

Buhid 1988 Edition

Language:
Country:
Publisher:
Copyright:
Last Updated: 2023-10-20
ID: 0cc6106f-6fbd-4322-8eff-783e606ae874
ISO: bku
ISBN:

MATIYO.....	4
MARKOS	35
LOKAS.....	55
HWAN	89
NAIBOLON	113
ROMA	144
1 KORINTO.....	158
2 KORINTO.....	171
GALASYA.....	180
IFISO	185
FILIPOS.....	190
KOLOSAS	194
1 TISALONIKA.....	198
2 TISALONIKA.....	201
1 TIMOTIYO.....	203
2 TIMOTIYO.....	207
TITO	210
FILIMON.....	212
HIBRIYO	213
SANTYAGO	224
1 PIDRO.....	228
2 PIDRO.....	232
1 HWAN	235
2 HWAN.....	239
3 HWAN.....	240
HODAS.....	241
NAFALAG	243

MATIYO

1 To in Kiristo Hisos manga hasokfonan gis hagarangan, gin Dabid fag Gorangon hasokfonan, ka yadi gin Abraham fag hasokfonan. 2 In Abraham anak is Isaak, in Isaak anak is Hakob. In Hakob manga anak is Hoda, hanggan it manga fadwasay. 3 Da Faris da Sara in Hoda manga anak san Tamar. In Faris anak is Isrom hanggan in Isrom anak is Aram. 4 In Aram anak is Aminadab, in Aminadab anak is Naason. In Naason anak is Salmon. 5 Is Boos in Salmon anak san Rahab, ginya madi is Obid in Boos anak san Rot. In Obid anak is Hisi. 6 In Hisi anak is Dabid kawan bali gorangon fag Dabid. Ginya madi is Salomon in Dabid anak san Oriyas babay hyabi. 7 Ginyan Salomon anak is Roboam. In Roboam anak is Abiyas. In Abiyas anak is Asa. 8 In Asa anak is Hosafat hanggan in Hosafat anak is Horan. In Horan anak is Osiyas. 9 In Osiyas anak is Hotan. In Hotan anak is Akas. In Akas anak is Isikyas. 10 In Isikyas anak is Manasis. In Manasis anak is Amos. In Amos anak is Hosiyas. 11 In Hosiyas manga anak is Hikoniyas hanggan it manga fadwasay. Gis nanya fag masohod ka manga taga Babilonya igpilit wagtaban in Israil manga ha sokfonan has Babilonya. 12 Nondiya has Babilonya, in Hikoniyas anak is Salatiyal. In Salatiyal anak is Sorobabil. 13 In Sorobabil anak is Abiyod. In Abiyod anak is Iliyakim. Ginyan Iliyakim anak is Asor. 14 In Asor anak is Sadok. In Sadok anak is Akim. Ginyan Akim anak is Iliyod. 15 In Iliyod anak is Iliyasir. In Iliyasir anak is Matan. In Matan anak is Hakob. 16 Ginya madin Hakob anak is Hosi, kawa ka nababay in Mariya fag Hosi. To fag is Mariya kan Hisos ina. To fag is Hisos kawasta faglwangon, in Diyos-natogon-Famawi. 17 It kahologan, gin Abraham balin Dabid, safolo ha ofat ik hasokfonan taw, ginya madi, gin Dabid balis tagpilit wagtaban in Israil manga hasokfonan taw has Babilonya, safolo ha ofat, ginya safolo ya-di ha ofat ik hasokfonan taw gistag pilit wagtaban has Babilonya balin Diyos-natogon-Famawi. 18 Kito is Kiristo Hisos nonsagaya. Is Mariya, kambali aba in Hisos ina, hanggan is Hosi, intohoyan talsawa aban. Dapat is Mariya danwa gabosog nyawa idyan saya in Hosi. To fag madolaw ka Maliyaw fag Falad nafatimawa. 19 Is Hosi, kan Mariya bato indoganon, mahoway, idwa kasayag fahaya in Mariya, yakanga hanya gayfan domayo lamang in Mariya, nyawadwa ha toltolan. 20 Is Hosi gisip wa gisip wa hanya baliwa. Ginya madi, sadi

ginan, hanya no matoyogan, nalag kagfon intam it anghil sadi. Ka anghil nalwang han Hosi kiti, Hosi, in Dabid hasokfonan, haw fag idwa kadalag dagos han Mariya, kawa hanya gabosog maskin ka Maliyaw fag Falad nafatimawa. 21 Ka anak nomsagaya aban, ama wan. Haw fangayanan hanya is Hisos, maskin hanya ka bomawi it sakop fag manga taw git manga ogali dwat. 22 To fagayo inlag kitonya kaarakitay im-anod in Diyos fwayong git fangampang kitay, 23 Fandog ngay, sadik dayaga kadya hansaya ama, imbali gabosog, ginyat anak nomsagaya ama wan. Ta lomwang, Tos Imanyowil, it kahologan, Is Diyos sawantam. 24 Ginyas Hosi nonfolaw, intanog kagfon intam it anghil fwayong, nataban wan Mariya, naano hanya. 25 Dapat is Hosi idyan saya in Mariya hanggan wansagaya ka anak dararag ama, kat nafangayan is Hisos.

2 Sawas banwa Bitlihim, sakop Hodiya, is Hisos nonsagaya. Gis nanya fag masohod, is Hirodis ka gorangon sas Hodiya. Ya mangharaw, ha akwa yadin bangkad manga fiyahin ik famaklay madonong, kawa ha nagadalan has fanggasan baliwa. Tanbangkad has banwa Hirosalim git banwanan sas salogan myanit baliwa. 2 Ta nondasog, ta gintaw wa gintaw wa kitay, Siday ka gorangon manga Hodyo ka bagon sagaya hyabi ogbot? Mi no sa hyami banwanan yapdi, sas salogan myanit baliwa, mi nalag it fanggasan. Yakanga hamin bangkad kaarakitay manlibabaan hanya. 3 Is Hirodis, ka gorangon, no nadog kitonya, nangalibitan it fangayofan, hanggan sadi wak dahonya Hirosalim kitonya yadi. 4 Is Hirodis nafatifon fagayo fagayo fag manga fagtahinan fagalan-han-Diyos, hanggan ka mangag faadal ka Batasan Hodyo, ginya naintaw has taw no siday mayon kan Diyos-natogon-Famawi, intam Gorangon, nomsagaya. 5 Ta nasagot kiti, Sas banwa Bitlihim, sakop Hodiya, hanya nomsagaya, maskin kiti in Diyos fangampang nasonat hyabi kitay, 6 Hanggan haw, banwa Bitlihim, san Hoda banwanan, Yatokitay im kangayanan ogbot man has manga banwa kanbantog sas sakop Hoda, Maskin giwa hyamo sadik Gorangon imbangkad Ka bomahala sangko sakop, in Israil manga hasokfonan. 7 Ginya madis Hirodis nafatawag ka manga famaklay madonong, kaarakitay tomwa no ginahin ka fanggasan nonlag, dapat idwag fadogon has iba taw. 8 Ginyas Hirodis nafalahaw has Bitlihim baliwa ka manga famaklay, dapat natogon yap kitay,

Ham fag hanya wan, sayakan fiya fiya ka anak. Ginya ham no nalag, fwayongan ya angko no siday tonya kaarakitay hanggan aho hanya wan, lomibabaan yadi hanya. ⁹ Ka manga famaklay madonong, no nadog ka gorangon togon, inlahaw ya ngawan. Sadi ya ginan ta nalag ka fanggasan kasta lagan sas salogan myanit baliwa itfagonan, yakanga tagbaya wa dahol dahol. Ginya ka fanggasan nagona ya ngay has taw hanggan wa tandasog. Ka fanggasan natorosan sas tongod oliyanan anak. ¹¹ Ginya ta nonsakbaw has basad balay, ka manga famaklay nalag ka anak san Mariya it ina akbang. Ta nanlibabaan hanggan nafasayagdog has anak. Ta nabongkat manga sohadan, ginya nadisag has anak, manga ginto, manga salong banglo kamangyan, hanggan tagok hayo mahalga, kawa mira. ¹² Ginya madi ka manga famaklay madonong natagimfan kitay, ha nafwayong, Ham hawag dalam han Hirodis no goli. Yakanga ta hawas iba dalam no nwali hat banwanan. ¹³ Ka manga famaklay madonong nonlahaw wan, is Hosi natagimfan ya ngay, nalag sadik anghil gintam Fon. Ka anghil iglwang, Kalibang, fakabangon wan, tabanan wa ka talanak has Ihipto. No baliday hodyag fwayong hyamo, ham hayap galin ginya, maskin is Hirodis igsayak ka anak kaarakitay fahatay hanya. ¹⁴ Yakangas Hosi dagos inbangon gis nanya, inlahaw wan, yabi yapdi, nataban ka talanak has Ihipto. ¹⁵ Ta sinya wak nadogayan hanggan is Hirodis nodya natay. In-anod kito kaarakitay fatonglos kagfon intam it fwayong git fangampang kitay, Ho nafatawag angko anak gis sakop Ihipto. ¹⁶ Is Hirodis no natwa kitay ka manga famaklay madonong nabohag odi, nabaybay wa hanya no goli, hanya kaisog wa dahol dahol. Yakanga nasogot manga sakop, natogon kitay, Fahatayan fagayo fag manga anak ama balis dowak fangaraw it kadogayan, hanggan wa ka bago sagaya sas banwa Bitlihim hanggan wa ka sas manga ligongan. Is Hirodis nafwayong kitonya maskin no naintaw gis manga famaklay madonong, taglwang kitay dowak fangaraw kantolas giwasta nalag ka fanggasan bago bago. ¹⁷ Yakanga in Hirimiyas, in Diyos fangampang nafwayong in-anod wan, noglwang kiti, ¹⁸ Sadik hasnog indog sas banwa Rama, igngongoy hanggan igrokyaw marigon. Is Rakil ka naoraw it manga anak, Fawa kalibang it fangayofan, Maskin it manga anak natay wan. ¹⁹ Ginya madis Gorangon Hirodis no natay wan, is Hosi natagimfan ya ngay sas Ihipto, nalag in Diyos anghil. Ka anghil nafwayong han Hosi, ²⁰ Haw fakabangon, tabanan ya ngay ka talanak has banwanan Israil, maskin ka manga kasayag fahatay ka anak hyabi natay wan. ²¹ Yakangas Hosi inbangon, ginya nafaoli ka talanak has banwanan Israil. ²² Dapat is Hosi no nadog kitay is Arkilao man ka natobos it ama is Hirodis, kanbali gorangon sas Hodiya, is Hosi kadala goli has banwa Bitlihim. Sadi ya ginan ha nafa-

tagak in Hosi basad tagimfan, yakanga hawas sakop Galiliya. ²³ Ginya da Hosi nabanwanan sas banwa Nasarit, kaarakitay faanod in Diyos fangampang fwayong kitay, Ta ngomayan hanya sadik taga Nasarit.

3 Gis nanya fag masohod, is Hwan, kagfatogna manga taw, indasog sas sakop Hodiya, sas basad fakahyabogan. Sinya no nafaadal bago bago. ² Hanyag lwang, Ham fag soyo, obonan yadi ka hayo manga ogali dwat, maskin ka gim tongod kaakbang wa kabali Gorangon. ³ Kawas Hwan iglwang kitonya, hanya kan Isayas, in Diyos fangampang, faglwangon no danwa ngap nafwayong kitay, Kiti kat nafwayong kagtawag marigon marigon sas basad fakahyabogan kitay, Fatalagaan in Diyos bato lahawan, Fahaslongan it manga dalan. ⁴ Gis nanya in Hwan rotay olad kamilyo mahalingan, anit yadit fagyahos, manga fan hanggan dyahot it fanganon. ⁵ Ka manga taga Hiroslim fagayo, hanggan fagayo gis sakop Hodiya, hanggan ka gis bali bali difay safa Hordan, nagobok in Hwan sinya. ⁶ Is Hwan nafatogna manga taw sas safa Hordan, hanggan ta nabayat sadili manga naogali dwat. ⁷ Dapat is Hwan noglag kaaywanon fag manga Farisiyo hanggan Sadosiyo gakbang ha hanya kaarakitay fatogna wan, is Hwan nalwang has taw, Ham bilang odi manga abyanon no madaya. Fakta kagfatagak hayo kitay ham fag lagyo wan gin Diyos fadosaan ka kadasog aban? ⁸ Fag hanggan wa hayo manga bohad ogali kagfalag kitay ham igsoyo. ⁹ Ham fag idwa kasyag kitay maskin ham in Abraham manga hasokfonan, ya fiya wan. Gwadi hogfwayong ha hayo kitay, gistay fag manga bato is Diyos syagan kalig in Abraham manga hasokfonan orongan. ¹⁰ Gis kati ginan ka wasay danwam hatak sas dalid hayo, omobang fagayo fagayo fag manga fon hayo kadwa fiyat manga bohad, omokas wa has basad afoy. ¹¹ Sas danom ho fatogna hayo, kawa tandaan kitay ham igsoyo, hanggan ham gobon yadi hayo manga ogali dwat. Dapat ka goyan angko, gingko ginanan, madonong man angko, sas Maliyaw fag Falad hanya no fatogna hayo, hanggan sas afoy. Ho kaya mandiya ngadit lapak. ¹² Hanya ha bitbit fanayang kaarakitay falayon fiya fiya it opa, manga ohot. Tomifon it tirigo sas basad dongdong, dapat ay, somonog wa ka manga ohot sas afoy kadwa kapsa. ¹³ Ginya madis Hisos indasog sas safa Hordan gis sakop Galiliya, naakbang han Hwan kaarakitay is Hwan fatogna nangos hanya. ¹⁴ Is Hwan nasanggala in Hisos, nalwang, Fag haw ngap nangos ka fatogna angko, dapat haw di ngap ka gakbang hangko. ¹⁵ Dapat is Hisos nasagot kiti, Kati fag masohod faangayan wangko, maskin to fag im-anod kaarakitay in Diyos kafangayofanan imtonglos wan. Yakangas Hwan nafaangay wan. ¹⁶ Is Hwan nontabo wa ngag fatogna in Hisos, is Hisos hawas dayo danom. Ka manghara banwa sam tongod inboklas wan, ginyas Hisos nalag

in Diyos Falad kitos salompati kayokfo ha hanya gis tongod. ¹⁷ Ginya ha nahampang gin Diyos banwanan sam tongod, nalwang, Tongko fagalwasiyon fag Anak, hogloba wa dahol dahol hanya.

4 Ginya madi ka Maliyaw fag Falad nataban in Hisos has basad fakahyabogan, kaarakitay is Fandaya somolay faloksowan hanya. ² Ofat ik safolok yabi hanggan ofat ik safolok sirang is Hisos idwa ha nahwan hanon, yakanga kalonos wa dahol. ³ Is Fandaya kagsolay hanya nondasog, nalwang han Hisos, Haw non Diyos wa nga Anak, haw fabaliyan nangos tinapay to fag manga bato. ⁴ Dapat is Hisos nasagot, Insorat kitay, Bohondi ka fanganon kagfaboyag manga taw, Dapat fagayo fag manga hampang gin Diyos bibig kagfaboyag manga taw. ⁵ Ginya madis Fandaya nataban in Hisos has baba atop Fanimbaan-Dahol, abwat abwat sas Hirosalim, ka banwa kantoheyon han Diyos. ⁶ Hanyag lwang han Hisos, Haw non Diyos wa nga Anak, fadagdagan nangos hyamo ham daga, is baba daga, maskin insorat kitay, Hanya tomogon it manga anghil kitay, ta fag omano hyamo, insorat yadi kitay Ta somambot di hyamo kaarakitay im bitis idwam iktan has bato. ⁷ Is Hisos iglwang hanya, Insorat yadi kitay, Haw fag idwag tikis igsolay kagfon hyamo, hyamo Diyos. ⁸ Ginya madi, sadi ya ginan is Fandaya nataban in Hisos ha baba fongso abwat abwat, sas fakabantayan, nafalag hanya ka manga gorangon sakop fagayo fagayo sadik dahonya baba daga, hanggan ista manga kaakwaan sinya. ⁹ Is Fandayag lwang han Hisos, Haw no ha ngangkok manlibabaan hanggan somimba, ho domisag wa hyamo to fagayo fagayo hyamo lagan. ¹⁰ Is Hisos nasogo in Fandaya, nalwang, Satanas, haw fag idwastay, haw fag lahaw wan, maskin insorat kitay, Fag is Diyos kagfon hyamo kam fagfasayaon igdog, Fag in Diyos lamang sogo kam fakatanogon. ¹¹ Ginyas Fandaya naobon in Hisos. Manga anghil inbangkad, natogbong hanya. ¹² Ginya madis Hisos nadog kitay ta nafaporiso in Hwan, yakanga nwali has sakop Galiliya, ¹³ dapat nabanwanan sas banwa Kapirnaom, idwa sas banwa Nasarit. Ka banwa Kapirnaom sas gobang linaw dahol, linaw Galiliya, sas bahalan manga banwanan Sabolon hanggan Niptali. ¹⁴ Yakangan Isayas, in Diyos fangampang fwayong in anod wan, kitay, ¹⁵ Ka banwanan Sabolon hanggan ka banwanan Niptali Has dagat baliwa sas difay Hordan, Ka bali Galiliya ka banwanan manga Hintil, ¹⁶ Ka manga taw sinya fag manga banwanan Sawas basad fakaharoman hyabi, Dapat, no dogay wan, taglag yawa masilaw. Kati to fag yawa yomawa Has fagayo ka hyabi maayfanan odi daga gohom kahatayan. ¹⁷ Ginya ginan is Hisos nafaadal has taw, iglwang kiti, Ham fag soyo wan hanggan obonan hayo manga ogali dwat, maskin ka gim tongod kaakbang wa kabali Gorangon. ¹⁸ Ginya madi, aban ogbot, is Hisos nogdalan sas ba-

halan linaw dahol, tagngayan tonya fag linaw Dagat Galiliya, is Hisos nalag dowak ama, is Simon, kawasta faglwangon is Pidro, hanggan it fadwasay is Andris. Gis nanya ta gokas it manga sarap ha basad linaw, maskin pariho fangoyang fag manga taw. ¹⁹ Is Hisos nalwang has taw, Ham tahinan wangko, ho fabali hayo manga fangiktan manga taw. ²⁰ Ginya ginan ta nadagos wa naobon it manga sarap, natahin wan Hisos. ²¹ Ta noglahaw wan, is Hisos nalag yadi inda Santyago da Hwan, dowasay, in Sibidiyo manga anak, sas basad baloto, gofodan hat ama. Tagsip it manga sarap. Is Hisos natawag wa ka dowasay. ²² Ta dagos wa naobon it baloto hanggan it ama, ginya natahin wan Hisos. ²³ Is Hisos nafahaskat sadik dahonya sakop Galiliya, igfaadal sas basad manga fanimbaan Hodyo, natoltol yadi ka Fiya fag Barita kawa han Diyos sakop baliwa. Igfafiya yadi ista manga sagit fagayo, hanggan ista manga fagdogon mahori. ²⁴ In Hisos ibolon kabantog wan sa sadik dahonya sakop Siriya. Yakanga ta nadiya han Hisos fagayo ka manga ha sagit, hanggan kasta manga fagdogon mahori bokod bokod, ka manga ha labang kagfapaong hasta sadili, ka manga kalobay, hanggan ka mangadwa syagan kimot no kasagit. Is Hisos nafafiya lamang fagayo. ²⁵ Yakanga kaaywanan wa fag manga taw gis sakop Galiliya, gi yadi sadik layonan ka ha safolok banwa, gis banwa Hirosalim, gis sakop Hodiya, hanggan kawa gis difay Hordan naoyan wan Hisos.

5 Is Hisos noglag manga taw bilang wa tigasaw it kaaywanan, is Hisos hawas baba moyod. Is Hisos no natokaw sinya, it manga katogbong naakbang yadi hanya, ² ginyas Hisos nafaadal has taw kiti, ³ Ka mangadwa ha takan bomaya wan, maskin in Diyos sakop is taw wan. ⁴ Ka ha karongkotan bomaya wan, kawas Diyos igfalibang ista fangayofan. ⁵ Ka manga mahoway bomaya wan, maskin ta omafo in Diyos nato-gon fagayo. ⁶ Ka manga gwayan wa kasaya katanog in Diyos fakasayaon, bomaya yadi wan, maskin im-anod wa kasta fakasayaon. ⁷ Ka manga maawaon bomaya wan, maskin is Diyos im-awa yadis taw. ⁸ Ka manga maliyaw it fangayofan bomaya yadi wan, maskin ta lomag in Diyos. ⁹ Ka mangag faamigosan ya has manga gawayan bomaya wan, maskin is Diyos lomwang kitay tonya fag manga taw it manga wa anak. ¹⁰ Kasta manga fagfahoriyon kawa ta no katanog in Diyos kafangayofanan bomaya wan, maskin ta omofod in Diyos san Diyos sakop aban. ¹¹ Manga taw nogyod hayo, mangag fahoriyan hanggan igfadwat odig dog hayo, maskin aho ka hayo fagalwasiyon, ista manga hampang dwat sonson wa bohag, idwa ha fakaanodan, ham bomaya wan. ¹² Fag masolong di hayo fangayofan, fag idwa kabalaw, kawa dahol hayo tanggapon fasalamat aban san Diyos banwanan sam tongod. Kitonya yadi kasta naibolon hyabi ta nogfahoriyan in

Diyos manga fangampang ka nagona hayo. ¹³ Ham bilang wa asin istay is baba daga. Dapat ka tamis nonbol wan gis asin, kinda odi nogfatamis ya ka asin, ham gayfan? Fawa ha fakinabang tonya fag asin, ta omokas odi, manga taw lomid lamang. ¹⁴ Ham bilang yadi wa salong istay is baba daga. Idwa ha syagan tomago sadik banwa, ka banwa no sas baba moyod. ¹⁵ Idwa ha taw igsonog salong ginyag fwalid sas daga gantangan. Yatokitay, fag sawa ngap is salangan fiya fiya nogsalifit ka salong, kaarakitay yomawa has fagayo sadi wak dahonya basad balay. ¹⁶ Ham fag kitonya yadi, ham fag fayawa yadi hayo salong sas faglagan manga taw, kaarakitay ta lomag hayo fiya fag ogali, ginya ta mamasayag dog yadi hayo Ama sat banwanan sam tongod kitay, hanya kafiyaon. ¹⁷ Ham fag idwa gisip kitay honbangkad hastay kaarakitay iglaban ka manga Batasan Hodyo, hanggan in Diyos manga fangampang adal hyabi. Yatokitay, maskin honbangkad hastay kaarakitay ho fatonglos tonya fagayo. ¹⁸ Ham fag matohodan kitay ka banwa sam tongod hanggan ka daga imliyam di aban, dapat ngadi ogbot ogbot fag bagay sas Batasan Hodyo idwam liyam it karigonan, tonya nodyan anod fagayo. ¹⁹ Yakanga nyawa faktaw kagfabali idwa ha kahologan ngadi sadik ogbot fag bagay gis Batasan Hodyo, hanggan igfaadal has taw kitonya, is Diyos igfatimbang hanya libaba man has fagayo it kangayanan sat sakop sam tongod. Dapat ay, ka katanog ka manga Batasan Hodyo fagayo, hanggan igfaadal kitonya has taw, is Diyos iglwang kitay, abwat it kangayanan sat sakop sam tongod. ²⁰ Maskin hogfwayong hayo, no kito odi ka mangag faadal Batasan Hodyo hanggan manga Farisiyo ham no katanog in Diyos kafangayofanan, ham idwam aktom hat sakop sam tongod. ²¹ Ham nadog kitay hyabi ta natogon has taw, Haw fag idwag fahatay taw. Nyawa faktaw nogfahatay taw, ka fangabaya mamatohoyan hanya has fadosaan. ²² Dapat kati kangko fagfwayongon ha hayo, ngadi ka gisog it fadwasay, ka fangabaya fatohoyan hanya hat fadosa. Kagyod dit fadwasay, ka manga ha kangayanan Hodyo sasta Fanoltolan fatohoyan hanyat fadosa. Hanggan nyawa faktaw noglwang hat fadwasay, Paong paong haw, ngandayo imtohoyan has fadosaan manga taw sas afoy. ²³ Yakanga haw no ha diya fagdisagon fangafiyan han Diyos, dapat igtohod kitay im fadwasay ha fakahoriyon ha hyamo, ²⁴ obonan yap im disagon sas dayo fanogban. Ha fag hayap im fadwasay, haw famatohoyan yap hanya fiya fiya. Ginya ara ha fakafwali ya, fag bago domisag im disagon han Diyos. ²⁵ No hagsombong ha hyamo has fangabaya, famatohoyan yap hasagsombong, ha no somyagan di, haw nodya sas fagdogan fangabaya. Maskin haw nodwa syagan igfatohoyan, ta domiya wa ara hyamo has fangabaya. Ginya ka fangabaya ka domisag hyamo hasag bantay

porisowan, ginya madi hamporiso wan. ²⁶ Hogfwayong hyamo hadwa malfas ginya aban, haw nodya nabayad hanggan wa kat kahaminan fag saga. ²⁷ Ham nadog kitay ta natogon has taw hyabi, Haw fag idwag fabayowan. ²⁸ Dapat kati hogfwayong ha hayo kitay, nyawa fakta fag ama kagbantay has ina, ha fangayofan wa kasaya hanya, sat fangayofan nafabayowan wa hanya fag ina. ²⁹ Nom mata kagtaban hyamo has ogali dwat, sowatan lamang im mata ginya okasan wan. Maskin im habilogan it baliw nomliyam, tonya fiya man has habilogan sadi wak dahonya nom hadasogan has fadosaan manga taw sas afoy. ³⁰ Nom gamat man kagtaban hyamo has ogali dwat, lifongan wam gamat, ginya okasan wan. Maskin im habilogan it baliw nomliyam, tonya fiya man has habilogan sadi wak dahonya, not hadasogan has fadosaan manga taw sas afoy. ³¹ Ka Batasan Hodyo gin Mwisid nalwang yadi kitay, sadik ama no gobon it babay fag ha kasoratan kitay hanya nadayo wan. ³² Dapat kati hogfwayong ha hayo, ka ama no gobon it babay, nyawat babay idwa ha nafabayowan, ginya kat babay omindogan iba ama, kawat indogan gona ka ha dwat, maskin igfangolo it babay hasagfabayowan baliwa. Hanggan nyawa fakta fag ama ka bomabay ista nagobonan fag ina, tonya fag ama igfabayowan yadi wan. ³³ Ham nadog yadi kitay ta natogon has manga taw hyabi hyabi, haw nogtangkod marigon kitay haw ha togon bato ibolonon, haw fag fatonglos kam natangkod san Diyos fagdogan. ³⁴ Dapat kati hogfwayong ha hayo, ham fag idwag faaywanon hampang ha no ha tangkod. Ham fag idwag lwang, In Diyos banwanan sam tongod fadi wadagdog angko hampang, maskin kat banwanan sam tongod in Diyos wa fanokawan gorongan. ³⁵ Fag idwa yadig tangkod wa kitay, Ka daga fadi wadagdog angko hampang, maskin ka daga in Diyos wa lidan bitis. Fag idwa yadig lwang kitay, Ka banwa Hirosalim fadi wadagdog angko hampang, maskin ka Hirosalim ka Dahol fag Gorongan it sadili banwa. ³⁶ Haw fag idwa yadig lwang Nyawa aho matay wan, maskin no kadi haw, hadwa syagan igfabanonan, mangag fahasding im bok alfoyo ngadi sadik ogat. ³⁷ Fiya wam fwayong, hawag dogang ya domwag, no ala, fag lwang ala wan, nodwan, fag lwang idwan. Maskin no ha dogang yat tangkod giwas kadwatan tonyat fagfonan. ³⁸ Ham nadog kasta fwayong kitay, No mata man di kasta nafadwat, ta fag gomanti, domwat mandi ista mata. No ngifon, ngifon mandi kasta fagfadwaton. ³⁹ Dapat kati hogfwayong ha hayo, ham fag idwag laban ka dwat fag taw. No hagtoga hyamo marigon balis sihon fag faringfing, fag hanggan wa ka balis wala. ⁴⁰ No hagsombong hyamo hasagtalinga hampangan kaarakitay igbolay im balokas, disagan yadi wa hanggan kam rotay ka aba aba. ⁴¹ No hagfafasan hyamo it diya sadik liho, fasanan dowan man ik liho. ⁴² Disagan

hasagsagad gi hyamo, fag idwa kwangit ka manga goyam hyamo. ⁴³ Ham nadog kasta manga fwayong hyabi, Haw fag kaawa im manga fakilalaon dapat fag kaisog im manga kaaway. ⁴⁴ Dapat to yadi kangko fwayong, Ham fag kaawa hayo manga kaaway, ham fag darangin yadi kawa has mangag fahoriyan hayo, ⁴⁵ kaarakitay ham imbali hayo Ama manga anak orongan, hayo Ama ka sat banwanan sam tongod. Maskin hayo wa Ama ka sat banwanan sam tongod kagfasalog ka myanit has manga dwat fag manga taw hanggan has fiya. Hayo yadi wa Ama kagfahwayan has manga taw kantoheyon hanya, hanggan has manga taw ka kafang hanya. ⁴⁶ No ka lamang manga kaawa hayo, ka hayo fakaawaon, kana ka hayo fagfanayaon fasalamat aban, ham gayfan? Idwa awkin kitonya yadi kat ogali ka manga fanohot bohisi? ⁴⁷ No ka odi hayo manga fadwasay ka hayo fakampangon mahoway, kana ka hayo ogali ka fiya man has taw? Ka manga Hintil, kadya kilala in Diyos, kampang mahoway no hadit manga fadwasay. ⁴⁸ Yakanga hayo manga ogali fag kabali fiya wa malayon, kito yadi ka hayo Ama sat banwanan sam tongod no fiya wa malayon.

6 Ham fag matohodan kitay ham no gogali fiya, fag bohonwa kitay famalagon odis taw. No famalagon odis taw, ham idwa ha tanggapon fasalamat gi hayo Ama ka sat banwanan sam tongod. ² Yakanga, haw no kasayag disag has myabog, haw fag idwa gawang has fakaaywanan, kito kasta ogali ka manga ha takan nogfadog sas fanimbaan, hanggan sayo basad karsada. Kitonya ista ogali kaarakitay manga taw mamasayag dog ha hanya. Hogfwayong hayo ta natanggap wat fasalamat. ³ Dapat haw nogdisag has myabog, sakwag fadog nyawa kawa kam fakilalaon fiya fiya, ⁴ kaarakitay bohonwa famalagon odis taw haw nogdisag has myabog. Ginya madi hyamo Ama kaglag hyamo ogali fiya, haw no nadisag kitonya, domisag fasalamat ha hyamo. ⁵ Ham nogdarangin, ham fag idwag sokfon ka ogali manga ha takan. Ta nogdarangin, ista fakasayaon, ta fag malindogan sas fanimbaan, ngatay sas basad fagsalahan karsada, maskin famalagon odis taw. Hogfwayong hayo ta natanggap it fasalamat. ⁶ Dapat haw nogdarangin, haw fag sakbaw ham basad balay, fag tahop wan. Ginya madi haw fag darangin ha hyamo Ama kaglag hyamo, nyawa hadyapdi nalag hanya, ginya hyamo Ama domisag yadi ha hyamo fasalamat, kawa fiya kam naogali nogdarangin, bohonwa famalagon odis taw. ⁷ Ham nogdarangin ham fag idwag faaywanon hampang kito kasta ogali manga Hintil. Ta gayfan kitay ista fagsyagon domog wan kawasta hampang kaaywanon. ⁸ Ham fag idwag sokfon is taw kitonya. Maskin ham nodyag sagad gi hayo Ama, hanya danwa twa no kana ka hayo kakorangan. ⁹ Yakanga fag kiti ham nogdarangin, Hyami Ama ka sawam banwanan sas ton-

god, Hyamo ngayan bohonwa fagswayon. ¹⁰ Haw fag kabali hari, kagsakop has fagayo. Im kafangayofanan fag kaanod fagaba istay is baba daga, no kinday no fagaba kaanod sam banwanan sam tongod. ¹¹ Disagan nangos ha hyami hyami fanganon ka homosto tango-na fag sirang. ¹² Haw fag faliyam hyami manga naogali dwat, no kinday hami nogfaliyam ista naogali dwat ha hyami. ¹³ Fag idwag faakbang hyami has manga dwat kaarakitay igsolay hyami, Dapat bawiyon hyami gin Santanas. (Maskin haw wa ka Hari kagsakop fagayo, haw kadwa ha bosal, sawa hyamo yadi ka kafiyon, nyawa ginahin. Fag kitonya wa ngay.) ¹⁴ Maskin ham nogfaliyam ista manga naogali dwat ha hayo, hayo Ama sat banwanan sam tongod, mamaliyam yadi hayo manga ogali dwat. ¹⁵ Dapat ham nogbotang yapdi ista manga naogali dwat ha hayo, hayo Ama idwa yadi faliyam hayo manga naogali dwat. ¹⁶ Ham nodwa kwan hanon kaarakitay mandarangin, ham fag idwag falagon kitay ham roko-roko kito ka manga taw kagfalagon odis taw. Tadwag fafiyanon it habilogan kaarakitay manga taw tomwa kitay tadwa kwan hanon gis nanya fag masohod. Hogfwayong ha hayo ta natanggap it fasalamat. ¹⁷ Nyawa haw idwag yafon, idwag yabas kaarakitay mandarangin, haw fag fafiyanon im habilogan, im bok fag masorodan di, fag yamos yap im mata, ¹⁸ kaarakitay manga taw idwa kadolaw kitay hadwa kwan hanon. Im Ama kaglag hyamo, nyawa hadyapdi nalag hanya, hanya lamang ka nalag kitay haw gibolon kitonya, gogali fiya, bohonwa famalagon odis taw, hanya ka domisag fasalamat ha hyamo. ¹⁹ Ham fag idwag tifon kaakwaan istay sas baba daga, maskin ha manga tipakong kagat, ha manga aningga kwan yadi, ha akwa yadi manga fangnahaw igsakbaw. ²⁰ Ka fiya, ham nogtifon hayo kaakwaan, fag san Diyos banwanan sam tongod, maskin sinya idwa ha tipakong homagat, idwa yadi ha aningga, idwa yadi ha fangnahaw igsakbaw. ²¹ Maskin no sidak mabotangan hayo kaakwaan, hayo fangayofan sinya yadi wak maisipan fagaba. ²² Ka mata ka bilang wa salong sas haboyagan. Yakanga im mata no fiya, igfayawam haboyagan sadi wak dahonya. ²³ Dapat im mata no dwat, im haboyagan sadik dahonya inbali yadi wa marom. Yakanga ka yawa sa hyamo no marom mangharaw, marom wa dahol dahol tonya. ²⁴ Idwa ha taw syagan igfasohodan katanog has dowag kagsogo hanya. Matohoyanan ha fagfiliyon, ngatay kawilit fon sadi, ngatay kadwat iglag kat fadowa, ngatay katanog fiya fiya ka sadi, dapat igfasigpala wa kat fadowa. Ham idwa syagan katanog in Diyos hanggan has kaakwaan igsohodan. ²⁵ Yakanga hogfwayong ha hayo, ham fag idwa galibitan hayo fanganon hanggan inomom kaarakitay ham imboyag, ngatay hayo rotay bato solongon. Idwa awkin ka haboyagan bohondi kitos fanganon no mahalga, ham gayfan, hanggan ka ha-

bilogan bohondi kitos rotay? ²⁶ Fanlag ngay, ham bantayan ka manga manok, idwag famgas, idwa yadi gani, idwa yadi ha tifon basad dongdong, dapat ay nyawa kitonya, hayo Ama sat banwanan sam tongod kagfahwan di ka manga manok. Gwadi ham bohondi kitos manga manok ik mahalga. ²⁷ Fakta fag taw sa hayo syagan igfadogay it haboyagan sas baba daga, ngadi sadik tama sinyahod kawa no galibitan, ham gayfan? ²⁸ Kana ham no galibitan hayo solong rotay? Yabay ka manga borahan igborak basad talon, gwadi tonya idwag bonang, idwa yadi kalig rotay. ²⁹ Dapat hogfwayong hayo, nyawas Salomon igsolong it rotay fiya man has fagayo, ka sadik borahan fiya man inyak kabantay, idwa ha matoga. ³⁰ Is Diyos no bilang wagfasolong rotay kafiyaon kabantay has manga lamnon, ka kati malangba basad talon, dapat ay, no marom ngandayo imsonog lamang, idwa awkin labi man is Diyos wa ka farotay hayo? Laya ogbot yapdi ham nogsyag hanya. ³¹ Yakanga ham fag idwa galibitan hayo fanganon, hayo inomon, hayo manga solongon rotay. ³² Maskin tonya fag manga bagay ka manga Hintil fagalibiton. Hayo Ama sat banwanan sam tongod fadi wadtwa kitay korang yadi sa hayo ham nodwa ha akwa tonya fag manga bagay. ³³ Bago bago ham fag fasakop fiya fiya han Diyos hanggan fag katanog it manga fwayong, ginya madi ham tomanggap yadi tonya fag manga bagay fagayo. ³⁴ Yakanga ham fag idwa galibitan ka manga bagay ka bago marom. Nomdasog sa sadik bago marom, gis nanya yabay, bago mangisip kitay kinda odi kati. Sa sadik sirang it fagisipon hosto wan.

7 Ham fag idwa gato fagaba hayo kapariho kaarakitay is Diyos idwa yadi gato hayo. ² Maskin no kinday ham no gato is taw, kitonya yadi is Diyos no gato hayo. No kinday hayo gantangan has taw, kitonya yadi is Diyos no gomantang ha hayo. ³ Kana mayon haw nogbantay ka rokrok sam fadwasay basad mata, dapat hagfabayaan ka sa hyamo sadili mata bilang wa dahos batang? ⁴ Kinda araw haw no lomwang ha hyamo fadwasay, ho nangos bomol ka rokrok gi hyamo mata, dapat sa hyamo, ya manghara, ha akwa yadi daho was batang? ⁵ Hagfataka odi, gwadi bol yap ka daho was batang ka sa hyamo sadili mata, ha bago di lomag fiya fiya, ginya madi ha tomwa bomol ka rokrok gim fadwasay mata. ⁶ Ham fag idwag disag has ido ka manga bagay kantohoyan han Diyos, ngandayo ka ido bomantay araw, ngomarngar ha hyamo. Ham fag idwa gokas has baboy hayo ono bolawan, ngandayo lomid odi tonya. ⁷ Ham fag sagad, ginya ham tomanggap hayo fagsagadon. Ham fag sayak a, ham lomag wa ka hayo fagsayahon. Ham fag sagam gi dayo balay, ginya ta fasakbaw hayo. ⁸ Maskin fagayo kagsagad tomanggap wa kat fagsagadon, fagayo kagsayak lomag wa kat fagsayahon, hanggan fagayo kagsagam gi dayo balay, ta fasakbaw wan. ⁹ No tinapay ka hayo anak

fagsagadon, ham awkin domisag bato? ¹⁰ No oyang man kat fagsagadon, ham awkin domisag abyanon? ¹¹ Gwadi no ham, nyawa kitay hayo manga ogali idwa fiya, ham idwag disag ha hayo manga anak kadwa fiya hanon, idwa awkin bohondi kitonyak mahoway hayo Ama ka sat banwanan sam tongod? Fiya fag manga bagay kat fagdisagon has mangag sagad gi hanya. ¹² No kinday hayo fakasayaon ista ogaliyon ha hayo, ham fag gogali yadi kitonya ha hayo manga kapariho. Kitonya yadi ka Batasan Hodyo it manga kahologan hanggan in Diyos manga fangampang adal hantam. ¹³ Ham fag danwag sakbaw has ogbot fag sakbawan alad, maskin dahol ka sakbawan hanggan gorangon ka dalan ka hawas kadwatan, aywan kaglahaw hanya. ¹⁴ Dapat ay, ogbot ka sakbawan, mahori yadi ka dalan ka hadasogan has haboyagan, hanggan sayok di kaglag ka ogbot fag dalan. ¹⁵ Ham fag matagahan ka manga bohagon fag manga fangampang. Magop wan no kalag di, ta nombangkad ha hayo, bilang manga topa, dapat ka orongan sasta basad fangayofan kitos ido maisog gi basad talon. ¹⁶ Ham lomag wat manga ogali no kinday. Tam awkin igfangta bohad obas gis lamnon madogi, ngatay bohad igos gis fon haya-haya, ham gayfan? ¹⁷ Ka fon hayo no fiya, igbohad yadi fiya, dapat ka fon hayo no dwat mandi, igbohad mandi dwat. ¹⁸ Maskin ka fiya fag fon hayo idwa somyagan bomohad dwat, kitonya yadi ka dwat fag fon hayo idwa somyagan bomohad fiya. ¹⁹ Fagayo fag fon hayo kadwag bohad fiya, ta omobang lamang a, somonog wan. ²⁰ Yakanga ham homilala ka manga bohagon fag manga fangampang git manga bohad ogali. ²¹ Idwa fagayo kagngayan angko, Angko Fon, ka somakbaw han Diyos banwanan fag sakop sam tongod aban, dapat ka katanog lamang angko Ama sas tongod it kafangayofanan ka somakbaw sinya. ²² Ka mahalga fag Sirang nomdasog aban, aywan ka lomwang hangko, Hyami Fon, gwadi mi namaadal yadi has taw im hampang, mi nafalagyo yadi ka manga labang, mi naibolon yadi manga madolaw sa hyamo ngayan karigonan. ²³ Dapat ho lomwang has taw, Nyawa ginahin hodwa nahilala hayo. Ham fag ayayo ginko, ham ka manga gogali dwat fagaba. ²⁴ Yakanga fagayo kagtalinga angko manga hampang to, hanggan katanog, kito yadi ka sadik taw madonong, ka nahalig it balay sas baba bato. ²⁵ Nahwayan dahol, nabaha ya ngadi, nabagyo yadi marigon, nabakbak ka balay, dapat ay, ka balay idwa nakfo maskin in-ganit sas baba bato. ²⁶ Dapat ay, fagayo fag manga taw kagtalinga angko manga hampang dapat idwa katanog, kito sadik taw, bilang odig bongol, kalig it balay basad odi onay. ²⁷ Nahwayan dahol, nabaha ya ngadi, nabagyo yadi marigon, nabakbak ka balay. Ka balay nakfo lamang, insarowayan wan. ²⁸ Is Hisos nontabo wagtoltol kitonya, ka manga taw indolaw it manga fway-

ong, ²⁹ maskin is Hisos nogfaadal matohoyanan wan, kitos sadik taw ha kangayanan, idwa kito ka mangag faadal Batasan Hodyo.

8 Is Hisos nondasog has lwad gis baba moyod, aywan fag manga taw naoyan hanya. ² Yakanga sadik taw ha sagit kitong naakbang hanya, nanlingkohodan sat atobangan, iglwang, Ama, haw no kasaya di, haw fadi wad somyagan igfafiya angko sagit. ³ Is Hisos natawid hanya, ginyag lwang, Ho kasaya ngay, haw fag imfiya wan. Ginya madit kitong dagos wanfiya. ⁴ Is Hisos natogon ha hanya kitay, Hawag fwayong nyawa haday fag manga taw, dapat fag hayap has fagalan-han-Diyos, fabantayan hanya im habilogan. Ginya madi ha disagan kan Mwisid natogon bato disagon bilang faorongon has taw kitay haw infiya wan. ⁵ Is Hisos no hawas basad banwa Kapirnaom, sadik fagtahinan sondalo taga Roma naakbang hanya, nalwang, ⁶ Ama, angko sogowan idwa syagan kimot. Hanya sinya dik maigyanan sa hyami balay, kahori wa dahol dahol it sagit. ⁷ Is Hisos iglwang, Tam hanya wan, ho fafiya hanya. ⁸ Dapat ka fagtahinan sondalo nasagot, Ama, ho kaya wa hyamo, nyawa hadwam dasog hangko balay. Haw fag lomwang lamang kitay, angko sogowan fag imfiya, ginya madi im-anod wan. ⁹ Kawa aho sadi yadik taw kagfasakop has manga abwat fag kangayanan, dapat ay, aho ha fagsogoon yadi manga sondalo. Aho noglwang ha sadi, Ha fag hanya wan, yakanga hanyan tanog wan. Aho noglwang ha sadi ya, Haw fag hastay, hanyam bangkad wan. Aho noglwang hangko nasali sogowan, Haw fag gibolon to, hanya omibolon wa tonya. ¹⁰ Is Hisos no nadog it hampang, indolaw wan, nafwayong has manga taw ka goyan hanya kitay, Hogfadog ha hayo, hodya ha donggon no kitay iba taw kitonya wa kagsyag angko marigon, nyawa sawan Israil manga hasokfonan. ¹¹ Ho danwag fatagak hayo kitay, aywan kambangkad aban gis salogan myanit hanggan sangdayan myanit baliwa, manayowan san da Abraham da Isaak da Hakob, san Diyos sakop fanganan sat banwanan sam tongod. ¹² Dapat aywan in Israil sakop fag manga hasokfonan im-okas lamang has basad marom sas sokayan, sinya ta mangodgorawan wan hanggan wasta ngifon di mangarigitan wan. ¹³ Ginyas Hisos nalwang has fagtahinan sondalo, Nyawa ha goli wa kati, maskin hagsyag wa fiya fiya angko, im-anod wan kam fagsagadon gingko. Gis nanya yadi fag masohod ka fagtahinan sondalo sogowan nonfiyat sagit. ¹⁴ Is Hisos nonsakbaw san Pidro basad balay, nalag in Pidro nongang ina sinya, maigyanan kagnaw. ¹⁵ Is Hisos natawid ka ina it gamat. It hagnaw dagos wanfiya, ginya ka ina inbangon, ogali man di, igtogbong in Hisos. ¹⁶ Ginya madi araw no kayabi wan, ka manga taw nataban han Hisos aywan ka ha manga labang igfahoriyan is taw. Sadi lamang ik hampang is Hisos nafaalin ka manga

labang, nafafiya yadi fagayo ka ha manga fagdogon. ¹⁷ Is Hisos naibolon kitonya kaarakitay in Isayas, in Diyos fangampang fwayong im-anod wan, noglwang kiti, Hanya nabol intam manga kagomowan, Nadiya yadintam manga fagdogon. ¹⁸ Is Hisos noglag kaaywanon ka manga taw sat ligongan, hanya nasogo hat manga ofod kitay, tam ara domifay wa has difay linaw. ¹⁹ Araw araw ogbot, sadi kagfaadal ka Batasan Hodyo naakbang han Hisos nalwang, Haw kagfaadal, ho tomahin yadi wa hyamo, nyawa ha hadawan. ²⁰ Is Hisos nasagot hanya, Ka manga ido maisog ha oliyanan basad lohib, ka manga manok ha fogad yap man, dapat ay, aho, Kanbali Taw, idwa ha toyogan, idwa ha fahowayan. ²¹ In Hisos katogbong sadi iglwang, Angko Fon, ha faoliyan yap dingko, ho manlobgob yap angko ama. ²² Dapat is Hisos nafwayong hanya, Ha tahinan wangko, fabayaanan yapdi ka manga mahatayan, ta bahala waglobgob it sadili kapariho ka natay. ²³ Araw is Hisos no nasahay was baloto, it manga katogbong natahin yadi wan. ²⁴ Yabay araw nabagyo dahol dahol baba danom, taob di godgoyanan wan myasa wa dahol sas baba linaw, ka odi kitay idyag tabon ka baloto. Dapat gis nanya is Hisos matoyogan di. ²⁵ Yakangat manga katogbong hawan Hisos, nafolaw hanya. Taglwang, Hyami Fon, hyami Fon, kalibang kalibang, togbongan hyami, tam kalogom wan ha daga danom. ²⁶ Ginyas Hisos iglwang, Kana mayon ham no kadala? Yabay ham idwa bangan igsyag angko. Ginyas Hisos inbangon wan, nangabaya ka bagyo hanggan taob. Yakangan tohas ya ngawan ka danom, inhalyaw ya fiya fiya. ²⁷ Yakanga ta fagayo indolaw waglag, taglwang, Kana wa to fag taw? Nyawa bagyo, manga dagat, katanog it fwayong. ²⁸ Da Hisos nondasog sas difay sas banwanan manga taga Gadara, ha dowak ama gis manga lohib fanlobgobanan taw natagbo in Hisos. Ka dowak ama ha manga labang kagfahoriyan hanya, maisog ya ngadi, yakanga ka manga taw kadala wagdalan sinya. ²⁹ Ginya madi ka dowak ama ha labang, dagos wa narokyaw, iglwang han Hisos, Haw in Diyos wa Anak, haw fag idwag mawat hyami. Haw awkin inbangkad hastay kaarakitay igfahoriyan hyami nyawa idyapdin dasog gis nanya hyami fadosaan? ³⁰ Idwa ayayo bangan ginya ha sadik tifonan baboy ayo ayo, kwan manga lamnon. ³¹ Ka manga labang igsagad in Hisos kiti, Haw nogfaalin hyami gis taw, faangayan nangos hyami, sogowan wa hyami has nwa fag manga baboy ayo ayo. ³² Is Hisos iglwang, Soggi, ham fag hanya wan. Yakanga ka manga labang nalin wa gis taw, hawas basad manga baboy. Ginya ka manga baboy dagos wa nandalandanan madali has lwad indahodan has basad linaw dahol, fagayo inlimos wan. ³³ Ka manga gano tifonan baboy nalagyo wan hawas banwa, nafadog has taw fagayo kat lagan hanggan no kinday ka manga ama ka ha labang

haraw. ³⁴ Yakanga ka manga taga banwa, sadi wak kayonya manga taw, nagobok in Hisos. Ta no nalag hanya, ta garonganon igsogo hanya gista banwanan.

9 Yakanga da Hisos nasahay wa baloto, nwali ya has bali difay linaw dahol, nadagos wa hat sadili banwanan. ² Yabay tiba taw nadiya han Hisos sadik taw kadwa syagan kimot, maigyanan sat baba sagmak. Is Hisos no nalag kitay tagsyag marigon ha hanya, is Hisos nafwayong has taw kadwa syagan kimot, Ama, ha fag marigon im fangayofan. Hogfaliyam im manga naogali dwat. ³ Tiba kagfaadal ka Batasan Hodyo naayfan sat basad fangayofan, To fag taw igsway in Diyos. ⁴ Dapat is Hisos nasalom ista fag-isipon, yakanga nalwang has taw, Kana mayon ham no gisip kitonyak dwat? ⁵ Sida ka malpos fwayongon, ngatay Hogfaliyam im manga naogali dwat, ngatay Ha fag kabangon, anggongan wam sagmak, fag lomahaw wan. ⁶ Dapat ho falag ha hayo kitay aho, Kanbali Taw, ha kangayanan igfaliyam ista manga ogali dwat istay sas baba daga. Ginyas Hisos nafwayong has idwa syagan kimot, Haw fag kabangon wan, dyan wam sagmak, nyawa ha mwali wa kati. ⁷ Ka ama nalindog wa ngay, nwali wan. ⁸ Ka manga taw no nalag kitonya, indala wan, hanggan tagbaya yadi han Diyos ka nadisag kitonya fag kangayanan has taw. ⁹ Da Hisos nalahaw wa ginya fag banwanan. Ta noglahaw yapdi, is Hisos nalag sadik ama, it ngayan is Matiyo, matokawan sas fanohotan bohis Roma. Is Hisos nafwayong hanya, Ha tahinan wangko. Is Matiyo dagos wanlindog, natahin wa hanya. ¹⁰ Araw da Hisos no matokawan san Matiyo balay sas bilog fanganan, yabay aywan fag manga fanohot bohis hanggan tiba taw kadwa fiya it ogali, nagobok in Hisos. Ta fagayo nanayowan kwan sinya, hanggan in Hisos manga katogbong. ¹¹ Ka manga Farisiyo no nalag kitay tagsayowan kwan hanon sinya, ta naintaw in Hisos manga katogbong, Kana mayon kagfaadal ha hayo nogsayo has manga fanohot bohis hanggan has manga taw ka ha ogali dwat? ¹² Is Hisos nadog ista manga hampang, yakanga nasagot kiti, Ka manga ha sagit ka kasaya has famolongan, no kadi idwa ha manga sagit idwa kasaya hanya. ¹³ Gwadi ham fag twagdog it kahologan noglwang, Ka kaawaan kangko fakasayaon, fiya man ka fangafiyon fag sinogba. Maskin ngay honbangkad hastay, angko fagsayahon ka manga ha ogali dwat, bohonwa ka gayfan kitay it manga ogali fiya. ¹⁴ Ginya madi in Hwan manga katogbong hawan Hisos, naintaw hanya kitay, Gwadi hami fagabadwa kwan hanon kaarakitay mandarangin, hanggan ka manga Farisiyo kitonya yadi. Kana mayon im manga katogbong nodwa gogali kitonya? ¹⁵ Is Hisos nasagot has taw, Ka mangag fasakop has famabayan marongkot awkin kagbabay no gofod yapdis taw, ham gayfan? Dapat ay, aban, ha pomilit tomaban kagbabay, gis nanya ta bago didwa

kwan hanon kaarakitay mandarangin mahogod. ¹⁶ Idwa haglonob rotay kadyan yamos has daanon fag rotay, maskin ka bago maganit man ka daanon, yakanga labi man imdahol ka losbong sas daanon. ¹⁷ Idwa yadi ha taw somiblag alak bago has basad sohadan anit daanon. No omibolon kitonya ka anit imbosni, ka alak im-od-olanan lamang, ka sohadan anit imdwat yadi wan. Yatokitay, tagsiblag bago fag alak has bago fag sohadan anit, ginya fagayo dowa dogay imdwat. ¹⁸ Is Hisos nogtolto yapdi has taw, sadik fag tahinan Hodyo insakbaw wan, nanlingkohodan san Hisos atobangan, iglwang, Angko anak ina bago di nafos it ip-saw. Haw nangos tahinan angko, fwalidan yap im gamat ha hanya kaarakitay hanyam boyag ya. ¹⁹ Is Hisos nalindog wan naofod hanya, hanggan it manga katogbong hanya yadi wan. ²⁰ Ya mangharaw, sadik ina ka ha sagit ina, safolo ha dowak fangaraw, naoyan inda Hisos. To fag ina naakbang han Hisos gis ginanan, dayo goyoy, nasapkid it tobwan tobwan rotay, ²¹ maskin it fangayofan iglwang, Ngadi ho somapkid it tobwan rotay homfiya wan. ²² Is Hisos inbalihid, ginya no nalag ka ina, nalwang, Anak ina, fag marigon im fangayofan, maskin hagsyag angko, haw infiya wan. Gis nanya yadi ka ina infiya wa dagos it fagdogon. ²³ Da Hisos nondasog sas balay fag tahinan, nalag tagfaoni manga palawta, hanggan aywan fag manga taw, mawang wan. ²⁴ Is Hisos nalwang, Ham fag dokson wa has sokayan. Ka anak ina idwa natay, matoyogan di. Ka manga taw kasay odi in Hisos. ²⁵ Dapat ka manga taw nondokson wan, is Hisos nasakbaw wan, natawid ka anak gamat, yakanga ka anak inbangon ya. ²⁶ Ginya madi in Hisos naibolon inbarita wa sadik dahonya sinya fag banwanan. ²⁷ Da Hisos no nalahaw ginya fag banwanan, dowak ama bota goyan wa goyan wan Hisos. Tagtawag marigon, iglwang, Haw in Dabid hasokfonan anak, haw fakaawa hyami. ²⁸ Is Hisos no nasakbaw hasta basad balay, ka manga bota naakbang hanya. Is Hisos naintaw is taw, Ham awkin katiwala kitay ho somyagan omibolon to? Taglwang, Ala, hyami Fon mi katiwala ngay. ²⁹ Ginyas Hisos nasapkid ista manga mata, nalwang yadi kitay, Maskin ham igsyag wangko, im-anod wa kitonya. ³⁰ Ginya madi dagos wanfoga ista mata. Is Hisos igbando mahogod kitay, Ham fag idyag fwayong nyawa haday. ³¹ Dapat ta nondokson di ngay, ta dagos wa nafwayong sadik dahonya banwanan sinya in Hisos naibolon. ³² Ka manga bota kanfiya nonlahaw di ngay, ta ha nataban ya han Hisos sadik taw boyon, labang kagfahoriyan. ³³ Ka labang no nalin wan, ka boyon kampang ya. Ka fakaaywanan fag manga taw indolaw wan, taglwang, Nyawa ginahin tam idwa ha lagan kadonongan kitonya sas Israil. ³⁴ Dapat ka manga Farisiyo iglwang, Ka manga labang fagtahinan kagtofbong in Hisos, yakanga syagan digfalagyo ka manga labang. ³⁵ Is Hisos naskatan

ya ngawan ka manga banwa hanggan sas manga ligongan manga banwa, igfaadal sas manga fanimbaan Hodyo ka Fiya fag Barita kawa han Diyos sakop baliwa. Is Hisos nafafiya yadi ka manga taw ka ha sagit, nyawa kanat manga sagit, manga fagdogon. ³⁶ Is Hisos in-awa ka fakaaywanan fag manga taw, maskin ista fangayofan balaw balaw odi, bilang wadwa ha kaawa has taw, kitos topa kadwa ha gano. ³⁷ Yakangas Hisos igfwayong hat manga katogbong. Kaaywanon ka aniyon, dapat sayok ka fangani. ³⁸ Ham daranginan hasag fon namay, hanya nangos fag somogo, fag ha omani wa kat aniyon.

10 Is Hisos nafatifon ka safolo ha dowak katogbong, ginya nafalobos has taw it kangayanan has mangag faalin manga labang hanggan igfafiya manga sagit. ² To kasta manga ngayan ka safolo ha dowak Fandiya Barita. Bago bago is Simon kasta faglwanon is Pidro, hanggan is Andris it fadwasay. Da Santyago da Hwan in Sibidiyo manga anak, ³ da Filipi da Bartolomi, da Tomas da Matiyo, ka fanohot bohis, in Santyago sangay kan Alfiyo anak, hanggan is Tadiyo. ⁴ In Simon yadi sangay kagbaliwa it manga kapariho Hodyo, hanggan is Hodas Iskariyoti ka naoyon in Hisos kalaban. ⁵ Is Hisos nasogo tonya fag safolo ha dowak Fandiya Barita, natogon kiti, Ham fag idwa has manga banwanan Hintil, fag idwa yadi has manga banwa manga taga Samariya. ⁶ Ham fag sayak yapdi ka manga topa kanliyam san Israil sakop fag manga banwanan. ⁷ Ham noglahaw wan, fag faadal has taw kitay ka gin Diyos banwanan sam tongod kaakbang wa aba kabali hari. ⁸ Ham fag fafiya ka manga ha sagit, faboyagan yadi ka manga natay. Fafiyaan ya ka manga ha sagit kitong, faalinan yadi gistaw ka manga labang. Ka hayo natanggap idwa ha bayad, yakanga ham nogdisag has taw fag idwa yadi ha bayad. ⁹ Ham fag idwag diya kwarta, nyawa ginto, nyawa pilak, nyawa tanso sa hayo hagkos. ¹⁰ Ham fag idwa yadi ha diya boyog, ham noglahaw, nyawa hayo falhosan rotay, nyawa fanobos lapak, nyawa sokod, fag idwa ha diya, maskin ka fangibolon fiya di tomanggap it fangaboyagon. ¹¹ Nyawa siday fag banwa, ngatay tifonan balay, ham nomdasog sinya, ham sayahan ka taw danwasta fakilalaon fiya fiya sinya. Ham fag sinya wak domogayan no baliday ham sinya yapdi. ¹² Ham nogsakbaw sasta balay ham fag lwang, Fag ka kahowayan kagbahala istay sa hayo balay. ¹³ Ka manga taw sinya fag balay no fiya it manga ogali, ham fag mahoway odi has manga taw sinya kito hayo nafwayong. Dapat nodwa fiya, bawiyon hayo fwayong. ¹⁴ Sa sadik balay, ngatay banwa, ta no kafang igfasakbaw hayo, kafang yadi igtalinga, ham noglahaw wa ginya, fadagdagan yadi ka manga fogis daga gi hayo manga bitis. ¹⁵ Hogfwayong ha hayo, bonwa bohag, ista fadosaan aban, sas Sirang Fangabaya bohondi kito ka fadosaan sas manga ban-

wa Sodoma hanggan Gomora. ¹⁶ Kati yabay, hogsogo hayo bomarita, bilang manga topa magop magop sas fagbokngan manga ido maisog. Yakanga ham fag bilang wa abyanon no maaman, dapat ham fag kito was limohon ik mahoway. ¹⁷ Ham fag matagahan maskin ha manga taw aban fagamat hayo hasag talinga hampangan. Ta fabakbak yadi hayo sas manga fanimbaan Hodyo. ¹⁸ Maskin aho hayo fagalwasiyon, ta gomoyod hayo has atobangan manga gobirnadador hanggan manga gorangon. Ham mamaorongan sasta fagdogan, hanggan sas fagdogan manga Hintil. ¹⁹ Ta nogfagamat hayo has taw, ham fag idwa galibitan hayo bato fwayongon ngatay no kinday ham no somagot. Nomdasog gis nanya fag masohod aban, is Diyos fatohod hayo hampang bato sagoton has taw. ²⁰ Maskin hayo hampang aban idwa gi hayo sadili fangayofan, ka hayo hampang gi wa hayo Ama it Falad ka faisip hayo. ²¹ Aban kayadit fadwasay kagfagamat it fadwasay has iba taw kaarakitay ta fahatay hanya, kitonya yadi kat ama hat sadili yadi anak. Manga anak lomaban it magorang, fasognod has iba taw kitay fahatayan wan. ²² Maskin aho hayo fagalwasiyon, fagayo fag manga taw kadwat iglag hayo aban, dapat kadwag fagomon hanggan wa has katabowan, hanya wa kambawi. ²³ Ta nogfahoriyan hayo sa sadik banwa, ham fag lagyo ha sadi yak banwa. Hogfwayong ha hayo, ham idya domasog has fagayo fag manga banwa sas Israil, aho Kanbali Taw, nombangkad ya. ²⁴ Idwa ha katogbong ha kangayanan abwat man hasag faadal hanya. Kitonya yadi idwa ha sogowan ha kangayanan abwat man hat fon kangayanan. ²⁵ Ka katogbong nogtolad kagfaadal hanya, fiya wan, hanggan ka sogowan nogtolad yadi kagfon hanya. Ta nogngayan kagfon balay is Biilsibol, labi man inyak dwat ta no ngomayan it manga ofod. ²⁶ Yakanga ham fag idwa kadalas taw. Ka manga matagowan kati fadi wadamlag aban. Fadi wamfyalom aban, imdog di has fagayo. ²⁷ Kangko fwayong ha hayo basad marom, olitan ya sas basad mayawa, kasta nainas ha hayo, ham fag golit igtawag fiya fiya sas sokayan sasta fanifonan. ²⁸ Ham fag idwa kadala kagfahatay habilogan taw, dapat idwa syagan igfahatay hayo falad. Yatokitay, ka syagan igfadwat habilogan hanggan falad sas basad fadosaan afoy, fag tonya wa ka hayo fakadalaon. ²⁹ Idwa awkin tam nogfasali dowak maya sadi dik saga it halga? Nyawa kitonya, no bohonwa hayo Ama kafangayofanan, nyawa sadik maya idwam dagdag has baba daga. ³⁰ Gwadi nyawa hayo bok sas alfoyo, hayo Ama twa wa no kayoday it manga ogat. ³¹ Yakanga ham fag idwa kadala, ham mahalga man has kaaywanon fag manga maya. ³² Nyawa faktaw kagbaya sas manga taw fagdogan kitay hanya angko wa sakop, ho bomaya yadi aban, sangko Ama atobangan sam tongod, kitay tonya fag taw angko wa sakop ngay. ³³ Dap-

at ay, nyawa faktaw kagtangkod angko sas fagdogan manga taw, ho tomangkod yadi hanya sangko Ama fagdogan, ka sawat banwanan sam tongod. ³⁴ Ham fag idwa gayfan kitay honbangkad hastay kaarakitay igdiya kahowayan hastay is baba daga. Honbangkad hastay ha diya yadi talibong, bohonwa kahowayan. ³⁵ Maskin honbangkad hastay kaarakitay ho falaban kasta anak ama hat ama, kasta anak ina hat ina, kasta nogang ina hat nogang ina magorang. ³⁶ Hanggan ista kalaban ka yadi talanahan. ³⁷ Ka galwasit ama ngatay it ina bohondi kito hangko no galwasi, idwa maangay sangko. Ka galwasit anak ama ngatay ina bohondi kito hangko no galwasi, idwa yadi maangay sangko. ³⁸ Kadwa gagwanta mahori, bilang kafang igfasan it sadili fatimbangan hayo, ginyadwag tahin angko, idwa yadi maangay sangko. ³⁹ Ka kwangit it sadili haboyagan hangko, hanya abadwa ha akwa haboyagan, dapat kadwa kwangit it sadili haboyagan kawa hangko, hanya ha tanggapon haboyagan. ⁴⁰ Kagtanggap hayo, aho yadi it fagtanggapon, hanggan kagtanggap angko igtanggap yadi kagsogo angko. ⁴¹ Kagtanggap sadik fangampang maskin tonya in Diyos fangampang, tomanggap ka fasalamat ka maangay han Diyos fangampang. Kagtanggap sadik taw fiyat ogali, maskin ka taw fiya, tomanggap ka fasalamat ka maangay has fiya fag taw. ⁴² Nyawa faktaw kagfainom, nyawa di sadik ongot danom magnaw, hangko sakop fag taw ka ogbot it kangayanan, maskin tonya angko wa katogbong, hogfwayong ha hayo kitay, matohoyanan hanya tomanggap it fasalamat aban.

11 Is Hisos natogon di ngay hat manga katogbong Safolo ha Dowa, ginyan lahaw ya ngawan kaarakitay mamwayong, mamaadal ya has manga banwa sinyat akbang. ² Is Hwan kagfatogna manga taw hyabi sayapdis basad porisowan gis nanya. It manga katogbong nafadahit han Hwan in Kiristo manga naibolon, yakangas Hwan nasogo yadit manga sogowan hanya. ³ Ta nangos intawan han Hisos kitay, Haw awkin kawan Diyos natogon kitay imbangkad hastay, ngatay mi ha fagfanayaon yapdi sadi ya? ⁴ Is Hisos nasagot kiti, Ham fag goli ya ngawan han Hwan, ham fwayongan ka hayo donggon hanggan lagan. ⁵ Fag fwayong kitay, ka manga bota infoga ya ngat mata, ka mangan fihong it bitis iglahaw ya, ka manga ha kitong in fiya yadi wan hanggan ka manga bongkok igdog ya, ka manga natay inboyag ya yadi, hanggan ka Fiya fag Barita nafaadal has manga myabog. ⁶ Ka taw kadwa gadowan igsyag angko bomaya wan. ⁷ In Hwan manga katogbong nonlahaw, Is Hisos nafwayong has manga taw kawa han Hwan, iglwang, Kana mayon hyabi ham no hawas basad fakahyabogan? Kana ka hayo fagasolopon sinya? Ham awkin kasayaglag ka bagyo nogfatarayfayan igfatarayfayan ka iyano? ⁸ Kana ham no hanya? Ngatay hayo faga-

solopon sinya sadik taw myasa wa fiya it manga solong rotay? Gwadi sawasta gorangon balay ka myasa wa fiya it manga solong rotay. ⁹ Kana ka orongan hayo fagasolopon sinya? Ngatay in Diyos fangampang sadi? Ala ngay, tonya wan, hanggan hogfwayong ha hayo ka hayo lagan sinya it kangayanan bohondi kito kan Diyos manga fangampang. ¹⁰ Maskin is Hwan kat faglwangon sas Kasoratan, noglwang kiti, Fanlag ngay, hogsogo angko sogowan ka gomona hyamo. Hanya mamatalaga hyamo bato lahawan. ¹¹ Hogfwayong ha hayo idya ha anak kansagaya git ina ka abwat man in Hwan kangayanan, ka Hwan kagfatogna manga taw, dapat ka ogbot man has fagayo san Diyos sakop, it kangayanan abwat man in Hwan. ¹² Giwan Hwan igfaadal ka barita, hanggan balis kati, kan Diyos banwanan fag sakop igdog mahori hanggan ka maisog fag manga taw igpilit wa omaktom sinya fag sakop fag manga taw. ¹³ Maskin hyabi hyabi in Diyos manga fangampang hanggan ka Batasan Hodyo nagona wa nafwayong kawa han Diyos banwanan fag sakop, hanggan was Hwan nafwayong yadi hanya baliwa. ¹⁴ Ham no kasaya yadim tiwala, hanya is Iliyas ka hastay. ¹⁵ Ham no ha manga talinga ya ngadi, fag talinga wan. ¹⁶ Kinda odi kin angko fatoladan ka kati fag manga masohod fag manga taw, ham gayfan? Kito odis manga anak matokawan sas famahowayan, igtawag hat manga ofod anak, iglwang, ¹⁷ Mi fadi wad nafaoni palawta, dapat ham kafang digtayok, Nyawa hami nangodgorawan, ham kafang yadi goraw. ¹⁸ Kawas Hwan nonbangkad hastay, nomtoon idwa kwan hanon kaarakitay mandarangin, idwa yadi ginom alak, ginya taglwang, hono, Labang wa kagfon in Hwan. ¹⁹ Ginya madi, aho man, Kanbali Taw, inbangkad hastay, kwan yadi hanon hanggan ginom kitos iba taw, ginya taglwang, Yabay, to fag taw, mahogod wa kwan a, iglango ya ngadi, koyog yadi has mangag falo igsohot bohisi Roma hanggan has tiba taw ka ha dwat fag manga ogali. Nyawa taglwang kitonya, in Diyos manga ibolon kagfatohoyan kitay in Diyos katonongan myasa wa fiya. ²⁰ Ginya madis Hisos nangabaya ka manga banwa kat nafalag ka fakaaywanan fag manga ibolon madolaw sinya, maskin tadwa nasoyo, idwa yadi nadayo it manga ogali dwat. ²¹ Isyay wa, isyay wan, haw, banwa Korasin. Isyay wa, isyay wan haw, banwa Bitsayda, maskin ka manga taga Tiro hanggan taga Sidon no nalag di ka hayo manga lagan madolaw, ta dan wa nasolong manga sako hyabi yapdi, hanggan natokaw sas fogis dafog kaarakitay igfalag kitay tagsoyo wan. ²² Dapat hogfwayong ha hayo, gis nanya aban, sas Sirang Fangabayan, ka fadosaan kamtohoayan ha hayo bohondi kito kamtohoayan has manga taga Tiro hanggan manga taga Sidon. ²³ Haw yadi, banwa Kapirnaom, Haw aw kasayag faabwaton hyamo han Diyos ban-

wanan sam tongod? Dapat ho fadagdag lamang hyamo hawas Daga Salad. Maskin no nangos sadis Sodoma no nalag ka hyamo lagan madolaw kati, ka banwa Sodoma idwa ara indwat, hanggan kati sinya yapdi. ²⁴ Dapat hogfwayong ha hayo, sas Sirang Fangabayan aban, im fadosaan bohondi kito ka fadosaan kandalan hyabi sas banwa Sodoma. ²⁵ Gis nanya fag masohod is Hisos nalwang, Mama, haw kagfon im banwanan sam tongod hanggan ka daga, hogbaya hyamo, maskin no hadis manga madonong, manga ha nagadalan, hadyag fatwagdog to fag manga bagay, dapat hagfatwagdog fiya fiya has manga taw kat fangayofan kito yapdis manga anak it fakatwawon. ²⁶ Anod mama, maskin kitonya ngay kam fakasayaon. ²⁷ Ginyas Hisos nalwang has taw, Angko Ama ka nafaano hangko fagayo fag manga bagay. Idwa ha kilala angko, in Diyos Anak no bohonwa angko Ama. Idwa yadi ha kilala in Diyos angko Ama, no bohonwa aho, kat Anak, hanggan nyawa kayoday angko fagfaangayon mamahilala has taw angko Ama. ²⁸ Ham fagayo ka kayaya basad fangayofan, fag gakbang wangko, kawa ham kabyat hayo manga fasan, ho fahoway hayo. ²⁹ Fasablayan angko singkaw ha hayo, ham fag gadal gingko. Kawa aho mahoway, idwa yadi ha takan, yakanga hayo fangayofan lomag yadi wa kahowayan. ³⁰ Maskin angko singkaw fiya wa donggon, malokmay a, angko fafasanon ha hayo magan wa dahil.

12 Gis nanya fag masohod, sas Sirang Kafahowayan, da Hisos igdalan sasta namay ha tirigo. Gis nanyat manga katogbong kalonos wan, yakanga ta nabol manga haway tirigo sayok, ginya kwan wan. ² Ka manga Farisiyo no nalag ista naibolon, taglwan han Hisos, Lag ngay im manga katogbong gibolon kadwa maangay sas Batasan Hodyo, maskin sawas Sirang Kafahowayan. ³ Is Hisos nasagot, Ham awkin idwa nabasa in Dabid naibolon hyabi no kalonos hanggan wat manga ofod kalonos yadi? ⁴ Is Dabid nasakbaw han Diyos basad balay a, hanya hanggan wat manga ofod nahwan ka tinapay kandisag han Diyos. Ka Batasan Hodyo iglwan ka manga fagan-han-Diyos lamang ka fiya homwan tonya fag tinapay. ⁵ Ngatay ham idwag basa sas Batasan Hodyo kitay, fagayo fag Sirang Kafahowayan ka manga fagan sas Fanimbaan-Dahol igfalamang di ka Togon kawa hastay fag sirang. Nyawa kitonya bohonwa dwat ista naogali. ⁶ Hogfwayong ha hayo, aho Kanbangkad kati hastay bohondi kitos Fanimbaan-Dahol angko kangayanan. ⁷ Ham nangos no natwa wagdog to fag manga hampang kaglwang, No sa dingko, fiya man no kaawa manga taw hasag sogba fangafiyan, ham nangos haraw idwa naato kadwa ha naibolon dwat. ⁸ Maskin aho, Kanbali Taw, kagbahala has Sirang Kafahowayan. ⁹ Is Hisos inlahaw wan hawas basad fanim-

baan Hodyo. ¹⁰ Sinyas basad fanimbaan ha sadik ama it gamat sadi inrifis wan. Ha akwa yadi manga taw sinya kagsayak it fabangdanan gin Hisos manga ibolon. Yakanga ta gintaw in Hisos, Ka Batasan Hodyo awkin igfaangay di kitay, nyawag fafiya sagit sas Sirang Kafahowayan, fiya di? ¹¹ Is Hisos nasagot, Nyawa faktaw sa hayo, no ha topa indagdag has basad tabyo sas Sirang Kafahowayan, ham awkin idwa bomol ginyas basad tabyo? ¹² Idwa aw ka sadik taw labi man ik mahalga ha sadik topa, ham gayfan? Yakanga ka Batasan Hodyo igfaangay di no gibolon fiya nyawa sawas Sirang Kafahowayan. ¹³ Ginya madis Hisos nafwayong has ama kanrifis it gamat, Haw fag falogday im gamat. Yakanga nafalogday ngat gamat a, in-fiya wa dagos, ogali wan, kito mandi kat gamat balis baliw yabay. ¹⁴ Dapat ay, ka manga Farisiyo nadokson wan, goyonan igtoltolan no kindasta halimbawan kaarakitay domaog in Hisos. ¹⁵ Is Hisos natwa di kitay ta kahori hanya, yakanga inlahaw yadi wa ginya. Aywan ka goyan hanya a, is Hisos nafafiya yadi ista manga sagit fagayo. ¹⁶ Dapat is Hisos nabando marigon kitay ta fag idwag fadog has taw kawa ha hanya. ¹⁷ To in-anod wan kaarakitay igfatonglos in Isayas, ka fangampang fwayong kiti, ¹⁸ Lag ngay, to kangko sogowan kangko yadi nafili, Ho gwayan wa galwasi hanya, hanya angko yadi fagbayaon. Ho domisag hanya angko Falad. Hanya fadog has fagayo fag manga layonan taw kitay, hodwa ha fagapinon taw nogfadosa. ¹⁹ Hanyadwag daraogan, mahoway di no kampang has taw, nyawa basad wa karsada idwag ringgit, ogali wa no kampang. ²⁰ Hanyadwa lomifong ka iyano kanbokong, Idwa yadig fahapsa ka salong ka ganos ganos odi, No kandogay day hanya, kadwa ha fagapinon taw nogfadosa, nodyag daog has fagayo ²¹ Hanggan fagayo fagayo fag manga layonan taw hawa hanya no somyag aban. ²² Ginya ta nataban han Hisos sadik ama bota, boyon ya ngadi, kawa labang kagfahorihan hanya. Is Hisos nafafiya ka ama, yakanga ka ama nahampang ya, infoga yat mata. ²³ Fagayo intaka waglag, taglwan, To aw mayon kan Dabid hasokfonan anak? ²⁴ Dapat ka manga Farisiyo no nadog ista hampang kitonya, iglwan, Tyamo fag ama it kadonongan igfaalin manga labang, gi odin Biilsibol ka fagtahinan manga labang. ²⁵ Is Hisos nasarom di ista fagisipon, yakanga nafwayong has taw, Fagayo fag gorongan sakop imdaog di nombali dowak layonan, yakanga idwa domogay. Nyawa sida fag banwa, ngatay talanan, nombali dowak layonan ginyag labanan wan, idwa domogay. ²⁶ Nos Satanas kagfalagyo in Satanas sakop, hanyag laban yadit sadili. No kitonya, kinday it sakop no domogay, ham gayfan? ²⁷ Nos Biilsibol kagfasyagan angko igfaalin labang, fakta, ham gayfan, kagfasyagan hayo manga anak igfaalin labang? Yakanga hayo manga anak mandi kagfatohoyan kitay ham

gwayan wagfalamang. ²⁸ Dapat non Diyos Falad kag-fasyagan angko igfaalin labang, it kahologan in Diyos sakop indasog wa sa hayo. ²⁹ Fakta ka somyagan somakbaw hasta basad balay kaarakitay ignahaw ista botang, kagfon balay no marigon, nodwa gomafos yap hanya bago bago? Kagfon balay no magafosan wa bay, ginya madi idwa somawad it manga botang. ³⁰ Kadwa kaoyon angko iglaban angko. Kadwag tog-bong angko igfatifon manga taw, yagfasarowayan di ngap. ³¹ Yakanga hogfwayong ha hayo, nyawa kana kasta ogali dwat, nyawa hanggan igfadwat igdog in Diyos, twam liyam, dapat ay, ista hampang nogfadwat igdog ka Maliyaw fag Falad, idwam liyam nyawa ginahin. ³² Nyawa faktaw no kampang dwat donggon kawa hangko, Kanbali Taw, fiya digfaliyam ista nahampang dwat, dapat ay, ka kampang dwat donggon kawa has Maliyaw fag Falad, ista naogali kitonya idwam liyam nyawa kati, nyawa hanggan aban. ³³ Ka fon hayo no fiya, it bohad fiya yadi. Ka fon hayo no dwat, it bohad dwat yadi. Kat bohad kagfalag no kinday fag hayo it fon. ³⁴ Ham bilang odi manga hasokfonan abyanon no madaya. Hayo fangayofan no dwat, kinday ham no twa kampang fiya, ham gayfan? No kindawasta fangayofan, kitonya yadi ka kadog. ³⁵ Ka taw no fiya, it fwayong fagaba yadi wa fiya, maskin it fagayfanon fagaba wa fiya. Dapat ka taw no dwat it fangayofan, it fwayong fagaba yadi wa dwat, maskin it fagayfanon fagaba wa dwat. ³⁶ Hogfwayong ha hayo kitay aban sas Sirang Fangabayan, ta ha sagoton wa fagayo fag manga hampang kat nafwayong kadwa ha kahologan. ³⁷ Maskin gi wa hayo sadili manga nahampang imto-hoyan kitay, ngatay ham fiya san Diyos faglagan, ngatay ham fag has fadosaan. ³⁸ Ginya ha mangag faadal Batasan Hodyo hanggan tibak Farisiyo nafwayong han Hisos kiti, Haw kagfaadal, falagan nangos hyami sadik falagon madolaw kagfathoyan ha hyami haw no faktaw. ³⁹ Is Hisos nasagot, Ka kati fag masohod fag manga taw dwat wa dahol, kawa has iba fagsyagon ham nogfasakop. Ham igsayak falagon madolaw, dapat hodwa ha falagon ha hayo, no bohonwa kanlag san Honas, in Diyos fangampang nadalanan. ⁴⁰ No kinday is Honas hyabi tolok sirang hanggan tolok yabi sas basad tiyan oyang dahol dahol, kitonya yadi aho, Kanbali Taw, tolok sirang hanggan tolok yabi sas basad basad daga aban. ⁴¹ Aban, sas Sirang Fangabayan, ka manga taga Ninibi fatohoyan has fadosaan ka kati fag masohod fag manga taw, maskin ka taga Ninibi nasoyo hyabi, kawas Honas nafaadal has taw, dapat ay, kati yabay, kastay bohondi kiton Honas it kangayanan. ⁴² Gis nanya yadi fag Sirang Fangabayan, ka ina gis Ihipto baliwa, kanbali gorangon hyabi, fatohoyan yadi has fadosaan ka kati fag masohod fag manga taw, maskin tonya fag ina hyabi inbangkad gis bali fongfongan daga kaarakitay

domog in Gorangon Salomon kadonongan, dapat yabay, kastay kati bohondi kiton Salomon it kadonongan. ⁴³ Ka labang no nalin gis sadik taw, igswaliyan igswaliyan has daga magwang magwang, igligaw it famahowayan, dapat idwa ha lagan it oliyanan. ⁴⁴ Yakangat fangayofan iglwang, Ho kafwali ya ngawan hangko nagalanan. Nonfwali ya, iglag it nagalanan idwa ha goli sinya, malinay di, maangay wan. ⁴⁵ Yakanga ka labang hanya ya ngay, igtaban fito yak labang ka dwat man hanya a, hawa basad taw, sinya wak rnaoliyanan. Yakanga sas katabowanan ka taw mahori man ka gona it fangayofan. Ka kati fag masohod fag manga taw dwat lomag yadi wa kitonya. ⁴⁶ Is Hisos nogtoltol yapdi has taw, yabay it ina hanggan it manga fadwasay indasog wan, mafanayan sas sokayan, ta kasaya mangampang in Hisos. ⁴⁷ Ha nafwayong han Hisos, Im ina hanggan im manga fadwasay sas sokayan, ta kasaya mangampang nangos ha hyamo. ⁴⁸ Dapat is Hisos nasagot, Fakta kangko ina, fakta kangko manga fadwasay, ham gayfan? ⁴⁹ Ginyas Hisos igsiyo hat manga katogbong, iglwang, To kangko ina hanggan angko manga fadwasay. ⁵⁰ Kawa nyawa faktaw no katanog angko Ama kafangayofanan, ka sat banwanan sam tongod, tonya wa kangko manga fadwasay, kangko ina.

13 Gis nanya yadi fag sirang is Hisos nalahaw wa gis balay, natokaw sas bahalan linaw dahol.

² Manga taw kaaywanon nagobok in Hisos, yakangas Hisos nasakbaw has basad baloto baba danom, akbang has bahalan linaw, sinyak matokawan. Ka fakaaywanan fag manga taw sinya dik malindogan sas baba daga sas bahalan linaw. ³ Yabay is Hisos igfaadal has taw sinya, sayapdis manga halimbawa dapat. Hanyag lwang kiti, Sadik ama fangiyab hawat namay kaarakitay mamamgas. ⁴ Hanya nogfamgas, igsabod odit binhi, yakanga tibak botol indagdag has boknga dalan. Ka manga manok indasog a, nahwan wa tonya. ⁵ Ha akwa yadi manga botol indagdag has daga libabaw, baba odi dalifi. No kitay di dagos wa natobo kawa libabaw maskin ka daga sinya. ⁶ Ka myanit no nasalog sinya, myanit wa dahol dahol. Kat manga tobo inlayong di, maskin idwa ha dalid abasad. ⁷ Ha manga bolhog yadin dagdag ha sayo manga lamnon madogi. Ka manga lamnon inlangba, nasakfaw di ka manga tanom, ka manga tanom nadaogan di lamnon. ⁸ Dapat ay, ha akwa yadi manga botol kandagdag has fiya fag daga, yabay nabohad wan. Ha akwa nabohad sadik daan bolhog, tiba onom ik safolok bolhog, tiba tolok safolo. ⁹ Ham no ha manga talinga ya ngadi, fag talinga wan. ¹⁰ Araw in Hisos manga katogbong naakbang hanya, naintaw kitay, Kana mayon haw nogfadalan yapdi las manga halimbawa hyamo bato toltolon has taw? ¹¹ Is Hisos nasagot, Indisag wa ha hayo kitay, ham fag tomwa ka mangadwag fadogon kawa han

Diyos banwanan fag sakop baliwa, dapat idyapdin dis-ag has taw. ¹² Maskin ka danwa ha akwa ho domogang ya hanya, im-aywan, dapat kadwa ha akwa bangan, nyawa hara ha akwa ogbot ogbot sa hanya, tonya abam bol di. ¹³ Maskin kitonya, sa yapdis manga halimbawa aho nogtoltol has taw, maskin nyawa tagbantay, tadwaglag, nyawa tagtalinga, tadwagdog, yakanga idwa yadi twagdog. ¹⁴ In Isayas faglwangon kawa hanya fag manga taw in-anod wan, hanya noglwang, Nyawa ham igdog fagaba, ham idwa yadi tomwa wagdog. Nyawa ham iglag fagaba, ham idwa yadi tomwa waglag no kana tonya ¹⁵ Maskin to fag manga taw inganit ista manga fangayofan Ngadit manga talinga dayo wagdog, Tagfotikan wan it manga mata, Maskin ta dayo waglag, Ta dayo yadi wagdog. Ista fangayofan ta fag idwa yadi tomwagdog. Ta kafang kafwali hangko, Dayo yadig soyo, Tadwa kasaya kitay aho fag fafiya is taw. ¹⁶ Dapat ham igbaya wan ka hayo mata lagan madolaw fagaba, hanggan ka hayo manga talinga donggon madolaw. ¹⁷ Hogfwayong ha hayo, no kitay di, aywan in Diyos manga fangampang, hanggan fiya fag manga taw hyabi hyabi, kasaya wa dahol lomag ka hayo lagan kati, ka tadyapdi nalag hyabi. Ta gwayan wa kasaya nangos fag domog wa haraw ka hayo donggon kati, ka tadyapdi nadog hyabi. ¹⁸ Kati dog ngay it kahologan ka halimbawa kawa hasagfamgas baliwa. ¹⁹ Ka mangagdog ka toltol kawa han Diyos sakop baliwa, dapat idwa twagdog tonya, ka kitos manga botol kandagdag boknga dalan. Is Satanas indasog di ngay, igbol lamang kansabod sasta basad fangayofan. ²⁰ Ka botol kansabod has sayo baba dalifi igfahalimbawa ka manga taw kagtalinga ka toltol, igtanggap wa dagos, masolong wan no kitay di. ²¹ Dapat idwag dalid abasad sasta basad fangayofan. Ngalay di gagwanta, maskin no ha donggon ya nga manga mahori, ngatay tagfahoriyan hanya maskin katiwala ka toltol, dagos wagdayo. ²² Kandagdag ha sayo manga lamnon madogi igfahalimbawa ka mangag talinga has toltol, dapat it manga kakorangan istay is baba daga kat fagisipon fagaba, ngatay kawili wa dahol ka kaakwa, yakanga nasakfaw ka Toltol sat basad fangayofan, yakanga tonya idwa nabohad. ²³ Dapat ay, ka botol kansabod sas fiya fag daga igfahalimbawa ka mangag talinga ka Toltol hanggan natwa wagdog tonya. Ginya yabay nabohad sinya, tiba sadik daan, tiba onom ik safolo, tiba tolok safolo. ²⁴ Is Hisos natoltol sadi yak halimbawa has taw, nalwang kitay, Kiti kan Diyos banwanan fag sakop, nogfahalimbawa, kitos sadik taw nafamgas fiya fag botol sat baba namay. ²⁵ Ta no matoyogan araw, basad yabi, it kalaban nasabod kadwa fiya fag bolhog lamnon hasta basad namay tirigo, ginya nwali wan. ²⁶ Ka tirigo no natobo hanggan kaboskad wat borak, inlag yadi wa ka manga dwat fag lamnon sinya maaktoman sayo tirigo. ²⁷ Yakanga ka

manga sogowan hawasagfon namay, iglwang kitay, Bohonwa awkin fiya fag manga botol ka hayo tanom? Kana mayon no ha manga lamnon kati? ²⁸ Kagfon namay nasagot, Angko kalaban sadi ka nasabod tonya. It manga sogowan naintaw hanya, Ha awkin kasaya mi nangos fag gomoyod tonya? ²⁹ Kagfon istaw nasagot, Ham fag idwa goyod, ngandayo hanggan wa ka tirigo imtahin. ³⁰ Ham fabayaan wan hanggan fanganion. Tam aba no gani wan ho fomwayong has manga fanganion, Tifonan yap ka manga lamnon, ham fogongan wa fogongan wan kaarakitay somonog, ginya madi ka tirigo ham tifonan wan hangko basad dongdong. ³¹ Is Hisos natoltol sadi yak halimbawa has taw, iglwang, Nogfahalimbawa in Diyos banwanan fag sakop kiti wan. Ha sadik taw igtanom sadik botol mostasa sat baba iyab. ³² Kat natanom hat basad iyab ka ogbot man has fagayo fag botol, dapat no natobo wan, kabali dahol man has fagayo fag fangofiyon. Kabali wa fon hayo it kadaholan, manok digfogad wan sat baba sanga. ³³ Is Hisos natoltol ya ngay sadi yak halimbawa, In Diyos banwanan fag sakop kitos famadahol tinapay ka sadik ina nafaaktom sas tolok sarok harina, hanggan wandahol sadi wak dahonya. ³⁴ To fagayo is Hisos natoltol has fakaaywanan fag manga taw sas manga halimbawa, idwa yadig toltol has fakaaywanan no bohonwa las halimbawa. ³⁵ Is Hisos natoltol kitonya kaarakitay ka fangampang fwayong hyabi im-anod kitay, Las manga halimbawa lamang ho no homampang has taw, Ho fadog has taw ka manga idyapdin dog gi yapdis kalig daga. ³⁶ Ginya madis Hisos naobon wa ka fakaaywanan fag manga taw, nasakbaw wa has basad balay. It manga katogbong naakbang ha hanya, iglwang, Ha fatwaan igdog hyami ka toltolan ka dwat fag lamnon sas basad namay. ³⁷ Is Hisos nasagot has taw, Kagtanom fiya fag botol kawa aho, Kanbali Taw. ³⁸ Ka namay kawastay sas baba daga. Ka fiya fag botol kawan Diyos sakop fag manga taw, hanggan ka dwat fag lamnon in Fandaya sakop fag manga taw. ³⁹ Ka kalaban kagtanom tonya idwa ha iba, kawas Fandaya. Ka fanganion sawas katabowanan fag sirang hanggan ka manga gani kawa manga anghil. ⁴⁰ No kinday nontifon ka manga lamnon hanggan insonog, kitonya yadi aba kamlag sas katabowanan fag sirang. ⁴¹ Aho, Kanbali Taw, somogo angko manga anghil aban, ta domayo a, tomifon fagayo kagfasayag dog has dwat iba taw, hanggan ka gogali yadi dwat, ka maaktoman sangko sakop, ⁴² omokas yadi tonya ha basad fadosaan afoy. Sinya ta mangodgorawan, hanggan wasta ngifon di mangarigitan wan. ⁴³ Dapat ay, ka mangan tohoyan han Diyos bilang wagyawa kitos myanit sat Ama sakop aban. Ham no ha manga talinga ya ngadi, fag talinga wan. ⁴⁴ In Diyos banwanan fag sakop kitos kaakwa malobgoban basad iyab. Sadik taw no nangodkod sinya nalag wan, ginya madi

natabon ya. Nabaya wa dahol dahol kat lagan matagowan basad daga. Yakanga nafasali it manga botang fagayo, ginya nasali tonya fag iyab. ⁴⁵ Kitonya yadi in Diyos banwanan fag sakop, kitos sadik fanlako kagsayak manga mahalga fag ono. ⁴⁶ No nalag nga sadik ono kafiyaon, hanya nafasali it manga botang fagayo fagayo, ginya nasali ka ono mahalga. ⁴⁷ In Diyos banwanan fag sakop kito yadis sadik sarap dahol kasta fagokason ha basad dagat, giktan yadi bokod bokod fag manga oyang. ⁴⁸ Ka sarap no napno ta nagoyod has bahalan bintalan. Ginya ka manga taw intokaw wan, igfalayon ka manga oyang bokod bokod. Ka fiya fag oyang ta natifon sasta basad sohadan, dapat naokas lamang kadwa fiya fag manga oyang. ⁴⁹ Kitonya yadi kamlag aban sas katabowanan fag sirang. Ka manga anghil imbangkad falayon ka manga ha ogali dwat hanggan ka mangan bokod han Diyos, ⁵⁰ omokas ha basad fadosaan afoy ka ha manga ogali dwat. Sinya ta mangodgorawan hanggan wasta ngifon di mangarigitan wan. ⁵¹ Is Hisos naintaw has taw, Ngatay ham natwa wagdog tonya fagayo? Taglwang, Ala. ⁵² Yakangas Hisos iglwang, Kawa kitonya fagayo kagfaadal Batasan Hodyo nombali yadi in Diyos banwanan fag sakop it katogbong, kitosagfon balay kagbangkad git fwalidan manga botang fiya fag bagay bago, hanggan ka gona. ⁵³ Nontabo wagtoltol to fag manga halimbawa, is Hisos inlahaw wa ginya. ⁵⁴ No nwali hat sadili banwanan, is Hisos igtoltol sasta basad fanimbaan. Ka manga matalingan kataka wagdog, taglwang, To fag taw gindak nabol it kadonongan? Twa oman gibolon kitonya fag manga madolaw? ⁵⁵ Bohonwa awkin it ama ka famanday balay? Bohonwa awkin it ina is Mariya, hanggan da Santyago, da Hosi, da Simon, da Hodas, it manga fadwasay ama? ⁵⁶ Idwa awkin istay yadik maoliyanan it manga fadwasay ina? Gindak nabol to fag kadonongan fagayo? ⁵⁷ Yakanga tadwa katalinga in Hisos. Dapat is Hisos nafwayong has taw, Nyawa siday manga taw magalang has fangampang, nodwa sat sadili banwanan, ngatay sat sadili talanahan. ⁵⁸ Yakangas Hisos idwa naibolon aywan fag manga madolaw sinya maskin tadwa katiwala hanya.

14 Gis nanya fag masohod in Hisos manga naibolon indahit han Hirodis ista gorangon sas sakop Galiliya. ² Ginyas Hirodis nafwayong hat sadili manga sogowan, Tos Hwan kagfatogna manga taw hyabi. Hanyan boyag ya mangharaw, yakanga syagan gibolon manga madolaw fag manga bagay. ³ No kitay di, hyabi is Hirodis mandi ka nafagamat has manga taw in Hwan, nafagafos yadi, ginya nafaporiso wan kawas Hwan naato in Hirodis, maskin is Hirodis nabol it tagyaw, is Hirodiyas, in Filipi babay. ⁴ Is Hwan fagaba kabaya in Hirodis, hanya nalwang, Idwa fiya haw no kagaw im tagyaw. ⁵ Yakangas Hirodis kasayag fahatay

in Hwan, dapat hanya kadala ka manga Hodyo, maskin ta natwa waglag kitay is Hwan in Diyos fangampang. ⁶ Ginya madi aban, gis nanya fag masohod ta nogtohod in Hirodis kasagayan, in Hirodiyas anak ina natayok san Hirodis manga fakilalaon faglagan. Labi was Hirodis insaya waglag, ⁷ yakanga hanya nafatohoyan has dayaga, nalwang, Nyawa kanam fagsagadon ho domisag wa ha hyamo. ⁸ Ka dayaga naolit kat ina nafasognod, kitay, Kati wan, disagan angko sas basad finggaan, in Hwan alfoyo, ka Hwan kagfatogna manga taw hyabi. ⁹ Is Hirodis no nadog ka dayaga fagsagadon, hanyan rongkot wan, dapat idwa nasyagan nabawit hampang kawat manga fakilalaon nadog wat nafatohoyan has dayaga, yakanga nafasognod has taw kitay, Disagan has dayaga it fagsagadon. ¹⁰ Yakangas Hirodis nafalifong is taw in Hwan liyog. ¹¹ Ta nafwalid ka alfoyo sas basad finggaan, ginya nadisag has dayaga. Ka dayaga nadiya wan hat ina. ¹² Araw in Hwan manga katogbong hawas porisowan, nabol in Hwan habilogan, nalobgob wan. Ginya ta nafwayong han Hisos no kinday kasta naibolon han Hwan. ¹³ Is Hisos no nadog di ngay kitonya, nasahay wan basad baloto, ginya hawas difay linaw, somaman yap nangos gis fakaaywanan fag manga taw. Dapat ka fakaaywanan fag manga taw no nadog kitay is Hisos hanya wan, tanbangkad gis manga banwa, nalahaw baba daga, natagbo hanya. ¹⁴ Is Hisos no nadokson sat nakadagsaan, iglag ka manga taw kaaywanon. Hanyan awa waglag is taw, hanggan nafafiya ka manga ha sagit kasta nataban hanya. ¹⁵ Ginya madi, araw, myanit no kabalihid wan, in Hisos manga katogbong hawan Hisos, iglwang, Tam istay sawas basad fakahyabogan, ka myanit kasangday yadi wan. Falahawan yap nangos has manga tifonan balay sas ligongan ka manga taw, kaarakitay ta manali ista sadili fanganon. ¹⁶ Is Hisos iglwang, Ham hawag falahaw ka manga taw, fag ham wa ka domisag fanganon has taw. ¹⁷ Taglwang, Tam idwa hanon nodwa limak tinapay, dowak oyang. ¹⁸ Is Hisos iglwang, Ham diyan has-tay. ¹⁹ Ginyas Hisos nafatokaw sas baba lamnon ka manga taw. Ginya no nabol ka limak tinapay hanggan dowak oyang, natangdan has tongod a, nabaya han Diyos ka fanganon. Ginyas Hisos nafaarogbotan ka manga tinapay a, nadisag hat manga katogbong, ginya ka manga katogbong nahoray has manga taw. ²⁰ Ginya madi fagayo nangwan wa a, napsog wan. Ta natifon ista sawad nakanan mafaarogbotan safolo ya ha dowak boyog ka napno. ²¹ Manga 5,000 ka manga ama ka nahwan, bokod wa ka manga ina, hanggan manga anak. ²² Ginyas Hisos dagos wa nafasahay has basad baloto it manga katogbong, nafagona wa has difay linaw dahol. Is Hisos in-goyan yapdi, bago di nafaoli ka fakaaywanan fag manga taw. ²³ Ka manga taw nonlahaw wan, is Hisos nalahaw yadi wa has baba

moyod kaarakitay mandarangin. Inyabi wa sinya sas baba moyod. Is Hisos idwam dowa sinya, ²⁴ dapat ka baloto sawas baba linaw, ayayo gis gobang, manga taob bilang wagsampok, kawa bagyo marigon nogso-ba wa has bohid. ²⁵ Dapat, no kayawa wan, is Hisos naoyan yadi wat manga katogbong, nalahaw sas baba danom. ²⁶ Dapat ay, it manga katogbong kadala wa dahol dahol iglag, taglag haglahaw sas baba danom. Tagrokyaw wan, Tya labang wan. ²⁷ Dapat is Hisos nadagos wa ngap nahampang has taw, nalwang, Ham fag idwa kadala, aho di. ²⁸ Is Pidro nalwang, Angko Fon, no haw wa ngay, haw falahawan yadi wangko sas baba danom. ²⁹ Is Hisos nasagot, Fag hastay ngay. Yakangas Pidro nadokson gis basad baloto, nalahaw yadi wa has baba danom, hawan Hisos baliwa. ³⁰ Dapat is Pidro no bago di naayfan kitay ha bagyo mangharaw, indala wan, hanya ganong wan tabon has daga danom. Is Pidro natawag, Angko Fon, angko Fon, ha salahapan wangko. ³¹ Is Hisos nadagos wa nasalahap yabay. Ginya nalwang han Pidro, Laya hadwa bangan igsyag hangko maskin. Kana mayon haw no gadowan? ³² Ta nonsahay has basad baloto, ka bagyo dagos wantohas. ³³ Ka manga taw basad baloto nafasayagdog in Hisos, taglwang, Haw orongan wa in Diyos Anak. ³⁴ Ta no nadifay ka linaw dahol, tandagsa wan sas banwa Ginisarit. ³⁵ Ka manga taga sinya no nahilala in Hisos, ta dagos wa nafadahit has manga taw sinyasta ligongan kitay is Hisos indasog wan. Yakanga ta nataban hanya fagayo ka ha manga sagit. ³⁶ Tagsagad kitay, Ha fatawidan di ngay ka manga ha sagit, ngadim tobwan rotay, kaarakitay tamfiya wan. Fagayo ka natawid in fiya ngay.

15 Aban, tibak Farisiyo hanggan mangag faadal Batasan Hodyo gis banwa Hirosalim naakbang han Hisos. Ta naintaw hanya kitay, ² Kana mayon im manga katogbong nodwa katanog intam manga magorang ogali gis hyabi hyabi? Ta kwan wa hanon nyawa tadya naogas fiya fiya ista sadili gamat kito ka ogali magorang fwayong. ³ Is Hisos nasagot is taw, Kana mayon ham nodwa katanog in Diyos Togon maskin ham katanog yapdi ka ogali magorang gis hyabi hyabi. ⁴ Is Diyos natogon kitay, Ha fag idwag falamang im ama hanggan im ina. Natogon yadi kitay, No fakta ka kampang ig sabayon ngatay hat ama, ngatay hat ina, fiya man hanya no matay wan. ⁵ Dapat ham iglwang, Nyawa faktaw noglwang, ngatay hat ama, ngatay hat ina, kangko togbong hara hayo ho nadisag wa han Diyos, ⁶ No nalwang di nga kitonya, nyawag falamang it ama, fiya di. Ka hayo fakatanogon ka odi ogali magorang, yakanga ham idwag fahalgan in Diyos togon. ⁷ Ham ha takan wan. Anod, kitonya ngay in Isayas, in Diyos fangampang fwayong hyabi kawa ha hayo, ⁸ Is Diyos iglwang, Hampang odik masayag dog, Dapat ista fangayofan ayayo gingko. ⁹ Idwa ha

kahologan ta nogfasayagdog angko Maskin ogali odi taw kasta fagfaadalon. ¹⁰ Ginyas Hisos nafaakbang hanya ka manga taw, iglwang kitay, Ham fagayo fag matalingan, ham fag tomwa wagdog yadi angko bato fwayongon ha hayo. ¹¹ Bohonwa kasta hanon ka has basad bibig kagfadwat ista fangayofan, dapat ista hampang kadwa fiya gista basad bibig kagfabali idwa fiya ka taw. ¹² Ka manga katogbong naakbang han Hisos, nalwang, Haw fadi wadtwa kitay ka manga Farisiyo inhorig dog im fwayong. ¹³ Is Hisos nasagot, Fagayo fag fon hayo ka bohonwa angko Ama sam tongod it tanom, imgoyod lamang aban. ¹⁴ Fabayaan lamang tonya fag manga taw, manga odi bota kagfango manga taw. No bota ka gamit bota, fagayo dowa imdagdag ha basad ohang. ¹⁵ Dapat is Pidro nafwayong han Hisos, Ha fatwag dogan yap hyami im halimbawa haraw. ¹⁶ Is Hisos nafwayong, Ham awkin idwa yadi twagdog? ¹⁷ Ham awkin idwa twa kitay nyawa kana kasta samsamon, nontolon wan hawas basad tiyan ginya aban imolay di? ¹⁸ Dapat ka hampang kalfas gis basad bibig giwas fangayofan, tonya wa kagfabali idwa fiya ka taw. ¹⁹ Maskin giwas fangayofan nogfabago ka manga isip dwat, ka mangag fahatay taw, ka mangag fabayowan, hanggan nyawa anahan, nyawa dayaga gofodan lamang, ka mangag nahaw, ka mangat fwayong bohonwa orongan, hanggan ka mangag fadwat igdog ka tiba taw. ²⁰ To fag manga ogali kagfabali idwa fiya ka taw. Dapat ta no kwan hanon, nyawa tadwa naogas ista gamat fiya fiya, kito ka ogali magorang, tonya idwag fabali idwa fiya ka taw. ²¹ Ginya madis Hisos inlahaw wan hawas akbang banwa Tiro hanggan banwa Sidon. ²² Yabay sadik ina taga Kanaan, kagbanwanan sinya naakbang han Hisos, nahampang marigon, nalwang, Angko Fon, in Dabid hasokfonan Anak, gwadi ha fakaawa angko. Labang gwayan wagfahoriyan angko anak ina. ²³ Is Hisos idwa ha naawang ngadi sadik hampang. Ginyan Hisos manga katogbong iglwang hanya, Disagan nangos hanya it fagsagadon kaarakitay omobon wantam. Tam kembang wagdog, fagaba wa goyan santam ginanan. ²⁴ Is Hisos nasagot kiti, Is Diyos nasogo angko has manga topa matalangan gin Israil tifonan lamang. ²⁵ Dapat ka ina naakbang ya han Hisos, nalibabaan sat atobangan, iglwang, Angko Fon, togbongan angko. ²⁶ Is Hisos nasagot, Idwa fiya bomol ka anak taw fanganon, ginyag disag has manga ido. ²⁷ Ka ina nasagot, Anod, Angko Fon, dapat nyawa di kasta manga ido kwan ka manga tingaw kandagdag git afo nakanan. ²⁸ Yakangas Hisos nafwayong hanya, Ina, marigon mangharaw haw nogsyag hangko. Im fagsagadon fag im-anod wan. Ginya madit anak dagos wanfiya. ²⁹ Da Hisos no nalahaw wa ginya, infwali ya has bahalan linaw dahol, linaw Galiliya. Ginyas Hisos hawas baba moyod, sinya wak matokawan. ³⁰ Kaaywanon fag manga taw in-

barangkadan han Hisos, ha taban manga gafilay, manga fihong, manga bota, manga boyon, ha akwa yadi tibak sagit. Ta nafwalid ka manga ha sagit han Hisos atobangan. Is Hisos nafafiya wasta sagit fagayo. ³¹ Ka manga taw indolaw wan, ta noglag ka manga boyon haraw kampang ya, ka manga fihong infiya wan, ka manga gafilay iglahaw ya, hanggan ka manga bota in-foga yat mata. Yakanga tagfasayagdog in Israil Diyos. ³² Ginya madis Hisos nafaakbang hanya it manga katogbong, iglwang, Ho kaawa wa to fag manga taw kaaywanon, maskin kati tolo wak sirang ta no gofod intam, namin wat manga balon. Ta nodyapdi ha nahwan hanon, hodyapdi kasayag faoli ka manga taw, ngandayo tamlobbay wat lonos boknga dalan nodwa ha nahwan hanon. ³³ It manga katogbong nalwang, Tam sawas basad fakahyabogan, tam gindak bomol manga tinapay homosto no kayo was nwa fag manga taw? ³⁴ Is Hisos naintaw has taw, Kayoday hayo tinapay is nyamo? Tagsagot, Fitok tinapay hanggan ha oyang yadi sayok garogbot. ³⁵ Is Hisos nafatokaw ka manga taw sas baba daga a, ³⁶ nabol ka fitok tinapay hanggan manga oyang. Ginya, nontabo wagbaya in Diyos, nafaarogbotan ka fanganon, nadisag hat manga katogbong. Kat manga katogbong nafahoray wan has manga taw. ³⁷ Fagayo nangwan, napsog ya ngadi. Ta no natifon ista sawad nakanan fanganan nafaarogbotan, napno fitok baban. ³⁸ 4,000 ama ka nangwan, bokod wa ka manga ina hanggan manga anak. ³⁹ Ginya madi is Hisos nafaoli ya ngawan ka manga taw. Ginya nasahay yadi wa has baloto hawas banwanan Magadan.

16 Ginya madi manga Farisiyo tiba hanggan manga Sadosiyo naakbang han Hisos. Ta kasayag so-lay hanya, yakanga tagsagad in Hisos kitay hanya fag ha falagon madolaw gin Diyos banwanan sam tongod. ² Dapat is Hisos nasagot kitay, Gwadi no kayabi ham iglwang kitay, No marom aban, fiya fag sirang no kalag di, idwa ha dangga sas banwa. ³ Ginya madi no marom marom ham iglwang, Homwayan wa araw maskin malanbong wa ka banwa. Ham bilang yadi wagbasa ka hayo manga faglagon sas banwa sam tongod, dapat ham idwa twag lag ka hayo manga lagan ka madalanan kati fag masohod. ⁴ Ham ka kati fag masohod fag manga taw myasa wa kitonya, dwat hayo manga ogali, ham idwag fasakop in Diyos. Ham igsayak yapdi ka falagon madolaw, dapat hodwa ha fagfalagon madolaw nodwa kito kan Honas nadalanan nafahalimbawa. Ginyas Hisos nafatawas was taw, nalahaw wan. ⁵ Da Hisos no nadifay ka linaw dahol, it manga katogbong bago di natohod kitay tadwa nadiya it balon tinapay. ⁶ Is Hisos iglwang has taw, Ham fag matagahan, fag idwa kasaya ka manga Farisiyo manga Sadosiyo famadahol tinapay. ⁷ It manga katogbong nangarintawan no kanat kahologan in

Hisos fwayong, taglwang, Kawa tam idwa ha diya tinapay maskin is Hisos iglwang kitonya. ⁸ Dapat is Hisos natwa wan kasta faglwangon, yakanga naintaw is taw, Kana ham nogtoltolan yapdi kawa ham idwa ha balon tinapay? Ham idwa bangan igsyag angko. ⁹ Ham awkin idya twagdog mangharaw? Ham awkin idwag tohod aho no nafaarogbotan ka limak tinapay, kawa has 5,000 taw? Kayodak boyog tinapay ka nalabi ka hayo natifon? ¹⁰ Kitonya yadi ka fitok tinapay kawa has 4,000 taw, kayodak baban tinapay ka nalabi ka hayo natifon? ¹¹ Kana ham nodya twagdog kitay bohonwa tinapay kangko faglwangon? Ham fag matagahan has manga Farisiyo hanggan Sadosiyo famadahol tinapay. ¹² Yakanga ta natwa wagdog kitay ka manga Farisiyo hanggan Sadosiyo manga faadalon kan Hisos fagfatagahon, bohonwa ka fagfaaktomon famadahol has tinapay. ¹³ Ginya ta nondasog sas sakop Sisariya, ka Sisariya ka san gorangon Filipos sakop, is Hisos naintaw it manga katogbong kiti, Fakta, hono, aho Kanbali Taw, ta noglwang? ¹⁴ Ta nasagot kiti, Tibag lwang, haw, honos Hwan kagfatogna manga taw hyabi. Tibag lwang haw is Iliyas hyabi. Tibag lwang ya-di kitay haw, hono, is Hirimiyas hyabi hyabi, ngatay haw in Diyos fangampang sadi ya. ¹⁵ Ginyas Hisos naintaw hat manga ofod, Dapat no ham kaglwang, faktaw aho, ham gayfan? ¹⁶ Is Simon Pidro nasagot, Haw wa kan Diyos-natogon-Famawi. Im Ama kawas Diyos boyagan. ¹⁷ Is Hisos iglwang han Simon, Simon, in Honas anak, haw bomaya wan maskin angko Ama ka sat banwanan sam tongod ka nafatwagdog ha hyamo no faktaw aho, bohonwa taw ka nafatwagdog hyamo. ¹⁸ Hogfwayong yadi ha hyamo, haw is Pidro, sadik bato. Sinya fag baba Bato ho homalig angko Tifonan, hanggan nyawa sakbawan Daga Salad idwa domaog angko Tifonan. ¹⁹ Ho domisag yadi ha hyamo ka manga sosi sakbawan han Diyos banwanan fag sakop. No kana kam fagbandoon istay is baba daga, kitonya yadi ka san Diyos banwanan sam tongod ka fagbandoon. No kana kam fagfaangayon istay is baba daga, kitonya yadi ka san Diyos banwanan sam tongod ka fagfaangayon. ²⁰ Ginyas Hisos nabando yapdi marigon hat manga katogbong kitay ta fag idyapdig fwayong nyawa hada fag taw kitay hanya in Diyos-natogon-Famawi. ²¹ Gis nanya ginan is Hisos bago di nafadog fiya fiya hat manga katogbong kitay hanya fag loma-haw has banwa Hirosalim, hanggan aywan it agwantaon mahori sinya aban. Maskin ka manga fagtahinan sas banwa hanggan manga fagtahinan fagalan-han-Diyos hanggan ka mangag faadal Batasan Hodyo fahoriyan hanya sinya, fahatay yadi wa hanya. Dapat ay, aban, hanyam boyag ya sas fatolo fag sirang. ²² Is Pidro nafasaman ogbot gis taw in Hisos, igfabago gato hanya, iglwang kiti, Hyami Fon, is Diyos nangos fag idwag faangay tonya. Idwa fiya ha hyamo no kitonya.

²³ Dapat is Hisos nasayango wan Pidro, ginyag Iwang, Satanas, fag lahaw wa gistay haw. Haw igtoplan dingko bato lahawan. Haw idwa goyon in Diyos, haw goyon odi has taw. ²⁴ Ginya madis Hisos nalwang hat manga katogbong, Nyawa faktaw no kasayag tahin angko, falibangan fagaba kat sadili fakasayaon, fasanan it sadili fatimbangan hayo, ginya madi tahanan wangko. ²⁵ Nyawa faktaw not sadili haboyagan it fagfahalgaoon, tonyam liyam di, dapat ay, kadwa kwan-git it sadili haboyagan, kawa hangko, it haboyagan idwam liyam. ²⁶ Kana kat fakinabangon, ham gayfan, sadik taw no omafo sadi wak dahonya baba daga, halimbawa, dapat ay, it sadili haboyagan nomliyam di aban? Kana ara it bayad kaarakitay bomawi yat sadili haboyagan, ham gayfan? ²⁷ Maskin aban, aho Kanbali Taw imbangkad ya, angko manga anghil mahoyogan hangko, hanggan angko Ama kafiyang malagan yadi sangko gis nanya. Gis nanya aban aho gomanti has fagayo kawasta naibolon no kinday. ²⁸ Dog ngay, bonwa bohag, tiba taw kastay idya matay nodya lomag angko, aho Kanbali Taw, kadasog kabali hari hangko sakop.

17 Nonsagaya onom ik sirang, is Hisos nafasaman git manga katogbong tiba, inda Pidro hanggan da Santyago da Hwan dowasay, nataban has baba moyod abwat. ² Ta no sinyang wan, ta nalag in Hisos habilogan inoman wan, fiya wa dahol kabantay. It walong igyawa kitos myanit, it manga rotay it kaabohayan di, masilaw wan. ³ Sadi odi ginan da Pidro nalag inda Mwisid da Iliyas kampang han Hisos. ⁴ Yakangas Pidro nalwang han Hisos, Yabay kafiyang, hyami Fon, tam fag istay yapdik madogayan. Haw no kasaya, ho fomalo hayo tolok dongdongan, insadi hyamo, insadi in Mwisid, insadi in Iliyas. ⁵ Is Pidro no kampang yapdi, sadik linyabo masinay nalanbong is taw. Ginya ha nahampang gis basad linyabo iglwang kiti, Toy angko fagalwasiyon fag anak, hogbaya wa dahol hanya. Fag hanya ka hayo fagtalingaon. ⁶ Ka manga katogbong indala wa dahol dahol ta no nadog tonya fag hasnog, ta nakfo di malohoban. ⁷ Dapat is Hisos naakbang has taw, natawid, ginyag Iwang, Ham fag kabangon wan, ham fag idwa kadala. ⁸ Ta no natangdan has tongod yabay, tadwa ha lagan taw no bohonwas Hisos lamang. ⁹ Araw, ta noglahaw has lwad, is Hisos natogon it manga katogbong kitay, Aho Kanbali Taw nodyan boyag ya gis kahatayan, ham hayap igfwayong has taw kan Diyos nafalag hayo kati haraw. ¹⁰ Ka manga katogbong naintaw in Hisos, Kana mayon ka mangag faadal Batasan Hodyo noglwang kitay bago bago is Iliyas fag imbangkad yapdi? ¹¹ Is Hisos nasagot, Is Iliyas imbangkad ya ngay, mamatalaga fagayo fag manga bagay. ¹² Hogfwayong ha hayo, no kitay di, is Iliyas inbangkad wan, dapat ka manga taw idwa nahilala hanya. Ta naibolon hanya no kinda odi ista

fakasayaon. Kitonya yadi aban ta no fahoriyan angko, aho Kanbali Taw. ¹³ Ginya madi ka manga katogbong natwa wagdog kitay is Hwan kagfatogna manga taw kan Hisos fagwason. ¹⁴ Araw, ta nonfwali ya has lwad, ta nalag aywan fag manga taw matifonan. Sadik ama naakbang han Hisos, nanlingkohodan sat atobangan, iglwang ha hanya kiti, ¹⁵ Ama kin, haw fakaawa angko anak ama. Hanya fagaba wa kalobay. No natoon ya nga kitonya, mahori wa dahol dahol, maskin fagaba kakfo has basad afoy, nomtoon katogna has basad danom. ¹⁶ Ho nataban hanya ha hyamo manga katogbong, dapat tadwa nasyagan nafafiya. ¹⁷ Is Hisos nasagot, Ham kawa kati fag masohod fag manga taw ka dwat wa dahol kawa ham idwa yadig syag angko. Ginahin ya kin nangos aho fag omofod yapdi hayo, ham gayfan? Kandogay day aho fag gagwanta yapdi hayo? Tabanan ka anak hastay. ¹⁸ Is Hisos nangabaya ka labang, ginya ka labang dagos wa nalin gis basad anak. Ginya madi, ka anak infiya wa dagos. ¹⁹ Araw, in Hisos manga katogbong naakbang hanya, nodwa yadi hagdog iba taw, ta naintaw hanya kiti, Kana mayon mi nodwa nasyagan igfaalin ka labang? ²⁰ Is Hisos nasagot, Maskin ham idwa bangan igsyag angko. Hogfwayong ha hayo, orongan wan, no daho yap man has botol mostasa ogbot ogbot, ham nogsyag angko, ham tomwa waglwang toy fag moyod, Haw fag malin wa gistay, haw fag hanya wan. Ginya yabay hanya wan. Ham somyagan di omibolon fagayo. ²¹ Dapat ka kito fag labang idwa malin no bohonwa kitay ham idwa kwan hanon kaarakitay mandarangin mahogod. ²² Aban ogbot, is Hisos hanggan it manga katogbong nogtifonan sas sakop Galiliya, is Hisos nafwayong has taw, Ta kaakbang wa fagamat angko has taw aban, aho Kanbali Taw. ²³ Ta fahatay yadingko, dapat ahom boyag ya sas fatolo fag sirang. In Hisos manga katogbong inrongkot wa dahol dahol igdog. ²⁴ Da Hisos nondasog sas banwa Kapirnaom, ka mangag sohot bohis Hodyo kawa has Fanimbaan-Dahol naakbang han Pidro. Ta naintaw hanya kiti, Kagfaadal hayo igbayad awkin bohis Hodyo? ²⁵ Is Pidro nasagot, Ala, igbayad ngay. Ginya madi, is Pidro no nwali has balay, is Hisos dagos wa naintaw in Pidro, iglwang, Kanam fangayofan Simon? Ka manga gorangon sas baba daga, gindak somohot manga bohis, ngatay manga kabahagi, ngatay giwat manga kapariho, ngatay gis iba taw? ²⁶ Is Simon nasagot, Giwas iba taw nogsohot. Ginyas Hisos iglwang, No kitonya, ka manga gorangon idwag sohot bohis git kapariho. ²⁷ Nyawa kitonya, fiya man ta nodwa ha faglwangon intam, haw fag hawas gobang linaw, haw fag banwit wan. Bol kam iktan oyang gona, haw fag fangangan it bibig, haw lomag sinyang sadik kwarta pilak. Bol tonya, bayadan intam bohis, tam dowang.

18 Gis nanya fag masohod in Hisos manga katog-bong naakbang hanya a, naintaw, Fakta aban ka abwat man it kangayanan san Diyos banwanan fag sakop? ² Is Hisos natawag sadik anak ka sawasta ak-bang a, nafalindog ka anak sasta fagbokngan. ³ Ginyag Iwang, Hogfwayong hayo, bonwa bohag, hayo manga fangayofan nodwam oman, ham nodwa tomolad kitos anak, nyawa kindawan ham idwam ak-tom san Diyos banwanan fag sakop. ⁴ Nyawa faktaw kagfalibaba it fangayofan kito fag anak, tonya ka abwat man has fagayo it kangayanan san Diyos banwanan fag sakop. ⁵ Nyawa faktaw kagtanggap sadik anak kito, maskin galwasi angko, aho yadi kat fagtangapon. ⁶ Dapat ay, sadik taw nogfayayom has ogali dwat sadik anak ogbot kito kagsyag angko, fiya man ha hanya ta no somiyok sadik bato gilingan mabyat sat boknga liyog, kagfayayom has dwat, ginya omokas tonya fag taw ha basad kaabasan dagat. ⁷ Isyay wan istay is baba daga, maskin ha akwag fayayom manga taw has dwat fag ogali. Idwa kabol id ha akwa ka gibolon kitonya, dapat ay, isyay wan ka manga taw kagfayayom tiba taw has ogali dwat. ⁸ Nom gamat ibolon, ngatay im bitis lahawan kagtaban hyamo has ogali dwat, lifongan lamang tonya, okasan wan. Nyawam gamat, ngatay im bitis nodwam dow, ha no hayap man has haboyagan balay balay, fiya man has gamat no dow, ngatay bitis no dow, haw nodyap man im-okas ha basad afoy kadwa kapsa. ⁹ Nom mata man kagfasayag lag hyamo has ogali dwat, sowatan wan, okasan wa yadi. Nyawam mata idwam dow, ha no hayap man has haboyagan, balay balay, fiya man has mata dow haw nodyap man im-okas has hadasogan fadosaan taw sas afoy. ¹⁰ Ham fag matagahan, ham fag idwag yod ngadi sadik anak ogbot kito. Hogfwayong ha hayo kitay, ista manga anghil sam tongod fagaba sangko Ama atobangan sat banwanan sam tongod. ¹¹ Maskin Aho Kanbali Taw inbangkad hastay kaarakitay bomawi ka mangan liyam. ¹² Kinda kasta ibolonon, ham gayfan, ka taw no ha topa sadik daan, sadi nogtalang? Idwa awkin omobon yap ka siyam ik safolo ha siyam kwan lamnon sas moyod, ginya madi somayak ka topa ka natalang? ¹³ Hogfwayong ha hayo hanya no nalag ya kanliyam, hanyag baya wa dahol dahol tonya, bohondi kito ka siyam ik safolo ha siyam kadwan talang nobaya. ¹⁴ Kitonya yadi, hayo Ama sat banwanan sam tongod, it fangayofan kitay, ngadi sadik anak ogbot kito fag idwam talang. ¹⁵ Im fadwasay no ha naibolon dwat ha hyamo, ha sabangan hanya. Ham dow dow fangampangan yap. Hanya nogtalinga hyamo, ham ogali mandi aban mangofodan. ¹⁶ Dapat hanya nodwag talinga hyamo, tabanan sadi yak taw, ngatay dow kaarakitay ha faorongan hayo toltolan fagayo. Ngatay dow, ngatay tolo kagfaorongan. ¹⁷ Hanya nodwa yadig talinga has taw,

fwayongan han Diyos Tifonan. Ginya madi, hanya nodwa yadig talinga han Diyos Tifonan, ham fag fatimbang hanya bilang sadik Hintil, ngatay sadik fanohot bohis Roma. ¹⁸ Hogfwayong ha hayo, no kana ka hayo fagbandoon istay is baba daga, kitonya yadi ka fagbandoon san Diyos banwanan sam tongod. Kitonya yadi, nyawa kana ka hayo fagfaangayon sas baba daga, tonya yadi ka fagfaangayon san Diyos banwanan sam tongod. ¹⁹ Hogfwayong yadi ha hayo, ham nogdarangin, ham no dowak taw kasadi hayo fangayofan nogsagad nyawa kana fag bagay, angko Ama sat banwanan sam tongod faanod hayo fagsagadon.

²⁰ Maskin nyawa siday ta nogtifonan, manga dow, ngatay tolo, kawa galwasi angko, aho sinya yadi mafodan is taw. ²¹ Ginyas Pidro naakbang in Hisos, naintaw hanya, Hyami Fon, kayoday ginan nangos aho nogfaliyam angko fadwasay naogali dwat hangko? Balis fito ginan, aho awkin igfaliyam yapdi? ²² Is Hisos nasagot hanya, Hodwag Iwang kitay fag balis fito ginan lamang, yatokitay, ka fito ginan fabaliyan fitok safolok olit ham nogfaliyam kitonya. ²³ Maskin kito kan Diyos banwanan fag sakop. Halimbawa, sadik gorangon igsohot it manga sogowan bayadan ha hanya. ²⁴ Kasta nataban gona has gorongan ka ha bayadan 10,000,000 piso. ²⁵ Maskin ka sogowan idwa ha famayadon, kagfon sogowan iglwang has taw, Fasaliyan wa hanya hanggan wat babay, it manga anak hanggan it manga sangkap fagayo fagayo, kaarakitay hanya lomang it bayad. ²⁶ To fag sogowan nanlingkohodan hat fon atobangan, igfaawaon wa hanya, iglwang, Hayap igfatangon angko, aho aba bomayad di fagayo. ²⁷ Ka fon sogowan in-awa di hanya, yakanga nafaliyam it bayadan fagayo, idwa ngap nasohot. ²⁸ Dapat tonya fag sogowan nonsagaya ginya, nahablang yadit kapariho, it ofod sogowan ka ha bayadan yadi ha hanya, 500 piso. Nagamat ka ha bayadan ha hanya, yakanga nasohol, iglwang, Ha bayadan im otang hangko. ²⁹ Kat ofod sogowan nanlingkohodan ha hanya, nafaawaon yadi, iglwang, Hayap igfatangon angko, aho aba bomayad di fagayo. ³⁰ Yatokitay, ka sogowan gona idwag fagomon igsohot hanggan wa nafaporiso hanya hanggan wad bomayad. ³¹ Kawasta manga ofod sogowan, no nalag ka sogowan gona naibolon, tanhori wat manga fangayofan, hawasta fon, nafwayong wa fagayo kat lagan kat sogowan gona naibolon dwat. ³² Yakanga kasta fon nafatawag hanya, nalwang, Ha dwat wa dahol fag sogowan, gwadi ho nafaliyam im otang fagayo maskin hagfaawaon wangko. ³³ Hon-awa hyamo, gwadi ha fag kaawa yadim kapariho. ³⁴ Ginya madi, kawat fon kaisog yadi wa hanya, nafaporiso yadi wa hanya hanggan wad bomayad it otang fagayo. ³⁵ Kitonya yadi kangko Ama sat banwanan sam tongod it ibolonon ha

hayo fagayo ham nodwa yadig faliyam, sadi wak dahonya fangayofan, hayo fadwasay naogali dwat ha hayo.

19 Ginyas Hisos nontabo wagtolto tonya fag manga halimbawa, ta nalahaw wan gis Galiliya, hawas banwanan Hodiya sas difay safa Hordan.
² Kaaywanon fag manga taw ka naoyan hanya, hanggan is Hisos nafafiya yadi ista manga sagit sinya. ³ Ha manga Farisiyo naakbang han Hisos, naintaw hanya, igtikis wa nangos igfasalan hanya. Taglwang, Maangay di awkin has Batasan Hodyo ka ama no omobon it babay ngadi kana kat fasingyanan? ⁴ Is Hisos nasagot, Ham awkin idwa nabasa sas Kasoratan kitay, gis fabagowanan, kawa Nahalig taw nahalig ama hanggan ina? ⁵ Hanya yadi ka nalwang kitay, Kawa nahalig kitonya, ka ama somaman wa git manga ama manga ina, ginya ka talsawa mangofodan wan, tambali wa sadi di. ⁶ Yakanga ginya wa ginan fawa dowa, dapat tambali sadi di. Kan Diyos nafasadi, fag idwa ha taw igfasarowayan. ⁷ Ka manga Farisiyo naintaw ya in Hisos kiti, No kitonya, kana mayon is Mwis no natogon kitay ka ama domisag yap fangobonan kasoratan hat babay, bago di gobon hanya? ⁸ Is Hisos nasagot, Kawa hayo manga fangayofan myasa wa maganit, is Mwis nafaangay yadi wan nyawa mangodgobonan. Dapat no gi dis bago bago idwa kitonya. ⁹ Yakanga hogfwayong ha hayo, nyawa fakta fag ama no omobon it babay, no bohonwa kitay it babay fabayowan wa dahol, ginya bomabay has iba ina, yagfabayowan wan. Hanggan ka bomabay ista nagobonan igfabayowan yadi wan. ¹⁰ In Hisos manga katogbong nafwayong hanya, No kitonya mangharaw, ka ama fiya man nodwa hara igbabay. ¹¹ Dapat is Hisos nasagot kiti, Idwa fagayo omagwanta kitay idwa bomabay, no bohonwa kan Diyos kafangayofanan fag kitonya. ¹² Maskin bokod bokod ista fadalan, manga ama idwa kasaya bomabay. Tiba kawa gis anak dararag danwa kitonya, tiba kawasta naibolon ha hanya, yakanga idwa kasaya ina, ginya madi ha akwa yadi tiba kagtikis wadwag babay kaarakitay tomogbong in Diyos banwanan fag sakop. Ka omagwanta kitonya fag tomonglos kitonya. ¹³ Ginya madi, ha akwa manga taw nataban manga anak han Hisos kaarakitay is Hisos fomwalid it gamat sas manga anak baba alfoyo, hanggan mandarangin. In Hisos manga katogbong nangabaya was taw. ¹⁴ Dapat is Hisos iglwang, Ham hawa kabaya ka manga anak no gakbang angko. Ham fag idwag toplan tonya maskin ka ha fangayofan kitos anak ka omafo in Diyos banwanan fag sakop. ¹⁵ Is Hisos nafwalid di ngay it gamat sas manga anak baba alfoyo, ginya nalahaw wan. ¹⁶ Ginya yabay ha sadik anahan naakbang han Hisos, naintaw kiti, Haw kagfaadal, kana kangko bato ibolonon ka fiya, kaarakitay ho lomag haboyagan kadwa ha katabowanan? ¹⁷ Is Hisos nasagot, Kana haw no gintaw angko no kana ka fiya? Sadi lamang ka fiya.

Haw no kasaya tomanggap ka haboyagan, haw fag katanog ka manga Batasan Hodyo. ¹⁸ Hanya naintaw, Kana kin nangos fag manga Batasan? Is Hisos nasagot, Haw fag idwag fahatay taw. Haw fag idwag fabayowan, haw fag idwag nahaw, haw fag idwag bangdan is taw. ¹⁹ Haw fag idwag falamang im ama hanggan im ina, hanggan fag kito yadim sadili habilogan haw no kaawa im kapariho. ²⁰ Ka anahan nalwang, Gwadi ho katanog wa tonya fagayo. Kana yapdi araw angko bato ibolonon? ²¹ Is Hisos nasagot kiti, Haw no kasaya kitay fag kabali hosto wa fiya fiya, haw fagoli wan, fasaliyan im manga botang fagayo fagayo, ginya ha fahafodan has manga myabog it manga sali, ginya yabay, haw ha akwa wa kaakwa san Diyos banwanan sam tongod. Ginya madi, ha fag hayastay, tahanan wangko. ²² Ka anahan no nadog kitonya, nalahaw wan, inbalaw digdog, maskin hanya maakwa wa dahol. ²³ Ginyas Hisos nafwayong hat manga katogbong, Hogfwayong ha hayo, bonwa bohag, ka maakwa fag taw mahori kaaktom han Diyos banwanan fag sakop. ²⁴ Hogfwayong ya ha hayo, malpos man ka hayopan kamilyo nogdalan has basad toho dagom has taw maakwa nogfasakop han Diyos. ²⁵ In Hisos manga katogbong indolaw wa dahol igdog it fwayong, yakanga ta naintaw kiti, No kitonya mangharaw, fakta fag manga taw kambawi? ²⁶ Is Hisos no mabantayan hat manga katogbong, iglwang, No taw di, idwa ha somyagan omibolon tonya, dapat is Diyos syagan di omibolon fagayo. ²⁷ Ginyas Pidro iglwang, Lag nga hami kati, mi naobon wa hyami akwa fagayo a, mi natahin wa hyamo. Kana ara kin ka hyami? ²⁸ Is Hisos nafwayong has taw, Fanlag nga aban, aho, Kanbali Taw, no tomokaw wan sangko fanokawan gorongan sas bago fag daga, ham kagtahin angko kati, ham tomokaw yadi sas safolo ha dowak fanokawan gorongan kaarakitay kabali manga fangabaya in Israil safolo ha dowak layonan taw. ²⁹ Nyawa faktaw no gobon it balay, ngatay it manga fadwasay, ngatay it ama hanggan ina, ngatay it manga anak, ngatay hanggan it manga daga, kawa ahot fagalwasiyon, kayonya fag gatos it tanggapon, ginya madi tomanggap yadi haboyagan kadwa ha katabowanan. ³⁰ Dapat aywan ka gona imgoyan man, hanggan ka goyan gomona wa aban.

20 Is Hisos iglwang, In Diyos banwanan fag sakop kito, halimbawa. Sadi kagfon obasan nalahaw marom marom yapdi, igsayak it famalo. ² Ta no narananggapan it tangdanan, sadik sirangan limak piso, ginya kagfon nasogot manga famalo has obasan. ³ Kagfon obasan noglahaw, myanit no kaabwat wan, nalag tibak taw matokawan odi sayo faktaban balay. ⁴ Nafwayong has taw, Ham fag hanya yadi, ham fangibolon angko obasan, ho tomangdan hayo hosto. Yakanga ta hanya wan. ⁵ No boknga wa sirang araw,

kagfon obasan nalahaw ya ngawan, hanggan myanit no kalibaba, dow a ya ginan, naibolon kito ka haraw. ⁶ Myanit no kasangday wan, hanya nalahaw ya ngay, nalag ya ka tiba kadwa ha ibolon. Nafwayong has taw, Kana ham nostay di, sadi wak sirangan kalibang odi matorosanan? ⁷ Ta nasagot, Maskin idwa hagfafalo hyami. Hanyag lwang, No kitonya, sogi, ham fag hanya wan, ham fangibolon wa sangko obasan. ⁸ No kataklob wa marom, kagfon obasan nafwayong hat natogon kagbahala hat manga sogowan, Haw tawagan angko manga famalo. Haw fag tangdan was taw, fabagowan yap ka manga goyan nangibolon hanggan bago ara ka gona. ⁹ Ka manga bago nangibolon no kayabi wan natanggap myasa limak piso. ¹⁰ Ginya madi ka manga nagona naibolon gayfan it tanggapon ngandayo dahol man inya, dapat fagayo pariho di ngap it natanggap, myasa limak piso. ¹¹ Ta no natanggap wat tangdanan, tagsohot yapdi gisagfon obasan, igmanaw yapdit tangdanan. ¹² Taglwang, Kandasog goyan sadi odik tama sinyahod no nangibolon dapat hami sadi wak sirangan gibolon, minyaya wa maalhanggan basad myanit. Yakana haw nogfaparihowan hyami tangdanan? ¹³ Kagfon iglwang ha sadik famalo, Ama, hodwa nadaya hyamo. Gwadi intam taranggapan dandi limak piso, idwa aw? ¹⁴ Haw fag bol no dahoday ka hyamo, haw fagoli wan. Ho kasayag tangdan ka goyan daho yadi ka hyamo tangdanan. ¹⁵ Kana ha no kahori, bohonwa awkin aho ka bahala kangko sadili akwa? Ngatay ham kaingli odi kitay aho mahoway has taw. ¹⁶ Yakanga ka goyan gomona wan hanggan ka gona imgoyan man. ¹⁷ Da Hisos noglahaw yapdi has bohid, has banwa Hirosalim baliwa, is Hisos nafasaman ka safolo ha dowak katogbong gis fakaaywanan. Ta noglahaw yapdi is Hisos igfwayong has taw kiti, ¹⁸ Yabay, tam hawam bohid has Hirosalim kati. No sinyan wan ta fagamat angko, aho Kanbali Taw, has manga fagtahinan fagalan-han-Diyos hanggan has mangag faadal Batasan Hodyo. Tonya fag manga taw fatohoyan angko has kahatayan. ¹⁹ Ta fabahala yadingko has manga Hintil. Ka manga Hintil yomod angko, manga bomakbak, ginya pomako angko sas nafatimbangan hayo. Dapat ay, ahom boyag ya sas fatolo fag sirang. ²⁰ Ginyan Sibidiyo babay hanggan wat manga anak naakbang han Hisos, nanlingkohodan sat atobangan, ha fagsagadon. ²¹ Is Hisos iglwang, Kanam fagsagadon gingko? Ka ina nasagot, Haw faangayan nangos tongko manga anak dow a fag ha kangayanan igtokaw sa hyamo akbang, haw nombali hari, insadi sam balis sihon, insadi sam balis wala. ²² Is Hisos iglwang, Ham idwa twa hayo fagsagadon. Ham awkin syagan omagwanta ominom gingko fanginoman kahorihan aban? Taglwang, Ala, mi somyagan di. ²³ Is Hisos iglwang, Ham ominom ngay gingko fanginoman aban. Dapat bonwa aho ka bahalag fili no faktaw ka

tomokaw aban sangko balis sihon, ngatay balis wala. Ka hayo faglwangon tokawan, angko Ama ka danwa nafatalaga no faktaw ka tomokaw sinyan. ²⁴ In Hisos manga katogbong tiba, safolo, no nadog ista fagsagadon, ta kahori wa dahol tonya fag dowak fadwasay. ²⁵ Yakangas Hisos nafaakbang ha hanya it manga katogbong fagayo, ginyag lwang, Ham fadi wadtwa kitay ka manga fagtahinan Hintil ha takan nogbahala has taw, hanggan ista manga gorangon igbaya wagfasognod it sakop. ²⁶ Dapat ham fagayo fag idwa kitonya. Yatokitay, nyawa fakta sa hayo ka kasaya kabali abwat it kangayanan, fag kabali di ngap hayo sogowan. ²⁷ Nyawa faktaw ka kasaya kabali fagtahinan, fag kabali di ngap bilang hayo nasali sogowan, ²⁸ kitungko, aho Kanbali Taw, kanbangkad hastay, bohonwa kitay aho kasta fagtogbongon, fag aho di ngap ka tomogbong is taw, hanggan igdisag angko haboyagan ka fangafiyon, kaarakitay tomobos has fakaaywanan taw. ²⁹ Da Hisos nontolas gis banwa Hiriko, aywan ka goyan gin Hisos ginanan. ³⁰ Yabay, ha dowak ama, pariho bota, matokawan sas bilog dalan. Ta nogdog kitay is Hisos igdalan wa sinyan, tagharokyawan wan, taglwang, Haw, in Dabid hasokfonan Anak, haw fakaawa hyami. ³¹ Manga taw nangabaya ka manga bota, tawag faawang nangos. Dapat ka manga bota kadahol di ngap nogrokyaw, igsakitan wan, Hyami Fon, haw in Dabid hasokfonan Anak, haw fakaawa hyami. ³² Is Hisos intorosan, natawag has bota, naintaw, Kana ka hayo fakasayaon angko togbongon ha hayo? ³³ Tagsagot kitay, Haw kagfon hyami, hyami mata fag imfoga ya nangos. ³⁴ Is Hisos in-awa ngay, naayohap ista manga mata. Yakanga infoga wa dagos, ginya madi ta natahin wan Hisos.

21 Kati yabay ta kadasog wa has banwa Hirosalim. Araw, ta nondasog sas tifonan balay Bitfagi, sas Moyod Oliboan, is Hisos nafagona kat manga katogbong dow a. ² Is Hisos natogon kitay, Ham fag hawas masoson fag tifonan balay. Ham araw nomdasog sinyan, ham lomag wa dagos sadik inan habayo libaba matarabingan, ha anak yadi sinyan. Lohasan it tarabing a, goyodan fagayo dow a hastay. ³ No ha taw gintaw hayo, ham fag lwang, Kagfon intam kasaya somahay, ginya madi kagfon habayo fadiya wa hayo dagos ka manga habayo. ⁴ In-anod wa nga kitonya kaarakitay ka fangampang fwayong hyabi imtonglos wan kati noglwang kitay, ⁵ Ham fwayongan has banwa Siyon, Lag ngay tya wamlwad ka hyamo gorangon kadasog wan. Hanyadwa ha takan, masahayan sa odis habayo libaba, Sa odi sadik anak habayo libaba. ⁶ Ginya madit katogbong dow a inlahaw wan, intanog in Hisos sogo. ⁷ Ta nagoyod ka inan habayo libaba hanggan wat anak, ta nasagmak it manga rotay aba sas baba goyoy manga habayo. Ginyas Hisos nasahay wan. ⁸ Kaaywanon fag manga taw nasagmak it manga rotay san

Hisos fagonan lahawan. Tiba taw nabonggo manga sanga hayo, nasagmak yadi sinyas boknga dalan. ⁹ Kaaywanon fag manga taw ka gonan Hisos hanggan goyan igtarawagan marigon, taglwang, Kafiyaon in Dabid hasokfonan anak. Ka kadasog san Diyos ngayan fag bomaya wan. Kafiyaon ka san Diyos banwanan sam tongod im tongod. ¹⁰ Araw is Hisos nonsakbaw basad alad Hirosalim, sadi wak banwa gagran. Ta garintawan, taglwang, Fakta mayon to fag ama? ¹¹ Ka fakaaywanan nasagot, To kawas Hisos ka fangampang gis Nasarit, sakop Galiliya. ¹² Ginya madis Hisos nasakbaw has basad aladan Fanimbaan-Dahol. Nasogo ha dayo alad ka mangag balidya hanggan ka mangag sali basad aladan. Nafatobong kasta fwalidan kagbalyo kwarta hanggan ka mangag balidya salompati manga tokawan. ¹³ Is Hisos nalwang, Gwadi insorat sas Kasoratan, Ta fag ngomayan angko balay, Balay Fandaranginan, Dapat ham nafabali angko balay oliyanan odi manga fangnahaw. ¹⁴ Ha manga bota hanggan manga fihong sinyas ka naakbang han Hisos basad aladan Fanimbaan-Dahol. Yakangas Hisos nafafiya is taw. ¹⁵ Ka manga fagtahinan fagalan, hanggan ka mangag faadal Batasan Hodyo, kahori sat manga basad fangayofan no nalag in Hisos manga naibolon madolaw. Ta kahori yadi ka manga anak nogtarawagan sas basad aladan Fanimbaan-Dahol, maskin tagfasayagdog hanya, taglwang, Kafiyaon in Dabid hasokfonan Anak. ¹⁶ Ka manga ha kangayanan naintaw in Hisos kiti, Haw awkin igdog yadi wan ista fwayong kawa ha hyamo? Is Hisos nasagot, Hogdog ngay. Ham idwa awkin nabasa ka kito fag manga toltol sas Kasoratan, Giwas manga bibig anak ogbot, hanggan ka mangag soso yapdi haw nafahosto nogfasayagdog hyamo? ¹⁷ Da Hisos nadokson ya ngawan, nalahaw gis banwa, hawas Bitanya. Sinya wak nigya. ¹⁸ Nonsirang, da Hisos no kafwali ya has banwa Hirosalim, is Hisos kalonos wan. ¹⁹ Is Hisos no nalag sadik fon igos sas bilog dalan, hanya nabantay. Dapat idwa ha lagang bohad sinyas fag fon, labong odi. Yakangas Hisos nahampang has fon igos, iglwang, Hadwa bomohad domwag nyawa ginahin. Yakanga ka hayo dagos wanlayong, intonga wan. ²⁰ Ka manga katogbong no nalag, tandolaw wan, ta gintaw, Twa oman intonga wa dagos to fag fon igos? ²¹ Is Hisos igsagot, Bonwa bohag, ham nodwa gadowan igsyag in Diyos, ham somyagan yadi omibolon bondi kitongko naibolon has nwa fag fon igos. Nyawa ham lomwang toy fag moyod, Haw fag galin wa gis nyamo, loksowan has basad dagat, im-anod wa ka hayo fwayong. ²² Ham nogsyag in Diyos, ham tomanggap nyawa kana ka hayo fagdaranginon. ²³ Araw da Hisos nasakbaw has basad aladan Fanimbaan-Dahol. Is Hisos nogfaadal yapdi sinyas, manga fagtahinan fagalan-han-Diyos hanggan manga fagtahinan sas banwa naakbang hanya, naintaw, Kanam

kangayanan haw no gibolon to fag manga bagay? Fakta ka nadisag hyamo kangayanan kitonya? ²⁴ Is Hisos nasagot has taw, nalwang, Ho ngap omintaw yadi hayo, ham no somagot angko, ho bago di fomwayong ha hayo no kana kangko kangayanan gibolon to fag manga bagay. ²⁵ Ginda kan-ginan in Hwan kangayanan igfatogna manga taw, ngatay gin Diyos banwanan sam tongod, ngatay gis taw? Tagfabarohagan ha sadi ha sadi, taglwang, Tam no lomwang giwan Diyos banwanan sam tongod, is Hisos lomwang hantam, Kana mayon ham nodwa katiwala in Hwan hyabi? ²⁶ Dapat, tam no lomwang, Gi odis taw, manga taw ngandayo omisog intam, maskin ka fakaaywanan fag manga taw natwa waglag kitay is Hwan in Diyos fangampang. ²⁷ Yakanga ta nasagot in Hisos kitay, Midwa yadi twa. Ginyas Hisos nafwayong, Hodwa yadi fomwayong hayo no ginday angko kangayanan gibolon to fag manga bagay. ²⁸ Kinda ham gayfan no kito? Ha sadik ama it anak ama dowa. Ka ama hawat anak sadi, igsogo hanya, iglwang, Haw fag gibolon hantam obasan kati. ²⁹ It anak nasagot kitay, Ho kafang di. Dapat araw araw ogbot in-oman yat fangayofan, ya hanya wan, nangibolon. ³⁰ Ka ama hayat anak sadi ya, nafwayong yadi kitonya. Yakanga kat fadowa fag anak iglwang, Ala, ho hanya wan, dapat idwa ngap ginya. ³¹ Fakta kantanog it ama fwayong, ham gayfan? Ta nasagot, Kat nasogo gona kantanog. Is Hisos iglwang has taw, Hogfwayong ha hayo kitay, bonwa bohag ka manga fanohot bohish Roma, hanggan ka manga fabayowan fag manga ina gomona man ara hayo kaaktom han Diyos sakop. ³² Maskin is Hwan indasog ha hayo, fadi wad nafwayong ha hayo ka fiya fag ogaligon, dapat ham idwan tiwala hanya. Dapat ka manga fanohot bohish Roma hanggan ka manga fabayowan fag manga ina intiwala hanya. Ham fadi wad nalag kitay kitonya, dapat ham idwa yadi nasoyo, idwan tiwala hanya. ³³ Ham fag matalingan sadi yak halimbawa. Ha sadik taw nananom manga obas sat baba daga, maaladan ya ngadi. Natigib yadi dalifi ista fanli-dan obas, nahalig sadik ansagan abwat, ista bantayan. Ginya madi nafabahalat obasan hat manga fangano. Kagfon obasan hawas iba banwanan ayayo. ³⁴ Nondasog wa famohadon, famangtaon wan, kagfon obasan nasogo it manga sogowan kaarakitay bomol it kahorayan bohad git manga fangano. ³⁵ Dapat ka manga gano obasan naisog di ngap ka manga sogowan. Ka sadik sogowan ta nabakbak. Ka sadi ta nafahatay. Ka fatolo ta nabintok bato. ³⁶ Kagfon obasan nasogo ya domwag, aywan man ka gona it nasogo sogowan, dapat kitonya mandi kasta naibolon has taw. ³⁷ Ginya madi, no dogay, ka man it anak kat nasogo. It fangayofan iglwang, Ta gomalang wa nangos angko anak. ³⁸ Yatokitay, ka manga fangano obasan, no nalag kagfon obasan it anak, tagtololan kitay, To wa aba ka

omafo it ama kaakwaan. Kalibang, tam fahatay wa hanya, ngan aba tam wa ka omafo ka obasan. ³⁹ Ta nagamat wa hanya, nagoyod hanya has dayo obasan, nafahatay wa sinya. ⁴⁰ Yakanga kagfon obasan no mwali aban, kanat ibolonon hat manga fangano, ham gayfan? ⁴¹ Ta nasagot kiti, Hanya fahatay yadi wa araw tonya fag dwat fag manga taw, faano ya domwag it obasan has tiba taw ka domisag it kahorayan no ginahin aba sas famangtaon. ⁴² Ginyas Hisos naintaw has taw kiti, Ham idya awkin nabasa to fag toltolan gis Kasoratan? Ka manga fangalig balay fagdayoon fag bato, Tonya di ngap kagfaganit ka balay sas basad solok. To in Diyos naibolon, Tam kadolaw waglag. ⁴³ Yakanga hogfwayong ha hayo, bohonwa ham kambali in Diyos sakop, dapat sadik layonan taw ka katanog it sogo fiya fiya, tonya wa kambali in Diyos sakop. ⁴⁴ Kamdagdag hanya fag baba bato, imbolang, dapat ka bato no kadagdag sasta babaw, kamlibit sas daga bato imrogrog lamang. ⁴⁵ Ka manga fagtahinan fagalan hanggan manga Farisiyo no nadog in Hisos manga halimbawa, nasarom kitay hawa ngap ista manga sadili in Hisos fagfatangonon. ⁴⁶ No kitay di ta kasaya wa gomamat in Hisos, dapat ta kadala di ka manga taw, maskin kat fakaaywanan natwa waglag kitay, is Hisos in Diyos wa fangampang.

22 Sadi ya ginan is Hisos nafahalimbawa has taw, iglwang, ² In Diyos banwanan fag sakop kito nangos. Sadik gorangon nafatalaga fanganon ayo ayo kawat anak ama mamabay wan. ³ Ginya ka gorangon nafasabang ya it manga sogowan has taw kat manga nafadog itfagonan, dapat ta kafang kabangkad. ⁴ Nasogo ya domwag ka tiba sogowan, natogon has taw kitay, Ham fag fwayong hantam manga nagsabangan itfagonan kitay, intalaga wa yabay ka fanganon, ho nasogba wan angko manga baka, hanggan kangko manga nafalakbog manga anak baka. Fagayo fag manga fanganon intalaga wan. Fag lwang has taw, Ham fag hastay wa kati has fanganan famabayan. ⁵ Dapat kasta nagsabangan itfagonan bilang didwa nadog. Ta nanarowayan it lahawan bokod bokod, insadi hat iyab, insadi mamalidya wan. ⁶ Tiba nagamat di ngap ka gorangon manga sogowan, nabakbak ya ngadi hanggan wa nafahatay. ⁷ Ka gorangon in-isog wa dahol dahol is taw. Nasogo wat manga sondalo, nafahatay yadi wa ka mangag fahatay taw. Ta nasonog yadi wat banwanan. ⁸ Ka gorangon nafwayong hat manga sogowan, No kitay di intalaga wan ka fanganon, dapat kantam nagsabangan fag manga taw idwa fiya igfasakop hastay. ⁹ Yakanga ham fag hawas basad karsada ka ha manga taw ayo ayo. Ham tabanan hayo lagan fagayo hastay has fanganan famabayan. ¹⁰ It manga sogowan inlahaw ya ngay has manga dahol fag karsada, nataban wan kat lagan fagayo, nyawa ka manga dwat fag taw, nyawa ka fiya. Yakanga napno

wa taw sat fanganan famabayan. ¹¹ Araw, ka gorangon nasakbaw mamantay ka manga taw, nalag sinya sadik taw kadwa ha solong rotay famabayan. ¹² Ka gorangon naintaw hanya, Ama, yakana haw no nasakbaw hastay idwa ha rotay famabayan? Ka taw idwa naawang.

¹³ Yakanga ka gorangon nafwayong hat manga sogowan, Ham gafosan it gamat hanggan bitis. Ham okasan hanya has basad marom sas sokayan. ¹⁴ Sinya manga taw omoraw hanggan wasta ngifon di mangarigitan wan. No kitay di aywan ka gorangon nafatawag, dapat sayok kat nafili. ¹⁵ Ginya madi, ka manga Farisiyo inlahaw wan, nanoltolan no kinda no omiktan in Hisos git sadili hampang nangos. ¹⁶ Yakanga ta nasogo han Hisos ista sadili manga katogbong tiba, hanggan in Gorangon Hirodis manga sakop tiba. Tagmaswag odin Hisos, taglwang hanya, Haw kagfaadal has taw, mi twa kitay haw idwag bohag, hanggan sonson wa orongan kam faadalon has taw kan Diyos fakasayaon ista manga ogaliyon. Hadwa ha fagihidon taw, maskin hagfapariho wan di fagayo fag manga taw. ¹⁷ Yakanga, fwayongan hyami, kana kam fangayofan? Maangay awkin sas Batasan Hodyo tam nogbayad bohis han Sisar, ngatay idwan? ¹⁸ Dapat ay, is Hisos fadi wad twagdog kasta bato lwangon dwat, yakangag lwang has taw, Hayo hampang bilang wa fakyason no kadog di. Kana mayon ham nogtikis wa nangos igfasalan angko? ¹⁹ Tay, ka kwarta, falagan angko ka kwarta famayad bohis. Ta nadisag ngay han Hisos sadik kwarta mabilog. ²⁰ Is Hisos naintaw has taw, Gafo tolad hanggan ngayan insorat istay? ²¹ Ta nasagot, In Sisar wa nga tolad tonya. Ginyas Hisos iglwang has taw, No kitonya, kan Sisar, disagan wa han Sisar, kan Diyos disagan wa han Diyos. ²² Tandolaw wagdog in Hisos sagot, ta naobon di hanya, nanarowayan lamang. ²³ Gis nanya yadi fag sirang, manga Sadosiyo kagfabohag kitay ka manga natay idwam boyag ya domwag, naakbang han Hisos. Taglwang hanya kitay, ²⁴ Haw kagfaadal has taw, is Mwis natonogon kitay, Sadik ama no matay idwa ha anak sat babay, it fadwasay fag bomabay ya kat tagyaw kanbalo kaarakitay no ganak, bilang man di ka natay it ama. ²⁵ Itfagonan sa hyami ha tasayan fitok ama kagdowasayan. Kasta ahan nababay, idya ha anak, natay wan. Nafamataw it babay hat fadwasay ama. ²⁶ Kitonya yadi kanlag kat fadowa fag indogan, hanggan fatolo hanggan wat fafito. ²⁷ No natay wa fagayo fag tasayan ama, hanggan ka ina natay yadi wan. ²⁸ Yabay gafo babay tonya fag ina, ta nomboyag ya, kawa ka fitok tasayan nababay hanya istay? ²⁹ Is Hisos nasagot has taw, Ham igfalamang wa dahol dahol, kawa ham idwa twa ka Kasoratan, idwa yadi twa in Diyos karigonan. ³⁰ Maskin ta nomboyag ya aban, fawa hagbabay gindogan, tambali kitos manga anghil san Diyos banwanan sam tongod kadwa yadig babay.

³¹ Kawa has manga natay no kaboyag ya, ham idwa awkin nabasa sas Kasoratan in Diyos nafwayong ha hayo? Hanyag Iwang, ³² Aho in Abraham wa Diyos, aho in Isaak wa Diyos hanggan in Hakob yadi Diyos. Ka manga taw boyagan lamang kan Diyos fagsakopon, bonwa ka manga mahatayan. ³³ Ka fakaaywanan fag manga taw no nadog in Hisos sagot, tandolaw wat manga fwayong. ³⁴ Dapat ka manga Farisiyo matifonan odi ta no nadog kitay ka manga Sadosiyo nadaogan din Hisos sas toltol. ³⁵ Sadik Farisiyo ka madonong wa dahol has manga Batasan Hodyo, naintaw in Hisos kaarakitay igsolay hanya, nalwang, ³⁶ Haw kagfaadal, sida ka marigon man has fagayo fag manga Togon kan Mwisid natogon? ³⁷ Is Hisos nasagot, Haw fag galwasi in Diyos kagfon hyamo, sadi wak dahonya fangayofan, hanggan sadi wak dahonya isip. ³⁸ To ka gona hanggan marigon man has fagayo fag manga togon. ³⁹ Kitonya yadi kat fadowa. Haw fag galwasi im kapariho kito yadim sadili. ⁴⁰ Ka manga Batasan Hodyo fagayo hanggan ka manga fangampang adal sinya wa kansakop sas dowak togon. ⁴¹ Ka manga Farisiyo no matifonan yapdi, is Hisos naintaw is taw, ⁴² Kana ka hayo fakatwawon kawa han Diyos-natogon-Famawi, ka Kadasog fag Gorangon? Gafo hasokfonan anak tonya? Ta nasagot, In Dabid hasokfonan anak. ⁴³ Is Hisos iglwang, No kitonya, ka Maliyaw fag Falad no nafaisip in Dabid, kana mayon is Dabid nogngayan it hasokfonan anak, kagfon hanya, noglwang ⁴⁴ Is Diyos nafwayong hasagfon angko, Haw fag matokawan yap sangko balis sihon, No bali day hodya nafasakop fiya fiya ha hyamo im manga kalaban fagayo. ⁴⁵ Kati nos Dabid man di ka nangayan in Diyos-natogon-Famawi, kagfon in Dabid, kinday hanya nogfon in Dabid not sadili odi hasokfonan anak, ham gayfan? ⁴⁶ Ngadi sadi sas taw idwa nalag it sagot han Hisos. Ginya wa ginan ta fawag fasolopan hanya kaarakitay omintaw hanya.

23 Ginya madis Hisos nahampang has fakaaywanan fag manga taw, hanggan hat manga katogbong, nalwang kiti, ² Ka mangag faadal Batasan Hodyo hanggan ka manga Farisiyo ka bilang in Mwisid tobos kati nogfaadal in Mwisid togon. ³ Yakanga ham fag talinga ista fwayong, fag katanog ista sogo. Dapat ay, ham fag idwag tolada ista manga ogali maskin ista manga ogali idwag faanod kasta adal. ⁴ Tagfagong ka manga mabyat fag ogali, bilang fagdiyaon, igfafasan hat sakop, dapat ay, tadwag sapkid ngadi ngap ista timoyo kaarakitay igfagat tonya. ⁵ Kasta manga ogali famalagon odi has taw kitay fiya. Tagfadahol it sohadan oksong sas boknga gamat hanggan sas boknga alfoyo. Ka masohadan sinya in Diyos hampang tiba. Tagfaaba yadit barobayan sat tobwan rotay. ⁶ Tagfahasa yadi ka tokawan hasta fon akbang fiya fiya, sas manga fanganan, hanggan ka fanokawan ka manga ha kangayanan sas fanimbaan. ⁷ Ta kasaya yadi manga

taw fag fadaholon hanya ta no gayayag basad banwa, manga taw fag ngomayan nangos is taw, Kagfaadal. ⁸ Dapat ham, ham fag idwag fangayan ha sadik taw kitay, Haw kagfaadal, maskin kagfaadal hayo sadi di, ham fagayo dowasay. ⁹ Ham fag idwag fadaholon ngadi faktaw sas baba daga nogngayan hanya hayo Ama, maskin sadi di hayo Ama, ka hayo Ama sat banwanan sam tongod. ¹⁰ Ham fag idwag faangay nyawa faktaw igngayan hayo, it fon, maskin sadi di kagfon hayo, kawan Diyos-natogon-Famawi, ka Kadasog-fag-Gorangon. ¹¹ Ka abwat man ha hayo it kangayanan, fag tonya di ngap kambali mahogod igtogbong, bilang hayo sogowan. ¹² Kagfatakagdog is taw, it kangayanan imbali ngap libaba, dapat ay kadwag fatakagdog, imbali ngap abwat it kangayanan. ¹³ Dapat, isyay wan, ham ka mangag faadal Batasan Hodyo, hanggan manga Farisiyo. Ham igfalagon odis taw kitay ham fiya. Ham igtaktak ka manga taw kaarakitay tadwag dasog han Diyos sakop. Bohondi kitay ham idwag sakbaw in Diyos sakop, ham igtaktak ya ngadi ka kasayang sakbaw. ¹⁴ Isyay wan ham ka mangag faadal Batasan Hodyo hanggan manga Farisiyo. Ham igfalagon odis taw kitay ham fiya. Ham iglogos wa ngap manga ina balo banwanan, hanggan hayo odi famalagon is taw ham nogdarangin kadogayon. Kawa kitonya ham, hayo fadosaan kamtohoayan ha hayo aban, mahori man ka tiba taw. ¹⁵ Isyay wan ham ka mangag faadal Batasan Hodyo hanggan manga Farisiyo. Ham igfalagon odis taw kitay ham fiya. Ham igdifay ya ngadi dagat. Ham iglahaw ayayo baba daga kaarakitay ham fatiwala ngadi sadik Hintil has ogali Hodyo. Ginya ham no nataban wan, ham igfabalit ogali dwat man ka hayo. Yakanga tonya fag taw aban, bohondi kito ka hayo no fiya fagfadosaon sas afoy kadwa kapsa. ¹⁶ Isyay wan ham manga bota kagfangolo is taw. Ham igfwayong kitay ta nogngayan ka Fanimbaan-Dahol nogtangkod marigon, nyawadwam tonglos tonya, dapat ham iglwang, ta nogngayan ka ginto sas Fanimbaan-Dahol ta nogtangkod, fag orongan wam-anod ista natangkod. ¹⁷ Ham manga bota, ham ka manga idagdog odi. Sida ka mahalga man, ham gayfan, ngatay ka ginto, ngatay ka Fanimbaan-Dahol maskin sinya wa ka ginto no nafabokod han Diyos. ¹⁸ Ham igfwayong yadi ka taw nogngayan ka danglayan nogtangkod marigon, nyawadwam tonglos tonya, dapat ay, ta nogngayan ka sinogba sas baba danglayan nogtangkod, fag im-anod wan ista natangkod. ¹⁹ Ham manga bota. Sida ka mahalga man, ham gayfan, ngatay ka sinogba, ngatay ka danglayan ka sinyan disag han Diyos ka sinogba? ²⁰ Yakanga, ta nogngayan ka danglayan, ta nogtangkod marigon, igfagat yadi fagayo kasta disag sinya. ²¹ Ta nogngayan ka Fanimbaan-Dahol nogtangkod marigon, igfagat ka Fanimbaan-Dahol hanggan ka goli sinya. ²² Ta nogngayan in

Diyos banwanan sam tongod ta nogtangkod marigon, igsakop in Diyos fanokawan gorangon, hanggan kagtokaw sinya. ²³ Isyay wan ham ka mangag faadal Batasan Hodyo hanggan manga Farisiyo. Ham igfalagon odis taw kitay ham fiya. Ham igdisag ka hayo fasafolo gis manga tanom famabanglo odi ofi, dapat ham igfasigpala di ka mahalga man fag adal gis Batasan Hodyo, kitos fag idwa ha fagihidon taw nogbolay fangabaya, ham fag kaawa ha sadi ha sadi, hanggan fag sonson wa maanod hayo hampang. Fiya ham nogdisag ka hayo fasafolo madi ngap, dapat ham fag katanog yadi to fag manga ogali mahalga. ²⁴ Ham manga bota kagfangolo manga taw. Ham matanogon no kadi garogbot fag bagay, dapat ay no ka mahalga fag manga bagay, ham idwa katanog, ham igfasigpala odi. ²⁵ Isyay wan ham mangag faadal Batasan Hodyo hanggan manga Farisiyo. Ham igfalagon odis taw kitay ham fiya. Ham gogas ya ngadi ka manga baba ongot, manga baba fingga, dapat ka sas basad manga odi bafaw wa dahol dahol kawa ham igtagagonaon, manga maingliyon ya ngadi. ²⁶ Ham manga Farisiyo bota. Falinayan yap man sas basad ongot, basad fingga, ginya madi ka sas babaw imbali yadi malinay. ²⁷ Isyay wan, ham mangag faadal Batasan Hodyo, manga Farisiyo. Ham igfalagon odis taw kitay ham fiya. Ham bilang kitos lobgoban kasta nafaabohay, fiya kabantay sas babaw, dapat sas basad manga odi boyok, manga botol natay, manga sitam. ²⁸ Ham kitonya wa fiya fiya. No sas faglagan di manga taw, ham kafiyaon wan, dapat ka orongan, dwat wa dahol dahol hayo manga ogali. Ham igfalagon odis taw kitay ham fiya. ²⁹ Isyay wan ham mangag faadal Batasan Hodyo hanggan manga Farisiyo. Ham igfalagon odis taw kitay ham fiya. Ham igfafiyan in Diyos manga fangampang lohob lobgoban, hanggan ham kalig yadi fatohodan ka manga taw fiya hyabi. ³⁰ Ginya ham iglwang, No hami di nangos ka boyagan hyabi gis nanya fag masohod, midwa ara naoyon has taw ta no nafahatay in Diyos manga fangampang. ³¹ Ham noglwang kitonya, ham igfatohoyan kitay ham ista manga hasokfonan anak ka manga nafahatay in Diyos manga fangampang. ³² Sogi, ham fatonglosan wan hayo manga hafowon nafabago. ³³ Ham manga abyanon wan, bilang odi hasokfonan abyanon no mada, kinday nangos ham no bomaybay ka fadosaan sas basad afoy kadwa kapsa? ³⁴ Yakanga hogsogo yadi ha hayo angko manga fangampang, hanggan ka manga madonong fag manga taw hanggan mangag faadal togon. Tiba aba ham fahatay wan, tiba ham fapako sas fatimbangan hayo, tiba ham bomakbak sa hayo basad fanimbaan, tiba ham mamahoriyan omalaw ha banwa ha banwa. ³⁵ Kawa kitonya, ham wa aba ka domog ka fadosaan fagayo ka nafahatay manga taw fiya sadik baba daga, gi yapdis hyabi hyabi, ta no

nafahatay in Abil kadwa ha kasalanan, hanggan ta no nafahatay in Sakariyas in Barakiyas anak. Ham nafahatay hanya sas faktaban fanonogan ista manga disag hanggan ka balay Fanimbaan-Dahol. ³⁶ Hogfwayong ha hayo, bonwa bohag, kasta fadosaan fagayo ka nabolon kitonya, ka manga taw ka kati fag masohod ka somagot. ³⁷ Haw, Hirosalim, Hirosalim, haw igfahatay in Diyos manga fangampang hanggan igbintok ya ngadi kan Diyos manga nasogo ha hyamo. Kayoda wa ginan ho kasayag lohob hyamo sakop fag manga taw, kitos ina ofa noglohob it anak sat daga fakfak, dapat haw Hirosalim, ha dayo di ngap. ³⁸ Yakanga kati ho orongan wa fabayaan lamang im oliyanan. ³⁹ Hogfwayong hyamo, haw fawa lomang angko domwag nodyam dasog gis nanya fag masohod haw no lomwang Ka kadasog hastay san Diyos ngayan fag bomaya wan.

24 Ginya madi da Hisos nadokson gis basad adan Fanimbaan-Dahol. Ta no kaginan wan, it manga katogbong naakbang han Hisos, igfasayagdog kitay kafiyaon ka manga balay Fanimbaan-Dahol. ² Dapat is Hisos iglwang, Lag ngay, to fag manga balay kati. Hogfwayong ha hayo, bonwa bohag, aban, idwa hamgoyan dowak bato igtarongbawan, fagayo imrofad lamang. ³ Araw da Hisos no matokawan sas baba Moyod Oliboan, it manga katogbong naakbang hanya, naintaw han Hisos, idwa sasta fagdogan fakaaywanan, iglwang kitay, Ginahin fag masohod aban ka Fanimbaan-Dahol nomdwat? Kana fag falagon madolaw kamlag aban kagfatohoyan kitay haw kaakbang wa kabangkad ya domwag, hanggan to fag daga it katabowanan wan? ⁴ Is Hisos nasagot has taw, Ham fag matagahan, ham fag idwa gadayaan nyawa faktaw. ⁵ Maskin aywan kambangkad aban, ngomayan yadingko ngayan, lomwang kitay, hanya wa kan Diyosnatogon-Famawi. Ta fatalang aywan fag manga taw aban. ⁶ Ham domog yadi aban ka manga madalag dog gis awayan hanggan manga barita awayan dahol dahol. Dapat ay, ham fag idwa galibitan. Talaga wa kitonya kamlag aban, dapat bonya tonya ka katabowanan. ⁷ Maskin aban ka manga layonan daga dahol manlabanan, kitonya yadi ka sadik gorangon sakop lomaban ha sadik gorangon sakop. No siday no siday aban, idwa ha hanon hanon, ka daga lominog yadi. ⁸ Dapat to fagayo kat fabagowanan lamang kahoriyan. ⁹ Gis nanya aban, maskin aho hayo fagalwasiyon, fagayo fag manga taw kadwat iglag hayo. Ta fagamat hayo has manga taw kaarakitay fahoriyan hanggan fahatay hayo. ¹⁰ Aywan ka domayo git fakatiwalaon, omisog yadi ha sadi ha sadi. Tibak taw, nyawat fakilalaon, omoyon it kalaban aban. ¹¹ Aywan aban fag bohagon fag manga fangampang imbangkad, aywan kat fatalangon. ¹² Ka manga dwat fag ogali im-aywan sadik baba daga, yakanga ista fangayofan aywan imlombay no galwasi in Diyos. ¹³ Dapat ay,

kadwag fagomon hanggan has katabowanan, ya hanya wa kambawi. ¹⁴ Ka Fiya fag Barita kawa han Diyos sakop imbarita yapdi ha sadik dahonya baba daga, kaarakitay fagayo fag manga layonan taw domog wan. Ginya madi yabay, bago di ka katabowanan fagayo. ¹⁵ Aban ham lomag kitay, igsagaya wa ogali fag dwat im-anod wan, idwa ha fag kitonyan, kan fangampang Danyal fagwason hyabi. Tonya mafwalidan aban sas lingoban kanbokod han Diyos. Kagbasa fag tomwa wagdog tonya. ¹⁶ Nom-anod aban, ka manga taw sas sakop Hodiya, fag dan waglagyo has moyod. ¹⁷ Ka sas sokayan balay fag idwam libang igbol yapdit botang git basad balay. ¹⁸ Ka sas iyab fag fawa goli kaarakitay bomol it rotay. ¹⁹ Isyay wan, no kaya ngadi manga gabosog hanggan ka ha manga anak ogbot igfasoso yapdi, gis nanya fag masohod aban. ²⁰ Ham fag darangin kitay ham noglagyo, fag idwa tomoon dayo abagat, ngatay has Sirang Kafahowayan. ²¹ Maskin gis nanya fag masohod aban, ka manga taw domog mahori wa dahol dahol, tadya ha nagdogan kitonya fag mahori, gi yapdis hyabi ka daga nonhalig balis kati, hanggan idwa yadi domog mahori man inya aban. ²² Nodwa ngalay imtohas tonya fag mahori, idwa ham sawad manga taw, ngadi sadi. Dapat ay, maskin is Diyos kaawa it manga nafili fag manga taw, hanya ngalay digfathas tonya fag mahori. ²³ Aban no ha akwag fwayong ha hayo kitay, Istay wan kan Diyos-natogon-Famawi, ngatay sinya wan, ham fag idwa katiwala. ²⁴ Maskin aban ha akwa mangag faniring in Diyos-natogon-Famawi. Ha akwa yadi manga bohagon fag fangampang imbangkad. Ta mamalag aban manga madolaw fag manga falagon hanggan manga fatimawa, kaarakitay fatalang in Diyos manga nafili, no somyagan di. ²⁵ Yabay, ho danwa nafadog hayo. ²⁶ Yakanga ta nogfwayong ha hayo, Sawas dayo basad talon. Ham fag idwa hanya. Ta noglwang, Sinya wan basad balay, ham fag idwa katiwala. ²⁷ Maskin aho, Kanbali Taw, malagan wa fiya fiya no kadasog aban, kito was hilat malagan no kilat gis salogan myanit baliwa hanggan wa has sangdayan myanit baliwa. ²⁸ No si-day ham iglag ka manga boyaw hagang igtifonan, ya sinya wa ka habilogan natay. ²⁹ Tonya fag manga kahoriyan nomtolas wan, Ka myanit dagos wamharom hanggan ka magdanon idwa yomawa. Ka manga fangangan imdagdag yadi gis banwa sam tongod, hanggan ka manga karigonan sam tongod, sas boknga fakayawan, imhadhawigan wan. ³⁰ Ginya madi, Aho Kanbali Taw, angko falagon madolaw imlag sam tongod is banwa a, fagayo fag manga layonan taw omoraw wan. Ta lomag angko, Kanbali Taw, kadasog sas baba linyabo, ha karigonan dahol, hanggan kangayanan abwat. ³¹ Ta fahasnog ka dahol fag bodyong. Ginya aho, Kanbali Taw, somogo angko manga anghil has ofat ik fongfongan daga, fatifon angko manga

nafili fag manga taw gis fagayo fag manga banwanan. ³² Ham fag twagdog ka adal kawa gis fon igos. Nogsalingsing, igsofot wan, tam twa kitay ka fangaraw kaakbang wan. ³³ Kitonya yadi, ham noglag to, kangko manga nafwayong kaanod wan, ham tomwa kitay aho, Kanbali Taw, kaakbang wa kadasog, sawas sakbawan alad. ³⁴ Hogfwayong hayo, bonwa bohag, to fagayo im-anod wan ka kati fag masohod fag manga taw no boyagan yapdi fagayo. ³⁵ Ka banwa sam tongod hanggan ka daga imliyam wa aban, dapat ay, angko hampang idwam liyam nyawa ginahin wan. ³⁶ Dapat idwa ha taw twa no ginahin fag sirang, no kinday ka myanit gis nanya tonya nom-anod. Nyawa ka manga anghil ka san Diyos banwanan sam tongod, nyawa aho in Diyos Anak, no bohonwas Diyos angko Ama, idwa ha twa no ginahin. ³⁷ Aho, Kanbali Taw, no kadasog aban, kitos gonaw hyabi san Nowi fag kashodan. ³⁸ Gis nanya hyabi, ka daga nodyan gonaw, manga taw kwan hanon, manga ginom, mangag babay hanggan gindogan, mangag tomboy it anak has anahan has dayaga, hanggan was Nowi insahay hat basad sahayon baloto. ³⁹ Sadi wa ginan ka gonaw indasog, tadwa tagak tagak, yakanga fagayo inlimos wan. Kitonya yadi kamlag aban, aho Kanbali Taw nomdasog. ⁴⁰ Gis nanya fag masohod aban, ha dowak ama gibolon sas iyab, insadi tomaban wan, insadi imgoyan di. ⁴¹ Ha dowak ina aban igtarogbongan iglobok, insadi tomaban, insadi imgoyan di. ⁴² Yakanga ham fag matagahan, maskin ham idwa twa no ginahin fag sirang kagfon hayo nomdasog. ⁴³ Dapat ham fag twa kitay kagfon balay no dandi twa no ginahin fag masohod basad yabi ka fangnahaw nomdasog, hanya danwa maologan, idwag fasakbaw ka fangnahaw hat balay. ⁴⁴ Yakanga ham fag fagaba matalagaan maskin aho, Kanbali Taw, kadasog gis nanya aban ham nodwa gisip kitay aho kaakbang wan. ⁴⁵ Faktaw ka matanogon hanggan madonong fag sogowan, ham gayfan? Kat fon nagtogonan kitay anowan it manga sogowan tiba, kaarakitay fahafod has taw ista fanganon no ginahin fag masohod ka fiya. ⁴⁶ Tonya fag sogowan bomaya wan it fon nogtahod hanyag fadagos it fon togon kitonya. ⁴⁷ Hogfwayong hayo, bonwa bohag, it fon faano hanya it manga kaakwaan fagayo. ⁴⁸ Dapat tonya fag ista nagtogonan nodwa fiya, it fangayofan iglwang, Angko fon imlibang yapdi, dogay di aban bago mwali. ⁴⁹ Yakanga tonya kasta nagtogonan igbakbak kat kapariho sogowan, igsayowan has manga kalango yadi, no manga kwan manga ginom. ⁵⁰ Yakanga ista fon mwali sas sirang kat nagtogonan fag sogowan nodwa tagak tagak, gis nanya fag masohod myanit, hanyadwa twa kitay it fon kadasog. ⁵¹ Yabay, tonya fag sogowan it fon no natahod kitonya, mahori wa dahol dahol nogfadosa hanya, faofod yadi hanya has manga taw kagfalagon odi is taw kitay fiya.

Ka manga sinya fag manga taw omoraw, hanggan wasta ngifon di mangarigitan wan.

25 Kito nangos in Diyos banwanan fag sakop nog-fahalimbawa. Ha safolok dayaga inlahaw kaarakitay tomagbo ka ama mamabay it fakilalaon. Ta fagayo ha diya ilawan, kafod wan. ² Yakanga ka lima fiya it fangayofan, dapat ka lima korang no naisip. ³ Ka korang no naisip ha diya ilawan ongay, dapat tadwa ha diya ista fandogang langis no mamin araw. ⁴ Dapat ay, ka manga fiya it fangayofan ha diya kat fandogang langis hat manga ilawan. ⁵ Ka bomabay inabala, yakanga ka manga dayaga fagayo katongka wa a, in-toyog wan. ⁶ Dapat ka bomabay nondasog araw, boknga yabi, ha narokyaw, Tya wan ka ama bomabay, ham fag tagbo hanya. ⁷ Ka safolok dayaga dagos wanbangon, nasogi yat manga ilawan. ⁸ Ka manga korang no naisip iglwang has manga fiya it fangayofan, Disagan ha hyami hayo langis ngadi ogbot, hyami ilawan kapsa wan. ⁹ Dapat ay, ka manga fiya it fangayofan iglwang, Ngandayo idwa homosto ara hantam fagayo. Fiya man ham no hayapdis mangag fasali langis, saliyan ya ka hayo. ¹⁰ Yakanga ka limak dayaga ka korang no naisip, inlahaw wan. Ta nonlibang yapdig sali, ka ama mamabay indasog wan. Ka limak dayaga ka danwan talaga natahin wa ka ama kababay, nasakbaw basad balay fanganan. Natahop wa ka sakbawan. ¹¹ Araw araw ogbot, ka limak dayaga, ka korang no naisip, indasog yadi wan. Tagtawag, Hyami fon, hyami fon, ha fasakbawan yadi wa hyami. ¹² Dapat ay, ka ama mamabay iglwang, Bonwa bohag, hodwa kilala hayo, yakanga idwa nafasakbaw is taw. ¹³ Ham fag danwa matagahan maskin ham idwa twa no ginahin fag sirang ngatay no ginahin fag masohod ka myanit aho nombangkad. ¹⁴ Kito in Diyos banwanan fag sakop nogfahalimbawa. Sadik taw kalahaw has ayayo fag banwanan, yakanga nafatawag it manga sogowan hanggan nafaano has taw it manga kaakwa. ¹⁵ Nafahafod has taw it kwarta no dahoday kasta fagsyaganon botangon. Ha sadik sogowan it nafaano 5,000 piso, ha sadik sogowan it nafaano 2,000 piso, ha sadi yak sogowan it nafaano 1,000 piso. Ginya madi hanyan lahaw wan. ¹⁶ Ka natanggap 5,000 piso dagos wa namalidya tonya. It nabolay fakinabang 5,000 piso yadi. ¹⁷ Kitonya yadi ka natanggap 2,000 piso, nafakinabang yadi 2,000 piso. ¹⁸ Dapat ka natanggap 1,000 piso nahodkod a, natago ha basad daga kat fon kwarta. ¹⁹ Ginya madi no dogay wa aban, kasta fon nwali hat manga sogowan, naintaw has taw kat nafaano kwarta. ²⁰ Ka natanggap 5,000 piso naakbang hasagfon hanya, iglwang, Angko fon to wa kam disag angko bago bago 5,000 piso. To yadi wa kangko nafakinabang lima yadik libo. ²¹ Kagfon hanyag lwang, Yabay, kafiyaon. Haw wa ka fiya hanggan mafaanodon fag sogowan. Maskin haw naano fiya ka ogbot fag halga, ho faano ya ha

hyamo dahol fag halga. Haw fag kito yadingko no kasolong igbaya. ²² Ka natanggap 2,000 piso naakbang yadi hasagfon hanya, iglwang, Angko fon, to wa kam nafaano angko bago bago 2,000 piso, to kangko nafakinabang yadi, 2,000. ²³ Kagfon hanyag lwang, Yabay, kafiyaon, haw wa ka fiya hanggan matanogon fag sogowan. Maskin haw naano fiya ka ogbot fag halga, ho faano ya ha hyamo dahol fag halga. Haw fag kito yadingko no kasolong igbaya. ²⁴ Ginya madi ka natanggap 1,000 pisos naakbang hasagfon hanya, iglwang, Angko fon, ho twa wa kitay haw mahigpit wa nogsohot. Haw igbol ka bohonwa hyamo tanom. Haw gani yadi ka bohonwa hyamo nafamgas. ²⁵ Maskin ho kadala hyamo, ho natago di has basad daga im kwarta. Toy di ka 1,000 hyamo kwarta. ²⁶ Dapat it fon iglwang, Haw idwa fiya, mafang fag sogowan haw. Haw danwa twa, mangharaw, kitay hogbol ka bohonwa angko tanom, ho gani yadi ka bohonwa angko nafamgas. ²⁷ No kitonya, kana mayon haw nodwa nafwalid angko kwarta sas fanifonan has famotangan? Ginya ha tobo yap man araw aho nogbol ginya, aho no nwali. ²⁸ Ginya madi nalwang hat sogowan tiba, Ham bol wa gi hanya ka 1,000 piso, disagan ka ha 10,000. ²⁹ Maskin ka ha akwa nafatobo, ho domogang ya, yakanga im-aywan. Dapat kadwa ha akwa, nyawa sayok kangko disag, ho bomawi ya gi hanya. ³⁰ Ham okasan wan has basad marom sas sokayan tonya fag sogowan kadwa ha fakinabang. Sinya manga taw omoraw wan, hanggan wasta ngifon di mangarigitan wan. ³¹ Aho Kanbali Taw nombangkad aban, angko kafiyon malagan sangko, hanggan manga anghil fagayo omofod yadi wangko. Ginya ho tomokaw sangko tokawan fanokawan gorangon kafiyaon. ³² Gis nanya fag masohod yadi aban, fagayo fag manga layonan taw manifonan sangko atobangan. Aho fabali dowak layonan ka manga taw, kitos gano topa nogfalayon ka manga hambing gis manga topa. ³³ Ho fatifon sangko balis sihon kawa manga topa, ka balis wala kawa manga hambing. ³⁴ Aho ka gorangon fomwayong has tifonan ka sas balis sihon, Ham fag hastay, ham kangko Ama faglwangon kitay ham bomaya wan. Ham fag omafo angko sakop banwanan kawan talaga ha hayo gi yapdis bagon halig ka daga. ³⁵ Maskin ahon lonos, dapat ham nafahwan angko. Hon-inom yadi, dapat ham nafainom angko. Aho sadik famaklay, dapat ham nafasakbaw angko. ³⁶ Hodwa ha solong rotay, dapat ham nafarotay angko. Honsagit, dapat ham nasabang angko. Ahonporiso, dapat ay, ham nabantay angko. ³⁷ Ginya madi ka manga fiya fag manga taw tomangkod aban, lomwang, Hyami Fon, ginahin mi no nalag hyamo kalonos hanggan nafahwan, ngatay kainom ginya nafainom? ³⁸ Ginahin mi no nafasakbaw hyamo haw nonbali sadik famaklay, ngatay nafarotay hyamo haw nodwa ha solong rotay? ³⁹ Ginahin mi no

nalag hyamo ha sagit, ngatay basad porisowan, ginya nanabang hyamo? ⁴⁰ Aho ka Gorangon somagot, Hogfwayong ha hayo, bohonwa bohag, no ginahin kawa ham natogbong angko manga fadwasay to, nyawa tadwa bangan mahalga sas taw, aho yadi wa ka hayo natogbong. ⁴¹ Ginya madi hanya lomwang yadi ka balis wala, Ham fag ayayo gingko, ham kan Diyos nafatohoyan has fadosaan. Ham fag hawas basad afoy kadwa kapsa kantalaga han Fandaya, hanggan it sakop fag manga labang. ⁴² Maskin ahon lonos, dapat ham idwa nafahwan angko, ahon inom, dapat ham idwa nafainom angko. ⁴³ Ahon bali sadik famaklay, dapat ay ham idwa nafasakbaw angko. Hodwa ha solong rotay, ham idwa yadi nafarotay angko. Aho ha sagit hanggan inporiso, dapat ham idwa nabantay angko. ⁴⁴ Ginya ta tomangkod yadi kito aban, Hyami Fon, ginahin hami no nalag hyamo inlonos, in-inom, inbali famaklay, idwa ha solong rotay, ngatay insagit, ngatay maporisowan, hami nodwa natogbong hyamo? ⁴⁵ Ginya madi, aho ka Gorangon fomwayong has taw, Hogfwayong ha hayo, bohonwa bohag, no ginahin ham no kafang wagtogbong to, kadwa bangan mahalga has taw, kawa aho ka hayo fakafangon fagtogbong. ⁴⁶ Tonya fag manga taw hawas basad fadosaan kadwa kapsa, dapat ay, ka fiya fag manga taw hawas haboyagan kadwa yadi ha katabowanan hanggan aban aban.

26 Araw is Hisos nontabo wagfaadal tonya fagayo, nalwang hat manga katogbong kiti, ² Ham twa wan kitay dowan odik sirang aban Fanohodan Nagsagayan tam nogtohod ka anghil nogsagaya ista manga balay hyabi, ta fagamat angko, aho Kanbali Taw, kaarakitay hompako wan sas nafatimbangan hayo. ³ Gis nanya yadi fag masohod, is Hisos nogfwayong kitonya, ka manga fagtahinan fagalan-han-Diyos, hanggan ka manga fagtahinan sas banwa nanifonan san Kaifas balay dahol, kawas Kaifas ka gorangon fag fagalan gis nanya. ⁴ Ta nanoltolan kitay ta fag gomat mafyaloman in Hisos, ginya fahatay hanya. ⁵ Dapat, Fag idwa hono sas Fanohodan, ngandayo manga taw mangagran wan. ⁶ Ginya madi araw, da Hisos sawas Bitanya san Simon balay, ka Simon ka ha sagit kitong hyabi. ⁷ Ta no kwan yapdi sinya, sadik ina naakbang in Hisos, ha diya sohadan alabastoro fag bato, napno famabanglo, dahol it sali. Is Hisos no sas bilog fanganan, ka ina nabohos ka famabanglo han Hisos boknga alfoyo. ⁸ Dapat in Hisos manga katogbong no nalag, ta kahori has ina, taglwan, Anogon di famabanglo. ⁹ Balay balay haw no nafasali yap man tonya, dahol araw it sali, ginya fiya man ha no nadisag it sali has manga myabog. ¹⁰ Dapat is Hisos fadi wad natwagdog ta noglwan kitonya. Yakangag lwan has taw, Kana ham no kabaya ka ina? Kafiyaon to kat naibolon hangko. ¹¹ Maskin ka manga myabog idwa ha

fagalinan gi hayo akbang, dapat ahodwa fagaba maofodan hayo aban. ¹² Ka ina no nabohos famabanglo hangko igfatalaga wangko has lobgoban. ¹³ Hogfwayong hayo, bonwa bohag, nyawa siday, sadik baba daga, ta no tomoltol ka Fiya fag Barita aban, ta fagaba wa aba omowas to fag ina it naibolon, yakanga tomohod hanya fagaba. ¹⁴ Ginya madi insadi gis Safolo ha Dowan, is Hodas Iskariyoti, nanabang has manga fagtahinan fagalan-han-Diyos. ¹⁵ Is Hodas naintaw, Kana ara hayo disagon angko aho no fagamat ha hayo in Hisos? Yakanga ta dagos wa nabangkad it kwarta tolok safolo kwarta pilak, nadisag han Hodas it tangdan. ¹⁶ Yabay, ginya wa ginan is Hodas gisip no ginahin no somyagan wagfagamat has taw in Hisos. ¹⁷ Ginya madi ka sirang gona sas Fanohodan Tinapay Mayangfis nondasog wan, in Hisos manga katogbong hawan Hisos, naintaw kitay, Sida nangos araw hyamo fakasayaon hami nogfatalaga intam Yafon Fanohodan Nagsagayan? ¹⁸ Is Hisos nasagot, Ham fag hawas basad banwa, ham fag hawa sadik taw, ham fag lwan kitay, Ka Famaadal igtogon hyami kitay, hami fag lwan kiti, Hogdog ho kaakbang wan. Aho hanggan angko manga katogbong hawa hyamo balay no mangwan ka Yafon Fanohodan Nagsagayan. ¹⁹ Ka manga katogbong intanog in Hisos sogo. Yakanga ta nafatalaga wan ista Yafon Fanohodan. ²⁰ Ginya madi araw, no kayabi wan, is Hisos hanggan it manga katogbong safolo ha dowan, sawas bilog fanganan sinya. ²¹ Ta no kwan yapdi, is Hisos iglwan, Hogfwayong ha hayo, bohonwa bohag, insadi sa hayo kaoyon angko manga kalaban. ²² Ka manga katogbong inrongkot wagdog, igsadig sadi gintaw han Hisos, Hyami Fon, aho awkin kam faglwanon? ²³ Is Hisos nasagot, Ka hara nafasohod angko natognat tinapay has basad mangkok, tonya kangko ofod kam-oyon angko manga kalaban. ²⁴ Aho Kanbali Taw kaakbang wa kalahaw kito kansorat hyabi, kawa angko dalanon, dapat isyay wan angko ofod ka goyon angko manga kalaban. Fiya man hara hanya nodwan sagaya git ina hyabi. ²⁵ Is Hodas, in Hisos ofod ka goyon in Hisos kalaban naintaw yadi, Haw kagfaadal, aho awkin kam faglwanon? Is Hisos nasagot, Haw wa kaglwan. ²⁶ Ta no kwan yapdi, is Hisos nabol tinapay, nabaya in Diyos, nafaarogbotan, ginya nadisag hat manga katogbong. Is Hisos iglwan, Ham fag bol toy, fakwan wan. Toy angko wa habilogan. ²⁷ Ginyas Hisos nabol ka fanginoman ha sabahan obas, nabaya in Diyos, nafagamit is taw, iglwan, Ham fagayo fag ginom toy. ²⁸ Maskin toy angko wa folot kagfaganit intam tarangapan, angko folot kamwatwat kawa has kaaywanon fag manga taw kaarakitay ista manga ogali dwat imliyam wan. ²⁹ Hogfwayong ha hayo, hodwa ominom domwag ka sabahan obas, nodwa aban ya, sawangko Ama sakop fag banwanan, tam no manayowan ya

domwag ominom ka bago fag sabahan obas. ³⁰ Ginya madi ta no nangambahan sadik ambahan, tanlahaw wa a, hawas baba Moyod Oliboan. ³¹ Ginyas Hisos iglwang hat manga katogbong, Araw basad yabi ham fagayo omobon wangko, kito kansorat sas Kasoratan, Ho fahatay ka fangano, ginya madi it anoon fag manga topa manarowayan wan. ³² Dapat ay, aban, aho nomboyag ya domwag, ho gomona wa hayo has sakop Galiliya. ³³ Is Pidro nalwang marigon han Hisos, Nyawa ta fagayo omobon hyamo araw, hodwa omobon hyamo, nyawa ginahin. ³⁴ Is Hisos nalwang han Pidro, Yatokitay, lag nga araw, araw basad yabi, ka tabag nodiyag taraok, tolo ginan haw tomangkod angko has taw. ³⁵ Dapat is Pidro marigon wagfwayong, Nyawa ta hanggan wa fahatay intam dow, hodwa tomangkod hyamo has taw. Ka tibak manga katogbong iglwang yadi kitonya. ³⁶ Ginyas Hisos naofod it manga katogbong hawas sadik foyo, taglwang Gitsimani. Is Hisos iglwang hat manga katogbong, Ham fag matokawan yap istay, ho mandarangin has nwas dayo ogbot. ³⁷ Ginyas Hisos nataban in Pidro hanggan in Sibidiyo manga anak dow. In Hisos fangayofan igfabago wagdog marongkot galibitan wan. ³⁸ Is Hisos nafwayong handa Pidro, Angko karongkotan bilang wa kodkod sangko basad fangayofan. Hogdog angko kahorihan ho bilang wa kahatay wan. Ham fag mafanayan yappingko istay matagahan, gofod angko. ³⁹ Is Hisos nonsaman ogbot gis taw, nanlohoban wan a, nandarangin, iglwang, Mama, no somyagan di, fatolasan wa gingko to fag fanginoman kahorihan kati. Nyawa hoglwang kitonya, fag hyamo kafangayofanan kam-anod, bohonwa angko. ⁴⁰ Is Hisos nonfwali ya hat katogbong tolo, nalag kitay ta matoyogan wan. Nafwayong han Pidro, Ham awkin idwa gagwanta gofod angko matagahan mangharaw, ngadi sadik tama sinyahod? ⁴¹ Ham fag matagahan, fag darangin wan kaarakitay idwa hagfaloksowan hayo. Ka fangayofan orongan wa kasaya has fiya, dapat ka habilogan malombay. ⁴² Fadowa ginan is Hisos nasaman ya gis taw a, nandarangin, iglwang kito, Mama to fag ongot nodwam tolas gingko, ho nodya ginom gistay, im kafangayofanan fag im-anod wan. ⁴³ Sadi ya ginan is Hisos infwali ya hat manga ofod, ya mangharaw, ta matoyogan ya ngawan, maskin matapyaton wan ista mata. ⁴⁴ Yakangas Hisos naobon yas taw, fatolo wa ginan nandarangin, kitonya mandi ka haraw it fwayong. ⁴⁵ Ginyas Hisos infwali ya hat manga katogbong, nafwayong handa Pidro, Ham awkin matoyogan yapdi, mafahowayan odi? Yabay, kati wan, ka yadi angko ofod ka goyon angko kalaban, fagamat angko, aho Kanbali Taw, has manga taw dwat. ⁴⁶ Ham ha kalibang, fakabangon, wan, tya wan, kangko ofod ka goyon has taw. ⁴⁷ Is Hisos no kampang yapdi, is Hodas, ka sadi gis Safolo-ha-Dowa, indasog wan. Ha taban kaay-

wanon kaaywanon fag manga taw, masalawidan manga talibong, mabitbitan manga pinotol. Ka manga fagtahinan fagalan-han-Diyos hanggan manga fagtahinan sas banwa ka nasogo tonya fag manga taw. ⁴⁸ Ta nodyan dasog sinya, kanoyon has taw danwa nafatohoyan kitay, No siday kangko ayohon fag ama, tonya wan kantam iktanon. Gamatan wa dagos. ⁴⁹ Yakangas Hodas naakbang in Hisos, nahampang mahoway, iglwang, Haw kagfaadal has taw, midwa fakayabiyon, midwa ha diya. Ginya madi naayok in Hisos faringfing. ⁵⁰ Is Hisos nalwang hanya, Ama, fadagosan wan im bato ibolonon. Ginya ka manga taw naakbang in Hisos, natoklos hanggan nagamat hanya. ⁵¹ In Hisos ofod sadi nagonos it talibong a, nabasing ka gorangon fag fagalan sogowan, natigbas it talinga. ⁵² Is Hisos iglwang hat ofod, Halobanan ya im talibong. Kagbasing talibong, talibong mandi it hatayon. ⁵³ Hadwa awkin twa kitay ho syagan digsagad togbong gingko Ama? Ho no somagad wan, hanya somogo yadi wa dagos hangko, nyawa bohondi safolo ha dowak habanan anghil. ⁵⁴ Dapat ay, no kitonya, kinday ka manga Kasoratan fwayong nom-anod, noglwang kitay kangko fakahorihan fag imlag wan? ⁵⁵ Ginya madis Hisos nahampang has fakaaywanan fag manga taw, iglwang, Aho awkin tolisan, ham gayfan, maskin ham masalawidan manga talibong, mabitbitan manga pinotol famogfog, kaarakitay gomamat angko? Sirang sirang hogfaadal basad Fanimbaan-Dahol, bati ham idwa gamat angko gis nanya. ⁵⁶ Dapat to fagayo in-anod wan kaarakitay imtonglos ka manga fangampang nasorat. Ginya madi in Hisos manga katogbong fagayo naobon in Hisos idwam dow, nalagyo wa dan. ⁵⁷ Ginya ka manga nagamat in Hisos nataban hanya han Kaifas balay. Gis nanya is Kaifas ka gorangon fag fagalan-han-Diyos. Ka mangag faadal Batasan Hodyo hanggan manga fagtahinan sas banwa matifonan sinya. ⁵⁸ No kitay di, is Pidro goyan in Hisos, dapat ayayo sat ginanan. Nondasog has gorangon fag fagalan balay, is Pidro nasakbaw has basad alad, natokaw maafodan yadi has mangag bantay maskin kasaya lomog no kinda kasta ibolonon araw han Hisos. ⁵⁹ Ka manga fagtahinan fagalan, hanggan ka tifonan manga fagtahinan Hodyo fagayo, igsayak manga taw ka bomangdan in Hisos ibolon kaarakitay somyagan igfatohoyan hanya has kahatayan. ⁶⁰ Dapat tadwa ha lagan ista fagbohagon, nyawa kaaywanon fag manga taw inbangkad igbangdan kawa han Hisos. No dogay araw ha dowak taw inbangkad ⁶¹ kaglwang, To fag taw nafwayong, Ho syagan domwat in Diyos Fanimbaan-Dahol, hanggan fatobo ya tolo lamang ik sirang. ⁶² Ginya yabay ka gorangon fag fagalan nalindog, naintaw han Hisos, Ha awkin idwa somagot? Kana tonya kasta sombong kawa ha hyamo? ⁶³ Dapat is Hisos idwa naawang. Ginya madi ka gorangon fag fagalan nafwayong

hanya, Hogfwayong ha hyamo, ha fwayongan ha hyami, ka boyagan fag Diyos madogan, no haw wa ngay in Diyos-natogon-Famawi, ka Kadasog fag Gorangon, in Diyos wa Anak. ⁶⁴ Is Hisos nasagot, Haw wa ngap kaglwang. Dapat hogfwayong ha hayo kitay, Gis kati ginan ham lomag angko, Aho kanbali Taw, matokawan sat akbang, kadwa ha bosal, sawat balis sihon. Ham lomag yadi wangko aho no kadasog aban, sas baba linyabo gin Diyos banwanan sam tongod. ⁶⁵ Ginya madi ka gorangon fag fagalan naragyang it solong rotay, nalwang, No kampung kiti, igsway in Diyos. Kana mayon tam nogsayak yapdista sombong tiba taw, ham ngap fadi wad nadog kati, gi wa ngap it sadili bibig igsway wa orongan in Diyos. ⁶⁶ Kinday hayo fatohoyan ka fiya kawa hanya? Tagsagot kitay, Ka fiya, hanya fag matay wan. ⁶⁷ Ginya ta natofay in Hisos mata hanggan nasontok hanya. Tiba natofa yadi hanya marigon. ⁶⁸ Ginya tagmaswag kiti, Haw, kan Diyos-natogon-Famawi, sogi, ha boktongan fakta kagsontok hyamo? ⁶⁹ Gis nanya fag masohod is Pidro matokawan basad aladan. Sadik sogowan ina naakbang hanya, iglwang, Gwadi haw gofod yadin Hisos, taga Galiliya, idwa aw? ⁷⁰ Dapat is Pidro natangkod sasta fagdogan fagayo, nalwang, Hodwa natwagdog im faglwangon. ⁷¹ Is Pidro igfatawas wan, hawas bilog sakbawan alad. Sadi yak sogowan ina nalag in Pidro sinya, yakanga nafwayong has taw, To fag ama gofod yadin Hisos ka taga Nasarit. ⁷² Is Pidro natangkod ya domwag, nalwang, Hogtangkod wa marigon, hodwa kilala tonya fag taw. ⁷³ Araw araw ogbot, ka manga taw sinya naakbang in Pidro, taglwang hanya, Yabay, haw it ofod yadi wa sadi, matohoyanan wan. Mi twa wagdog haw no kampung. ⁷⁴ Is Pidro natangkod marigon, iglwang, Nyawa ho matay wan, orongan wan hodwa kilala tonya fag taw. Ginya madi ka tabag dagos wa nanaok. ⁷⁵ Is Pidro bago di natohod in Hisos fwayong kitay, Ka tabag nodyag taraok araw, tolo ginan haw tomangkod has taw angko. Ginya madis Pidro nadokson wan, naoraw marigon.

27 Araw, no dayo kasirang, fagayo fag manga fagtahinan fagalan hanggan fagtahinan banwa igtoltolan no kinday no fahatay in Hisos. ² Ta no nagafos hanya, ta nataban hanya han Pilato ka gobirnadador Roma. ³ Yabay is Hodas, ka naoyon in Hisos manga kalaban, no nalag kitay ta nafatohoyan in Hisos has kahatayan, hanya nafanisi wan, igfwali ya nangos has manga fagtahinan fagalan hanggan fagtahinan banwa ka tolok safolo kwarta pilak. ⁴ Is Hodas iglwang, Aho ha kasalanan wan, maskin kangko ofod, kangko nafaoyon ha hayo, idwa ha kasalanan. Ka manga fagtahinan nasagot, Midwa ha mawat, ha bahala wan. ⁵ Is Hodas naokas odi has basad Fanimbaan-Dahol ka kwarta pilak, yakangan lahaw wan, natagbong wa hanya. ⁶ Dapat ka manga fagtahinan fagalan nafoyot

ka kwarta pilak. Taglwang, Idwa maangay sas Batasan Hodyo tam nogfaaktom to fag kwarta has basad sohadan kwarta sas Fanimbaan-Dahol, maskin to bayad wa habilogan taw. ⁷ Yakanga ta nanoltohan. Insadi ista manga fangayofan kitay ta somali ka daga fandagan tonya fag kwarta, kaarakitay, no ha famaklay matay, ta lomogob wa sinya. ⁸ Yakanga hanggan wa kati, tagngayan tonya fag daga fandagan, Daga Folot. ⁹ Maskin kitonya, in fangampang Hirimiyas fwayong in-anod wan noglwang, Ta nabol ka tolok safolok kwarta pilak, dahonya wan ka manga taga Israil no nafahalga hanya, ¹⁰ ginya ta nasali ka daga fanganglitan, kito kan Diyos nafwayong angko. ¹¹ Ta nafaatobangan in Hisos han Pilato ka gobirnadador Roma. Ka gobirnadador naintaw in Hisos kiti, Haw awkin ka gorangon manga Hodyo? Is Hisos igfwayong, Haw wa ngap kaglwang. ¹² Dapat ka manga fagtahinan fagalan hanggan manga fagtahinan banwa nogsombong ha hanya, is Hisos idwa ha fagawangon. ¹³ Yakangas Pilato nafwayong hanya, Hadwa awkin igdog ta nogsombong aywan ha hyamo? ¹⁴ Dapat is Hisos idwa yapdi ha fagawangon, ngadi ista sombong sadi, yakanga ka gobirnadador kataka wan. ¹⁵ Ka manga Hodyo nogtohod ka Fanohodan Nagsagayan, ka gobirnadador Roma ha ogali igfalfas sadik Hodyo kanporiso, no fakta ka manga Hodyo fakasayaon falfason. ¹⁶ Gis nanya ha akwa sadi kanporiso kasta fakilalaon fiya fiya, kawas Hisos Barabas. ¹⁷ Yakanga ka manga taw no nanifonan, is Pilato naintaw is taw, Faktaw ka hayo fakasayaon falfason, ngatay is Hisos Barabas, ngatay is Hisos kasta faglwangon in Diyos-natogon-Famawi, ka Kadasog fag Gorangon? ¹⁸ Maskin is Pilato natwa wa kitay ta kaingli odin Hisos, yakanga ta nataban hanya. ¹⁹ Bohondi tonya, is Pilato no matokawan yapdi sas fanokawan fangabaya, it babay nasogo sadik taw han Pilato. Kat babay iglwang kitay, Haw fag idwag mawat tonya fag taw kadwa ha kasalanan, maskin sayabi ho kadala wagdog angko tagimfan kawa ha hanya. ²⁰ Ka manga fagtahinan fagalan-han-Diyos hanggan manga fagtahinan banwa nafasognod has manga taw kitay ta fag somagad gin Pilato fag is Barabas kasta fagfalfason, dapat fahatayan in Hisos. ²¹ Sadi ya ginan ka gobirnadador naintaw is taw, Faktaw sas dowo ka hayo fakasayaon angko falfason? Taglwang, Fag is Barabas kantam fagfalfason. ²² Is Pilato iglwang is taw, No kitonya, kana araw angko ibolonon han Hisos, kasta faglwangon in Diyos-natogon-Famawi? Ta fagayo nasagot, Fapakowan hanya sas nafatimbangan hayo. ²³ Ginyas Pilato naintaw is taw, Kana mayon, kana kat naibolon dwat? Dapat ta labi wa nanarawagan marigon, Fapakowan hanya sas nafatimbangan hayo. ²⁴ Is Pilato no natwa kitay hanyadwa ha halimbawan, ngandayo ka manga taw labi man no mangawangan, nafabol danom gis taw, nagonaw it gamat sasta

faglagan, nalwang, Bohonwa aho ka managot nyawa ham fahatay to fag taw. Ham bahala wan. ²⁵ Ka manga taw nasagot, Hami hanggan wa hyami manga anak ka bahala somagot it kahatayan. ²⁶ Yakangas Pilato nafalfas in Barabas, dapat no nafabakbak in Hisos, nafabalahala was taw kaarakitay ta fapako hanya sas nafatimbangan hayo. ²⁷ Ginya madi ka gobirnadador fag manga sondalo nataban in Hisos has basad gobirnadador balay dahol. Ginya ta nafatifon sadi wak habanan sondalo san Hisos dayo. ²⁸ Ka manga sondalo naloslos in Hisos rotay, ginya ta nafasolong hanya sadik balokas aba aba, dararag. ²⁹ Ta nahoskos lamnon madogi a, nafasangbaw tonya in Hisos boknga alfoyo. Ta nafabit-bit sadik pinotol bagahay sat gamat balis sihon. Ginya tagsway odig lingkohodan, iglwang, Anod, kafiyaon mangharaw ka gorangon manga Hodyo. ³⁰ Ta natofay hanya, hanggan nabol ka bagahay, nabakbak in Hisos alfoyo. ³¹ Ginya madi ta nonsagaya wagyod hanya, ta naloslos ka balokas aba aba, nafasolong ya in Hisos sadili rotay, hanggan nataban wa hanya has dayo kaarakitay pomako wan sas nafatimbangan hayo. ³² Araw araw ta noglahaw gis basad banwa, ta nahablang sadik ama, is Simon, taga Sirini. Ka manga sondalo napilit wa nafafasan hanya ka nafatimbangan hayo kasta fag fapakowan araw in Hisos. ³³ Ta nondasog sa sadik foyo tagngayan Golgota, it kahologan Botol Alfoyo, ³⁴ ka manga sondalo nafagamit han Hisos langgaw ha aktom mayat. Dapat is Hisos no nandog nainom, nadayo di. ³⁵ Manga sondalo napako wan in Hisos sas nafatimbangan hayo, ginya tagpostahan it manga rotay, nangafodan wan. ³⁶ Ginya madi tantokaw wan kaarakitay igbantay hanya. ³⁷ Masoratan sas hayo san Hisos tongod alfoyo ista sombong kitay, Tos Hisos ka Gorangon manga Hodyo. ³⁸ Gis nanya yadi ta nafapako dowak tolisan, insadi san Hisos balis sihon, insadi sat balis wala. ³⁹ Manga taw kagdalan sinya igmaswag, igyod, mabaringan di ista alfoyo, ⁴⁰ taglwang, Anod, haw ka domwat nangos ka Fanimbaan-Dahol, ginya fatobo ya tolo lamang ik sirang, kati bawiyon hyamo sadili. No haw wa ngay kan Diyos Anak, fag dokson wan gis nyamos nafatimbangan hayo. ⁴¹ Kitonya yadi ka manga fagtahinan fagan, ka mangag faadal Batasan Hodyo, hanggan ka manga fagtahinan banwa iglibak in Hisos, tagfwadfwayongan, ⁴² Bati hanya nabawi ongay ka tiba taw, dapat not sadili wa habilogan idyadi wa syagan igbawi. Gwadi tyamo, hono, ka Gorangon manga Israil. Hanya no domokson nga kati gis nwa fag nafatimbangan hayo, mimtiwala wa hanya. ⁴³ Gwadi hanyag syag in Diyos, iglwang yadi kitay hanya in Diyos wa Anak. Tam lomag wa araw ngatay is Diyos bomawi hanya no orongan galwasi hanya. ⁴⁴ Kitonya yadi ka manga tolisan kanpako sat akbang nogyod in Hisos. ⁴⁵ Ginya madi yabay, gis boknga sirang balis myanit kabohid

wan, inharom sadi wak dahonya banwanan. ⁴⁶ Myanit no kabohid wan, is Hisos natawag marigon, sas fangampangan Aramaik, Ili, Ili, lama sabaktani? It kahologan, Angko Diyos, angko Diyos, kana mayon haw nogfabayaan angko. ⁴⁷ Tiba taw ka sinya malindogan no nadog kitay is Hisos igtawag kitonya, taglwang, Mayon igtawag in Iliyas. ⁴⁸ Ka sadik taw dagos wa nandalandan nabol famasopsop, natogna has langgaw maiglis, nasongkit sas tobwan bagahay ginya nafasopsop in Hisos. ⁴⁹ Dapat tibag lwang, Faya, tam bomantay yap, ngatay is Iliyas imbangkad araw kaarakitay mamawi hanya. ⁵⁰ Is Hisos natawag ya domwag marigon, ginya nafalfas wat ipsaw. ⁵¹ Ginya yabay ka fanahop rotay sas fagbokngan Fanimbaan-Dahol dagos wanragyang, gis tongod has daga baliwa, namokngan wan. Ka daga inhawig wan, ka manga bato in-gifak lamang. ⁵² Ka manga lobgoban inboklas, hanggan aywan fag manga taw ka natay, ka danwan tohoyan han Diyos, inboyag ya. ⁵³ Ginyas Hisos nonboyag ya, ta nadokson gis lobgoban, nasakbaw has basad Hirosalim, ka banwa kantohoyan han Diyos. Kaaywanon fag manga taw nalag yadi sinya ka mangan boyag ya. ⁵⁴ Ka fagtahinan sondalo, hanggan it manga ofod kagbantay in Hisos, inhinol wa dahol dahol ta no nadog nalinog hanggan nalag fagayo kananod sinya. Taglwang, To orongan wan Diyos Anak. ⁵⁵ Aywan fag manga ina sinya yadi mabantayan gis ayayo. Gi yapdis sakop Galiliya to fag manga ina nogtahin in Hisos hanggan igtogbong hanya. ⁵⁶ Tonya fag ina tiba kawa da Mariya Magdalena, da Mariya inda Santyago da Hosi ina, hanggan in Sibidiyo babay. ⁵⁷ Araw, myanit no kasangday wan, sadik ama maakwa, is Hosi gis banwa Arimatiya, indasog wan. Is Hosi in Hisos yadi katogbong sadi. ⁵⁸ Hanya hawan Pilato nasagad in Hisos habilogan. Is Pilato nafasognod it manga sakop kitay disagan han Hosi in Hisos habilogan. ⁵⁹ Yakangas Hosi nabol in Hisos habilogan a, nasafot basad bago fag rotay madamol. ⁶⁰ Is Hosi nafaigyan in Hisos habilogan san Hosi sadili nafatalaga lohib lobgoban, ngalay yapdi no natigib ka bato. Ginya madi is Hosi nafabalolang sadik bato dahol dahol it fanahop sas sakbawan lohib, ginyan lahaw wan. ⁶¹ Da Mariya Magdalena, hanggan sadi yak Mariya, sinya yadi matokawan sas masohod lobgoban. ⁶² Nonbago marom, nonsagaya ka sirang famatalagaon, ka manga fagtahinan fagan-han-Diyos hanggan manga Farisiyo, ta fagayo nangofodan han Pilato. ⁶³ Taglwang, Ama, migtohod kitay tonya fag bohagon no boyagan yapdi igfatakagdog, iglwang kitay, nonsagaya tolok sirang, hanyam boyag ya. ⁶⁴ Yakanga, balis tolok sirang, fag hagtahinan nangos fiya fiya ka lobgoban, ngandayo it manga katogbong imbangkad hanya, bomol it habilogan, ginya fadahit has taw kitay hanyan boyag ya. No kitonya ka bohag goyan imbali dwat man ka gona. ⁶⁵ Is

Pilato iglwang, Sogi, ham tabanan manga sondalo, fabantayan fiya fiya sas lobgoban. ⁶⁶ Yakanga tanlahaw wan, nafaganit ka tahop lohib, nafwalid tandaan sas boknga sakbawan fanahop bato, hanggan nafabantay ka lobgoban has manga sondalo, kaarakitay fatohoy-an idwa ha taw tomanog tonya.

28 Nonsagaya wan ka Sirang Kafahowayan, da Mariya taga Magdala hanggan sadi yak Mariya, hawan Hisos lobgoban kaarakitay ta manibaw, dayo kayawa sas sirang gona sa sadik simba. ² Yabay sadi odi ginan nalinog marigon. In Diyos anghil sadi nadokson gin Diyos banwanan sam tongod, nafabalolang ka bato fanahop, ginya madi natokaw wa sinya baba fanahop bato. ³ Ka anghil mata masilaw kitos hilat, it rotay abohay yadi kito was gafas. ⁴ Ka manga bantay sondalo karokog wa a, inlobay wa kadala no nalag ka anghil. ⁵ Dapat ka anghil nafwayong has manga ina, Ham fag idwa kadala, ho twa kitay ham igsayak in Hisos kanpako sas nafatimbangan hayo itfagonan. ⁶ Hanyadwastay, hanyan boyag ya kito kat fwayong itfagonan. Ham fag hastay, bantayan kasta nagfwalidan hanya is nwa basad lohib. ⁷ Ginya ham fag hanya wan, fag fwayong hat manga katogbong kitay hanyan boyag ya, gomona wa hayo has sakop Galiliya. Ham lomag wa hanya sinya. Yabay ham fag tohod angko fwayong ha hayo. ⁸ Ginya madi da Mariya inlahaw wa madali gis lobgoban. Ista manga fangayofan sayo kadala sayo kasolong wa dahol igdog. Yakanga tagdalandan wan han Hisos manga katogbong kaarakitay fomwayong kat lagan. ⁹ Dapat is Hisos natagbo inda Mariya, nahampang mahoway. Ka manga ina naakbang in Hisos, natahos it bitis, nanlibabaan hat atobangan. ¹⁰ Is Hisos nafwayong has taw, Ham fag idwa

kadala. Ham fag hanya wan, fwayongan hangko manga fadwasay kitay ta fag hawas Galiliya, yakanga ta lomang angko sinya. ¹¹ Ka manga ina noglahaw wan, yabay tibak sondalo kagbantay sas lobgoban hawas basad banwa, nafwayong has manga fagtahinan fagan fagayo kat lagan sinya sas lohib lobgoban. ¹² Ka manga fagan nanifonan, ginya madi, nontabo wagtoltolan has manga fagtahinan banwa, ta natangdan dahol has manga sondalo. ¹³ Ta natogon ka manga sondalo fag kiti ham nogfwayong is taw, ham fag lwang kitay, Sayabi, mi no matoyogan wan, it manga katogbong inbangkad has lohib lobgoban, naanggong wan it habilogan. ¹⁴ Ta nafwayong yadi, Ham fag idwa galibitan, nyawa ka gobirnadador domog kitonya, mi bahala wa hanya, ham idwam iktan. ¹⁵ Yakanga ka manga bantay sondalo natanggap wat tangdan, nafadahit yadi has taw kitonya. Hanggan wa balis kati tonya yapdi ka manga Hodyo fagfadahiton has taw. ¹⁶ Ginya madi ka safolo ha sadik katogbong hawas Galiliya han Hisos nagfwayongan fag moyod itfagonan. ¹⁷ Ta no nalag in Hisos ta nanlibabaan hat atobangan, dapat tiba gadowan yapdi. ¹⁸ Is Hisos naakbang has taw, iglwang, Fagayo fag kangayanan san Diyos banwanan sam tongod hanggan sas baba daga indisag wa hangko. ¹⁹ Yakanga ham fag lahaw wan, ham fakalig angko manga katogbong sas fagayo fag manga layonan daga. Ham fag fatogna ka manga taw, sangko Ama ngayan, hanggan sat Anak ngayan, hanggan sat Maliyaw fag Falad ngayan. ²⁰ Faadalan yadi tonya fag manga taw imtanog fagayo kangko natogon ha hayo. Yabay, fanlag nga aban, no bali da ha daga yapdi, ho omofod wa fagaba hayo.

MARKOS

1 Kito ka Fiya fag Barita nogfabago kawa han Kiris-to Hisos, in Diyos anak. 2 Hyabi hyabi is Isayas, in Diyos fangampang nasorat kitay, is Diyos iglwang, Fandog ngay, hogsogo angko sogowan ha hyamo fag-onan, Kaarakitay igyawa hyamo bato lahawan. 3 Kiti kat fwayong kagtawag marigon marigon sas basad fakahyabogan, Fatalagaan in Diyos bato lahawan, Fahaslongan it manga dalan. 4 Ginya madis Hwan kagfatogna manga taw inbangkad wa ngay, igban-wanan basad fakahyabogan. Is Hwan igfwayong kitay, no fakta ka somoyo hanggan fatogna hanya, is Diyos faliyam it manga naogali dwat. 5 Fagayo gis sakop Hodiya hanggan ka manga gis banwa Hirosalim, fagayo nagobok in Hwan. Manga taw nogbaya ista manga sadili naogali dwat, is Hwan igfatogna hanya sas safa Hordan. 6 Gis nanya in Hwan rotay olad kamilyo mahaligan, anit yadit fagyahos, manga fan, manga dyahot it fanganon. 7 Is Hwan igtoltol has taw, iglwang kitay, Ha akwa omoyan sangko ginanan ha kangayanan abwat man angko, ho kaya wan ngadi manlo-has it famaganit lapak. 8 Sas danom aho nogfatogna hayo, dapat sas Maliyaw fag Falad hanya no fatogna hayo aban. 9 Ginya madi, gis nanya fag manga masohod, is Hisos inbangkad gis banwa Nasarit, sakop Galiliya, hanggan is Hwan nafatogna in Hisos sas safa Hordan. 10 Is Hisos no kabangon gis basad danom, hanya nalag ka manga banwa sas tongod dagos wanboklas hanggan ka Maliyaw fag Falad kayokfo ha hanya kitos salompati. 11 Ha sadik hasnog gin Diyos banwanan sam tongod iglwang kitay, Haw wa kangko fagalwasiyon fag anak, hogbaya wa dahol dahol hyamo. 12 Ka Maliyaw fag Falad nadagos wa nafalahaw in Hisos has basad fakahyabogan. 13 Is Hisos nadogay sinya ofat ik safelok sirang hanggan is Satanas nasolay igfaloksowan hanya. Manga odi myala fag hayopan banwanan sinya, dapat ay, manga anghil nafarigon in Hisos gis nanya. 14 Ginya madi, ta no nagamat in Hwan kaarakitay igfaporiso hanya, is Hisos hawas sakop Galiliya, nanoltol in Diyos Fiya fag Barita. Is Hisos iglwang, 15 Kati wa fag masohod im-anod wan in Diyos sakop, yakanga ham fag soyo wan. Ham fag katiwala ka Fiya fag Barita. 16 Is Hisos nogdalan sas bahalan linaw dahol, tagngayan Dagat Galiliya, nalag inda Simon da Andris dowasay. Da Simon gokas sarap has basad danom maskin manga fangoyang. 17 Is Hisos

nalwang handa Simon, Ham tahinan angko. Ho fabali hayo manga fangiktan manga taw. 18 Ginya ginan ta nadagos wa naobon it manga sarap a, nahin wan Hisos. 19 Ta noglahaw yapdi, is Hisos nalag inda Santyago, da Hwan dowasay, in Sibidiyo manga anak. Da Santyago masahayan yadi sat basad baloto, igsip it manga sarap. 20 Is Hisos dagos natawag wa ka dowasay. Ta naobon wan Sibidiyo, it ama, sas basad sahayon, ha ofod yapdi manga famalo. Ginya madi ka dowasay nahin wan Hisos. 21 Da Hisos indasog wa has banwa Kapirnaom. No sas Sirang Kafahowayan, is Hisos dagos wansakbaw ha basad fanimbaan Hodyo, igfaadal has taw. 22 Tantaka wagdog is Hisos nogfaadal has taw, maskin kitos ha kangayanan hanya nogfaadal, idwag hono, bondi kitos mangag faadal Batasan Hodyo. 23 Sadi odi ginan sadik ama nasakbaw has basad fanimbaan, labang wa kagfahoriyan hanya. 24 Ka ama igtawag marigon, kitay, Haw, Hisos taga Nasarit, kana haw nogmawat hyami? Haw awkin hastay kaarakitay domaog wa hyami? Ho fadi wad twa no faktaw haw. Haw wa ka Maliyaw kanbangkad gin Diyos. 25 Dapat is Hisos nangabaya ka labang, nalwang, Ha hawa gawang gawang. Haw fag galin gis nyamo fag taw. 26 Ginya madi, ka labang no nafalimboyagan yapdi ka ama, narokyaw dahol, bago nalin gi hanya. 27 Fagayo fag manga taw intaka wan, ta fagayo nangarintawan kitay, Kana to fag kadonongan? Ngatay sadik adal bago. Ha kangayanan igfasognod, hanggan ka manga labang katanog odi hanya. 28 In Hisos naibolon dagos wandahit ha sadik dahonya manga banwanan sas ligongan, sas sakop Galiliya. 29 Da Hisos dagos wa nalahaw gis basad fanimbaan, nasakbaw handa Simon da Andris balay. Da Santyago da Hwan naofod yadi wansakbaw. 30 Gis nanya in Simon nogang ina maigyanan maskin it sagit kagnaw a, tadwa nafadogayon nafadog in Hisos kawa hanya. 31 Is Hisos naakbang has ina, nagamit hanya, nafabangon. It hagnaw dagos wanfiya. Ginya madi ka ina natogbong is taw. 32 Araw, no kayabi wan, myanit no kasangday wan, manga taw nataban han Hisos fagayo sinya fag banwanan ka ha manga sagit, hanggan ka ha manga labang igfahoriyan istaw. 33 Sadik banwa dahonya, ta nanifonan dayo sakbawan. 34 Is Hisos nafafiya kaaywanon fag manga taw ha sagit bokod bokod, nafaalin yadi aywan fag manga labang kagfahoriyan is

taw. Is Hisos idwa nafaawang ka manga labang maskin ta kilala wan Hisos. ³⁵ Ginya madi, no marom, is Hisos inbangon, yabi yapdi, idya kasirang, hawas talon, nandarangin sinya. ³⁶ Araw, da Simon naoyan hanya. ³⁷ Ta no nalag in Hisos, ta nalwang hanya kitay, Fagayo fag manga taw igsayak hyamo. ³⁸ Is Hisos nasagot kitay, Tam hawas masoson fag manga banwa kaarakitay ho manoltol is taw sinya. Maskin tonya wa kangko bato ibolonon, ho nalahaw wa gintam ginanan. ³⁹ Is Hisos nasafong ka manga banwanan fagayo sas sakop Galiliya. Igtoltol sas basad manga fanimbaan Hodyo, igfaalin yadi ka manga labang gis taw. ⁴⁰ Sadik taw ka ha sagit kitong naakbang han Hisos, nanlingkohodan, iglwang hanya, Haw nangos no kasaya digfafiya angko, haw fadi wad somyagan. ⁴¹ Kawas Hisos kaawa hanya, natawid hanya a, nalwang kitay, Ho kasaya ngay, haw fag imfiya wan. ⁴² Ginya madit kitong dagos wanfiya, ogali wan it anit. ⁴³ Is Hisos nabando hanya fiya fiya, bago nafalahaw, ⁴⁴ nafwayong hanya, Hawag fwayong nyawa haday fag manga taw, dapat fag hayapdis fagalan-han-Diyos, fabantayan hanyam habilogan, ginya madi ha disagan kan Mwisid natogon bato disagon, bilang faorongon has taw kitay haw infiya wan. ⁴⁵ Dapat ka ama nonlahaw wan, dagos wagtoltol has manga taw, nafadahit wan. Kawa kitonya, is Hisos idwa has basad manga banwa, dapat nabaybay odi has manga ligongan. Nyawa kitonya, manga taw gis fagayo fag manga banwanan inbarangkadan wa hanya.

2 Idya bangan dogay, is Hisos no nwali has banwa Kafirnaom, manga taw nadog kitay is Hisos sawat oliyanan. ² Kaaywanon fag manga taw inbangkad, nanifonan sinya, iglabi di sasta balay hanggan wa sayo sokayan, ³ hanggan is Hisos igtoltol has taw. Ha ofat ik ama inbangkad naosong sadik ama kadwa syagan kimot. ⁴ Ta nodwa twa gakbang in Hisos kawa kaaywanon wa fag manga taw, ta nabol ka atop san Hisos tongod. Ginya nonlosbong ngay, ta nanton han Hisos akbang, ka ha sagit sat baba sagmak. ⁵ Ginya madis Hisos no nalag kitay tagsyag marigon ha hanya, iglwang has ama kadwa syagan kimot, Anak, hogfaliyam im manga naogali dwat. ⁶ Dapat gis nanya, ha akwa mangag faadal Batasan Hodyo matokawan sinya. Ista fangayofan iglwang, ⁷ Yakana mayon to fag taw no kampang kitonya? Igsway odin Diyos. Bohonwa awkin is Diyos lamang ka ha kangayanan igfaliyam manga ogali dwat? ⁸ Dapat is Hisos nasarom ista fangayofan kitay ta gisip kitonya. Yakanga nafwayong has taw, Kana mayon ham no nangarisipan kitonya? ⁹ Sida ka malpos fwayongon has idwa syagan kimot, ngatay, Im manga naogali dwat fag imliyam wan, ngatay, Haw fag kabangon wan, anggongan wam sagmak, haw fag lomahaw wan. ¹⁰ Dapat ho falag ha hayo kitay aho, Kanbali Taw, ha kangayanan istay

sas baba daga, igfaliyam ista manga ogali dwat.

¹¹ Ginyas Hisos nafwayong has idwa syagan kimot, Aho wa kaglwang kitay, Haw fag kabangon wan, dyan wam sagmak, nyawa ha mwali wa kati. ¹² Ginya ka ama nalindog, dagos wa naanggong it sagmak, sasta faglagan fagayo, ginya nalahaw wan. Yakanga tandolaw wa dahol dahol, nafasayagdog in Diyos, iglwang, Nyawa ginahin, tam idwa ha lagan kitonya. ¹³ Sadi ya ginan is Hisos inlahaw, hawas akbang linaw dahol. Kaaywanon fag manga taw naakbang hanya, hanggan is Hisos igfaadal has manga taw. ¹⁴ Araw, da Hisos noglahaw yapdi, ta nalag in Libi, in Alpiyo anak, matokawan sas fanohotan bohis Roma. Is Hisos nafwayong hanya, Ha tahinan wangko. Ginyas Libi dagos wanlindog, natahin wa hanya. ¹⁵ Ginya madi da Hisos no matokawan san Libi balay, sas bilog fangangan, aywan fag manga fanohot bohis hanggan tiba taw kadwa fiya it ogali, nanayowan kwan sinya, maskin kaaywanon naoyan in Hisos, hanggan in Hisos manga katogbong sinya yadi wan. ¹⁶ Ka mangag faadal ka Batasan Hodyo hanggan manga Farisiyo, no nalag kitay is Hisos igsayowan kwan has manga ha ogali dwat hanggan manga fanohot bohis, taglwang han Hisos manga katogbong, Kana mayon is Hisos nogsayo has manga fanohot bohis Roma, hanggan has manga taw ka ha ogali dwat? ¹⁷ Is Hisos no nadog ista fwayong, iglwang has manga taw kitay, Ka manga ha sagit ka kasaya has famolongan, no kadidwa ha manga sagit idwa kasaya hanya. Maskin ngay honbangkad hastay angko fagsayahon ka manga ha ogali dwat, bohonwa ka gayfan kitay it manga ogali fiya. ¹⁸ Gis nanya fag manga masohod in Hwan manga katogbong, hanggan manga Farisiyo idwa kwan hanon kaarakitay mandarangin mahogod. Manga taw naakbang in Hisos, naintaw hanya kiti, Kana mayon in Hwan manga katogbong, hanggan ka manga Farisiyo manga katogbong, nomtoon idwa kwan hanon kaarakitay mandarangin mahogod, dapat kam manga katogbong idwa gogali kitonya? ¹⁹ Is Hisos nasagot has taw, Ka mangag fasakop has famabayan idwa awkin kwan hanon kagbabay no gofod yapdi has taw, ham gayfan? Kagbabay no sinya yapdi, ta homwan yapdi hanon. ²⁰ Dapat ay, aban ha gomamat tomaban kagbabay. Gis nanya ta bago didwa kwan hanon kaarakitay mandarangin mahogod. ²¹ Idwa haglonob rotay kadyan yamos has daanon fag rotay. Noglonob kitonya, ka daanon fag rotay labi wamdawat aban. Maskin ka bago no sas daanon, kadahol ya kat losbong. ²² Idwa yadi ha taw somiblag bago fag alak ha basad daanon fag sohadan anit. Maskin ka alak bago fabosni ka anit daanon, ginya ka alak im-odolanan lamang. Ka fiya, fag somiblag bago fag alak has bago fag sohadan anit. ²³ Sadi ginan, sas Sirang Kafahowayan, da Hisos nadalan sasta namay ha tirigo. Ta

nogdalan sinya, in Hisos manga katogbong igfabago igbol manga haway sayok. ²⁴ Manga Farisiyo iglwang han Hisos kitay, Yabay kana mayon im manga katogbong no gibolon kadwa maangay sas Batasan Hodyo, maskin sawas Sirang Kafahowayan? ²⁵ Is Hisos nasagot has taw kiti, Ham awkin idwa nabasa, nyawa ginahin, in Dabid naibolon hyabi, da Dabid hanggan it manga ofod nonhori kawa kalonos? ²⁶ Kawas Dabid nasakbaw han Diyos basad balay, nos Abiyatar kasta gorangon has manga fagalan-han-Diyos. Ginyas Dabid nahwan ka tinapay kandisag han Diyos. Ka Batasan Hodyo iglwang ka manga fagalan lamang ka fiya homwan tonya fag tinapay. Dapat ay, is Dabid nahwan, ginya nadisag yadi hat manga ofod. ²⁷ Is Hisos nalwang ya has taw, Ka Sirang Kafahowayan kagtogbong has taw, bonwa ka taw kagtogbong has Sirang Kafahowayan. ²⁸ Maskin ngay, aho, Kanbali Taw, kagbahala yadi has Sirang Kafahowayan.

3 Sadi ya ginan is Hisos nasakbaw has basad fanimbaan Hodyo. Sinya ha sadik ama it gamat inrifis wan. ² Ha manga taw igbantay in Hisos, ngatay mafiya basad Sirang Kafahowayan maskin tagsayak it fabangdanan iglaban in Hisos. ³ Is Hisos iglwang has ama kanrifis it gamat kitay, Ha fag hastay. ⁴ Ginya madis Hisos iglwang has fakaaywanan kitay, Sida ka maangay has Batasan Hodyo, ham gayfan, ngatay ka gibolon fiya, ngatay ka gibolon dwat sas Sirang Kafahowayan? Ngatay igbawi taw, ngatay igfahatay taw? Dapat idwa ha nasagot in Hisos. ⁵ Ginyas Hisos namalantayon has taw sat ligongan, kahori wa dahol it fangayofan, maskin karongkot iglag manga taw myasa wa maganit it fangayofan. Ginya madis Hisos igfwayong has ama, Falogdayan im gamat. Ginya ka ama nafalogday ngat gamat, in fiya wa dagos, ogali wan. ⁶ Dapat ay, ka manga Farisiyo igdokson a, dagos wa goyonan igtoltolan han Hirodis sakop, no kindasta halimbawan kaarakitay fahatay in Hisos. ⁷ Ginya madis Hisos nataban it manga katogbong, nafatawas wan, hawas linaw dahol. Aywan fag manga taw gis sakop Galiliya goyan is taw, hanggan gis sakop Hodiya, ⁸ gis banwa Hirodalim, gis sakop Idomiya, hanggan gis difay Hordan, hanggan gis ligongan manga banwa Tiro hanggan Sidon, kaaywanon kaaywanon fag manga taw. Kawa tagdog in Hisos manga ibolon myasa wa fiya, ta gobok hanya. ⁹ Ginya madis Hisos igfwayong hat manga katogbong kitay, Fag fatalaga hangko sadik baloto kawa taw kaaywanon, matohon wa dahol, ho ngandayo imlibit. ¹⁰ Is Hisos iglwang kitonya maskin fagayo ka ha manga sagit igpilit han Hisos kaarakitay is Hisos mandog, manawid ka manga taw. Inbali kitonya kawa kaaywanon kan Hisos nafafiya. ¹¹ Nyawa ginahin ka manga labang noglag in Hisos, ka labang fagfahoriyon iglohoban san Hisos fon bitis, ginya ka labang igtawag marigon, iglwang, Haw in

Diyos wa Anak. ¹² Is Hisos igbando marigon has manga labang kitay, Hagfahilala has taw no fakta aho. ¹³ Ginyas Hisos hawas moyod, nafatawag it manga fakilalaon tiba. Tagtahnin yadi wa hanya. ¹⁴ Is Hisos nafatohoyan safolo ha dowak taw ka omofod hanya fagaba, it fagsogoon yadi kaarakitay manoltol has taw. ¹⁵ Ha kangayanan yadi igfaalin manga labang gis taw. ¹⁶ To kat manga ngayan ka safolo ha dowak katogbong. Bago bago is Simon, kan Hisos nafangayan is Pidro, ¹⁷ hanggan da Santyago da Hwan, in Sibidiyo manga anak, kan Hisos nafangayan da Boanirgis, it kahologan, Manga anak dalogdog. ¹⁸ Hanggan da Andris, da Filipi, da Bartolomi, da Matiyo, da Tomas, in Santyago sangay in Alpiyo anak, da Tadiyo, ginyan Simon sangay, ka goyon marigon it manga kapariho Hodyo, ¹⁹ hanggan is Hodas Iskariyoti ka naoyon in Hisos kalaban. ²⁰ Ginya madi da Hisos nwali wan. Kaaywanon fag manga taw nanifonan sadi ya ginan, yakanga da Hisos idwa twa kwan hanon gis nanya. ²¹ In Hisos manga kaiban no nadog kitay kitonya, ta naoyan kaarakitay tomaban in Hisos maskin taglwang, Is Hisos ngandayo kaliyam it fangayofan. ²² Ka mangag faadal Batasan Hodyo kandasog gis banwa Hirodalim, iglwang kiti, Is Biilsibol, ka tahinan manga labang, kagfon in Hisos, yakangas Biilsibol, kagfasyagan hanya igfaalin manga labang. ²³ Ginyas Hisos nafaakbang hanya ka manga taw, nafahalimbawa kitay, Kinday araw is Satanas nogfalagyo it sadili, ham gayfan? ²⁴ Halimbawa, ka sadik gorangon sakop nombali dowak layonan, idwa domogay. ²⁵ Kitonya yadi nangos, no sadik talanahan imbali dowak layonan, idwa yadi domogay. ²⁶ Kitonya yadis Satanas, noglaban it sadili sakop, igfabali dowak layonan, idwa domogay, imliyam di. ²⁷ Dapat ay, kagfon balay no marigon, idwa ha somakbaw hat basad balay kaarakitay ignahaw it botang nodya gomafos yap hanya, ginya madi idwa somawad it manga botang. ²⁸ Hogfwayong ha hayo, bonwa bohag, kasta manga naogali dwat fagayo twam liyam hanggan ista hampang nogfadwat igdog in Diyos ngayan, ²⁹ dapat, nyawa faktaw nogfadwat igdog ka Maliyaw fag Falad, tonya sadik ogali dwat idwa twam liyam, nyawa ginahin. ³⁰ Is Hisos iglwang kitonya maskin taghalwang kitay, Ha sadik labang kagfon in Hisos. ³¹ Yabay, in Hisos ina, hanggan it manga fadwasay indasog wan, mafanayan di sas sokayan a, igfatawag in Hisos. ³² Gis nanya kaaywanon fag manga taw matokawan san Hisos ligongan. Ta nafadog hanya, iglwang, Im ina hanggan im manga fadwasay sas sokayan galingawan hyamo. ³³ Ginyas Hisos nasagot has taw, Fakta kangko ina, fakta kangko manga fadwasay, ham gayfan? ³⁴ Ginya, nogbarantayon it mata has manga taw ka matokawan sat ligongan, is Hisos iglwang, Yabay, to kangko ina, hanggan angko manga fadwasay. ³⁵ Maskin, nyawa faktaw no katanog in Diyos kafan-

gayofanan, tonya wa kangko manga fadwasay, angko ina.

4 Sadi ya ginan is Hisos igtoltol sas bahalan linaw dahol. Kaaywanon kaaywanon fag manga taw igtifonan yadi sinya, yakangas Hisos nasakbaw has basad baloto, baba danom, matokawan yadi sinya. Ka fakaaywanan fag manga taw sinyas baba daga sas bahalan linaw. ² Yabay, is Hisos igfaadal has taw sinya, dapat sayapdis manga halimbawa. Nogtoltol, is Hisos iglwang, ³ Ham fag matalingan. Sadik ama fangiyab hawat namay kaarakitay mamamgas. ⁴ Hanya nogfamgas igsabod odit binhi, yakanga tibak bolhog indagdag has boknga dalan. Ka manga manok indasog a, nahwan wa tonya. ⁵ Ha akwa yadi manga bolhog indagdag has daga libabaw, baba odi dalifi. No kitay di dagos wa natobo kawa libabaw maskin ka daga sinya. ⁶ Ka myanit no nasalog sinya, myanit wa dahol dahol, kat manga tobo inlayong di, maskin idwa ha dalid abasad. ⁷ Ha manga bolhog yadi indagdag ha sayo manga lamnon madogi. Ka manga lamnon inlangba, nasakfaw di ka manga tanom. Ka tanom idwa nabohad. ⁸ Dapat ay, ha akwa yadi manga bolhog kandagdag has fiya fag daga. Yabay tonya ka natobo hanggan inabwat a, malangba, nabohad wan. Ha akwa nabohad tolok safolok bolhog, ha akwa nabohad onom ik safolok bolhog, hanggan ha akwa nabohad sadik daan bolhog. ⁹ Is Hisos nalwang, Ham no ha manga talinga ya ngadi, fag talinga wan. ¹⁰ Ginya madis Hisos nonboktong, ka tiba taw naintaw hanya, hanggan it manga katogbong, safolo ha dow, naintaw yadi, kawa hat manga halimbawa no kanat kahologan. ¹¹ Is Hisos nalwang has taw, Kati indisag wa ha hayo kitay ham fag tomwa ka mangadyag fadogon kawa han Diyos sakop baliwa, dapat no has iba taw, fagayo sas manga halimbawa yapdi ta no domog. ¹² Kaarakitay, Nyawa tanyaya wagbantay, tadwa lomag. Nyawa tagtalinga wagtalinga wan, tadwa tomwagdog. Inbali kitonya kaarakitay tadwa somoyo faliyam ista manga naogali dwat. ¹³ Is Hisos nalwang has taw kitay, Ham aw idwa twagdog to fag halimbawa? Kinda odi ham no tomwa wagdog fagayo fag halimbawa, ham gayfan? ¹⁴ Kagsabod igsabod in Diyos hampang. ¹⁵ Ka manga bolhog kandagdag sas boknga dalan, kito yadi nangos ka manga taw no nadog tonya fag hampang, is Satanas madali wagbol gista basad fangayofan ka nasabod hampang sinya. ¹⁶ Kito yadi ka manga bolhog kandagdag sayo baba dalifi, sas daga libabaw. Ta no nadog tonya fag hampang, igtanggap wa dagos, masolong wan no kitay di. ¹⁷ Dapat, idwa nadalid abasad sasta fangayofan. Ngalay di gagwanta. Dapat no ha donggon ya nga manga mahori, ngatay tagfahoriyan hanya maskin katiwala ka hampang, dagos wa nadayo. ¹⁸ Ka manga bolhog kandagdag ha sayo lamnon madogi, igfahalimbawa ka mangag talin-

ga has hampang, ¹⁹ dapat kat manga fagisipon fagaba it manga kakorangan, ngatay kawili wa dahol kaakwaan, ngatay kasaya manga iba bagay. To fag manga fagisipon ka kalangba, ginyag sakfaw ka hampang sat basad fangayofan, yakanga tonya idwag bohod. ²⁰ Dapat ay, ka manga bolhog kansabod sas fiya fag daga, ka mangag talinga ka hampang, igfaanod yadi tonya, ginyag bohod wan, tiba tolok safolo, tibat bohod onom ik safolo, tibat bohod sadi wak daan. ²¹ Is Hisos iglwang has taw, Tam awkin igdiya salong kaarakitay tam tomago ka salong sas daga gantangan, ngatay sas daga igyanan? Idwa awkin tam igsalifit ka salong sas tongod salangan, ham gayfan? ²² Idwa ha matagowan, kadwam lag aban. Idwa yadi ha mafyaloman kadwam diya aban has faglagan. ²³ Ham no ha manga talinga ya ngadi, fag talinga wan. ²⁴ Ginyas Hisos iglwang has taw, Ham fag matagahan no kana ka hayo fagtalingaon. No kinday ham nogfalag has iba taw, ta aba kitonya yadi nogfalag ha hayo, hanggan bondi kitonya kat disagon ha hayo aban. ²⁵ Dapat ay, ka ha akwa, ha tanggapon ya domwag, hanggan kadwa ha akwa, nyawa ka ogbot sa hanya, imbol di tonya aban. ²⁶ Is Hisos iglwang has taw kitay, kito yadi nangos in Diyos sakop. Sadik taw igsabod manga botol sas baba daga. ²⁷ Ginya kagsabod, no yabi intoyog wan, no sirang mabangon. Dapat ka botol igtobo di, kaabwat wan, nyawa kagsabod idwa twagdog no kinday no kabali kitonya. ²⁸ Yabay, ka dagag fatobo wan it natanom. Bago bago igtorang, ginya kaabwat, ginya kaway, ginya ha afo wan. ²⁹ Ka manga bohod no loto wan, igdagog wagfangta, kawa fanganion wan. ³⁰ Ginyas Hisos iglwang, Kinday odi ngap intam fatoladan in Diyos sakop, ham gayfan? Kinday tam nogfahalimbawa tonya? ³¹ Kitos sadik botol mostasa, ka ogbot man has fagayo fag botol kasta tanomon sadik baba daga, ³² dapat tonya nontanom, kalangba aban, kabali dahol man has fagayo fag fangofiyon, somanga yadi dahol fag manga sanga, yakanga manga manok igfogad sinya. ³³ Is Hisos nafwayong has fakaaywanan fag manga taw kaaywanon fag manga halimbawa kitonya, no kinday ka manga taw no tomwa wagdog. ³⁴ Idwa yadig toltol no bohonwa las halimbawa. Dapat nafwayong it manga kahologan fagayo hat manga sadili katogbong, ka tiba taw nodwa matalingan. ³⁵ Araw no kayabi wan, is Hisos nalwang hat manga katogbong, Tam domifay wa has difay danom. ³⁶ Ginya ta no naobon ka fakaaywanan fag manga taw, ka manga katogbong nataban in Hisos, danwa masahayan, nafalahaw wat baloto has baba linaw. Tiba sahayon nahoyog yadi was taw. ³⁷ Yabay araw nabagyo dahol dahol, ka manga taob nabakbak ha boknga baloto, yakanga kapno wa ka danom sinyas basad baloto. ³⁸ Dapat is Hisos sa dis ginanan ginanan, basad habot sahayon matoyogan, matangyawan. Ta naf-

law in Hisos, nalwang hanya, Haw kagfaadal hyami, haw awkin idwa galibitan tam nomlogom ha daga danom? ³⁹ Ginyas Hisos infolaw wan, nabando has bagyo, nalwang yadi has danom kitay, Fag kahalyaw wan, fag katohas wan. Ginya ka bagyo insiwang wa dagos, inhalyaw ya fiya fiya ka danom. ⁴⁰ Is Hisos nalwang hat manga katogbong, Yakana ham no kadala? Ham awkin idwag syag angko? ⁴¹ Tandolaw wa dahol a, ta nangarintawan ha sadi ha sadi kitay, Yabay faktaw to? Nyawa manga bagyo, manga danom katanog it fwayong.

5 Da Hisos indasog wan sas difay linaw sas banwanan manga Girasino. ² Is Hisos no nadokson gis basad baloto, sadik ama ka ha manga labang igfahoriyan hanya natagbo in Hisos. Ka ama inbangkad gis basad manga lohib fanlobgobanan taw, ³ kawa sinya no maoliyanan. Kati idwa ha taw syagan gafos ka ama, nyawa kadina ka fanggafos. ⁴ Itfagonan ta fagaba wagbinggas ya, gafos ya manga lobid baol, dapat hanyag bogloy digbogloy di ka kadina, igtogo digtogo di ka binggas. Idwa ha taw syagan igdaog ka ama. ⁵ Fagaba wa marokyawan, yabi sirang, sinyas basad manga lohib fanlobgobanan, hanggan wa basad moyod. Igfabaran wat sadili habilogan ha sayo manga bato. ⁶ Dapat ay, ka ama no nalag in Hisos gis ayayo, nadalandan hanya a, nanlibabaan hat atobangan, ⁷ igtawag marigon, iglwang, Hisos, in Diyos ka Abwat-man-has-Fagayo-Fagayo it Anak, kana haw nogmawat angko? Is Diyos igdog angko, aho nogtangkod kitay haw fag idwag fahoriyan angko. ⁸ Ka labang nalwang kitonya kawas Hisos nafwayong hanya kati kati haraw, Haw sadik labang dwat, fag galin gis nyamo fag ama. ⁹ Ginyas Hisos naintaw hanya, Faktam ngayan? Ka labang nasagot kitay, Ahos Mahabanan maskin hami kaaywanon. ¹⁰ Ka labang nafaawaon in Hisos, nalwang, Ha nangos fag idwag faalin hyami gis-tay fag talon. ¹¹ Gis nanya ha sadik tifonan baboy ayo ayo kwan manga lamnon sasta akbang, baba moyod. ¹² Ka manga labang nafwayong in Hisos, kitay, Ha nangos sogowan wa hyami has manga baboy, mi fag has basad manga baboy. ¹³ Yakangas Hisos nafaangay wa ngay. Ginya ka manga labang, no nalin gis ama, hawas basad manga baboy. Ka tifonan manga baboy, manga 2,000, dagos wa nanhadalandanan madali has lwad indahodan, has basad linaw dahol. Fagayo inlimos wan. ¹⁴ Ka manga gano ista tifonan baboy nalagyo wan, namarita has manga basad banwa hanggan sas ligongan. Ka manga taw inbarangadan, namantay no kana ka sinya. ¹⁵ Ta nondasog han Hisos, taglag ka ama ka haraw ka labang, is Mahabanan, it fagfahoriyon, kati matokawan yadi sinya, ha solong rotay, it fangayofan ogali man di. Tandala waglag. ¹⁶ Ka manga nalag is Hisos nogfafiya ka ama, natoltol kawa hanya hanggan has manga baboy. ¹⁷ Ginya ka manga taw ig-

sogo wan Hisos kitay, fag lahaw gista banwanan.

¹⁸ Ginya madi araw araw, is Hisos nogsakbaw wan has basad baloto, ka ama, ka manga labang fagfahoriyon haraw, gwayan wa kasaya mahin in Hisos, ¹⁹ dapat is Hisos idwag faangay, iglwang hanya, Haw fag goli yapdi ham manga fakilalaon. Fwayongan has taw ka hayo Fon naibolon kafiyaon sa hyamo, hanggan in-awa hyamo. ²⁰ Ginya ka ama nwali wa ngay, namarita has taw sas banwanan Safolok-Banwa kitay, in Hisos naibolon ha hanya kafiyaon. Ka manga taw fagayo intaka wagdog. ²¹ Da Hisos nondasog ya has difay linaw, kaaywanon fag manga taw nagobok hanya sas baba daga, sas bahalan danom. ²² Ginya madi sadi kagbaha la sas fanimbaan Hodyo, kawas Hayro, inbangkad wan. Ginya, no nalag in Hisos, nanlibabaan san Hisos atobangan, ²³ igfaaronganon wan, iglwang kitay, Angko anak ina kaodikitay sas balay yapdi. Haw nangos tahinan angko, fwalidan yap im manga gamat hanya kaarakitay hanyam boyag yapdi. ²⁴ Yabay, is Hisos naofod wan Hayro. Sadik tifonan taw kaaywanon naoyan yadi wan, igdarotdotan wa hanya. ²⁵ Ya mangharaw, ha sadik ina mahoyogan yadi has taw. Ka ina ha fagdogon dogay, kawa safolo ha dowak fangaraw idwa kafiya it sagit ina. ²⁶ Inhori gis manga famolongan ayo no kitay di, hanggan di namin it manga sangkap, nabayad fagayo fagayo has manga famolongan, dapat ay idwa kaoman. Yatokitay, mahori man kat fagonan. ²⁷ Ka ina nadog kawas Hisos igfafiya ista manga sagit, yakanga naakbang han Hisos gis ginanan, dayo goyoy, sas fagbokngan fakaaywanan, nasapkid in Hisos rotay. ²⁸ Maskin ka ina fangayofan iglwang, ngadi ho somapkid in Hisos rotay, homfiya wan. ²⁹ Dagos wanfiya it sagit ina. Ka ina nadog kitay fawag folot yabay. ³⁰ Ginya madis Hisos no natwa kitay ha nabol karigongan gi hanya, namalihidan wan sas fagbokngan fakaaywanan taw, iglwang kiti, Fakta kagsapkid angko manga rotay? ³¹ In Hisos manga katogbong nafwayong hanya, Haw fadi wadaglag taw kaaywanon, igdarotdotan wa ha hyamo, ginya haw iglwang, Faktaw kagsapkid angko? ³² Dapat is Hisos nafasaligawan it mata sat ligongan kaarakitay lomag no faktaw ka nasapkid it rotay. ³³ Ginya madi ka ina, maskin natwa kitay hanyan fiya, naakbang hanya, indala wa dahol, nangarokogan wan, nanlibabaan san Hisos atobangan a, nabaya wa fagayo han Hisos. ³⁴ Ginyas Hisos nalwang hanya, Anak ina, maskin hagsyag angko, haw infiya wan. Nyawa ha mwali wa kati, im fangayofan fag imhoway wan, hyamo fagdogon infiya wan. ³⁵ Is Hisos no kampung yapdi has ina, tiban dasog wan gin Hayro balay. Ta nafwayong hanya kiti, Hyamo anak ina natay wan. Hawag falibang yapdi kagfaadal has taw. ³⁶ Dapat is Hisos idwa nabati ista nafwayong, nalwang has ama ka fagtahinan sa sadik fanimbaan Hodyo, Haw fag idwa kadala, haw fag syag

di ngay hangko. ³⁷ Is Hisos idwa nafatahin ka fakaay-wanan. Nataban lamang in Pidro, hanggan da Santyago da Hwan dowasay. ³⁸ Ta nondasog san Hayro balay, tagdog ka manga taw gagran igwaraywayan wan, goraw ka anak natay. ³⁹ Is Hisos nonsakbaw, nalwang has taw, Yakana ham no gagran hanggan goraw? Ka anak idwa natay, matoyogan di. ⁴⁰ Ta kasay odin Hisos. Dapat is Hisos nafadokson fagayo fag manga taw. Ginya nataban ka anak it ama hanggan it ina, hanggan in Hisos nataban manga katogbong, ginya ta nasakbaw has basad oliyanan anak. ⁴¹ Is Hisos igtawid ka anak gamat, nafwayong kiti, Talita komi, sat sadili sanglitan. It kahologan nangos, Anak ina, hogfwayong hyamo, fakabangon wan. ⁴² Ginya ka anak ina dagos wanbangon a, iglahaw ya. Ka anak ina ha safolo ha dowak fangaraw it kadogayan. Fagayo fagayo fag manga taw indolaw waglag. ⁴³ Ginyas Hisos natogon fiya has taw kitay, Ham fag idwag fwayong nyawa haday ka hayo mata lagan. Ginya madis Hisos natogon has taw, Ham fahwanan fafa has anak ina.

6 Is Hisos inlahaw wa ginya, nwali hat sadili banwanan. It manga katogbong natahin yadi hanya. ² No sas Sirang Kafahowayan, is Hisos igfaadal ya ngay has basad fanimbaan. Kaaywanon ka manga nadog in Hisos toltol, intaka wan, taglwang, To fag ama gindak nabol to? Kana fag katonongan ka nafalobos hanya? Twa oman gibolon ka kitonya fag manga madolaw? ³ Bohonwa awkin to ka famanday balay, in Mariya anak, inda Santyago, da Hosi, da Hodas, da Simon fadwasay? Idwa awkin istay yadit manga fadwasay ina no maoliyanan? Yakanga tadwa katalinga in Hisos. ⁴ Ginyas Hisos nafwayong has taw, Nyawa siday manga taw magalang has fangampang, nodwa sat sadili banwanan, it sadili iba, ngatay sat sadili talanahan. ⁵ Is Hisos idwa nasyagan naibolon manga madolaw sinya, no bonwa sayok odi kat nafafiya ista manga sagit no nandog is taw. ⁶ Is Hisos ngap indolaw wan kawa tadwa katiwala hanya. Ginya madis Hisos nasafong has manga tifonan balay sas sokayan banwa, igtoltol yadi sinya. ⁷ Ginyas Hisos nafatifonan ya ka Safolo-ha-Dowa, nafalobos has taw it kangayanan hasagfaalin manga labang gis taw. ⁸ Natogon yadi hat manga katogbong kitay, Ham fag idwa ha balon ngadi kana sas lahawan, no bohonwa sokod odi hayo diya. Nyawa fanganon, nyawa boyog, nyawa kwarta sa hayo hagkos, fag idwa ha diya. ⁹ Dapat fag ha lapak di, fag idwa gosniban hayo rotay. ¹⁰ Ginya nafwayong yadi hat manga katogbong, Nyawa siday hayo nagdasogan fag balay, ham fag sinya wak gigya ham nodyag lahaw ginya fag banwanan. ¹¹ Nyawa sida fag foro ta nodwag fasakbaw hayo, nodwa yadig talinga hayo, ham no kalahaw ginya, fadagdagan ka fogis daga gi hayo manga bitis, bilang wagfaayfan ka taga sinya fag manga taw. Ginya madis Hisos nasogo ka Safolo-ha-Dowa

ha sadik foro, ha sadik foro, myasa dowa, myasa dowa. ¹² Yakanga ka Safolo-ha-Dowa inlahaw wan, naltol has taw kitay ta fag soyo wan. Ta fag dayo wasta manga ogali dwat. ¹³ Aywan fag manga labang kasta nafaalin gis taw. Ta naasnahi lana ogbot sasta baba alfoyo nogfafiya aywan ka ha manga fagdogon. ¹⁴ Gis nanya fag masohod, is Hirodis kasta gorangon sas sakop Galiliya, nadog yadi kan Hisos manga naibolon madolaw, maskin in Hisos ngayan inbantog wan. Tiba taw iglwang is Hisos kawas Hwan kagfatogna manga taw hyabi. Hanya hono, inbangon ya gis kahatayan, yakangas Hisos syagan gibolon manga madolaw. ¹⁵ Tibag Iwang, To is Iliyas wan. Tibag Iwang, To in Diyos fangampang sadi, kito mandi ka hyabi it manga fangampang. ¹⁶ Dapat is Hirodis, no nadog, nalwang, To kawa ngas Hwan, kangko nafalifong it liyog hyabi, dapat ay, inbangon ya. ¹⁷ Maskin hyabi, is Hirodis mandi ka nafagammat has manga taw in Hwan, nafagafos yadi, nafaporiso wan, kawas Hwan gato in Hirodis maskin is Hirodis nabol in Hirodiyas, it tagyaw, in Filipi babay. ¹⁸ Kawas Hwan igfwayong han Hirodis kitay, Idwa fiya haw no kagaw im tagyaw. ¹⁹ Is Hirodiyas kahori in Hwan, kasaya wagfahatay hanya, dapat bago bago idya syagan, ²⁰ maskin is Hirodis kadala in Hwan. Is Hirodis natwa kitay is Hwan sadik ama fiya it ogali, maliyaw, yakangas Hirodis gapin in Hwan. Is Hirodis kasayag talinga in Hwan manga toltol madi ngap, nyawa gadowan it fangayofan. ²¹ Dapat ay aban, is Hirodiyas nalag it halimbawan kaarakitay fahatayan in Hwan. Ta nogtohod in Hirodis kasagayan fag sirang, is Hirodis nafasyahod is taw kaaywanon fag manga hanon. Is Hirodis nafatawag it manga nahalig, ka ha manga kangayanan, ka manga fagtahinan has manga sondalo, hanggan kasta manga fakilalaon fag manga taw gis sakop Galiliya. ²² Araw in Hirodiyas anak ina, nasakbaw, natayok sasta faglagan manga ama. Is Hirodis, hanggan ka manga ama matokawan yadi sinya, igbaya waglag ka dayaga nogtayok. Ginyas Hirodis, ka gorangon, nafwayong has dayaga, Ho domisag hyamo nyawa kana kam fagsagadon gingko, nalwang ya domwag, ²³ Is Diyos igdog wan aho noglwang, bonwa bohag, nyawa kanam fagsagadon, ho domisag hyamo, nyawa hanggan wagboknga angko sakop. ²⁴ Ginya ka dayaga hawat ina, naintaw hanya, Kana araw angko sagadon? It ina nalwang kitay, Fag kawas Hwan, kagfatogna manga taw, fag it alfoyo im fagsagadon. ²⁵ Ginya madi ka dayaga infwali ya madali has gorangon, nanagad madali, iglwang, Ho kasaya nangos, in Hwan alfoyo basad fingingan, ka Hwan kagfatogna manga taw hyabi, fag tonya kam disagon angko. ²⁶ Ginya madi yabay, ka gorangon is Hirodis inrongkot wa dahol it fangayofan. Dapat idwa nasyagan nabawit hampang kawat manga fakilalaon nadog wat nafatohoyan has dayaga haraw. ²⁷ Is Hirodis dagos na-

sogo sadik sondalo, nalwang, Lifongan in Hwan liyog a, diyan it alfoyo hastay. Ka sondalo hanya wan, nalifong in Hwan liyog basad porisowan. ²⁸ Ginya ta nadiya it alfoyo basad fingingan, nadisag has dayaga, ginya madi ka dayaga nadisag hat ina. ²⁹ In Hwan manga katogbong, no nadog kitay ta nafahatay in Hwan, ta hawas porisowan, nabol in Hwan habilogan a, nafwalid basad lohib fanlobgobanan. ³⁰ Ka manga Fandiya-Barita nwali ya gis famaritaan. Ta natoltol han Hisos it manga naibolon fagayo fagayo hanggan it manga natoltol has taw. ³¹ Ginya madis Hisos nalwang hat manga katogbong, Tam hawas basad fakahyabogan, kaarakitay tam fahoway yap ogbot. Nalwang kitonya maskin kaaywanon fag manga taw igsaliwan wan, tadwa twa kwan hanon. ³² Yakanga ta nasahay baloto, hawas difay sayo fakahyabogan ngay, masamanan nangos gis taw. ³³ Dapat aywan nalag wan ta no kaginan, nalag kitay da Hisos wa tonya fag manga taw. Ta nandalandan sas baba daga gis fagayo fag manga banwa, has bahalan danom. Ta nagona man inda Hisos indasog. ³⁴ Is Hisos no nadokson gis sahayon sat nakadagsaan, iglag ka manga taw kaaywanon. Hanyan awa waglag is taw, maskin ka manga taw bilang wa topa idwa ha gano taw. Ginyas Hisos natoltol kaaywanon fag manga bagay has taw. ³⁵ Ka myanit no kasangday wan, in Hisos manga katogbong hawan Hisos, nalwang, ³⁶ Tam istay basad fakahyabogan, kayabi wan. Falahawan yap nangos has manga tifonan balay sas ligongan ka manga taw kaarakitay ta manali ista sadili fanganon. ³⁷ Dapat is Hisos nasagot hat manga katogbong kitay, Fag ham wa ka domisag fanganon has taw. Ginya ta nasagot han Hisos, Mi manali awkin 200 dinariyo tinapay, ginya fahoray has taw? ³⁸ Ginyas Hisos nalwang hat manga katogbong kitay, Kayodak tinapay hayo diya? Faman-tay ngay. Ginya ta no namantay, taglwang, Lima di hanggan dowak oyang. ³⁹ Ginyas Hisos nafatokaw sas baba lamnonan ka manga taw, malayonan. ⁴⁰ Ginya ka manga taw intokaw wan, malayonan ngay. Tibak layonan sadik daan, tibak layonan limak safolo. ⁴¹ Ginya madis Hisos nabol ka limak tinapay, hanggan dowak oyang, natangdan has tongod a, nabaya in Diyos ka fanganon. Ginya nafaarogbotan ka tinapay a, nadisag hat manga katogbong kaarakitay homoray has taw. Ginya no nafaarogbotan ka dowak oyang, nahoray ya-di has taw fagayo. ⁴² Ginya madi fagayo nangwan wa a, napsog wan. ⁴³ Ta natifon ista sawad nakanan mafaarogbotan, safolo ha dowak boyog napno manga tinapay hanggan oyang. ⁴⁴ Manga 5,000 ka manga ama ka nangwan tinapay. ⁴⁵ Is Hisos nafasahay wa dagos it manga katogbong, has basad baloto nafagona wa has difay linaw dahol, hawas banwa Bitsayda. Is Hisos in-goyan, nafaoli yap ka fakaaywanan fag manga taw. ⁴⁶ Ka manga taw nonlahaw di ngay, is Hisos

nalawah yadi wan has baba moyod kaarakitay mandarangin. ⁴⁷ Araw, nonyabi wan, ka baloto sawas fakabokngan linaw, is Hisos sadi odi sas baba daga. ⁴⁸ Ginya madis Hisos nalag kitay it manga katogbong kahori waglowag, kawa bagyo igsibwa wa has bohid. Dapat no kayawa wan, is Hisos naoyan yadi wat manga katogbong, nalawah sas baba danom, kawas Hisos kasaya nangos gomona hasta fagonan. ⁴⁹ Dapat in Hisos manga katogbong no nalag in Hisos iglahaw sas baba danom, ta gayfan ngan wa labang. Tagharokyan wan, ⁵⁰ kawa ta gafalad wan Hisos. Dapat is Hisos dagos nahampang has taw, nalwang, Fag marigon hayo fangayofan, aho di, ham fag idwa kadala. ⁵¹ Ginyas Hisos nasahay has basad sahayon. Ka bagyo dagos yadi wantolong. ⁵² Ta kadolaw waglag, kawa tadya twagdog no kinday is Hisos nafatimawa no nafaaywan ka tinapay, maskin tadyag syag orangan in Hisos. ⁵³ Ta no nadifay ka linaw dahol, tandagsa wan sas banwa Ginisarit, natarabing it baloto sinya. ⁵⁴ Ta nondokson gis basad sahayon, ka manga dan sinya fag manga taw is difay, dagos wa nahilala in Hisos. ⁵⁵ Dagos nasonson ka ha manga sagit git manga balay sas ligongan. Ta naanggong sasta baba fangigyanan kaarakitay domiya han Hisos. Nyawa ta sidak nadog in Hisos, ta hanya yadi wan. ⁵⁶ Nyawas Hisos haday kandasog, ta nafaigyan ka manga ha sagit sas manga fakataban balay, nyawas Hisos has manga tifonan balay sayok, nyawa has manga banwa dahol, nyawa has moyod, tagsagad kitay, Ha fatawidan yap man ka manga ha sagit, ngadim tobwan rotay, kaarakitay tamfiya wan. Fagayo ka natawid in fiya wan.

7 Ginya madi, gis banwa Hirosalim, ha manga Farisiyo hanggan ka mangag faadal Batasan Hodyo, naakbang in Hisos, ² taglag kitay in Hisos manga katogbong tiba, kwan hanon nyawadya naogas fiya fiya ista sadili gamat kito ka togon magorang fwayong. ³ Maskin ka manga Hodyo fagayo, labi man ka manga Farisiyo, tadwa kwan hanon nodya nanggonaw it manga gamat kito kasta kaogaliyan gis magorang hyabi. ⁴ Hanggan ta no goli gis fanaliyan, ta nodya nanggonaw it manga gamat kitonya, tadya kwan hanon. Tadwag liyam it manga ogali gis hagorangan kitay, fag kitonya no manga gogas it manga fanginoman, manga anglit, hanggan manga sangkap tanso. ⁵ Ginya ka manga Farisiyo hanggan ka mangag faadal ka Batasan Hodyo naintaw yadi han Hisos kitay, Kana mayon im manga katogbong no kaliyam wa ka manga ogali hyabi, gis manga magorang, kawat manga gamat idwan gonaw kito kantam ogali gis hyabi, ta no kwan hanon? ⁶ Is Hisos nalwang has taw kitay, Anod, kitonya ngay in Diyos fangampang Isayas fwayong kawa ha hayo, manga taw ka ha takan. Kito kanfwalid sat sorat kitay, Hampang odik masayagdog, Dapat ista fangayofan ayayo gingko. ⁷ Idwa ha kahologan ta

nogsimba hangko, Maskin ogali odi taw kasta fagfaadalon. ⁸ Ham igfasigpala in Diyos togon, dapat ham matawidan fiya fiya has ogali magorang. ⁹ Is Hisos iglwang has taw, Anod ham, ham igdayo in Diyos togon kaarakitay hayo sadili fag manga ogali fagayo ka hayo fakatanogon. ¹⁰ Maskin is Mwisid nalwang kitay, Haw fag idwag falamang im ama hanggan im ina. Nalwang yadi kitay, No fakta ka kampung igSabayon, ngatay hat ama, ngatay hat ina, fiya man hanya no matay wan. ¹¹ Dapat ham iglwang, Nyawa faktaw noglwang, ngatay hat ama, ngatay hat ina, Kangko togbong hara hayo, ya Korban wan. It kahologan no Korban, nadisag wa han Diyos ka kitonya. ¹² Basta nalwang kitonya, gis nanya ham fawag fafalo tonya fag taw it ama hanggan it ina, nyawa kana. ¹³ No kitonya ham idwag fahalga in Diyos togon maskin ham igfalaming odig fadog hayo manga ogali has taw. Dapat aywan yadi fag manga bagay, bonwa kitay matoonan odi tonya, ka hayo fagfalamingon. ¹⁴ Ginyas Hisos nafaakbang ya hanya ka manga taw, iglwang kitay, Ham fagayo fagayo fag matalingan hangko. Ham fag tomwagdog kitay, ¹⁵ idwa ha fanganon igfadwat ista fangayofan, dapat gista basad fangayofan kagfadwat ista ogali. ¹⁶ Ham no ha manga talinga ya ngadi, fag talinga wan. ¹⁷ Is Hisos nonsakbaw ha basad balay, saman gis fakaaywanan taw, it manga katogbong naintaw hanya kat nafahalimbawa haraw, no kanat kahologan. ¹⁸ Ginyas Hisos nalwang hat manga katogbong kitay, Ham aw idwa yadi natwagdog? Ham awkin idwa twa kitay bonwa ka hanon kagfadwat ista ogali? ¹⁹ Ka hanon idwa has basad fangayofan, dapat ha odis basad tiyan, ginyam olay di aban. Maskin nafwayong kitonya, is Hisos nafatohoyan kitay idwa ha fagbaybayon fanganon. ²⁰ Ginyas Hisos iglwang, Kadi gis basad fangayofan taw kagfadwat it ogali. ²¹ Maskin gis fangayofan taw nogfabago ka gisip dwat, nyawa anahan nyawa dayaga nogdoyogan lamang, mangag nahaw, mangag fahatay taw, ²² mangag fabayowan, manga kaingli is taw. Ginya yadi ka manga dwat fag ogali, kitos igbalibad, mangadwa ha nahayan, hanggan igSadili odi, ka mangag fadwat igdog ka tiba, igfataka has manga taw, hanggan manga dwat fag hakot. ²³ Tonya fag manga dwat fag ogali fagayo gis basad fangayofan taw nogfabago, igfabali ka taw idwa fiya. ²⁴ Ginyas Hisos inlahaw ginya fag banwanan, hawas akbang banwa Tiro hanggan banwa Sidon. Is Hisos insakbaw sasta balay, no kitay di, kwangit igfadog has taw kitay hanyan dasog wan. Dapat, nyawa kitonya, taglag di hanya. ²⁵ Sinya ha sadik ina, it anak ina ogbot ha sadik labang igfahoriyan hanya. Ka ina no nadog kitay is Hisos sinya, hanya dagos wa naakbang in Hisos, nanlibabaan san Hisos dayo bitis. ²⁶ Tonya fag ina taga Sirofinisya, it fangampangan Girigo. To fag ina igfaaronganon in Hisos kitay, Faalinan ka labang gingko

anak ina. ²⁷ Ginyas Hisos nasagot kitay, Idwa fiya bomol ka anak taw fanganon ginyag disag has manga ido. ²⁸ Dapat ka ina nasagot kitay, Anod, angko Fon, dapat nyawa di kasta manga ido sas daga fanganan, kwan ka manga anak tingaw ka kadagdag. ²⁹ Ginyas Hisos nalwang has ina kitay, Kawa haw nalwang kitonya, nyawa haw mwali wa kati, ka labang nalin wan gim anak ina. ³⁰ Ka ina nwali wa dagos hat balay, nalag it anak maigyanan sas baba sagmak. Kat ina nondasog, ka labang danwa nalin ginya fag anak. ³¹ Is Hisos nwali ya gis manga sakop Tiro, nadalan sas banwa Sidon hanggan wandasog sas Linaw Galiliya. Nadalan yadi sas sakop Safolok-Banwa fag banwanan. ³² Ka sinya fag manga taw nataban han Hisos sadik ama gabongkok, idwa twa kampung fiya. Tagfaaronganon in Hisos kitay nangos, in Hisos gamat fag manawid yap man ka ama boyon. ³³ Is Hisos nafasaman ka ama boyon gis fakaaywanan taw, natolsok it manga timoyo faniyo has ha bongkok fag manga talinga. Ginyas Hisos natofay a, nasapkid has ama baba dila. ³⁴ Ginyas Hisos, no nabantay has tongod, naayangasan a, nafwayong hanya, Ifata, sat sadili sanglitan. It kahologan, Fag katolas wan. ³⁵ Ginya madit talinga intolas wan, it tahod dila inlohas yadi a, ginya nahampang maslong. ³⁶ Is Hisos iglwang has manga taw kitay, Hawag fwayong has taw, ngadi siday. Dapat is Hisos nogbando has taw, kwangit igfadog, ta labi man igfwayong di ngap has taw. ³⁷ Tantaka wa dahol dahol igdog, tagfwadfwayongan kitay, In Hisos manga ibolon fagayo myasa wa fiya. Nafafiya ka gabongkok, ginyag dog ya. Nafafiya ka boyon, ginya ogali mandi, kampung mandi fiya fiya.

8 Gis nanya fag manga masohod, sadi ya ginan taw kaaywanon nonbangkad han Hisos, tadwa ha hanon, hanggan is Hisos nafaakbang hanya it manga katogbong, iglwang kitay, ² Ho kaawa wa to fag manga taw kaaywanon, maskin kati tolo wak sirang ta no gofod intam, namin wat manga balon. ³ Aho nogfaoli was taw hat manga balay, ta no kalonos yapdi, tam-lombay wat lonos boknga dalan, kawa tiba giwas fakaayayowan. ⁴ Ginyan Hisos manga katogbong nasagot hanya kiti, Kinda fag mapsog fanganon to fag manga taw istay, maskin tam sawas basad fakahyabogan. ⁵ Ginyas Hisos naintaw hat manga katogbong, Kayoday hayo tinapay is nyamo? Taglwang, Fito dik tinapay. ⁶ Ginyas Hisos nafatokaw ka manga taw sas baba daga a, nabol ka fitok tinapay. Nontabo wagbaya in Diyos, nafaarogbotan, ginya nadisag hat manga katogbong kaarakitay ta homoray has manga taw. Ginyat manga katogbong nangorayan wan has fakaaywanan. ⁷ Ha ofi yadi oyang ogbot. Ginya madi; is Hisos, no nabaya yadi han Diyos ka manga oyang, nalwang, Toy ham fahafodan yadi has taw. ⁸ Fagayo nangwan, napsog ya ngadi. Ta no natifon ista sawad

nakanan fanganon mafaarogbotan, napno fitok baban. ⁹ Ka manga taw sinya manga ofat ik libot kaaywanan. ¹⁰ Is Hisos nafaoli wan ka fakaaywanan a, ginya madi nataban it manga katogbong, dagos nasahay has basad baloto, hawas akbang banwa Dalmanota. ¹¹ Ka manga Farisiyo inbangkad ya ngay han Hisos, nafabohondit toltol. Tagsagad kitay is Hisos fag ha falagon madolaw gin Diyos banwanan sam tongod, kawa tagsolay in Hisos. ¹² Yakangas Hisos inhuri odit fangayofan, nalwang has taw kitay, Yakana ka kati fag masohod fag manga taw nogsagad falagon madolaw? Hogfwayong hayo, orongan wan hodwa ha falagon madolaw ha hayo, ham ka kati fag masohod fag manga taw. ¹³ Is Hisos nafatawas was taw. Ginya madi nasahay has baloto hawas difay linaw. ¹⁴ In Hisos manga katogbong idwa natohod nadiya it manga balon tinapay, sadi odi ista nadiya. ¹⁵ Ginyas Hisos iglwang hat manga katogbong kitay, Ham fag matagahan, fag idwa kasaya ka manga Farisiyo hanggan in Hirodis famadahol tinapay. ¹⁶ In Hisos manga katogbong nangarintawan no kanat kahologan in Hisos fwayong. Taglwang, Kawa tam idwa ha balon tinapay. ¹⁷ Kawas Hisos nadog ta nogtololan, hanyag Iwang kitay, Kana ham nagtololan yapdi kawa ham idwa ha balon tinapay? Ham awkin idya twagdog? Hayo fangayofan laya idyag dasog sinya, kawa maganit. ¹⁸ Kawa bilang odi bota, idwag lag, nyawa ha mata. Bilang odi bongkok, nyawa ham ha manga talinga. Ham awkin idwag tohod? ¹⁹ Aho no nafaarogbotan limak tinapay has 5,000 ama, kayodak boyog ka napno nafaarogbotan tinapay ka hayo naanggong kasta sawad nakanan? Ta nasagot in Hisos, Safolo ha dow. Ginyas Hisos naintaw ya domwag, ²⁰ Sadi ya ginan aho no nafaarogbotan fitok tinapay has 4,000 kayodak baban ham igdog kasta sawad nakanan ka hayo naanggong itfagonan? Ta nasagot, Fito ya. ²¹ Ginyas Hisos nafwayong has taw, Ham awkin idya twagdog? ²² Da Hisos nondasog wan has banwa Bitsayda, ka manga taga sinya nataban sadik ama bota, galibitan wagfwayong han Hisos, is Hisos fag tomawid yap. ²³ Is Hisos nagamit ka ama bota, nafasaman yap gis taw, hawas dayo manga balay. Is Hisos natofay ka ama bota mata, ginya natawid ka ama, naintaw hanya, Kati hagdog awkin hanfoga wan? Haw awkin iglag wan? ²⁴ Ka ama namarantayon wan, iglwang, Hogleg manga taw bilang wa manga hayo iglahaw. ²⁵ Ginya, sadi ya ginan is Hisos nandog it mata, ginya ka ama igdoro wan, it mata infoga wa fiya fiya, nalag nyawa kana fag bagay. ²⁶ Is Hisos nafaoli ya ka ama, dapat iglwang kitay, Haw fag idwag dalam sas tifonan manga balay. ²⁷ Ginyas Hisos hanggan it manga katogbong nafadagos it lahawan. Hawas manga tifonan balay sas sakop Sisariya, ka Sisariya ka san gorongan Filipi sakop. Ta noglahaw yapdi, is Hisos naintaw hat manga katogbong kitay, Fakta hono aho,

ta noglwang? ²⁸ Ginya madi ta nasagot han Hisos, Tiba taw noglwang, haw, hono, hyabi, is Hwan kagfatogna manga taw. Dapat tiba taw iglwang, haw kawas Iliyas hyabi, ginya tibag lwang, haw in Diyos fangampang sadi hyabi. ²⁹ Ginya madis Hisos naintaw ya domwag hat manga katogbong, Dapat no ham kaglwang, faktaw aho, ham gayfan? Is Pidro nasagot, Haw wa kan Diyos-natogon-Famawi. ³⁰ Ginyas Hisos nabando has taw kitay ta fag idyapdig fwayong nyawa hada fag taw kitay hanya in Diyosnatogon-Famawi. ³¹ Ginya madis Hisos bago digfadog hat manga katogbong kitay hanya, Kanbali Taw, omagwanta aywan fag manga mahori aban. Ka manga fagtahinan sas banwa, ka manga fagtahinan fagalan-han-Diyos, hanggan ka mangag faadal Batasan Hodyo domayo, hanggan wa fahatay hanya. Dapat ay aban, nomsagaya tolok sirang, hanyam boyag ya. ³² Is Hisos no nalwang kitonya, nafatigna fiya fiya. Ginyas Pidro nafasaman ogbot gis taw in Hisos, igfabago gato hanya. ³³ Dapat is Hisos nasayango hat manga katogbong tiba, naato in Pidro, nalwang, Satanas, fag lahaw wa gistay haw. Hadwa goyon in Diyos, haw goyon odis taw. ³⁴ Ginyas Hisos nafaakbang hanya ka fakaaywanan fag manga taw hanggan it manga katogbong, ginyag lwang, Nyawa faktaw no kasayag tahin angko, falibangan fagaba it sadili fakasayaon, fasanan it sadili fatimbangan hayo, ginya madi tahinan wangko. ³⁵ Maskin, nyawa faktaw, not sadili haboyagan it fagfahalgaoon, tonyam liyam di, dapat ay, nyawa faktaw kadwa kwangit it sadili haboyagan kawa hangko, hanggan ka Fiya fag Barita, it haboyagan idwam liyam. ³⁶ Kana kat fakinabangon, ham gayfan, sadik taw no omafo sadi wak dahonya baba daga, halimbawa, dapat ay it sadili haboyagan nomliyam di aban? ³⁷ Kana ara it bayad kaarakitay bomawi it sadili haboyagan, ham gayfan? ³⁸ Maskin aban, aho, Kanbali Taw nombangkad ya, angko Ama kafiyan imlag sangko gis nanya, hanggan ka manga maliyaw fag anghil mahoyogan yadingko. Gis nanya aban ho maya wagfadog ista ngayan nyawa faktaw, hanya no kayag fadog angko ngayan hanggan angko manga hampang has manga taw, kati fag kasohodan, ka ha ogali dwat, hanggan dayog fasakop hangko.

9 Is Hisos iglwang is taw, Hogfwayong hayo, bonwa bohag, tiba taw istay idya matay nodya lomag kitay is Diyos kabali wa hari, ha karigonan dahol.

² Nonsagaya onom ik sirang, is Hisos nafasaman git manga katogbong iba, inda Pidro, da Santyago, da Hwan, nataban ka tolo has baba moyod abwat. Ta no sinya wan, ta nalag in Hisos habilogan in-oman wan, fiya wa dahol kabantay, hanggan ³ it manga rotay it kaabohayan di masilaw wan, abohay wa dahol dahol, bondi kitos nabakbak non-abohay kat rotay, nyawa faktaw. ⁴ Da Pidro nalag inda Iliyas da Mwisik kampang han Hisos. ⁵ Yakangas Pidro nalwang han Hisos,

Kafiyaon, hyami Fon. Tam fag istay yapdik madogayan. Mi fomalo hayo tolok dongdongan, insadi hyamo, insadi in Mwis, insadi in Iliyas. ⁶ Is Pidro nalwang kitonya kawa ka tolok katogbong indala wa dahol iglag, yakangas Pidro gadaliyan wa kampang. ⁷ Ginya madi sadik linyabo nalanbong is taw. Gis basad linyabo ha nahampang, iglwang kiti, Toy angko fagal-wasiyon fag anak, fag hanya ka hayo fagtalangaon. ⁸ Ginya da Pidro fadi wadnamarantayon madali hasta dayo, yabay tadwa ha lagan kasta ofod haraw, no bonwas Hisos lamang kasta lagan kan-goyan. ⁹ Araw, ta noglahaw has lwad, is Hisos natogon it manga katogbong kitay, Aho, Kanbali Taw, nodyan boyag ya gis kahatayan, ham hayap igfwayong has taw kan Diyos nafalag hayo kati haraw. ¹⁰ Yakanga da Pidro idyapdig fwayong has taw it lagan, dapat ta garintawan no kanat kahologan is Hisos no gwas kitay, hamboyag ya domwag gis kahatayan. ¹¹ Ta gintaw in Hisos, Kana mayon ka mangag faadal Batasan Hodyo noglwang kitay bago bago is Iliyas fag imbangkad yapdi? ¹² Is Hisos nasagot kitay, Bago bago is Iliyas imbangkad ya ngay, mamatalaga fagayo fag manga bagay. Kana mayon nonsorat yadi kitay, aywan angko fagagwantaon mahori, aho Kanbali Taw, manga taw yomod yad- ingko. ¹³ Dapat hogfwayong hayo, is Iliyas inbangkad wan. Manga taw naibolon ha hanya no kinda odista fakasayaon. In-anod wa ngap kito kansorat hyabi no kinday ha hanya. ¹⁴ Da Hisos nondasog hat manga katogbong tiba, ta nalag manga taw kaaywanon sasta ligongan. Ka mangag faadal Batasan Hodyo igfabodbohagan yadi in Hisos manga katogbong. ¹⁵ Ginya madi, ka manga taw ayo ayo, no nalag di ngay in Hisos, ta dagos wandolaw wa dahol. Ta nagobok hanya a, ta gintaw, Ha gindawan? ¹⁶ Is Hisos naintaw has taw, Kana ka hayo fagfabodbohaganon has taw? ¹⁷ Ginya madi sadik ama gis basad fakaaywanan taw nasagot in Hisos, iglwang kiti, Haw, kagfaadal has taw, ho nataban angko anak ama ha hayo, maskin sadik labang kagfaboyon, igfahakfo hanya marigon marigon, it bibig igboraan wan a, hanggan it ngifon garigitan wan. It habilogan di kagwang wan. Maskin di nga hogfaaronganon ha hyamo manga katogbong ta nangos faalinan ka labang, dapat tadwa nasyagan nafaalin. ¹⁸ Is Hisos nalwang has taw, Ham kawa ka kati fag masohod fag manga taw idyag syag angko. Ginahin ya kin aho nangos fag omofod yapdi hayo, ham gayfan? Kandogay da aho fag gagwanta yapdi hayo? Tabanan ka anak hastay. ²⁰ Ginya madi ta nataban ka anak han Hisos. Ka labang no nalag in Hisos, dagos wa nafakidkisan ka anak, nafahakfo hanya has baba daga. Ka anak infolid wanfolid. It bibig igboraan wan. ²¹ Is Hisos naintaw hat ama, Kandogay day im anak no kito? Ka ama nasagot, Giwas ogbot ginan danwa kitonya. ²² Ka

labang fagaba wagfahakfo angko anak has basad afoy, hanggan igfatogna has basad danom kaarakitay igdaog hanya. Dapat, haw no somyagan di, fakaawa wa hyami, togbongan yap hyami nangos. ²³ Is Hisos iglwang hanya kitay, Kana mayon haw noglwang kitay, Aho no somyagan di? Manga taw nogsyag angko nyawa kana im-anod wa ngay. ²⁴ Ka ama madali wa nasagot, nahampang marigon, iglwang, Hogsyag ha hyamo ngay. Haw noglag aho korang yapdi nogsyag ha hyamo, togbongan yap angko igsyag marigon. ²⁵ Ginyas Hisos no nalag ka fakaaywanan fag manga taw kabarangkadan ya ngay, is Hisos nangabaya ka labang. Nalwang hanya kitay, Haw, ka sadik labang kagfaboyon yagfabongkok ya, hogsogo wa hyamo, fag galin wa gis nwa fag anak. Ha fag fawa kafwali domwag hanya. ²⁶ Ginya ka labang no nafarokyaw ka anak hanggan nafahidkisan wa dahol dahol, ginya yabay nalin wa ginya. Ka anak in-igyan wa baba daga, bilang wa natay. Yakanga aywan ka nalwang, Yabay yabay, natay wan. ²⁷ Dapat is Hisos natawid ka anak gamat a, nafabangon ka anak. Ginya ka anak nalindog ya. ²⁸ Is Hisos nonsakbaw has basad balay, it manga katogbong naintaw hanya, idwa sas manga taw fagdogan, Kana mayon mi nodwa nasyagan nafaalin tonya fag labang? ²⁹ Is Hisos nafwayong is taw, Kito fag labang idwa malin no bohonwa kitay ham domarangin mahogod. ³⁰ Da Hisos nalahaw wa ginya, nadalan sas sakop Galiliya. Is Hisos idwa kasayag fadog is taw kitay hanyan bangkad, ³¹ kaarakitay hayapdit manga katogbong nogfaadal. Is Hisos iglwang kitay, Ta kaakbang wa fagamat angko has taw aban, aho Kanbali Taw. Ta fahatay yadingko. Dapat ay nomsagaya tolok sirang, ahom boyag ya. ³² Dapat in Hisos manga katogbong idwa natwagdog kan Hisos faglwangon, ta kadala yadi gintaw hanya. ³³ Da Hisos indasog ya ngawan has banwa Kapirnaom. Ginya ta nonsakbaw wan hasta basad balay, is Hisos naintaw hat manga katogbong, Kana hayo fagdaraogon haraw sas boknga dalan? ³⁴ Dapat tadwa naawang, maskin it fagdaraogon sas dalan no faktaw sas taw ka abwat it kangayanan. ³⁵ Ginya madis Hisos no matokawan, nafaakbang ka Safolo-ha-Dowa. Ginyag lwang has taw, Fag bali man ista ginanan nyawa faktaw no kasaya kabali abwat man it kangayanan. Hanya fag imbali ista sogowan fagayo fagayo. ³⁶ Is Hisos nagamit sadik anak ogbot, nafalindog sasta fagbokngan. Ginya, is Hisos no nasafoko ka anak, iglwang has taw kitay, ³⁷ No faktaw kagtanggap sadik anak kito, maskin galwasi angko, aho yadi kat fagtanggapon. Kagtanggap yadingko bondi aho kat fagtanggapon, igtanggap yadi kagsogo angko. ³⁸ Is Hwan nafwayong in Hisos kitay, haw kagfaadal, Mi nalag sadik taw ka gwas hyamo ngayan nogfaalin manga labang. Mi nabando hanya maskin idwa gofod intam. ³⁹ Dapat is Hisos iglwang kitay, Ham fag idwag

bando hanya maskin nyawa faktaw no gwas angko ngayan no gibolon manga madolaw, idwa lomibak angko madali. ⁴⁰ Maskin kadwag laban intam, intam yadi wa kaoyon. ⁴¹ Hogfwayong hayo, orongan wan, nyawa faktaw nogfainom hayo sadik ongot danom maskin ham in Diyos-natogon-Famawi sakop, mato-hoyanan wa kitay hanya tomanggap it fasalamat aban. ⁴² Nyawa faktaw nogfayayom has ogali dwat sadik anak ogbot to kagsyag angko, fiya man ha hanya ta no somiyok sadik bato gilingan mabyat sat boknga liyog kagfayayom has dwat, ginya omokas tonya fag taw ha basad dagat. ⁴³ Nom gamat ibolon kagtaban hyamo has ogali dwat, lifongan lamang tonya. Nyawam gamat nodwam dowha ha no hayap man has haboyagan, balay balay, fiya man has gamat no dowha haw nodyap man has fadosaan taw sas afoy kadwa kapsa. ⁴⁴ (Sinya manga olod idwa katay, idwa yadi kapsa ka afoy.) ⁴⁵ Nangos nom bitis lahawan kagtaban hyamo has ogali dwat, lifongan yadim bitis. Nyawam bitis nodwam dowha ha no hayap man has haboyagan, balay balay, fiya man has bitis no dowha haw nodyap man im-okas has fadosaan taw. ⁴⁶ (Sinya manga olod idwa katay, idwa yadi kapsa ka afoy.) ⁴⁷ Nom mata lagan man kagfasayag lag hyamo has ogali dwat, sowatan wam mata ka sadi, nyawam mata nodwam dowha ha no hayap man han Diyos sakop, balay balay, fiya man has mata no dowha haw nodyap man im-okas has fadosaan taw. ⁴⁸ Sinya manga olod idwa katay, idwa yadi kapsa ka afoy. ⁴⁹ Fagayo im-aktom sas afoy kito yadi ka fanganon no ha asin. ⁵⁰ Tam fadi wadtwa kitay ka asin kafiyaon. Dapat ay, nonbol wat tamis, kinda odi nogfatamis ya ka asin, ham gayfan? Hayo manga fangayofan fag bilang wantamis kitos fanganon ha asin, ginya ham mangafiyan wa ha sadi ha sadi.

10 Is Hisos nalahaw wa ginya, hawas manga banwanan sakop Hodiya, hawas difay safa Hordan yadi. Sadi ya ginan manga taw kaaywanon in-barangkadan ya ngay han Hisos. Is Hisos nafaadal has fakaaywanan kawa dandi kitonyat ogali. ² Ha manga Farisiyo gakbang han Hisos, igtikis wa nangos igfasalan hanya. Yakanga ta gintaw hanya kitay, Maangay di aw has Batasan Hodyo ka ama no omobon it babay? ³ Ginya madis Hisos iglwang has taw, Kinday in Mwisitogon hayo? ⁴ Ta nafwayong kiti, Is Mwisitogon igfaangay di ka ama no domisag yap fangobonan kasoratan hat babay bago di gobon hanya. ⁵ Dapat is Hisos igfwayong has taw, Kawa maganit hayo fangayofan yakangas Mwisitogon natorat tonya fag togon. ⁶ Dapat gis bago bago, is Diyos no nahalig manga taw, nahalig ama hanggan ina. ⁷ Maskin kitonya, ka ama somaman git ama hanggan git ina, omofod hat babay. ⁸ Nyawa dowha haraw, tambali sadi di. Yakanga ginya ginan fawa dowha, inbali wa sadi. ⁹ Yakanga kan Diyos nafasadi, fag idwa ha taw igfasarowayan. ¹⁰ Araw no sas bal-

ay, in Hisos manga katogbong naintaw ya domwag in Hisos kawa has manga godgobonan. ¹¹ Ginyas Hisos nafwayong is taw, Nyawa fakta fag ama no gobon it babay, ginyag babay has iba ina, igfabayowan, ha kasalanan wan hat babay gona. ¹² Ka babay no omobon it indogan, ginya omindogan has iba ama igfabayowan yadi wan. ¹³ Ginya madi tagtaban manga anak han Hisos kaarakitay is Hisos tomawid ista manga anak. Dapat in Hisos manga katogbong nangabaya was taw. ¹⁴ Is Hisos no nalag it katogbong naibolon, in-hori dit fangayofan, igfwayong hat manga katogbong kitay, Ham hawa kabaya ka manga anak no gakbang hangko. Ham fag idwag bando tonya, maskin ka manga ha fangayofan kitos anak ka omafo in Dios sakop. ¹⁵ Ham fag tohod kitay nyawa faktaw kat fangayofan kadwa kitos anak ogbot nogfasakop han Diyos, tonya fag taw idwam-aktom san Diyos sakop. ¹⁶ Ginya madis Hisos nasafoko ka manga anak a, nahampang mahoway, gayohap odi kaawa. ¹⁷ Da Hisos no kalahaw wan, sadik ama nadalandan han Hisos, nalingkohodan sat atobangan, naintaw hanya, Haw kagfaadal kafiyaon, kana ara angko ibolonon kaarakitay hombali ha haboyagan idwa ha katabowanan? ¹⁸ Ginyas Hisos naintaw ya hanya kitay, Kana haw no nalwang kitay aho fiya? Is Diyos lamang ka fiya. ¹⁹ Haw fadi wadtwa ka manga Batasan Hodyo kitay, Haw fag idwag fahatay taw, haw fag idwag fabayowan, haw fag idwag nahaw, haw fag idwag bangdan is taw, haw fag idwag daya iba taw, haw fag idwag falamang im ama hanggan im ina. ²⁰ Ka ama nasagot in Hisos, No kitay di, gingko ogbot ginan, ho katanog wa tonya fagayo. ²¹ Yabay is Hisos nogbantay hanya, kabaya waglag no kitay di. Ginyag lwang kiti, Dapat ha ha korang yapdi sadik fakatwawon. Haw fag goli yap, fag fasali im manga botang fagayo fagayo. Ginya fahafodan has manga myabog it manga sali. Yabay, no kitonya, haw ha kaakwaan san Diyos banwanan sam tongod. Ginya madi haw fag hayastay, tahinan wangko. ²² Ka ama kabayong odi, nalahaw wan, maskin hanya maakwa wa dahol. ²³ Ginya madis Hisos namarantayon has manga taw sat ligongan, nalwang hat manga katogbong kitay, Ka maakwa fag manga taw, mahorig fasakop han Diyos. ²⁴ In Hisos manga katogbong indolaw wagdog in Hisos fwayong. Dapat is Hisos naolit yat hampang has taw, nalwang kitay, Angko manga anak, mahori wa dahol igfasakop han Diyos. ²⁵ Malpos man ka hayopan kamilyo nogdalan has basad toho dagom, ha sadik taw maakwa nogfasakop han Diyos. ²⁶ In Hisos manga katogbong indolaw wa dahol igdog, ta gintaw in Hisos, No kitonya mangharaw, fakta fag manga taw kambawi? ²⁷ Ginyas Hisos no mabantayan hat manga katogbong, iglwang, No taw di, idwa ha somyagan omibolon tonya, dapat is Diyos syagan di omibolon fagayo fag manga bagay. ²⁸ Is Pidro igfwayong han

Hisos kitay, Lag nga hami kati toy, mi naobon wa hyami akwa fagayo a, migtahin wa hyamo. ²⁹ Ginyas Hisos iglwang kitay, Hogfwayong wa hayo, bonwa bohag, nyawa faktaw no omobon yap it balay, ngatay it manga fadwasay, ngatay it ina, ngatay it ama, ngatay it manga anak, ngatay hanggan it manga daga, kawa ahot fagalwasiyon, hanggan angko Fiya fag Barita, ³⁰ hanya tomanggap kati kayonya fag gatos, nyawa manga balay, manga fadwasay, hanggan manga bilang wat ina, hanggan it manga anak, hanggan manga daga. Nyawa kitonya, manga taw igfahoriyan yapdi hanya. Ginya madi yabay, hanya lomag yadi haboyagan kadwa ha katabowanan gis nanya fag masohod nomdasog aban. ³¹ Nyawa kitonya, aywan ka gona omoyan man, hanggan ka goyan gomona wa aban. ³² Ginya madi da Hisos noglahaw has bohid, hawas banwa Hirosalim, is Hisos gona wa gona was taw. In Hisos manga katogbong kadolaw kitay is Hisos hawas Hirosalim. Ta kadala odi goyan. Is Hisos sadi ya ginan nafasaramanan ka Safolo-ha-Dowa gis fakaaywanan manga taw, ginyag fabago iglwang no kinday hanya no lomag mahori aban. ³³ Iglwang kitay, Yabay, tam hawas bohid has Hirosalim kati. No sinya wan, ta fagamat angko, aho Kanbali Taw, hasta manga fagtahinan fagalan-han-Diyos, hanggan has mangag faadal Batasan Hodyo. Tonya fag manga taw fatohoyan angko has kahatayan. Ta fabahala yadingko has manga Hintil. ³⁴ Ka manga Hintil yomod wangko, manga tomofay, manga bomakbak hanggan wa fahatay angko. Dapat ay, nomsagaya wa tolok sirang, ahom boyag ya. ³⁵ Ginya da Santyago da Hwan, in Sibidiyo manga anak naakbang han Hisos, iglwang kitay, Haw kagfaadal hyami, mi ha fagsagadon nangos gi hyamo, haw faangayan nangos. ³⁶ Is Hisos nasagot handa Santyago da Hwan, iglwang kitay, Kana ka hayo fagsagadon ginko? ³⁷ Ta nasagot in Hisos kiti, Aban, tam no sawam kafiyan, haw faangayan hyami fag ha kangayanan igtokaw sa hyamo akbang, insadi sam balis sihon, insadi sam balis wala. ³⁸ Dapat is Hisos nalwang has taw, Ham idwa twa hayo fagsagadon. Ham awkin syagan omagwanta ominom ginko fanginoman kahoriyan aban? Ham awkin syagan yadi fatogna hayo sas mahori, kito yadingko no fatogna angko aban? ³⁹ Taglwang, Ala, mi somyagan di. Ginyas Hisos iglwang has taw, Ham ominom ngay ginko fanginoman kahoriyan aban, hanggan ham fatogna hayo kito yadingko aban. ⁴⁰ Dapat bonwa aho ka bahalag fili no faktaw ka tomokaw aban sangko balis sihon, ngatay balis wala, dapat ka hayo faglwangon tokawan, danwan talaga no fakta fag manga taw ka tomokaw sinya. ⁴¹ Dapat in Hisos manga katogbong tiba, ka safolo, no nadog ista fagsagadon, ta kahori wa dahol inda Santyago da Hwan. ⁴² Yakangas Hisos nafaakbang ha hanya it manga katogbong fagayo, ginyag lwang,

Ham fadi wadtwa ka manga gayfan kitay, hanya ka manga fagtahinan Hintil, ha takan nogbahala has taw, hanggan ista manga gorangon igbaya wagfasognod it sakop. ⁴³ Dapat ham fagayo fag idwa kitonya. Yatokitay, nyawa fakta sa hayo ka kasaya kabali abwat it kangayanan, fag kabali di ngap hayo sogowan. ⁴⁴ Nyawa faktaw ka kasaya kabali fagtahinan, fag kabali di ngap bilang hayo nasali sogowan. ⁴⁵ Kitongko, aho Kanbali Taw kanbangkad hastay, bonwa kitay aho kasta fagtogbongon, fag aho di ngap ka tomogbong is taw, hanggan igdisag angko haboyagan ka fangafiyan, kaarakitay tomobos has fakaaywanan taw. ⁴⁶ Ginya tandasog has banwa Hiriko, dapat ta noglahaw wa ginya, in Hisos manga katogbong hanggan ka fakaaywanan fag manga taw nahoyog yadi wan. Sadik ama bota, is Bartimiyo, fanagad fanagad odi, in Timiyo anak, matokawan sas bilog dalan. ⁴⁷ Is Bartimiyo, no nadog kitay is Hisos taga Nasarit kagdalan sinya, igtawag marigon, iglwang, Hisos, in Dabid hasokfonan anak, haw fakaawa wangko. ⁴⁸ Ginya madi ka fakaaywanan fag manga taw nangabaya in Bartimiyo, tadwag faawang nangos. Dapat kadahol di ngap nogtawag, mapiit wan, igtawag, In Dabid hasokfonan anak, fakaawa wangko. ⁴⁹ Ginyas Hisos intorosan, iglwang has taw kitay, Tawagan tonya fag ama. Ginya ta natawag ka ama bota, iglwang kiti, Hadwa ha fakadalaon. Fag lindog wan, is Hisos igtawag hyamo. ⁵⁰ Ka ama bota nabol it homot, nalokso, nalindog, naakbang in Hisos. ⁵¹ Ginyas Hisos naintaw hanya kitay, Kanam fakasayaon angko bato togbongon hyamo? Ginya ka ama bota nasagot hanya kitay, Haw kagfaadal has taw, angko mata fag imfoga ya nangos. ⁵² Is Hisos nasagot hanya kitay, Nyawa ha mwali kati, kawa haw igsyag wangko, im mata imfoga wa yabay. Gis nanya yadi dagos wanfogat mata, nalag wa fiya fiya. Yabay ka ama natahin wan Hisos.

11 Kati yabay, ta kadasog wa has banwa Hirosalim. Araw ta nondasog sas Moyod Oliboan, sas akbang manga tifonan balay Bitfagi hanggan Bitanya, is Hisos nafagonat manga katogbong dowo. ² Is Hisos natogon kitay, Ham fag hawas masoson fag tifonan balay. Ham araw nomdasog sinya, ham dagos lomag sadik anak habayo libaba, matarabingan, idyapdi ha taw nasahay sinya. Lohasan it tarabing a, goyodan hastay. ³ No ha gintaw hayo kitay, Kana hayo fakamolon is nyamo? Ham fag lwang kitay, Kagfon intam kasayag sahay, fomwali ya araw, ngalay di. ⁴ Ginya ka dowak katogbong inlahaw, nalag ngay ka anak habayo sas boknga karsada, matarabingan sas bilog sakbawan balay. Ta nalohas it tarabing. ⁵ Ginya ka manga taw malindogan sasta akbang naintaw has dowak katogbong, Kana hayo fakamolon is nyamo noglohas ka anak habayo tarabing? ⁶ Ginya ta nasagot has taw kan Hisos togon fag manga hampang. Ginya

madi ka manga taw nafadiya han Hisos manga katogbong ka anak habayo. ⁷ Ta nagoyod ka anak habayo han Hisos, nasagmak it manga rotay aba sas baba goyoy anak habayo, ginyas Hisos nasahay wan. ⁸ Kaaywanon fag manga taw nasagmak yadit manga rotay san Hisos fagonan lahawan. Tiba nabonggo manga sanga hayo galabongan gis talon, ginya ta nasagmak sas dalan san Hisos fagonan. ⁹ Ka manga taw ka gona in Hisos hanggan goyan igtarawagan marigon, taglwang, Kafiyaon kafiyaon, Ka kadasog hastay san Diyos ngayan, fag bomaya wan. ¹⁰ Is Dabid intam pinagka wa ama, it sakop ka kaakbang wamlag fag bomaya yadi wan. Kafiyaon ka san Diyos banwanan hayam tongod im tongod. ¹¹ Is Hisos hawas basad alad banwa Hirosalim a, nasakbaw yadi has basad Fanimbaan-Dahol. Ginya madi, no namarantayan di nga sat ligongan, is Hisos nadokson ya, igtaban ka Safoloha-Dowa has Bitanya, kawa kayabi wan. ¹² Nonsirang wan, ta no kafwali ya gis Bitanya, is Hisos kalonos wan sas boknga dalan. ¹³ Is Hisos no nalag sadik fon igos malabong, ayayo yapdi, nagobok has fon igos maskin gayfan ngandayo ha bohad. Dapat is Hisos no akbang wan has fon igos, idwa ha lagan bohad sinya fag fon, manga odi labong maskin idya famolon manga bohad igos. ¹⁴ Is Hisos iglwang has fon igos, Fag idwa ha taw homwan domwag bohad igos gistay fag fon. In Hisos manga katogbong nadog it hampang. ¹⁵ Ginya madi ta nondasog wa sas Hirosalim, is Hisos nasakbaw basad aladan Fanimbaan-Dahol a, dagos nasogo has dayo alad ka mangag balidya hanggan igsali sas basad aladan. Nafatobong lamang kasta fwalidan kagbalyo kwarta hanggan ka mangag balidya salompati manga tokawan. ¹⁶ Is Hisos kwangit igfalahaw has basad aladan Fanimbaan-Dahol nyawa faktaw no ha diya. ¹⁷ Is Hisos nafaadal has taw kitay, Gwadi insorat san Diyos kasoratan kitay, Sas fagayo fag layonan taw, ta fag ngomayan angko balay, Balay Fandaranginan, Dapat ham nafabali angko balay oliyanan odi manga fangnahaw. ¹⁸ Ka manga fagtahinan fagalan-han-Diyos hanggan ka mangag faadal Batasan Hodyo nadog in Hisos fwayong. Yakanga ta gisip no kinda nangos ta nogdaog in Hisos, maskin ta kadala hanya, kawa ka fakaaywanan intaka wagdog in Hisos adal. ¹⁹ No kayabi wan, da Hisos inlahaw gis basad banwa. ²⁰ Nonsirang, da Hisos no hanya ya has basad Hirosalim, ta nalag tonya fag fon igos, hanggan wat manga dalid intonga wan. ²¹ Is Pidro nathod in Hisos sabayon, yakangag lwang hanya, Haw kagfon hyami, fanlag kin, tonya fag fon igos, kam nasabayon, intonga wan. ²² Is Hisos nalwang hat manga katogbong kitay, Ham fag syag fagaba han Diyos. ²³ Hogfwayong hayo kitay bonwa bohag, nyawa faktaw no lomwang toy fag moyod, Haw fag galin wa gis nyamo, loksowan ha basad dagat, tonya fag taw nodwa gadowan it fangayofan, dap-

at sadi wak fangayofan igsyag kitay im-anod wat fwayong, orongan wam-anod kitonya. ²⁴ Yakanga, hogfwayong hayo, ham nogsyag kitay ham tomanggap gin Diyos hayo fagdaranginon, ham tomanggap wa tonya. ²⁵ No ginahin ham nogdarangin, taw no ha nafahoriyan hayo, ham fag faliyam tonya, kaarakitay hayo Ama ka sat banwanan sam tongod, mamaliyam yadi hayo manga naogali dwat. ²⁶ (Dapat ham nodwag faliyam kasta nafahoriyan hayo, hayo Ama sam tongod idwa yadi mamaliyam hayo manga naogali dwat.) ²⁷ Ta nonfwali ya has banwa Hirosalim, is Hisos igsakbaw ya domwag has basad aladan Fanimbaan-Dahol. Manga fagtahinan fagalan-han-Diyos, hanggan ka mangag faadal Batasan Hodyo, hanggan ka manga fagtahinan sas banwa naakbang han Hisos. ²⁸ Ta gintaw hanya kiti, Kanam kangayanan haw no gibolon to fag manga bagay? Fakta ka nadisag hyamo kangayanan gibolon kitonya? ²⁹ Is Hisos nasagot has taw, iglwang, Ho ngap omintaw yadi hayo, ham sagotan angko, ho bago di fomwayong ha hayo no kana kangko kangayanan gibolon to fag manga bagay. ³⁰ Ginda kan-ginan in Hwan kangayanan igfatogna manga taw, ngatay gim tongod, ngatay gis taw? ³¹ Ginya madi tagfabarohagan ha sadi ha sadi, taglwang, Tam no lomwang, Giwam tongod, is Hisos lomwang, Kana mayon ham nodwa katiwala in Hwan hyabi? ³² Dapat tam no lomwang, Gi odis taw, tam kadala has fakaaywanan, maskin ta katiwala kitay is Hwan in Diyos fangampang orongan. ³³ Yakanga ta nasagot in Hisos kitay, Midwa twa, Ginyas Hisos nafwayong, Hodwa yadi fomwayong hayo no ginday angko kangayanan gibolon to fag manga bagay.

12 Is Hisos igfabago igfahalimbawa ya has taw iglwang kitay, Ha sadik taw nananom manga obas sat baba daga, maaladan ya ngadi. Natigib dalifi yadi ista fanlidan obas. Nahalig sadik ansagan abwat, ista bantayan, nafabahala it obasan hat manga fangano, ginya nalahaw hawas ayayo. ² Nondasog was famohadon, famangtaon wan, kagfon obasan nasogo wat sogowan sadi kaarakitay mamol ista horay hanya bohad obas. ³ Dapat ay ka manga gano obasan nabakbak di ngap kat fon sogowan. Ta nafaoli wa gominan, idwa ha diya. ⁴ Ginya kagfon obasan nasogo has manga gano obas, sadi yak sogowan. Ta kaisog ya ngay hanya, nafabaran hat boknga alfoyo. Ta nafahayan ya ngadi hanya. ⁵ Fatolo wa ginan kagfon obasan nasogot sogowan. Ta nafahatay wa hanya. Hanggan wa ka tiba sogowan ayo dogay dogay. Tiba ta nabakbak yap man, dapat tiba ta nafahatay wan. ⁶ No dogay, ka odit fakaawaon fag anak ama kan-goyan sa hanya. Yakanaga hanya ka goyan goyan kat nasogo. It fangayofan iglwang kitay, Gwadi ta gomalang wa nangos angko anak. ⁷ Dapat ka manga gano tanom nanoltolan yap kiti, To wa aba ka omafo it ama kaakwaan. Kalibang,

tam fahatay wa hanya, ngan aba tam wa ka omafo ka obasan. ⁸ Yakanga ta nagamat hanggan wa nafahatay hanya, ginya naokas lamang it habilogan has dayo alad obasan. ⁹ Kinday nangos ham gayfan, kagfon obasan ibolonon hat manga fangano? Anod, hanyam bangkad, fahatay yadi wa ka manga gano, ginya faano ya has iba taw. ¹⁰ Ham idya awkin nabasa to fag toltolan gis Kasoratan? Ka manga fangalig balay fag-dayoon fag bato, Tonya di ngap kagfaganit ka balay sas basad solok. ¹¹ Tam kadolaw waglag, To in Diyos naibolon. ¹² Yakangan Hisos manga kahampang kasaya gomamat hanya, maskin ta nasalom kitay hawa ngap ista manga sadili in Hisos fagfatangonon sat natoltol halimbawa. Dapat tadyapdi nagamat in Hisos kawa ta kadala ka fakaaywanan fag manga taw. Yakanga gis nanya ta nwali yapdi, naobon wan Hisos. ¹³ Ginya madi ta nasogo han Hisos manga Farisiyo hanggan tiba gin Gorangon Hirodis manga sakop, kaarakitay igsayak fabangdanan gin Hisos hampang. ¹⁴ Tagmaswag odi hanya, taglwang kitay, Haw kagfaadal has taw, mi twa kitay haw idwag bohag, haw idwa ha fagihidon taw, maskin haghapariho wan di fagayo fag manga taw, hanggan sonson wa orongan kam faadalon has taw kan Diyos fakasayaon ista manga ogalison. Maangay awkin sas Batasan Hodyo tam nogbayad bohis han Sisar, ngatay idwan? ¹⁵ Ngatay tam fag bohis yadi, ngatay fag idwan? Dapat maskin is Hisos twa kitay tagfataka odi, is Hisos igsagot has taw, iglwang kitay, Kana mayon ham nogtikis wa nangos igfasalan angko? Falagan angko sadik kwarta mabilog, diyan hastay. ¹⁶ Ginya ta nafalag ngay sadik kwarta mabilog han Hisos. Is Hisos naintaw has manga taw kiti, Gafo tolad hanggan ngayan insorat istay? Tagsagot, In Sisar wa nga tolad tonya. ¹⁷ Ginyas Hisos iglwang has taw, Kan Sisar disagan wa han Sisar, kan Diyos disagan wa han Diyos. Tandolaw wagdog in Hisos sagot. ¹⁸ Ginya madi manga Sadosiyo, kagfabohag kitay ka manga natay idwam boyag ya domwag, gakbang han Hisos. Taglwang kitay, ¹⁹ Haw kagfaadal has taw, is Mwisis nasorat it togon hantam kitay, Sadik ama no ha fadwasay ama natay, dapat it babay in-goyan dit indogan, idwa ha anak, ka ama fag babay kat tagyaw ka balo, kaarakitay no ganak, bilang man di ka natay it ama. ²⁰ Yabay ha tasayan fitok ama kagdowasayan. Kasta ahan nababay, ya ginya no katay idya ha anak. ²¹ Ka masoson it ahan nababay yat tagyaw kanbalo, dapat natay yadi wan, idwa yadi ha anak. Kitonya yadit fatolo wan. ²² Hanggan wa kat fafito fag indogan, ka ina idyadi wa naanak. No natay wa fagayo fag tasayan ama, hanggan ka ina natay yadi wan. ²³ Yabay, gafo babay tonya fag ina ta nomboyag ya aban, kawa ka fitok tasayan nababay hanya istay? ²⁴ Is Hisos nasagot is taw, nalwang kitay, Ham fagaba wagfalamang maskin ham idwa twa ka Kasoratan

hanggan ham idwa yadi twa in Diyos karigonan. ²⁵ Maskin manga taw nomboyag ya gis kahatayan, manga taw fawag babay, gindogan gis nanya aban. Tambali kitos manga anghil san Diyos banwanan sam tongod kadwa yadig babay. ²⁶ Dapat ay, kawa has manga natay no kaboyag ya, ham idwa awkin nabasa gin Mwisis nasorat, kawa no sas kakbang fon hayo libaba hyabi, is Diyos nafwayong hanya kitay, Aho in Abraham wa Diyos, aho in Isaak wa Diyos, hanggan in Hakob yadi Diyos. ²⁷ Ka manga taw boyagan lamang kan Diyos fagsakopon, bonwa ka manga mahatayan. Ham noglwang kitay taw idwam boyag ya, ham igfalang mang wa orongan. ²⁸ Kati kati haraw, sadik ama kagfaadal Batasan Hodyo naakbang inda Hisos. Nadog manga taw nogdaraogan hanggan nadog yadi in Hisos sagot kafiyaon. Yakanga, hanya naintaw yadin Hisos, Sida fag togon sas Batasan Hodyo ka marigon man has fagayo fagayo? ²⁹ In Hisos sagot kitay, To fag togon ka marigon man has fagayo fagayo kitay, Ham, in Israil manga ha sokfonan, ham fag matalingan, is Diyos kagfon intam sadi lamang, idwa ha akwa tiba Diyos. ³⁰ Haw fag galwasi in Diyos kagfon hyamo, fag sadi wak dahonya fangayofan, sadi wak dahonya isip hanggan sadi wak dahonya karigonan. ³¹ It fadowa fag togon kiti, Haw fag galwasi im kapariho taw kito yadim sadili. Idwa ha togon iba marigon man to fag manga togon. ³² Ginya kagfaadal Batasan Hodyo nalwang han Hisos kitay, Anod, haw kagfaadal is taw, orongan wan hyamo fwayong, Is Diyos sadi di. Idwa ha akwa tiba Diyos. ³³ No galwasi hanya sadi wak dahonya fangayofan, sadi wak dahonya isip, hanggan sadi wak dahonya karigonan, hanggan no galwasi intam kapariho taw, kito yadintam sadili, tonya fagayo nom anod, bondi kito kantam manga nasogba hayopan kan irog sadik dahonya, hanggan tiba disagon fangafiyan. ³⁴ Ginyas Hisos no nadog kafiyaon it sagot, iglwang kitay, Haw mangharaw akbang han Diyos sakop. Ginya wa ginan fagayo fag manga taw fawag fasolopan han Hisos kaarakitay omintaw hanya, maskin tadwa syagan igfasalan hanya. ³⁵ Is Hisos nogfaadal is taw basad aladan Fanimbaan-Dahol, iglwang kitay, Kana mayon ka mangag faadal Batasan Hodyo noglwang kitay, In Diyos-natogon-Famawi in Dabid wa hasokfonan anak? ³⁶ Kawa ka Maliyaw fag Falad nogfaisip in Dabid, hanya mandi kaglwang, Is Diyos nafwayong hasagfon angko, Haw fag matokawan yap sangko balis sihon, no baliday hodya nafasakop fiya fiya ha hyamo im manga kaway. ³⁷ Yabay is Dabid mandi kagngayan in Diyos-natogon-Famawi, kagfon hanya. Kinday hanya nogfon in Dabid, not sadili odi hasokfonan anak, ham gayfan? Ka fakaaywanan fag manga taw nabaya wagdog in Hisos fwayong. ³⁸ Is Hisos nogfaadal has taw, igfwayong kiti, Ham fag idwag sokfon ka mangag faadal Batasan Hodyo it manga ogali. Ta kasayag solong

manga rotay aba aba, hanggan ta gwayan wa kasayag dog manga taw nogbaya hanya ta noglahaw basad banwa. ³⁹ No sas basad manga fanimbaan ta kasayag tokaw sas fanokawan ka manga ha kangayanan, hanggan ka manga fanokawan akbang hasagfon balay no sasta fanyahodan hanon aywan. ⁴⁰ Bohondi tonya, taglogos wa ngap manga ina balo banwanan, hanggan ista odi famadogan is taw ta nogdarangin kadogayon. Ka fadosaan kamtohyon has taw aban mahori man ka tiba taw. ⁴¹ Is Hisos natokaw sas akbang haban ista fandisagan kwarta basad Fanimbaan-Dahol. Is Hisos mabantayan manga taw kaaywanon nogfwalid kwarta sinya. Kaaywanon fag manga taw maakwa, aywan it manga nafwalid kwarta sinya. ⁴² Ginya madi sadik ina balo myabog naakbang has haban, nafwalid sinya dowak saga, it halga nangos idya sika walo. ⁴³ Ginyas Hisos nafaakbang hanya it manga katogbong, nalwang kitay, Hogfwayong hayo, bonwa bohag, to fag ina balo myabog, it disag mahalga man kasta disag fagayo. ⁴⁴ Maskin ka tiba nadisag gi odista sadili labi kwarta, dapat to fag ina balo myabog, nadisag wa ka hanya sadik kayonya.

13 Da Hisos nogdokson gis basad aladan Fanimbaan-Dahol, it katogbong sadi iglwang kitay, Haw kagfaadal, lag nga kin, to fag manga bato gorangon, hanggan dahol fag manga balay, kafiyaon kabantay. ² Dapat is Hisos nasagot kitay, Nyawa kitay kati haglag kafiyaon to fag manga balay gorangon, aban idwa hamgoyan dowak bato igtarongbawan, fagayo imrofad lamang. ³ Araw, da Hisos no matokawan sas baba Moyod Oliboan, sas masohod Fanimbaan-Dahol, da Pidro da Santyago da Hwan da Andris naintaw in Hisos, idwa sasta fagdogan fakaaywanan, ⁴ iglwang kitay, Ginahin fag masohod aban ka Fanimbaan-Dahol nomdwat? Kana fag falagon madolaw kamlag aban kagfatohoyan kitay to fag manga bagay kaanod wan? ⁵ Ginyas Hisos iglwang has taw kitay, Ham fag matagahan. Ham fag idwa gadayaan nyawa faktaw, ⁶ maskin aywan kambangkad aban, ngomayan yadingko ngayan, lomwang hanya wa kan Diyos-natogon-Famawi. Ta fatalang aywan fag manga taw aban. ⁷ Ham no domog aban ka manga madalagdog gis awayan, hanggan manga barita awayan dahol dahol, ham fag idwa galibitan, maskin talaga wa kitonya kamlag aban, dapat bonya tonya ka katabowanan. ⁸ Maskin aban ka manga layonan daga dahol manlabanan, kitonya yadi ka sadik gorangon sakop lomaban ha sadik gorangon sakop. No sida no siday aban ka daga lominog, ha manga banwanan idwa aba ha hanon hanon, dapat to fagayo kat fabagowanan lamang kahorihan. ⁹ Ham fag matagahan hayo sadili maskin ta fagamat hayo hasagtalinga hampangan aban. Ta fabakbak hayo sas manga fanimbaan Hodyo. Maskin aho hayo fagalwasiyon, ham aba lomindog sas

atobangan manga gobirnadador hanggan manga gorangon, ham mamaorongon yadi sasta fagdogan. ¹⁰ Dapat ay, ta nodya natoltol fiya fiya ka Fiya fag Barita has fagayo fag manga layonan taw, ka katabowanan fagayo idyam lag. ¹¹ Ta nogtaban hayo hasagtalinga hampangan, hanggan fagamat hayo has taw, ham fag idwa galibitan hayo bato fwayongon, dapat no kana ka nafatohod hayo gis nanya, fag tonya wan kam fwayongon, maskin im hampang aban idwa gi hayo sadili fangayofan, dapat gis Falad Maliyaw ka faisip hayo. ¹² Gis nanya fag masohod aban, kayadit fadwasay kagfagamat it fadwasay has iba taw kaarakitay ta fahatay hanya, kitonya yadi kat ama hat sadili yadi anak. Manga anak lomaban it magorang, fasognod has iba taw kitay fahatayan wan. ¹³ Maskin aho hayo fagalwasiyon, fagayo fag manga taw kadwat iglag hayo aban. Dapat kadwag fagomon hanggan wa has katabowanan, yabay hanya wa kambawi. ¹⁴ Dapat aban ham lomag kagsagaya wa ogali fag dwat, idwa ha fag kitonyan infwalid sas idwa fiya fwalidan. Kagbasa fag tomwa wagdog tonya. Nom-anod aban, ka manga taw sas sakop Hodiya, fag dan waglagyo has moyod. ¹⁵ Ka sas sokayan balay fag idwam libang somakbaw domwag has basad balay kaarakitay bomol it botang. ¹⁶ Ka sas iyab, fag fawa goli kaarakitay bomol it rotay. ¹⁷ Isyay wan, no ka yangadi manga gabosog hanggan ka ha manga anak ogbot, igfasoso yapdi gis nanya fag masohod aban. ¹⁸ Ham fag darangin kakitay to fag manga bagay fag idwa tomoon dayo abagat. ¹⁹ Maskin gis nanya fag manga sirang manga taw domog mahori wa dahol dahol. Gi yapdis hyabi, is Diyos no bago di nahalig ka daga, balis kati, tadya ha nagdogan kitonya fag mahori, hanggan idwa yadi domog mahori man inya aban. ²⁰ No bonwas Diyos kagfatohas ngalay tonya fag manga mahori, idwa hamsawad manga taw, ngadi sadi. Dapat ay, maskin is Diyos kaawa yapdit manga nafili fag manga taw, hanya ngalay digfatohas tonya fag manga mahori. ²¹ Aban, no ha akwag fwayong ha hayo kitay, Istay wan kan Diyos-natogon-Famawi, ngatay sinya wan, ham fag idwa katiwala. ²² Aban ha akwa mangag faniring in Diyos-natogon-Famawi. Ha akwa yadi manga bohagon fag fangampang imbangkad. Ta mamalag aban manga madolaw fag manga falagon, hanggan manga fatimawa, kaarakitay fatalang in Diyos manga nafili, no somyagan di. ²³ Yabay, ham fag matagahan. Ho dan wa nafadog hayo fagayo kamlag aban. ²⁴ Dapat gis nanya fag manga sirang, tonya fag manga kahorihan nomtolas wan, Ka myanit imharom, Ka magdanon idwa yomawa. ²⁵ Ka manga fanggasan imdagdag yadi gis banwa sam tongod, Hanggan ka manga karigonan sam tongod sas boknga fakayawan imhadhawigan wan. ²⁶ Ginya madi ta lomag angko, aho Kanbali Taw, kadasog sas baba linyabo, ha karigonan dahol hang-

gan kangayanan abwat. ²⁷ Ginya madi aho, Kanbali Taw, somogo angko manga anghil, fatifon angko manga nafili fag manga taw gis ofat ik fongfongan daga gis fagayo fag manga banwanan. ²⁸ Ham fag twagdog ka adal kawa gis fon igos. Nogsalingsing, igsofot wan, tam twa kitay ka fangaraw kaakbang wan. ²⁹ Kitonya yadi ham noglag to kangko manga nafwayong kaanod wan, ham tomwa kitay aho, Kanbali Taw, kaakbang wa kadasog, sawas sakbawan alad. ³⁰ Hogfwayong hayo, bonwa bohag, to fagayo im-anod wan ka kati fag masohod fag manga taw no boyagan yapdi. ³¹ Ka banwa sam tongod, hanggan ka daga imliyam wa aban, dapat ay angko hampang idwam liyam nyawa ginahin. ³² Dapat idwa ha taw twa no ginahin fag sirang, no kana fag oras gis nanya tonya nom-anod. Nyawa ka manga anghil ka san Diyos banwanan sam tongod, nyawa aho in Diyos anak, no bohonwas Diyos angko Ama, idwa ha twa no ginahin. ³³ Ham fag matagahan, fag danwa matalagan maskin ham idwa twa no ginahin fag masohod kangko nafwayong nom-anod. ³⁴ Kitos sadik taw mamaklay has ayayo, halimbawa. No kalahaw igtogon yap igfaano it manga sangkap has taw, igfahafod hat manga sogowan ista bato ibolonon. Ginyag togon yadi hasagbantay sakbawan kitay, fag fagaba matanodan. ³⁵ Kitonya yadi ham fag matagahan maskin ham idwa twa no ginahin kagfon balay nomdasog, ngatay kayabi, ngatay boknga yabi, ngatay manok igtaraokan wan, ngatay dayo marom marom. ³⁶ Ngandayo hanyam dasog sadi odi ginan, tomahod hayo kalibang odi matoyogan. ³⁷ Kangko fwayong ha hayo, hogfadog yadi has fagayo fag manga taw, ham fag danwa matagahan.

14 Kati dowak yabi bago dista Fanohodan Nagsagayan, ta nogtohod ka anghil nogsagaya ista balay hyabi, hanggan ka Fanohodan Tinapay Mayangfis. Ka manga fagtahinan fagalan-han-Diyos, hanggan ka mangag faadal Batasan Hodyo, igsayak it halimbawan no kinday ara ta no gomamat mafyaloman in Hisos hanggan wagfahatay hanya. ² Maskin fag idwa hono sas Fanohodan, ngandayo manga taw mangagran wan. ³ Da Hisos no sawas Bitanya san Simon balay, ka Simon ka ha kitong hyabi, sadik ina naakbang in Hisos, ha diya sohadan alabastoro fag bato, napno famabanglo nardo, idwa ha aktom iba, dahol it sali. Is Hisos no sas bilog fanganan, ka ina nabolang ka sohadan, nabohos ka famabanglo han Hisos boknga alfoyo. ⁴ Dapat ha manga taw tiba sinya kahori odit manga fangayofan. Ista fangayofan iglwang, Anogon di famabanglo, ⁵ balay balay no nafasali yapman tonya, bondi tolok gatos dinaryo haraw, ginyan disag has manga myabog it sali. Ta nangabaya ka ina. ⁶ Dapat is Hisos nalwang kitay, Ham fabayaanan wa ka ina, kana ham no kabaya hanya? Kafiyaon to kat naibolon hangko. ⁷ Maskin ka manga

myabog idwa ha fagalinan gi hayo akbang, nyawa ginahin ham no kasayag togbong has myabog, ham tomwa wan, dapat aho idwa fagaba maafodan hayo aban. ⁸ Ka ina naiblon kat fagsyaganon kati, nagona wa nabohos famabanglo, maskin igfatalaga angko habilogan has lobgoban aban. ⁹ Hogfwayong hayo, bonwa bohag, nyawa siday, sadik baba daga, ta no to-moltol ka Fiya fag Barita aban, ta fagaba wa aba omowas to fag ina it naibolon, yakanga tomohod hanya fagaba. ¹⁰ Ginyas Hodas Israkiyoti, ka sadi gis Safolo-ha-Dowa, hawas manga fagtahinan fagalanhan-Diyos kaarakitay goyon in Hisos manga kalaban. ¹¹ Ka manga fagtahinan fagalan igbaya wan ta no nadog kitay is Hodas goyon is taw. Taglwang ta tomangdan ara hanya. Ginya wa ginan is Hodas gisip no ginahin no somyagan wa fagamat has taw in Hisos. ¹² Ka sirang gona ta no kwan Tinapay Mayangfis indasog wan hanggan gis nanya yadi fag sirang tagsogba ka anak topa fangafiyan kawa hasta Yafon Fanohodan Nagsagayan. In Hisos manga katogbong naintaw hanya, kitay, Siday nangos araw hyamo fakasayaon hami nogfatalaga intam Yafon Fanohodan Nagsagayan? ¹³ Is Hisos nasogot katogbong dowak, nalwang kitay, Ham, fag hawas basad banwa. Ham homablang araw sadik ama ka ha songgoy tapayan fwalidan danom. Ham tahinan wa hanya. ¹⁴ Nyawa haday hanya no somakbaw, intawan hasagfon balay, fag lwang kitay, Kagfaadal has taw iglwang, Siday fag lingoban araw angko fasakbawan famaklay kaarakitay manayowan yadi, angko manga katogbong no kwan intam Yafon Fanohodan Nagsagayan? ¹⁵ Hanya falag ara hayo sadik lingoban dahol, matalagaan, sas tongod fag salogan. Ham fag fatalaga intam Yafon sinya. ¹⁶ Ginya madi in Hisos manga katogbong inlahaw wan, hawas banwa, hanggan ta nalag wa fagayo kito kan Hisos fwayong, yakanga ta sinya wak nafatalaga ista Yafon Fanohodan Nagsagayan. ¹⁷ Ginya madi araw, no kayabi wan, is Hisos hanggan it manga katogbong, safolo ha dowak, ta fagayo sinya wan. ¹⁸ Ta no sas bilog fanganan, kwan yapdi, is Hisos iglwang, Hogfwayong ha hayo, bonwa bohag, insadi sa hayo kaoyon angko kalaban, sadi kagsayo angko kati. ¹⁹ Ginya madi ka manga katogbong inrongkot wagdog, igsadig sadi gintaw kitay, Aho awkin kam faglwangon? ²⁰ Is Hisos nasagot kitay, Sadi sas Safolo-ha-Dowa, angko kasayo kati igtogna tinapay sas basad mangkok. ²¹ Maskin aho, Kanbali Taw, kaakbang wa kalahaw kito kansorat hyabi, kawa angko dalanon, dapat ay, isyay wan, angko ofod ka goyon angko manga kalaban. Fiya man hara ha hanya, hanya nodwan sagaya git ina hyabi. ²² Ta no kwan yapdi, is Hisos nabol tinapay, nabaya in Diyos, nafaarogbotan, ginya nadisag has taw. Is Hisos iglwang, Toy angko habilogan, ham fag bol. ²³ Ginya madi is Hisos nabol ka fanginoman ka ha sohad

danom obas, nabaya in Diyos, ginya nafagamit is taw. Ta fagayo nainom wan. ²⁴ Ginya madis Hisos nalwang has taw, Toy angko folot kagfaganit intam taranggan. Angko folot kamwatwat kawa has fakaaywanan fag manga taw. ²⁵ Hogfwayong ha hayo, bonwa bohag, hodwa ominom domwag danom obas, nodwa aban ya aho no ominom bago fag danom obas san Diyos sakop banwanan. ²⁶ Ta no nangambahan sadik ambahan, tanlahaw wa a, hawas Moyod Oliboan. ²⁷ Ginyas Hisos iglwang hat manga katogbong, Ham fagayo omobon wangko, maskin insorat sas Kasoratan kitay, Ho fahatay ka fangano, ginya madit anoon fag manga topa manarowayan wan. ²⁸ Dapat ay aban, aho nomboyag ya domwag, aho gomona wa hayo has sakop Galiliya. ²⁹ Is Pidrog lwang han Hisos kitay, Nyawa ta fagayo omobon hyamo araw, hodwa omobon hyamo. ³⁰ Ginya madis Hisos nalwang han Pidro, Yatokitay, lag nga araw, araw basad yabi, bago it fadowa ginan fag kataraoak tabag, tolo ginan haw tomangkod angko has taw. ³¹ Dapat is Pidro marigon wagfwayong, Nyawa ta hanggan wa fahatay intam dowa, hodwa tomangkod hyamo has taw. Ka tibak manga katogbong iglwang yadi kitonya. ³² Ginya madi da Hisos nalahaw wan, hawas sadik foyo, taglwang, Gitsimani. Is Hisos iglwang hat manga katogbong, Ham fag matokawan yap istay, aho nogdarangin yadi. ³³ Ginyas Hisos nataban inda Pidro da Santyago da Hwan. In Hisos fangayofan igfabago wagdog marongkot, galibitan wan. ³⁴ Is Hisos nafwayong handa Pidro, Angko karongkotan bilang wa kodkod sangko basad fangayofan. Hogdog angko kahoriyan ho bilang wa kahatay wan. Ham fag mafanayan yapdistay, matagahan. ³⁵ Is Hisos nonayayo ogbot gis taw, iglohoban wan sas baba daga, igdarangin kitay, no katwa di nangos, ka gis nanya fag mahori fag kashodan, fag somagaya lamang hanya. ³⁶ Nalwang kitay, Mama, angko Ama, idwa hagsagaya hyamo fagsyaganon. Fag bol nangos gingko to fag fanginoman kahoriyan kati. Dapat, nyawa hoglwang kitonya, fag hyamo kafangayofanan kam-anod, bohonwa angko. ³⁷ Is Hisos nonfwali ya hat manga katogbong tolo, nalag kitay ta matoyogan wan. Nafwayong han Pidro, Simon, haw awkin matoyogan? Haw awkin idwa gagwanta mafolawan matagahan mangharaw, ngadi sik tama sinyahod? ³⁸ Ham fag matagahan, fag darangin wan kaarakitay idwa hagfaloksowan hayo. Ka fangayofan orongan wa kasaya has fiya, dapat ka habilogan malombay. ³⁹ Fadowa ginan is Hisos nasaman ya gis taw a, nandarangin, kito mandi ka haraw. ⁴⁰ Sadi ya ginan is Hisos infwali ya hat manga ofod, ya mangharaw, ta matoyogan ya ngawan, maskin ista mata matapyaton. In Hisos manga katogbong kaya wan, idwa twag sagot hanya. ⁴¹ It fatolo fag swali araw is Hisos naakbang ya, ginya nalwang handa Pidro kitay,

Ham awkin matoyogan yapdi, mafahowayan odi, fiya wan. Yabay, kati wan, ka yadi angko ofod ka goyon angko kalaban igfagamit angko, aho Kanbali Taw, has manga taw dwat. ⁴² Ham ha kalibang, fakabangon wan, tya wan, kangko ofod ka goyon has taw. ⁴³ Sadi wa ginan, is Hisos no kampung yapdi, is Hodas, sadi gis Safolo-ha-Dowa, indasog wan. Ha taban kaaywanon fag manga taw, salawidan manga talibong, mabitbitan manga pinotol. Ka manga fagtahinan fagalan-han-Diyos, mangag faadal Batasan Hodyo, hanggan manga fagtahinan sas banwa ka nasogo tonya fag manga taw. ⁴⁴ Ta nodyan dasog sinyas, kanoyon has taw danwa nafatohoyan is taw, iglwang kitay, No sida kangko ayohon fag ama, tonya wan kantam iktanon. Gamatan wa dagos tonya. Tabanan wan. ⁴⁵ Is Hodas nondasog wa sinyas, naakbang wa dagos han Hisos, iglwang kiti, Haw kagfaadal has taw. Ginyas Hodas naayok in Hisos faringfing. ⁴⁶ Manga taw natoklos in Hisos a, nagamat hanya. ⁴⁷ Dapat insadi ka malindogan akbang sinyas nagonos it talibong a, nabasing ka gorangon fag fagalan sogowan, natigbas it talinga. ⁴⁸ Ginya madis Hisos nalwang has fakaaywanan fag manga taw kitay, Aho awkin tolisan, ham gayfan, maskin ham ha diya manga talibong, mabitbitan manga pinotol famogfog, kaarakitay gomamat angko? ⁴⁹ Sirang sirang ho gofod hayo igfaadal basad Fanimbaan-Dahol, bati ham idwa gamat angko gis nanya. Dapat fag im-anod wan no kinday kansorat sas Kasoratan. ⁵⁰ Ginya madi in Hisos manga katogbong fagayo naobon in Hisos idwam dowa, nalagyo dan. ⁵¹ Sadik anahan maholimpayan homot goyan yadin Hisos. Manga sondalo nagamat yadi hanya, ⁵² dapat ka anahan nalfas di, it homot odi kangoyan sasta gamat. Nalagyo idwa ha rotay. ⁵³ Ka manga nagamat in Hisos nataban hanya has gorangon fag fagalan-han-Diyos. Ka manga fagtahinan fagalan fagayo, ka manga fagtahinan sas banwa hanggan ka mangag faadal Batasan Hodyo matifonan yadi sinyas. ⁵⁴ No kitay di, is Pidro goyan haraw in Hisos, dapat ayayo sat ginanan. Ginya, nondasog sas gorangon fag fagalan it balay, is Pidro nasakbaw has basad aladan, intokaw maofodan yadi has manga bantay sondalo, mafanayangan afoy. ⁵⁵ Yabay, ka manga fagtahinan fagalan-han-Diyos hanggan ka tifonan manga fagtahinan Hodyo fagayo igsayak manga taw ka bomangdan in Hisos kaarakitay ta fahatay hanya. Dapat tadwa ha lagan it fagbohagon han Hisos. ⁵⁶ Maskin ha akwag bangdan hanya, dapat idwa pariho ista fwayong. ⁵⁷ Dapat ha akwa yadi tiba nalindog, nabangdan in Hisos, iglwang kitay, ⁵⁸ Mi nadog to fag ama igfwayong kitay, Ho domwat to fag Fanimbaan-Dahol ista gamat nahalig. Dapat ay, sas tolo lamang ik sirang, ho fatobo ya sadi yak Fanimbaan-Dahol, bonwa gamat taw nahalig. ⁵⁹ Dapat nyawa kitonya, ista bangdan idwa myasa kitonya. ⁶⁰ Ginya

madi ka gorangon fag fagalan-han-Diyos nalindog sasta fagbokngan, naintaw han Hisos, Haw awkin idwag sagot? Kana tonya kasta sombong kawa ha hyamo? ⁶¹ Dapat is Hisos idwa naawang, idwa yadi nasagot. Ka Gorangon fag fagalan naintaw ya domwag in Hisos, nalwang kitay, Haw awkin in Diyos-natogon-Famawi? Haw awkin kantam Fagbayaon, it anak? ⁶² Is Hisos iglwang, Ala, aho ngay. Aban ham lomag yadingko, aho Kanbali Taw, matokawan sat akbang, sat balis sihon, kadwa ha bosal. Ham lomag yadi wangko, kadasog aban sas baba manga linyabo gin Diyos banwanan sam tongod. ⁶³ Ginya madi, ka gorangon fag fagalan-han-Diyos naragyang it sadili solong rotay, nalwang, Kana mayon tam nogsayak yapdi ista sombong tiba taw? ⁶⁴ Ham ngap fadi wad nadog kati, gi wa ngap it sadili bibig, igsway wa orongan in Diyos. Kinday hayo fangayofan? Fagayo fagayo nafatohoyan kitay ka fiya fahatayan in Hisos. ⁶⁵ Ginya madi ka tiba igtofay in Hisos. Tagtaklob it mata, ginyag sontok hanya, bago diglwang, Sogi, boktongan. Ginya ka manga bantay sondalo natofa yadi marigon in Hisos. ⁶⁶ Is Pidro no sayapdista basad aladan, ka gorangon fag fagalan sogowan ina sadi inbangkad yadi sinya. ⁶⁷ No nalag in Pidro igfanayang afoy, nabantay hanya fiya fiya, ginyag lwang, Haw mangharaw tonya fag ama it ofod yadi, kawas Hisos taga Nasarit. ⁶⁸ Dapat is Pidro natangkod wan, iglwang wa hanya fag ina, Twa man. Hodwa twagdog im faglwangon. Is Pidro igfatawas wan, hawas bilog sakbawan alad. ⁶⁹ Ka sogowan ina nalag ya in Pidro, nafadahit ya has manga taw ka manga malindogan sinya kitay, To fag ama in Hisos wa nga ofod. ⁷⁰ Dapat is Pidro sadiya ginan natangkod. Ginya madi, araw araw ogbot, ka manga taw sinya, sadi ya ginan nalwang han Pidro, Yabay, haw it ofod yadi wa sadi, matohoyanan wan, haw taga Galiliya yadi. ⁷¹ Dapat is Pidro natangkod marigon, iglwang, Nyawa ho matay wan, orongan wan hodwa kilala tonya fag ama hayo faglwangon. ⁷² Ginya madi ka tabag dagos wa nataraok it fadowa ginan. Is Pidro bago di natohod in Hisos fwayong hanya kitay, Ka tabag nodiyag taraok it fadowa ginan, tolo ginan haw tomangkod has taw angko. Ginya madis Pidro naoraw wa marigon.

15 Araw, no dayo kasirang, ka manga fagtahinan fagalan-han-Diyos, ka manga fagtahinan banwa, hanggan ka mangag faadal Batasan Hodyo hanggan ka fanifonan magorang Hodyo sadik dahonya nangampangan wan. Ginya ta nagafos in Hisos a, nataban hanya han Pilato. ² Ginya madis Pilato naintaw in Hisos, nalwang kitay, Haw awkin ka gorangon manga Hodyo? Is Hisos iglwang, Haw wa ngap kaglwang. ³ Aywan ka manga fagtahinan fagalan-han-Diyos igbangdan han Hisos. ⁴ Is Pilato naintaw ya domwag in Hisos, Kana kin ha nodwag sagot? Fandog kin kaaywanon ista manga sombong ha hyamo. ⁵ Dap-

at is Hisos idwa nasagot domwag. Yakangas Pilato kataka wan. ⁶ Ka manga Hodyo nogtohod ka Fanohodan Nagsagayan, is Pilato ha ogalig falfas sadik Hodyo kanporiso, no fakta ka manga Hodyo fakasayaon falfason. ⁷ Itfagonan ha manga taw iglaban ista gorangon hanggan wa nangadkatayan noglaban. Insadi ka nataban is Barabas, kati maporisowan. ⁸ Ka fakaaywanan nalwang han Pilato, Haw fag idwag liyam im ogali. Ha fag falfas mandi sadik Hodyo kito ka nogbanwan. ⁹ Ginyas Pilato nasagot has taw kitay, Kinda nangos hayo fangayofan? Fag ka gorangon manga Hodyo awkin kangko falfason? ¹⁰ Maskin is Pilato naintaw ngatay fag is Hisos kat falfason, hanya natwa wa kitay kawa manga fagtahinan fag fagalan kaingli odin Hisos, yakanga ta nataban hanya han Pilato. ¹¹ Dapat ka manga fagtahinan fag fagalan nafasognod has manga taw kaaywanon kitay, ta fag somagad gin Pilato fag is Barabas kat falfason. ¹² Is Pilato naintaw has taw, iglwang sadi ya ginan, No kitonya, kana araw angko ibolonon has nwa fag ama ka hayo faglwangon gorangon manga Hodyo? ¹³ Ta nanarawagan di ngap, Fapakowan wa hanya sas nafatimbangan hayo. ¹⁴ Ginyas Pilato gintaw ya domwag has taw, Kana mayon? Kana kat naibolon dwat? Dapat ta labi wan nanarawagan marigon, Fapakowan hanya sas nafatimbangan hayo. ¹⁵ Maskin is Pilato kasaya kitay ka fakaaywanan fag manga taw fag igbaya hanya, ya nafalfas in Barabas. Ginya madis Pilato no nafabakbak in Hisos it manga sondalo, nafabahala hanya has taw kaarakitay ta fapako hanya sas nafatimbangan hayo. ¹⁶ Yakanga ka manga sondalo nataban in Hisos hasta gorangon basad balay dahol. Ta nafatifon sadi wak habanan sondalo san Hisos dayo. ¹⁷ Ka manga sondalo nafasolong di nga hanya sadik rotay aba, boragaw. Ta nahoskos di lamnon madogi a, nafasangbaw tonya in Hisos baba alfoyo. ¹⁸ Ginya ka manga sondalo igsway odi in Hisos, iglwang, Anod, kafiyaon mangharaw ka gorangon manga Hodyo. ¹⁹ Ta nabakbak in Hisos boknga alfoyo pinotol bagahay. Tagtofay hanya hanggan igsway odig lingkohodan hanya. ²⁰ Ginya madi ta nonsagaya wagyod hanya, ta naloslos ya ka rotay boragaw, nafasolong ya in Hisos sadili rotay, hanggan nataban wa hanya has dayo, kaarakitay pomako wan sas nafatimbangan hayo. ²¹ Araw, ta no sawas boknga dalan, ta nahablang sadik ama goli has banwa git iyab, kawas Simon, taga Sirini, inda Alihandro da Rofo ama. Ka manga sondalo napilit wa nafafasan hanya ka nafatimbangan hayo kasta fag fapakowan araw in Hisos. ²² Ta nataban in Hisos ha sadik foyo, tagngayan Golgota, it kahologan Botol Alfoyo. ²³ Ka manga sondalo nafagamit in Hisos langgaw ha aktom lamnon mira. Dapat is Hisos nadayo di. ²⁴ Manga sondalo napako in Hisos sas nafatimbangan hayo, ginya ta nangafodan wan in Hisos manga rotay, tagpostahan no kinday

nogfahafod. ²⁵ Myanit faginan wa kaabwat ta no napako in Hisos sas nafatimbangan hayo. ²⁶ Kasta sombong masoratan sat tongod alfoyo iglwang, Ka gorangon manga Hodyo. ²⁷ Gis nanya yadi ta nafapako dowak tolisan, insadi san Hisos balis sihon, insadi san Hisos balis wala. ²⁸ In-anod kansorat sas Kasoratan kitay, Ta nafatimbang hanya bilang sadik taw ha kasalanan. ²⁹ Ka manga taw kagdalan sinya, igmaswag, igyod, mabaringan odista alfoyo, taglwang, Nabi, anod, haw ka domwat nangos ka Fanimbaan-Dahol, ginya fatobo ya tolo lamang ik sirang, ³⁰ kati, bawiyang hyamo sadili. Fag dokson lamang gis nyamos fatimbangan hayo. ³¹ Kitonya yadi ka manga fagtahinan fagalan-han-Diyos, hanggan ka mangag faadal Batasan Hodyo noglibak in Hisos, tagtoltolan, Bati hanya nabawi ongay ka tiba taw, dapat not sadili wa habilogan, idyadi wa syagan igbawi. ³² Tagmaswag iglwang, Tonya fag in Diyos-natogon-Famawi, ka gorangon manga Israil, fag domokson nga kati gis nwa fag nafatimbangan hayo. Nontam wa mata lagan, tam imtiwala wan. Ka manga tolisan kanpako yadi san Hisos akbang nafasidyowan yadi hanya. ³³ Ginya madi yabay, gis boknga wa sirang fiya fiya, balis myanit kabohid wan, sadi wak dahonya banwanan inharom wan. ³⁴ Myanit no kabohid wan, is Hisos natawag marigon sas fangampangan Aramaik, Iloy, Iloy, lama sabaktani? It kahologan, Angko Diyos, angko Diyos, kana mayon haw nogfabayaan angko? ³⁵ Tiba taw ka sinya malindogan, no nadog kitay is Hisos igtawag kitonya, taglwang, Yabay, igtawag in Iliyas. ³⁶ Sadik taw nadalandan wan natogna famasopsop has basad langgaw maiglis, nasongkit sas tobwan bagahay, ginya nafasopsop in Hisos, iglwang has fakaaywanan, Faya, tam bomantay yap, ngatay is Iliyas imbangkad araw kaarakitay fadokson hanya. ³⁷ Is Hisos natawag ya domwag marigon, ginya nafos wat ipsaw. ³⁸ Ginya yabay, ka fanahop rotay sas fagbokngan Fanimbaan-Dahol inragyang sadi odi ginan, gis tongod has daga baliwa, namokngan wan. ³⁹ Ka fagtahinan sondalo ka masayangowan in Hisos, no nalag no kinday in Hisos ipsaw no nafos, iglwang kitay, Bonwa bohag to fag ama in Diyos wa Anak. ⁴⁰ Ha akwa yadi manga ina sinya mabantayan gis ayayo. Tonya fag manga ina tiba kawa da Mariya Magdalena, da Mariya inda Santyago sangay ina, hanggan in Hosi ina, hanggan is Salomi. ⁴¹ Gi yapdis sakop Galiliya to fag manga ina nogtahin in Hisos hanggan igtogbong hanya. Ha akwa yadi sinya tibak ina aywan kan Hisos manga ofod no hawas Hirosalim itfagonan. ⁴² Kawa myanit kasangday wan sas Sirang Famatalagan hanggan no marom Sirang Kafahowayan, is Hosi, gis banwa Arimatiya, inrigon it fangayofan, hawan Pilato, nasagad in Hisos habilogan. Is Hosi sadik ama ha kangayanan, sadi sas fanoltolan manga fagtahinan Hodyo. Hanyag fanaya no ginahin

is Diyos nogfabago it sakop. ⁴⁴ Dapat is Pilato gadowan ngatay is Hisos idya ha lahaw natay. No nafa-tawag ka fagtahinan has manga sondalo, naintaw hanya is Hisos ngatay natay wa ngay. ⁴⁵ Is Pilato no nadog gis fagtahinan manga sondalo kawas Hisos natay wa ngay, nafaangay kitay is Hosi bol wa nga kan Hisos habilogan gis nafatimbangan hayo. ⁴⁶ Is Hosi nasali sadik homot madamol fag rotay kafiyaon, ginya nabol in Hisos habilogan, nasafot basad homot. Ginyas Hosi nafaigyan in Hisos habilogan sas basad natigib lohib bato. Ginya madi nafabalolang bato dahol dahol it tahop sas sakbawan lohib. ⁴⁷ Da Mariya Magdalena hanggan da Mariya in Hosi ina mabantayan yapdi hanggan ta nalag no sida nafwalid in Hisos habilogan.

16 Nonsagaya wan ka Sirang Kafahowayan, da Mariya Magdalena, da Mariya in Santyago ina, hanggan da Salomi nasali famabanglo kaarakitay fomyad in Hisos habilogan. ² No dayo kayawa sas sirang gona sa sadik simba, ka manga ina hawas lohib bato. ³ No boknga wa dalan tagtoltolan wagtoltolan wan kitay, Fakta araw ka fomalo intam bomoklas ka tahop bato gis boknga sakbawan lohib? ⁴ Ta no nabantay wan, taglag ka lohib fanahop bato in-osen wan has dayo sakbawan maskin kadaholon ka bato. ⁵ Ta nonsakbaw wa has basad lohib bato, ta nalag sadik anahan matokawan sas balis sihon, ha solong rotay abohay. Ka manga ina inhinol odi. ⁶ Ka anahan nalwang has taw, Ham fag idwa kahinol. Ka hayo fagsayahon is Hisos, taga Nasarit, kasta napako sas nafatimbangan hayo. Hanyan boyag ya domwag, idwastay. Ham bantayan ista nagfwalidan hanya is nwa. ⁷ Ham fag goli wan, fwayongan han Hisos manga katogbong, labi man han Pidro, kitay is Hisos gomona hayo has sakop Galiliya. Sinya ham bago di lomag hanya, kito katogon hayo. ⁸ Ka manga ina nadokson di ngay gis lohib bato, nalagyo wan, karokog wa kadala, indolaw wan. Tadwa nafwayong nyawa hada fag taw maskin tandala wan. ⁹ Ka manga ina hawan da Pidro hanggan nafwayong has fagayo kasta lagan anahan, basad lohib, it nafwayong fagayo has taw. ¹⁰ Ginya madis Hisos nasogokitay it manga katogbong fag bomarita ha sadik dahonya baba daga. Ta nafaadal has taw ka maliyaw hanggan maanod fag barita no kinday tam nombawi hanggan aban aban. ¹¹ Dapat nyawa ta nadog kitay is Hisos inboyag ya, nyawa in Mariya wa mata lagan, tadya katiwala in Mariya fwayong. ¹² Ginya madis Hisos nafalag it sadili hat katogbong dowag, ta noglahaw has moyod, dapat it fanwalongan in-oman. ¹³ Tanfwali ya has basad banwa, nafwayong han Hisos manga katogbong tiba kitay ta nalag wan Hisos. Dapat tadwa katiwala ista fwayong. ¹⁴ Ginya madis Hisos nafalag it sadili hat manga katogbong Safolo-ha-Sadi, ta no kwan fafa. Is Hisos nangabaya is taw, maskin

maganit ista fangayofan, tadwa katiwala ista fwayong, nyawa kagfadog has taw nalag kitay is Hisos inboyag ya. ¹⁵ Ginyas Hisos natogon has taw, Ham fag hanya wan sadik baba daga, fwayongan ka Fiya fag Barita has fagayo fag manga taw. ¹⁶ Ka manga taw katiwala hanggan igfatogna yadi hanya imbawi wan, dapat kadwam tiwala imtohoayan has fadosaan. ¹⁷ Ka mangam tiwala mamalag to fag manga falagon madolaw. Ta nogsyag angko, ta somyagan igfaalin manga labang gis taw, ta tomwa yadi homampang ka tiba fangampangan. ¹⁸ Nyawa abyanon homoskos

hanya, hanggan nyawa ta domaya igfainom fakalangoon hanya, tadwam kinday. Ta nogfalangday it manga gamat has manga taw ha sagit, tamfiya wan.

¹⁹ Ginya madis Hisos nontabo wagtogon kiti hat manga katogbong, inabwat has tongod, intokaw san Diyos balis sihon. ²⁰ Ginya madin Hisos manga katogbong nalahaw wan, natoltol has fagayo fag manga banwanan taw. Kagfon intam gofod yadi has taw gibolon, igfalag yadi manga falagon madolaw has manga taw kaarakitay igfaanod kitay orongan ista toltol.

LOKAS

¹ Hogsorat ha hyamo, Tiyofilo, sadik taw ha kangayanan. Aywan fag manga taw danwa nasorat kawa hantam donggon ka manga nadalanan sa hyami banwanan itfagonan. ² Ka manga nalag to fag manga bagay gis fabagowanan hanggan nafaadal in Diyos hampang, ka nafwayong ha hyami it mata lagan, ginya hyami ofod tiba nasorat yadi kasta nafwayong. ³ Ginya madi, aho no naintaw wa fiya fiya fagayo fag mangan anod gis fabagowanan, ho naisip yadi kitay hanggan aho somorat yadi wan sadik toltolan fiya wa donggon, idwa ha labi, idwa ha korang. ⁴ Hogsorat ha hyamo kaarakitay haw tomwa matohoyanan kitay, kam manga donggon orongan wan-anod kitonya. ⁵ Hyabi, nos Hirodis ka gorangon sas sakop Hodiya, ha sadik fagalan-han-Diyos san Abiyas habanan, it ngayan is Sakariyas, in Aaron hasokfonan. In Sakariyas babay is Ilisabit gi yadin Aaron hasokfonan. ⁶ Ka tal-sawa myasa wa kitonya in Diyos wa fagbayaon, katanog it manga togon fagayo fagayo. ⁷ Dapat ay, hanggan wa magorang tadya ha anak maskin is Ilisabit malayos. ⁸ Ginya madi yabay, in Sakariyas fag habanan, no gibolon ka fagalan bato ibolonon san Diyos faglagan, tagbahala sas Fanimbaan-Dahol. ⁹ Gis nanya, ta no nafaaraktoman ista manga ngayan, kito kasta ogali manga fagalan, in Sakariyas ngayan kasta nabol gis sohadan, yakanga hanya ka domiya sonogon kamangyan. Yakanga gis nanya fag masohod ta nogsonog kamangyan, is Sakariyas insakbaw han Diyos basad Fanimbaan-Dahol a, ¹⁰ kat fakaaywanan fag manga taw matifonan sas sokayan, igdarangin. ¹¹ Ginyan sadi odi ginan, in Diyos anghil sadi dagos wa nafalag han Sakariyas, sawas balis sihon baliwa fagsonogan kamangyan. ¹² Is Sakariyas no nalag ka anghil, inhinol wa a, indala wa dahol dahol. ¹³ Dapat ka anghil nafwayong han Sakariyas kitay, Haw fag idwa kadala, Sakariyas. Is Diyos nadog wa hyamo darangin. Ham da Ilisabit omanak yapdi anak ama aban. Fag is Hwan ham no ngomayan hanya. ¹⁴ Ham bomaya wa a, hamsolong yadi waglag, hanggan fagayo fag manga taw, ta bomaya waglag hanya no bago sagaya. ¹⁵ Hanyam bali wa ha kangayanan dahol aban san Diyos faglagan. Hayo anak aban fag idwa ominom alak, nyawa kana fag fakalangoon. Gi yapdit ina basad tiyan, ka Maliyaw fag Falad danwa sa hanya sadi wak dahonya fangayofan aban. ¹⁶ Tonya hayo anak ama ka

fafwali ya aban hasta fakatiwalaon fag Diyos, hasagfon has taw, kaaywanon in Israil manga hasokfonan fag manga taw. ¹⁷ Tonya hayo anak ama ka gomona man kagfon intam, hanggan ka fangayofan hanggan karigonan ka nafasyagan in Diyos fangampang is Iliyas hyabi, mamasyagan yadi hanya. Imbali wa kitonya kaarakitay hanyag faamigosan ya ka manga ama hat manga anak, hanggan fafwali ya ka mangag sway has fiya fag ogali. Ginya madi yabay, sadik tifo-nan taw imtalaga han Diyos. ¹⁸ Is Sakariyas nalwang has anghil kitay, Kinday ho no tomwa matohoyanan kitay ha akwa anak aban, maskin aho magorang wa dahol kati, hanggan angko babay, mi myasa wa kitonya. ¹⁹ Ka anghil nasagot, Ahos Gabriyal ka gibolon san Diyos atobangan. Is Diyos nasogo angko ha hyamo kaarakitay fomwayong hyamo kangko nafadog fiya fag barita ha hyamo kati haraw. ²⁰ Maskin hadwa kati-wala kangko fwayong hyamo, gis kati ginan haw imbali wa boyon hanggan bongkok no kandogay day nodyam anod. ²¹ Gis nanya yabay, no bali day is Sakariyas idyan dokson, ka manga taw mafanayan yapdi sas sokayan. Tandolaw wan no kana mayon nondogay sas basad Fanimbaan-Dahol. ²² Ginya hanya nondokson wan, fawa twa kampung has taw, igfaaman odi. Yakanga ta natwa wa kitay hanya ha lagan madolaw sas basad Fanimbaan-Dahol. ²³ Nonsagaya in Sakariyas habanan taranggapan ibolon, is Sakariyas nwali wa hat balay. ²⁴ Ginya madi yabay, fawa dogay, is Ilisabit gabosog wan. Manga limak magdanon, is Ilisabit idwa galin galin git balay. ²⁵ Is Ilisabit nalwang, Kati yabay is Diyos bago dinawa angko, naibolon kito kaarakitay tadwa ha fagwason aban kitay, hodwa ha anak. ²⁶ Is Ilisabit no onom wak magdanon gabosog, is Diyos nasogo ya ka anghil Gabriyal ²⁷ has banwa Nasarit, sakop Galiliya, ha sadik dayaga, it ngayan is Mariya. Is Mariya idya nangindogan. No kitay di, is Mariya ha bato wa indoganon, is Hosi, sadik ama gin Dabid ha sokfonan, ka gorangon fag Dabid. ²⁸ Ka anghil nondasog has oliyanan dayaga, naakbang wa a, nafasayagdog hanya kiti, Yabay yabay, is Diyos igbaya wa hyamo, sawa yadi hyamo. ²⁹ Dapat is Mariya indolaw wa dahol dahol igdog kat nafwayong a, nangayfanan wa fiya fiya no kanat kahologan ka anghil no kampung kitonya. ³⁰ Yakanga ka anghil nafwayong hanya, Mariya, haw fag idwa kadala, maskin haw in

Diyos wa fagbayaon.³¹ Haw fag talinga wan. Haw im-bali gabosog hanggan omanak yadi sadik anak ama. Haw aban ngomayan hanya is Hisos.³² Hanyam bali dahol it kangayanan hanggan ta lomwang yadi kitay kat Ama is Diyos ka ha kangayanan abwat man has fagayo fagayo. Is Diyos, kagfon intam, fatokaw yadim Anak, san Dabid it hafofowan nagtokawan fanokawan gorangon hyabi.³³ Ginya madi hanya bomahala han Hakob manga hasokfonan hanggan aban aban. Hanya nombali wa gorangon idwa ha katabowanan nogbahala.³⁴ Is Mariya naintaw has anghil, Kinday nom-anod tonya kawa hodyan saya ama?³⁵ Ka anghil nasagot, Ka Maliyaw fag Falad domokson ha hyamo a, ka Abwatman-has-Fagayo-Fagayo it karigonan ka lomanbong ha hyamo. Yakanga kam fasagayaon fag anak aban imtohoyan han Diyos, hanggan it ngayan in Diyos wa Anak.³⁶ Ha awkin idwag tohod in Ilisabit im kaiban? Nyawa magorang wan, gabosog kati a, sadik anak ama aban it fagfasagayaon. Kati faonom wa fag magdanon hanya no gabosog, nyawa hyabi taglwang hanya baog.³⁷ Maskin nyawa kana fag madolaw idwa hagsagaya in Diyos fagsyaganon.³⁸ Is Mariya nasagot, Aho intam Fon sogowan. Nyawa kana kam nafwayong angko fag im-anod wan. Ginya yabay ka anghil naobon wan Mariya.³⁹ Ginya madis Mariya idwa dogay nadagos wan has manga moyod sakop Hoda hawas sadik banwa sinya.⁴⁰ Is Mariya nonsakbaw han Sakariyas balay, nahampang masaya wagdog han Ilisabit.⁴¹ Is Ilisabit no nadog in Mariya hampang, ka anak san Ilisabit basad tiyan nahimot marigon. Ka Maliyaw fag Falad sawan Ilisabit basad fangayofan sadi wak dahonya,⁴² ginyas Ilisabit nahampang marigon a, nalwang han Mariya, Haw bomaya wan bohondi kitos iba ina hanggan kam fagfasagayaon fag anak aban bomaya yadi.⁴³ Hodwa ha fangayofan kitay, kambali angko Fon it ina manabang angko.⁴⁴ Maskin aho no nadog hyamo hampang, haw no kadasog, ka anak sangko basad tiyan nabaya wan, nahimot marigon.⁴⁵ Maskin haw nasyag kitay, im-anod wan kagfon intam nafwayong ha hyamo, git anghil, haw bomaya wan.⁴⁶ Ginya madis Mariya nasagot in Ilisabit kiti, Angko fangayofan igfasayagdog kagfon intam,⁴⁷ Angko fangayofan igbaya in Diyos angko Famawi,⁴⁸ Maskin nyawa ahot sogowan odi, hanyan-awa wangko. Gis kati ginan hanggan wa aban, maskin is Diyos kadwa ha bosal⁴⁹ Naibolon sangko madolaw, fagayo fag manga taw lomwang kitay, aho ka bomaya wan. Is Diyos maliyaw wan.⁵⁰ Hanya kaawa ka manga katanog hanya gis fagayo fagayo fag manga hasokfonan taw.⁵¹ In Diyos manga ibolon igfalag has taw it karigonan, Hanyag fasarowayan yadi ka manga ha takan.⁵² Hanya nafaalin manga gorangon git kangayanan a, Nafaabwat it kangayanan ka mangadwa ha takan.⁵³ Nafahapsog manga fiya fag fanganon ka

manga kalonos, Dapat ay, nasogo ka manga maakwa, nyawadwa ha nahwan.⁵⁴ Maskin igfaanod it togonan hantam manga magorang, Hanya natogbong in Israil manga hasokfonan, in Diyos manga sogowan,⁵⁵ Kawa tonya wat togonan han Abraham hanggan hat manga hasokfonan hanggan aban aban.⁵⁶ Is Mariya nandogayan san Ilisabit balay tolok magdanon, ginya madi nwali wan.⁵⁷ Ginya madi aban, nondasog in Ilisabit anak kasagayan fag masohod, yabay insagaya anak nga ama.⁵⁸ It manga faakbang balay hanggan kaiban, no nadog kitay kagfon intam inawa wa dahol in Ilisabit, ta nagobok wa ngap hanya, igbaya yadi wa ngap iglag.⁵⁹ Ginya madi, ta nogfatoli ka anak dararag sas fawalo fag sirang, tonya fag manga taw nafasakop yadi sinya. Ta gayfan kitay is Sakariyas nogfangayan it anak, is Sakariyas mandi, kito mandi it ama.⁶⁰ Dapat ay, it ina nalwang, Bohonwas Sakariyas, is Hwan di kat ngayan.⁶¹ Dapat taglwang, Ngadi sadi sa hayo kaiban idwa ha ngayan kitonya.⁶² Yakanga ta nafaaman odin Sakariyas it ama, ta no gintaw hanya no faktaw kat fakasayaon it anak ngayan.⁶³ Is Sakariyas nafaaman, nanagad soratan a, ginya nesorat kiti, It ngayan is Hwan. Fagayo indolaw wan.⁶⁴ Ginya sadi wa ginan is Sakariyas nahampang ya, nafasayagdog in Diyos.⁶⁵ Ka manga taga sinya fag banwanan, fagayo fagayo, indolaw wa dahol, yakanga igfadadahitan ha sadi ha sadi kat manga lagan, sadi wak dahonya manga banwanan sas manga moyod sakop Hodiya.⁶⁶ Fagayo ka nadog naayfan wa fiya fiya no kanat kahologan, maskin kalag wa kitay, is Diyos sinya wa fag anak, ka manga taw garintawan yadi, Kinday mayon aban to fag anak?⁶⁷ Ginya madi ka Maliyaw fag Falad sawan Sakariyas in Hwan ama, sadi wak dahonya fangayofan. Ginyas Sakariyas inbalin Diyos fangampang, nalwang kito,⁶⁸ Maskin kagfon in Israil manga hasokfonan, is Diyos, in-awa waglag hanggan nafalo nafalfas it sakop, Yakanga tam fag fasayagdog hanya.⁶⁹ Hanya nafabangkad yadi hantam sadik Famaliwa, marigon wa dahol, Hanyan Diyos sogowan is Dabid, it hasokfonan.⁷⁰ Hyabi hyabi is Diyos ha togonan hantam git manga fangampang maliyaw kitay,⁷¹ hanya bomawi intam gintam manga kalaban Hanggan gis manga taw ka kadwat iglag intam.⁷² Hanya ha togonan yadi hantam manga magorang kitay, hanya kaawa has taw. Hanya tomohod yadit fiya fag taranggapan.⁷³ To kan Diyos nafatohoyan fiya fiya hantam hafofowan fag ama is Abraham kitay,⁷⁴ Hanya bomawi intam gintam manga kalaban, Kaarakitay tam somyagan masayagdog hanya, idwa ha fakadalaon,⁷⁵ Imbali maliyaw hanggan maslong intam manga ogali sat faglagan, no kandogay day tam no boyagan yapdi.⁷⁶ Kati haw man angko anak kangko fagwason. Maskin haw gomona kagfon intam, kaarakitay igfatalagat manga bato lahawan, Yakanga ta ngomayan hyamo

kitay, haw wat fangampang, ka Abwat-man-has-fa-gayo-fagayo-it-kangayanan. ⁷⁷ Haw fomwayong hat sakop no kinday ta nombawi, No kinday it manga ogali dwat nomliyam. ⁷⁸ Maskin intam Diyos maawaon wa dahol dahol, Ka mayawa ka bomawi intam kaakbang wagfayawa intam, ⁷⁹ Kaarakitay igyawa ka manga basad marom yapdi, ka manga sas daga gohom ka-hatayan, Hanggan tomaban intam has dalan ka-howayan. ⁸⁰ Ka anak, is Hwan, no kadahol wan, kabali yadi marigon it fangayofan a, nabanwanan basad fakahyabogan nodyan bali ha bantog sas manga banwanan Israil.

2 Gis nanya fag manga masohod, is Sisar Agosto ka gorangon sas fagayo fag layonan daga ka banwa Roma sakop sadi wak dahonya. Is Sisar Agosto nalwang kitay fagayo fagayo fag manga taw sas sakop Roma fag falistat manga ngayan. ² Toy ka gona fag nafalista nos Kiriniyo hyabi ka gobirador sas Siriya. ³ Yakanga fagayo fag manga taw nwali hat magorang banwanan kaarakitay mamalista it manga ngayan. ⁴ Is Hosi nalahaw gis banwa Nasarit, sakop Galiliya, hawas sakop Hodiya, has banwa Bitlihim kan Dabid nakasagayan fag banwa hyabi, maskin is Hosi in Dabid hasokfonan. ⁵ Is Mariya, kan Hosi bato babayon, nahin yadi wan Hosi kaarakitay mamalista yadit ngayan. Is Mariya danwa gabosog gis nanya. ⁶ Ta no sinya yapdi, natoon wa ngap sinyat anak kasagayan. ⁷ Ginyas Mariya nafasagaya wa sinya, sas banwa Bitlihim, kat anak ahan, anak ya ngadi ama. Is Mariya nafasafot manga rotay hat anak dararag. Ginya madi, kawa napno wa manga taw kasta balay bato hadasogan, yakanga ta nafaigyan odi ka anak dararag sas basad fanganan manga hayopan. ⁸ Dayo gis nanya fag manga masohod, ha manga gano topa basad yabi sas bahalan banwa, hawas talon baliwa. ⁹ Ginya madi, sadi wa ginan, in Diyos anghil sadi inbangkad hasta akbang a, in Diyos masilaw wa dahol fag kayawaan nayawa sasta ligongan. Ka manga gano topa indala wa dahol dahol iglag. ¹⁰ Dapat ka anghil nalwang has taw, Ham fag idwa kadala. Fandog ngay, aho ha fwayongon ha hayo fiya fag barita a, fagayo fag manga taw imsaya wagdog. ¹¹ Maskin kati hayo Famawi insagaya wan san Dabid banwa, kawan Diyos-natogon-Famawi, kagfon intam. ¹² Ka fatohoyan hayo no sida fag anak, ham lomag tonya fag anak dararag masafotan manga rotay a, maigyanan sas basad fanganan hayopan. ¹³ Ginya madi, sadi wa ginan, sadik habanan anghil gin Diyos banwanan sam tongod, inbangkad has anghil gona akbang. Tagfasayagdog in Diyos kiti, ¹⁴ Fag fasayagdog in Diyos sat banwanan sam tongod, Hanggan kan Diyos fagbayaon fag manga taw istay is baba daga fag lomag yadi kahowayan. ¹⁵ Ginya madi, ka manga anghil no nwali han Diyos banwanan sam tongod, ka manga gano topa nanoltolan a, taglwang, Kalibang,

tam hawas basad banwa Bitlihim. Tam mamantay ngay ka madolaw sinya kagfon intam nafadog han-tam. ¹⁶ Ginya ta nalahaw madali hanya a, ta nasayak inda Mariya, da Hosi hanggan ta nalag yadi anak dararag sinya, maigyanan basad fanganan hayopan. ¹⁷ Ta no nalag di ngay, ta natoltol has taw it donggon ka anghil fwayong, kawa has nwa fag anak dararag. ¹⁸ Fagayo fag manga taw ka nadog ka manga gano topa fwayong indolaw wa dahol. ¹⁹ Dapat is Mariya fagaba wa maayfanan to fagayo kan-anod kitonya. ²⁰ Ka manga gano topa nwali wa a, igfasayagdog in Diyos, igbaya hanya kawat donggon hanggan it manga lagan fagayo, kito kan anghil fwayong has taw. ²¹ Nondasog ka fawalo fag sirang git kasagayan, ta natoli ka anak dararag, hanggan nafangayan hanya is Hisos. Is Mariya nodya gabosog, ka anghil danwa nadisag it ngayan tonya. ²² Ginya madi, nondasog ka sirang gis nanya ta nogfatonglos ka ogali kan Mwisis natogon kawa has manga nafasagaya anak, hasaglinay baliwa, ka talanahan nalahaw has banwa Hirosalim. Maskin in Diyos togon iglwang, Fagayo fag anak ama it ahan, ham fakoray hasagfon intam, yakanga, ta nadiya yadi wa ka anak dararag kaarakitay fabangkad has fagalan-han-Diyos faglagan. ²⁴ Ta nadisag yadi kasta bato disagon no kana kan Diyos togon iglwang, kitos sadik talsawa manok bilang tokmo, ngatay dowak anak salompati. ²⁵ Gis nanya fag manga masohod ha sadik ama sas Hirosalim, it ngayan is Simyon. Kalag wa kitay hanya galwasi in Diyos maskin matanogon a, igfanaya odi kitay no ginahin nangos is Diyos nogbawi in Israil sakop. Ka Maliyaw fag Falad sawan Simyon fangayofan, ²⁶ hanggan nafatagak hanya kitay, hadya matay ha lomag yapdin Diyos-natogon-Famawi. ²⁷ Ka Maliyaw fag Falad nataban in Simyon has basad Fanimbaan-Dahol. Ginya madi, it manga magorang no nadiya ka anak, kawas Hisos, ha basad Fanimbaan-Dahol kaarakitay igfatonglos kan Diyos togon fagsagadon, ²⁸ is Simyon nababa ka anak, nabaya in Diyos, nalwang kiti, ²⁹ Haw kagfon angko, maskin angko wa mata lagan ka Famawi manga taw, Kam nafatalaga sasta faglagan fagayo, ka mamayawa has manga Hintil, Hanggan gi hanya, manga taw masayag dog ha hyamo sakop sas Israil. Yakanga, in-anod wan kam fwayong angko. Nyawa aho, im sogowan, gomona was taw kati, fiya was fangayofan. ³³ Ka anak dararag manga magorang indolaw wagdog in Simyon fwayong kawa han Hisos. ³⁴ Is Simyon nafasayag dog inda Hosi kitay ta bomaya wan, ginya madi nafwayong han Mariya kitay, Haw fag danwa twa kitay, to fag anak danwan talaga kaarakitay aywan fag manga taga Israil omayayo gin Diyos, dapat aywan yadi ka omakbang. Is Diyos nasogo to fag anak hastay, sadik falagon madolaw, dapat aywan ka yomod hanya. ³⁵ Yakanga ista manga basad fangayofan imlag wa fiya

fiya. Haw domog yadi aban kitay, bilang wa ha dagom matobohan sa hyamo basad fangayofan. ³⁶ Gis nanya yadi ha sadik ina in Diyos fangampang sinyas basad Fanimbaan-Dahol, it ngayan is Ana, in Fanwil anak, in Asir hasokfonan. Is Ana magorang wa dahol. Fitok fangaraw lamang hyabi, hanya no gofodan hat indogan, ³⁷ ginya madit indogan natay wan, yakanga hanyan balo yadi wan kati. It kagorangan walok safolo ha ofat ik fangaraw. In Ana ibolon ha odis basad Fanimbaan-Dahol, yabi sirang, igfasayagdog in Diyos. Nomtoon idwa kwan hanon kaarakitay mandarangin. ³⁸ Gis nanya yadi, is Ana naakbang handa Hosi, nafasalamat han Diyos. Hanya natoltol yadi, kawa han Hisos baliwa, has fagayo ka manga mafanayan no ginahin is Diyos no bomawi ka banwa Hirosalim gis mahori. ³⁹ Da Hosi da Mariya, no nafatonglos fagayo fag manga bagay ka maangay han Diyos togon has manga Hodyo, ta nwali ya ngawan hat sadili banwanan has banwa Nasarit, sakop Galiliya. ⁴⁰ Ka anak kadahol wan a, inbali marigon it fangayofan hanggan madonong ya ngadi, maskin in Diyos kafiyan sawa hanya. ⁴¹ Yabay, fangaraw fangaraw, sas Fanohodan Nagsagayan, manga Hodyo nogtohod ka anghil no nasagaya ista manga balay hyabi, in Hisos manga magorang has banwa Hirosalim. ⁴² Is Hisos no safolo wa ha dowak fangaraw it kadogayan, hanyag tahin yadi wat manga magorang, ta no has Hirosalim kito kasta ogali nogbanwan. ⁴³ Nonsagaya ka Fanohodan, ta nwali ya nga wan. Is Hisos in-goyan yapdi sas Hirosalim dapat it manga magorang idwa naisip kitay hanyan goyan. ⁴⁴ Ta gayfan ngatay is Hisos nahoyog yapdi has iba taw, yakanga ta nafadagos yapdit lahawan sadi wak sirangan. Ta no nasayak hat manga kaiban hanggan hat manga fakilalaon, ta bago di natwa kitay, is Hisos idwa mangharaw natahin it manga magorang. ⁴⁵ Ta nodwa nalag in Hisos, tanfwali ya has banwa Hirosalim kaarakitay somayak hanya. ⁴⁶ Sayas fatolo fag sirang ta bago di nalag in Hisos, ya mangharaw, sadis basad Fanimbaan-Dahol, matokawan sinyas maofodan yadi ka mangag faadal. Hanya matalingan has taw, ginya gintaw yadi. ⁴⁷ Fagayo ka nadog in Hisos hampang tandolaw wa dahol kitay hanya madonong mangharaw, twa yadig sagot has taw. ⁴⁸ Hanggan it manga magorang intaka wan, ta no nalag hanya, it inag lwang, Anak, kana mayon haw no kitonya ha hyami? Aho hanggan im ama, minyaya wa galingawan hyamo mi nogsayak hyamo. ⁴⁹ Is Hisos nasagot, Kana mayon ham nogsayak angko? Ham awkin idwa natwa kitay aho fag sawangko Ama balay? ⁵⁰ Dapat tadwa natwagdog in Hisos nafwayong, no kanat kahologan. ⁵¹ Is Hisos natahin ya ngawan it manga magorang a, nwali ya has banwa Nasarit, nafasakop fiya fiya hat manga magorang. It ina naayfan fiya fiya to fag manga bagay fagayo sat basad fangayofan. ⁵² Is Hisos kadahol wan gis

nanya, madonong ya ngadi. Labi was Diyos hanggan manga taw igbaya wa dahol dahol hanya.

3 Ginya madi aban, sas fasafolo ha lima fag fangaraw, nos Tibiriyo Sisar kasta abwat fag gorangon sas manga layonan daga ka sakop Roma, is Ponsiyo Pilato ka gobirnadador sas sakop Hodiya, is Hirodis kasta gorangon, no sas sakop di Galiliya, hanggan kaman it fadwasay, is Filipi, ka gorangon sas manga sakop di Itoriya hanggan Taroniti. Is Lisaniyas ka gorangon sas sakop di Abiliniya. ² Gis nanya da Anas da Kayfas ka tarogbongan gorangon fag fagalan-han-Diyos. Gis nanya fag masohod is Hwan, in Sakariyas anak no maoliyanan sas basad fakahyabogan, is Diyos nafadog hanya it bato toltolon has taw. ³ Yakangas Hwan nasafong wa bali bali difay safa Hordan, igfaadal has taw. Hanyag lwang, Ham fag soyo, fag dayo yadi hayo manga ogali dwat. Ham fag fatogna hayo kaarakitay ha tandaan sas danom kagfatohoyan has taw kitay ham igsoyo, hanggan is Diyos faliyam wa fagayo hayo manga naogali dwat. ⁴ Kito kansorat san Isayas, in Diyos fangampang, sorat kitay, Kiti kat nafwayong kagtawag marigon marigon, gis basad fakahyabogan, Fatalagaan in Diyos bato lahawan, Fahaslongan it manga dalan fagayo. ⁵ Dafogan ka manga losot, Hodkodan, fadatagan ka manga moyod, manga fongso, Fahaslongan ka dalan igbarikwangan, Fasohodan fiya fiya ka manga losot garogbot garogbot. ⁶ Ginya madi fagayo fag manga taw lomag no kinday is Diyos nogbawi manga taw. ⁷ Aywan fag manga taw ka nagobok in Hwan kaarakitay mamatogna. Is Hwan iglwang has manga taw, Ham bilang odi manga abyanon no madaya. Fakta kagfatagak hayo kitay ham fag lagyo wan gin Diyos fadosaan ka kadasog aban? ⁸ Fag hanggan wa hayo manga bohad ogali kagfalag kitay ham igsoyo wan. Ham fag idwa kasyag kitay maskin ham in Abraham manga hasokfonan, ya fiya wan. Gwadi hogfwayong ha hayo kitay gistay fag manga bato is Diyos syagan kalig in Abraham manga hasokfonan orongan. ⁹ Gis kati ginan ka wasay danwan hatak sas dalid hayo, omobang fagayo fagayo fag manga fon hayo kadwa fiya it bohad a, omokas wa has basad afoy. ¹⁰ Ginya ka fakaaywanan fag manga taw gintaw in Hwan, No kitonya mangharaw, kana ka hyami bato ibolonon kaarakitay midwam sakop has fadosaan? ¹¹ Is Hwan nasagot, Hayo balokas no dowa, disagan wa ka sadi hasadwa akwa. Ka manga ha hanon fag kitonya yadi, disagan hasadwa akwa. ¹² Mangag falo igsohot ka gobirno Roma bohis indasog wan han Hwan maskin kasaya mamatogna. Ta naintaw yadi han Hwan kitay, Haw kagfaadal, kinda odi hami? ¹³ Is Hwan iglwang has manga fanohot bohis, Ham fag idwag sagad iglabi ka fiya hayo fagsagadon. ¹⁴ Ka manga sondalo naintaw yadin Hwan, Hami yadi, kinda odi? Hanyag lwang, Nyawa

ham igsagad, fag idwag logos is taw. Fag idwag fadala nodwa orongan. Ham fag idwag manaw hayo tangdanan. ¹⁵ Gis nanya fag masohod aywan fag manga taw mafanayan odi no ginahin in Diyos-natogon-Famawi nombangkad, yakanga kat fakaaywanan naayfan kitay ngatay is Hwan kasta fagfanayaon. ¹⁶ Dapat is Hwan nafwayong has taw, No kitay di, sas danom aho nogfatogna hayo, dapat ha akwa ya kadasog aban, ka madonong man angko, hanya ka fatogna hayo sas Maliyaw fag Falad, hanggan sas afoy. Ho kaya wa manlohas it siyok lapak. ¹⁷ Hanya ha bitbit fanayang kaarakitay falayon it opa, manga ohot. Tomifon it tiri-go sas basad dongdong, dapat ay, somonog wa ka manga ohot sas afoy kadwa kapsa. ¹⁸ Yakanga aywan yapdi fag manga fatagak in Hwan fagtoltolon has taw nogfadog ka Fiya fag Barita. ¹⁹ Dapat is Hwan nangabaya in Hirodis, kasta gorangon, maskin kaha-gaw in Filipi babay, is Hirodiyas, it tagyaw yadi. Bohondi tonya kan Hirodis naibolon dwat kan Hwan fakabayaan. ²⁰ Yakangas Hirodis nadogang ya to kat kasalanan, hanya nafaporiso yadin Hwan. ²¹ Itfagonan, fagayo fagayo fag manga taw no nafatogna wan, hanggan is Hisos nafatogna yadi. Ginyas Hisos nogdarangin yapdi, ka banwa sas tongod inboklas wan. ²² Ka Maliyaw fag Falad, bilang wa salompati, nayokfo han Hisos. Ginya ha nahasnog gin Diyos banwanan sam tongod, iglwang kitay, Haw wa kangko fagalwasiyon fag Anak, hogbaya wa dahol dahol hyamo. ²³ Is Hisos manga wa tolok safolok fangaraw it kagorangan bago digfaadal has taw. Ista fangayofan is Hisos in Hosi odi anak. In Hosi hafofowan gin Adan ginan kiti, ²⁴ Bago bago is Adan bilang wan Diyos anak. Ginyan Adan anak is Sit. Ginyan Sit anak is Inos. Ginyan Inos anak is Kainan. In Kainan anak is Mahalalil. In Mahalalil anak is Harid. In Harid anak is Inok. In Inok anak is Matosalim. In Matosalim anak is Lamik. In Lamik anak is Nowi. In Nowi anak is Sim. In Sim anak is Arfaksad. In Arfaksad anak is Kainan. In Kainan anak is Sala. In Sala anak is Hibir. In Hibir anak is Pilig. In Pilig anak is Ragaw. In Ragaw anak is Sirog. In Sirog anak is Nakor. In Nakor anak is Tira. In Tira anak is Abraham. In Abraham anak is Isaak. In Isaak anak is Hakob. In Hakob anak is Hoda. In Hoda anak is Faris. In Faris anak is Isrom. In Isrom anak is Arni. In Arni anak is Admin. In Admin anak is Aminadab. In Aminadab anak is Naason. In Naason anak is Salmon. In Salmon anak is Boos. In Boos anak is Obid. In Obid anak is Hisi. In Hisi anak is Dabid. In Dabid anak is Natan. In Natan anak is Matata. In Matata anak is Mainan. In Mainan anak is Miliya. In Miliya anak is Iliyakim. In Iliyakim anak is Honan. In Honan anak is Hosi. In Hosi anak is Hoda. In Hoda anak is Simyon. In Simyon anak is Libi. In Libi anak is Matat. In Matat anak is Horin. In Horin anak is Ilyasar. In Ilyasar anak is Hoswi. In Hoswi anak is Ir. In

Ir anak is Ilmodam. In Ilmodam anak is Kosam. In Kosam anak is Adi. In Adi anak is Milki. In Milki anak is Niri. In Niri anak is Saltiyal. In Saltiyal anak is Sorobabil. In Sorobabil anak is Risa. In Risa anak is Hoana. In Hoana anak is Hoda. In Hoda anak is Hosi. In Hosi anak is Simi. In Simi anak is Matatiyas. In Matatiyas anak is Maat. In Maat anak is Nagi. In Nagi anak is Isli. In Isli anak is Nahom. In Nahom anak is Amos. In Amos anak is Matatiyas. In Matatiyas anak is Hosi. In Hosi anak is Hanan. In Hanan anak is Milki. In Milki anak is Libi. In Libi anak is Matat. In Matat anak is Ili. Ginya madin Ili anak kawas Hosi. To fag is Hosi kasta fangayofan in Hisos wa ama.

4 Gis nanya ka Maliyaw fag Falad sawan Hisos fangayofan sadi wak dahonya, hanggan is Hisos nwali ya gis safa Hordan. Ka Maliyaw fag Falad nataban in Hisos has basad fakahyabogan. ² Is Hisos no sinya wan, is Fandaya nasolay igfaloksowan hanya ofat ik safolok sirang. Is Hisos idwa ha nahwan hanon kandogay inya, yakanga kalonos wa dahol dahol. ³ Ginyas Fandayag Iwang han Hisos, Haw non Diyos wa nga Anak, haw fag Iwang has nwa fag bato, Fag imbali tinapay. ⁴ Dapat is Hisos nasagot hanya, Inso-
 rat kitay, Bohondi ka odi fanganon kagfaboyag manga taw. ⁵ Ginyas Fandaya nataban in Hisos has abwat, sas fakabantayan, nafalag hanya, sadi wa ginan, ka manga gorangon sakop fagayo fagayo sadik dahonya baba daga. ⁶ Ginyas Fandayag Iwang han Hisos, Haw no ha ngangkok manimba, ho domisag ha hyamo to fag manga gorangon sakop, it manga kangayanan hanggan kafiyon fagayo, maskin to fagayo indisag wa hangko a, kati ho domisag wan nyawa faktaw kangko fakasayaon disagan. ⁸ Is Hisos nasagot, nalwang, Inso-
 rat kitay, Fag is Diyos kagfon hyamo kam fagsimbaon. Fag hanya lamang kam fakatanogon. ⁹ Ginya madis Fandaya nataban ya in Hisos has baba atop Fanim-
 baan-Dahol sas Hirosalim, iglwang han Hisos, Haw non Diyos wa nga Anak, fadagdagan hyamo gistay is baba atop, ham daga is baba daga, ¹⁰ maskin inso-
 rat kitay, Hanya tomogon it manga anghil kitay, ta fag omano hyamo, ¹¹ inso-
 rat yadi kitay, Ta somambot di hyamo kaarakitay im bitis idwam-ik-
 tan has bato. ¹² Dapat is Hisos nasagot, Ka Kasoratan iglwang, Haw fag idwag tikis igsolay kagfon hyamo, hyamo Diyos. ¹³ Is Fandaya nontabo wagsolay igfaloksowan in Hisos git manga halimbawan fagayo, naobon ya nga wan Hisos a, igfanaya nangos no ginahin fag masohod aban no somolay ya hanya. ¹⁴ Is Hisos infwali ya has sakop Galiliya a, in Diyos Maliyaw fag Falad karigonan sawa hanya. In Hisos manga toltol hanggan ibolon indahit wan sas ligongan. ¹⁵ Is Hisos nafaadal has taw sasta manga basad fanimbaan. Fagayo fag manga taw nafasayagdog hanya. ¹⁶ Ginyas Hisos nwali has banwa Nasarit hat nakadaholan fag banwa. Is Hisos nasak-

baw has basad fanimbaan sas Sirang Kafahowayan kito kat ogali nogbanwan. Is Hisos nalindog kaarakitay bomasa gis Kasoratan. ¹⁷ Ta nafagamit hanya in Isayas, in Diyos fangampang kasoratan malohotan. Is Hisos naladlad ka kasoratan kansorat kito, ginya nabasawan, ¹⁸ Kati in Diyos Maliyaw fag Falad sawangko Maskin hanya nafili wangko kaarakitay ho manoltol ka Fiya fag Barita has manga myabog. Hanya nasogo angko kaarakitay igfadog hasta manga napilit nataban kitay, ta malfas ya, Fadog yadi has manga bota kitay, ista manga mata imfoga ya, Kaarakitay fomalfas kasta fagfahoriyon. ¹⁹ Fadog yadi has taw kitay, kati fag fangaraw kagfon intam falag it kahowayan has taw. ²⁰ Is Hisos nalohot ya ngawan ka Kasoratan, nafwali ya hasag bahala, ginya madis Hisos intokaw ya. Fagayo ka sas basad fanimbaan indolaw wagdog, ta nabantay in Hisos. ²¹ Ginya madis Hisos igfwayong has taw, Ka hayo donggon gis Kasoratan in-anod wa kati. ²² Fagayo nafasayagdog hanya a, tandolaw wa dahol kawa kafiyaon maskin nogtoltol. Ta garintawan, Bohonwa awkin in Hosi anak to? ²³ Yakangas Hisos iglwang, Ham ngandayo somokfon to fag fwayongon, Haw kagbolong has taw, fag im sadili yap im fagbolongon. Ham lomwang yadi hangko, Ibolonan yadistay sam sadili banwanan kito ka hyami donggon kam naibolon sas banwa Kapiroaom. ²⁴ Is Hisos igfadagos yapdig fwayong kitay, Hogfwayong ha hayo kitay orongan wan, idwa ha akwa in Diyos fangampang kabantog sat sadili banwanan. ²⁵ Dapat hogfwayong hayo kitay, hyabi hyabi, san Iliyas fag kasohodan, nodwa nahwayan tolok fangaraw hagboknga, yakanga malonos wa dahol sadi wak dahonya banwanan, gis nanya, bonwa bohag, aywan ka manga ina balo sas Israil. ²⁶ Dapat ay, is Diyos idwa nafalahaw in Iliyas has ina balo sas Israil, dapat ha sadik ina balo sas Sapipta, sakop Sidon. ²⁷ San Iliyo man fag kasohodan, no kitay di, kaaywanon fag manga taw ka ha sagit kitong sas banwanan manga Israil, dapat idwa hanfiya ngadi sadi. Kan Diyos nafafiya is Naaman lamang, gis sakop Siriya. ²⁸ Ta no nadog in Hisos manga hampang, fagayo ka sas basad fanimbaan kaisog wa dahol. ²⁹ Ta nanhalindogan, natawid marigon in Hisos boknga takyay ginya nataban hanya has sokayan banwa has bohid has baba dalifi kaarakitay ta fomolid hanya ha basad gobang. ³⁰ Dapat ay, is Hisos nalahaw lamang hasta fagbokngan a, nwali wan. ³¹ Ginya madis Hisos hawas lwad has banwa Kapiroaom, sakop Galiliya. Sas Sirang Kafahowayan, is Hisos igfaadal has manga taw sinya. ³² Tantaka wagdog is Hisos nogfaadal is taw maskin kitos ha kangayanan no kampang, idwag hono. ³³ Sinyas basad fanimbaan, ha sadik ama, labang wa kagfahoriyan hanya, igtawag marigon kitay, ³⁴ Yabay, haw Hisos taga Nasarit, kana haw nogmawat hyami. Haw awkin hastay kaarakitay domaog wa hyami? Ho fadi

wadtwa no fakta haw. Haw ka Maliyaw kanbangkad gin Diyos. ³⁵ Dapat is Hisos nangabaya ka labang, nalwang, Ha hawa gawang gawang. Haw fag galin wa gis nyamo fag taw. Ginya madi, sasta faglagan fagayo, ka labang nafahakfo wa dagos ka ama, ginya madi nalin lamang, idwa nafabaran ka ama. ³⁶ Fagayo fag manga taw intaka wan, ta nangarintawan ha sadi ha sadi kitay, Kana ti fag manga hampang? Ha kangayanan, marigon ya ngadi, nogfasognod ka manga labang, ta katanog yadi wa galin. ³⁷ Ka barita kawan Hisos manga ibolon indahit ha sadik dahonya sinya fag manga banwanan. ³⁸ Is Hisos nalahaw wa gis fanimbaan, nasakbaw han Simon balay. Gis nanya in Simon nogang ina ha sagit, kagnaw wa dahol dahol, yakanga tagfaaronganon han Hisos kitay, Haw nangos fafiyaan yap hanya. ³⁹ Is Hisos nalindog sas ina dayo igyanan a, nasogo kitay ka hagnaw fag galin wa gi hanya. Ka ina infiya wan, dagos wanbangon, ogali man di, nanogbong was taw. ⁴⁰ Araw, myanit no kasangday wan, ista manga kahilala nataban han Hisos fagayo fagayo ka ha manga sagit, bokod bokod. Is Hisos nafwalid it gamat ha sadi ha sadi, hanggan nafafiya fagayo. ⁴¹ Manga labang nalin wa gis aywan fag manga taw, igsohodan wagharkoyawan kitay, Haw in Diyos wa Anak. Dapat is Hisos nangabaya ka manga labang, idwa nafaawang maskin ka manga labang kilala wa kitay is Hisos wa kan Diyos-natogon-Famawi. ⁴² Ginya madi, no bago marom, is Hisos nabisok has talon. Ka manga taw galingawan in Hisos. Ta no nalag ya nga hanya, taglwang, Ha hayap iglahaw gistay. ⁴³ Dapat is Hisos iglwang has taw, Ho fag mamaadal yapdi has iba fag manga banwanan ka Fiya fag Barita han Diyos sakop baliwa. Maskin nga is Diyos nasogo angko hastay, tonya wa kangko bato ibolonon. ⁴⁴ Ginyas Hisos igtoltol yapdi sas manga fanimbaan Hodyo sas sakop Hodiya.

5 Aban, kawa manga taw kaaywanon kasayag talinga in Diyos hampang, ta tifonan tifonan ya san Hisos akbang. Is Hisos malindogan sas akbang linaw Ginisarit. ² Ginyas Hisos nalag dowak baloto sas bahalan linaw. Ka mangag fon baloto, manga fangoyang fag manga taw, indokson wan git manga basad baloto, gogas wat manga sarap. ³ Yakangas Hisos nasakbaw has basad baloto sadi a, nalwang han Simon, kagfon tonya fag baloto, No fiya di, ha faosonan yap ogbot gis bahalan im baloto. Ginya madis Hisos matokawan sas basad baloto a, igfaadal ka manga taw sas baba bintalan. ⁴ Araw, is Hisos nontabo wagfaadal has manga taw, nalwang han Simon, Ham fag hawas fagbokngan linaw. Ham fadagdagan hayo manga sarap ha basad linaw kaarakitay omiktan oyang. ⁵ Is Simon nasagot kitay, Haw kagfaadal, sadi wak yabi hanggan wa kayawa midwa ha naiktan, minyak wan. Dapat kawa haw nalwang fag fadagdag ka manga

sarap, ho fadagdag ngay. ⁶ Ginya ta nafaanod odi ngay, ta nafadagdag it manga sarap. Nyawa kitonya, kaaywanon wa fag manga oyang ista iktan araw, madala wamragyang kasta manga sarap it kaaywanan it iktan. ⁷ Yakanga ta nafaaman ha sadik baloto kaarakitay igfatogbong it manga ofod. Ginya ka sadik baloto nagobok wan da Simon. Ta nafahapno wa oyang fagayo dowak baloto, madala wamlogom ha daga danom. ⁸ Is Simon Pidro no nalag kitay aywan it iktan, nanlibabaan san Hisos atobangan a, nalwang, Angko Fon, ha fag ayayo yap ginko, maskin dwat angko manga ogali. ⁹ Is Pidro hanggan it manga ofod indolaw wan kawat iktan oyang kaaywanan wan. ¹⁰ Hanggan in Simon manga ofod sa sadik baloto, da Santyago da Hwan, in Sibidiyo manga anak, tandolaw yadi wan. Ginyas Hisos iglwang han Simon, Haw fag idwa kadala, gis kati ginan taw man kam iktanon aban. ¹¹ Ginya madi kasta manga baloto nondagsa wan, da Pidro naobon wat manga akwa fagayo a, natahin wan Hisos. ¹² Ginya madis Hisos no sawa sadik banwa, ha sadik ama ha sagit kitong, nakfos wa sadik habilogan, naakbang han Hisos. Ka ha kitong no nalag in Hisos, nanlibabaan a, nafaaronganon hanya, iglwang, Ama, haw no kasaya di, haw fadi wad somyagan igfafiya angko sagit. ¹³ Ginyas Hisos natawid hanya, iglwang, Ho kasaya ngay, haw fag imfiya wan. Ginya madit kitong dagos wanfiya. ¹⁴ Yakangas Hisos natogon hanya kitay, Hawag fwayong nyawa hada fag manga taw, dapat fag ha yap has fagalan-han-Diyos, fabantayan hanya im habilogan. Ginya madi ha disagan kan Mwis natogon bato disagon bilang faorongan has taw kitay haw infiya wan. ¹⁵ Yatokitay, indahit di ngap has manga taw kawan Hisos naibolon. Yakanga ka fakaaywanan fag manga taw inbarangkadan di ngap han Hisos kaarakitay tomalinga hanya, hanggan igfafiya ista manga sagit. ¹⁶ Dapat ay, is Hisos hawas ayayo gista manga banwanan kaarakitay mandarangin sinya. ¹⁷ Dapat gis nanya fag kasohodan is Hisos nogfaadal, ha akwa manga Farisiyo hanggan ka mangag faadal in Mwis manga togon gis fagayo fag banwa, sakop Galiliya hanggan sakop Hodiya hanggan gis Hirosalim, ta matokawan yadi sinya. In Diyos katonongan sawan Hisos kaarakitay igfafiya ka manga ha sagit. ¹⁸ Yabay, gis nanya ha manga taw kadasog, gosong sat baba sagmak, sadik taw kadwa syagan kimot. No kitay di, tagpilit wagfasakbaw nangos hanya has basad balay kaarakitay ta fomwalid ka ha sagit han Hisos akbang. ¹⁹ Dapat ay, tadwa twag fasakbaw hanya, kawa sawas fakaaywanan fag manga taw, yakanga ta hawas baba balay. Ta nalosbong ka atop a, natonton han Hisos akbang, ka ha sagit sat baba sagmak. ²⁰ Is Hisos no nalag kitay tagsyag marigon ha hanya, nafwayong has ama kadwa syagan kimot, Ama, hogfaliyam im manga naogali dwat. ²¹ Ka mangag faadal Batasan Hodyo hang-

gan ka manga Farisiyo nangarisipan kitay, Fakta tonya ka kampang igsway in Diyos? Bohonwa awkin is Diyos lamang ka ha kangayanan igfaliyam manga ogali dwat? ²² Dapat is Hisos nasarom ista fagisipon, yakan-ga nalwang has taw kiti, Kana mayon ham no nangarisipan kitonya? ²³ Sida ka malpos fwayongon, ngatay, Im manga naogali dwat fag imliyam wan, ngatay Ha fag kabangon, haw fag lomahaw wan? ²⁴ Dapat ho falag ha hayo kitay, aho Kanbali Taw, ha kangayanan igfaliyam ista manga ogali dwat istay sas baba daga. Ginyas Hisos nafwayong has idwa syagan kimot Aho wa kaglwang kitay, Haw fag kabangon wan, diyan wam sagmak, nyawa ha mwali wa kati. ²⁵ Ka ama dagos wa nalindog sas faglagan manga taw, naang-gong wat sagmak, nwali wa a, igfasayagdog ya ngadi han Diyos. ²⁶ Ka manga taw indolaw wa dahol iglag, ta nataka wan, nafasaya ya ngadig dog in Diyos, taglwang, Madolaw wa dahol dahol kantam lagan kati. ²⁷ Ginya madi araw, is Hisos nadokson wan gis basad balay, inlahaw wan, nalag sadik ama kagsohot bohis Roma, it ngayan is Libi, matokawan sas fanohotan bohis. Is Hisos iglwang hanya, Ha tahinan wangko. ²⁸ Is Libi dagos wanlindog, naobon wat manga sangkap fagayo fagayo a, natahin wa hanya. ²⁹ Ginya madis Libi nasyahod it manga fanganon aywan sat balay kawas Hisos nondasog. Manga fanohot bohis Roma aywan, hanggan ka iba taw sinya yadi igsayowan kwan handa Hisos. ³⁰ Ka manga Farisiyo hanggan kat manga ofod kagfaadal Batasan Hodyo, gidginasan wa gidginasan wan. Taglwang han Hisos manga katogbong, Kana ham no kwan, manga ginom, igsayowan has manga fanohot bohis hanggan has manga taw ka ha ogali dwat? ³¹ Is Hisos nasagot has taw, Ka manga ha sagit ka kasaya has famolongan, no kadidwa ha manga sag-it idwa kasaya hanya. ³² Maskin honbangkad hastay, kangko fagsayahon, bohonwa ka gayfan kitay it manga ogali fiya, dapat ka manga taw ka ha ogali dwat kangko fagsayahon kaarakitay ta somoyo wan. ³³ Ginya tibag lwang han Hisos kitay, In Hwan manga katogbong fagabadwa kwan hanon kaarakitay mandarangin mahogod. Kitonya yadi ka manga Farisiyo katogbong ogali. Bati im manga katogbong kwan di hanon fagaba, hanggan ginom. ³⁴ Is Hisos nasagot is taw, Ham awkin idwag fahwan hanon hasagfasakop hasta fangsawan fatalagaan fanganon, kagbabay no gofod yapdis taw? ³⁵ Dapat ay, aban, ha gomamat tomaban kagbabay, gis nanya ta bago didwa kwan hanon kaarakitay mandarangin mahogod. ³⁶ Ginyas Hisos nafahalimbawa yadi kitay, Idwa ha romagyang rotay bago, falonob has daanon. No omibolon kitonya imdwat wa ka rotay bago, hanggan ka lonob bago idwa yadi maangay has rotay daanon. ³⁷ Idwa yadi ha taw somiblag alak bago has basad sohadan anit daanon. No omibolon kitonya ka sohadan anit im-

bosni wan, ka alak im-od-olanan lamang, ka sohadan anit imdwat yadi wan. ³⁸Yatokitay, tagsiblag bago fag alak has bago fag sohadan anit. ³⁹Nyawa faktaw no gayfan yapdi kitay ka gona fag alak ka fiya kainom, idya kasaya manginom ka bago, maskin iglwang ka gona fag alak fiya wan.

6 Sadi ginan, sas Sirang Kafahowayan, da Hisos igdalan sasta namay ha tirigo. In Hisos manga katogbong nabol manga haway tirigo sayok, ginya no naligis basad dalohap, ta nahwan wan. ²Tibak Farisiyo nangabaya has taw, taglwang, Kana ham no gibolon kadwa maangay sas Batasan Hodyo maskin sawas Sirang Kafahowayan? ³Is Hisos nasagot has taw, nalwang, Ham awkin idwa nabasa in Dabid naibolon hyabi no kalonos, hanggan wat manga ofod kalonos yadi? ⁴Is Dabid nasakbaw han Diyos basad balay a, nabol ka tinapay kandisag han Diyos, ginya madi nahwan wan. Is Dabid nadisag ya ngadi hat manga ofod. Ka Batasan Hodyo iglwang kitay ka manga fagalanhan-Diyos lamang ka fiya homwan tonya fag tinapay. ⁵Ginyas Hisos nalwang yadi kitay, Aho, Kanbali Taw, kagbahala has Sirang Kafahowayan. ⁶Ginya, aban sa sadi yak Sirang Kafahowayan, is Hisos igsakbaw ya has basad fanimbaan a, igfaadal has taw. Sinya ha sadik ama it gamat balis sihon inrifis wan. ⁷Ka mangag faadal Batasan Hodyo hanggan ka manga Farisiyo igbantay ya ngay in Hisos, ngatay fafiya ya nga araw sas basad Sirang Kafahowayan, maskin tagsayak it fangangan hanya. ⁸Dapat is Hisos fadi wad twa ista manga fagisipon, yakanga hanya nafwayong has ama kanrifis it gamat, Ha fag hastay is fagonan. Ka ama naakbang han Hisos, nalindog ya ngadi sasta fagonan. ⁹Is Hisos nafwayong has fakaaywanan kiti, Ho mangintaw hayo, sida ka maangay has Batasan Hodyo, ham gayfan, ngatay ka gibolon fiya, ngatay ka gibolon dwat sas Sirang Kafahowayan? Ngatay igbawi taw, ngatay igfahatay? ¹⁰Is Hisos namarantayon yapdi has taw sat ligongan, bago di nahampang has ama kanrifis it gamat, nalwang, Falogdayan yap im gamat. Ka ama nafalogday ngat gamat, infiwa wa dagos, ogali wan. ¹¹Ka mangag faadal Batasan Hodyo hanggan manga Farisiyo it mata di myasa wa bayong kawa kaisog wa dahol in Hisos. Yakanga tagtololan no kana kasta ibolonon hanya aban. ¹²Ginya madi, gis nanya fag masohod, is Hisos hawas moyod kaarakitay mandarangin. Hanya nandarangin han Diyos sadi wak yabi hanggan wa kayawa. ¹³Yakanga, no sirang wan, nafatawag it manga katogbong, ginyas Hisos nafili ka Safo-lo-ha-Dowa, kat nangayan it manga Fandiya-Barita. ¹⁴To kat manga nafili, is Simon, kawan Hisos nangayan is Pidro, hanggan is Andris it fadwasay, da Santyago, da Hwan, da Filipi, da Bartolomi, ¹⁵da Matiyo, da Tomas, in Santyago yadi sangay in Alfiyo anak, ginyan Simon yadi sangay ka goyon marigon it manga kapari-

ho Hodyo, ¹⁶da Hodas in Santyago anak, hanggan da Hodas Iskariyoti ka naoyon it ofod kalaban. ¹⁷Is Hisos hanggan it manga ofod haya nga was lwad baliwa, hawas basad datag. In Hisos manga katogbong fagayo sinya yadi wan. Kaaywanan wa fag manga taw inbarangkadan wan gis sakop Hodiya hanggan gis banwa Hiroosalim, ka yadi gis manga banwa Tiro hanggan banwa Sidon sas bahalan datag. Ta fagayo nagobok in Hisos kaarakitay tomalinga hanya hanggan igfafiya ista manga sagit. ¹⁸Is Hisos nafafiya yadi ka ha manga labang igfahoriyan hanya. ¹⁹Maskin ha karigonan gin Hisos kagfafiya has fagayo, fagayo fag manga taw gwayan wa kasaya ngadi somapkid, ta fag somapkid wan Hisos. ²⁰Is Hisos nabantay hat manga katogbong a, nalwang, Nyawa ham manga myabog, ham bomaya wan maskin in Diyos sakop hayo wan.

²¹Nyawa ham kalonos kati, ham bomaya wan maskin ham mapsog aban. Nyawa ham ha karongkotan kati, ham bomaya wan, maskin ham ha kasolongan aban. ²²Manga taw no kadwat iglag hayo, kawa ham galwasi angko, Kanbali Taw, ta nogsogo hayo, ta nogyod hayo, nyawa taglingo wa hayo manga ngayan, ham bomaya wan. ²³Nyawa hamlag kitonya, ham fag masolong wa dahol dahol, fag lokso ya ngadi, maskin dahol aban hayo tanggapon fasalamat san Diyos banwanan sam tongod. Ista manga hafofowan magorang naibolon yadi kitonya han Diyos manga fangampang hyabi. ²⁴Dapat ay, isyay wan, ka hayo lagon aban, ham ka manga maakwa, maskin ham nadog wa hayo kafiyan kati. ²⁵Isyay wa ka ham ka fagaba wa mahapsogan kati, Aban ham imlonos wan. Isyay wan aban, ka ham, ka fagaba wa mahasayan, Aban ham imhori wan, mangodgorawan ya ngadi. ²⁶Isyay wan no aba fagayo fag manga taw igfasayagdog hayo, maskin ista manga hafofowan magorang igfasayagdog yadi kitonya has manga bohagon fag fangampang hyabi. ²⁷Dapat, ham ka mangag talinga angko, hogfwayong ha hayo kitay, ham fakaawa hayo manga kaaway. Ham fag fiya has manga taw ka kadwat iglag hayo. ²⁸Ham fag kampang mahoway has mangag fadwat igdog hayo. Ham fag darangin yadi kawa has mangag fahoriyan hayo. ²⁹No hagtoga hayo marigon sas faringfing, fag kaman balis baliw. Ta nogbol hayo balokas ka aba-aba, disagan yadi wa ka agod kat famabasad. ³⁰Ham disagan has fagayo kagsagad gi hayo, no nabol hayo manga botang, ham hawag bawi. ³¹Fag maangay hayo manga ogali has taw, no kinday hayo fakasayaon nangos taw no gogali ha hayo, ham fag kitonya yadi has taw. ³²Ham idwa fiya man has taw hayo ogali, no ka lamang kaawa hayo ka hayo fakaawaon. Nyawa ka ha manga ogali dwat fadi wad twa kaawa ka manga kaawa has taw. ³³Ham idwa fiya man has taw hayo ogali no ka lamang syagan igtogbong hayo ka hayo fagtogbongon. Nyawa ka ha manga ogali dwat fadi wad tomog-

bong has syagan igtogbong hanya. ³⁴ Ham idwa fiya man has taw hayo ogali no hayo fagfaoyamon ka lamang syagan igbayad. Nyawa ka ha manga ogali dwat igfaodoyaman ha sadi ha sadi, ta no twa di kitay bomayad di aban. ³⁵ Yatokitay, ham ngap fag kaawa hayo manga kaaway, fag falag has fiya. Ham fag faoyam has taw nyawa ham idwa ha faglagon ista bato bayadon. Hayo ogali no kitonya, dahol hayo tangapon fasalamat aban, hanggan ham imbali in Diyos manga anak. Is Diyos, ka abwat man has fagayo fagayo it kangayanan, fiya it ogali has manga taw kadyapdig baya hanya, has mangag sadili odi. ³⁶ Ham fag maawaon kito yadi hayo Ama. ³⁷ Ham fag idwa gato fagaba hayo kapariho, ginya madis Diyos idwa yadi gato hayo. Ham fag idwag fatohoyan hayo manga iba has fadosaan, ginya madis Diyos idwa yadi fatohoyan hayo has fadosaan. Ham fag idwa ha bodbotangan ha sadi ha sadi, ginyas Diyos idwa yadig botang hayo manga ogali dwat. ³⁸ Ham fag madisagon has taw, ginyas Diyos domisag yadi ha hayo napno wa gantangan, maaligigan ya ngadi, hanggan wa nafaambobong wan. Maskin no kinday hayo gantangan has taw, kitonya yadis Diyos no gomantang ha hayo. ³⁹ Ginya madis Hisos nafalimbay ya ngay has manga bota baliwa, naintaw, Sadik bota syagan awkin gomat ka sadik bota, ham gayfan? No kitonya ta pariho imdagdag has gobang, idwa aw? ⁴⁰ Idwa ha katogbong ka madonong man kagfaadal hanya, dapat kagfaadal no nafwayong wa fiya fiya, ka katogbong imlobos yadi kito kagfaadal hanya. ⁴¹ Kana mayon haw nogbantay ka dihot sam fadwasay basad mata, dapat hagfabayaan ka sa hyamo sadili mata, bilang wa dahos batang? ⁴² Kinda araw haw no lomwang ha hyamo fadwasay, Ho nangos bomol ka dihot gi hyamo mata, dapat hadyag lag kitay ka sa hyamo mata, manghara, daho was batang. Hagfataka odi, gwadi bol yap ka daho was batang ka sa hyamo sadili mata, ha bago di lomang fiya fiya, ginya madi ha tomwa bomol ka dihot gim fadwasay mata. ⁴³ Idwa ha fiya fag fon hayo kagbohad dwat. Idwa yadi ha dwat fag fon hayo kagbohad fiya. ⁴⁴ Ka bohad kagfalag no kana fag hayo it fon. Tam idwag bol bohad igos gis fon madogi, idwa yadig fangta manga bohad obas gis hayahaya. ⁴⁵ Ka taw no fiya it ogali, it fwayong fagaba yadi wa fiya, maskin it fagayfanon fagaba wa fiya. Dapat ka taw no dwat it ogali, it fwayong fagaba yadi wa dwat, maskin it fagayfanon fagaba wa dwat. No kindawasta fangayofan, kitonya yadi ka kadog. ⁴⁶ Kana mayon ham no fagabag ngayan angko, Hayo wa Fon, dapat ham idwa katanog angko manga fwayong? ⁴⁷ Ho homalimbawa hayo kawa has fagayo fag manga taw ka omakbang hangko, igtalinga angko manga hampang, hanggan katanog yadi. ⁴⁸ Hanya kito wa sadik taw ka nahodkod abasad hanggan wa nadasog bato, bago di natorok it

balay. Ginya madi, no nabaha, ka danom fadi wad nadalan hanya fag balay, dapat idwan hawig maskin abasad it hodkod. ⁴⁹ Dapat ay, kagtalinga angko mangahampang, dapat idwa katanog, kito sadik taw nahalig balay idwa abasad it hodkod. Ginya madi no nabaha, ka danom no nadalan hanya fag balay, dagos wa nakfo, insarowayan lamang.

7 Ginyas Hisos nontabo wagfaadal tonya fagayo hasta fagdogan, hawas basad banwa Kapirnaom. ² Yabay, sinya ha sadik fagtahinan sondalo taga Roma, mahoway wa dahol hat nasali sogowan ka ha sagit, kaakbang wa kahatay. ³ Ka sondalo fagtahinan no nadog kawa han Hisos, nasogo manga fagtahinan Hodyo tiba, kaarakitay fomwayong han Hisos, Fag hayap ista balay fagtahinan sondalo, fafiyaan nangos it nasali sogowan. ⁴ Ka manga Hodyo no nalag in Hisos, tagfahowayon wa no kampang, iglwang, To fag fagtahinan sondalo fiya wa fagtogbongon, ⁵ kawa hanya kaawa wa dahol intam layonan taw, manga Hodyo. Hanya yadi ka nafahalig intam fanimbaan sas Kapirnaom. ⁶ Ginyas Hisos naofod is taw. Ta no kaakbang wa bangan has fagtahinan sondalo balay, ka fagtahinan sondalo nasogo it manga fakilalaon kaarakitay tomagbo in Hisos, iglwang, Ham fag fwayong kiti han Hisos, Ama, hawag fayaya ngap hyamo, ho kaya wa hyamo, nyawa hadwam dasog hangko balay. ⁷ Aho idwa fiya hampangon ha hyamo, yakanga hodwa has nyamo. Ka fiya, haw fag lomwang yap man kitay, Ka sondalo sogowan fag imfiya wan, ginya hanya fag imfiya ngay. ⁸ Kawa aho sadi yadik taw kagfasakop has manga abwat fag kangayanan, dapat ay, aho ha fagsooon yadi manga sondalo. Aho noglwang ha sadi, Ha fag hanya wan, yakanga hanyan tanog wan. Aho noglwang ha sadi ya, Haw fag hastay, hanyam bangkad wan. Aho noglwang hangko nasali sogowan, Haw fag gibolon kito, hanya omibolon wa tonya. ⁹ Yakangas Hisos no nadog it hampang, indolaw wan, nasayango has fakaaywanan fag manga taw ka goyan hanya, ginyag lwang, Hogfadog ha hayo, hodya ha donggon no kitay iba taw kitonya wa kagsyag angko marigon, nyawa sawan Israil manga hasokfonan. ¹⁰ Ka fagtahinan sondalo manga nasogo haraw, no nwali hasta balay, ta nalag kitay kat nasali sogowan infiya wa yabay. ¹¹ Ngalay di aban is Hisos haya sadik banwa, banwa Nain. It manga katogbong naofod hanya hanggang ka fakaaywanan fag manga taw natahin yadi. ¹² Da Hisos no kaakbang wan has sakbawan alad banwa, ta natoon nahablang ka manga manlobgob sadik ama ka natay. Kat ina danwa balo, hanggan to kasta faglobgobon, it anak ama sadi sadi. Kaaywanon ka gofod hat ina, ka manlobgob. ¹³ Kagfon intam no nalag ka ina balo, in-awa hanya, iglwang has ina, Haw fag idwa goraw. ¹⁴ Is Hisos naakbang a, natawid ka fwalidan natay, yakanga kagdiya intorosan yadi. Is Hisos na-

hampang has natay, nalwang, Bago ama, hoglwang ha hyamo, haw fag kabangon wan. ¹⁵ Ka natay haraw, intokaw ya, dagos wa nahampang. Is Hisos nafaano ya hat ina it anak bago ama. ¹⁶ Ka manga taw indala wa dahol dahol iglag, dapat igfasayagdog yapdi han Diyos, taglwang, In Diyos fangampang sadi, madonong wa dahol, inbangkad hantam. Is Diyos in-awa waglag it sakop. ¹⁷ To kan Hisos naibolon indog wa has fagayo sas sakop Hodiya hanggan sadi wak dahonya banwanan sas ligongan. ¹⁸ Is Hwan kagfatogna manga taw, it manga katogbong nabarita hanya to fagayo kan Hisos naibolon. ¹⁹ Ginyas Hwan nafili it katogbong dow, nasogo hasagfon intam kaarakitay omintaw, Haw awkin kawan Diyos natogon kitay imbangkad hastay, ngatay mi ha fagfanayaon yapdi sadi ya. ²⁰ In Hwan katogbong dow, nondasog han Hisos, nalwang, Is Hwan kagfatogna manga taw itfagonan, nasogo hyami hastay kaarakitay mi omintaw hyamo ngatay haw awkin kan Diyos natogon kitay imbangkad hastay, ngatay mi ha fagfanayaon yapdi sadi ya? ²¹ Gis nanya yadi fag manga masohod, in Hisos nafafiya kaaywanon, ka manga inhori it sagit, hanggan ka ha manga labang kagfahoriyan hanya. Nafafoga ya aywan ka manga bota. ²² Ginya madis Hisos nafwayong has taw, Ham fag goli ya ngawan han Hwan, ham fwayongan ka hayo lagan hanggan donggon. Fag fwayong kitay, ka manga bota infoga ya ngat mata, ka manga infihong it bitis iglahaw ya, ka manga ha kitong infiya yadi wan, hanggan ka manga bongkok igdog ya, ka manga natay inboyag ya, hanggan ka Fiya fag Barita nafaadal has manga myabog yadi. ²³ Ka taw kadwa gadowan igsyag angko bomaya wan. ²⁴ In Hwan manga sogowan nonlahaw wan, is Hisos nafwayong has manga taw kawa han Hwan, iglwang, Kana mayon hyabi, ham no hawas basad fakahyabogan? Kana ka hayo fagasolopon sinya? Ham awkin kasayag lag ka bagyo nogfarayfayan igfarayfayan ka iyano? ²⁵ Kana ham no hanya? Ngatay hayo fagasolopon sinya sadik taw myasa wa fiya it manga solong rotay? Gwadi sawas gorangon balay ka myasa wa fiya it solong rotay, kawa maakwa wa dahol, idwa ha korang. ²⁶ Kana orongan ka hayo fagasolopon sinya? Ngatay in Diyos fangampang sadi? Ala ngay, tonya wan, hanggan hogfwayong ha hayo, ka hayo lagan sinya it kangayanan bohondi kito kan Diyos manga fangampang. ²⁷ Maskin is Hwan kat faglwangon sas Kasoratan noglwang kitay, Fanlag ngay, hogsogo angko sogowan ka gomona hyamo. Hanya mamatalaga hyamo bato lahawan. ²⁸ Hogfwayong ha hayo idya ha anak kansagaya git ina ka abwat man in Hwan it kangayanan, is Hwan kagfatogna manga taw. Dapat, ka ogbot man has fagayo san Diyos sakop it kangayanan, abwat man in Hwan. ²⁹ Ka manga fanohot bohis Roma inaktom has manga taga sinya fag manga taw ig-

fasayagdog in Diyos no nadog in Hisos fwayong. Tonya fag manga taw kan Hwan nafatogna itfagonan. ³⁰ Dapat ka manga Farisiyo hanggan ka mangag faadal Batasan Hodyo igdayo di in Diyos fasadan has taw, idwa yadi han Hwan kaarakitay igfatogna. ³¹ Is Hisos nalwang has taw, Kinda odi kin angko fatoladan ka kati fag manga taw, ham gayfan? ³² Kito odis manga anak matokawan sas famahowayan, igtawag hat manga ofod anak, iglwang, Mi fadi wad nafaoni palawta, dapat ham kafang digtayok. Nyawa hami nangodgorawan, ham kafang yadi goraw. ³³ Kawas Hwan, kagfatogna manga taw nonbangkad hyabi, nomtoon idwa kwan hanon kaarakitay mandarangin mahogod, idwa yadi ginom alak. Yakanga ham iglwang kitay Labang wa kagfon hanya. ³⁴ Ginya madi, aho man, Kanbali Taw, inbangkad hastay, kwan yadi hanon hanggan ginom kitos iba taw, ginya ham iglwang, Yabay, to fag taw mahogod wa kwan a, iglango ya ngadi, koyog yadi has manga fanohot bohis Roma, hanggan has tiba taw ka ha dwat fag manga ogali. ³⁵ Nyawa ham iglwang kitonya, in Diyos manga anak ogali kagfatohoyan kitay in Diyos kadonongan myasa wa fiya. ³⁶ Ginya madi aban, sadik Farisiyo nataban in Hisos hat balay kaarakitay manayowan kwan. Is Hisos hawas balay Farisiyo a, masorayan dayo fanganan. ³⁷ Sinya fag banwa ha sadik ina, manga taw twa wa kitay dwat wa dahol it ogali. Tonya fag ina nadog kitay is Hisos kwan sas balay Farisiyo, yakanga ka ina nadiya sadik sohadan, alabastoro fag bato, napno famabanglo. ³⁸ Ka ina naakbang han Hisos dayo goyoy hat akbang bitis. Ka ina goraw a, dagos wagfayamos wan in Hisos bitis it lowa, ginya madi it famyad it bok wan, naayok ya ngadi in Hisos bitis, ginya nalidgid ya ngadi famabanglo. ³⁹ Ka Farisiyo kagtaban in Hisos hat balay, no nalag ka ina ibolon, it fangayofan iglwang, To fag ama non Diyos wa fangampang orongan, hanya fadi wad twa no faktaw, hanggan no kindat ogali ka ina kagsapkid hanya, gwadi dwat wa dahol it ogali. ⁴⁰ Is Hisos nasagot in Simon fagayfanon, nalwang, Simon, aho ha fagfwayongon hyamo. Is Simon iglwang, Haw kagfaadal, kana ara tonya? ⁴¹ Is Hisos igtoltol kiti, Ha dowak taw ha bayadan ha sadik taw. Ka sadi kat bayadan limak daan dinaryo, insadi lima dik safolok dinaryo. ⁴² Ta nodwa nasyagan nabayad, ka nafaoyam idwa yadi nasohot ka fagayo dow. Da fag taw gis dowak taw ka ha bayadan kwarta ka bohondi kito ka sadi nogbaya ka nafaoyam? ⁴³ Is Simon nasagot, Angko fangayofan kagbaya wa dahol hanya, ka dahol it halga kat bayadon. Is Hisos nalwang, Anod, tonya wa ngay. ⁴⁴ Ginyas Hisos igbantay has ina a, dapat iglwang han Simon, Ha awkin iglag to fag ina? Gwadi aho nonsakbaw ha hyamo balay, hadwa nadisag angko danom fanggonaw angko bitis, dapat to fag ina nafayamos it lowa angko bitis, it famyad it bok ya ngadi. ⁴⁵ Hadwa yadi naayok angko,

dapat aho indasog di ngay, idwa nafagomon naayok angko bitis. ⁴⁶ Hadwa yadi nalidgid langis olibo angko alfoyo, dapat hanya nalidgid famabanglo angko bitis. ⁴⁷ Yakanga hogfwayong ha hyamo, maskin hanya galwasi wa dahol angko, kalag wa kitay fagayo it manga naogali dwat kaaywanon, inliyam wan. Dapat ay, no sayok ista naogali dwat kanliyam, idwa bangan igfalag kitay hanya galwasi angko. ⁴⁸ Ginyas Hisos nafwayong has ina, Im manga naogali dwat fagayo inliyam wan. ⁴⁹ Ginya madi ka mangag sayo in Hisos, it manga fangayofan iglwang, Kana mayon to fag ama nogfaliyam ista manga naogali dwat, fakta kin nangos tonya? ⁵⁰ Dapat is Hisos nalwang has ina, Maskin haw igsyag hangko haw inbawi wan, nyawa ha mwali wan kati, im fangayofan inhoway wan.

8 Ginya madi, idya dogay aban, is Hisos nanabang has iba banwanan a, nasafong wan ka manga banwa hanggan ka manga forowan balay sas dayo banwa. Natoltol hanggan nafaadal ka Fiya fag Barita kawa han Diyos sakop baliwa. Ka Safolo-ha-Dowa nahin yadi wan Hisos. ² Ha manga ofod yadi ina kan Hisos nafafiya it sagit hanggan nafalagyo ka manga labang. To fag manga ina kawa da Mariya taga Magdala, fitok labang kan Hisos nafalagyo ginya fag ina, ³ hanggan da Hwana, in Kosa babay. Is Kosa in Gorangon Hironis katogbong. Da Sosana hanggan aywan yapdi ka tiba ina. To fag manga ina natogbong in Hisos hanggan hat manga katogbong kawa gista sadili manga kaakwaan. ⁴ Ginya madi, gi sadik banwa, gi sadik banwa, manga taw kabarangkadan wan, gakbang han Hisos. Ginyas Hisos natoltol to fag halimbawa, ⁵ Sadik ama fangiyab hawat namay kaarakitay mamamgas. Hanya nogfamgas, igsabod odit binhi, yakanga tibak botol indagdag has boknga dalan a, ta nalid lamang, yakanga ka manga manok nahwan wa tonya. ⁶ Ha akwa yadi manga botol indagdag has daga libabaw, baba odi dalifi. Tonya natobo ongay, dapat inlayong ya, maskin ka daga kamaya madali. ⁷ Ha manga botol yadi indagdag ha sayo manga lamnon madogi. Ka manga lamnon inlangba, nasakfaw di ka manga tanom. ⁸ Dapat ay, ha akwan dagdag has fiya fag daga a, natobo, nabohad, fagayo fag bolhog myasa sadik daan no nabohad. Ginyas Hisos nafwayong marigon, Ham no ha manga talinga ya ngadi, fag talinga wan. ⁹ In Hisos manga katogbong naintaw in Hisos no kanat kahologan it natoltol halimbawa. ¹⁰ Is Hisos nasagot, Indisag wa ha hayo kitay ham fag tomwa ka mangadyag fadogon kawa han Diyos sakop baliwa, dapat ka tiba, kawa gis manga halimbawa ta no domog kaarakitay, Nyawa ta bomantay, tadwa twaglag, Nyawa tagtalinga, tadwa yadi twagdog. ¹¹ Is Hisos igfadagos yapdit hampang, nalwang, Kito kat kahologan ka halimbawa. Ka binhi in Diyos wa hampang. ¹² Ka botol kandagdag has boknga dalan kawa ka mangag talinga, dapat is Fandaya inda-

sog igfaliyam gista basad fangayofan kan Diyos hampang kaarakitay tadwa katiwala in Diyos, idwa yadim bawi. ¹³ Ka mangan dagdag sas daga libabaw baba dalifi, kagtalinga in Diyos hampang a, igtanggap wa ongay, masolong wan, no kitay di, dapat idwag dalid abasad sat fangayofan. Sadik ngalay intiwala wan, dapat no hagsolay is taw, tagdayo wa dagos.

¹⁴ Kandagdag ha sayo manga lamnon madogi, igfahalimbawa ka mangag talinga ongay, dapat ay, kat manga fagisipon fagaba hat manga kakorangan, ngatay has kaakwaan, ngatay has kasolongan baliwa, igsakfaw di in Diyos hampang, yakanga idwag bohod sasta basad fangayofan. ¹⁵ Dapat ay, kansabod sas fiya fag daga, kawa mangag talinga han Diyos hampang, gano tonya fiya fiya sasta basad fangayofan, matanogon hanggan malinay. Ta gagwanta yadi, yakangan Diyos hampang igbohod sat manga ogali. ¹⁶ Tam idwag santik salong ginyag fwalid sas daga polahan, ngatay sas daga igyanan. Yatokitay tam igsalifit ka salong sas salangan kaarakitay nyawa faktaw kagsakbaw lomag mayawa. ¹⁷ Idwa ha matagowan kadwam lag aban, idwa yadi ha mafyaloman kadwam dog, hanggan imdiya has faglagan aban. ¹⁸ Maskin ngay, ham fag matagahan no kinday ham nogtalinga. No ka ha akwa, ha tanggapon ya domwag, dapat kadwa ha akwa, nyawa hanya gayfan ha akwa wa ogbot, imbol di tonya aban. ¹⁹ Ginyan Hisos ina hanggan it manga fadwasay inbangkad han Hisos, dapat tadwa syagan gakbang hanya kawa aywan wa dahol fag manga taw. ²⁰ Ka manga taw iglwang han Hisos, Im ina hanggan im manga fadwasay sawas sokayan kasaya hono lomag hyamo. ²¹ Dapat is Hisos igsagot has taw, Ka mangag talinga in Diyos hampang hanggan katanog, tonya wa kangko ina hanggan angko manga fadwasay. ²² Ginya madi aban, is Hisos hanggan it manga katogbong, nasahay has basad baloto. Is Hisos iglwang, Tam domifay wa has difay linaw. Yakanga tan-ginan wa ngay. ²³ Ka baloto noglahaw wan, is Hisos intoyog wan. Ginya madi araw nabagyo dahol dahol sas baba linaw. Ka baloto kapno wa danom, yakanga ta ganong wamlomogom has daga danom. ²⁴ In Hisos manga katogbong nafolaw hanya, taglwang, Hyami Fon, hyami Fon, kalibang, tam kalogom wan ha daga danom. Is Hisos infolaw wan, nangabaya ka bagyo hanggan ka taob kagsaribwaan. Ginya madi intohas ya. Yabay inhalyaw ya ka dagat. ²⁵ Ginyas Hisos iglwang has taw, Kana ham nodwag syag angko? Dapat ay tandolaw waglag a, tandala yadi wa dahol, ta garintawan ha sadi ha sadi kitay, Yabay, faktaw to? Twa oman igfatohas ka bagyo, manga taob, ta katanog wat manga fwayong. ²⁶ Ginya madi araw tandagsa sas banwanan manga Girasino, sas masohod yadi sakop Galiliya. ²⁷ Is Hisos indokson di ngay, ha natagbo hanya sadik ama gis banwa, ha manga labang kagfahoriyan hanya. Tonya fag ama do-

gay wan fawag solong rotay, idwa goli hat balay, sa odi sayo manga lohob fanlobgobanan taw. ²⁸ Ka ama no nalag in Hisos, narokyaw marigon a, nanlibabaan san Hisos atobangan, iglwang, Hisos, is Diyos, ka Abwat-man-has-fagayo-fagayo, it Anak, kana haw nogmawat angko? Hogfaaronanon hyamo kitay, ha fag idwag fahoriyan angko. ²⁹ Hanyag lwang kitonya maskin haraw is Hisos nasogo ka labang kitay fag galin wa gis nyamo fag ama. Nogbanwan ka labang mahogod wagfahoriyan ka ama, hanggan nyawa haggantay di hanya, nyawa tagbinggas, nyawa ta gafos wa manga lobid baol, hanyag bogloy lamang tonya, ginya ka labang igfatabog hanya has basad fakahyabogan. ³⁰ Ginyas Hisos naintaw hanya, Faktam ngayan? Maskin aywan fag manga labang kagfahoriyan tonya fag ama, hanya nasagot han Hisos, Ahos Mahabanan. ³¹ Ka manga labang igfaawaon han Hisos kitay, Haw fag idyag sogo hyami has fakaabasadan. ³² Gis nanya ha sadik tifonan baboy ayo ayo kwan manga lamnon sas akbang fag moyod. Ka manga labang nafaaronan in Hisos kitay, Mi fag ha yap man has basad manga baboy nangos, yakanga is Hisos nafaangay wa ngay. ³³ Ginya ka manga labang nalin gis ama, hawas basad manga baboy. Ka tifonan manga baboy dagos nanhadalandanan wa madali has lwad indahodan, has basad linaw dahol, fagayo inlimos wan. ³⁴ Ka manga gano ista tifonan baboy no nalag ka manga baboy inlimos, ta nalagyo wan, namarita has manga basad banwa hanggan sas ligongan. ³⁵ Ka manga taw inbarangkadan namantay no kana ka sinya. Ta nondasog han Hisos, taglag ka ama ka ha manga labang haraw. Kati matokawan san Hisos dayo bitis, ha solong rotay a, it fangayofan ogali mandi. Tandala waglag. ³⁶ Ka manga nalag is Hisos nogfafiya ka ama natoltol has taw no kinda mayon nonfiya ka ama ka manga labang fagfahoriyan haraw. ³⁷ Ginya madi ka manga taw gis sakop banwanan manga Girasino fagayo nanagad kitay is Hisos fag lahaw gista banwanan kawa tandala wa dahol dahol. Yakanga da Hisos nasahay ya ngawa ha basad baloto a, infwali wan. ³⁸ No kitay di ka ama ka manga labang nagalanan haraw, garonganon wa kasaya mahin in Hisos, dapat is Hisos nafaoli yapdi, iglwang, ³⁹ Haw fag goli yapdi, haw fag toltol yap has taw kan Diyos naibolon kafiyaon ha hyamo. Ginya ka ama nwali wa ngay, igbarita has taw sadik dahonya banwa in Hisos naibolon ha hanya kafiyaon. ⁴⁰ Ginya madi, da Hisos nonfwali ya has difay linaw, ka manga taw igbaya waglag in Hisos, kawa fagayo fagayo fag manga taw igfanaya hanya. ⁴¹ Ginya madi ha sadik ama, is Hayro, kagbahala sas fanimbaan Hodyo, indasog han Hisos, nanlibabaan san Hisos atobangan, igfaaronanon kitay, nangos fag hayap it balay. ⁴² maskin it anak ina sadi sadi, manga safolo ha dowak fangaraw it kadogayan, kafos wa ip-

saw. Is Hisos noglahaw yapdi, manga taw igdarotdotan wa hanya. ⁴³ Ha sadik ina mahoyogan yadi has taw, safolo ha dowak fangaraw idwa kafiya no kasagit ina. It manga botang namin wan kawat bayad nogfabolong has taw, dapat idwa ha syagan igfafiya hanya. ⁴⁴ Ka ina naakbang han Hisos gis ginanan, dayo goyoy, nasapkid in Hisos tobwan tobwan rotay, ginya madi dagos wanfiya it sagit ina. ⁴⁵ Ginyas Hisos naintaw has taw, Fakta ka nasapkid angko? Idwa ha nabaya, yakangas Pidro nalwang, Angko Fon, maskin ka fakaaywanan igligong wa hyamo, taw igdarotdotan wan, ta natanog odi hyamo rotay. ⁴⁶ Dapat is Hisos iglwang, Hogdog ha natawid angko. Hogdog hanbol wa karigonan gingko. ⁴⁷ Ka ina no natwa kitay idwa syagan igfyalom it naibolon, naakbang han Hisos, nanlibabaan hat atobangan, karokog wa kadala. Sasta fagdogan fagayo, ka ina nafwayong no kana mayon no nasapkid in Hisos, hanggan no kinday nonfiya wa dagos. ⁴⁸ Is Hisos iglwang hanya, Anak ina, maskin hagsyag angko, haw infiya wan. Nyawa ha goli wa kati, im fangayofan fag imhoway wan. ⁴⁹ Is Hisos no kampang yapdi has ina, sadik ama inbangkad gin Hayro balay. Nafwayong han Hayro, Hyamo anak ina natay wan. Hawag falibang yapdi kagfaadal has taw. ⁵⁰ Is Hisos no nadog di ngay tonya, nalwang han Hayro, Haw fag idwa kadala, haw fag syag di ngay hangko, ginyam anak imfiya ya. ⁵¹ Da Hisos nondasog hasta balay, idwa nafaofod istaw has basad balay, no bohonwa da Pidro, da Hwan, da Santyago, hanggan ka anak ina it ama hanggan ina. ⁵² Fagayo fag manga taw ka sas sokayan igwaraywayan wan, ta goraw wan ka anak natay. Dapat is Hisos iglwang, Ham fag idwa goraw, ka anak idwa natay, matoyogan di. ⁵³ Dapat ta kasay odin Hisos maskin ta natwa kitay ka anak ina natay wan. ⁵⁴ Dapat is Hisos natawid ka anak ina gamat, ginya nalwang, Anak, haw fag kabangon wan. ⁵⁵ Ginya madi ha ipsaw ya, inbangon wa dagos. Is Hisos nalwang ya has taw kitay, Ham fahwanan fafa has anak ina. ⁵⁶ It manga magorang indolaw wan dapat is Hisos natogon has taw kitay, Ham fag idwag fwayong nyawa haday ka hayo mata lagan.

9 Ginya madi sadi ya ginan is Hisos nafatifonan ka Safolo-ha-Dowa, nafalobos has taw it kadonongan hanggan kangayanan igfalagyo manga labang gis taw, hanggan igfafiya yadi ka ha manga sagit. ² Is Hisos nafalahaw it manga katogbong kaarakitay igtoltol has taw kawa han Diyos sakop baliwa, hanggan fafiya yadi ka manga ha sagit. ³ Is Hisos natogon kitay, Ham fag idwa ha balon nyawa kana, ham noglahaw, nyawa sokod, nyawa boyog, nyawa fanganon, nyawa kwarta, nyawa hayo tobos rotay, fag idwa ha diya. ⁴ Nyawa siday hayo nagdasogan fag balay, ham fag sinya wak gigya ham nodyag lahaw ginya fag banwanan. ⁵ No sida fag foro taw nodwag fasakbaw hayo,

ham no lomahaw ginya, fadagdagan ka fogis daga gi hayo manga bitis, bilang wagfaayfan ka taga sinya fag manga taw. ⁶ Yakanga ka manga katogbong inlahaw wan, hawas manga forowan balay sas ligongan, igtoltol ka Fiya fag Barita nyawa haday, igfafiya yadi ka manga ha sagit. ⁷ Gis nanya, is Hirodis ka gorongan sas sakop Galiliya no nadog fagayo kan Hisos naibolon, gadowan it fangayofan maskin tibag lwang kitay, is Hwan inboyag ya kagfatogna manga taw hyabi. ⁸ Tibag lwang is Iliyas inlag ya. Tibag lwang in Diyos fangampang sadi hyabi, kati inboyag ya. ⁹ Yakangas Hirodis iglwang, Gwadi ho nafalifong wan in Hwan liyog. Fakta fag taw is nyamo hayo fagbaritaon ka gibolon kitonya? Yakangas Hirodis gwayan wa kasaya lomag in Hisos. ¹⁰ Aban, ka manga Fandiya-Barita no nwali wan, ta natoltol han Hisos it manga naibolon fagayo. Ginyas Hisos nafasaman yapdi gis fakaaywanan, nataban ka Safolo-ha-Dowa hawas sadik banwa, banwa Bitsayda. ¹¹ Ka fakaaywanan fag manga taw no natwa kitay hanya wan, ta ngap naoyan ya inda Hisos. Is Hisos igbaya di ngap iglag ka manga taw ta nondasog wan. Is Hisos natoltol has taw kawa han Diyos sakop baliwa a, nafafiya yadi ka ha manga fagdogon. ¹² Araw, myanit no kalibaba wan, ka Safolo-ha-Dowa naakbang han Hisos, nalwang, Falahawan yap nangos has manga tifonan balay sas ligongan ka manga taw, kaarakitay ta somayak it hanon hanggan it manga toyogan. Tam istay sawas basad fakahyabogan. ¹³ Dapat is Hisos nalwang, Fag ham wa ka domisag fanganon has taw. Taglwang han Hisos, Tam idwa hanon nodwa limak tinapay, dowak oyang odi, mi nodwa hawas tindahan somali fanganon kaarakitay has manga taw fagayo. ¹⁴ Maskin ka manga ama sinya manga 5,000. Dapat is Hisos iglwang hat manga katogbong, Fatokawan ngakin ka manga taw malayonan, myasa limak safolo ka sadik layonan. ¹⁵ Tantanog wan, yakangan tokaw ngay fagayo. ¹⁶ Is Hisos nabol ka limak tinapay hanggan ka dowak oyang, natangdan has tongod a, nabaya han Diyos ka fanganon, nafaarogbotan, ginya nadisag hat manga katogbong kaarakitay homoray has manga taw. ¹⁷ Fagayo nahwan wa a, napsog wan. Ka manga katogbong natifon ya kasta sawad nakanan mafaarogbotan, safolo ya ha dowak boyog ka napno. ¹⁸ Ginya madi aban, is Hisos nogdarangin sadi sadi, it manga katogbong sinya yadi wan. Araw is Hisos gintaw hat manga katogbong, Fakta hono aho, manga taw noglwang? ¹⁹ Ta nasagot, Tibag lwang kitay haw is Hwan kagfatogna manga taw hyabi, intibag lwang haw is Iliyas, intibag lwang haw kan Diyos fangampang sadi hyabi inboyag ya. ²⁰ Ginyas Hisos naintaw, No ham kaglwang, faktaw aho, ham gayfan? Is Pidro nasagot, Haw wa kan Diyos-natogon-Famawi. ²¹ Is Hisos natogon marigon hat manga katogbong kitay, fag idyag fwayong nyawa hada fag taw kitay hanya

kan Diyos-natogon-Famawi. ²² Ginyas Hisos nafwayong kitay, Aho Kanbali Taw aywan angko fagagwan-taon manga mahori aban. Ka manga fagtahinan sas banwa, hanggan ka manga fagtahinan fagalan-han-Diyos, hanggan ka mangag faadal Batasan Hodyo domayo hanggan wa fahatay angko. Dapat ay, aban, sas fatolo fag sirang ahom boyag ya. ²³ Is Hisos nafwayong has fagayo, Nyawa faktaw no kasayag tahin angko, falibangan fagaba it sadili fakasayaon, fasanan it sadili fatimbangan hayo sirang sirang, ginya madi tahinan wangko. ²⁴ Not sadili haboyagan it fagfahalgan, tonyam liyam di, dapat ay, kadwa kwangit it haboyagan kawa hangko, it haboyagan idwam liyam. ²⁵ Kana kat fakinabangon, ham gayfan, sadik taw no omafo sadi wak dahonya baba daga, halimbawa, dapat ay, it sadili haboyagan nomliyam di aban? Yatokitay idwa ha fakinabang. ²⁶ Aho, Kanbali Taw, nombangkad ya aban, malagan sangko angko kafiyon, hanggan angko Ama kafiyon hanggan ka manga maliyaw fag anghil kafiyon. Gis nanya aban ho maya wagfadog ista ngayan nyawa faktaw, hanya no kayag fadog angko ngayan hanggan angko manga hampang has manga taw kati fag masohod. ²⁷ Dog ngay, bonwa bohag, tiba taw kastay idya matay nodya lomag in Diyos sakop. ²⁸ Ginya madi yabay, nonsagaya manga walok sirang is Hisos no natoltol kitonya, hanya nataban inda Pidro da Hwan da Santyago, hawas moyod kaarakitay mandarangin. ²⁹ Is Hisos nogdarangin yapdi, it walong in-oman, fiya wa dahol kabantay, it rotay in-abohay wa dahol, masilaw wan. ³⁰ Yabay ha dowak ama, da Mwisid da Iliyas, dagos wanbangkad, nangampangan han Hisos. ³¹ Ka gim tongod fag kafiyon kalag sanda Mwisid. Inda Mwisid da Iliyas fagtoltolon kawas Hisos lomahaw wa aban ka kaakbang wamlag sas banwa Hirosalim. ³² Da Pidro intoyog wa fiya fiya gis nanya, dapat ay, ta nonfolaw, ta nalag in Hisos kafiyon hanggan ka dowak ama ka malindogan sat akbang. ³³ Ka dowak ama no kalahaw wa gin Hisos akbang, is Pidro nafwayong han Hisos, Yabay, hyami Fon, kafiyaon, tam fag istay yapdik madogayan. Mi fomalo tolok dongdongan, insadi hyamo, insadi in Mwisid, insadi in Iliyas. Ka orongan wan is Pidro idwa yadi natwa it bato lwangon. ³⁴ Is Pidro no kampang yapdi, sadik linyabo dagos wa nalanbong is taw, yakanga tandala wa dahol dahol. ³⁵ Gis basad linyabo ha nahampang, iglwang kiti, To angko wa Anak, angko wa nafili. Fag tonya wan ka hayo fagtalingan. ³⁶ Ka hasnog nontohas wan, yabay tadwa ha lagan taw no bohonwas Hisos lamang. Tadwa naawang, tadwa ha nafwayong yapdi gis nanya ista manga mata lagan nyawa haday fag taw. ³⁷ No bago wa marom da Hisos no nwali wa has lwad, kaaywanon fag manga taw natagbo hanya. ³⁸ Ha sadik ama sas basad fakaaywanan natawag marigon, iglwang, Haw kagfaadal, bantayan nangos angko anak ama,

kawangko anak idwam dow. ³⁹ Labang kagfahoriyan hanya, sadi odi ginan igrokyaw. Ginya kidkisayan wan hanggan wat bibig igboraan wan, igfabaran wat sadili habilogan. Ka labang kafang wa galin gi hanya. ⁴⁰ Hogfaaronan ha hyamo manga katogbong kitay, ta nangos faalinan wa ka labang, dapat tadwa nasyagan nafaalin. ⁴¹ Is Hisos nalwang has taw, Ham kawa ka kati fag masohod fag manga taw dwat wa dahol, kawa ham idwa yadig syag angko. Ginahin ya kin nangos aho fag omofod yapdi hayo, ham gayfan? Kandogay day aho fag gagwanta yapdi hayo? Ginya nalwang has ama, Tabanan im anak hastay. ⁴² Ka anak no kaakbang wan Hisos, ka labang nafahakfo hanya ha baba daga, yakanga nangidkisayan ya ngawan. Is Hisos nangabaya ka labang, nafafiya ka anak, ginya nafaano ya hat ama. ⁴³ Ka manga taw indolaw wan in Diyos dahol fag kadonongan. Fagayo fag manga taw no kadolaw yapdin Hisos manga naibolon fagayo, is Hisos nalwang hat manga katogbong, ⁴⁴ Ham fag matohodan angko fwayong kitay, angko ofod im-oyon angko manga kalaban aban, fagamat has taw angko, aho Kanbali Taw. ⁴⁵ Dapat tadwa natwagdog kan Hisos faglwangon maskin is Diyos idyag faangay kitay ta fag tomwagdog it kahologan, hanggan ta kadala yadi gintaw hanya. ⁴⁶ Araw ogbot in Hisos manga katogbong igdaraogan no fakta sas taw ka abwat it kangayanan. ⁴⁷ Is Hisos no nasarom ista manga fangayofan, nagamit sadik anak ogbot a, nafalindog sat akbang. ⁴⁸ Ginyas Hisos nalwang has taw, No faktaw kagtanggap to fag anak maskin galwasi angko, aho yadi kat fagtanggapon. Kagtanggap angko, igtanggap yadi kagsogo angko. Ka ogbot man sa hayo it kangayanan, tonya ka dahol man has fagayo it kangayanan. ⁴⁹ Is Hwan nafwayong in Hisos kitay, Hyami Fon, mi nalag sadik taw ka gwas hyamo ngayan nogfaalin ka labang. Mi nabando hanya maskin idwa gofod intam. ⁵⁰ Dapat is Hisos iglwang kitay, Ham fag idwag bando hanya maskin kadwag laban intam, intam yadi wa kaoyon. ⁵¹ Is Hisos no kaakbang wa aban kaalin han Diyos banwanan ham tongod, hanyag tikis waglahaw has banwa Hirosalim baliwa. ⁵² Nafagona wa ka tiba. Tanlahaw wa ngay hawas sadik tifonan balay sas sakop Samariya, kaarakitay mamatalaga in Hisos bato hadasogan. ⁵³ Dapat ka manga taga Samariya kafang igtanggap in da Hisos maskin tagdog it hadasogan orongan hadis Hirosalim. ⁵⁴ Da Santyago da Hwan no natwa kitay ta kafang igfasakbaw in Hisos, taglwang, Hyami Fon, haw aw igfaangay di mi nogfadagdag afoy gis tongod kaarakitay tamsonog? ⁵⁵ Dapat is Hisos nabaringan dit liyog, nangabayas taw, nalwang, Ham idwa twa no kin day hayo manga fangayofan. Maskin aho, Kanbali Taw, inbangkad hastay, bohonwa kitay domaog manga taw, yatokitay, ahon bangkad kaarakitay bomawi manga taw. ⁵⁶ Yakanga ta nafadagos it lahawan ha sadi yak ti-

fonan balay. ⁵⁷ Ta noglahaw yapdi, ha taw ya ngag lwang han Hisos, Ho mahin yadi wa hyamo nyawa ha hadawan. ⁵⁸ Dapat is Hisos nasagot hanya, Ka manga ido maisog ha oliyanan basad lohib, ka manga manok ha fogad yap man, dapat ay, aho, Kanbali Taw, idwa ha toyogan idwa ha fahowayan. ⁵⁹ Is Hisos iglwang ha sadi yak taw, Ha tahinan wangko. Dapat ka taw nasagot, Angko Fon, ha faoliyan yapdingko, ho manlobgob yap angko ama. ⁶⁰ Dapat is Hisos nafwayong hanya, Ha fabayaan yapdi ka manga mahatayan, ta bahala waglobgob it sadili kapariho ka natay. Dapat kawa haw, haw fag lahaw wan, haw fag fadog has taw kawa han Diyos sakop baliwa. ⁶¹ Insadig lwang, Angko Fon, ho tomahin wa hyamo, dapat ay, ha faoliyan yapdingko, ho manogon yap angko manga iba. ⁶² Is Hisos iglwang, Nyawa faktaw nogtawid togda bago bago, mananom nangos, ginya haglibang yapdi hanya, idya maangay san Diyos sakop.

10 Ginya madi aban, kagfon intam nafili ya fitok safolo ha dowak manga katogbong. Is Hisos nafagona was taw ha banwanan ha banwanan, myasa dowak taw, han Hisos bato hadasogan aban. ² Is Hisos nafwayong has taw, Kaaywanon ka aniyon kati, dapat ay, sayok di ka manga fangani. Yakanga ham fag darangin hasagfon namay kaarakitay somogo ya ka manga fangani hat namay. ³ Hogsogo hayo igbarita, ham fag lahaw wan. Yabay, aho nogsogo hayo, ham bilang wa manga anak topa, magop magop, sas fagbokngan ido maisog. ⁴ Ham fag idwag diya sokloban, nyawa bay-ong, nyawa lapak. Ham fag idwa kalibang igtoltolan boknga dalan, nyawa faktaw. ⁵ Nyawa haday fag balay ham nomdasog, fag lwang yap has taw, In Diyos kahowayan fag somakop hayo talanahan nangos. ⁶ Kagfon balay sinya no kasaya kahowayan, im kahowayan somakop hanya, dapat ay, nodwa kasaya kahowayan, yadwa somakop. ⁷ Ham fag sawa hayo nagdasogan fag balay. Ham fag sinya wak kwan, manga ginom, nyawa kana kasta nadisag, maskin ka fangibolon idwa kayag tanggap it tangdan. Ham fag idwa galin galin, ha balay ha balay. ⁸ Nyawa haday fag banwa hayo hadasogan, ta nogtanggap hayo, ham fakwan ista disag fanganon, nyawa kana. ⁹ Fafiyaan ka manga ha sagit sinya. Faglwang yadi has taw sinya fag banwa kitay, In Diyos sakop kaakbang wa has taw. ¹⁰ Dapat nyawa siday fag banwa ta nodwag tanggap hayo, ham sagayaan wa ginya, ham fag lwang, ¹¹ Ngadi hayo lotok kantokba sa hyami yapyafa migfadagdag wan, bilang wagfaorongon kitay ham dayog dog hyami barita. Dapat ham fag twa wa kitay in Diyos sakop naakbang hayo banwanan. ¹² Hogfwayong ha hayo ka manga taw sinya fag banwa it fadosa aban mahori man has fadosa manga taga banwa Sodoma hyabi. ¹³ Isyay wa, isyay wan, haw banwa Korasin. Isyay wa, isyay wan haw, banwa Bitsayda, maskin ka manga

taga Tiro, hanggan taga Sidon, no nalag di ka hayo manga lagan madolaw, ta dan wa nasolong manga sako hyabi yapdi, hanggan natokaw sas fogis dafog, kaarakitay igfalag kitay tagsoyo wan. ¹⁴ Dapat aban, sas Sirang Fangabayan, ka fadosaan kamtohoyan ha hayo bohondi kito kamtohoyan has manga taga Tiro hanggan manga taga Sidon. ¹⁵ Haw yadi, banwa Kapir-naom, Haw aw kasayag faabwaton hyamo han Diyos banwanan sam tongod? Dapat ho fadagdag lamang hyamo hawas Daga Salad. ¹⁶ Ginyas Hisos nafwayong hat manga katogbong, Kagtalinga ha hayo, igtalinga yadingko. Kagdayo hayo, igdayo yadingko. Hanggan kagdayo angko, igdayo yadi kagsogo angko. ¹⁷ Ginya madi aban, ka Fitok-Safolo-ha-Dowa no nwali han Hisos, igbaya wa dahol dahol, taglwang, Hyami Fon, hami nogngayan hyamo ngayan, nyawa ka manga labang galin wan. ¹⁸ Is Hisos nasagot has taw, Ho nalag was Satanas no kadagdag gis banwa sam tongod, bilang wa hilat gim tongod has daga. ¹⁹ Yabay, ho nafalobos hayo angko kangayanan nyawa ham lomid manga abyanon, manga inonay, hanggan domaog intam kalaban karigonan, ham idwam kinday. ²⁰ Nyawa kitonya, hayo fagbayaon fag bohonwa kitay kawa ham igfaalin labang, dapat kawa hayo manga ngayan insorat san Diyos banwanan sam tongod. ²¹ Gis nanya mandi fag masohod, ka Maliyaw fag Falad kasolongan sawan Hisos fangayofan sadi wak dahonya. Ginyas Hisos iglwang, Mama, haw kagfon im banwanan sam tongod hanggan ka daga, hogbaya hyamo maskin no hadis manga madonong, manga ha nagadalan, hadyag fatwagdog to fag manga kadonongan, dapat hagfatwagdog fiya fiya has manga taw kat fangayofan kito yadis manga anak it fakatwawon. Anod, Mama, maskin kitonya ngay kam fakasayaon. ²² Ginyas Hisos nalwang has taw, Angko Ama ka nafaano hangko fagayo fag manga kadonongan. Idwa ha kilala angko, in Diyos Anak, no bohonwa angko Ama. Idwa yadi ha kilala in Diyos angko Ama, no bohonwa aho kat Anak, hanggan no kayoday angko faangayon mamahilala has taw angko Ama. ²³ Is Hisos insayangowan hat manga katogbong, ginya, idwa sasta fagdogan fakaaywanan iba taw, nalwang, Ham igbaya wan ka hayo mata lagan madolaw kati. ²⁴ Kawa hogfwayong hayo, aywan in Diyos manga fangampang hanggan manga gorongan hyabi kasaya wa dahol lomag ka hayo lagan kati, no kitay di, dapat tadyapdi nalag hyabi. Ta kasaya nangos fag domog haraw ka hayo donggon kati, dapat tadyapdi nadog hyabi. ²⁵ Ginya madi sadi kagfaadal Batasan Hodyo naakbang han Hisos kaarakitay igsolay hanya, iglwang, Haw kagfaadal, kana araw kangko bato ibolonon kaarakitay ho lomag haboyagan kadwa ha katabowanan? ²⁶ Is Hisos nasagot, Kana kansorat sas Batasan Hodyo? Kana kam nabasa sinya? ²⁷ Hanyag lwang, Haw fag galwasi in Diyos kagfon hyamo, sadi

wak dahonya fangayofan, sadi wak dahonya karigonan, sadi wak dahonya isip, hanggan fag galwasi im kapariho kito yadim sadili. ²⁸ Is Hisos iglwang has ama, Im sagot idwa nalway, fag kitonya wa kam fakatanogon, ginya hamboyag wan. ²⁹ Kagfaadal Batasan Hodyo kafang yapdi kadaog sas toltol, yakanga naintaw ya domwag in Hisos, Fakta kangko kapariho nangos? ³⁰ Is Hisos nafahalimbawa, nasagot, Ha sadik taw iglahaw gis banwa Hirosalim hawas lwad has banwa Hiriko. Nahablang manga tolisan boknga dalan. Ta nabol wat balokas a, nabakbak ya ngadi ka ama. Ka ama bilang wa mahatayan, ka tolisan no naobon wa hanya. ³¹ Natoonan araw ogbot, ha sadik fagalan-han-Diyos nadalan sinya. No nalag ka ama mafolidan, hanya nabaybay lamang sas bali karsada, igfadagos it lahawan. ³² Ginyan Libi hasokfonan sadi igdalan yadi sinya, nalag yadi ka ama mafolidan, dapat nabaybay yadi wan. ³³ Ginya madi araw araw, ha sadik taga Samariya igdalan yadi sinya. Noglag ka tolisan nahablang, hanyan awa waglag. ³⁴ Naakbang hanya a, nalidgid lana hanggan alak hat manga baran, nata-mong, nafasahay wa ka ama hat baba habayo, ginya nadiya hasta fandasogan fag balay, hanggan naano yadi sinya. ³⁵ No bago wa marom hanyag bangkad dowak kwarta dinaryo, igdisag hasagfon balay. Hanya nogtogon, iglwang hasagfon balay kitay, Ha anowan to fag taw. No kayoday ka korang, ho bomayad ya hyamo, ho nogdalan ya aban, aho no goli. ³⁶ Ginyas Hisos naintaw hasagfaadal Batasan Hodyo kitay, Faktaw sinyas tolo kagdalan hasta nadaog kagfalag kitay hanyag fapariho wan has taw ka manga tolisan nahablang, ha gayfan? ³⁷ Kagfaadal Batasan Hodyo iglwang, Kan-awa hanya kagfalag kitay igfapariho wan. Ginyas Hisos iglwang hanya, Sogi, fag kitonya yadim ogali. ³⁸ Da Hisos nogfadagos wat lahawan has banwa Hirosalim baliwa, indasog ha sadik forowan balay. Sadik ina, is Marta nafasakbaw inda Hisos. ³⁹ To fag ina ha fadwasay ina, is Mariya. Is Mariya matokawan san Hisos bilog bitis a, igtalinga is Hisos nogfaadal. ⁴⁰ Dapat is Marta kasaliwawa wagfatalaga fanganon. Yakanga gakbang han Hisos, iglwang, Fiya di awkin, ha gayfan, angko fadwasay nogfabayaan angko? Haw fag fwayong hanya nangos kitay, togbongan yap angko. ⁴¹ Dapat kagfon intam nasagot hanya, Marta, Marta, aywan fag manga bagay im fakasaliwawaon, ⁴² dapat sadi odik bagay ka orongan fagfiliyon. Is Mariya ka ha nafili ka fiya, yakanga hodwa bomol tonya gi hanya.

11 Gis nanya yadi fag manga masohod, sadi ya ginan is Hisos igdarangin. Is Hisos nontabo wagarangin, it katogbong sadi iglwang hanya, Hyami Fon, ha fayayoman yadi hyami igdarangin, kito yadin Hwan nogfayayom it manga katogbong. ² Ginyas Hisos iglwang, Fag kiti ham nogdarangin, faglwang,

Mama, hyamo ngayan bohonwa fagswayon. Haw fag ngalay no kabali hari kagsakop has fagayo. ³ Disagan ha hyami ka fanganon ka homosto sirang sirang. ⁴ Haw fag faliyam hyami manga naogali dwat, Maskin migfaliyam yadi ista manga naogali dwat fagayo ha hyami. Fag idwag faakbang hyami has manga dwat kaarakitay igsolay hyami. ⁵ Ginyas Hisos nafwayong ya domwag, Halimbawa, insadi santam no manabang hat fakilalaon, boknga wa yabi, ginyag lwang, Ha disagan yap angko nangos tolok tinapay, ⁶ maskin angko fakilalaon sadi indasog a, hodwa ara ha famahanon hanya. ⁷ Intam fakilalaon somagot gis basad balay, Haw fag idwag folaw hyami. Matahopan wa hyami sakbawan a, mi talanahan maigyanan wa fagayo. Mahafang wa kabangon kaarakitay domisag hyamo fagsagadon. ⁸ Hogfwayong hayo, nyawa hanyam bangon araw, kaarakitay igdisag intam fagsagadon, bohonwa kitay ka tam it fakilalaon, dapat maskin tam igpilit wagsagad, yakanga nonbangon di ngap, domisag hantam kantam fagsagadon. ⁹ Yakanga hogfwayong hayo, ham fag sagad, ginya ham tomanggap hayo fagsagadon. Ham fag sayak a, ham lomag wa ka hayo fagsayahon. Ham fag sagam gi dayo balay, ginya ta fasakbaw hayo. ¹⁰ Maskin fagayo kagsagad tomanggap wa kat fagsagadon. Fagayo kagsayak, lomag wa kat fagsayahon, hanggan fagayo kagsagam gi dayo balay, ta fasakbaw wan. ¹¹ Gwadi fakta fag ama sa hayo, it anak nogsagad oyang ka domisag hat anak abyanon odi, bonwa oyang, ham gayfan? ¹² It anak nogsagad bolan, domisag awkin inonay? ¹³ Gwadi nyawa ham dwat fag manga taw, ham idwa twag falingo hayo manga anak, bago man ara hayo Ama sat banwanan sam tongod, ka mahoway, labi man idwag falingo hayo. Hanya domisag it Maliyaw fag Falad has mangag sagad gi hanya. ¹⁴ Ginya madi aban is Hisos nafaalin sadik labang kagfahoriyan sadik ama, idwag fahampang hanya. Ginya ka ama nahampang ya. Yakanga fagayo fag manga taw indolaw wan. ¹⁵ Dapat ka tibag lwang in Hisos kadonongan igfaalin ka manga labang, gi odin Biilsibol, ka fagtahinan manga labang. ¹⁶ Ginya madi ka tibag solay in Hisos, taglwang hanya, Falagan ha hyami sadik falagon madolaw gin Diyos banwanan sam tongod. ¹⁷ Dapat ay is Hisos nasarom di ista fagisipon, yakanga nafwayong has taw, Fagayo fag gorangon sakop imdaog di nombali dowak layonan, yakanga idwa domogay. Kitonya yadi sadik talanahan nombali dowak layonan, ginyag labanan wan, idwa yadi domogay. ¹⁸ Maskin ham iglwang is Biilsibol kagfasyagan angko igfaalin labang, no kitonya, is Satanas iglaban it sadili sakop, yakanga it sakop idwa domogay. ¹⁹ Nos Biilsibol kagfasyagan angko igfaalin labang, fakta, ham gayfan, kagfasyagan hayo manga anak igfaalin labang? Yakanga hayo manga anak mandu kagfatohoyan kitay ham gwayan wafalamang.

²⁰ Dapat ay, non Diyos kadonongan kagfasyagan angko igfaalin labang, it kahologan in Diyos sakop indasog wa sa hayo. ²¹ Sadik taw marigon nontalaga it fanlaban igbantay it sadili balay, it manga botang idwam liyam. ²² Dapat ay, ka sadi ka marigon man inya nombangkad, lomaban hanya, domaog wan, hanya homagaw lamang kat manga fanlaban manga bangkaw, manga talibong, ka ama marigon fagsyagon haraw, ginya ka ama marigon man homoray hat ofod it manga nahagaw ista botang. ²³ Kadwa kaoyon angko, iglaban angko. Kadwag togbong angko igfatifon manga taw, yagfasarowayan di ngap. ²⁴ Ka labang no nalin gis sadik taw, igswaliyan igswaliyan has daga magwang magwang, igligaw it famahowayan, dapat idwa ha lagan it oliyanan. Yakangat fangayofan iglwang, Ho kafwali ya ngawan hangko nagalanan. ²⁵ Nonfwali ya, iglag it nagalanan malinay di, maangay wan. ²⁶ Yakanga ka labang hanya ya ngay, igtaban fito yak labang ka dwat man hanya a, hawa basad fangayofan taw, sinya wak maoliyanan. Yakanga sas katabowanan ka taw mahori man ka gona it fangayofan. ²⁷ Is Hisos no kampang yapdi, sadik ina gis fakaaywanan igtawag marigon a, iglwang han Hisos, Yabay, ka ina ka nadiya hyamo sat basad tiyan, hanggan nafasoso hyamo bomaya wan. ²⁸ Dapat is Hisos nasagot, Yatokitay, ka manga taw kagtalinga hanggan katanog in Diyos hampang bondi kitonya no bomaya. ²⁹ Ginya manga taw no kadasarogon wan, is Hisos iglwang, Ka kati fag masohod fag manga taw dwat wa dahol. Kana mayon ta no kalibang wagsayak gingko manga falagon madolaw? Gwadi hodwa ha falagon madolaw has taw no bohonwa kanlag san Honas nadalanan. ³⁰ No kinday hyabi kan Honas nadalanan inbali falagon madolaw has taga banwa Ninibi, kitonya yadi aho, Kanbali Taw, angko dalanan aban imbali falagon madolaw has manga taw kati fag masohod. ³¹ Aban sas Sirang Fangabayan, ka ina gis Ihipto baliwa, kanbali gorangon hyabi, fatohoyan has fadosaan ka kati fag masohod fag manga taw, maskin hyabi, tonya fag ina inbangkad gis bali fongfongan daga kaarakitay domog in Gorangon Salomon kadonongan, dapat ay, kastay kati bohondi kiton Salomon it kadonongan. ³² Aban, sas Sirang Fangabayan, ka manga taga Ninibi fatohoyan has fadosaan ka kati fag masohod fag manga taw, maskin ka taga Ninibi nasoyo hyabi kawas Honas nafaadal has taw, dapat ay, kati yabay, kastay bohondi kiton Honas it kangayanan. ³³ Idwa ha taw igsonog salong kaarakitay tomago sas daga balay, ngatay daga gantangan. Yatokitay fag sawa ngap is salangan fiya fiya nogsalifit ka salong kaarakitay manga taw nogsakbaw lomag mayawa. ³⁴ Im mata bilang wam salong sas haboyagan. Im mata no fiya, igfayawa yadim haboyagan sadi wak dahonya. Dapat im mata no dwat, im haboyagan sadi wak

dahonya inbali yadi wa marom. ³⁵ Ha no gayfan ngatay ka mayawa ngandayo sa hyamo, ya mangharaw marom di, yakanga ham fag matagahan wan. ³⁶ Im haboyagan sadi wak dahonya no sawas mayawa, ngadi ogbot idwa sas basad marom, im haboyagan orongan wa basad mayawa, bilang sadik salong mayawa wa dahol kagyawa hyamo. ³⁷ Is Hisos nogtoltol yapdi, sadik Farisiyo igtaban in Hisos hat balay kaarakitay manayowan sinya. Yakangas Hisos insakbaw wan, in tokaw sas bilog fanganan. ³⁸ Ka Farisiyo indolaw waglag in Hisos maskin kwan fafa idwa nagonaw fiya fiya it gamat kito kasta magorang togon. ³⁹ Ginya kagfon intam igfatangon has Farisiyo, iglwang, Ham manga Farisiyo, ham gogas ya ngadi ka manga baba ongot, manga baba fingga, dapat ka sas basad manga odi bafaw, kawa ham igtagagonaon, hanggan ha manga ogali dwat. ⁴⁰ Ham manga odi idagdog. Bohonwa awkin ka nahalig ka sas babaw nahalig yadi ka sas basad? ⁴¹ Dapat ham fag disag yadi has manga myabog ka gi hayo basad sohadan, ginya ham imbali wa malinay sadi wak dahonya fangayofan. ⁴² Dapat ay, isyay wan, ham manga Farisiyo. Ham igdisag ka hayo fasafolo gis manga tanom famabanglo odi ofi, dapat ham igfasigpala di ka mahalga fag togon kitos, fag idwa ha fagihidon taw nogbolay fangabaya hanggan fag galwasi in Diyos. Fiya ham nogdisag ka hayo fasafolo madi ngap, dapat fag katanog yadi ka manga togon mahalga. ⁴³ Isyay wan, ham manga Farisiyo, maskin no sas basad fanimbaan, ham igfahasa ka tokawan ka mangag bahala, hanggan ham gwayan wa kasayagdog manga taw nogfadaholon hayo, ham no gayayag basad banwa. ⁴⁴ Isyay wan ham, ham bilang wa manga lobgoban kadwa ha tandaan, ista odi fanlidan kawa tadwa twa kitay inboyok sas basad. ⁴⁵ Sadi kagfaadal ka Batasan Hodyo iglwang han Hisos, Haw kagfaadal, haw igfalafit hyami haw noglwang kitonya. ⁴⁶ Is Hisos nasagot hanya, Isyay wan, ham ka mangag faadal Batasan Hodyo. Ham igfahabyatan has taw, no bilang wagfadiya manga ogali mabyat, dapat ham idwag sapkid ngadi ngap hayo timoyo kaarakitay igfahatay. ⁴⁷ Isyay wa ham, hyabi hayo manga hafofowan magorang nafahatay in Diyos manga fangampang, kati ham igfahatay tonya fag manga fangampang lobgoban. ⁴⁸ Kawa ham gibolon kitonya, ham igfahatay kitay ham igfaangay hayo manga hafofowan magorang naibolon. Maskin ta nafahatay manga fangampang, ginya madi ham igfahatay ista manga lobgoban. ⁴⁹ Kawa kitonya in Diyos fakatwawon iglwang yadi, Ho somogo yapdi has taw angko manga fangampang hanggan manga Fandiya-Barita. Tiba aba ta fahatay yadi, tiba ta fahoriyan. ⁵⁰ Yakanga, ka fadosa has fagayo kagfahatay manga fangampang gi yapdis fabagowanan daga imdasog has manga taw ka kati fag masohod. ⁵¹ Ka fadosaan gi yapdi ta no nafahatay in Abil hyabi, hang-

gan ta no nafahatay in Sakariyas sas faktaban fanongan ista manga disag, hanggan ka balay Fanimbaan-Dahol. Anod, hogfwayong ha hayo, bonwa bohag, ka kati fag masohod fag manga taw ka somagot ista fadosaan fagayo ka naibolon kitonya. ⁵² Isyay wan, ham ka mangag faadal Batasan Hodyo maskin ham nabol ka sosi kagboklas ka tahop sas kadonongan. Bondi kitay ham idwag sakbaw, ham igtaktak ya ngadi ka manga kasayag sakbaw. ⁵³ Ginya madis Hisos noglahaw ginya fag balay, ka mangag faadal Batasan Hodyo hanggan manga Farisiyo gintaw kaaywanon fag bagay, ⁵⁴ kaarakitay, is Hisos no somalan di nangos no somagot has taw, ta omiktan hanya git sadili hampang, ginya somombong has manga ha kangayanan.

12 Gis nanya yadi fag masohod kaaywanan wa kaaywanan wan fag manga taw kadasog, igtarahidan ista ginanan bitis sas kaaywanan. Ginyas Hisos nafwayong yapdi hat manga katogbong kiti, Ham fag idwag sokfon ka ogali manga Farisiyo, ka bilang libadora, ka famadahol tinapay. Kawa ka manga Farisiyo ogali famalagon odistaw kitay fiya. ² Ka manga matagowan kati fadi wadamlag aban. Fadi wamfyalom aban, imdog wan has fagayo. ³ Yakanga nyawa kana ka hayo fwayong sas basad marom, imdog di aban has basad mayawa a, ka hayo faginason sas basad lingoban imdog wa aban fiya fiya sas sokayan, sasta fanifonan. ⁴ Angko manga fakilalaon, hogfwayong hayo kitay ham fag idwa kadala kagfahatay habilogan taw, maskin balinya odi no kadi fagsyaganon taw. ⁵ Ho fomwayong hayo no fakta ka hayo fakadalaon fiya fiya, fag ka syagan igbol hayo ipsaw, ginya hanya bahala yadig fatohoyan no fakta fag manga taw ha sadik hadasogan, sinya wa kamdosa basad afoy. Hogfwayong hayo, anod, fag tonya wa ka hayo fakadalaon. ⁶ Idwa awkin tam nogfasali limak maya dowo odik sagat halga? Nyawa kitonya is Diyos idwag falamang ngadi sadik maya. ⁷ Gwadi nyawa hayo manga ogat bok sas alfoyo, is Diyos twa wa no kayoday. Ham fag idwa kadala. Gwadi ham mahalga man has kaaywanon fag manga maya. ⁸ Hogfwayong hayo nyawa faktaw kagabaya sas manga taw fagdogan kitay hanya angko wa sakop, aho, Kanbali Taw, bomaya yadi aban san Diyos manga anghil fagdogan kitay, tonya fag taw angko wa sakop ngay. ⁹ Dapat ay, kagtangkod angko sasta fagdogan manga taw, ho tomangkod yadi hanya aban san Diyos manga anghil fagdogan. ¹⁰ Nyawa faktaw ka kampang dwat donggon kawa hangko, aho Kanbali Taw, fiya digfaliyam ista hampang dwat, dapat ay, ka kampang dwat donggon kawa has Maliyaw fag Falad, tonya fag taw ista naogali kitonya idwam liyam, nyawa ginahin. ¹¹ Ta no tomaban hayo has manga fanimbaan Hodyo aban, hanggan has faglagan manga gorongan, has manga ha kangayanan, kaarakitay omintaw hayo, ham fag idwa galibitan hayo sagot is taw, ngatay hayo

bato fwayongon, ¹² maskin, nomdasog gis nanya fag masohod aban, ka Maliyaw fag Falad faisip hayo no kana ka hayo sagot. ¹³ Ka sadik taw sinya sas fakaaywanan nafwayong han Hisos kiti, Haw kagfaadal, fwayongan angko fadwasay kitay, horayan yadingko hyami ama nafaobon ha hyami. ¹⁴ Is Hisos nasagot, Ama, fakta kagfabali angko igbahala igfafiyanan igfa-horayan ha hayo dowo hayo ama faobonan hayo, ha gayfan? ¹⁵ Ginyas Hisos nafwayong has fagayo, Ham fag matagahan, ham fag idwa maingliyon, nyawa kana, maskin bohonwa kitay hayo kaakwaan no ayo kagfaboyag hayo. ¹⁶ Ginya madis Hisos igtoltol to fag halimbawa, iglwang, Ha sadik taw maakwa ha manga namay, manga iyab, aywan it ani. ¹⁷ Yakangat fangayofan iglwang kitay, Kinda odi angko halimbawan? Hada odi ara angko fwalidan angko ani? ¹⁸ Hanyag lwang kiti, Yabay, aho mangharaw omiklas kangko manga dongdong gona, ho homalig tiba, fag dahol man inya. Fag sinya wan aho no fomwalid angko manga ani hanggan angko botang fagayo. ¹⁹ Ginya madi angko sadili fangayofan bomaya wan, lomwang kitay, Nabi, kaaywanon angko manga botang kati. Aywan fag fangaraw idwa komorang angko manga fakasayaon. Yakanga ho fag mafahowayan odi, manga kwan, manga ginom, aho fag masolong odi fagaba. ²⁰ Dapat is Diyos nafwayong hanya fag taw maakwa kitay, Paong paong haw. Araw basad yabi ho bomol wam ipsaw. Fakta nga araw ka omafo im manga botang, ha gayfan? ²¹ Kitonya kasta lagon aban kagtifon kaakwaan kaarakitay hat sadili, dapat no han Diyos baliwa myabog di. ²² Ginyas Hisos nafwayong hat manga katogbong, Yakanga hogfwayong hayo, ham fag idwa galibitan hayo fanganon kaarakitay ham kaboyag, ngatay hayo rotay bato solongon, ²³ maskin ka haboyagan bohondi kitos fanganon no mahalga, hanggan ka habilogan bohondi kitos rotay. ²⁴ Yabay, bantayan ka manga ahak, idwag famgas, idwa yadi gani, idwa ha halongkong, idwa yadi ha dongdong, dapat ay, nyawa kitonya, is Diyos kagfahwan di ka manga ahak. Gwadi ham bohondi kitos manga manok ik mahalga. ²⁵ Fakta fag taw sa hayo ka syagan igfadogay it haboyagan sas baba daga, ngadi sadik tama sinyahod kawa no galibitan, ham gayfan? ²⁶ Gwadi ham nodwa syagan gibolon to fag ogbot fag manga bagay, kana mayon ham no fagaba wa galibitan ka manga iba bagay? ²⁷ Yabay ka manga borahan sas dayo, gwadi tonya idwag bonang, idwa yadi kalig rotay. Dapat hogfwayong hayo, nyawas Salomon igsolong it rotay ka fiya man has fagayo, sadi dik borahan fiya man inya kabantay, idwa ha matoga. ²⁸ Is Diyos no bilang wagfasolong rotay kafiyaon kabantay has manga lamnon ka kati malangba basad talon, dapat ay, no marom, ngandayo imsonog lamang, labi man is Diyos wa ka farotay hayo. Laya ogbot yapdi ham nogsyag in Diyos.

²⁹ Yakanga ham fag idwa galibitan igsayak hayo fanganon, ngatay inomon. ³⁰ Maskin tonya fag manga bagay ka manga layonan taw kadyag syag in Diyos, tonya ista fagalibitan. Gwadi hayo Ama fadi wad twa kitay, korang yadi ha hayo ham nodwa ha akwa tonya fag manga bagay. ³¹ Ka fiya, ham fag fasakop fiya fiya han Diyos, ginya madi ham tomanggap yadi hayo manga kakorangan fagayo. ³² Angko tifonan, nyawa ham sayok, ham fag idwa kadala, maskin hayo Ama sat banwanan sam tongod igfaangay kitay ham aban fag ha akwa kangayanan sat sakop. ³³ Ham fag fasali hayo manga botang, ginya fag disag it sali has manga myabog. Ham fag ha loka kadwa kadaanon a, ka sohadan hayo kaakwaan san Diyos banwanan sam tongod kadwa kamin sinya, maskin idwa ha domasog fangnahaw, idwa yadi ha tipakong domwat sinya. ³⁴ Maskin no sidak mabotangan hayo kaakwaan, hayo fangayofan sinya yadi wak maisipan fagaba. ³⁵ Ham fag danwa masalawidan hayo fotol, hayo salong fag danwa masonogan. ³⁶ Ham fag tolod ka manga sogowan kagfanaya it fon no goli gis fangsawan kaarakitay dagos wa bomoklas ka tahop, hanya no kadasog igsagam. ³⁷ Kat manga sogowan bomaya wan no mafolawan yapdi hanggan mafanayan it fon nomdasog wan. Hogfwayong hayo, bonwa bohag, ka mandi ista fon ka somolong rotay fangibolon a, fatokaw it manga sogowan sas fanganon, ginya fahwan fafa has taw. ³⁸ It manga sogowan bomaya wan it fon noglag ta matalagaan wan, nyawa boknga yabi, nyawa kasirang wan hanya nomdasog. ³⁹ Dapat ay, ham fag twa kitay kagfon balay no nadog kitay ha kadasog fangnahaw gis nanya fag masohod, hanya idwag fasigpala it balay, idwag fasakbaw hat basad balay. ⁴⁰ Ham yadi, ham fag danwa matalagaan fagaba maskin aho, Kanbali Taw, imbangkad ya aban no ginahin fag masohod ham nodwa ha fagasolopon kitay aho kadasog gis nanya. ⁴¹ Is Pidro naintaw in Hisos kiti, To kam nafwayong halimbawa ngatay matoonan di ha hyami, ngatay has fagayo? ⁴² Kagfon intam nasagot, Fakta ka matanogon, hanggan madonong fag sogowan, ham gayfan? Kat fon nagtogonalan kitay anowan it manga sogowan tiba, kaarakitay fahafod has taw ista fanganon no ginahin fag masohod ka fiya. ⁴³ Tonya fag sogowan bomaya wan it fon nogtahod hanyag fadagos it fon togon kitonya. ⁴⁴ Hogfwayong hayo, bohonwa bohag, it fon faano hanya it manga kaakwaan fagayo. ⁴⁵ Dapat ay, halimbawa, tonya fag ista nagtogonalan, not fangayofan iglwang, Angko fon inlibang yapdi, dogay di aban bago mwali. Yakanga hanyag bakbak ka tibak sogowan, manga ina, manga ama, hanggan kwan kwan odi, manga ginom, iglango ya ngadi. ⁴⁶ Ginya madi ista fon mwali sas sirang kat nagtogonalan fag sogowan nodwa tagak tagak, gis nanya fag masohod myanit hanya idwa twa kitay it fon kadasog.

Yakangat fon fadosa wa fiya fiya, faofod hanya has mangadwa matanogon. ⁴⁷ Kasta sogowan no natwa it fon faibolonon hanya, dapat idwan talaga, idwa yadin tanog, it fon aban bomakbak hanya marigon. ⁴⁸ Dapat kasta sogowan nodwa natwa it fon faibolonon hanya, ginyat ibolon fiya wa fadosaon, it fon no bomakbak hanya, idwa bangan marigon maskin kawadwa natwa it fon faibolonon hanya. Kagtanggap aywan fag manga anoon, aywan yadi abat sagoton. Ta no nafabahala aywan man ha sadik taw, aywan man yadi abat sagoton. ⁴⁹ Honbangkad hastay kaarakitay igdiya afoy has baba daga. Fag imtongo wa nangos. ⁵⁰ Ha sadi yak tandaan kahorihan kitos igfatogna, kangko bato fatandaan yapdi sangko, hanggan aho gwayan wa kahorihan tonya nodyapdin anod. ⁵¹ Aho awkin inbangkad hastay kaarakitay igdiya kahowayan hastay is baba daga, ham gayfan? Hogfwayong hayo, bohonwa kahowayan kangko taban, yatokitay igfasarowayan wa ngap manga taw. ⁵² Gis kati ginan no ha limak taw sa sadik talanahan, imbali dowak layonan, tolo iglaban has dowan, hanggan dowan iglaban has tolo. ⁵³ Kat ama hanggan it anak ama iglabanan. It ina hanggan it anak ina iglabanan yadi, Kitonya yadi ka manga almanogang ina iglabanan. ⁵⁴ Ginya madis Hisos nafwayong yadi has fakaaywanan fag manga taw, Ham noglag manga linyabo masding sas sangdayan myanit baliwa, ham iglwang, araw kahwayan wan, hanggan fagaba wa ngap kaanod. ⁵⁵ Ginya madi, ka bagyo no gis balitanagan, ham iglwang, Myanit wa dahol dahol araw. Kitonya ngay ka kaanod. ⁵⁶ Ham igfataka odigdog. Ham bilang yadi wagbasa ka hayo manga faglagon sas banwa sam tongod hanggan sas baba daga, kana mayon ham nodwa twaglag ka hayo manga lagan ka madalanan kati fag masohod? ⁵⁷ Ginyas Hisos iglwang, Kana mayon ham nodwa syagan igfatohoyan no kana ka fiya. ⁵⁸ Halimbawa, no hagtaban hyamo has fangabaya, ka fiya ham fakafiyon mandi, ham no katabo di. Nodwa kitonya, ta ngandayo gomoyod hyamo has fangabaya, ginya ka fangabaya fagamat hyamo hasagbantay sas porisowan, ginya faporiso hyamo. ⁵⁹ Hogfwayong hyamo hadwa malfas ginya aban, haw nodya nabayad hanggan wa kat kahaminan fag saga.

13 Gis nanya handasog tiba taw ka nafadahit han Hisos kitay, is Pilato, ka Gobirnadon taga Roma, ha nafahatay manga Hodyo tiba, taga Galiliya, ta nogdisag yapdi manga sogbaon han Diyos. ² Is Hisos nafwayong has taw, Ham gayfan awkin bohondi kito ka tibak taga Galiliya no ha ogali dwat tonya fag manga taw maskin ta nalag kitonya? ³ Bohonwa mawat. Dapat hogfwayong ha hayo, ham nodwag soyo, ham fagayo lomag yadi kadwatan. ⁴ Kitonya yadi ka safolo ha walok taw ka natay, ka balay abwat abwat sas Siloi no nakfo, natokob wa ka manga taw. Ham awkin gay-

fan bohondi kito ka tiba taga Hirosalim no ha ogali dwat maskin inlag kitonya? ⁵ Bohonwa mawat. Dapat, hogfwayong ha hayo, ham nodwag soyo, ham fagayo lomag yadi kadwatan. ⁶ Ginyas Hisos natoltol has taw sadik halimbawa, iglwang, Ha sadik ama ha tanom sadik fon igos sat basad iyab. Namantay ya ngay ka fon igos ngatay igbohadi wan, dapat ay, hanyadwa ha lagan it bohadi. ⁷ Yakanga nafwayong hat sogowan ka gano sinya fag iyab, Gwadi tolo wak fangaraw aho nogtibaw angko halamanan, hodya ha lagan it bohadi tonya fag fon igos. Ha obangan wan. Maskin igtoplan di ka tiba. ⁸ Dapat ka gano sinya fag halamanan iglwang, Tam faya gobang kati fag fangaraw. Ho homodkod yapdi sat ligongan dalid, ho fomwalid famalangba sinya. ⁹ Nomdasog aba sa sadik fangaraw, no bomohadi ngay, selamat wan, dapat nodwa bomohadi gis nanya fag fangaraw aban, tam omobang wan. ¹⁰ Aban, sas Sirang Kafahowayan, is Hisos igfaadal basad fanimbaan Hodyo. ¹¹ Ha sadik ina sinya yadi, safolo ha walok fangaraw ha sagit, bokong bokong odi, idwa syagan katadlong maskin labang kagfahorihan hanya. ¹² Is Hisos no nalag ka ina, natawag a, nalwang kiti, Ina, kati kam fagdogon in fiya wan. ¹³ Is Hisos natawid ka ina, ginya madi ka ina intadlong wa dagos, yakangag fasayagdog in Diyos. ¹⁴ Dapat kagbahala sas fanimbaan kaisog in Hisos maskin sawas Sirang Kafahowayan is Hisos no nafafiya ka ina. Yakangag fwayong has manga taw, Gwadi onom ik sirang sa sadik simba kantohoyan kaarakitay omibolon. Fag gis nanya fag manga sirang ham no kabangkad kaarakitay igfafiya hayo manga sagit, fag idwa sas Sirang Kafahowayan. ¹⁵ Is Hisos nasagot hasagbahala, Ham ha takan wan. Bati, nyawa basad wa Sirang Kafahowayan, ham lomohas hayo baka ngatay habayo gi hayo nagsiyokan basad lamnonan kaarakitay igfainom. ¹⁶ Gwadi idwa aw fiya nogfalfas to fag ina, kan Abraham yadi hasokfonan, nyawa basad Sirang Kafahowayan, maskin safolo wa ha walok fangaraw is Satanas no bilang wa nagafos hanya. ¹⁷ In Hisos manga kalaban naya wagdog yadi, dapat ka fakaaywanan nabaya waglag in Hisos manga naibolon madolaw fagayo fagayo. ¹⁸ Ginya madis Hisos iglwang has taw, Kinday in Diyos sakop? Kinda odi ngap angko fatoladan tonya, ham gayfan? ¹⁹ Kitos sadik botol mostasa sadik taw natanom sat basad iyab. Ginya madi natobo wan, indahol, inbali wa fon hayo, manok digfogad wan sat baba sanga. ²⁰ Sadi ya ginan is Hisos iglwang, Kinda odi ngap angko fatoladan in Diyos sakop, ham gayfan? ²¹ In Diyos sakop kitos famadahol tinapay ka sadik ina nafaaktom has tolok sarok harina, hanggan wandahol sadi wak dahonya. ²² Ginyas Hisos igfadagos wat lahawan, hawas Hirosalim baliwa. Is Hisos igfaadal has fagayo kat nagdalanan banwa hanggan manga forowan balay sayok sayok. ²³ Ha sadik taw gintaw in

Hisos, iglwang, Ama, sayok di awkin fag manga taw kambawi? Is Hisos nasagot hanya, ²⁴ Ham fag tikis wagsakbaw has ogbot fag sakbawan. Hogfwayong ha hayo, no kitay di, kaaywanon fag manga taw ka kasaya somakbaw has ogbot fag sakbawan, dapat tadwa somyagan. ²⁵ Aban kagfon balay no natahop wa ka sakbawan, ham kadwa nasakbaw, ham fag bayai mandis nyamo sas sokayan, igsagam wagsagam wan. Nyawa hamyayag lwang kitay, Ama, ha fasakbawan yadi hyami, hanya somagot yadi hayo, Hodwa twa ham no ginda fag manga taw, no ginda hayo banwanan. ²⁶ Ham lomwang yadi hanya kitay, Gwadi tam igsayowan yadi wa kwan, manga ginom, itfagonan, hagfaadal ya ngadi sa hyami manga fagbokngan balay. ²⁷ Dapat hanya omolit ya aban kitay, Hodwa kilala hayo ham no ginday fag manga taw. Ham fagayo ka gogali dwat, fag ayayo gingko. ²⁸ Aban ham mangoraw wan hanggan hayo ngifon di mangarigitan wa sinya, ham no lomag inda Abraham da Isaak da Hakob hanggan in Diyos manga fangampang fagayo san Diyos sakop, dapat ham man im-okas has dayo. ²⁹ Aban hamdasog gis salogan myanit baliwa, gis sangdayan myanit baliwa, hanggan gis manga balitangan, ta mangaraktoman aban sas fanganan san Diyos sakop. ³⁰ Orongan wan ha akwa tiba ka goyan ka gomona man ka gona, hanggan ka tiba ka gona imgoyan man ka goyan. ³¹ Gis nanya yadi fag masohod, tibak Farisiyo inbangkad yadi sinya, iglwang han Hisos, Haw fag lahaw wa gistay maskin is Hirodis kasayag fahatay hyamo. ³² Is Hisos nasagot kiti, Ham fag fwayong han Hirodis, ka bilang sadik hayopan idwag falagon kitay homagat, fag lwang kitay, Yabay, hogfaalin yapdi manga labang kagfahoriyan manga taw, hanggan igfafiya yapdi manga taw ka ha manga sagit kati, hanggan kitonya mandi bago marom, ginya madi sat dayo aban, angko ibolon imtabo wan. ³³ Dapat kati, hogfadagos yapdi angko lahawan, hanggan bago marom, hanggan sat dayo aban, maskin idwa fiya in Diyos fangampang sadi no matay nodwa sas banwa Hirosalim. ³⁴ Ginyas Hisos iglwang kawa has banwa Hirosalim, Haw, Hirosalim, Hirosalim, haw igfahatay in Diyos manga fangampang hanggan igbintok ya ngadi kan Diyos manga nasogo ha hyamo. Kayoda wa ginan ho kasayag lohob hyamo sakop fag manga taw, kitos ina ofa noglohob it anak sat daga fakfak, dapat haw, Hirosalim, ha dayo di ngap. ³⁵ Yakanga kati ho orongan wa fabayaan lamang im oliyanan. Hogfwayong hyamo, haw fawa lomag angko domwag, nodyam dasog gis nanya fag masohod haw no lomwang, Ka kadasog hastay san Diyos ngayan, fag bomaya wan.

14 Aban sa sadik Sirang Kafahowayan, is Hisos hawas sadik fagtahinan Farisiyo balay kaarakitay manayowan kwan sinya. In Hisos manga kasayo igtikis igbantay wa fiya fiya it manga fangimotan.

² Yabay, ha sadik ama kabadbagaan it habilogan san Hisos dayo. ³ Yakangas Hisos naintaw has manga Farisiyo hanggan has mangag faadal Batasan Hodyo kitay, Ngatay fiya di awkin sas Batasan Hodyo nogfafiya sagit sas Sirang Kafahowayan, ngatay idwan? ⁴ Dapat tadwa ha naawang, yakangas Hisos natawid ka ha sagit, nafafiya hanya, ginya nafalahaw wan. ⁵ Ginya madis Hisos nafwayong has taw kitay, Fakta sa hayo no ha anak, ngatay baka kandagdag basad hodkodan, ham awkin idwa bomawi ginya, nyawa sawas Sirang Kafahowayan? ⁶ Tadwa twag sagot, tadwa ha naawang. ⁷ Gis nanyas Hisos iglag kitay, kasta manga nataban hasta balay igsaringgonaan it manga tokawan, igfili kasta fanokawan kasta fakilalaon fiya fiya. Yakangas Hisos nafwayong has taw to fag halimbawa. ⁸ Ta nogtaban hyamo hasta fangsawan, ha fag idwag fili kasta fanokawan fakilalaon. Ngandayo ta ha taban ya kasta fakilalaon fiya man hyamo. ⁹ Ginya kagtaban hayo fagayo dow, homampang ha hyamo, lomwang, Fiya di awkin haw nogfatokaw to fag taw sa hyamo nagtokawan? No kitonya haw maya wan, haw ngap ara tomokaw sa odis tokawan kadwa bangan. ¹⁰ Ka fiya, ta nogtaban hyamo hasta balay, haw nogtokaw, fag sa yap man idwa bangan fag tokawan, sas hadasogan yapdi gis sokayan. Maskin kagtaban hyamo lomwang hyamo araw, Haw fag istay yadi gwa-di, sangko akbang. No kitonya ta ara fadog ya hyamo ngayan has manga taw kagsabang sinya. ¹¹ Maskin kagfadaholon it sadili, ha falibaba di hanya, hanggan kagfalibaba it sadili, hagfaabwat hanya. ¹² Ginya madi hasagtaban man hanya, is Hisos iglwang kiti, Haw no ha nafatalaga fanganon, fag bohon yapdi kam manga fakilalaon, ngatay kam manga fadwasay, manga kaiban, ngatay ka manga maakwa, im faakbang balay, kam fagtabanon. Maskin ta aba somabang yadi hyamo, ta naganti yadi hyamo, ya balinya wan. ¹³ Dapat ha no ha nafatalaga fanganon ayo ayo, fag ha yap man is manga myabog myabog, manga rifis, manga fihong, manga bota kam fagtabanon. ¹⁴ Tadwa syagan gomanti hyamo, yakangas Diyos iglwang kitay, ka manga ha akwa in Diyos kafiyan nomboyag ya aban, ham bomaya wan, maskin is Diyos domisag ha hyamo fasalamat gis nanya. ¹⁵ Ka sadi kagsayo in Hisos sas fanganan sinya, no nadog in Hisos hampang, iglwang hanya, Kagsayo san Diyos sakop fanganan bomaya wan. ¹⁶ Dapat is Hisos iglwang, Ha sadik ama nafatalaga fanganon ayo ayo, aywan ya ngadi kat nasabang. ¹⁷ Nondasog gis nanya fag masohod, yagsogban wa gis nanya, kagfon balay nafasabang ya kat sogowan has taw kat manga nafadog itfagonan, iglwang kitay, Ham fag kabangkad wa kati, intalaga wan fagayo. ¹⁸ Dapat fagayo pariho ha fabangdanan wan. Ka bago bago iglwang, Ho ha nasali sadik iyab. Ka fiya ho bomantay yapdi tonya. Haw fag idwa kahori angko,

nyawa hodwam bangkad has nyamo. ¹⁹ Ka sadi iglwang yadi, Ho ha nasali baka, lima kagtimbang. Ka fiya ho somolay yap somingkaw tonya. Haw nangos fag idwa kahori angko nyawa hodwam bangkad has nyamo hayo. ²⁰ Ka sadi iglwang yadi, Mi bago dintalsawa, midwa has nyamo hayo. ²¹ Ginya madi ka sogowan infwali ya ngawan, nafwayong hasagfon balay kitay, ka manga taw idwa kabangkad hastay, hono. Yakanga kagfon balay kahori wa dahol dahol, iglwang hat sogowan kiti, Haw fag lahaw ya madali. Fwayongan ka sayo basad manga karsada, ka sayo basad dalan ogbot basad banwa, tabanan hastay ka manga myabog, ka manga rifis, manga bota, manga fihong. ²² Ka sogowan no nwali ya domwag hasagfon balay, iglwang kiti, Angko fon, kati hontanog wan hyamo manga sogo angko, no kitay di, dapat tam idya napno. ²³ Ginyat fon nafwayong ya hat sogowan, Haw fag haya ngawas basad karsada sas dayo banwa, ha fag pilit wa ka manga taw fag kabangkad hastay kaarakitay angko balay mapno. ²⁴ Hogfwayong ha hayo, ngadi sadi kangko nasabang gona idwa ha hagaton angko nafatalaga. ²⁵ Kaaywanon fag manga taw igtahin in Hisos. Ginyas Hisos nasayango has taw, iglwang kiti, ²⁶ Nyawa faktaw ka gakbang angko, idwa fiya imbali angko katogbong nodwa galwasi angko bondi kito kat ama, ngatay kat ina, ngatay kat babay, ngatay kat indogan, ngatay kat manga anak, ngatay kat fwadwasay, nyawa ina, nyawa ama, ngatay hanggan wat sadili haboyagan. Fag aho kat fagalwasiyon bago bago. ²⁷ Nyawa faktaw idwa fiyam bali angko katogbong nodwa gagwanta mahori bilang wagfasan it sadili fatimbangan hayo hanggan idwag tahin angko. ²⁸ Halimbawa, insadi sa hayo no ha fangayofan mangalig balay abwat abwat, idwa aw tomokaw yapdi, ham gayfan, kaarakitay omisip yap it bato bayadon kaarakitay tomwa ngatay it kwarta homosto wa fatabo? ²⁹ Ngandayo torok yapdi kat falindogon, no mangharaw idwa tomabo, fagayo ka lomag, ta fasidyowan odi hanya. ³⁰ Taglwang, Tonya fag taw nafabago wa nahalig, dapat idwa nasyagan nafatabo. ³¹ Yabay, fakta fag gorangon, ham gayfan, it sondalo no safolo dik libo, ka lomaban nga ha sadik gorangon ka ha dowak safolo libo it manga sondalo, ham gayfan? Idwa aw tomokaw yap kaarakitay omisip ngatay syagan domaog it kalaban. ³² Hanya nogdog kitay idwa somyagan domaog, hanya somogo yapdit fanonson hat kalaban, ta no ayayo yapdi kaarakitay somagad kitay, ta fag taranggapan yapdi, fag idwa lomaban nangos. ³³ Yakanga nyawa faktaw idwa fiya imbali angko katogbong nomlibang di hat sadili fakasayaon. ³⁴ Tam fadi wadtwa kitay ka asin kafiyaon. Dapat ay, nonbol wat tamis, kinda odi nogfatamis ya ka asin, ham gayfan? ³⁵ Idwa ha fakinabang nogsabog sas baba daga, idwa yadi fiya igfaaktom has manga famalangba

tanom. Yakanga manga taw gokas odi tonya fag asin. Ham no ha manga talinga ya ngadi, fag talinga wan.

15 Ginya madi ka manga fanohot bohis hanggan ka manga tiba, kasta faglwangon ha manga ogali dwat, fagayo gakbang han Hisos kaarakitay tomalinga hanya. ² Yakanga ka manga Farisiyo hanggan ka mangag faadal Batasan Hodyo gidginasan a, taglwang kiti, Long madi ngap, to fag taw igsayo has manga taw ha ogali dwat. ³ Yakangas Hisos natoltol to fag halimbawa has taw. ⁴ Halimbawa, insadi sa hayo no ha akwa sadik daan topa, ka sadi nomliyam wan, idwa awkin omobon yapdi ka siyam ik safolo ha siyam ik topa sas basad lamnonan, ginya igsayak kanliyam hanggan wa lomag, ham gayfan? ⁵ Hanya no nalag ngay ka topa kanliyam, kabaya wagsonggoy, igdiya a, goli wan. ⁶ Nondasog sat balay, fatawag it manga fakilalaon, it manga faakbang balay, lomwang kitay, Tam fag hastay sangko balay, fag fagayo wagbaya, maskin ho nalag ya angko topa kanliyam. ⁷ Hogfwayong hayo, kitonya yadi ka san Diyos banwanan sam tongod nobaya. Labi man ta nogbayag lag ka sadik taw ka ha ogali dwat nogsoyo, has siyam ik safolo ha siyam ka gayfan kitay fiya it ogali, idwa ha fagsoyoon. ⁸ Sadi yak halimbawa, ngatay sadik ina no ha safolok bilog pilak, ginya madi ka sadi inliyam, kinda odi ham gayfan it halimbawan? Idwa aw somonog it salong, ginya fomaris it baba salog, somayak wa fiya fiya hanggan wa lomag tonya? ⁹ No nalag ya tonya fag pilak, fatawag it manga fakilalaon, manga faakbang balay, fomwayong has taw, Tam fag hastay sangko balay, fag fagayo wagbaya maskin ho nalag ya ka sadik bilog pilak kanliyam. ¹⁰ Hogfwayong ha hayo kitay, kitonya yadi in Diyos manga anghil nogbayag lag sadik taw ka ha ogali dwat nogsoyo. ¹¹ Ginyas Hisos iglwang, Halimbawa, ha sadik ama ha anak ama dow. ¹² It anak foyo iglwang hat ama, Mama, ha disagan wa nangos hangko kati kangko fag kahorayan im botang kangko tanggapon aban. Yakangat ama nahoray hat manga anak dow, it manga botang. ¹³ Tansagaya di nga korayan, kat anak foyo nafasali wa ka hanya it manga kaakwaan, ginya madi, no kayo da odik sirang, nalahaw has fakaayayowan fag banwanan, nadiya wa fagayo it kaakwaan. Nondasog wa sinya, naolan odit kwarta, idwa has fiya fag kasolong. ¹⁴ Ginya madi, no namin wat kwarta, gis nanya fag masohod ka manga taw sinya fag banwanan inlodlonosan yadi. Yakanga ka anak foyo inhyabog wa dahol dahol. ¹⁵ Yakanga nasayak it ibolon sinya fag banwanan. Ka nafaibolon hanya nasogo hanya hat tifonan baboy maaladan, kaarakitay gano a, bomahog. ¹⁶ Maskin ka anahan kalonos wa dahol dahol, hanya kasamok wan ngadi kat bahog baboy yayos fayay, dapat fawa hagdisag hanya nyawa kana. ¹⁷ Dapat ay, ka anahan no bago di naayfan it naogali, it fangayofan iglwang, Gwadi ngadi angko ama manga so-

gowan hosto it fanganon, ha labi ya ngadi, dapat hogdog ho kahatay wa kalonos istay. ¹⁸ Ho goli ya nangos hangko ama hogdog, ho lomwang ha hanya, Mama, ho ha kasalanan han Diyos hanggan ha hyamo. ¹⁹ Gis kati ginan sakwag ngayan angko im anak. Aho fag bilang odim sogowan. ²⁰ Ginya madi in-anod wan, hanyan lindog wa a, inlahaw wan, hawat ama. Ginya madi, kat ama nalag it anak ama foyo sas ayayo yapdi, danwa kaawa wa dahol dahol hanya, yakangat ama nadalandan natagbo, nafohot, naayok it anak. ²¹ Ginyat anak iglwang, Mama, ho ha kasalanan han Diyos hanggan ha hyamo. Gis kati sakwag ngayan angko im anak. ²² Dapat it amag lwang hat manga sogowan, Kalibang, diyan hastay ka fiya man has fagayo fag manga rotay, fabalokasan hanya. Ham fasingingan hanya, falapakan ya ngadi. ²³ Diyan hastay kantam fagfalakbogon fag anak baka, tam somogba wan, tam ara mangwan, tam kasolong wan yabay, ²⁴ maskin tongko anak ho gayfan natay wan, dapat kati, bilang wanboyag ya. Inliyam wa haraw a, ginyan lag ya. Ta ngap nafanolodan ya ngadi kawag baya wa dahol dahol. ²⁵ Gis nanya yadi ka ama anak ahan sawat iyab. Ginya madi araw goli mandi. No kaakbang wa has balay, hanya nadog ha manga gagong, mangag tayok. ²⁶ Ka anak ahan natawag ha sadik sogowan, ginya naintaw hanya, Kana ka hanya intam? ²⁷ Ka sogowan nasagot hanya kiti, Gwadi im fadwasay nwali ya. Hayo ama nafasogba intam fagfalakbogon anak baka maskin nalag yam fadwasay, boyagan di mangharaw, idwa ha sagit. ²⁸ Kat ahan kahori wa dahol it fangayofan, dayo wagsakbaw ha basad balay. Yakangat ama nadokson, nahampang hanya mayan mayan. ²⁹ Dapat it anak ahan igsogot it ama, iglwang, Gwadi fagaba wa katanog hyamo, aho, aywan wak fangaraw kandalan. Dapat no hadingko, hadwag disag ngadi sadik anak hambing kaarakitay migbaya, aho hanggan angko manga fakilalaon. ³⁰ Dapat indasog di ngay kam anak ka naolan hyamo kaakwaan ha sayo manga ina kadwa fiya it ogali, ginya ha nasogba ya ngadi kantam fagfalakbogon anak baka. ³¹ Kat ama nasagot hanya kiti, Angko anak, gwadi tam fagaba gofodan. Angko manga botang fagayo fagayo hawa hyamo. ³² Dapat fiya tam nogbaya, kasolong wan, maskin im fadwasay, ho gayfan di natay wan, dapat bilang wanboyag ya, inliyam wa haraw a, ginya tam nalag ya kati.

16 Ginyas Hisos nafwayong sadi yak halimbawa hat manga katogbong, iglwang, Ha sadik taw maakwa nafaano it manga kaakwaan hat sogowan sadi. Ginya madi aban, tiba taw natoltol hasagfon kitay, Kam sogowan idwa gano fiya fiya im botang, anogon. ² Yakanga hanya nafatawag kat sogowan, naintaw hanya, Kana kin angko donggon kawa ha hyamo? Falagan angko im manga sorat maskin ha sakwa gano angko manga botang aban. ³ Ka sogowan fangayofan

iglwang, Kinda odi angko halimbawan? Angko fon domayo angko, fawa faano angko it manga botang. Hodwa marigon mangodkod sas iyab hogdog. Ho kaya yadi ho nogsagad igsagad odi. ⁴ Ala, kati, ho twa wan angko bato ibolonon. Angko fon no domayo angko gingko ibolon gano it botang, tiba tomanggap yapdingko sat manga balay. ⁵ Yakanga kat sogowan nafatawag, igsadig sadi ka ha manga bayadan hasagfon. Ginya naintaw kandasog bago bago, Dahoda kin im bayadan hangko fon? ⁶ Ka ha otang nasagot, Angko bayadan sadik daan siboran langis. Ka gano it fon botang nalwang, Dahos nwa kanfwalid sas sorat. Kalibang wan, haw fag matokawan is nwa, ha fag fwalid im ngayan, hanggan fag sorat kitay lima dik safolo siboran langis kam bayadan. ⁷ Ginya madi naintaw yadi ka sadi, Ka hyamo bayadan, dahoday yadi? Ka ha bayadan nasagot, Sadik daan sako tirigo. Ka gano it fon botang iglwang, Dahos nwa kanfwalid sas sorat. Ha fag fwalid im ngayan hanggan fag sorat kitay walo dik safolok sako kam bayadan. ⁸ Kat fon nafaanod yadi kitay kat sogowan madaya madonong yadi kalig it halimbawan. Maskin ka taga istay is baba daga madonong man in Diyos sakop no gamigosan hat manga kapariho. ⁹ Is Hisos igfadagos wat toltol, iglwang, Yakanga hogfwayong hayo, nyawa ham domisag hayo kaakwaan has taw istay is baba daga, kaarakitay ham ha akwa fakilalaon, nyawa hayo kaakwaan mamin wan, ha tomanggap yapdi hayo sas oliyanan kadwa ha katabowan. ¹⁰ Ka taw no fiya no gano ka ogbot fag bagay, omano yadi fiya ka dahol fag bagay. Kagdaya has ogbot di fag bagay, igdaya man di has dahol fag bagay. ¹¹ Ham nodwa twa gano kastay sas baba daga fag manga kaakwaan, fakta ka faano ha hayo ka orongan wa kaakwaan ham gayfan? ¹² Ham nodwa twa gano kasta kaakwaan iba taw, fakta ka domisag kaakwaan orongan ha hayo sadili, ham gayfan? ¹³ Halimbawa, it fon no dow, idwa ha taw ka syagan igfasohodan katanog fagayo dow pariho. Ma-tohoyanan ha fagfiliyon, ngatay kawili it fon sadi, ginya kadwat iglag kat fadowa, ngatay katanog fiya fiya ka sadi, dapat igfasigpala wa kat fadowa. Ham idwa syagan katanog in Diyos igsohodan has kaakwaan. ¹⁴ Manga Farisiyo ka kaingli has kwarta baliwa nayod wan Hisos no nadog it toltol kitonya. ¹⁵ Yakangas Hisos nafwayong has manga Farisiyo kiti, Ham igfalagon odi has taw kitay hayo ogali fiya, dapat is Diyos fadi wadaglag hayo manga fangayofan. Maskin ka manga taw fagfadaholon ka manga ogali kadwa fiya san Diyos faglagan. ¹⁶ In Mwisitogon hanggan in Diyos manga fangampang nasorat igdasog yadi wa han Hwan kagfatogna manga taw. Ginya wa ginan ka Fiya fag Barita indog wan kawa han Diyos sakop baliwa. Yakanga fagayo fag manga taw igpilit wa kasakbaw han Diyos sakop. ¹⁷ Dapat ay malpos man nangos ka

banwa sam tongod hanggan ka daga nomliyam, halimbawa, hasagfaliyam ngadi sadik sorat it karigonan sas Batasan Hodyo. ¹⁸ Ginyas Hisos iglwang, Ka ama ka gobon it babay, ginyag babay has iba ina, yagfabayowan wa tonya. Hanggan ka ama kagbabay hasta nagobonan ina, yagfabayowan yadi. ¹⁹ Ginyas Hisos nafahalimbawa ya ngay, iglwang, Ha sadik ama, it manga rotay kawa myasa wa dahol it sali, aywan ya ngadit manga fanganon fiya, sirang sirang. ²⁰ Ha akwa yadi sadik ama is Lasaro, myabog myabog, maigyanan odi dayo sakbawan balay maakwa. Sadi wak habilogan bangbangon wan. ²¹ Is Lasaro kasamok ngadi ka manga tingaw ka kadagdag gis maakwa fanganan basad nigo. Bohondi tonya, ka manga ido gakbang han Lasaro, igtimos it manga bangbang. ²² Aban is Lasaro natay wan, ginya manga anghil nataban in Lasaro, nafatokaw hanya san Abraham sayangowan. Ka ama maakwa natay yadi wa a, ta nalobgob wa hanya. ²³ Tonya fag taw maakwa hawas sadik hadasogan, sinya wa ka manga natay kamdosa basad afoy. No kahori wa dahol dahol, natangdan has tongod, nalag in Abraham sas ayayo sas tongod, hanggan is Lasaro matokawan san Abraham sayangowan. ²⁴ Ginya ka ama maakwa natawag marigon, Hyami ama Abraham, ha fakaawa wangko. Ha sogowan in Lasaro fatolsokan it tobwan timoyo ha basad danom, ginya fayamosan angko dila, kawa ho gwayan wa kahori istay basad afoy. ²⁵ Dapat is Abraham nalwang hanya, Gwadi anak, haw fag tohod kitay myasa wa fiya im lagan haw no sas baba daga yapdi, dapat ay, kan Lasaro nadalanan mahori fagaba sinya. Kati hanya ka ha kahowayan istay, haw man ka galibitan fagaba sas fadosaan. ²⁶ Ginya madi, labi man inya, santam fagbokngan ha sadik gobang abwat abwat, kaarakitay ka gistay idwa somyagan has nyamo hayo hanggan ka gis nyamo hayo idwa yadi somyagan hastay. ²⁷ Yakanga ka taw maakwa nalwang, Hyami ama Abraham, no kitonya, hogfaaronan hyamo kitay, ha sogowan nangos in Lasaro hangko ama balay, ²⁸ maskin angko fadwasay ama lima ya sinya. Sogowan in Lasaro hanya kaarakitay igfatagak angko manga fadwasay, fag idwa hastay nangos has fadosaan ista hadasogan. ²⁹ Dapat is Abraham igfwayong ya hanya, Gwadi in Mwis mangga togon hanggan in Diyos manga fangampang nasorat sadis taw, ta fag tomalinga wa tonya. ³⁰ Ka ama maakwa iglwang ya, Hyami ama Abraham, korang di tonya, dapat sadik natay inboyag ya no somabang has taw, yabay ta somoyo wat manga ogali dwat. ³¹ Is Abraham nasagot hanya, Ta no dayog talinga in Mwis togon hanggan in Diyos manga fangampang nasorat, nyawa sadik taw imboyag ya, tadwa yadim tiwala.

17 Ginya madis Hisos nafwayong hat manga katogbong, Tam idwa syagan igbaybay kitay idwa hagfaloksowan manga taw has ogali dwat. Dapat

isyay wan kagfaloksowan kitonya. ² Fiya man ha hanya ta no somiyok sadik bato gilingan sat boknga liyog, ginya omokas hanya ha basad dagat kaarakitay idwag fadagos igfayayom has ogali dwat ngadi sadik anak ogbot to. ³ Yakanga ham fag matagahan. Kam fadwasay no ha naibolon dwat ha hyamo, haw fakabaya hanya, ginya hanya nogsoyo, haw fag faliyam wa tonya kat naibolon. ⁴ Nyawa hanggan wa balis fito ginan sadik sirang, hanggan kayabi, hanya no gibolon dwat ha hyamo, dapat fito yadi ginan no omakbang ha hyamo, igsoyo, haw fag faliyam wa tonya fagayo kat naibolon dwat. ⁵ Ka manga Fandiya-Barita igfwayong hasagfon intam, Ha farigonan hyami, hami nogsyag ha hyamo. ⁶ Kagfon intam igsagot, Ham nogsyag hangko ngadi ogbot ogbot, dahos botol mostasa ogbot, haw somyagan lomwang has nwa fag fon hayo, halimbawa, Haw fag imgoyod wan gi basad daga, ha fag hawas basad dagat nomtanom. Yakanga im-anod wa kam fwayong hanya. ⁷ Ginyas Hisos iglwang, Halimbawa, insadi sa hayo no ha sogowan gadado, ngatay gano topa, it sogowan no mwali gis iyab, haw awkin lomwang has sogowan, Haw fag hastay, fag haw ka kwan yap, ham gayfan? ⁸ Yatokitay, idwa awkin haw lomwang kiti, Fatalagaan yap angko yafon, ginya tobosan im rotay. Haw fag sayapdingko akbang, haw fag lag yapdingko manga fafa, manga danom, ho no kasamok yapdi. Ginya madi haw man araw ka homwan, ho nomtabo wa kwan. ⁹ It sogowan no katanog di ista sogo, fag idwa gayfan kitay it fon fagabag fasalamat hanya. ¹⁰ Ham fag kitonya yadi, ham nomtanog wa fagayo, fag idwag fatakagdog is taw, ham fag lwang odi kitay, Hami it manga sogowan kadwa bangan, mi katanog odi hyami bato ibolonon. ¹¹ Da Hisos noglahaw yapdi has Hirosalim, nadalan has fagbokngan sakop Samariya hanggan sakop Galiliya. ¹² Da Hisos nondasog ha sadik forowan balay, safolok taw ka ha sagit kitong natagbo hanya. Ta natorosan sas ayayo ayayo ogbot, ¹³ natawag marigon, Hisos, hyami Fon, haw fakaawa hyami nangos. ¹⁴ Is Hisos no nalag ka manga ha sagit kitong, nalwang has taw, Nyawa ham iglahaw wa kati, ham falagan hayo has manga fagalan-han-Diyos. Ginya madi, ta noglahaw yapdi, kasta sagit kitong in fiya wa boknga dalan. ¹⁵ Insadi no nalag kitay hanyan fiya wa mangharaw, infwali ya han Hisos, igtawag marigon, igfasayagdog in Diyos. ¹⁶ Nanlohodan han Hisos atobangan a, nabaya wa dahol hanya, maskin hanya in fiya wan. To fag taw kagbaya, taga Samariya. ¹⁷ Is Hisos iglwang, Idwa awkin safolok taw kanfiya haraw, hadawa mayon ka siyam? ¹⁸ Idwa awkin hanfwali igfasayagdog in Diyos no bohonwa to fag sadik ama ka bohonwa Hodyo? ¹⁹ Is Hisos nafwayong hasagbaya, Ha fag kabangon wan, fiya di, nyawa ha goli wa kati, kawa haw nogsyag angko, haw in fiya wan. ²⁰ Sadi ginan manga Farisiyo

gintaw in Hisos, Ginahin fag masohod in Diyos sakop nomlag? Is Hisos nasagot kiti, In Diyos sakop fabagowanan idwa ha hoyog manga falagon madolaw. ²¹ Idwa yadi ha syagan lomwang, Lag ngay, in Diyos sakop igfabago wan ngatay istay, ngatay sinya, maskin ka orongan in Diyos sakop danwastay sas manga fangayofan taw. ²² Ginyas Hisos iglwang hat manga katogbong, Nomdasog gis nanya fag masohod aban, no kitay di, ham gwayan wa kasaya lomang angko, Aho Kanbali Taw, igbahala ngadi sadik sirang, dapat ham idyapdi lomang gis nanya. ²³ No ha taw igfasayagdog hayo kitay, Aho Kanbali taw sinya wan, ngatay istay wan, ham fag idwa hanya kaarakitay ham bomantay. ²⁴ Maskin gis nanya fag sirang kamtohoayan aban, aho, Kanbali Taw, imdasog bilang wa hilat igyawa sas banwa sam tongod, gim lward has bohid. ²⁵ Dapat ka fiya, aho, Kanbali Taw, aho fag omagwanta yapdi aywan fag manga mahori hanggan ka kati fag manga taw domayo yadingko. ²⁶ Aho Kanbali Taw, no kadasog aban, kitos gonaw hyabi san Nowi fag kaso-hodan. ²⁷ Gis nanya hyabi, ka daga nodyan gonaw, manga taw kwan hanon, manga ginom, mangag babay, manga gindogan, mangag tomboy it anak has anahan has dayaga, hanggan was Nowi insahay hat basad sahayon baloto. Sadi wa ginan ka gonaw indasog a, tanlogom wa fagayo. ²⁸ Kitonya yadi ista manga ogali san Lot fag kasohodan, ka manga taw kwan hanon, manga ginom, tibag balidya, tibag sali, mangag tanom, manga kalig balay. ²⁹ Dapat ay, is Lot no nalagyo gis Sodoma, ha afoy hanggan asopri bilang wa mwayan gis tongod, tansonog wa a, inyangaw wa fagayo. ³⁰ Aho Kanbali Taw no kabangkad aban, kitonya yadi kamlag, ka fakaaywanan fag manga taw idwa matalagaan. ³¹ Gis nanya fag sirang no ha taw sas sokayan balay, fag idwag sakbaw kaarakitay bomol yapdit manga botang git basad balay. Hanggan ka sas iyab fag fawa golingan has manga bagay sat ginanan. ³² Ham fag tohod in Lot babay nadalanan. ³³ Nyawa faktaw not sadili odi haboyagan it fagisipon kaarakitay fadogay tonya, imliyam di. Dapat kadwa kwangit it haboyagan kawa hangko, it haboyagan domogay hanggan aban aban. ³⁴ Hogfwayong hayo kitay ha dowak taw matoyogan sa sadik igyanan gis nanya fag yabi aban, insadi im-anggong wan, insadi imgoyan di. ³⁵ Ha dowak ina aban igtarogbongan iglobok gis nanya fag sirang, insadi im-anggong wan, insadi imgoyan di. ³⁶ Ha dowak ama gibolon sas iyab insadi im-anggong wan, insadi imgoyan di. ³⁷ In Hisos manga katogbong naintaw, Haw kagfon hyami, siday tonya aban? Is Hisos nasagot, nafalimbay kiti, No siday ham iglag ka manga boyaw hagang igtifonan, ya sinya wa ka habilogan natay.

18 Ginya madis Hisos igfwayong has taw sadik halimbawa, kaarakitay igfaadal has taw kitay, ta fag

fagabag darangin, fag idwa kalombay ista manga fangayofan. ² Is Hisos iglwang, Sa sadik banwa ha sadik fangabaya kadwa kadala in Diyos, idwa yadi magalang has taw. ³ Ha akwa yadi sadik ina balo sinya fag banwa ka fagabag syag has fangabaya. Ka ina fagabag sagad kitay, Togbongan angko, fatabo hyami hampangan maskin ha akwa igfahorihan angko. ⁴ No kayodak swali ka fangabaya kafang yapdig togbong ka ina balo. Dapat no dogay, it fangayofan iglwang, Nyawa ahodwa kadala in Diyos, idwa yadi gomalang nyawa hada fag taw, ⁵ ho tomogbong fafiyan to fag ina fakahorihan, maskin hanya fagaba waglibang angko, homyaya waglag hanya nogswaliyan wagswaliyan nogsyag hangko. ⁶ Kagfon intam iglwang, Yabay, ham nadog ka dwat fag fangabaya fwayong. ⁷ Dapat is Diyos idwa kafang igfafiyan no ha taw igfahorihan it manga nafili kagsagad togbong gi hanya yabi sirang. Hanya dogay aw bago digtogbong, ham gayfan? ⁸ Yatokitay hogfwayong hayo, is Diyos dagos wagfafiyan ista fakahorihan. Dapat ay, aho Kanbali Taw nombangkad has-tay is baba daga, aho awkin ha lagon manga taw igsyag hangko, ham gayfan? ⁹ Is Hisos igfwayong to sadi yak halimbawa, igfatangon has manga taw kagfadaholon it sadili, kagsyag hat sadili kafiyan, dapat igyod ka tiba taw. ¹⁰ Is Hisos iglwang, Ha dowak ama, insadi Farisiyo, insadi fanohot bohis Roma, hawas Fanimbaan-Dahol kaarakitay mandarangin. ¹¹ Ka Farisiyo nalindog a, nogdarangin bilang odi ginas kiti, Diyos, hogbaya wa hyamo kitay ahodwa kito ka tiba taw ka mangag nahaw, mangag daya, mangag fabayowan, hodwa yadi kito kas nwa fag fanohot bohis. ¹² Dowa ginan sadik simba ahodwa kwan hanon kaarakitay igdarangin. Hogdisag yadi angko fasafolo gingko lagan fagayo. ¹³ Dapat ay, ka fanohot bohis Roma nalindog sas bahalan bahalan Fanimbaan-Dahol, idwa yadig bantay has tongod, igfogfog it sadili dobdob, maskin karongkot it fangayofan. Ginyag lwang, Diyos, haw fag kaawangko, ho sadik taw ha ogali dwat. ¹⁴ Hogfwayong hayo kitay hanya fag taw no nwali hat balay, it fangayofan inbali fiya san Diyos faglagan, dapat ka sadi idwan. Maskin nyawa faktaw kagfaabwaton it sadili, is Diyos igfalibaba di hanya, dapat kagfalibaba it sadili, is Diyos igfaabwat hanya. ¹⁵ Tiba taw nadiya han Hisos ista manga anak garogbot kaarakitay is Hisos tomawid it manga anak. In Hisos manga katogbong, no nalag kasta taban manga anak garogbot, ta nangabaya was taw. ¹⁶ Dapat is Hisos nafaakbang it manga katogbong, iglwang, Ham hawa kabaya ka manga anak no gakbang angko, fiya di. Ham fag idwag bando tonya, maskin ka manga ha fangayofan kitos anak ka omafo in Diyos sakop. ¹⁷ Ham fag tohod kitay nyawa faktaw kat fangayofan kadwa kitos anak ogbot nogfasakop han Diyos, tonya fag taw idwam aktom san Diyos sakop. ¹⁸ Ginya sadik fagtahinan Hodyo gintaw in

Hisos, kiti, Haw kagfaadal kafiyaon, kana ara angko bato ibolonon kaarakitay ho omafo haboyagan kadwa ha katabowanan? ¹⁹ Is Hisos naintaw hanya, Kana haw nogngayan angko kafiyaon? Is Diyos lamang ka kafiyaon. ²⁰ Haw fadi wadtwa ka manga Batasan Hodyo kitay, Haw fag idwag fabayowan, haw fag idwag fahatay taw, haw fag idwag nahaw, haw fag idwag bangdan is taw, haw fag idwag falamang im ama hanggan im ina. ²¹ Ka ama nasagot in Hisos, No kitay di, ginko yapdi ogbot ginan, ho katanog wa tonya fagayo. ²² Is Hisos no nadog it sagot, hanyag lwang, Dapat haw ha korang yapdi sadik fakatwawon. Haw fag fasali im manga botang fagayo, ginya fahafodan has manga myabog it manga sali. Yabay no kitonya, haw ha akwa wa kaakwa san Diyos banwanan sam tongod. Ginya madi ha fag hayastay, tahinan wangko. ²³ Dapat ay ka ama inrongkot no nadog kitonya maskin hanya maakwa wa dahol a, nahwangit it kaakwaan. ²⁴ Is Hisos nogbantay yapdi hanya, iglwang kitay, Ka maakwa fag manga taw mahorig fasakop han Diyos. ²⁵ Malpos man ka hayopan kamilyo nogdalan has basad toho dagom has taw maakwa nogfasakop han Diyos. ²⁶ Ka manga nadog is Hisos nogfalimbay kitonya naintaw, No kitonya mangharaw, fakta fag manga taw kambawi? ²⁷ Is Hisos nasagot is taw, Is Diyos syagan gibolon kagsagaya fagsyaganon taw. ²⁸ Ginyas Pidro iglwang han Hisos, Lag nga hami, mi naobon hyami manga banwanan hanggan igtahin wa hyamo. ²⁹ Ginyas Hisos nafwayong has taw, Hogfwayong ha hayo, bonwa bohag, nyawa faktaw ka gobon yap it balay, ngatay it babay, ngatay it manga fadwasay, ngatay it manga magorang, ngatay it manga anak maskin galwasi in Diyos sakop, ³⁰ hanya tomanggap yadi aywan ginan iglabi man kat naobon ka kati fag masohod, ginya madi, gis nanya fag masohod aban nomdasog, ha akwa yadi haboyagan kadwa ha katabowanan. ³¹ Is Hisos nafasaman ka Safolo-ha-Dowa gis fakaaywanan fag manga taw, ginyag lwang has taw, Yabay, tam hawam bohid has Hirosalim kati. Fagayo kan Diyos manga fangampang nasorat hyabi, kawa hangko, aho Kanbali Taw, im-anod wa sinya. ³² Ta fabahala angko has manga Hintil. Ka manga Hintil yomod angko, mahaya yadi it ibolonon hangko aban, ta tomofay ya ngadingko. ³³ Ta bomakbak angko, fahatay yadi, dapat ay, homboyag ya sas fatolo fag sirang. ³⁴ Dapat in Hisos manga katogbong idwa natwagdog it donggon. Idyan angay kitay ta fag tomwa yapdi, tadwa nasalom no kana tonya kan Hisos nafwayong. ³⁵ Da Hisos no kaakbang has banwa Hiriko, sinya ha sadik ama bota matokawan sas bilog dalan, igsagad igsagad odi. ³⁶ Ka ama bota no nadog kitay kaaywanon fag manga taw igdalan sat akbang, naintaw no kana ka sinya. ³⁷ Taglwang hanya kitay, is Hisos, taga Nasarit, igdalan wan. ³⁸ Ginya madi yabay, ka ama bota

igtawag marigon, iglwang, Hisos, in Dabid hasokfonan anak, haw fakaawa wangko. ³⁹ Ka manga taw balis fagonan fakaaywanan nangabaya hanya, idwag faawang nangos, dapat ka ama bota kadahol di ngap nogtawag, igsakitan wan, In Dabid hasokfonan, haw fakaawa wangko. ⁴⁰ Yakangas Hisos intorosan sinya, ginya nafasognod has taw, iglwang, Tabanan hastay tonya fag ama. No naakbang, is Hisos gintaw hanya, ⁴¹ Kana kam fakasayaon angko togbongon ha hyamo? Hanyag lwang, Angko Fon, angko mata fag imfoga ya nangos. ⁴² Is Hisos nafwayong hanya, Im mata fag imfoga ya kati. Haw infiya wan maskin haw igsyag wa hangko. ⁴³ Gis nanya yadi dagos wanfiyat mata. Yakanga ka amag tahin wan Hisos, igbaya han Diyos. Manga taw no nalag kitay infoga it mata, fagayo nafasayagdog in Diyos.

19 Ginya da Hisos igdalan has banwa Hiriko. ² Ha akwa sinya fag banwa sadik maakwa fag fag-tahinan fanohot bohio Roma, kawas Sakiyo. ³ Hanya gwayan wa kasaya lomang no faktas Hisos. Dapat, maskin hanya sadik ama libaba libaba odi, aywan fag taw igfarom hanya, hanyadwag lag in Hisos. ⁴ Yakanga hanya nadalandan hasta fagonan madali madali a, nafanyak has tongod fon hayo sikomoro kaarakitay lomang in Hisos, ta nogdalan sinya. ⁵ Is Hisos nondasog sinya sat masohod, natangdan has tongod a, iglwang han Sakiyo, Sakiyo, kalibang, haw fag dokson gis nyamo, maskin kati aho fag migya wa ham balay. ⁶ Yakangas Sakiyo madali odin dokson gis tongod sikomoro, igbaya wa dahol dahol igtahan in Hisos. ⁷ Fagayo ka nalag kitay is Hisos igtahin in Sakiyo, ta gidginasan gidginasan wan, taglwang, Is Hisos igtahin ha sadik taw ha ogali dwat, migya hat balay. ⁸ Ginya madi araw, is Sakiyo nafwayong hasagfon intam kiti, Angko Fon, hogfabokngan wan kangko kaakwaan. Kati yabay ho domisag wa has manga myabog it baliw. Hanggan aho no ha nadaya nyawa faktaw, no sadik kangko nadaya hanya, ho domogang ya tolo ya, yabay inbali ofat kangko fawaliyon hanya. ⁹ Is Hisos iglwang han Sakiyo, Kati ka Famawi ibolon igsakop wa hastay fag talanahan kawas Sakiyo in Abraham yadi hasokfonan. ¹⁰ Maskin Aho, Kanbali Taw inbangkad hastay, kaarakitay ho somayak, bomawi ya ka mangan liyam. ¹¹ Manga taw no matalingan yapdin Hisos, is Hisos dagos wagtoltol sadik yak halimbawa. Is Hisos natoltol to fag halimbawa maskin hanya kadasog wa has banwa Hirosalim, hanggan manga taw gasolop kitay, ngandayo is Hisos dagos wa farigon in Diyos sakop sinya. ¹² Yakangas Hisos igtoltol kiti, Ha sadik ama it manga hafofowan ha kangayanan abwat, iglahaw has ayayo fag banwanan kaarakitay ta fabali hanya gorangon. Ginya aban, nombali wa gorangon, goli ya. ¹³ To fag ama, nodyan ginan git balay, nafatawag it manga sogowan safolo a, nafahafod myasa sadik daan piso.

Nafwayong hat manga sogowan, No baliday hodya mwali, to fag kwarta ngatay ham fag sali, ginyag fasali ya domwag kaarakitay lomag tobo. ¹⁴ Dapat kat manga sakop, ka bohonwat sogowan, ka myasa wa ginya, kadwat wa dahol iglag ka kabali ista gorongan. Yakan-ga hanya nonlahaw wan, ta nafasonson it manga sogowan hasagbahala kaarakitay lomwang, Mi dayo kitay to fag taw fag idwam bali hyami gorongan.

¹⁵ Ginya madi aban, hanya nonbali wa gorongan, nwali ya ngawat balay, nafatawag ya nga kat manga sogowan it nagdisagan manga kwarta kaarakitay tomwa no dahoday fagayo kasta nafatobo. ¹⁶ Ka bago bago fag sogowan naakbang has gorongan, nalwang, Angko fon, hyamo nafaano angko kwarta sadik daan piso, ho nafatobo safolok daan. ¹⁷ Ka gorongan nasagot, Yabay kafiyaon, haw fiya fag sogowan, kawa haw naano fiya, nyawa ogbot fag halga, kati aho fabahala hyamo ha safolok banwa. ¹⁸ Ginya madi kat fadowa fag sogowan naakbang yadi hanya, nalwang, Angko fon, hyamo nafaano angko kwarta sadik daan piso, ho nafatobo limak daan. ¹⁹ Ka gorongan iglwang ha hanya, Ho fabahala hyamo has limak banwa. ²⁰ Ka sadi yak sogowan naakbang has gorongan a, nalwang, Angko fon, to kam nafaano kwarta hangko sadik daan piso. Ho nasafot sas basad taong, ho natago odi.

²¹ Hondala digfatobo maskin haw mahigpit wan nogsohot, nyawa ka bohonwa hyamo naano, haw igbol di, ha gani wan, nyawa bohonwa ka hyamo nafamgas.

²² Kat fon iglwang, Idwa fiya fag sogowan haw. Gim sadili bibig hampang hogfathoyan hyamo has fadosaan. Gwadi ha mangharaw danwa twa kitay aho mahigpit, haglwang kitay ahogbol ka bohonwa angko, aho gani ka bohonwa angko nafamgas. ²³ No kitonya, kana mayon ha nodwa nafwalid angko kwarta sas fanifonan has famotangan? Ginya ha tobo yap man araw aho nogbol ginya, aho no nwali. ²⁴ Ka gorongan iglwang hat manga ofod sinya, Ham bol wa gi hanya ka kwarta sadik daan piso, disagan tonya fag sogowan ka ha safolok daan. ²⁵ Taglwang, Hyami fon, gwadi ka hanya aywan man, safolok daan piso. ²⁶ Ka gorongan iglwang, Hogfwayong ha hayo, fagayo ka ha nafatobo wan ha tanggapon ya domwag, dapat kangko nadisag kadwa ha nafatobo, ho ngap bomawi ya ginya. ²⁷ No ka man has mangag laban angko, kagdayo angko, fag nangos bohonwa aho kasta gorongan, tabanan hastay tonya fag manga taw, fahatayan sangko faglagan.

²⁸ Nontabo wagtoltol kitonya, da Hisos nadagos wa has bohid has banwa Hirosalim baliwa. ²⁹ Ta no gakbang has tifonan balay sas Bitfagi hanggan Bitanya, sas Moyod Oliboan, is Hisos nafagonat manga katogbong dowa. ³⁰ Is Hisos igtogon kitay, Ham fag hawas masoson fag tifonan balay. Ham araw nomdasog sinya, ham dagos lomag sadik anak habayo libaba, matarabingan, idyapdi ha taw nasahay sinya. Lohasan

it tarabing a, goyodan hastay. ³¹ No ha gintaw hayo kitay, Kana ham noglohas tonya? Ham fag lwang, Kagfon intam kasayag sahay to. ³² Yakangan Hisos nasogo hanya wan. Ta nalag nga ka anak habayo, no kinday in Hisos fwayong. ³³ Ta noglohas yapdi ka anak habayo tarabing, it manga fon gintaw, Kana ham noglohas tyamo? ³⁴ Taglwang, Kagfon intam kasayag sahay to. ³⁵ Yakanga ta nagoyod ka habayo libaba han Hisos, ginya madi ta no nasagmak wan it manga rotay aba has baba goyoy habayo, ta nafasahay in Hisos. ³⁶ Is Hisos noglahaw, manga taw igladlad it manga rotay san Hisos fagonan lahawan. ³⁷ Is Hisos no kaakbang has banwa Hirosalim igloslos has lwad Moyod Oliboan, kat tifonan manga katogbong fagayo fagayo igtarawagan wa kasolong iglag, igfasayagdog han Diyos kawasta lagan in Hisos manga naibolon madolaw fagayo. ³⁸ Taglwang kiti, Ka Gorongan ka kadasog hastay kati, san Diyos ngayan, fag bomaya wan. Fag ha kahowayan san Diyos banwanan sam tongod, hanggan fag kafiyon kamlag sam tongod im tongod. ³⁹ Dapat ay, tibak Farisiyo ka koyog has fakaaywanan iglwang han Hisos, Haw kagfaadal, haw fag kabayam manga katogbong. ⁴⁰ Is Hisos nasagot kitay, Hogfwayong ha hayo, taw nodwa omawang, matohoyanan wan ka odi manga bato ka romokyaw mamasayagdog angko. ⁴¹ Is Hisos no gakbang, kabantay has banwa Hirosalim, goraw wan. ⁴² Hanyag lwang, Hirosalim, haw nangos no dandi twa kati fag manga masohod, no kana fag manga bagay kagdisag kahowayan ha hyamo. Dapat kati to fag manga bagay inharom gi hyamo. ⁴³ Maskin no ginahin aba fag manga sirang, im manga kalaban somafong wa hyamo, fasafong yadi wa alad dahol dahol, ta somaklawan wa hyamo bali bali banwa. ⁴⁴ Ta homamin wa domwat hyamo aban, hanggan im manga anak basad balay dahol, ta mamin wa fahatay. Nga-di sadik bato idwa hamgoyan kagtarongbawan ha sadi ha sadi, maskin hadwa nabati in Diyos, dayo kadasog kaarakitay bomawi hyamo. ⁴⁵ Is Hisos nasakbaw basad aladan Fanimbaan-Dahol a, dagos nasogo has dayo alad ka mangag balidya. ⁴⁶ Nalwang has taw, Insoat san Diyos kasoratan kitay, Ngayanan angko balay, balay fandaranginan, Dapat ham nafabali angko balay, oliyanan odi manga fangnahaw. ⁴⁷ Is Hisos igfaadal sirang sirang basad aladan Fanimbaan-Dahol. Ka manga fagtahinan fagalan-han-Diyos hanggan ka mangag faadal Batasan Hodyo hanggan ka manga fagtahinan sas banwa Hirosalim, igsayak wa yabay no kinday no fahatay in Hisos. ⁴⁸ Dapat tadwag lag it halimbawan kaarakitay fahatay hanya, maskin fagayo fag manga taw igtalinga wa fiya fiya is Hisos nogfaadal.

20 Ginya madi aban is Hisos nogfaadal yapdi hanggan igtoltol ka Fiya fag Barita has manga taw basad aladan Fanimbaan-Dahol, ka manga fagtahinan fagalan-han-Diyos, mangag faadal Batasan

Hodyo hanggan manga fagtahinan sas basad banwa naakbang hanya, ² taglwang han Hisos, Ha fwayongan ha hyami, kanam kangayanan haw no gibolon to fag manga bagay. Fakta ka nadisag hyamo kangayanan gibolon kitonya? ³ Is Hisos nasagot has taw, Ho ngap omintaw yadi hayo, ham sagotan angko. ⁴ Ginday kanginan in Hwan kangayanan nogfatogna manga taw, ngatay gin Diyos banwanan sam tongod, ngatay gis taw? ⁵ Ta nanoltolan yapdi kiti, Tam no lomwang kitay giwam tongod, is Hisos lomwang ara hantam, no kitonya, kana mayon ham nodwa katiwalan Hwan hyabi? ⁶ Dapat tam no lomwang kitay gi odis taw, ka manga taw bomintok fahatay intam maskin ta katiwala kitay is Hwan in Diyos fangampang. ⁷ Yakanga ta nasagot in Hisos, Midwa twa no ginday in Hwan kangayanan. ⁸ Ginyas Hisos iglwang has taw, Ho balaw yadi mamwayong hayo no ginday angko kangayanan aho no gibolon to fag manga bagay. ⁹ Ginya madis Hisos igfabago igfahalimbawa ya has taw, iglwang kitay, Ha sadik taw nananom manga obas sat baba iyab, nafabahalat obasan hat manga fangano, ginya nalahaw has ayayo, dogay idya nwali. ¹⁰ Nondasog was famohadon, no famangtaon wan, kagfon obasan nasogo wat sogowan sadi, kaarakitay bomol ista horay hanya gis bohad obas. Dapat ay, ka manga gano obasan nabakbak di ngap kat fon sogowan, ta nafaoli wa gominan idwa ha diya. ¹¹ Ginya kagfon obasan nasogo has manga gano obasan sadi yak sogowan, hanggan yadi tonya ta nabakbak, ta nafahayan ya ngadi hanya, nafaoli wa gominan, idwa ha diya. ¹² Kagfon nasogo ya kat fatolo fag sogowan. Ta naisog di ngap hanya, hanggan wa nafabaran, ginya naokas lamang ha dayo alad. ¹³ Ginya kagfon obasan iglwang, Kinda odi angko halimbawan? Yabay, ho somogo angko fakaawaon fag anak, ngatay ta gomalang wa hanya. ¹⁴ Yatokitay, ka manga fangano obasan no nalag di ngap it anak, tagtololan kitay, To wa aba ka omafo it ama kaakwaan, kalibang, tam fahatay wa hanya, ngan aba tam wa ka omafo ka obasan. ¹⁵ Ginya ta nagoyod wa hanya has dayo obasan a, nafahatay wa sinya. Kana araw, ham gayfan kagfon obasan ibolonon hat manga fangano? ¹⁶ Kagfon hawas obasan fahatay yadi wan ka manga gano sinya, ginya faano has iba fag manga taw ka obasan. Manga taw no nadog in Hisos toltol, taglwang, Liwas, liwas, fag idwa nangos im-anod tonya. ¹⁷ Dapat is Hisos nabantay fiya fiya has manga taw, ginya nalwang, Tonya nodwam anod, kana arat kahologan kansorat sas Kasoratan noglwang kiti, Kasta fagdayoon fag bato, ka manga fangalig balay, Tonya di ngap kagfaganit ka balay sas basad solok. ¹⁸ Kamdagdag has nwas baba bato imbolang ongay, dapat ay, kamlibit sas balis daga bato, ka bato nomdagdag ha hanya, imrogrog lamang. ¹⁹ Ka mangag faadal Batasan Hodyo, hanggan manga fag-

tahinan fagalanhan-Diyos mabantayan madogan in Hisos natoltol halimbawa. Ta kasaya nangos gomamat hanya dagos, maskin ta nasarom kitay, kawa ngap ista manga sadili in Hisos fagfatangonon sat natoltol halimbawa, dapat ta kadala yapdi has fakaaywanan fag manga taw. ²⁰ Yakanga tagbantay han Hisos fagaba. Ta nasogo tiba taw kaarakitay igfalagon odi kitay tagsayak ka fakaoronganan no gintaw in Hisos, ginya tagsolay di hanya, igfasalan nangos no kampung kaarakitay ta ha fagsombongon nogfagamat in Hisos, igfabahala hanya has gobirnadador Roma. ²¹ To kasta nasogo fag manga taw igmaswag odi iglwang han Hisos, Haw kagfaadal has taw, mi twa wa kitay hyamo manga fwayong hanggan faadal igtoon wa fiya fiya. Hadwa ha fagihidon taw. Sonson wa orongan kam faadalon has taw kan Diyos fakasayaon ista manga ogaliyon. ²² Maangay awkin sas Batasan Hodyo tam nogbayad bohis han Sisar, ngatay idwan? ²³ Dapat is Hisos igсарom kitay tagtikis wa nangos igfasalan hanya, yakanga hanyag lwang, ²⁴ Falagan angko sadik kwarta mabilog. Gafo tolad hanggan ngayan kansorat is nyamo? Tagsagot, In Sisar wa nga tolad tonya. ²⁵ Ginyas Hisos iglwang, No kitonya, kan Sisar disagan wa han Sisar, kan Diyos disagan wa han Diyos. ²⁶ Yakanga tadwa syagan giktan in Hisos git hampang sasta fagdogan fakaaywanan. Tandolaw odi in Hisos sagot, ta kyabog it bato fwayongon, fawa ha naawang domwag. ²⁷ Ginya madi tibak Sadosiyo kagfabohag kitay ka manga natay idwam boyag ya domwag, gakbang in Hisos. ²⁸ Taglwang kitay, Haw kagfaadal has taw, is Mwis is nasorat it togon hantam kitay, sadik ama no ha fadwasay ama natay, dapat it babay in-goyan dit indogan, idwa ha anak, ka ama fag babay kat tagyaw kanbalo, kaarakitay no ganak, bilang mandi ka natay it ama. ²⁹ Yabay, ha tasayan fitok ama kag-dowasayan. Kasta ahan nababay. Yabay natay wadya ha anak. ³⁰ Ka masoson it ahan nababay it tagyaw kanbalo a, natay yadi wan. ³¹ Kitonya yadi kat fatolo hanggan wa kat fafito, fagayo nababay wat tagyaw nonbalo. Tasayan nangolbosan, nababay ka ina, dapat fagayo natay wadwa ha anak. ³² Ginya madi no has ginnan ka ina natay yadi wan. ³³ Yakanga, gafo babay tonya fag ina ta nomboyag ya aban, kawa ka fitok tasayan nababay hanya istay? ³⁴ Is Hisos nasagot kiti, Manga ama igbabay hanggan manga ina gindogan no kati yapdi fag masohod. ³⁵ Dapat ay, ka manga ama hanggan ina ka fiya lomag ka aban fag kasohodan, ka maangay yadim boyag ya gis kahatayan, fawag babay, gindogan gis nanya aban. ³⁶ Fayadi wa matay domwag, kawa tambali kito yadi wa ka anghil, idwag babay idwa yadi katay. Hanggan tonya fag manga taw in Diyos wa nga anak maskin inboyag ya domwag. ³⁷ Nyawas Mwis wan igfaoronganan wa kitay ka natay imboyag ya. Maskin is Mwis no nalag ka fon hayo

libaba gigang hyabi, gis nanya is Mwis is nangayan in Diyos kitay, In Abraham wa Diyos, in Isaak wa Diyos hanggan in Hakob wa Diyos. ³⁸ Yabay ka manga taw boyagan lamang kan Diyos fagsakopon, bohonwa ka manga mahatayan. Fagayo ka san Diyos boyagan wa fagaba. ³⁹ Tiba kagfaadal Batasan Hodyo iglwang han Hisos, Haw kagfaadal, kafiyaon im sagot. ⁴⁰ Maskin manga taw idwag bongol gintaw ya domwag in Hisos. ⁴¹ Ginyas Hisos gintaw has taw, Kinday ta no twag lwang kitay kan Diyos-natogon-Famawi in Dabid wa hasokfonan anak? ⁴² Gwadi is Dabid yadi wa ka nalwang sat sorat sas manga Ambahan, Is Diyos nafwayong hasagfon angko, Haw fag matokawan yap sangko balis sihon ⁴³ No kandogay day hodya nafasakop fiya fiya ha hyamo im manga kalaban. ⁴⁴ Yabay is Dabid mandi ka nangayan in Diyos-natogon-Famawi, kagfon hanya. Kinday hanya nogfon in Dabid, not sadili odi hasokfonan anak, ham gayfan? ⁴⁵ Fagayo no matalingan yapdi hanya, is Hisos igfwayong hat manga katogbong kiti, ⁴⁶ Ham fag idwag sokfon ka mangag faadal Batasan Hodyo manga ogali. Ta kasayag solong manga rotay aba aba, hanggan ta gwayan wa kasayagdog manga taw nogbaya hanya ta no gayayag basad banwa. No sas basad manga fanimbaan, ta kasayag tokaw sas fanokawan ka manga ha kangayanan, hanggan ka manga fanokawan akbang hasagfon balay no sasta fanyahodan hanon aywan. ⁴⁷ Bohondi tonya, taglogos wa ngap manga ina balo banwanan, hanggan ista odi famadogan is taw ta nogdarangin kadogayon. Ka fadosaan kamtohoyan has taw aban mahori man ka tiba taw.

21 Gis nanyas Hisos mabantayan has manga taw maakwa ta nogfwalid it manga disag basad haban fandisagan kwarta sas Fanimbaan-Dahol. ² Ginyas Hisos nalag sadik ina balo myabog igfwalid yadi ka hanya, dowo odik saga. ³ Is Hisos iglwang, Hogfwayong ha hayo, bonwa bohag, to fag ina balo myabog, it disag mahalga man kasta disag ka manga maakwa. ⁴ Maskin ka tiba nadisag gi odista labi, dapat to fag ina balo myabog nadisag wa ka hanya sadik kayonya. ⁵ Gis nanya yadi tiba taw nabaya ka Fanimbaan-Dahol kawa fiya wa kabantay ka manga bato ista nahalig sinya hanggan kasta manga nadisag kanfwalid sinya, myasa wa fiya kabantay. Dapat is Hisos iglwang, ⁶ Nomdasog gis nanya fag masohod aban, ka hayo faglagon kati tyamo, idwa hamgoyan ngadi dowak bato igtarongbawan, fagayo imrofad lamang. ⁷ Yakanga ta gintaw in Hisos, Haw kagfaadal hyami, ginahin fag masohod aban ka Fanimbaan-Dahol nomdwat? Kana fag falagon madolaw kamlag aban kagfatohoyan kitay to kaanod wan? ⁸ Is Hisos nasagot is taw, Ham fag matagahan, ham fag idwa gadayaan nyawa faktaw, maskin aywan kambangkad aban, ngomayan yadingko ngayan, lomwang kitay, hanya wa kan Diyos-natogon-

Famawi. Ka manga taw lomwang yadi, Kati fag masohod kan Diyos nafatohoyan. Ham fag idwag tahin kaglwang kitonya. ⁹ Ham no domog aban manga bari-ta awayan, ngatay kaid-isogan, ham fag idwa galibitan, maskin talaga wa kitonya kamlag aban, dapat bonya tonya ka katabowanan dagos. ¹⁰ Ginyas Hisos iglwang has taw, Manga layonan daga dahol manlabanan, kitonya yadi ka sadik gorangon sakop lomaban ha sadik gorangon sakop. ¹¹ Ha manga linog dahol dahol hanggan no siday no siday fag banwanan, idwa aba ha hanon hanon, hanggan ha manga fanalafod. Manga fakadalaon hanggan manga falagon madolaw imlag yadi gis banwa sam tongod. ¹² Dapat bagom-anod to fag manga bagay fagayo, ta gomamat yapdi hayo hanggan fahoriyan hayo. Ta fagamat hayo hasagbahala sas manga fanimbaan hanggan sas manga porisowan. Maskin aho hayo fagalwasiyon, ta tomaban hayo has manga gorangon hanggan has manga gobirnadador. ¹³ Gis nanya fag masohod ham mamaorongan yadi sasta fagdogan. ¹⁴ Ham fag danwag fatohoyan sa hayo manga basad fangayofan gis kati kitay, ham idwa galibitan hayo bato sagoton gis nanya aban. ¹⁵ Maskin gis nanya ho domisag ha hayo katonongan hanggan fatohod hayo hayo bato hampangon has taw. Ngadi sadi sa hayo manga kalaban idwa syagan lomaban hanggan igfabohag hayo. ¹⁶ Ka yadi hayo manga magorang, ngatay manga fadwasay, manga kaiban, manga fakilalaon ka fagamat hayo has taw. Ta fahatay yadi tiba sa hayo. ¹⁷ Maskin aho hayo fagalwasiyon, fagayo fag manga taw kadwat iglag hayo aban. ¹⁸ Dapat ay, ngadi sadik ogat bok gi hayo alfoyo idwa hambohin. ¹⁹ Ham nodwag fagomon, ham tomanggap haboyagan orongan. ²⁰ Dapat ham noglag manga tifonan sondalo igsafong wa ka banwa Hirosalim, ham fag taw kitay tonya fag banwa kaakbang wamdwat. ²¹ Gis nanya aban ka manga taw sas sakop Hodiya fag danwag lagyo has moyod. Ka manga sas basad banwa Hirosalim, faglahaw wan, hanggan ka manga sas moyod, hawa goli has banwa. ²² Maskin gis nanya fag masohod aban, ka manga sirang fadosaan kawam anod fagayo ka Kasoratan fwayong. ²³ Isyay wan no ka yangadi manga gabosog hanggan ka ha manga anak ogbot, igfasoso yapdi gis nanya fag masohod aban. Maskin ka manga taw sas baba daga domog mahori wa dahol dahol gis nanya. Hanggan is Diyos omisog to fag layonan taw. ²⁴ Tiba ista kalaban fahatay. Tiba ta pomilit tomaban has fagayo fag manga layonan banwanan. Ka manga Hintil domaog, hanggan yomod wa fiya fiya ka banwa Hirosalim, no kandogay day kaanod kitay, manga Hintil kagbahala yapdi sinya. ²⁵ Aban ha manga falagon madolaw sas myanit, sas magdanon hanggan sas manga fang-gasan. Ka manga taw sas manga layonan daga fagayo sadik baba daga imhinol wan, tamdala yadi wan kawa

ka dagat nomsaribwaan, ka manga taob homatok wan. ²⁶ Manga taw imlobay wasdala kawa ta no gisip wa gisip wan ka mahori kamlag aban istay is baba daga, maskin ka manga karigonan sas boknga fakayawan imhadhawigan wan. ²⁷ Ginya madi yabay ta lomag wangko, aho Kanbali Taw, kadasog sas baba linyabo, ha karigonan dahol hanggan kangayanan abwat. ²⁸ Yabay, ham, no ha lagan wa kitonya fag manga bagay igfabago, ham fag kasolong wan, ya kaakbang wa ka bomawi hayo. ²⁹ Ginyas Hisos igfahalimbawa ya ngay, iglwang, Lag nga ka manga fon igos hanggan ka tiba fon hayo. ³⁰ Kat manga sanga nogfalongfong wan, tam twa wa kitay kafangaraw wan. ³¹ Kitonya yadi ham noglag to kangko manga nafwayong kaanod wan, is Diyos kaakbang wa somakop fagayo. ³² Hogfwayong hayo kitay, bonwa bohag, to fagayo im-anod wan ka kati fag masohod fag manga taw no boyagan yapdi. ³³ Ka banwa sam tongod hanggan ka daga imliyam wa aban, dapat ay, angko hampang idwam liyam, nyawa ginahin. ³⁴ Ham fag danwa matagahan, ham fag idwa kalibang has kasolongan fagaba, has manga fakalangoon, hanggan ha hayo manga fagisipon istay is baba daga tiba, kaarakitay tonya fag Mahalga fag Sirang idwa omiktan hayo kitos bitik. ³⁵ Maskin ka Mahalga fag Sirang tomahod has fagayo fag manga taw sadik baba daga. ³⁶ Yakanga nyawa ginahin ham fag matalagaan wan, fag fagabag darangin, kaarakitay ham syagan imtolas to fag manga bagay fagayo kam-anod aban, ginya somayango hangko, Aho Kanbali Taw. ³⁷ Gis nanya fag manga masohod, no sirang, is Hisos igfaadal sas basad Fanimbaan-Dahol, no yabi is Hisos sawas baba Moyod Oliboan hanggan wagfasirang. ³⁸ Yakanga marom yapdi ka manga taw hawas Fanimbaan-Dahol kaarakitay tomalingat toltol.

22 Gis nanya ka Fanohodan Tinapay Mayangfis kaakbang wan. Tonya fag fanohodan tagngayan yadi Fanohodan Nagsagayan, ta nogtohod ka anghil no nasagaya ista balay hyabi. ² Gis nanya ka manga fagtahinan fagalan-han-Diyos hanggan ka mangag faadal Batasan Hodyo igsayak yapdit halimbawan kaarakitay fahatay in Hisos maskin ta kadala ka fakaaywanan fag manga taw. ³ Ginyas Satanas hawan Hodas basad fangayofan. In Hodas bansagan is Iskariyoti, hanya sadi ka gis Safolo-ha-Dowa. ⁴ Yakangas Hodas inlahaw wan, igtoltol has manga fagtahinan fagalan-han-Diyos, hanggan has manga fagtahinan kagbahala sas Fanimbaan-Dahol, no kinday hanya no fagamat has taw in Hisos. ⁵ Tagbaya wan, taglwang han Hodas, Mi tomangdan wa hyamo. ⁶ Is Hodas nafaoyon was taw, hanggan gisip gis nanya no ginahin no somyagan fagamat has taw in Hisos nomsaman di gis fakaaywanan. ⁷ Aban ka sirang ta no kwan Tinapay Mayangfis indasog wan, hanggan gis nanya yadi fag sirang tagsogba ka anak topa fangafiyan, kawa hasta

Yafon Fanohodan Nagsagayan. ⁸ Yakangas Hisos igso-goinda Pidro da Hwan, igtogon kitay, Ham fag hanya wan fatalagaan intam Yafon Fanohodan Nagsagayan. ⁹ Da Pidro naintaw in Hisos, Siday nangos hyamo fakasayaon mi nogfatalaga? ¹⁰ Is Hisos iglwang, Yabay, nomdasog has basad banwa, ham homablang araw sadik ama ka ha songgoy tapayan fwalidan danom. Ham tahinan wa hanya hat fagsakbawan fag balay. ¹¹ Ham fag lwang hasagfon balay kiti, Kagfaadal has taw gintaw hyamo kitay siday angko fasakbawan famaklay fag lingoban araw, kaarakitay manayowan yadi angko manga katogbong no kwan intam Yafon Fanohodan? ¹² Hanya falag ara hayo sadik lingoban dahol, matalagaan sas tongod fag salogan. Ham fag fatalaga intam Yafon sinya. ¹³ Da Pidro inlahaw wan hanggan ta nalag wa fagayo kito kan Hisos fwayong. Yakanga ta sinya wak nafatalaga ista Yafon Fanohodan Nagsagayan. ¹⁴ Nondasog gis nanya fag masohod ta nogyafon, is Hisos ha yadi was bilog fanganan hanggan it manga Fandiya-Barita. ¹⁵ Is Hisos igfwayong has taw, Ho danwa kasaya wa dahol kitay, tam fag manayowan yapdi kwan intam Yafon Fanohodan Nagsagayan, ho bago domog mahori. ¹⁶ Hogfwayong ha hayo hodwa yapdi homwan domwag kito, to nodyam anod san Diyos sakop banwanan. ¹⁷ Ginyas Hisos nabol fanginoman ka ha sabahan obas, nabaya in Diyos, nafagamit has taw, iglwang, Ham fag bol toy, ham fagayo fag golbosan ginom gistay fag fanginoman. ¹⁸ Hogfwayong ha hayo hodwa ominom domwag sabahan obas no baliday is Diyos nodiyag sakop fagayo. ¹⁹ Ginya madis Hisos nabol tinapay, nabaya in Diyos, nafaarogbotan, ginya nadisag has taw, iglwang has taw, Toy angko habilogan kangko fagdisagon kaarakitay ha hayo. Ham fag sokfon yadi aban to fag ogali kaarakitay ham maayfanan ya angko. ²⁰ Kitonya yadi, ta nontabo wagyafon, is Hisos nabol ka fanginoman, iglwang, To fag fanginoman ka bago fag taranggapan kan-ganit sangko folot kamwatwat kaarakitay ha hayo. ²¹ Dapat istay yadi wan ka kaoyon angko manga kalaban, igsayo yadi wangko. ²² Maskin aho, Kanbali Taw, kaakbang wa kalahaw, kito kan Diyos nafatohoyan, dapat ay, isyay wan kangko ofod ka kaoyon angko manga kalaban. ²³ In Hisos manga katogbong garintawan ha sadi ha sadi kitay, Faktaw santam kam-oyon in Hisos kalaban? ²⁴ Araw araw ogbot, in Hisos manga katogbong igdaraogan no faktaw kambali abwat man it kangayanan. ²⁵ Is Hisos igfwayong has taw, Ka manga gorangon istay sas baba daga igfatakak manga sakop hanggan ka manga ha kangayanan istay kagfasayagdog it sadili has taw. ²⁶ Dapat ham fag idwa kitonya. Ka abwat man has fagayo it kangayanan sa hayo, hanya fag fatimbang kitay hanya ka libaba man has taw it kangayanan. Ka hayo fagtahinan fag hanya ka matogbongon is taw. ²⁷ Fakta ka ab-

wat man is taw it kangayanan, ham gayfan? Ngatay kagtokaw odi sasta bilog fanganan, ngatay kat sogowan kagfalo igsyahod? Bohonwa awkin ka matokawan sas bilog fanganan ka abwat man it kangayanan? Dapat tam no gofodan, aho bilang odi sadik famalo yadi. ²⁸ Ham ka naofod angko fagaba nyawa sawangko basad fakahoriyan kagsolay angko. ²⁹ Yakanga no kinday angko Ama igfatalaga angko bato sakopon aban, kitonya yadi ahog fatalaga hayo kangayanan sangko sakop aban. ³⁰ Tam fagaba wagsayowan kwan, manga ginom gis nanya aban hanggan ho fatokaw yadi wa hayo sas manga tokawan fanokawan gorangon aban, kaarakitay ham kabali manga fangabaya han Israil manga hasokfonan safolo ha dowak layonan. ³¹ Ginyas Hisos iglwang, Simon, Simon, yabay is Satanas nanagad kitay hanya fag somolay hayo kitos igfalayon fayay gis manga opa sas nigo. ³² Dapat ahog darangin wa kitay, haw fag idwag fagomon igsyag hangko. Ginya, im fangayofan nogsoyo ya, farigonan yadim manga fadwasay fangayofan. ³³ Is Pidro nasagot, Angko Fon, gwadi hodwa kafang omofod hyamo kati, nyawa hanggan wamporiso hanggan wa matay. ³⁴ Is Hisos iglwang, Yatokitay, Pidro, hogfwayong hyamo, ka tabag idyag taraok, ha tomangkod araw hangko tolo ginan kitay, hadwa kilala angko. ³⁵ Ginya madis Hisos gintaw hat manga katogbong kiti, Aho no nasogo hayo igbarita itfagonan, ha korang awkin sa hayo, nyawa kana, nyawa ham idwa ha diya ngadi sokloban, manga sopot, idwa yadi ha diya lapak? Taglwang, Idwa ha korang. ³⁶ Is Hisos iglwang, Dapat kati, ham no ha sokloban, ngatay sopot, ham fag diya mandi. Kadwa ha binagaw, fasaliyan wat balokas, ginya madi, saliyan sadik binagaw. ³⁷ Maskin hogfwayong ha hayo kitay ka Kasoratan fwayong kawa hangko, fag im-anod wan. Ka Kasoratan iglwang kiti, Ta nafatimbang hanya bilang sadik taw ha kasalanan. Maskin kansorat kawa hangko kaanod wa kati. ³⁸ In Hisos manga katogbong iglwang, Hyami Fon, yabay to wa ka dowak binagaw. Is Hisos nasagot, Hosto wa tonya. ³⁹ Da Hisos nadokson gis lingoban sas tongod fag salogan, nalahaw ya ngawan, hawas Moyod Oliboan kito kan Hisos ogali nogbanwan, hanggan it manga katogbong natahin yadi wa hanya. ⁴⁰ Ta nondasog wa sinya, is Hisos igfwayong has taw, Ham fag darangin kaarakitay idwa hagfaloksowan hayo. ⁴¹ Is Hisos nasaman yapdi ogbot it manga katogbong, manga kayos bintohan bato, ginya nalingkohodan hanggan nandarangin. ⁴² Is Hisos iglwang, Mama, no maangay sa hyamo, fag bol nanggos gingko to fag fanginoman kahoriyan kati. Dapat nyawa hoglwang kitonya, fag hyamo wa kafangayofanan kam-anod, bohonwa kangko. ⁴³ Ginya sadik anghil gin Diyos banwanan sam tongod inbangkad han Hisos, nafarigon hanya. ⁴⁴ Dapat in Hisos fangay-

ofan inhuri wa dahol dahol, yakanga bohondi kito ka haraw nogdarangin, hanggan dit gayamon bilang dahol fag tiktik folot kantigna has baba daga. ⁴⁵ Nontabo wagdarangin, is Hisos nalindog ya ngawan, infwali ya hat manga katogbong, iglag mangharaw, ta matoyogan wan, maskin inrongkot wa dahol dahol haraw. ⁴⁶ Is Hisos iglwang has taw, Kana mayon ham no matoyogan? Ham fag kabangon wan, ham fag darangin wan kaarakitay idwa hagfaloksowan hayo. ⁴⁷ Is Hisos no kampang yapdi, sadik habanan taw kadasog wan, igtahin in Hodas, sadik ama gis Safolo-ha-Dowa. Is Hodas gakbang in Hisos kaarakitay omayok hanya. ⁴⁸ Dapat is Hisos igfwayong hanya, Hodas, haw awkin omayok angko, aho Kanbali Taw, haw no kaoyon angko manga kalaban? ⁴⁹ In Hisos manga ofod katogbong no nalag ista bato ibolonon, taglwang, Hyami Fon, ngatay mi bomasing yadi was taw? ⁵⁰ Ginya ka sadik katogbong nabasing ka gorangon fag fagalan sogowan a, natigbas ka balis sihon fag talinga. ⁵¹ Dapat is Hisos iglwang hat manga katogbong, Ham fag idwa kityamo, ham. Ginyas Hisos natawid ya ka sogowan talinga, yakangan somag ya. ⁵² Ginya madis Hisos igfwayong has fagtahinan fagalan, hanggan has manga fagtahinan igbahala sas Fanimbaan-Dahol, hanggan has manga fagtahinan sas banwa, kembangkad yadi wan kaarakitay gomamat in Hisos, iglwang kitay, Aho awkin tolisan, ham gayfan, maskin ham masalawidan manga talibong, mabitbitan manga pinotol kaarakitay gomamat angko? ⁵³ Aho fagaba gofod hayo sirang sirang sas Fanimbaan-Dahol, bati ham idwa gamat angko gis nanya. Dapat kati ya, basad yabi ka hayo fakasayaon hanggan ka karigonan marom kagbahala kati. ⁵⁴ Ginya ta nagamat wa ngay in Hisos hanggan nataban hanya has Gorangon fag fagalan balay. No kitay di is Pidro goyan haraw in Hisos, dapat ayayo sat ginanan. ⁵⁵ Ta no nafagba afoy sas basad aladan, is Pidro matodtodan sasta akbang, mafanayanagan yadi. ⁵⁶ Ginya sadik sogowan ina nalag in Pidro sinya, ka yawa afoy nogsakop in Pidro hanggan nabantay wa hanya fiya fiya, iglwang, To fag taw in Hisos yadi wa ofod hoglag. ⁵⁷ Dapat is Pidro igtangkod yapdi, hanyag lwang, Yabay ina, hodwa kilala hanya. ⁵⁸ Araw araw ogbot, sadi yak taw sinya, nalag in Pidro, iglwang, Haw yadi kat ofod sadi, ha? Dapat is Pidro nasagot, Yabay yabay ama, aho bohonwat ofod. ⁵⁹ Nonsagaya manga sadik tama sinyahod, sadi yak taw igfaaronan iglwang, Matohoyanan to fag ama it ofod sadi, maskin pariho gis sakop Galiliya. ⁶⁰ Dapat is Pidro igsagot ya, Ama, hodwa natwagdog kam faglwangon. Is Pidro no kampang yapdi, ka tabag dagos wa nanaraok. ⁶¹ Ginya kagfon intam naolingan han Pidro, nabantay hanya fiya fiya. Ginya madi yabay is Pidro bago di natohod kagfon intam it fwayong kitay, Ka tabag bago tomaraok araw, haw tolo wa ginan

tomangkod has taw angko. ⁶² Is Pidro nadokson gis basad aladan, naoraw marigon. ⁶³ Gis nanya yadi fag masohod ka mangag bantay in Hisos igyod, igfasidyowan odi hanya, igsontok ya ngadi. ⁶⁴ Ta nataklob yadin Hisos mata, ginya taglwang, Fanlag ngay bok-tongan fakta nga kagsontok hyamo kati? ⁶⁵ Aywan yapdi ista manga hampang dwat kawa han Hisos igfasidyowan odi hanya. ⁶⁶ No bago marom ka manga fagtahinan fanifonan Hodyo fagayo, ka manga fagtahinan fagalan-han-Diyos hanggan ka mangag faadal Batasan Hodyo matifonan wan. Ta nataban in Hisos has Fanoltolan Hodyo ka ha manga kangayanan. ⁶⁷ Taglwang han Hisos, Fwayongan hyami, haw awkin kan Diyos-natogon-Famawi? Dapat is Hisos igsagot, Nyawa ho fomwayong hayo, ham idwa yadim tiwala. ⁶⁸ Hanggan aho no mangintaw hayo, ham idwa yadi somagot. ⁶⁹ Dapat ay, gis kati ginan, aho, Kanbali Taw, tomokaw san Diyos karigonan akbang, sat balis sihon. ⁷⁰ Ta fagayo gintaw in Hisos, Haw wa awkin kan Diyos Anak, mangharaw? Is Hisos nasagot, Ham mandi ngap ka gwas kitonya. ⁷¹ Yakanga ta nanoltolan ha sadi ha sadi, taglwang, Kana yapdi fag sombong kantam fagfanayaon? Tam ngap nadog wa fiya fiya gi wat sadili bibig ka nafwayong.

23 Ginya madi yabay sadik kayonya tifonan inlindog a, nataban wan Hisos han Pilato. ² Gis nanya tagfabago wagsombong han Pilato, taglwang, To fag taw mi naiktan maskin igfasognod hyami kapariho iglaban has manga ha kangayanan, igbando yadi fag idwag bayad bohis han Sisar. Igfasyagdog ya ngadi has taw kitay hanya wa hono kan Diyos-natogon-Famawi, ka sadik gorangon. ³ Ginyas Pilato gintaw in Hisos kiti, Haw awkin ka Gorangon manga Hodyo? Is Hisos nasagot, Haw wa ngap kaglwang. ⁴ Is Pilato igfwayong has manga fagtahinan fagalan-han-Diyos hanggan has fakaaywanan fag manga taw, Hodwa ha donggon it kasalanan to fag taw. ⁵ Dapat tagpilit wagsombong, taglwang, Hanya wa kagfasognod sadi wak dahonya sakop Hodiya, igfwayong has taw kitay fag lomaban ka manga ha kangayanan. Gi yapdis sakop Galiliya nogfabago igfasognod ka manga taw hanggan wandasog hastay kati. ⁶ Is Pilato no nadog kitay is Hisos gis Galiliya, hono, nogfabago igfasognod has manga taw, naintaw has taw ngatay is Hisos taga yadi Galiliya. ⁷ Yakangas Pilato no nadog kitay is Hisos giwas Gorangon Hirodis sakop fag banwanan, is Pilato nasogo in Hisos han Hirodis maskin is Hirodis sawas Hirosalim gis nanya. ⁸ Is Hirodis nabaya wa dahol dahol iglag in Hisos, maskin aywan it donggon ista fwayong gin Hisos. Hanya dogay wa kasaya lomang hanya. In Hirodis fakasayaon, is Hisos nangos fag omibolon sadik bagay madolaw san Hirodis faglagan. ⁹ Yakangas Hirodis, nyawa gintaw wa gintaw wan Hisos, is Hisos fawa nasagot ngadi sadik hampang. ¹⁰ Ka manga fag-

tahinan fagalan-han-Diyos hanggan ka mangag faadal Batasan Hodyo sinya yadi wan idwag fagomon igtawag marigon, igsombong kan Hisos naibolon. ¹¹ Is Hirodis hanggan it manga sondalo nayod in Hisos hanggan nafaniring kitay hanya sadik gorangon. Ta nafasolong rotay ha kangayanan, fiya kabantay, han Hisos, ginya ta nafafwali ya han Pilato. ¹² Gis nanya lamang fag sirang da Hirodis da Pilato nangamigosan yadi wan, nyawat fagonan haraw kahodhoriyan. ¹³ Is Pilato nafatawag ka manga fagtahinan fagalan-han-Diyos hanggan ka manga fagtahinan sas banwa Hirosalim hanggan ka fakaaywanan fag manga taw. ¹⁴ Ginyas Pilato iglwang has taw, Ham no nataban hastay to fag ama, hayo sombong hangko kitay, to fag taw kawag fasognod manga taw fag lomaban ka ha manga kangayanan. Kati yabay ho no nasaysay hanya sa hayo fagdogan, ho nadog hayo manga sombong ha hanya idwa ha fakaoronganan. ¹⁵ Is Hirodis kito yad-ingko idwag dog kitay hanya ha kasalanan, yakanga nafafwali ya hantam. Idwa fiya igfatohoyan hanya has kahatayan, maskin hanya idwa ha kasalanan daho wasagfahatay hanya. ¹⁶ Yakanga ho fabakbak lamang is taw hanya, ginya ho fomalfas ya. ¹⁷ Fagaba sas masohod Fanohodan Nagsagayan, is Pilato fag ha falfason ka sadik Hodyo kanporiso kaarakitay ka manga Hodyo bomaya hanya. ¹⁸ Dapat ay, ka fakaaywanan fag manga taw nanarawagan di ngap igsohodan, taglwang, Mi dayo tyamo fag taw. Fag is Barabas kantam fagfalfason. ¹⁹ Is Barabas kasta nafaporiso itfagonan, kawa hanya nafasognod ngay has taw ka nalaban has manga ha kangayanan sas banwa Hirosalim, hanggan ha nafahatay yadi taw. ²⁰ Sadi ya ginan is Pilato nahampang has taw maskin hanya kasayag falfas in Hisos. ²¹ Dapat ta nanarawagan di ngap kitay, Fapakowan in Hisos, fapakowan hanya sas nafatimbangan hayo. ²² Fatolo wak olit is Pilato gintaw has manga taw, Kana mayon, kanat naibolon dwat ham gayfan? Hodwa ha lagan in Hisos fabangdanan no kitay daho wasagfahatay hanya. Yakanga ho fabakbak lamang is taw hanya, ginya ho fomalfas wan. ²³ Ta ngap inbagat wan, inlabi wa ngap igtarawagan kitay, Fapakowan in Hisos sas nafatimbangan hayo. No dogay ista tawag nadaog wan Pilato fwayong. ²⁴ Yakangas Pilato nafatohoyan kitay hanyag faangay no kinda kasta fagsagadon. ²⁵ Nafalfas kasta fagsagadon, ka taw kanporiso maskin iglaban has manga ha kangayanan hanggan ha nafahatay taw, ginya nafabahala in Hisos has taw kaarakitay ta omibolon nyawa kana kasta fakasayaon ha hanya. ²⁶ Ka manga sondalo nogtaban in Hisos kaarakitay igfapako hanya, ta ha nahablang sadik ama, is Simon, taga Sirini, goli has banwa git iyab. Tagpilit igtaban hanggan nafafasan hanya ka nafatimbangan hayo, balin Hisos ginanan. ²⁷ Kaaywanan fag manga taw goyan san Hisos ginanan, ha

akwa manga ina ayo goraw wa dahol maskin kaawa hanya.²⁸ Dapat is Hisos natakfili ginyag Iwang has manga ina, Manga anak ina, taga Hirosalim, ham fag idwa goraw angko. Fag ka hayo sadili hanggan hayo sadili manga anak ka hayo fakaawaon.²⁹ Yabay, aban fag manga sirang ta lomwang, Fiya man mangharaw ka manga galayos, kadwa naanak, kadwa yadi ha nagfasosowan.³⁰ Gis nanya fag manga sirang aban, manga taw lomwang has manga fongso, Ham fag katono ha hyami, hanggan has manga moyod, Ham fag tomabon wa hyami.³¹ Maskin halimbawa, ta no gibolon kito ka fon hayo no latoy yapdi, kinday aban, ista ibolonon ka hayo no tonga wan, ham gayfan?³² Ka manga sondalo nataban yadi dowak ama ka ha kasalanan orongan kaarakitay ta fasohod yadi wan Hisos nogfahatay.³³ Ta nondasog sa sadik foyo, tagngayan Botol Alfoyo, ta nafapako in Hisos sas nafatimbangan hayo sinya. Ta nafapako yadi ka dowak ama tolisan, insadi san Hisos balis sihon, insadi sat balis wala.³⁴ Ginyas Hisos iglwang, Mama, haw fag faliyam ista ibolon dwat, fag idwa kahori is taw, maskin tadwa twa kasta kasalanan ta nogfapako angko. Ginya ka manga sondalo namostahan no fakta ka omafo in Hisos manga rotay.³⁵ Ka manga taw malindogan sas ligongan mabantayan odi in Hisos. Dapat ka manga fagtahinan gis banwa igfasidyowan odi hanya, taglwang, Hanyag bawi tiba taw, no hanya nga kan Diyos-natogon-Famawi, kan Diyos nafili, gwadi hanya fag bomawi yadit sadili habilogan.³⁶ Ka manga sondalo nayod yadin Hisos, gakbang hanya, igfagamit ha hanya langgaw.³⁷ Taglwang yadi hanya, No haw wa nga ka Gorongan manga Hodyo, gwadi bawiyam wam sadili.³⁸ Masoratan yadi san Hisos tongod alfoyo ista sombong sas manga fangampangan manga Girigo, manga taga Roma, manga Hibriyo, kitay, To wa ka gorongan manga Hodyo.³⁹ Ka sadi ka ha kasalanan, ka mapakowan yadi sinya, igmaswag odin Hisos iglwang, Bohonwa awkin haw kan Diyos-natogon-Famawi? Gwadi bawiyam hyamo sadili, bawiyam yadi hyami gistay.⁴⁰ Dapat it fadowa nangabaya hanya, nalwang, Hadwa awkin kadala in Diyos? Bati tagfadosa yadi hyamo kito hanya.⁴¹ Tam wa ngap ka fiya fadosaon kito, kawa ganti intam manga kasalanan, dapat ay, to fag taw idwa ha naibolon dwat.⁴² Ginyag Iwang yadi han Hisos, Hisos, haw nangos fag tomohod yadingko haw no kabali wa hari aban.⁴³ Is Hisos nasagot hanya, Hogfwayong ha hyamo, tam araw mangoyogan wan has fiya fag oliyanan ka manga natay.⁴⁴ Araw, no manga boknga wa sirang, sadi wak dahonya banwanan inharom wan, hanggan wa myanit kabohid.⁴⁵ Ka kandogay inya ka myanit fawa nasalog, inliyam wan, hanggan ka fanahop rotay sas fagbokngan Fanimbaan-Dahol dagos wanragyang, namokngan wan.⁴⁶ Ginyas Hisos igtawag marigon, iglwang,

Mama hogfaano ha hyamo angko falad. Hanya nalwang di nga kitonya, nafalfas wat ipsaw.⁴⁷ Ka fagtahinan sondalo no nalag to fag manga bagay, nafasayagdog in Diyos, iglwang, To fag taw orongan wadwa ha kasalanan.⁴⁸ Fagayo fag manga taw ka matifonan mabantayan sinya nalag wa fagayo no kinda kananod, tandala wan, yakanga no goli hat manga balay, tagbakbak hat manga sadili boknga dobdob.⁴⁹ In Hisos manga fakilalaon fagayo malindogan yadi sas dayo ogbot, hanggan ka manga ina ka natahin in Hisos gi yapdis sakop Galiliya sinya yadi wan. Ta fagayo nalag tonya fag manga bagay.⁵⁰ Yabay, ha sadik ama is Hosi, gis banwa Arimatiya, sadik banwa Hodyo. To fag ama it fangayofan hanggan it ogali kafiyaon. Hanya mafanayan yadi no ginahin is Diyos nogfabago it sakop. Nyawa kitay is Hosi sadi gis fanoltolan manga fagtahinan Hodyo, hanyadwa goyon is taw ista naibolon han Hisos.⁵² Is Hosi hawan Pilato, nasagad in Hisos habilogan.⁵³ No nabol wa gis tongod fatimbangan hayo in Hisos habilogan, nasafot basad homot madamol, ginya nafaigyan sasta basad natigib dalifi, tadyapdi ha naglobgobanan taw sinya.⁵⁴ Gis nanya fag sirang, sirang Famatalaga, faginam yadi wa has Sirang Kafahowayan.⁵⁵ Ka manga ina ka natahin in Hisos gi yapdis sakop Galiliya naoyan in Hosi a, ta nalag yadi wa kat nagfwalidan in Hisos hanggan no kinday no mafwalidan sinya.⁵⁶ Ginya madi ka manga ina nwali wan, igfatalaga manga famabanglo hanggan lana. Ka Sirang Kafahowayan nondasog wan, ka manga ina nafahoway no kinday ka Batasan Hodyo fwayong.

24 Dapat ay, no marom marom yapdi sas sirang gona sa sadik simba, ka manga ina hawas lobgoban nagtigiban bato, ha diya it manga nafatalaga famabanglo.² Ta nondasog wan, taglag ka lohib fanahop bato inoson wan has dayo sakbawan.³ Yakanga ta nasakbaw, dapat tadwa ha lagan in Hisos habilogan sinya.⁴ Yabay, ta no nangarisipon yapdi, sadi odi ginan ta nalag dowak ama sasta akbang, it rotay di masilaw wan.⁵ Maskin tandala wa dahol dahol, ka manga ina matarohongan wa fiya fiya, ista walong di matignaan wa fiya fiya has boknga daga. Ginya ka manga ama nalwang has manga ina, Kana mayon ham nogsayak ka boyagan sasta nagfwalidan natay?⁶ Idwastay, hanyan boyag ya domwag. Ham fag tohod kat fwayong ha hayo ham no sayapdis sakop Galiliya. Hanya danwa nalwang kitay,⁷ Ka fiya hanya, Kanbali taw, ta fag fagamat has manga taw ha kasalanan, fag impako yadi sas nafatimbangan hayo, ginya madi fag imboyag ya sas fatolo fag sirang.⁸ Ginya madi ka manga ina bago di natohod in Hisos fwayong.⁹ Ka manga ina no nwali gis lobgoban, ta natoltol han Hisos manga katogbong kasta lagan fagayo, natoltol has Safolo-ha-Sadi hanggan hasta ofod tiba.¹⁰ To fag manga ina kawa da Mariya Magdalina, da Hwana hanggan da

Mariya in Santyago ina. To fag manga ina, hanggan it manga ofod tibak ina, ka natoltol tonya has manga Fandiya-Barita. ¹¹ Dapat ka manga Fandiya-Barita naayfan ka manga ina igfatoga odi, yakanga tadwa katiwala. ¹² Nyawa kitonya, is Pidro inlindog wan, igdalandan, namantay wa has naglobgoban. Is Pidro natalonggaw has basad nagfwalidan, dapat idwa nga hanglag, no bohonwa ka odista nagsafotan it habilogan. Yakangas Pidro nwali wa a, nataka wa ngay kat lagan. ¹³ Gis nanya yadi fag sirang in Hisos katogbong dowahawas sadik forowan balay sayok, Imaos. It kaayayowan gis Hirosalim manga safolo ha sadik liho. ¹⁴ Ta no boknga wa dalan, tagtoltolan kasta lagan fagayo madayo. ¹⁵ Ta nogtoltolan yapdi, is Hisos wan ka natahod is taw, ginya ta koyogan wan. ¹⁶ Ka dowak katogbong iglag in Hisos, dapat tadyapdi kilala hanya. ¹⁷ Is Hisos gintaw has taw, Kana ka hayo fagtoltolon boknga dalan? Ta natorosan wa a, marongkotan odi. ¹⁸ Ginyan sadi, kat ngayan is Kilyopas iglwang kiti, Haw laya ka sadi dik famaklay has Hirosalim kadya nadog ka manga bagay ka ngalay yapdin lag sinya. ¹⁹ Is Hisos naintaw, Kana fag manga bagay tonya? Ta nasagot kiti, Kawas Hisos, taga Nasarit, in Diyos fangampang sadi, nyawa gibolon, nyawa kampang, idwa ha bosal san Diyos faglagan, hanggan sasta faglagan fagayo fag manga taw. ²⁰ Hyami yadi manga fagtahinan fagalahan-Diyos hanggan manga fagtahinan banwa nafagamat hanya has taw kaarakitay fatohoyan has kahatayan. Ta napako yadi hanya sas nafatimbangan hayo. ²¹ No kitay di migsyag kitay hanya ka fomalfas ka manga taga Israil. Bohondi tonya ka hyami fagisipon. Kati madayowan nonlag kitonya, ²² hanggan mindolaw wan ka tiba hyami ofod manga ina no nabarita ha hyami. Ta marom yapdi, hono, namantay has lobgoban, ²³ dapat tadwa ha lagan in Hisos habilogan sinya. Tanfwali ya, taglwang, Mi ha lagan sadik madolaw, manga anghil kaglwang kitay is Hisos boyagan. ²⁴ Hyami manga ofod tiba ginya yadi was lobgoban, kitonya nga kasta lagan, dapat tadwa ha lagan in Hisos. ²⁵ Ginyas Hisos iglwang has taw, Yabay yabay ham. Kana mayon ham nodwa katiwala fagayo kan Diyos manga fangampang fwayong. ²⁶ Idwa awkin ka fiya kan Diyos natogon-Famawi fag omagwanta to fag manga bagay fagayo bago domog it kafiyang? ²⁷ Is Hisos nafatwagdog has taw kansorat sas manga Kasoratan fagayo kawa hat sadili. Gin Mwisid manga nasorat has taw nogfabago igfatwagdog, hanggan wa han Diyos manga fangampang nasorat. ²⁸ Araw ta no kaakbang wa hasta hadasogan fag forowan balay. No kalag di, is Hisos igfadagos yapdit lahawan. ²⁹ Dapat ta kwangit yapdig falahaw hanya, taglwang, Haw fag hawa hyami balay, maskin ka myanit kasangday wa a, kaharom wan. Yakangas Hisos nasakbaw wa sinya. ³⁰ Ta nogsayowan wa kwan sas fanganan, is Hisos nabol tinapay a,

nabaya han Diyos, ginya nafaarogbotan, nadisag yadi has taw. ³¹ Ta bago di nahilala kitay, is Hisos wa ngap mangharaw. Ginya madi is Hisos idwa hanlag domwag. ³² Ginya tagtoltolan kiti, Yabay yabay, maskin manghara kitonya wak masayagdog nogtoltol intam sas boknga dalan, hanggan igfatwagdog intam gis Kasoratan manga fwayong. ³³ Ka dowak katogbong dagos wanlindog a, nwali has Hirosalim. Ta nondasog, taglag ka Safolo-ha-Sadi matifonan hanggan ista manga ofod tiba. ³⁴ Tagtoltolan kitay, Orongan wan kagfon intam inboyag ya. Nafalag wa han Simon. ³⁵ Ka dowak katogbong natoltol yadi has taw kat lagan sas boknga dalan, hanggan no kinday ta no nahilala in Hisos, hanya no nafaarogbotan ka tinapay. ³⁶ Ginya ta nogtoltolan yapdi kitonya, is Hisos mandi kandasog sasta fagbokngan. Is Hisos igfwayong has taw, Fag sawa hayo ka kahowayan kati. ³⁷ Dapat ay tanhinol wa ngap, tandala wan, ta gayfan ngan di falad ka sasta fagbokngan. ³⁸ Yakangas Hisos igfwayong has taw, Kana ham no marongkotan odi? Kana ham no gadowan yapdi? ³⁹ Bantayan angko manga gamat, manga bitis, aho wa ngay. Sapkidan angko, bantayan wa fiya fiya. Ka falad idwa ha botol, idwa ha faknol, dapat ham iglag kitay aho ha habilogan mandi. ⁴⁰ Is Hisos nalwang di nga kitonya, nafalag has taw it manga gamat hanggan it manga bitis. ⁴¹ Sas kabayaan ngap tadya katiwala fiya fiya, ta gadowan yapdi. Yakangas Hisos gintaw has taw, Tam ha fanganon yapdi awkin is nyamo? ⁴² Tagdisag hanya sadik lifong oyang masogban. ⁴³ Is Hisos nabol a, nahwan wa sasta faglagan. ⁴⁴ Ginyas Hisos igfwayong has taw, Ka manga nadalanan sangko, kangko nafwayong ha hayo tam no gofodan yapdi, kitay, ka fiya, fag im-anod fagayo kansorat kawa hangko san Mwisid Togon, san Diyos manga fangampang manga famasaan, hanggan sas manga Ambahan fag famasaan. ⁴⁵ Ginyas Hisos naboklas ista manga fangayofan kaarakitay ta tomwagdog ka manga Kasoratan fwayong. ⁴⁶ Ginyag lwang, Kito kansorat, ka fiya, aho, in Diyos-natogon-Famawi, fag omagwanta mahori, ginya fag imboyag ya gis kahatayan sas fatolo fag sirang. ⁴⁷ Ginya ka fiya, manga taw kagsyag hangko fag tomoltol has taw sas fagayo fag layonan banwanan. Fag imbarita kitay manga taw fag soyo wan, ginyat manga naogali dwat imliyam wan. Fag gis Hirosalim nogfabago igbarita. ⁴⁸ Ham ka nalag angko manga nadalanan fagayo, yakanga ham fadogan yadi wan has tiba taw. ⁴⁹ Yabay, ho somogo ha hayo kangko Ama nagtogonan ha hayo. Dapat ham fag idyag lahaw gis banwa Hirosalim no baliday ham idya ha natanggap karigonan fagsyaganon gin Diyos banwanan sam tongod. ⁵⁰ Ginya madis Hisos nataban it manga katogbong has dayo banwa. Ta nondasog sas Bitanya, is Hisos nafaabwat it gamat has tongod, ginyag lwang has taw, Ham bomaya wan. ⁵¹ Is Hisos, nyawa kam-

pang yapdi, igfabago wa kaabwat has tongod. ⁵² Kan Hisos manga katogbong nafasayagdog hanya. Ginya madi ta nwali ya nga has banwa Hirosalim, kasolong

wa dahol dahol. ⁵³ Ta fagaba wa sas basad Fanimbaan-Dahol igfasayagdog in Diyos sinya.

HWAN

1 Gis fabagowanan, ka daga nodyan halig, ka Hampang dan wa ha akwa, dan wa san Diyos. Ka Hampang Diyos yadi. 2 Gis fabagowanan ka Hampang dan wa san Diyos. 3 Ka Hampang in Diyos fangalig no nahalig fagayo fag manga bagay. Ngadi sadik bagay kanhalig idwa ha nahalig iba. 4 Ka Hampang kagfaboyag fagayo. It haboyagan ka yawa kagfayawa has manga taw. 5 Ka yawa igfayawa has basad marom, dapat, nyawa ginahin, ka marom idwag fahapsa ka mayawa. 6 Ginya madi, is Diyos nasogo hastay, has baba daga, sadik ama, it ngayan is Hwan. 7 Is Hwan inbangkad kaarakitay faorongon ka yawa kagfayawa has manga taw, kaarakitay fagayo domog hanggan katiwalat fwayong. 8 Bohonwas Hwan ka yawa. Is Hwan inbangkad kaarakitay mamaorongon lamang tonya fag yawa. 9 Tonya ka yawa orongan ka kabangkad hastay hanggan igfayawa has fagayo fag manga taw istay sas baba daga. 10 Ka Hampang sawas baba daga. Dapat ay, nyawa hanya in Diyos fangalig no nahalig intam daga, ka manga taw sas baba daga idwa nahilala hanya no faktaw. 11 Ka Hampang inbangkad hat sadili banwanan, dapat kat manga kapariho taw idwa natanggap ha hanya. 12 Dapat ay, no kayoday ka natanggap ha hanya, ka manga nasyag ha hanya, hanya nafaangay kitay ta fag imbali in Diyos manga anak. 13 Tonya fag manga taw inbali in Diyos manga anak maskin is Diyos ka kasaya kabali it Ama, idwa kitos anak dararag no kabali ista anak maskin it ama taw ka kasaya anak. 14 Ka Hampang inbali taw, nabanwanan santam faglagan. Mi nalag it kafiyon, kat Ama nadisag hat Anak sadi sadi, orongan hanggan mahoway wa dahol. 15 Is Hwan igfaorongon kawa hanya. Is Hwan igtawag, Tya ngay kangko faglwangon ka kabangkad balingko ginanan, ka dahol man angko it kangayanan, kawa hanya danwa ha akwa gi yapdis hyabi, nyawa hodyan sagaya. 16 Maskin malooy wa dahol it kahowayan, hanyag disag fagaba hantam it kahowayan. 17 Is Mwisid ka nafadonong in Diyos manga togon has taw, dapat is Kiristo Hisos kagfalag has taw no kinday is Diyos orongan, hanggan it malooy fag kahowayan. 18 Idwa ha taw iglag in Diyos. In Diyos Anak sadi sadi, ka sawat Ama akbang fagaba, tonya kagfahilala has manga taw no kinday is Diyos. 19 Ginya madi ka manga fagtahinan Hodyo gis Hirosalim nasogo han Hwan manga fagalan-han-Diyos hanggan in Libi man-

ga hasokfonan tiba, kaarakitay ta omintaw kitay, Ha ginda fag taw? 20 Is Hwan idwa kadalag sagot, nafwayong fiya fiya, Bohonwa aho kan Diyos-natogon-Famawi. 21 Ta naintaw ya hanya, No kitonya, fakta di haw? Ha aw is Iliyas? Is Hwan nasagot, Bohonwas Iliyas aho. Ta naintaw ya domwag, Ha aw kan Diyos fangampang? Is Hwan nasagot, Bohonwa aho yabay. 22 Ta gintaw yapdi, Fakta nga haw? Fwayongan hyami mi ara fomwayong hasagsogo hyami. Kanam sadili fwayongon haw no ginda fag taw? 23 Is Hwan nafwayong, Aho kan Isayas, in Diyos fangampang fagfwayongon noglwang, Aho wa Kagtawag marigon marigon, sas basad fakahyabogan, Fahaslongan in Diyos dalan bato lahawan. 24 Ginya madi ka manga taw ka manga Farisiyo nasogo, 25 naintaw ya domwag, Haw no bohonwa kan Diyos-natogon-Famawi, bohonwa yadis Iliyas, bohonwa yadi kan Diyos fangampang, fakta ka nahalig hyamo ha kangayanan igfatogna manga taw sas danom? 26 Is Hwan nasagot has taw, Ahog fatogna ngay manga taw sas danom, dapat ay, ha akwa sadik taw malindogan sa hayo fagbokngan kati, ham idwa kilala hanya no faktaw. 27 Nyawa hanya goyan man angko indasog, ho kaya manlohas it siyok lapak. 28 Gis nanya fag masohod da Hwan sas banwa Bitanya sas salogan myanit baliwa safa Hordan, san Hwan fagfatognaan manga taw. 29 Nonbago marom is Hwan nalag in Hisos gakbang ha hanya. Is Hwan iglwang, Tya ngay kan Diyos fangafiyon Anak Topa kagfaliyam ka manga ogali dwat sadik baba daga. 30 Tonya wa nga kangko faglwangon ha hayo, ka goyan gingko ginanan fag ama, dapat ay, dahol man angko it kangayanan maskin hanya danwa ha akwa hyabi, nyawa hodyan sagaya. 31 Aho yadi idwa kilala hanya fiya fiya hyabi, dapat ay, ahon bangkad igfatogna manga taw sas danom kaarakitay igfahilala hanya has manga taga Israil. 32 Is Hwan nafaorongon kiti, Aho nalag ka Maliyaw fag Falad gin Diyos banwanan sam tongod, igyokfo hanya kitos salompati, idwa yadi galin gi hanya. 33 Nyawa aho hyabi, hodya kilala hanya fiya fiya, dapat is Diyos kagsogo angko kaarakitay igfatogna manga taw sas danom, hanya danwa nafwayong angko kitay, Ka hyamo lagon aba ka Maliyaw fag Falad it fagyokfowan, idwa yadi malin gi hanya, tonya wa ngay kagfatogna manga taw sas Maliyaw fag Falad. 34 Is Hwan iglwang, Kati in-anod wan. Angko wa mata la-

gan. Hogfaorongon wa nga kitay to in Diyos wa Anak.³⁵ Nonbago marom, is Hwan sinya ya ngay, hanggan it katogbong dowo.³⁶ Is Hwan igbantay in Hisos, is Hisos nogdalan, ginyag lwang, Yabay, tya ngay, kan Diyos Anak Topa.³⁷ Ginya madi in Hwan katogbong dowo ka nadog it fwayong, natahin in Hisos.³⁸ Is Hisos no natakfili, nalag kitay ta goyan hanya, naintaw has taw, Kana hayo fagsayahon? Tagsagot in Hisos, Rabi, sida kin haw no goli? Ta noglwang Rabi, it kahologan, Kagfaadal.³⁹ Is Hisos nasagot, Hawi, tam hanya wan, ham lomag wa araw. Ta natahin in Hisos a, ta nalag kitay sinya no goli. Ka myanit kalibaba wan gis nanya, yakanga ta ngap nigya wa sinya.⁴⁰ Insadi ka nadog in Hwan fwayong, ginya natahin han Hisos, kawas Andris, in Simon Pidro fadwasay.⁴¹ Is Andris nadagos wa hat fadwasay Simon, nafwayong hanya kitay, Mi nalag in Diyos-natogon-Famawi kat kahologan is Kiristo.⁴² Ginya nataban in Simon han Hisos. Is Hisos nadoro in Simon a, nafwayong hanya, Haw mangharaw is Simon, in Hwan anak, dapat aba ta ngomayan hyamo is Sifas. To fag ngayan kawas Pidro yadi, it kahologan, bato.⁴³ Nonbago marom yabay, is Hisos kasaya has sakop Galiliya. Ginya madi, nondasog sinya, is Hisos nalag in Filipi a, nalwang hanya, Tahinan wangko.⁴⁴ Is Filipi taga Bitsayda yadi, ginda Andris da Pidro banwanan.⁴⁵ Is Filipi nasayak in Natanail a, nafwayong hanya, Mi nalag kan Mwisid fagsoraton sas Batasan Hodyo, kan Diyos manga fangampang fagsoraton, kangas Hisos, gis banwa Nasarit, in Hosi anak.⁴⁶ Is Natanail naintaw in Filipi, Da ngap, tam awkin ha fagasolopon fiya gis banwa Nasarit? Is Filipi nasagot, Hawi, tam hanya wan, fanlag ngay.⁴⁷ Is Hisos nalag ngay in Natanail no kaakbang ha hanya, nafwayong has taw kawa han Natanail, Yabay, to orongan kan Israil hasokfonan sadi. Maanod it manga hampang fagayo.⁴⁸ Is Natanail nalwang han Hisos, Twa oman ha no nahilala angko? Is Hisos nasagot, Haw no masarirongan daga fon igos, is Filipi nyawa idyag tawag hyamo, aho dandig lag hyamo haraw.⁴⁹ Is Natanail nalwang, Rabi, haw wa nga in Diyos Anak. Haw wa ka gorongan manga taga Israil.⁵⁰ Is Hisos nalwang, Hantiwala wangko maskin aho nalwang ha hyamo kitay, hoglag hyamo haraw, haw no sayapdis daga fon igos? Bondi kitonya fag madolaw kam manga lagon aban.⁵¹ Is Hisos iglwang ya kitay, Orongan wan, bohonwa bohag, hogfwayong ha hayo, ham lomag ka banwa sam tongod idwa hagfarom, in Diyos manga anghil igdokson yagsakbaw ya sangko, aho Kanbali Taw.

2 Nonsagaya dowak yabi, ha fangsawan sas banwa Kana, sakop Galiliya. In Hisos ina sinya yadi.² Ta nafatawag in Hisos hanggan it manga katogbong has-ta fangsawan.³ No namin wan ista inomon alak, in Hisos inag lwang han Hisos, Ista alak namin wan.⁴ Is Hisos iglwang, Ina, nyawa hadwa fomwayong angko,

angko ibolonon bon yapdi tonya.⁵ Ginya in Hisos ina igfwayong hasta manga sogowan, Ham fakatanog ha hanya, nyawa kanat sagoon hayo.⁶ Ka manga Hodyo ha ogali bilang wa fagliyong ta nodwag fatonglos. No faginan mangwan hanon, ta gonaw yap fiya fiya it manga bitis hanggan gamat. Yakanga ha onom ik tapayan sinya ista sohadan danom. Tonya fag manga tapayan no napno, manga dowak safolo, ngatay tolok safolok gawadan danom.⁷ Is Hisos iglwang hasta manga sogowan, Fahapnowan danom ka manga tapayan. Ginya ta nafahapno ngay balis bayang.⁸ Ginya madis Hisos nafwayong has taw, Kati sarokan ginya, dyan hasagbahala sas fangsawan. Ginya ta nadiya ngay.⁹ Tonya fag danom inbali alak a, hanggan kagbahala nandog nanginom ogbot. Hanyadwa natwa no ginday ka alak, dapat ay, kasta manga sogowan ka nasarok ka danom fadi wad natwa no ginday tonya. Ginya kagbahala nafatawag ka ama mamabay,¹⁰ nalwang ha hanya, Nogbanwan sas fangsawan, ta nogbangkad bago bago, kawa manga fiya fag alak, ginya madi, manga taw no nanginom wa fagayo, yabay bago di nabangkad kadwa bangan fiya, dapat kam nabangkad goyan goyan, fiya man ka gona.¹¹ To in Hisos naibolon bago bago fag falagon madolaw sas banwa Kana, sakop Galiliya. Is Hisos nafalag has taw it kafiyang sinya, yakangat manga katogbong igsyag yadi ha hanya.¹² Ginya madis Hisos hanggan it ina, it manga fadwasay hanggan it manga katogbong, hawas lwad has banwa Kapirnaom. Ta nadogay sinya manga fayahin ik yabi.¹³ Aban, no kaakbang wa ka Fanohodan Nagsagayan, ka manga Hodyo nogtohod ka anghil no nasagaya ista manga balay hyabi hyabi, is Hisos hawas bohid, has banwa Hirosalim.¹⁴ Is Hisos nondasog has basad aladan Fanimbaan-Dahol, nalag ka mangag fasali manga baka, manga topa, manga salompati, hanggan kagfabalyo ista kwarta, matokawan sat bilog manga fwalidan kwarta sas basad aladan fanimbaan.¹⁵ Ginya madis Hisos nalanit ista manga tarabing, nafabali famakbak, nafalimo manga baka hanggan topa, nafaalin yadi was taw gis basad aladan fanimbaan. Nafasarabodan kasta kwarta ka mangag fabalyo kwarta a, nafahakfo ista manga fwalidan.¹⁶ Is Hisos nasogo ka manga taw kagfasali salompati, nalwang, Faalinan ka manga manok gis basad aladan. Ham fag idwag fabali angko Ama balay sadik balay fanalian.¹⁷ Ginyan Hisos manga katogbong natohod kitay insorat kiti, Angko Diyos, kawa ho kawili wa dahol im balay, kito was afoy ik mayanbong sangko basad fangayofan.¹⁸ Yakanga ka manga fagtahinan Hodyo kaglaban in Hisos, gintaw hanya, Kana fag madolaw kam fagfalagon hyami kaarakitay igfatohoyan kitay haw ha kangayanan gibolon kito?¹⁹ Is Hisos igsagot has taw, Nyawa ham fahakfo to fag Fanimbaan-Dahol, tolo lamang ik sirang ho fatobo ya.²⁰ Ka

manga Hodyo iglwang, Ha aw gayfan kitay haw somyagan fatobo ya to fag fanimbaan tolo lamang ik sirang? Gwadi hyabi, ofat ik safolo ha onom ik fan-garaw bago dintabo kalig to fag fanimbaan. ²¹ Dapat in Hisos faglwangon Fanimbaan-Dahol, kawat sadili habilogan. ²² Ginya madi aban, is Hisos nonboyag ya domwag gis kahatayan, it manga katogbong natohod kawa hanya nalwang kitonya, yakanga ta katiwala kitay orongan in Diyos Kasoratan, hanggan in Hisos manga fwayong. ²³ Is Hisos no sayapdis basad banwa Hirosalim sas Fanohodan Nagsagayan, aywan igsyag ha hanya noglag it naibolon manga falagon madolaw. ²⁴ Dapat ay, is Hisos idwa yadi kasyag has taw, ²⁵ maskin hanya kilala fiya fiya fagayo fag manga taw. Nyawa idwa ha taw igtoltol hanya, is Hisos fadi wad twa sasta basad fangayofan.

3 Yabay, ha sadik ama fagtahinan Hodyo, gis layonan manga taw tagngayan manga Farisiyo, kawas Nikodimo. ² Gis nanya basad yabi, is Nikodimo nasabang han Hisos, iglwang, Rabi, mi twa waglag kitay haw sadik kagfaadal, kan Diyos nasogo, maskin nyawa faktaw idwa syagan gibolon kito fag manga falagon madolaw is Diyos nodwa sa hanya. ³ Is Hisos iglwang, Orongan wan, bohonwa bohag, hogfwayong hyamo, nyawa faktaw nodwam sagaya ya domwag anak dararag bago, idwam aktom san Diyos sakop. ⁴ Is Nikodimo gintaw kitay, Kinday araw sadik taw nom-sagaya ya bago, no magorang wan? Idwa twa mwali ya hat ina basad tyan, ginyam sagaya ya. ⁵ Is Hisos igsagot kitay, Orongan wan, bohonwa bohag hogfwayong hyamo, nyawa faktaw nodwam bali anak dararag gis danom hanggan gis Maliyaw fag Falad idwam aktom san Diyos sakop. ⁶ Ka anak gis taw, taw mandi. Ka anak gis Falad, falad mandi. ⁷ Haw fag idwa katakag dog aho noglwang ha hyamo, ham fagayo fag imsagaya ya bago. ⁸ Ka bagyo igfalayfayan no hadat fakasayaon, tam igdog igfawas, dapat tam idwa twa no ginday ka bagyo hanggan no haday kamdiya. Kitonya yadi ka fagayo ka Maliyaw fag Falad nafaanak. ⁹ Is Nikodimo gintaw, Kinda araw tonya nangos? ¹⁰ Is Hisos igsagot han Nikodimo, Gwadi haw sadik famaadal sas Israil, dapat haw aw idwa twag dog to fag bagay? ¹¹ Orongan wan bonwa bohag kangko fwayong hyamo, migfwayong ka hyami natwa, migfaorongan yadi ka hyami mata lagan, dapat ham idwag faanod hyami barita. ¹² Ham nodwag faanod kangko fwayong hayo manga fakaorongan sas baba daga, kinda araw ham nogfaanod angko fwayong hayo ka san Diyos banwanan sam tongod fag maga fakaorongan? ¹³ Idwa ha taw nasakbaw han Diyos banwanan ham tongod no bohonwa aho, Kanbali Taw, ka nadokson mandi gim tongod. ¹⁴ No kinday hyabi is Mwis is nafaabwat sas tongod hayo ka abyanon tanso, ta no sas basad fakahyabogan, kitonya yadi, aho, Kan-

bali Taw, nomabwat aban, ¹⁵ kaarakitay nyawa faktaw nogsyag hangko ha haboyagan hanggan aban aban. ¹⁶ Maskin is Diyos galwasi wa dahol dahol ka manga taw sadik baba daga, yakanga hanya nadisag it anak sadi sadi, kaarakitay nyawa faktaw nogsyag hanya, idwa has kadwatan, dapat ay, imboyag hanggan aban aban. ¹⁷ Kawas Diyos idwa nasogo angko, it Anak, has baba daga kaarakitay igfatohoyan manga taw has fadosaan, dapat kaarakitay gingko agwantaon, bomawi ka manga taw. ¹⁸ Is Diyos idwag fatohoyan has fadosaan kagsyag hangko, in Diyos Anak, dapat ay, kadwag syag hangko, danwa nafatohoyan has fadosaan, maskin ngay tadwag syag hangko ngayan, kan Diyos Anak sadi sadi. ¹⁹ Kiti is Diyos nogfatohoyan has fadosaan ka manga taw. Ka yawa inbangkad hastay is baba daga, dapat ay, manga taw kasaya man ka marom has mayawa, maskin dwat ista manga ogali. ²⁰ Nyawa fakta ka gogali dwat, kadwat iglag ka yawa, idwa yadi gakbang has mayawa maskin kadala kitay it manga ogali dwat imlag. ²¹ Dapat ay, nyawa faktaw no fiya it ogali, idwa kwangit igfalag it manga ogali sas basad fakayawan, kaarakitay manga taw lomag fiya fiya kitay it ogali kitonya, maskin hanyan sadi san Diyos. ²² Ginya madi aban, is Hisos hanggan it manga katogbong nadasog has sakop Hodiya a, ta nadogay ogbot sinya, hanggan is Hisos igfatogna manga taw. ²³ Gis nanya fag masohod, is Hwan igfatogna yadi manga taw sas Inon, akbang has Salim, kawa dahol yadi ka danom sinya. Manga taw gobok in Hwan hanggan is Hwan igfatogna manga taw sinya, ²⁴ kawa tadyag poriso in Hwan gis nanya. ²⁵ In Hwan manga katogbong hanggan sadik Hodyo igdaraogan kawa has ogali Hodyo bilang fagliyon ta nodwag linay hosto. ²⁶ Ginya madi in Hwan manga katogbong hawan Hwan, iglwang, Haw kagfaadal, haw igtahod aw kam nahablang itfagonan sas salogan myanit baliwa Hordan, kam nafasayag dog has taw? Yabay hanyag fatogna yadi manga taw, fagayo gobok hanya kati. ²⁷ Is Hwan igsagot, Nyawa faktaw idwa ha tanggapon kitonya no bohonwas Diyos kagdisag hanya. ²⁸ Ham mandi ka nadog angko bibig hampang aho nogfaorongan kitay bohonwa aho kan Diyos-natogon-Famawi. Is Diyos nasogo lamang angko kaarakitay gomona hanya. ²⁹ Sas fangsawan, ka ama mamabay kasolong wa dahol maskin hanya wan ka ina mangindogan. Dapat ay, ka ama kahilala sinya yadi sas fangsawan, igtalinga has ama mamabay, kasolong yadi wa dahol nogdog it hasnog. Kitonya yadi aho no kasolong wa dahol kati. ³⁰ It kangayanan fag kadahol wa kadahol wa nangos, dapat ay, kangko fag kaogbot wan. ³¹ Ka gis tongod dahol man has fagayo it kangayanan. Ka taga daga gi odis baba daga a, ka odi manga bagay gis baba daga it manga fagfwayongon. Dapat ay, ka gin Diyos banwanan sam tongod, dahol man has fa-

gayo it kangayanan. ³² Nyawa hanyag faorongan it mata lagan, hanggan it talinga donggon, idwa haggfaanod it fwayong. ³³ Dapat ay, kagfaanod it fwayong igfaanod yadi kitay orongan wan in Diyos fwayong. ³⁴ Kan Diyos nasogo igfwayong yadi in Diyos manga hampang, maskin idwa ha korang is Diyos nogdisag it Maliyaw fag Falad ha hanya. ³⁵ Is Diyos, kat Ama, galwasi it Anak, nafaano yadi fagayo fag manga bagay hat Anak. ³⁶ Kagsyag han Diyos Anak ha haboyagan hanggan aban aban, dapat nyawa faktaw kadwa katanog it Anak, idwa lomag kitonya fag haboyagan, dapat hanya in Diyos odi fakaisogon fagaba.

4 Is Hisos no sayapdis sakop Hodiya, ka manga Farisyo nadog kitay kan Hisos fagfatognaon manga taw hanggan kanbali in Hisos manga katogbong aywan man kan Hwan. ² Ka orongan, bohonwas Hisos kagfatogna manga taw, ka dit manga katogbong kagfatogna is taw. ³ Yakangas Hisos no nadog kitay manga taw igfadahit kitay kitonya, da Hisos nalahaw ginya, nwali has sakop Galiliya. ⁴ Noglahaw hanya, ka fiya da Hisos fag domalan sas sakop Samariya. ⁵ Ginya madi da Hisos indasog has sakop Samariya, has bahalan banwa Sikar. In Hakob nagtogonalan iyab hyabi hyabi han Hosi, it anak, akbang yadi sinya. ⁶ Hanggan kan Hakob gobon hyabi hyabi sinya yapdi. Is Hisos inyaya wan kawa ayayot naglahawan, yakanga dagos wantokaw sas bilog salongawan gobon. Gis nanya manga boknga sirang ka myanit. ⁷ In Hisos manga katogbong nadagos ha basad banwa kaarakitay manali fanganon. Ista ginanan, sadik ina taga Samariya inbangkad has gobon kaarakitay managob danom. Is Hisos iglwang has ina, Ho kainom nangos. ⁹ Ka inag lwang han Hisos, Haw Hodyo wan, aho ina di, taga Samariya. Kana mayon haw nogsagad inomom gingko? Ka ina indolaw wan maskin ka manga Hodyo idwa gamigosan has manga taga Samariya. ¹⁰ Is Hisos igsagot has ina, Haw nangos, no natwa wagdog in Diyos disagon, hanggan no kilala no fakta kagsagad inomom danom, fag haw man nangos ka somagad gi hanya, kawa danom kagfaboyag manga taw it fagdisagon hyamo. ¹¹ Ka inag lwang, Ama, hadwa ha fanarok a, abasad yadi ka gobon. Kinda haw no bomolay ka danom kagfaboyag manga taw? ¹² Gwadi to fag gobon hyami yapdi hafofowan Hakob faobonan hyami hyabi hyabi. Is Hakob hanggan it manga anak, hanggan it manga hayopan fagayo, giwastay fag danom no ginom hyabi. Haw aw gayfan haw madonong man in Hakob? ¹³ Is Hisos igsagot, Fagayo ka ominom gistay fag danom, im-inom ya. ¹⁴ Dapat nyawa faktaw ka ginom kangko disag fag danom idwam inom domwag, nyawa ginahin. Maskin ka danom kangko fainomon ha hanya imbali bilang sadik bolbogan sat basad fangayofan, kagbolos danom fagaba kagfaboyag hanya hanggan aban aban. ¹⁵ Ka inag lwang, Ama, hogyay

tonya fag danom kaarakitay hodwam inom domwag, idwa yadi hastay aban manarok. ¹⁶ Is Hisos iglwang has ina, Fagoli wan, tawagan im indogan a, tabanan hastay. ¹⁷ Ka inag sagot, Hodwa ha indogan. Is Hisos iglwang, Hadwag bohag ha noglwang hadwa ha indogan. ¹⁸ Maskin im manga indogan gis hyabi lima wan, hanggan kam ofod ama kati bohonwam indogan. Hadwag fyalom haw noglwang kitonya. ¹⁹ Ka inag lwang, Ama, kati ho natwa wagdog yabay, haw in Diyos wa fangampang. ²⁰ Istay fag moyod hyami ha fofowan nogsimba han Diyos, dapat ham manga Hodyo iglwang, fag sas Hirosalim manga taw nogsimba han Diyos. ²¹ Is Hisos iglwang, Ina, haw fakatiwala angko fwayong. Aban idwastay baba moyod, idwa yadi sas Hirosalim manga taw no mamasayagdog hantam Ama. ²² Ham manga taga Samariya idwa kilala orongan ka hayo fagsimbaon. Dapat hami manga Hodyo, mi kilala fiya fiya ka hyami fagsimbaon, maskin gis Hodyo is Diyos no bomawi manga taw. ²³ Dapat aban, hanggan nyawa kati madi ngap, in Diyos Falad kagfasyagan manga taw igfasayagdog hantam Ama kawa kilala hanya orongan, yakanga maangay nogfasayagdog hanya. Kitonya fag manga taw kantam Ama fagsayahon kaarakitay fasayagdog hanya. ²⁴ Is Diyos Falad wan. Ka mangagsimba han Diyos, fag it Falad kagfasyagan igfasayagdog orongan. ²⁵ Ka inag lwang, Ho twa kitay in Diyos-natogon-Famawi imbangkad aban, kasta faglwangon is Kiristo. Hanya, hono, nombangkad fomwayong hantam fagayo fag manga bagay. ²⁶ Is Hisos iglwang, Aho ka kampang ha hyamo kati, aho wa ngap tonya fag taw. ²⁷ Nalwang di ngay kitonya has ina, ginyan Hisos manga katogbong indasog wan, bago nwali gis banwa. Tandolaw wa dahol maskin ina in Hisos kahampang. Dapat tadwa ha namawat, tadwa naintaw has ina, Kanam fakasayaon? Tadwa yadi naintaw han Hisos, Kana mayon haw no kampang has ina? ²⁸ Ginya madi ka ina naobon sinya it balanga fanagoban, nwali ya has banwa, nafwayong has taw, ²⁹ Kalibang, tam hanya wan, famantay ha sadik ama kagfwayong angko fagayo angko naibolon. Ngatay tonya wa aba kan Diyos-natogon-Famawi? ³⁰ Ta nalahaw wa yabay, nagobok in Hisos. ³¹ Gis nanya yadi in Hisos manga katogbong igfaorongan hanya, iglwang, Rabi, haw fakwan hanon nangos. ³² Dapat is Hisos nasagot has taw, Ham idwa twa no kana kangko fanganon. ³³ Yakangat manga katogbong nangarintawan, Mayon aw ha taw igdisag hanon ha hanya? ³⁴ Is Hisos nalwang, Angko fanganon kawa aho no katanog kagsogongko it fakasayaon, hanggan igfatabo it faibolonon angko. ³⁵ Idwa awkin ham iglwang, Ofat yak magdanon bago fanganion? Ahog fwayong hayo, fag bantay manga namay, fanlag ngay, dararag wat manga haway kati, kaani wan. ³⁶ Ka gani ha tangdan hanggan igtifon it bohad has haboyagan idwa ha

katabowanan, kaarakitay kagtanom hanggan ka gani pariho kasolong. ³⁷ Bohonwa bohag ta noglwang, Bokod wa kagtanom, bokod wa ka gani. ³⁸ Hogsogo hayo kitay ham fagani ka bohonwa hayo nakayayan. Ka tiba gibolon a, ginya ham korayan git nakayayan. ³⁹ Aywan fag manga taga Samariya ginya fag banwa igsyag in Hisos no nadog ka ina faorongan kitay, Hanya nafwayong angko angko naibolon fagayo. ⁴⁰ Yakanga ka manga taga Samariya no nagobok in Hisos, tagfaaronan hanya nangos fag domogay yapdi sasta banwanan. Da Hisos nadogay yapdi sinya dowak yabi. ⁴¹ Yabay aywan man katfagonan kagsyag in Hisos no nadog in Hisos sadili fwayong. ⁴² Taglwang has ina, Kati migsyag in Hisos maskin hami wa ka nadog it sadili fwayong, bohondi kitay hyamo odi fwayong hyami. Kati mi natwa wagdog fiya fiya kitay, hanya wa ka orongan fag Famawi manga taw sadik baba daga. ⁴³ Nonsagaya wa dowak yabi, is Hisos nwali ya has sakop Galiliya, ⁴⁴ kawas Hisos mandi kaglwang, Nyawa siday fag manga taw tomalinga ka fangampang, dapat ka git sadili banwanan idwa tomalinga hanya. ⁴⁵ Itfagonan manga taga Galiliya ginya yadis Hirosalim sas Fanohodan Nagsagayan a, nalag in Hisos naibolon fagayo sinya. Yakangas Hisos nondasog sas Galiliya, tagbaya wa dahol iglag hanya. ⁴⁶ Ginya madis Hisos inbangkad ya has banwa Kana, sas sakop Galiliya. Sinya kan Hisos nagfabalihan alak gis danom itfagonan. Kati fag masohod sadik anak ama sas Kapirnaom ha sagit. It ama ha kangayanan sas gobirno. ⁴⁷ Kat ama no nadog kitay is Hisos indasog sas sakop Galiliya gis sakop Hodiya, ka ama hawan Hisos, igfaaronan kitay fag hanyas lwad has banwa Kapirnaom, fafiyon nangos it anak, maskin kafos wat ipsaw. ⁴⁸ Is Hisos iglwang hanya, Aho nodwa gibolon manga falagon madolaw, ham idwag syag angko. ⁴⁹ Ka ha kangayanan iglwang, Ama, kalibang, tam hanya wan, tam nangos fag tomahod yappingko anak. ⁵⁰ Is Hisos iglwang, Fagoli wan. Im anak in fiya yat sagit. Ka ama insaya wagdog in Hisos hampang, nwali wa ngay. ⁵¹ Noglahaw yapdi has lwad, goli wan, it manga sogowan igtagbo hanya, iglwang, Im anak in fiya wat sagit. ⁵² Ka ama naintaw has taw no ginahin fag masohod it anak nonfiya. Taglwang, Fafon, myanit kabalihid wan nonfiya it hagnaw. ⁵³ Ka ama natohod yabay gis nanya fag masohod fiya fiya is Hisos noglwang, Im anak kafiya wan. Yakanga ka ama hanggan it ofod sas balay fagayo igsyag in Hisos. ⁵⁴ To ka fadowa fag falagon madolaw kan Hisos nafalag has taw nondasog has sakop Galiliya gis sakop Hodiya.

5 Ginya madis Hisos hawas bohid has banwa Hirosalim, maskin ha sadi yak Fanohodan kaakbang wan. ² Sas basad alad bato sas Hirosalim, sas akbang sakbawan manga topa, ha linaw gis bolbogan. Sas ligongan bolbogan ha balay, ha limak ansagan. It

ngayan sas fangampangan Hodyo Bitisda. ³ Aywan fag manga ha sagit, tiba bota, tiba gafilay, tiba idwa twa kimot, maigyanan sinya sas manga baba ansag. Tagfanaya no hagfafarisikan ka danom. ⁴ Maskin nomtoon, intam Fon anghil igdokson, igfafarisikan ka danom. Ginya madi, nyawa fakta ka gomona has basad danom nomfafarisikan, imfiya wan nyawa kanat fagdogon. ⁵ Sadik ama sinya tolok safolo ha walok fangaraw no ha sagit. ⁶ Is Hisos no nalag hanya, hanggan natwa kitay dogay wa fag fangaraw no maigyanan sinya, naintaw, Haw aw kasayam fiya im sagit? ⁷ Ka ama ha sagit nasagot, Kana wa kin ama, ahodwag dasog. Idwa hagtogbong angko no hagfafarisikan ka danom. Aho nyawa kaakbang has danom, tiba gona man angko kadokson. ⁸ Is Hisos iglwang has ama, Haw fag kalindog, diyon wam sagmak, fag lahaw wan. ⁹ Ka ama in fiya wa dagos. Naanggong wat sagmak, nahaw wan. Gis nanya fag sirang ka Hodyo fag Kafahowayan fag Sirang. ¹⁰ Yakanga ka manga fagtahinan Hodyo iglwang has ama kanfiya, Kati Sirang Kafahowayan, idwa maangay has Batasan Hodyo haw nogdiya im sagmak kati. ¹¹ Dapat ay, ka amag sagot, Ka nafafiya angko nafwayong angko kitay aho fag diya angko sagmak, fag lahaw wan. ¹² Ta gintaw hanya, Fakta fag ama ka nafwayong hyamo kitay diyon wam sagmak, fag lahaw wan? ¹³ Dapat ka ama kanfiya idwa kilala no faktaw is Hisos maskin is Hisos in-aktom has basad fakaaywanan manga taw sinya. ¹⁴ Ginya madi araw, is Hisos nalag kat nafafiya fag ama sas basad aladan Fanimbaan-Dahol. Is Hisos iglwang hanya, Kati yabay, haw in fiya wan. Haw fag idwag fadagos has ogali dwat, kaarakitay hadwa ha dogon mahori man inya. ¹⁵ Ginya madi ka ama inlahaw wan a, nafwayong has manga fagtahinan Hodyo, kawas Hisos ka nafafiya hanya. ¹⁶ Yakanga ka manga fagtahinan Hodyo igfabago igfahorihan in Hisos maskin sawas Sirang Kafahowayan no nafafiya sadik taw. ¹⁷ Dapat is Hisos igsagot has taw kiti, Nyawa ginahin hanggan wa kati, angko Ama gibolon hanggan aho kitonya yadi. ¹⁸ Ka manga fagtahinan Hodyo no nadog in Hisos hampang kitonya, labi wan kasaya fahatay hanya. Bohondi kitay ka no nalaban ka Batasan Hodyo has Sirang Kafahowayan baliwa, dapat kawag lwang yadi kitay is Diyos it sadili Ama a, igfadaholon it sadili kito yadin Diyos. ¹⁹ Yakangas Hisos iglwang has taw, Bohonwa gwadi bohag, orongan wan kangko fwayong hayo. Aho, in Diyos Anak, idwa gibolon basta odi angko sadili fangayofan, nodwag lag kitay kangko Ama gibolon kitonya. Maskin no kanangko Ama ibolon, aho it Anak gibolon yadi kitonya. ²⁰ Maskin angko Ama galwasi angko, it Anak a, igfalag yadingko it manga ibolon fagayo. Aban, hanya mamalag angko manga ibolon madolaw man to kat nafalag, ginya madi ham fagayo labi man imdolaw aban. ²¹ Maskin no kinday

angko Ama no nafaboyag ya domwag ka manga natay, kitonya yadi aho, it Anak igdisag haboyagan hangko manga fagfiliyon. ²² Angko Ama idwag fatohoyan has fadosaan nyawa faktaw, dapat nafatohoyan hangko, it Anak, kitay fag aho ka bahala fatohoyan has fadosaan ka manga taw. ²³ Angko Ama nafabali angko ha kangayanan kitonya kaarakitay fagayo fag manga taw gomalang angko it Anak, kito yadi ta no galang angko Ama. Kadwa magalang angko, it Anak, idwa yadi magalang angko Ama ka nasogo ankg. ²⁴ Orongan wa, bohonwa bohag angko fwayong hayo kitay, kag-talinga angko fwayong hanggan igsyag ha hanya ka nasogo angko, ha akwa wa haboyagan hanggan aban aban. Idwa ha fatohoyan hanya has fadosaan aban, dapat nalin wa gis kahatayan hawas haboyagan.

²⁵ Orongan wan angko fwayong ha hayo, bohonwa bohag kitay, kaakbang wa gis nanya fag masohod, no kitay di kati wan, ka manga mahatayan domog angko, in Diyos Anak, hasnog. No kayoday ka tomalinga angko imboyag wan. ²⁶ Maskin no kinday angko Ama ka syagan igfaboyag manga taw, kitonya yadi kat nadisag angko it Anak kitay, aho fag somyagan yadig faboyag manga taw. ²⁷ Angko Ama nafatohoyan kitay maangay no aho, it Anak, ka fatohoyan has taw it fadosaan maskin aho Kanbali Taw. ²⁸ Ham fag idwa kadolaw igdog aho nogfwayong hayo kitonya, maskin aban ogbot fagayo ka mahatayan sas manga lobgoban domog angko hasnog. ²⁹ Fagayo imbangon nyawa ginday. Ka manga naogali fiya imbangon has haboyagan, dapat ay, ka naogali dwat imbangon yadi, dapat ay imtohoyan di has fadosaan. ³⁰ Hodwa syagan igfatohoyan has taw ista fadosaan nongko di sadili fangayofan. Angko fatohoyan is taw angko lamang donggon ginko Ama. Yakanga aho nogfatohoyan ista fadosaan, sawas fakaorongan. Maskin aho katanog ka nasogo angko it fakasayaon, bohonwa angko sadili kafangayofanan, yakanga sawas fakaorongan aho nogfatohoyan ista fadosaan. ³¹ No aho lamang kagfaorongan angko sadili, manga taw idwa twa ngatay orongan angko fwayong. ³² Dapat sadil ya kagfaorongan yadi kawa hangko. Aho twa kitay orongan it manga fwayong kawa hangko. ³³ Itfagonan, ham no nasogo hayo manga sogowan han Hwan, is Hwan nafaorongan yadi kawa hangko. ³⁴ Nyawa hoglwang kitonya, ahodwa kasyag ka faorongan taw, dapat ka odi kitay hogfwayong kito kaarakitay ham imbawi wan. ³⁵ In Hwan manga fwayong ka bilang salong giging hanggan igyawa, nafasayag dog hayo. Sadik ngalay ham insaya wagdog it manga hampang, ka bilang salong. ³⁶ Dapat ay, ha akwa sadik bagay ka marigon man in Hwan faorongan kawa hangko, kikitay angko Ama faibolonon hangko. To fag manga ibolon kagfaorongan aho no faktaw, hanggan igfaanod kitay angko Ama ka nasogo angko. ³⁷ Ginya madi

angko Ama ka nasogo angko igfaorongan yadi kawa hangko. Nyawa ginahin ham idwa nadog angko Ama hasnog, ham idwa yadi nalag it walong. ³⁸ It manga fwayong hayo idwag dogayan sa hayo manga basad fangayofan maskin ham idwag faanod kitay aho kat nasogo. ³⁹ Ham manga Hodyo, ham igbasa fagaba ka manga Kasoratan kawa ham kasyag kitay ginyas Kasoratan ham no lomag haboyagan hanggan aban aban. Dapat ay, aho wa ngap kat fagfwayongon sinyas Kasoratan. ⁴⁰ Nyawa kitonya ham kafang gakbang angko kaarakitay ha haboyagan orongan. ⁴¹ Hodwa kasyag kitay manga taw mamasayag dog angko. ⁴² Dapat ho twa kitay ham idwa galwasi in Diyos. ⁴³ Ham igtanggap tiba taw fagaba ta no kabangkad sat sadili kangayanan, dapat ham idwag tanggap angko, nyawa angko kangayanan gi wangko Ama. ⁴⁴ Manga taw nogfasayag dog hayo, ham kasolong odig dog. Dapat ay, no hadin Diyos baliwa, kaarakitay is Diyos, ka sadil dik Diyos, ka mamasayagdog hayo, ham idwa katanog. No kitonya yapdi ham, kinday nangos ham gayfan ham no somyagan katiwala angko? ⁴⁵ Nyawa kitonya, ham fag idwa gayfan kitay aho ka somombong hayo hangko Ama. Is Mwis, ka hayo fagsyagon kitay, hanya ka bomaliwa hayo, hanya mandi kagsombong kawa ha hayo. ⁴⁶ Ham nangos no katiwala orongan in Mwis, ham katiwala yadingko maskin aho kat fagsoraton fagaba. ⁴⁷ Dapat ham nodwa katiwalat manga natorat, kinda kin araw ham nomtiwala angko manga hampang, ham gayfan?

6 Ginya madis Hisos hanggan it manga katogbong nadifay ka dahol fag linaw, linaw Galiliya, tibag lwang, linaw Tibiriyadis. ² Manga taw kaaywanon kaaywanon naoyan in Hisos, maskin ta nalag it kadonongan no nafafiya manga taw ha sagit. ³ Is Hisos hanggan it manga katogbong hawas bohid has baba moyod a, tantokaw wa sinyas. ⁴ Gis nanya fag masohod ka Fanohodan Nagsagayan kaakbang wan, ta nogtohod ka anghil no nasagaya ista manga balay hyabi hyabi. ⁵ Is Hisos nogbantay sas ligongan, iglag kaaywanan wa kaaywanan wa fag manga taw kaakbang hanya. Yakangas Hisos gintaw in Filipi, Ginday nangos tam no manah hanon hosto kaarakitay to fag manga taw mangwan? ⁶ Is Hisos noglwang kitonya, igsolay odin Filipi, maskin is Hisos danwa natwa it bato ibolonon. ⁷ Is Filipi igsagot, Dowak daan dinaryo korang yapdi fanali tinapay kaarakitay homosto, mafod has taw fagayo, ngadi ogbot. ⁸ Is Andris, in Hisos katogbong sadil ya, in Simon Pidro fadwasay, iglwang han Hisos, ⁹ Sadik anak ama istay ha balon limak tinapay dawa, hanggan dowak oyang. Dapat kinda araw, idwa mafod has fakaaywanan fag manga taw. ¹⁰ Is Hisos iglwang hat manga katogbong, Fatokawan yap ka manga taw. Sinya malamnon, yakanga manga taw fagayo intokaw wan. Ka manga ama gamtanan manga 5,000. ¹¹ Is

Hisos nabol ka manga tinapay, ginya no nabaya in Diyos, nafahoray has manga taw ka matokawan sinya. Kitonya yadi ka oyang nafahafod has taw no kayodawan ka kahanan. ¹² Ta no napsog wa fagayo, is Hisos nalwang hat manga katogbong, Tifonan yap kasta manga sawad nakanan kaarakitay idwam olan. ¹³ Ginya ta natifon ista sawad tinapay dawa mafaarogbotan, safolo ha dowak boyog napno. ¹⁴ Ka manga taw no nalag in Hisos nafalag madolaw, taglwan, Yabay yabay, to wa nga ka Kasoratan fagfwayongon in Diyos fangampang ka kabangkad hastay has baba daga. ¹⁵ Is Hisos nasarom kitay ka manga taw kaakbang wa gomamat hanya kaarakitay pomilit hanya kabali ista gorangon. Yakangas Hisos nalahaw ya ngawan, hawas moyod, nabisok wan. ¹⁶ Araw, myanit no kasangday wan, in Hisos manga katogbong hawas gobang linawa, ¹⁷ nasahay wa baloto, igdifay linaw nangos, hawas Kapirnaom baliwa. Ginya araw, tanyabi wan, dapat is Hisos idya kadasog has taw. ¹⁸ Gis nanya igbagyo marigon, yakanga ka taob dagat kadaholon wan. ¹⁹ In Hisos manga katogbong no nalwag manga lima, ngatay onom ik liho gis bahalan linaw, taglag in Hisos. Ta gafalad wan maskin is Hisos iglahaw baba danom, gakbang has baloto. ²⁰ Dapat ay, is Hisos iglwan has taw, Aho di, ham fag idwa kadala. ²¹ Ginya ta nabaya wagfasahay in Hisos has basad baloto. Ginya tandasog wa dagos has gobang linaw hasta fangadagsaan baloto. ²² Ginya madi nonbago marom, kat fakaaywanan fag manga taw kangoyan yapdi sas bali difay linaw, natohod kitay sadi dik baloto sas gobang linaw fafon. Ta galingawan in Hisos. Ta natwa kitay is Hisos idwan sahay, idwa nahoyog it manga katogbong. It manga katogbong lamang kanlahaw. ²³ Ginya, araw araw ogbot, handasog manga baloto tiba gis banwa Tibiriyadis, indagsa hantam Fon akbang nagfasalamatan manga tinapay, ginya madi ka fakaaywanan manga taw nahwan wan. ²⁴ Yakanga ka fakaaywanan fag manga taw no nalag kitay is Hisos idwa akwa sinya, nyawat manga katogbong, ta nasahay yadi wan tonya fag manga baloto, hawas Kapirnaom baliwa kaarakitay ta somayak in Hisos. ²⁵ Ka manga taw no nalag in Hisos sas difay linaw, ta naintaw ha hanya kitay, Rabi, ginahin haw nondasog istay? ²⁶ Is Hisos igsagot kiti, Orongan wan, bohonwa bohag, aho noglwan kitay ham idwag sayak angko maskin ham twagdog angko manga nafalag madolaw, dapat maskin ham nahwan ka fanganon hanggan ham napsog wan. ²⁷ Ham fag gibolon mahogod kaarakitay ha hanon kagfaboyag manga taw has haboyagan hanggan aban aban, bohonwa ka hanon ka ha kadwatan di. Aho, Kanbali Taw, ka domisag to fag fanganon ha hayo, maskin is Diyos angko Ama igfathoyan kitay hawangko it kangayanan. ²⁸ Yakanga ta gintaw in Hisos, Kana araw hyami fakatanogon kaarakitay hami

omibolon in Diyos wa fakasayaon? ²⁹ Is Hisos nasagot has taw, Kan Diyos fakasayaon, ham fag syag han Diyos nasogo. ³⁰ Ginya taglwan kitay, Kanam falagon madolaw ha hyami kaarakitay mimtiwala mi no lomag tonya? Kana kam ibolonon? ³¹ Hyami manga hafofowan nahwan mana no basad yapdi fakahyabogan, kito kansorat, Hanya nadisag has taw ka fanganon gin Diyos banwanan sam tongod. ³² Is Hisos iglwan, Orongan wan, bohonwa bohag angko fwayong ha hayo kitay, bohonwas Mwisid ka nadisag ha hayo ka fanganon gim tongod. Angko Ama kagdisag ha hayo ka fanganon orongan git banwanan sam tongod. ³³ Kawa kan Diyos fagdisagon fanganon kagdokson git banwanan sam tongod, igdisag yadi haboyagan has manga taw sas baba daga. ³⁴ Ta nanagad kitay, Ama kin, migyay to fag fanganon fagaba. ³⁵ Is Hisos iglwan kitay, Aho ka fanganon kagfaboyag manga taw. Ka gakbang angko idwam lonos nyawa ginahin, hanggan kagsyag angko idwa yadim inom domwag. ³⁶ Dapat ho nafwayong hayo kitay nyawa ham iglag wangko, ham idwag syag angko. ³⁷ Fagayo fag manga taw angko Ama bato disagon hangko, omakbang angko. Ahodwa domayo ngadi sadi, ngadi faktaw ka gakbang angko. ³⁸ Maskin ahonbangkad gin Diyos banwanan sam tongod kaarakitay omibolon kagsogo angko it fakasayaon, bohonwa angko sadili fakasayaon. ³⁹ To in Diyos fakasayaon ka nasogo angko hastay kitay, aho fag idwag liyam ngadi sadik taw kat nadisag hangko. Yatokitay, aban, sas ginanan fag sirang, aho fag fabangon ya tonya fagayo. ⁴⁰ Maskin angko Ama fakasayaon kito, fagayo kagsyag, hanggan kagbantay angko, it Anak, fag ha haboyagan hanggan aban aban. Ho fabangon ya tonya fag manga taw has haboyagan kadwa ha katabowanan sas ginanan fag sirang. ⁴¹ Ginya madi ka manga Hodyo gidginasan ha sadi ha sadi, kahori in Hisos maskin hanyag fwayong kitay, Aho ka fanganon kanbangkad gin Diyos banwanan sam tongod. ⁴² Yakanga taglwan, To fag is Hisos in Hosi odi anak, idwa aw? Tam kilalat ama hanggan wat ina. Kinday nangos tonya noglwan kitay hanyan bangkad hastay gin Diyos banwanan sam tongod? ⁴³ Is Hisos igsagot has taw, iglwan, Ham hawa gidginasan. ⁴⁴ Idwa ha omakbang angko no bohonwa angko Ama ka nasogo angko kagfaboyag hanya, hanggan aho faboyag ya hanya aban sas katabowanan fag sirang. ⁴⁵ Insadi san Diyos manga fangampang nasorat kitay, Is Diyos kagfatwagdog has manga taw fagayo fagayo. Fagayo kagtalinga hangko Ama, ginya twagdog it fwayong ka gakbang hangko. ⁴⁶ Bohonwa kitay ha taw nalag angko Ama, no bohonwa ka gin Diyos mandi, hanya lamang ka nalag angko Ama. ⁴⁷ Orongan wan, bohonwa bohag kangko fwayong hayo kitay, kagsyag angko ha haboyagan hanggan aban aban. ⁴⁸ Aho ka hanon kagfaboyag manga

taw. ⁴⁹ Hayo manga hafofowan nahwan mana no sas basad fakahyabogan, dapat ta natay wa fagayo. ⁵⁰ Dapat ay, manga taw no kwan ka hanon kanbangkad gin Diyos banwanan sam tongod, idwa matay. ⁵¹ Aho wa ngap ka hanon kagfaboyag manga taw, aho kanbangkad gin Diyos banwanan sam tongod. Nyawa faktaw no kwan to fag hanon, ha haboyagan hanggan aban aban. Angko habilogan kangko disag ha hanya, kwinta wat hanon. Tongko disag kaarakitay igfaboyag ka manga taw sadik baba daga. ⁵² Ginya madi, kawas Hisos iglwang kitonya, ka manga Hodyo kagtalinga igfabodbohagan wan, taglwang, Kinda to fag taw no domisag intam it habilogan? Kinda tam no homwan? ⁵³ Yakangas Hisos igsagot has taw, Orongan wan bohonwa bohag angko fwayong ha hayo, ham nodwa homwan angko habilogan, aho Kanbali Taw, ham nodwa yadi ominom angko folot, ham idwa ha haboyagan orongan sa hayo sadili. ⁵⁴ Ka kwan angko habilogan hanggan ginom angko folot, tonya ka ha haboyagan hanggan aban aban, aho faboyag ya hanya sas katabowanan fag sirang. ⁵⁵ Maskin angko habilogan ka hanon orongan, hanggan angko folot ka inomom orongan. ⁵⁶ Ka kwan angko habilogan hanggan ginom angko folot kasadi fagaba sangko, hanggan aho kasadi yadi sa hanya. ⁵⁷ No kinday angko Ama boyagan ka nasogo angko, yakanga aho boyagan yadi, kitonya yadi ka kwan angko, kaboyag yadi kawa aho boyagan wan. ⁵⁸ Yakanga to ka hanon kanbangkad gin Diyos banwanan sam tongod, idwa kitos hanon hayo manga hafofowan nahwan, ginya natay aban. Ka kwan to fag hanon ha haboyagan hanggan aban aban. ⁵⁹ Is Hisos sas basad fanimbaan Hodyo sas Kapirnaom nogfaadal has taw kitonya. ⁶⁰ Aywan fag manga katogbong kagtahin in Hisos haraw, no nadog it manga hampang iglwang, Madolaw wa dahol to fag adal. Fakta ka syagan igfaanod tonya? ⁶¹ Dapat is Hisos natwa kitay manga katogbong kagtahin hanya gidginasan kitonya, yakangag lwang, Ham awkin kabway wan maskin madolaw angko adal? ⁶² Kinda nangos ham no lomag angko, Kanbali Taw, goli wan hangko banwanan hyabi? ⁶³ In Diyos Falad kagfaboyag manga taw. Ka habilogan taw idwa syagan igfaboyag manga taw. Angko manga nafaadal hampang ha hayo kan Diyos Falad hanggan haboyagan. ⁶⁴ Dapat ay, tiba sa hayo idwag syag angko. Gi yapdis bago bago is Hisos natwa wan no fakta fag manga taw idwa somyag hanya hanggan no fakta ka omoyon it kalaban aban. ⁶⁵ Is Hisos nado-gang yat hampang, iglwang kitay, Maskin ngay hogfwayong hayo kitay, no bohonwa angko Ama kagfaakbang manga taw hangko, idwa ha syagan omakbang hangko. ⁶⁶ Gis nanya, aywan fag manga katogbong kagtahin in Hisos itfagonan, infwali ya, fawag tahin domwag. ⁶⁷ Ginyas Hisos naintaw hat manga katogbong safolo ha dow, Ham aw kafang yadi wag-

tahin angko? ⁶⁸ Is Simon Pidro nasagot han Hisos, Hyami Fon, hada araw fag taw mi no somyag? Hyamo wa manga hampang kagfaboyag manga taw hanggan aban aban. ⁶⁹ Yabay mi katiwala hanggan twagdog fiya fiya kitay haw wa kan Diyos nasogo Maliyaw. ⁷⁰ Is Hisos nasagot has taw kitay, Bohonwa aw ham angko nafili safolo ha dow? Dapat ay, insadi sa hayo kabali labang. ⁷¹ In Hisos faglwangon kawas Hodas in Simon Iskariyoti anak. Nyawas Hodas insadi sas manga katogbong safolo ha dow, is Hodas ka omoyon in Hisos kalaban aban.

7 Ginya madi aban, is Hisos igsabang has manga banwanan sakop Galiliya. Gis nanya fag manga masohod is Hisos idwa kasayag sabang has sakop Hodiya maskin ka manga fagtahinan Hodyo sinya kasayag fahatay hanya. ² Kaakbang ka Hodyo Fanohodan Dongdongan. ³ Yakanga in Hisos manga fadwasay ama igmaswag odi hanya, taglwang kiti, Haw fag hanya wan, fag hawas sakop Hodiya kaarakitay kam manga katogbong kagtahin hyamo lomag im manga ibolon madolaw. ⁴ Kawadwa ha taw kwangit igfalag it ibolon has fakaaywanan no kasaya ha bantog. Maskin haw gibolon kitonya, gwadi fag falag im manga ibolon madolaw has fagayo fag manga taw. ⁵ Gis nanya fag masohod nyawan Hisos manga fadwasay idyag syag ha hanya. ⁶ Is Hisos igsagot hat manga fadwasay, iglwang, Idya fiya aho no has fakaaywanan manga taw. Dapat kadi ham, fiya di nyawa ginahin ham no hanya wan. ⁷ Kastay is baba daga fag manga taw idwa kadwat iglag hayo, dapat aho kasta fakadwaton iglag maskin ahog fatohoyan kitay dwat ista manga ogali. ⁸ Sogi, ham fag has Fanohodan. Ahodya has Fanohodan kati, maskin idya fiya aho no hanya wan. ⁹ Is Hisos nalwang di nga kitonya, ginya nadogay yapdi ogbot sas sakop Galiliya. ¹⁰ Dapat ay, in Hisos manga fadwasay nonlahaw has Fanohodan, is Hisos naoyan yadi, dapat idwag falagon fiya fiya is taw. ¹¹ Gis nanyas Fanohodan, ka manga fagtahinan Hodyo igsayak wa ngay in Hisos. Ta nangarintawan kitay, Hadawas Hisos? ¹² Sas fakaaywanan fag manga taw, aywan gidginasan kawa hanya. Intibag lwang, Fiya fag taw tonya. Intibag lwang, Yatokitay, idwa fiya, igfalamang odi manga taw. ¹³ Dapat idwa ha taw kampang mado-gan kawa han Hisos maskin ta kadala ka manga fagtahinan Hodyo. ¹⁴ Nogbokngan wa ka Fanohodan, is Hisos nasakbaw has basad Fanimbaan-Dahol, igfaadal has taw. ¹⁵ Ka manga fagtahinan Hodyo indolaw wan. Taglwang, Twa oman to fag taw it katonongan? Hanyadwa nangadal gis adalan ngadi sadi ginan. ¹⁶ Is Hisos igsagot, Kangko fagfaadalon has taw idwa gingko sadili, dapat gin Diyos ka nasogongko. ¹⁷ Nyawa faktaw no talaga wa gibolon in Diyos fakasayaon tomwa wagdog ngatay angko faadalon giwan Diyos, ngatay gi odingko sadili fangayofan.

¹⁸ Kagfwayong it sadili fangayofan kasaya odig fataka, igfadaholon it sadili. Dapat ay, ka kasayag fadaholon kagsogo hanya, idwag bohag, sonson wa maanod it manga hampang. ¹⁹ Bohonwa awkin is Mwisid ka nadisag in Diyos togon ha hayo? Dapat ngadi sadi sa hayo idwa ha katanog tonya. Kana mayon ham no kasayag fahatay angko? ²⁰ Ka fakaaywanan nasagot, Ha ngandi ha labang, fakta sa hyami ka kasayag fahatay hyamo? ²¹ Is Hisos igsagot has taw, Angko ibolon sadi madolaw a, ginya ham fagayo kataka wan. ²² Nomtoon ham igtoli ka manga anak ama nyawa sas Sirang Kafahowayan, maskin is Mwisid natogon hayo kitay fag fatoli hayo manga anak ama. Ka orongan tonya fag ogali gi yapdi hayo manga hafofowan, bohondi kitay gin Mwisid. ²³ No sawas Sirang Kafahowayan ham nogtoli ka manga anak ama nomtoon, kaarakitay ham idwag falamang in Mwisid togon, kana mayon ham no gisog angko maskin sas Sirang Kafahowayan aho no nafafiya sadik ama sadi wak dahonyat habilogan? ²⁴ Ham fag idya gato sadik taw maskin bilang idwa fiya it naibolon, ham fag twa no kinday ka orongan bago omato hanya. ²⁵ Intiba taga Hirosalim iglwang, Bohonwa awkin to fag ama ka manga fagtahinan fakasayaon fahatayon? ²⁶ Istay yapdi mangharaw. Hanggan no baliday kampang idwas fyaloman, tadwag laban hanya. Ngatay ka manga fagtahinan natwa wagdog awkin to fag ama kawan Diyos-natogon-Famawi, ham gayfan? ²⁷ Dapat ay, no todi to fag ama, tam fagayo wa twa hanya no ginday, dapat, in Diyos-natogon-Famawi nombangkad, idwa ha tomwa no gindak banwanan tonya. ²⁸ Yakangas Hisos nogfaadal yapdi sas basad aladan Fanimbaan-Dahol, kampang marigon, iglwang, Ham awkin gayfan kitay ham orongan kilala wangko hanggan aho no ginday? Bohonwa angko odi sadili fangayofan aho fag imbangkad hastay. Ka nasogo angko maanod it manga hampang. Ham idwa kilala hanya. ²⁹ Dapat aho kilala hanya maskin ahon bangkad gi hanya, hanggan hanya ka nasogongko. ³⁰ Yakanga ta kasaya wa gomamat in Hisos dapat idwa ha taw natawid hanya maskin, gis nanya, is Diyos idyag fagamat has taw in Hisos. ³¹ Nyawa kitonya, aywan fag manga taw igsyag in Hisos. Taglwang, In Diyos-natogon-Famawi nombangkad aban, tam awkin ha fagasolopon yapdi kitay, hanya omibolon bohondi kitonya fag manga madolaw, ham gayfan? ³² Ka manga Farisiyo no nadog kitay ka fakaaywanan gidginasan kitonya, kawa han Hisos, ka manga fagtahinan fagalanhan-Diyos hanggan manga Farisiyo nasogo manga polis kagbahala basad aladan Fanimbaan-Dahol kaarakitay gomamat hanya. ³³ Ginyas Hisos iglwang, Aho omofod yapdi ha hayo ngalay, ginya aho hawa hanya hasagsogo angko. ³⁴ Nyawa ham imyaya wagligaw angko aban, ham idwa lomag, maskin ham idwa syagan domasog hangko

hadasogan aban. ³⁵ Ka manga fagtahinan Hodyo nangarintawan, Hada mayon it lahawan to fag ama tam nodwa lomag hanya? Mayon aw has manga Hodyo masoglatan ha sayo manga banwa Girigo, hanya man ik mamaadal aw is manga Girigo? ³⁶ Kanat kahologan noglwang kitay, tam idwa lomag hanya, nyawa tam somayak, hanggan tam idwa somyagan domasog hat hadasogan aban? ³⁷ Sas katabowanan Fanohodan fag sirang, ka mahalga man fag sirang, is Hisos nalindog, ginya nahampang marigon, nalwang, Nyawa faktaw ka kainom, fag gakbang angko, fag ginom wan. ³⁸ Kito kansorat sas Kasoratan, Nyawa faktaw kagsyag angko, giwat basad fangayofan bomolos manga safa danom kagfaboyag manga taw. ³⁹ In Hisos faglwangon istay, kawa ka Falad Maliyaw ka mangag syag hanya it fagtanggapon aban. Dapat ay, gis nanya fag masohod, is Diyos idyag disag it Falad Maliyaw has taw, maskin is Hisos idyan abwat hat kafiyan. ⁴⁰ Tibak taw sas fakaaywanan no nadog to fag manga hampang, iglwang, Orongan wan, to wa kan Diyos fangampang. ⁴¹ Ka tibag lwang, To wa kan Diyos-natogon-Famawi. Dapat ka tibag lwang, Gwadi idwa gis Galiliya kan Diyos-natogon-Famawi nombangkad aban. ⁴² Ka Kasoratan iglwang kitay hanya nombangkad aban, gin Gorongan Dabid hasokfonan, sas Bitlihim nomsagaya san Dabid sadili banwanan. ⁴³ Ginya tibak taw sas fakaaywanan igbaliwa in Hisos, tiba idwan. ⁴⁴ Tiba taw kasaya gomamat hanya, dapat idya ha taw natawid hanya. ⁴⁵ Ka manga polis nonfwali ya has manga fagtahinan fagalan hanggan has manga Farisiyo, ta gintaw has polis, taglwang, Yakana ham nodwa nataban in Hisos hastay? ⁴⁶ Ka manga polis igsagot, Nyawa ginahin midwa ha donggon taw kampang kitonya. ⁴⁷ Ka manga Farisiyo iglwang, Ham aw igfalamang yadi? ⁴⁸ Ham awkin ha donggon barita kitay ha manga fagtahinan ngatay Farisiyo intiwala ha hanya? Idwa akwa. ⁴⁹ Tonya fag fakaaywanan fag manga taw idwa natwagdog ka Batasan Hodyo, yakangas Diyos faliyam tonya fag manga taw. ⁵⁰ Dapat insadik Farisiyo ka sinya, kawas Nikodimo ka nasabang in Hisos itfagonan. Is Nikodimo iglwang, ⁵¹ Maangay awkin santam Batasan Hodyo, ham gayfan, tam no fatohoyan has fadosaan sadik taw nodya nangampangan sas hampangan, nodya nadog fiya fiya gi hanya it naibolon? ⁵² Tagsagot han Nikodimo, Anod, haw awkin taga Galiliya yadi? Haw fag gadal ka Kasoratan, ginya haw tomwa kitay idwa ha fangampang imbangkad gis sakop Galiliya. ⁵³ Ginya madi fagayo nangodgoliyan wan hat manga balay,

8 dapat is Hisos hawas Moyod Oliboan. ² Nonbago marom, dayo kayawa, is Hisos nwali has Fanimbaan-Dahol, nasakbaw has basad aladan. Fagayo fag manga taw nagobok hanya, yakangas Hisos intokaw wa a, igfaadal has taw. ³ Ginya ka mangag faadal

Batasan Hodyo hanggan manga Farisiyo nataban sadik ina ista naiktan gis famabayowanan. Ta nafalindog tonya fag ina sasta fagbokngan. ⁴ Tagfwayong han Hisos, Haw kagfaadal, to fag ina ta natahod gis famabayowanan. ⁵ In Mwisig togon insorat sa hyami Kasoratan kitay, fahatayan, bintokan ka kitonya fag manga ina. Dapat haw, kinday haw noglwang no ha naibolon kitonya? ⁶ Tagtikis wa nangos igfasalan odi in Hisos, kaarakitay ha fagsombongon has manga gorangon, nangos iglaban hanya. Dapat is Hisos natarohongan odi, nasorat it timoyo sas boknga fogis daga. ⁷ Ta nodwag fagomon gintaw yapdi hanya, is Hisos nalindog a, igfwayong has taw, Nyawa faktaw sa hayo kadwa ha naibolon dwat, sogi, gonaan wa bintokan wa tonya fag ina. ⁸ Ginya madis Hisos natarohongan ya, igsorat ya sas boknga fogis. ⁹ Dapat ay, ka manga taw no nadog in Hisos fwayong, nanarowayan wa fagayo igsadig sadi. Ka magorang man ka nagona nalahaw. Is Hisos kan-goyan matarohongan yapdi hanggan ka ina malindogan sas dayo ogbot. ¹⁰ Ginyas Hisos nalindog a, naintaw has ina, Ina, hadawa ka manga taw kati? Idwa aw han-goyan fatohoyan hyamo has fadosaan? ¹¹ Ka ina nasagot, Ama, fawa hansawad ka manga taw. Is Hisos nafwayong, No kitonya, ahodwa yadig fatohoyan hyamo has fadosaan. Nyawa ha goli wa kati, dapat hawa gogali dwat domwag. ¹² Sadi ya ginan is Hisos igtoltol has manga Farisiyo, iglwang, Aho ka yawa sas baba daga. Kagtahn angko idwa lomahaw basad marom, nyawa ginahin, hanya ha akwa wan ka yawa kagfaboyag manga taw. ¹³ Ka manga Farisiyo iglwang han Hisos, Yabay haw lamang kagfaorongon ha hyamo, im hampang idwa ha kahologan no kitonya di. ¹⁴ Is Hisos igsagot, Yatokitay, nyawa ahog faorongon angko sadili, orongan wan angko fwayong maskin aho twa aho no ginda kanbangkad hanggan haday angko hadasogan aban. Dapat ay, ham idwa twa aho no ginda kanbangkad hanggan aho no haday aban. ¹⁵ No ham ka kabaya, kito odis ogali taw, dapat ahodwa kabaya nyawa haday fag taw. ¹⁶ Dapat ay, halimbawa, aho no kabaya, orongan wan, maskin bohondi aho kagfwayong, angko Ama ka nasogo angko sayadingko. ¹⁷ Insorat ngay sa hayo Batasan Hodyo kitay, no dowak taw igfaorongon sadik bagay, tam igfaanod ista manga hampang. ¹⁸ Ahogfaorongon angko sadili hanggan angko Ama ka nasogo angko igfaorongon yadi kawa angko. ¹⁹ Yakanga ta gintaw in Hisos, Siday im ama? Is Hisos igsagot, Ham idwa kilala angko aho no faktaw orongan. Ham idwa yadi kilala angko Ama. Ham nangos no kilala di aho no faktaw, ham kilala yadingko Ama. ²⁰ Is Hisos igfwayong kitonya has manga Farisiyo nogfaadal yapdi basad aladan Fanimbaan-Dahol. Is Hisos sawasta akbang fandisagan. Idwa ha taw nagamat in Hisos maskin is Diyos idyag faangay gis nanya. ²¹ Sadi ya ginan is Hisos igfwayong has taw,

Ho lomahaw wa aban a, ham somayak wangko dapat ham matay wan maskin ham igfadagos yapdi hayo manga ogali dwat. Ham idwa syagan omoyan angko hangko hadasogan. ²² Ginya madi ka manga fagtahinan Hodyo garintawan kitay, It kahologan aw ngatay somongon noglwang tam idwa somyagan domasog hat hadasogan? ²³ Is Hisos igsagot kitay, Ham tagastay is baba daga, dapat aho taga di gim tongod, gin Diyos banwanan. Ham ka tagastay is baba daga, dapat ahodwa gistay is baba daga. ²⁴ Kawa kitonya ahog fwayong hayo kitay ham matay wan ham nogfadagos hayo manga ogali dwat. Anod wan, ham nodwa katiwala kitay AHO AHO WAN, ham matay wan maskin ham igfadagos hayo manga ogali dwat. ²⁵ Ta gintaw in Hisos, Fakta ngakin haw? Is Hisos iglwang, Gis bago bago aho danwa nafwayong hayo no faktaw aho. ²⁶ No kitay di, aywan fag manga bagay ho twag fasogbo hanggan kabaya hayo. Dapat ay, kagsogo angko idwag bohag, kangko lamang donggon gi hanya kangko fagfwayongon has manga taw istay is baba daga. ²⁷ Ka manga taw idwa natwagdog kitay in Hisos faglwangon kawat Ama. ²⁸ Yakangas Hisos iglwang has taw, Aban ham nogfaabwat angko, sas tongod hayo, aho Kanbali Taw, ham tomwa wagdog kitay AHO AHO WAN, ginya madi ham tomwa fiya fiya kitay, ahodwa gibolon nyawa kana nongko di sadili fangayofan, dapat kangko Ama lamang togon angko, kangko fagfwayongon has manga taw. ²⁹ Ka nasogo angko sa yadingko, idwa gobon angko sadi sadi, maskin aho gogali kat fagbayaon fagaba. ³⁰ Is Hisos nogtoltol kitonya, aywan kagsyag ha hanya. ³¹ Yakangas Hisos igfwayong has manga Hodyo kagsyag hanya, Ham no katanog fagaba angko manga fwayong, ham orongan wan angko manga katogbong. ³² Ham homilala yadi ka fakaorongonan hanggan ka fakaorongonan fomalfas hayo. ³³ Tagsagot in Hisos, Hami in Abraham wa hasokfonan. Nyawa ginahin hami bohonwasta manga nasali sogowan. Kana mayon haw noglwang kitay, ha fomalfas hyami? ³⁴ Is Hisos igsagot is taw, Orongan wan angko fwayong hayo, bohonwa bohag kitay, nyawa faktaw ka ha ogali dwat, bilang ka ogali dwat nasali sogowan. ³⁵ Ista sogowan nomtoon galin ya, dapat nyawa ginahin it anak, it anak wan. ³⁶ Yakanga non Diyos wa Anak kagfalfas hayo, ham mafalfasan orongan gis ogali dwat. ³⁷ Ho twa kitay ham in Abraham manga hasokfonan, dapat ay, nyawa kitonya, ham kasayag fahatay angko maskin ham kafang katanog angko manga fwayong. ³⁸ Angko lagan aho no sawangko Ama, kangko fagfwayongon has taw. Dapat ka hayo ama fagfwayongon ha hayo ka hayo fakatanogon. ³⁹ Taglwang han Hisos, Hyami hafofowan magorang kawas Abraham. Is Hisos igsagot is taw, Ham no orongan in Abraham manga hasokfonan, ham nangos somokfon yadit ogali. ⁴⁰ Dapat ham kasayag fahatay

angko nyawa hogtoltol ha hayo angko donggon fakaoronganan gin Diyos. In Abraham ogali idwa kitonya. ⁴¹ Hayo ama ibolon ka hayo fagtoladon. Tagsagot in Hisos, Hyami pinagkaama sadi di, kawas Diyos, hami bonwa manga anak gis famabayowanan. ⁴² Is Hisos iglwang has taw, Yabay, nos Diyos hayo pinagkaama, ham nangos galwasi angko maskin aho giwan Diyos kanbangkad hastay. Bohonwa angko odi sadili fangayofan kitay aho fag imbangkad hastay, angko Ama nasogo angko. ⁴³ Kana mayon ham nodwa twagdog angko manga fwayong, ham gayfan? Maskin ham kadwat igdog angko barita. ⁴⁴ Is Fandaya hayo ama a, ham it manga wa anak. Ham kasaya gibolon hayo ama manga fakasayaon. Gis bago bago hanya sadik fanlibon taw, idwa yadig baliwa ka fakaoronganan nyawa ginahin, maskin it manga hampang idwa ha maanod. Hanya nogbohag, kawat ogali danwa kitonya maskin hanya bohagon, hanggan hanya ka pinagkaama hasagbohag baliwa. ⁴⁵ Dapat ay, hogfwayong hayo ka fakaoronganan, yakanga ham idwa katiwala angko. ⁴⁶ Fakta fag taw sa hayo ka syagan igfathoyan kitay aho ha ogali dwat, ham gayfan? Dapat ay, aho nogfwayong ka orongan, kana mayon ham nodwa katiwala angko? ⁴⁷ In Diyos manga anak igtalina in Diyos manga hampang. Dapat ay, ham idwag talinga hanya maskin ham bohonwan Diyos manga anak. ⁴⁸ Ka manga fagtahinan Hodyo iglwang han Hisos, Anod, orongan wan hyami fwayong kitay haw taga Samariya, ngandi labang kagfapaong hyamo. ⁴⁹ Is Hisos iglwang has taw, Idwa ha labang igfapaong angko. Hogfasayagdog angko Ama, dapat ham igfadwat igdog angko. ⁵⁰ Hodwag sayak kitay manga taw fag fasayagdog angko. Dapat ay, ha akwa sadi ka kasaya kitay manga taw fag fasayagdog angko, hanya bahalag fathoyan. ⁵¹ Orongan wan angko fwayong ha hayo kitay, nyawa faktaw no katanog angko togon fagaba, fawa domog kahatayan. ⁵² Taglwang han Hisos, Kati mi natwa wagdog fiya fiya kitay labang orongan igfapaong hyamo. Maskin is Abraham natay wan, hanggan ka manga fangampang natay yadi wan, dapat haglwang nyawa faktaw no katanog im togon, idwa domog kahatayan, nyawa ginahin. ⁵³ Hyami pinagkaama is Abraham natay wan. Haw awkin gayfan kitay hyamo kangayanan dahol man in Abraham? Ka manga fangampang natay yadi wan. Fakta odi haw, ha gayfan? ⁵⁴ Is Hisos igsagot is taw, Idwa ha kahologan aho nogfasayagdog angko sadili. Angko Ama kagfasayagdog angko. Hanya ka hayo faglwangon hayo Diyos. ⁵⁵ Dapat ham idwa kilala hanya, nyawa ginahin. Dapat ay, aho kilala hanya fiya fiya. Ahog bohag odi aho noglwang kitay ahodwa kilala hanya. Dapat ho kilala hanya a, ho katanog yadi fagaba it fwayong. ⁵⁶ Hayo pinagkaama is Abraham insaya wagdog kitay hanya lomag no ginahin angko kabangkadan. Hanya

nalag ngay, insaya waglag. ⁵⁷ Ka manga fagtahinan Hodyo iglwang han Hisos, Gwadi haw idya limak safolo fangaraw im kadogayan, kinda tonya, haw noglwang kitay haw nalag in Abraham? ⁵⁸ Is Hisos igsagot is taw, Orongan wan bohonwa bohag, hyabi is Abraham nodyan sagaya, dandi AHO AHO WAN. ⁵⁹ Yakanga manga taw nafoyot manga bato kaarakitay bomintok in Hisos. Dapat is Hisos natago wa a, nadokson lamang gis basad Fanimbaan-Dahol.

9 Ginya madi, da Hisos noglahaw, ta nalag sadik ama danwa bota, gi yapdis anak dararag. ² In Hisos manga katogbong gintaw hanya kiti, Haw kagfaadal, faktaw ka ha ogali dwat, ngatay to fag ama, ngatay it manga magorang, maskin insagaya anak dararag bota? ³ Is Hisos igsagot, Bohonwa mawat. Bohonwa kitay ngatay to fag ama, ngatay it magorang ha ogali dwat maskin hanyan sagaya anak dararag danwa bota. Dapat ay, to fag ama bota wan kaarakitay in Diyos kadonongan imlag gi hanya. ⁴ No sirang yapdi tam fag gibolon ka nasogo angko manga ibolon madolaw. Araw yabi wan, ginya idwa ha taw twa gibolon no yabi. ⁵ Aho no sayapdis baba daga, aho ka yawa istay is baba daga. ⁶ Is Hisos no nalwang di nga kitonya, natofay has daga, nayomid ka daga hanggan tofay, ginya nafyad ka lotok has ama bota boknga mata. ⁷ Ginyag lwang, Haw fag lahaw wan. Yamosan im mata sas bolbogan sas Siloi. Santam sanglitan ka ngayan Siloi, it kahologan, Nasogo. Ginya madi ka ama bota inlahaw wan, nayamos it mata a, no goli wan infoga wan. ⁸ Kat manga faakbang balay hanggan ka mangag lag hanya, hanya no fagabag sagad igsagad odi gis taw, indolaw wan, ta nangarintawan, Bohonwa awkin to fag ama ka danwa matokawan fagaba sas bahalan dalan igsagad igsagad togbong? ⁹ Intibag lwang, Tonya wa ngay kagsagad igsagad itfagonan. Intibag lwang, Bohonwan, bilang odi kitonyat manga walong. Dapat ka ama nalwang, Aho wa ngay. ¹⁰ Ta gintaw hanya, Twa oman im mata nonfoga? ¹¹ Ka amag sagot kitay, Kawasta fangngayanon ama, is Hisos, ka nayomid daga a, nafyad hangko mata, ginya nasogo angko has Siloi, fag yamos hono angko walong. Yakanga ho hanya wan a, aho no nayamos wangko mata, honfoga wan. ¹² Ta gintaw hanya, Hadawas Hisos kati? Hanyag lwang, Hodtwa man. ¹³ Ginya ta nataban has manga Farisiyo ka ama ka bota haraw. ¹⁴ Yabay sawas Sirang Kafahowayan is Hisos no nayomid ka daga hanggan nafafoga tonya fag ama it mata. ¹⁵ Sadi ya ginan ka manga Farisiyo naintaw hanya no kinday it mata nonfoga. Ka ama nasagot, Hanya nafyad lotok angko mata, ginya ho nayamos a, kati honfoga wan. ¹⁶ Ka manga Farisiyo iglwang, Ka naibolon to idwa gin Diyos, maskin idwa katanog intam Batasan Hodyo kawa has Sirang Kafahowayan. Dapat ay tibag lwang, Kinda nangos sadik

ama omibolon manga madolaw kitonya no sonson wa dwat it manga ogali? Ka manga taw kabali wa dowak layonan. ¹⁷ Yakanga ka manga Farisiyo naintaw ya domwag has ama, Haw iglwang hanya nafafogam mata, kanam fwayongon no kindak taw tonya? Ka ama nasagot, Hanyan Diyos fangampang. ¹⁸ Ka manga fag-tahinan Hodyo nodyag fatawag it manga magorang, kafang yapdi katiwala kitay tonya fag ama bota hyabi, dapat kati iglag wa fiya fiya. ¹⁹ Yakanga ta gintaw hat manga magorang, Hayo anak awkin to? Ham iglwang danwa bota gis anak dararag ginan, fiya oman kati iglag wan? ²⁰ Ginya madit manga magorang nasagot, Mi twa kitay hyami wa anak, danwa bota gis ogbot ginan. ²¹ Dapat ay, midwa twa no kinday hanggan no faktaw ka nafafogat mata. Ham intawan hanya, maskin hanya dahol yadi wan. Hanya fadi wadtwa fomwayong hayo. ²² It manga magorang nafwayong kitonya kawa ta kadala ka manga fagtahinan Hodyo maskin ka manga fagtahinan nangoyonan kitay nyawa faktaw nogfaanod kitay is Hisos kan Diyos-natogon-Famawi, ta domayo hanya gis fanimbaan tifonan Hodyo. ²³ Maskin ngay it manga magorang nafwayong, Hanya dahol wan, intawan hanya. ²⁴ Yakanga ka manga Farisiyo nafasonson ya ka bota hyabi a, naintaw hanya matangon wa kitay, Im bibig hampang fag ka fakaoronganan wan kawas Diyos igdog wan. Mi twa wan ka ama ka nafafiya hyamo ha ogali dwat. ²⁵ Ka ama nasagot kiti, Hodwa twa ngatay hanya ha ogali dwat, ngatay idwan. Dapat ay sadik bagay ho twa wa fiya fiya. Ho bota wan itfagonan, dapat kati hoglag wan. ²⁶ Ta naintaw hanya, Kanat naibolon ha hyamo? Kinday no nafafoga im mata? ²⁷ Ka ama nasagot has taw, Gwadi ho nafwayong hayo haraw, ham dayo katiwala. Kana ham no kasayag fasaysayan ya domwag angko? Ham aw kasaya yadi kabalit manga katogbong? ²⁸ Ta namaswag odi ka ama a, nalwang, Haw mandi kat katogbong, dapat hami in Mwisid manga katogbong. ²⁹ Tam twa matohoyanan kitay is Diyos nahampang in Mwisid, dapat ay, no kadi tonya fag ama, is Hisos, midwa twa no ginday fag banwanan. ³⁰ Ka ama nasagot, Yabay yabay, ham idwa twa, mangharaw, hanya no ginday fag banwanan, dapat tonya wa ka nafafoga angko mata. ³¹ Tam twa kitay is Diyos idwag talinga hasta manga darangin ka ha manga ogali dwat, dapat ay is Diyos igtalinga has mangag fasakop hanya, hanggan katanog it fwayong. ³² Gi yapdis fabagowanan intam daga, tam idya ha donggon nyawa faktaw ka nafafoga ista mata ka bota gi yapdis anak dararag. ³³ Nangos to fag ama nodwa giwan Diyos, idwa ara nasyagan nafafoga angko mata. ³⁴ Ka manga Farisiyo nasagot hanya, Haw insagaya anak dararag danwa ha ogali dwat, dapat ay, haw man ka kasayag faadal hyami? Ginya madi ta natolod hanya gis basad fanimbaan. ³⁵ Is Hisos no nadog kitay ta na-

tolod, gis basad fanimbaan, ka ama bota kanfiya, naoyan hanya a, naintaw, Haw awkin igsyag has ama Kanbali Taw? ³⁶ Ka ama naintaw, Ama, fakta kin tonya, kaarakitay ho kasyag hanya? ³⁷ Is Hisos nalwang, Haw nalag hanya a, aho wa tonya kam fakampangon kati. ³⁸ Ka ama nalwang, Yabay, angko Fon, hogsyag wa ha hyamo, ginya nalingkohodan san Hisos atobangan. ³⁹ Is Hisos nafwayong, Honbangkad hastay has baba daga kaarakitay ho fatohoyan ka manga taw kitay, ka manga bota fag lomag hanggan ka manga mafogan fag bilang wambota. ⁴⁰ Tiba manga Farisiyo ka san Hisos akbang nadog it hampang. Ta naintaw hanya, Haw awkin gayfan hami bota yadi wan? ⁴¹ Is Hisos nasagot has taw, Ham nangos no bota, idwa ha somogat hayo, nyawa ham igsalan, dapat ay, ham iglwang ham mafogan wan, yakanga ta somogat hayo fiya fiya.

10 Ginyas Hisos iglwang, Orongan wan, bohonwa bohag angko fwayong ha hayo kitay kagfanyak idwa las sakbawan no ha odis basad aladan topa, tonya fangnahaw hanggan tolisan. ² Dapat ay, kagdalan las sakbawan, tonya wa ka gano manga topa. ³ Kagbantay sakbawan igboklas ka tahop a, igfasakbaw hanya. Ka manga topa igdog it hasnog nogtawag it manga sadili topa ngayan. Ka gano topa igfangolo it manga topa has lamnonan. ⁴ No nafadokson wa fagayo ka hanya gis basad aladan, ka gano iglahaw balis fagonan a, it topa goyan hanya maskin kilalat hasnog. ⁵ Idwa omoyan no iba odi taw, yatokitay, labi wa ngap lomagyao gis iba taw, maskin idwa kilala ka hasnog iba taw. ⁶ Is Hisos igtoltol to fag halimbawa has taw, dapat ay, tadwa natwagdog kat bato fwayongon. ⁷ Yakanga sadi ya ginan is Hisos igfwayong has taw, Orongan wan bohonwa bohag angko fwayong hayo. Aho ka sakbawan has basad aladan topa. ⁸ Fagayo ka nagona angko manga fangnahaw a, manga tolisan. Dapat ka manga topa idwag talinga has taw. ⁹ Aho ka sakbawan. Ka somakbaw langko imbawi wan a, somakbaw, domokson, lomag yadi lamnonan. ¹⁰ Ka fangnahaw kabangkitad kaarakitay ignahaw lamang, igfahatay hanggan igfadwat odi. Honbangkad hastay kaarakitay angko manga topa ha akwa haboyagan a, kafiyaon fag haboyagan. ¹¹ Aho ka fiya fag gano manga topa. Ka fiya fag gano topa idwa kafang matay kaarakitay bomawi it manga topa gis mahori. ¹² Ka famalo odi, ka bohonwa ka gano fiya fiya, bohonwa yadi kagfon manga topa, noglag ka hayopan lobo galaw ka manga topa, ka famalo iglagyo odi, igfabayaan ka manga topa. Ginya ka lobo kagat lamang ka topa, igfasarowayan ka tiba. ¹³ Kasta famalo iglagyo di maskin igfatangdan odi, idwag faanogon ka manga topa. ¹⁴ Aho ka fiya fag gano topa. ¹⁵ No kinday angko Ama kilala angko hanggan aho kilala angko Ama, kitonya yadi aho kilala angko sadili topa a, angko sadili topa kilala yadi wangko. Hodwa kafang matay kaarakitay

has manga topa. ¹⁶ Aho ha akwa yapdi manga topa idya sas basad aladan. Aho fag tomaban yadi tonya. Tonya fag manga topa homilala angko hasnog a, ginya madi imbali sadi dik tifonan topa, sadi di ka fangano ka omano tonya. ¹⁷ Angko Ama galwasi angko maskin hogdisag angko haboyagan kaarakitay ho bomawi ya angko haboyagan aban. ¹⁸ Idwa haglogos angko haboyagan gingko, aho nodwag faangay. Angko sadili fangayofan aho fag idwa kafang katay. Fiya di aho nogfaangay kitay aho fag matay, fiya yadi aho nogfaangay kitay aho fag imboyag ya. To kangko Ama natogon angko ibolonon. ¹⁹ Sadi ya ginan ka manga Hodyo inbali dowak layonan no nadog tonya fag manga hampang. ²⁰ Aywan ka nalwang, Labang odi kagfapaong tonya fag ama. Kana ham nogtalinga hanya? ²¹ Dapat tibag lwang, No ha labang igfapaong hanya, idwa twag toltol kitonya. Kinda fag labang ka syagan igfafoga ista mata no bota, ham gayfan? ²² Gis nanya manga taw kasolong sas Fanohodan Famatalagaan sas Fanimbaan-Dahol sas banwa Hirosalim. Anitayon ya ngadi gis nanya fag masohod. ²³ Is Hisos gayayag sasta famahowayan dayo balay, sas akbang Fanimbaan-Dahol. Tonya fag famahowayan tagngayan in Salomon Famahowayan. ²⁴ Yakanga manga Hodyo nagobok hanya a, ta gintaw, Kandogay day haw nogfaadowan yapdi hyami? Sagotan hyami fiya fiya, haw awkin kan Diyos-natogon-Famawi? ²⁵ Is Hisos igsagot has taw, Ho dan wagfwayong hayo dapat ham idwa katiwala angko. Angko manga ibolon kangko ama natogon angko ibolonon, tonya kagfaorongan aho no faktaw. ²⁶ Dapat ham idwa katiwala maskin ham idwan aktom sangko manga topa. ²⁷ Angko manga topa kilala angko hasnog a, ho kilala yadi angko manga topa, tagtahin angko. ²⁸ Hogdisag haboyagan hanggan aban aban ha hanya a, tadwam liyam nyawa ginahin. Idwa ha syagan homagaw gingko angko manga topa. ²⁹ Angko Ama kagdisag angko ka manga topa, labi wa dahol man has fagayo a, idwa ha syagan homagaw gingko ama angko manga topa. ³⁰ Aho hanggan angko Ama mi sadi di. ³¹ Ginya madi manga Hodyo igfoyot ya bato kaarakitay bomintok in Hisos. ³² Is Hisos iglwang has taw, Aywan angko Ama nafaibolon angko kangko naibolon sa hayo faglagan. Sida kangko naibolon kadwa fiya ham iglag, maskin ham kasayag bintok angko? ³³ Ka manga Hodyo igsagot, Bohonwa manga fiya fag ibolon maskin mi kasayag bintok hyamo, kawa haw igsway odin Diyos. Haw iglwang haw is Diyos yadi wan, gwadi ha taw di, haw bohonwas Diyos. ³⁴ Is Hisos igsagot, Idwa aw insorat sa hayo sadili manga Batasan Hodyo kitay is Diyos iglwang ham manga diyos? ³⁵ Is Diyos nongngayan manga diyos it manga nahampang, tam idwa syagan igtangkod ka Kasoratan fwayong. ³⁶ Dapat ay, no kawa aho, angko Ama nafili angko a, nasogo yadingko hastay is baba daga. Kinday nangos

ham noglwang ahog sway in Diyos maskin hoglwang aho in Diyos wa Anak? ³⁷ Anod ngay, ham fag idwa katiwala angko, aho nodwa gibolon angko Ama faibolonon angko. ³⁸ Dapat aho no gibolon tonya, nyawa ham idwa katiwala angko hampang, ham fag katiwala nangos angko manga ibolon, kaarakitay ham talastas wa fiya fiya kitay angko Ama sa dingko, hanggan aho sawangko Ama. ³⁹ Ginya madi sadi ya ginan ta gomat nangos in Hisos, dapat is Hisos nalfas di gista basad gamat. ⁴⁰ Sadi ya ginan is Hisos nwali ya has difay safe Hordan, han Hwan nagfatognaan manga taw hyabi. ⁴¹ Aywan fag manga taw nagobok in Hisos, taglwang, Is Hwan idwa naibolon manga falagon madolaw, dapat fagayo kat nafwayong kawa hastay fag ama inanod wan. ⁴² Aywan kagsyag in Hisos sinya.

11 Is Lasaro, sadik ama taga Bitanya, ha sagit wan. It manga fadwasay ina, da Mariya da Marta igbanwanan yadi sinya. ² To fag Mariya ka nafwalid famabanglo hantam Fon bitis, ginya nalidgid in Hisos bitis it bok. It fadwasay, is Lasaro, ka ha sagit. ³ Yakanga in Lasaro manga fadwasay ina nasogo sogowan han Hisos, iglwang, Hyami Fon, im fakilalaon ha sagit wan. ⁴ Dapat ay, is Hisos, no nadog, nalwang, In Lasaro sagit bohonwa fakatayon fiya fiya. Is Lasaro insagit kaarakitay manga taw fasayagdog in Diyos kafiyan, hanggan in Diyos Anak kafiyan imlag yadi. ⁵ Yabay is Hisos kaawa in Marta hanggan it fadwasay ina hanggan in Lasaro. ⁶ Dapat ay, nyawa kaawa no kitay di, ta no nafadog in Hisos kitay is Lasaro ha sagit, is Hisos idyapdin ginan ginya dowak yak yabi, kaarakitay mamantay in Lasaro. ⁷ Ginya madi aban bago diglwang hat manga katogbong, Tam hanya ya has sakop Hodiya. ⁸ It manga katogbong nasagot kiti, Haw kagfaadal, ngalay yapdi itfagonan, ka manga Hodyo sinya kasayag bintok hyamo. Haw awkin kafwali ya has Hodiya? ⁹ Is Hisos igsagot, Idwa aw ha safolo ha dowak oras sa sadik sirang? Kaglahaw sirang idwam tahid maskin kalag ka yawa istay sas baba daga. ¹⁰ Dapat kaglahaw yabi imtahid wan maskin idwa ha yawa sa hanya. ¹¹ Is Hisos no nalwang di nga kitonya, nafwayong ya domwag, Intam fakilalaon is Lasaro intoyog wan, dapat ho hanya wa a, ho fomolaw hanya. ¹² Ka manga katogbong iglwang han Hisos, Hyami Fon, nogtoyog wan, hanya kafiya wan. ¹³ Kan Hisos fagfwayongon kawas Lasaro natay, dapat ta naayfan kat fagfwayongon kawa matoyogan igfahoway. ¹⁴ Yakangas Hisos nafatigna fiya fiya, nalwang, Is Lasaro natay wan. ¹⁵ Dapat ay, hogbaya wan kitay hodwa natahod kaarakitay ham katiwala wan. Sogi, tam hanya wan. ¹⁶ Is Tomas, kasta nangayan Singan, nafwayong hat manga kapariho katogbong, Tam mahin yadi wa hanya nyawa ara tam matay yadi wan. ¹⁷ Ginya madis Hisos nondasog sas Bitanya, nadog kitay is Lasaro ofat wak yabi mafwalidan sas basad lohib

bato. ¹⁸ Ka tifonan balay Bitanya akbang has banwa Hirosalim, manga odi tolok liho it kaayayowan. ¹⁹ Aywan fag manga Hodyo igsabang inda Marta da Mariya kaarakitay iglibang ista fangayofan kawat fadwasay no natay. ²⁰ Is Marta no nadog kitay is Hisos kadasog wan, hanyag tagbo wan Hisos, dapat is Mariya idwan tanog, matokawan di sas balay. ²¹ Is Martag Iwang han Hisos, Angko Fon, haw nangos no natahod di, idwa ara natay angko fadwasay. ²² Dapat ay, ho twa kitay, nyawa kati, is Diyos domisag hyamo nyawa kanam fagsagadon. ²³ Is Hisos iglwang han Marta, Im fadwasay imboyag ya. ²⁴ Is Martag Iwang, Ho twa kitay angko fadwasay imboyag ya aban has ginanan sirang. ²⁵ Is Hisos iglwang hanya, Aho kagfaboyag ya ka manga natay hanggan aho ka haboyagan. Kagsyag angko nyawa kitay hanya matay, imboyag ya. ²⁶ Ka orongan boyagan hanggan igsyag angko fawa matay orongan, nyawa ginahin. Haw awkin igsyag kitonya? ²⁷ Is Martag sagot, Anod, angko Fon, hogsyag ngay. Hogsyag kitay haw kan Diyos-natogon-Famawi, in Diyos Anak kan Diyos faglwangon kitay imbangkad hastay has baba daga. ²⁸ Is Marta no nalwang di ngay kitonya, nwali has balay, nafwayong han Mariya, dapat idwa sasta fagdogan iba taw, nalwang kitay, Intam Famaadal indasog wan, igfatawag hyamo. ²⁹ Is Mariya no nadog kitonya, madali wanlindog, inlahaw wa hanya. ³⁰ No kitay di is Hisos idyapdin dasog fiya fiya sinya, sayapdit nagtagbowan in Marta. ³¹ Ka manga taw ka gofod in Mariya sas balay, kaglibang hanya, no nalag is Mariya madalin lindog, nadokson yadi wa a, naoyan hanya. Ta gayfan is Mariya hawas lobgoban kaarakitay omoraw sinya. ³² Is Mariya nondasog wan san Hisos nagdasogan, hanggan nalag hanya, nanlibabaan sat atobangan a, nalwang, Angko Fon, haw nangos no natahod di, idwa ara natay angko fadwasay. ³³ Is Hisos noglag kitay is Mariya goraw, hanggan ka manga koyog hanya goraw yadi, is Hisos in-awa waglag, inrongkot wa dahol it fangayofan. ³⁴ Is Hisos naintaw has taw, Ham hadawak nafwalid hanya? Tagsagot, Hyami Fon, tam hanya wan, famantay ngay. ³⁵ Is Hisos nangoraw wan. ³⁶ Ka manga Hodyog Iwang, Fanlag nga kin no galwasi in Lasaro. ³⁷ Dapat ka tibag Iwang, Bohonwa awkin to fag ama ka nafafoga ka ama bota mata? Idwa aw nasyagan kitay is Lasaro fag idwa natay? ³⁸ Ginya yabay is Hisos inrongkot ya domwag a, hawas lobgoban lohib, ka matahopan bato dahol dahol. ³⁹ Is Hisos nasogo is taw, Bol ka bato. Is Marta ka natay it fadwasay, iglwang, Hyami Fon, no kati wan baboyok wan. Ofat wak yabi itfagonan no natay wan. ⁴⁰ Is Hisos iglwang han Marta, Ho nafwayong hyamo kitay haw nogsyag dingko, haw lomag in Diyos kafiyon, idwa aw? ⁴¹ Ginya ta naboklas ka tahop bato. Is Hisos natangdan it mata has tongod a, iglwang, Mama hogbaya hyamo maskin haw igtalinga angko. ⁴² Ho danwa twa kitay

haw igtalinga angko nyawa ginahin. Dapat ay, hoglwang kitonya kaarakitay ka manga taw istay sas ligongan imtiwala kitay haw wan ka nasogo angko. ⁴³ Is Hisos no nalwang di ngay kitonya, natawag marigon, Lasaro, ha fag dokson wan. ⁴⁴ Is Lasaro nadokson wa ngay, it manga gamat hanggan bitis masafotan yapdi rotay, it alfoyo matamongan yadi. Is Hisos nafwayong has taw, Lohasan wan, falahawan wa hanya. ⁴⁵ Yabay, aywan fag manga Hodyo kagsabang in Mariya, no nalag in Hisos naibolon, igsyag yadi hanya. ⁴⁶ Dapat ay, tiba hawas manga Farisiyo, nafsogbo in Hisos naibolon. ⁴⁷ Ginya madi ka manga fagtahinan fagalan, hanggan tonya fag manga Farisiyo nafatifon ka manga fagtahinan Hodyo kaarakitay mangampangan. Ta nangarintawan, Kinda odi intam halimbawan? Yabay, aywan to fag ama ibolon falagon madolaw. ⁴⁸ Tam nogfabayaan hanya, fagayo fag manga taw hanya wak somyag. Ginya madi aban ka manga gorongan manga taga Roma ngandayo imbangkad hastay, domwat intam Fanimbaan-Dahol, hanggan domaog intam sadik layonan taw manga Hodyo. ⁴⁹ Dapat ay, insadi, it ngayan is Kayfas, ka gorongan fag fagalan gis nanya fag masohod nafwayong has taw, Ham idwa ha fakatwawon. ⁵⁰ Ham awkin idwa twagdog kitay, fiya man hantam no sadi dik taw ka matay kaarakitay ha sadik layonan taw? Ginya idwam daog sadik kayonya. ⁵¹ Ka orongan, bohonwan Kayfas odi sadili fangayofan kitay, hanya fag Iwang kitonya. Dapat kawa gis nanya fag masohod, hanya ka gorongan has manga fagalanhan-Diyos, hanya nagona wa nafwayong kitay is Hisos matay kaarakitay ha sadik layonan manga Hodyo. ⁵² Hanggan bohondi kitay ha sadi odik layonan manga taw, is Hisos no matay, dapat kaarakitay in Diyos manga anak fagayo ka nanarowayan imtifon ya aban sa sadik tifonan. ⁵³ Yakanga ginya ginan ka manga fagtahinan Hodyo igfatalaga no kinday nangos ta no fahatay in Hisos. ⁵⁴ Kawa kitonya is Hisos noglahaw, idwag falag hanya bangan ha sayo manga banwanan Hodiya, dapat nalin has banwa Ifraim sas bahalan manga banwanan taw. Sinya wak maoliyanan hanggan it manga katogbong. ⁵⁵ Gis nanya kaakbang wa manga Hodyo Fanohodan Nagsagayan, ta nogtohod ka anghil no nasagaya ista manga balay hyabi hyabi. Nodya Fanohodan wan, aywan gis manga ligongan hawam bohid has banwa Hirosalim kaarakitay igfahosto it manga ogali hasagfalinay baliwa. ⁵⁶ Ka manga taw igsayak in Hisos. Ta garintawan nogtifonan basad aladan Fanimbaan-Dahol. Kinda ara, ham gayfan? Is Hisos imbangkad aw has Fanohodan? ⁵⁷ Ka manga fagtahinan fagalan hanggan ka manga Farisiyo nafsognod has taw kitay, nyawa faktaw no natwa is Hisos no siday, fwayongan wan kaarakitay ta gomamat hanya.

12 Ginya madi no onom ik sirang aban ka Fanohodan Nagsagayan, is Hisos indasog has Bitanya han Lasaro banwanan. Is Lasaro kan Hisos nafaboyag ya gis kahatayan. ²In Hisos manga fakilalaon nanyahod hanon kawas Hisos inbangkad. Is Marta sadi kaglag hanon, hanggan is Lasaro sadi ka gofod in Hisos sas bilog fanganan. ³Ginya madis Mariya nabol sadik sohadan famabanglo nardo, dahol it sali, idwa ha aktom iba, nafyad ka famabanglo han Hisos bitis. Ginyas Mariya nalidgid it bok in Hisos bitis a, sadi wak balay kaayok banglo. ⁴Dapat is Hodas Iskariyoti, in Hisos katogbong sadi, ka omoyon aban in Hisos kalaban, igfwayong kiti, ⁵Gwadi balay balay no nafasali yap man ka famabanglo, tolok daan dinaryo, ginyag disag ka sali has myabog. ⁶Is Hodas noglwang kitonya, bohonwa kitay maskin kaawa ka manga myabog, dapat kawag nahaw wan. Hanya kagbotang ista tifonan kwarta a, inyayom wagbol ginya. ⁷Dapat is Hisos iglwang, Fabayaanan wan in Mariya. Nyawas Mariya igfatalaga it naibolon kawa has aban aho nomlobgob. ⁸Ka manga myabog idwa ha fagalinan gi hayo akbang, dapat aho idwa fagaba maofodan hayo aban. ⁹Ka fakaaywanan fag manga taw, no natwa kitay is Hisos sinyas Bitanya, hanya yadi wan. Bohondis Hisos kat faggobokon, ta kasaya yadi lomag in Lasaro kan Hisos nafaboyag ya gis kahatayan. ¹⁰Yakanga ka manga fagtahinan fagalan talaga wa fahatay in Lasaro yadi, ¹¹maskin aywan fag manga Hodyo dayo igfasakop has manga fagalan, hawan Hisos nogsyag, kawa gin Lasaro nadalanan. ¹²Nonbago marom ka fakaaywanan fag manga taw kanbangkad has Fanohodan nadog kitay is Hisos kadasog has banwa Hirosalim. ¹³Yakanga ta nabol manga labong tagisi, nalahaw gis banwa kaarakitay managbo in Hisos. Tagtarawagan marigon, iglwang, Kafiyaon kafiyaon, ka kadasog hastay kati, san Diyos ngayan, Hanya, kan Israil sakop gorongan, fag bomaya wan, ¹⁴Is Hisos nalag sinyas sadik anak habayo libaba, nasahay wan, kito kansorat sas Kasoratan, ¹⁵Ham fag idwa kadala, banwa Siyon, Lag ngay, tya wamlwad, hayo gorongan kadasog wan, Masahayan baba anak habayo libaba. ¹⁶Gis nanya yapdi fag masohod, in Hisos manga katogbong idya natwagdog in Hisos kabangkadan basad Hirosalim kitonya. Dapat aban in Hisos kafiyan nonlag, ta bago di natohod kitay insorat kitonya, hanggan in-anod wan ta nogfasayagdog in Hisos. ¹⁷Ka fakaaywanan fag manga taw ka nalag in Hisos itfagonan, is Hisos no natawag in Lasaro gis basad lohib, hanggan nafaboyag ya hanya gis kahatayan, nafadahit has taw ista mata lagan. ¹⁸Yakanga manga taw kaaywanan natagbo in Hisos maskin ta nadog tonya kat naibolon falagon madolaw. ¹⁹Ginya madi ka manga Farisiyo nanoltolan, taglwang, Yabay, yabay, tam idwa ha halimbawan. Fagayo fagayo fag manga taw igtahin wa hanya. ²⁰Ha

akwa manga Girigo hawas Hirosalim yadi, kaarakitay manimba han Diyos sas masohod Fanohodan Nagsagayan. ²¹Ta naakbang in Filipi, ka taga Bitsayda, sakop Galiliya. Ta garonganon han Filipi, taglwang, Ama, mi kasaya wa dahol lomag nangos in Hisos. ²²Is Filipi nafwayong han Andris, ginya ta fagayo dow naakbang han Hisos, nafwayong hanya ka manga Giri-go fakasayaon. ²³Is Hisos nasagot has taw, Kati wa fag masohod intohoyan kitay angko kafiyan, aho Kanbali Taw, fag imlag wan. ²⁴Orongan wan, bohonwa bohag angko fwayong hayo kitay, sadi odik bolhog ka tirigo nodyan tanom has basad daga, hanggan wanboyok ka bolhog gona, ginya madi ha natobo ya ka bomohad aywan aban. ²⁵Nyawa faktaw no fagaba kawili odit sadili haboyagan, imliyam di tonya aban, dapat ay kadwa kwangit it haboyagan istay is baba daga, ha akwa wa haboyagan hanggan aban aban. ²⁶No ha kasaya kabali angko sogowan, fag tahin yadi wangko. Aho no siday, angko sogowan sinyas yadi wan. Nyawa faktaw kangko sogowan, angko Ama gomalang hanya. ²⁷Kati angko fangayofan kahori wa dahol dahol. Kana ara angko fagfwayongon, ham gayfan? Aho awkin fag lomwang, Mama bawiyang nangos angko gingko fagdalanon mahori kati? Idwan. Maskin ngay honbangkad hastay kaarakitay omagwanta ka kati fag mahori. ²⁸Mama, fag im ngayan kafiyan kamlag kati. Ginya ha nahampang gin Diyos banwanan sam tongod, iglwang, Ho nafalag angko ngayan kafiyan has taw, hanggan ho mamalag ya tonya aban. ²⁹Ka fakaaywanan fag manga taw malindogan sinyas nadog ka nahampang. Tibag lwang kitay nadalogdog. Tibag lwang, Sadik anghil nahampang hanya. ³⁰Dapat ay, is Hisos igfwayong has taw, Bohonwa aho kat fagfarigonon no nalwang kitonya, ka nahampang kitonya kasayag farigon hayo fangayofan. ³¹Kati wan is Diyos fathoyan kastay is baba daga it fadosaan. Kati yadi kagbahala istay is baba daga im-okas wan has sokayan. ³²Dapat ay, aho nom-abwat sas baba daga, aho faakbang hangko fagayo fag manga taw. ³³Is Hisos noglwang kitonya, it fagfalimbayon no kinday hanya no matay aban. ³⁴Dapat ay, ka fakaaywanan fag manga taw iglwang, Migbasa sa hyami manga Batasan Hodyo kitay in Diyos-natogon-Famawi igdogayan hanggan aban aban. Kana haw noglwang Kanbali Taw fag im-abwat kitonya? Faktaw to kam faglwangon Kanbali Taw? ³⁵Is Hisos iglwang has taw, Sadik ngalay ka yawa sawa hayo yapdi. Fag fadagos yapdi hayo lahawan ka yawa no sawa hayo yapdi kaarakitay ka marom idwa tomahod hayo. Kaglahaw basad marom idwa twa no hadat hadasogan. ³⁶Ka yawa no sawa yapdi hayo, fag syag hanya kaarakitay ham im-aktom sas sakop mayawa. Is Hisos no nalwang di nga kitonya, inlahaw wan, nafasamanon gis taw. ³⁷Nyawas Hisos naibolon kayonya fag manga

falagon madolaw sasta faglagan, tadyag syag hanya.³⁸ Inbali kitonya kaarakitay in Isayas, in Diyos Fangampang fwayong, im-anod kitay, Diyos, fakta kantiwala hyami natoltol barita, haw gayfan? Haday fag taw is Diyos nogfalag it karigonan?³⁹ Yakanga tadwa twa katiwala, maskin is Isayas nafwayong ya domwag,⁴⁰ Is Diyos nafabota ista manga mata, nafaganit yadista manga fangayofan, Kaarakitay tadwa lomag, Idwa yadi tomwa wagdog, Idwa yadi hangko nogdali kaarakitay mamafiya it manga sagit.⁴¹ Is Isayas nahampang kitonya maskin nalag no kinday in Hisos kafiyon aban, ginya natoltol kawa ha hanya.⁴² Nyawa kitonya, aywan fag manga fagtahinan Hodyo igsyag in Hisos, dapat tadwag fadog has taw maskin ta kadala kitay, ka manga Farisiyo domayo has taw gis fanimbaan tifonan Hodyo.⁴³ Maskin ka mahalga has taw, fag manga taw kagbaya hanya, nyawas Diyos idwag baya.⁴⁴ Ginyas Hisos nahampang marigon, iglwang, Kagsyag angko bohondi aho kat fagsyagon. Hanyag syag yadi hasagsogo angko.⁴⁵ Kaglag angko iglag yadi kagsogo angko.⁴⁶ Aho ka yawa kanbangkad hastay has baba daga, kaarakitay fagayo kagsyag angko idwam goyan sas marom.⁴⁷ Hodwa fatohoyan has fadosaan kagdog angko manga hampang, dapat idwa katanog angko, maskin honbangkad ngay istay kaarakitay bomawi manga taw istay is baba daga, hodwan bangkad kaarakitay fatohoyan manga taw has fadosaan.⁴⁸ Iba bagay ka fatohoyan has fadosaan kagdayo angko, hanggan idwag faanod angko manga hampang. Angko natoltol manga hampang kagfatohoyan hanya aban has fadosaan sas ginanan sirang.⁴⁹ Kawa angko manga fwayong idwa gingko odi sadili fangayofan, angko Ama ka nasogo angko ka nafasognod angko angko bato fwayongon fiya fiya.⁵⁰ Ho twa yadi wagdog kitay it fasognod kagdisag has taw haboyagan hanggan aban aban. Yakanga angko fagfwayongon ka lamang angko Ama fasognod angko kitay, aho fag fwayong kitonya.

13 Ginya madi aban, ta no kaakbang mangwan ka Fanohodan Nagsagayan, is Hisos natwa kitay gis nanya fag masohod hanya kaakbang kaalin wan gistay gis baba daga, hawat Ama. Is Hisos danwa galwasi it sakop istay is baba daga, galwasi yapdi hanggan has katabowanan.² Araw, da Hisos igsayowan kwan, igyafon wan. Is Fandaya danwa nafaisip in Hodas, in Simon Iskariyoti anak, kitay, hanya fag omoyon in Hisos maga kalaban.³ Is Hisos natwa kitay it Ama nadisag ha hanya fagayo fag kangayanan, natwa yadi kitay hanya giwan Diyos kan-ginan, hanggan hawan Diyos aban.⁴ Yakanga, taw no sas bilog fanganan, is Hisos nalindog a, naloslos ka balis babaw it solong rotay, ginya nafogong twalya sat awak.⁵ Is Hisos natalin danom has fanggonawan, ginya madi nafabago nagonaw it manga katogbong bitis, ginya nafyad twalya kat

fogong sat awak.⁶ Is Hisos no kaakbang wa gomonaw in Simon Pidro bitis, is Simon nahwangit wan, iglwang, Angko Fon, ha gayfan haw awkin gomonaw angko bitis?⁷ Is Hisos igsagot in Simon, No kati yapdi ham kadolaw angko ibolon, dapat aban ham tomwa wagdog.⁸ Is Pidro iglwang marigon, Nyawa kindawan, nyawa ginahin, hodwa mamagonaw angko bitis hyamo. Is Hisos igsagot han Pidro kiti, Haw nodwa fagonaw angko im manga bitis, hadwa kasadi hangko.⁹ Is Simon Pidro iglwang, Angko Fon, no kitonya, fag bohon di angko manga bitis, fag hanggan wangko manga gamat hanggan alfoyo.¹⁰ Is Hisos iglwang, Ka nanyagos, maangay wan it habilogan sadik dahonya. Nyawadwag fyagos domwag sadik dahonya habilogan, bitis lamang ka fagonawon. Ham maangay wan, no kitay di, dapat idwa fagayo.¹¹ Is Hisos danwa twa no faktaw ka omoyon hat kalaban, yakangag lwang, Ham bonwa fagayo maangay.¹² Is Hisos nontabo wa gonaw ista manga bitis, nasolong ya kat naloslos balokas haraw, ginya nwali ya has fanganan. Is Hisos naintaw has taw, Ham awkin natwa wagdog no kana kat kahologan kangko naibolon ha hayo kati kati?¹³ Ham igngayan angko hayo Famaadal hanggan hayo Fon. Maangay ham nogngayan angko kitonya, maskin aho wa ngap tonya.¹⁴ No aho kagfon hayo, hanggan hayo Famaadal, nagonaw hayo bitis, ham fag kitonya yadi. Ham aba fag gonaw yadi ista manga bitis.¹⁵ Aho nafalag hayo sadik fagtoladon kaarakitay ham tomolad yadi kitongko naibolon ha hayo.¹⁶ Orongan wan, bohonwa bohag angko fwayong hayo, nyawa gafo nasali sogowan idwa abwat man it fon it kangayanan, hanggan kasta nasogo idwa abwat man kagsogo hanya it kangayanan.¹⁷ Ham no twa wagdog to fag manga bagay, ham bomaya yadi ham no gogali kitonya.¹⁸ Bohonwa ham fagayo kangko fagfwayongon. Ho fadi wad kilala kangko manga nafili. Dapat ay, ka Kasoratan fag im-anod wan. Ka Kasoratan iglwang, Insadi kagsayo angko omoyon angko kalaban.¹⁹ Hogfwayong hayo kati bagom anod tonya kaarakitay nom-anod aban, ham imtiwala kitay AHO AHO WAN.²⁰ Orongan wan bohonwa bohag angko fwayong hayo, kagtanggap angko sogowan, aho yadit fagtangapon. Kitonya yadi kagtanggap angko, kagsogo angko it fagtangapon yadi.²¹ Is Hisos no nalwang di nga kitonya, inhori wa dahol dahol it fangayofan, iglwang, Hogfwayong hayo, orongan wan, bohonwa bohag, insadi sa hayo omoyon angko manga kalaban.²² In Hisos manga katogbong namarantayan ha sadi ha sadi. Ta gadowan no faktaw kan Hisos fagfwayongon.²³ In Hisos katogbong, it fagalwasiyon fiya fiya, masorayan sas fanganan, it alfoyo san Hisos akbang dobdob.²⁴ Yakangas Simon Pidro nafaaman hanya kitay, Fwayongan hyami no faktaw kat faglwangon ka omoyon it kalaban?²⁵ Kawa masorayan kitonya, ka

katogbong gintaw kiti, Hyami Fon, fakta fag taw tonya? ²⁶ Is Hisos igsagot, Ka taw kangko fagdisagon to fag lifong tinapay aho no natogna wan, ya tonya wan. Ginya madis Hisos no natogna ka lifong tinapay, nadisag han Hodas, in Simon Iskariyoti anak. ²⁷ Is Hodas no nabol ka lifong tinapay, is Satanas hawan Hodas basad fangayofan, igfasognod hanya. Ginyas Hisos iglwang han Hodas, Sogi, fatonglosan madali im bato ibolonon. ²⁸ Ka tiba taw sas fanganan idwa twagdog no kana mayon is Hisos noglwang kitonya. ²⁹ Intiba gayfan, kawas Hodas kagbotang ista sohadan kwarta, ngandayo is Hisos igsogo hanya kaarakitay manali ista fakasayaon sas Fanohodan. Ngatay is Hisos igsogo in Hodas kawa ha fagdisagon has manga myabog, ta gayfan. ³⁰ Is Hodas nontabo wa kwan ka lifong tinapay, dagos wa nadokson. Yabi wan gis nanya. ³¹ Is Hodas nondokson wan, is Hisos iglwang, Kati manga taw lomag angko kafiyon, aho Kanbali Taw. In Diyos kafiyon imlag yadi wa sangko kati. ³² Ginya in Diyos kafiyon nomlag sangko, is Diyos mamalag yadi angko kafiyon, aho Kanbali taw, kaakbang wa falag tonya kati. ³³ Angko manga anak, ngalay odi tam no gofodan gis kati. Ham somayak angko dapat hogfwayong hayo kito yadi kangko nafwayong has manga fag-tahinan Hodyo, kitay ham idwa syagan domasog hangko hadasogan. ³⁴ Kati aho ha togon ya domwag bago ha hayo kitay, ham fag gadgalwasiyan ha sadu ha sadu. No kinday aho no galwasi hayo, ham fag kitonya yadi no galwasi ha sadu ha sadu. ³⁵ Ham no gadgalwasiyan ha sadu ha sadu, fagayo tomwa kitay ham angko wa manga katogbong. ³⁶ Is Simon Pidro gintaw in Hisos kiti, Hyami Fon, ha hadawa nangos? Is Hisos igsagot, Kati hadya syagan tomahin hangko hadasogan, dapat aban, yabay, hanggan wa haw omoyan angko. ³⁷ Is Pidro gintaw ya domwag, Hyami Fon, yakana aho nodya tomahin hyamo kati? Nyawa aho hanggan wa matay kawa ho galwasi hyamo. ³⁸ Is Hisos igsagot han Pidro kiti, Hadwa aw kafang matay kawa hangko, ha gayfan? Yatokitay, lag nga araw, tabag nodyag taraok, haw tomangkod tolo ginan kitay hadwa kilala angko.

14 Hayo manga fangayofan fag idwa kabalaw. Ham fag syag in Diyos, fag syag yadingko. ² Kaaywanon fag manga lingoban sangko Ama balay. Nodwa kitonya hodwa hara nafwayong hayo kitay, ho gomona wa hayo kaarakitay mamatalaga hayo oliyanan. ³ Ginya aho no gomona hayo, mamatalaga hayo oliyanan, ho kafwali ya hastay kaarakitay toman hayo. Ginya madi aho no siday, ham sinya yadi wa aban. ⁴ Ham twa wan ka dalan hangko hadasogan. ⁵ Dapat is Tomas iglwang han Hisos, Hyami Fon, midwa twa hyamo hadasogan, kinda ara hami no tomwa ka dalan hanya? ⁶ Is Hisos igsagot hanya kiti, Aho ka dalan, aho ka fakaoronganan, hanggan aho ka haboy-

agan. Idwa ha domasog hangko Ama nodwa domalan langko. ⁷ Ham no nahilala angko, ham kilala yadingko Ama. Gis kati ginan ham kilala wa hanya a, ham nalag wa hanya. ⁸ Is Filipi iglwang han Hisos, Hyami Fon, falagan ha hyami im Ama nangos, mi no lomag hanya, yabay fiya wan. ⁹ Is Hisos igsagot, Gwadi, Filipi, dogay wan tam no koyogan, ha awkin idyapdi kilala angko fiya fiya? Ka nalag angko nalag yadingko Ama. Kana haw nogfasolopan yapdi, kitay, falagan hayo angko Ama? ¹⁰ Ha awkin idwa katiwala, Filipi, kitay aho kasadi sangko Ama hanggan angko Ama kasadi yadi sangko? Idwa gingko di sadili fangayofan kangko nafwayong ha hayo. Angko Ama kasadi hangko a, hanya kagfa-tonglos it sadili fakasayaon. ¹¹ Ham fag katiwala angko fwayong, kitay aho kasadi sangko Ama, hanggan angko Ama kasadi hangko, ngatay ham fag katiwala maskin ham nalag angko manga naibolon. ¹² Orongan wan angko fwayong hayo kitay, kagsyag angko omibolon yadi manga ibolon madolaw kito kangko naibolon. No kitay di, hanya omibolon istay bohon di kitongko maskin aho hawangko Ama. ¹³ Nyawa kana hayo fagsagadon, sangko ngayan, homtanog wan kaarakitay gingko ibolon manga taw lomag angko Ama kafiyon. ¹⁴ Nyawa kana ka hayo fagsagadon gingko, sangko ngayan, ho omibolon wa tonya. ¹⁵ Ham no galwasi angko, ham imtanog wangko manga togon. ¹⁶ Ho somagad yadi gingko Ama a, hanya somogo wa ha hayo sadu yak Fanogbong kaarakitay omofod hayo hanggan aban aban. ¹⁷ Hanya ka Falad fakaoronganan. Ka taga istay sas baba daga fag manga taw idwa syagan igtanggap hanya ista Fanogbong maskin bohonwasta mata lagan, tadwa kilala hanya. Dapat ay, ham kilala hanya fiya fiya maskin hanya omofod hayo hanggan sawa hayo manga basad fangayofan aban. ¹⁸ Ho no lomahaw, hodwa omobon hayo kitos manga olila. Aho kafwali ya ha hayo aban. ¹⁹ Ngalay di aban ka taga istay sas baba daga fag manga taw idwa lomag angko domwag, dapat ham lomag angko aban. Maskin aho boyagan, ham imboyag yadi. ²⁰ Gis nanya fag sirang aban, nom-anod wan, ham tomwa kitay aho kasadi hangko Ama hanggan ham kasadi sangko, hanggan aho kasadi ha hayo. ²¹ Kagfaanod angko manga togon hanggan katanog tonya, hanya ka galwasi angko. Ka galwasi angko, angko Ama yadi fagalwasiyon. Aho galwasi yadi hanya a, aho mamahilala angko sadili ha hanya. ²² Is Hodas, bohonwa kan Iskariyoti anak fag Hodas, gintaw in Hisos kiti, Hyami Fon, kinda nangos haw no mamalag im sadili ha hyami, dapat idwa mamalag has baba daga fag manga taw? ²³ Is Hisos igsagot han Hodas kiti, Ka galwasi angko, imtanog yadingko hampang. Angko Ama galwasi yadi hanya a, mi sinya wak bomanwanan sasta basad fangayofan. ²⁴ Kadwa galwasi angko idwa yadi katanog angko manga hampang. Ka hayo donggon

hampang idwa gingko sadili, gi dingko Ama ka nasogo angko. ²⁵ Hogfwayong hayo to fag manga bagay aho no gofod yapdi hayo. ²⁶ Dapat aban, angko Ama so-mogo ha hayo ka Fanogbong ka tomobos angko. Hanya ka faadal hayo fagayo fag manga fakaoronganan, fatohod ha hayo fagayo angko nafwayong. ²⁷ Kahowayan kangko faobonon ha hayo. Angko sadili kahowayan kangko disagon ha hayo. Idwa kito kastay is baba daga fag kahowayan kangko disag ha hayo. Hayo manga fangayofan fag idwa kabalaw, fag idwa yadi kadala. ²⁸ Ham nadog wan aho noglwang kitay, aho kalahaw wan, dapat ay, aho aba kabangkad ya ha hayo. Ham no galwasi nangos angko, ham igbaya wan maskin ho hawangko Ama kawat kangayanan dahol man angko. ²⁹ Kati hogfwayong hayo to fag manga bagay bagom anod, kaarakitay nom-anod wan, ham imtiwala angko manga fwayong. ³⁰ Kati ngalay odi aho no kampang yapdi ha hayo maskin kastay is baba daga fag gorangon kaakbang wan. Hanya idwa syagan igdaog angko. ³¹ Dapat ay, ho katanog angko Ama manga togon, kaarakitay kastay is baba daga fag manga taw fag tomwa kitay aho galwasi angko Ama. Ginyas Hisos iglwang, Yabay, kati tam fag dokson wan, tam kalahaw wan.

15 Aho ka fon obas orongan, angko Ama ka bahala gano. ² Angko Ama kaglifong fagayo fag manga sanga sangko kadwag bohada, igyawa yadi ka manga sanga kagbohada kaarakitay labi man bomohada. ³ Ham basad fakayawan kati kawa angko manga hampang ka nafayawa hayo. ⁴ Ham fag idwag saman gingko kito yadi aho nodwag saman gi hayo. No kinday ka manga sanga idwa syagan bomohada no masamanan gis fon obas, ham idwa yadi syagan bomohada no masamanan gingko. ⁵ Aho ka fon obas, ham ka manga sanga. Kadwag saman gingko hanggan aho sa hanya, tonya kagbohada aywan. Maskin ham no masamanan di gingko, ham idwa somyagan omibolon nyawa kana, no ham odi. ⁶ Kadwa madahitan sangko im-okas kitos manga sanga kan-okas, inlayong. Tagtifon lamang ka manga sanga kanlayong a, gokas has basad afoy hanggan wamsonog. ⁷ Ham nodwag saman gingko hanggan angko manga hampang igdogayan sa hayo fangayofan fagaba, nyawa kana hayo fagsagadon, im-anod wan. ⁸ Ham nogbohada aywan, angko Ama kafiyan imlag wan. Imlag yadi kitay ham angko wa manga katogbong. ⁹ No kinday angko Ama no galwasi angko, kitonya yadi aho no galwasi hayo. Fag fagaba kasadi hangko kaarakitay ho galwasi yadi hayo fagaba. ¹⁰ Aho katanog angko Ama manga togon, yakanga aho it fagalwasiyon fagaba. Kitonya yadi, ham no katanog angko manga togon, ham angko manga fagalwasiyon fagaba. ¹¹ Maskin hogfwayong hayo kito kaarakitay ham domog yadi angko kasolongan hanggan hayo kasolongan idwa ha korang. ¹² Angko togon ha hayo kiti,

ham fag gadgalwasiyan ha sadi ha sadi, kito yadi aho no galwasi hayo. ¹³ No ha taw bomawi it manga fakilalaon, nyawa hanya hanggan wa matay, idwa ha akwa domwag galwasi labi man inya. ¹⁴ Ham no katanog angko togon ha hayo, ham angko wa manga fakilalaon. ¹⁵ Gis kati ginan hodwag ngayan hayo domwag angko manga sogowan, maskin kat fon idwag fwayong hat manga sogowan it fon ibolonon fagayo. Dapat hogngayan hayo angko manga fakilalaon maskin ho natoltol ha hayo fagayo kangko donggon gingko Ama. ¹⁶ Bohonwa kitay ham kagfili angko, dapat aho ngap kagfili hayo. Ahog fatalaga yadi hayo kaarakitay ham lomahaw wan a, bomohada yadi aywan, manga bohada kadwa kafangta bagyo. No kitonya angko Ama domisag ha hayo nyawa kana ka hayo fagsagadon sangko ngayan. ¹⁷ Angko togon ha hayo kiti, ham fag gadgalwasiyan ha sadi ha sadi. ¹⁸ Ka tagastay baba daga fag manga taw no kadwat iglag hayo, ham fag tohod kitay aho kasta fakadwaton iglag, bago di ham. ¹⁹ Ham no nangos tagastay sas baba daga fag manga taw, kastay fag manga taw galwasi yadi hayo. Dapat ay, aho nafili hayo gistay is baba daga fag manga taw. Kati ham bohonwa tagastay baba daga fag manga taw, yakanga ka manga tagastay kadwat iglag hayo. ²⁰ Ham fag tohod angko fwayong ha hayo kitay, kasta sogowan kangayanan idwa dahol man kat fon kangayanan. Maskin ta nogfahoriyan angko, ta mamahoriyan yadi hayo, dapat ta no katanog angko manga hampang, tantanog yadi hayo. ²¹ Ta mamahoriyan hayo kitonya kawa ham angko nafili fag manga taw. Maskin tadwa kilala ka nasogo angko. ²² Aho nangos nodwan bangkad hastay, nodwa yadi nahampang has taw, idwa twa sogaton has taw, dapat ay, tadwa ha katowidan kati, maskin ta nadog wan. ²³ Ka kadwat iglag angko, kadwat yadig lag angko Ama. ²⁴ Idwa ha fagsogaton has taw aho nodwa naibolon sasta faglagan manga ibolon kadwa ha taw naibolon nyawa ginahin. Dapat ay, ta fadi wad nalag angko manga ibolon, dapat ta kadwat iglag angko hanggan angko Ama. ²⁵ Inbali kitonya kaarakitay im-anod wan kansorat sas Batasan Hodyo kitay, Ta kadwat iglag angko, idwa ha fabangdanan gingko. ²⁶ Dapat ay, ka Fanogbong imbangkad wan. Ho somogo hanya ha hayo gingko Ama. Hanya ka Falad fakaoronganan, gingko Ama kamginnan. Hanya ka mamaoronganan kawa aho no faktaw. ²⁷ Hanggan wa ham kagfaoronganan maskin ham angko ofod yadi gis fabagowanan.

16 Hogfwayong hayo to fag manga bagay kaarakitay ham idwag fagomon igsyag angko. ² Aban ta domayo hayo gis manga fanimbaan Hodyo. Bohondi kitonya, aban, ta nogfahatay hayo, ta gayfan kitay ta gibolon in Diyos ibolon. ³ Manga taw mamahoriyan hayo kitonya, maskin tadwa kilala angko Ama, idwa yadi kilala angko. ⁴ Dapat hogfwayong ha hayo

kitonya, kaarakitay to fag manga bagay nom-anod wan aba, ham fag tomohod kangko nafwayong ha hayo. Hodwa nafwayong hayo to fag manga bagay gis bago bago, maskin tam gofodan fagaba gis nanya. ⁵ Dapat kati aho hawasagsogo angko a, nyawa kitonya ngadi sadi sa hayo idwa ha gintaw aho no hadawan. ⁶ Dapat ay, kawa ho nafwayong hayo kitonya, ham gwayan wa karongkot hayo manga fangayofan. ⁷ Dapat angko fagfwayongon hayo orongan wa kitay, dahol man hayo fakinabang aho no gobon hayo. Maskin aho nodwa gobon hayo, ka Fanogbong idwam bangkad ha hayo. Dapat ay, aho no omobon hayo, hanya kangko sogoon ha hayo. ⁸ Hanya nomdasog ha hayo, hanya mamatwagdog has taw istay is baba daga no kana ka ogali dwat, no kana ka kahalongan, hanggan no kinday nomtohoyan has fadosaan. ⁹ Mamatwagdog no kana ka ogali dwat kawa tadwag syag angko, ¹⁰ no kana ka kahalongan maskin aho hawangko Ama, ham fawa lomag angko aban. ¹¹ Fatwagdog yadi no kinday nomtohoyan has fadosaan kawas Diyos danwa nafatohoyan has fadosaan ka gorongan istay is baba daga. ¹² No kitay di aywan yapdi angko bato fwayongon ha hayo, dapat ham idya fagayo twagdog, aho no fomwayong hayo fagayo kati. ¹³ Dapat ay, ka Falad fakaoronganan nomdasog ha hayo, hanya ka fadonong hayo ka manga fakaoronganan fagayo. Bohonwat sadili fangayofan it fagfwayongon aban, kat donggon lamang gingko it bato fwayongon. Hanya fomwayong yadi ha hayo ka manga bagay kamlag aban. ¹⁴ Hanya mamalag angko kafiyan maskin hanya fomwayong hayo kat donggon gingko. ¹⁵ Fagayo kangko Ama, angko yadi wan, yakanga hoglwang ka Falad tomalinga angko fwayong, ginya madi hanya ka fomwayong tonya ha hayo. ¹⁶ Kati aba sadik ngalay, ham idwa lomag angko, ginya sadi yak ngalay ham lomag ya angko aban. ¹⁷ In Hisos manga katogbong tiba nangarintawan kiti, Kanat kahologan it nafwayong intam kitay, sadik ngalay tam idwa lomag hanya, ginya madi sadi yak ngalay tam lomag ya, hanggan hanya iglwang kitay hanya hawat Ama? ¹⁸ Kana tonya fag ngalay lamang aban it kahologan? Tam idwa natwagdog no kanat kahologan. ¹⁹ Is Hisos natwa kitay ta kasaya gintaw hanya, yakanga hanyag fwayong has taw kiti, To awkin hayo fagarintawanon ha sadi ha sadi no kana angko bato lwangon, aho noglwang, aban, ngalay ham idwa lomag angko, ginya madi sadi yak ngalay ham lomag ya angko? ²⁰ Orongan wan, bohonwa bohag, angko fwayong ha hayo kitay ham omoraw hanggan ngomongoy, dapat ka manga tagastay is baba daga fag manga taw bomaya wan. Anod, bago bago ham galibitan wan, dapat hayo kaalibitan imbali kasolongan. ²¹ Kitos ina nogfasagaya it anak igdog galibitan wa dahol gis nanya fag masohod, dapat non-sagaya wan, fawag tohod kitay galibitan haraw,

maskin igbaya wan kawa sadi yak anak dararag insagaya wan istay is baba daga. ²² Kitonya mandi ham. Ham galibitan kati, dapat tam manladlagan ya aban. Ham bomaya wa dahol dahol gis nanya fag masohod aban. Fawa ha taw syagan faliyam hayo kasolongan aban. ²³ Gis nanya aban ham idwa ha intawon angko domwag. Orongan wan, bohonwa bohag, angko fwayong hayo kitay, nyawa kana hayo sagadon gingko Ama, sangko ngayan, angko Ama domisag ha hayo. ²⁴ Balis kati ham idya ha nasagad nyawa kana sangko ngayan. Ham fag sagad, ham tomanggap wan kaarakitay ham kasolong wa dahol dahol. ²⁵ To fag manga bagay ho natoltol ha hayo las manga halimbawa. Dapat ay, aban, fawa las manga halimbawa ho no manoltol ha hayo, ho tomigna wa fiya fiya, aho no manoltol ha hayo gis nanya kawa angko Ama. ²⁶ Gis nanya fag manga masohod aban, sangko ngayan, ham somagad hayo fakasayaon gingko Ama. Nyawa hodwag fwayong hayo kitay ho fomalo hayo igdarangin hangko Ama, ²⁷ maskin angko Ama galwasi yadi hayo. Ham angko Ama fagalwasiyon kawa ham galwasi angko, hanggan ham katiwala kawa aho giwan Diyos. ²⁸ Ho giwangko Ama hyabi, ginya honbangkad ya hastay is baba daga, kati aho lomahaw ya gistay is baba daga, ho haya ngawangko Ama. ²⁹ In Hisos manga katogbong igfwayong, Kati yabay, hagnafatigna wa fiya fiya, hadwa kampang las manga halimbawa. ³⁰ Kati mi natwa wagdog kitay ha talastas wa fagayo fagayo, nyawa manga taw idya gintaw hyamo. Yakanga mi katiwala kitay haw giwan Diyos. ³¹ Is Hisos gintaw has taw, Kati ham awkin katiwala wan? ³² Dapat ay, araw ogbot, no kitay di kati wan, ham manarowayan wa fagayo, ham mangodgoliyan wan. Aho idwam dowan kam-goyan. Dapat ay, ka orongan, aho bohondi sadi, maskin angko Ama sa yadingko. ³³ Hogfwayong ha hayo to fag manga bagay kaarakitay ham ha kahowayan sangko. Istay is baba daga ham lomag kahoriyan. Dapat ay, fag marigon hayo manga fangayofan, aho nadaog ka karigonan istay is baba daga.

17 Is Hisos nontabo wagtoltol kitonya, nabantay has tongod, iglwang, Mama, kati wan fag masohod fag falag im Anak kafiyan kaarakitay aho, im Anak, mamalag yadi has taw im kafiyan. ² Kawa haw igfabahala angko has manga taw, fagayo fagayo sadik baba daga, kaarakitay igfaboyag hanggan aban aban, fagayo fag manga taw kam fagdisagon angko. ³ To ka haboyagan hanggan aban aban, manga taw no kilala hyamo, ka sadi dik Diyos orongan, hanggan kilala yadin Kiristo Hisos kam nasogo. ⁴ Ho nafalag im kafiyan istay is baba daga, kawa ho nafatabo im faibolonon angko. ⁵ Mama, falagan ya has taw angko kafiyan kati, kito yadi angko kafiyan hyabi, tam no gofodan ka daga nodyan halig. ⁶ Aho nafahilala hyamo

ngayan has manga taw kam nadisag angko gistay is baba daga. Tonya fag manga taw danwa hyamo, ginya haw nadisag wangko. Ta katanog hyamo hampang fagaba. ⁷ Kati ta natwa wagdog fiya fiya kitay, fagayo kam nadisag angko, gi hyamo orongan. ⁸ Ho natoltol yadi has taw kam nafwayong angko, ta nafaanod yadi wan. Ta twa kitay aho orongan gi wa hyamo non-bangkad hastay hanggan ta katiwala kitay haw ka nasogo angko. ⁹ Kam nadisag angko fag manga taw kangko fagdaranginon. Hodwag darangin kawa has fagayo fag manga taw sas baba daga, dapat kawa has manga taw kam disag angko, maskin hyamo wa tonya. ¹⁰ Kangko fag manga taw fagayo, hyamo yadi wan, hanggan fagayo ka hyamo, angko yadi wan. To fag manga taw kagfalag angko kafiyan. ¹¹ Dapat ay, to fag manga taw istay yapdis baba daga, ho fawa sas baba daga kati. Ho kaoli wan has nyamo hyamo. Mama, anowan nangos to fag manga taw sa hyamo Maliyaw fag ngayan karigonan, kam disag yadingko ngayan, kaarakitay tamsadi kito yadintam, tam sadi di. ¹² No kandogay day aho no gofod yapdis taw, aho naano tonya sa hyamo ngayan karigonan, kam nadisag yadingko ngayan. Ho naano has taw fiya fiya a, idwa hanliyam no bohonwa tonya fag taw ka danwan tohoyan has kadwatan kaarakitay im-anod wan kansorat sas Kasoratan. ¹³ Dapat kati ho kabangkad has nyamo hyamo. Hogfwayong to fagayo aho nostay yapdi sas baba daga, kaarakitay ta domog yadingko kasolongan kadwa ha korang. ¹⁴ Ho natoltol has taw kam hampang, yakanga ka manga tagastay is baba daga kadwat iglag angko manga taw, maskin ta bohonwa tagastay fag manga taw kati, kito yadingko, aho bohonwa tagastay. ¹⁵ Ahodwag sagad kitay haw fag faalin gis baba daga ka mangag syag angko, dapat ay, kangko fagsagadon nangos, haw fag taktak hanya gin Fandaya. ¹⁶ No kinday aho bohonwa tagastay, kitonya yadi kagsyag angko bohonwa tagastay is baba daga kati. ¹⁷ Fag ka fakaoronganan kagfatohoyan ha hyamo to fag manga taw. Im hampang ka fakaoronganan. ¹⁸ No kinday haw nasogo angko has baba daga, kitonya yadi aho nogsogo kagsyag angko has manga tagastay fag manga taw. ¹⁹ Maskin ho galwasi ka mangag syag angko, hogfatohoyan angko sadili ha hyamo kaarakitay ka fakaoronganan fatohoyan yadi ha hyamo, kangko fag manga taw. ²⁰ Bohondi kagsyag angko kati kangko fagdaranginon, hanggan yadi wa has manga somyag angko aban no domog ista manga hampang. ²¹ Tonya angko fagdaranginon kitay, nangos fagayo fag kasadi no kinday haw Mama, sawangko, hanggan aho sa yadi wa hyamo, kaarakitay ta kasadi santam. No kitonya, ka tagastay fag manga taw imtiwala yadi kitay haw ka nasogo angko. ²² Hogdisag yadi has taw kam disag angko kafiyan, kaarakitay ta kasadi, kito yadintam, tam sadi di. ²³ Aho kasadi sas taw hang-

gan ta kasadi hangko kaarakitay tamsadi orongan. Ginya madi ka tagastay is baba daga fag manga taw tomwa kitay haw nasogo angko hanggan haw galwasi ka manga taw kagsyag angko kito yadi hyamo, haw no galwasingko. ²⁴ Mama, angko fakasayaon, kam nadisag hangko fag manga taw fag omofod angko santam banwanan aban, kaarakitay lomag angko kafiyan, kam nadisag angko, maskin nyawa ka daga idyan halig hyabi, haw danwa galwasi angko. ²⁵ Mama maslong, ka manga tagastay is baba daga idwa kilala hyamo, dapat aho danwa kilala hyamo hanggan tongko manga ofod natwa wa kitay haw ka nasogongko. ²⁶ Aho nafahilala hyamo ngayan has taw, hanggan hogfadagos yapdig fahilala tonya kaarakitay no kinda ha no galwasingko, ta kitonya yadi, hanggan aho kasadi yadi has taw.

18 Ginya madis Hisos, nontabo wagdarangin, nadokson wan, hanggan it manga katogbong. Tanlahaw wan, hawas difay safa Kidron. Ha akwa sadik iyab sinya. Da Hisos hanya wan. ² Yabay, is Hodas, ka goyon in Hisos manga kalaban, iglag yadi tonya fag iyab kawas Hisos hanggan it manga katogbong fagabag tifonan sinya no mabanwanan. ³ Yakangas Hodas hanya yadi was iyab, hanggan wat manga nasagad sondalo taga Roma, hanggan manga polis kagbahala sas Fanimbaan-Dahol, kat nasagad gis manga fagtahinan fagalan, hanggan gis manga Farisiyo. In Hodas manga taban ha diya manga sa-long, manga fatay, masalawidan yadi manga talibong. ⁴ Kawas Hisos, danwa twa wan no kana ka madalananan ha hanya, yakanga hanya dagos natagbo is taw, naintaw kiti, Fakta ka hayo fagsayahon? ⁵ Ta nasagot hanya, Is Hisos ka taga Nasarit ka hyami fagsayahon. Is Hisos igsagot, Aho wa ngap kas Hisos. Is Hodas ka goyon in Hisos manga kalaban malindogan yadi sinya, ista ofod. ⁶ Is Hisos no nafwayong has taw kitay Aho wa kas Hisos, ka manga sondalo hanggan polis infwali has ginanan, tanlohob has boknga daga. ⁷ Sadi ya ginan is Hisos gintaw has taw, Fakta hayo fagsayahon? Ta nasagot ya hanya, Is Hisos taga Nasarit. ⁸ Is Hisos nasagot, Ho danwag fwayong hayo kitay aho wa kas Hisos. No aho ka hayo fagsayahon, fag falahaw angko manga ofod to. ⁹ Is Hisos nafwayong kitonya kaarakitay im-anod it hampang noglwang, Mama, ahodwa ha naliyam ngadi sadik taw kam nadisag angko. ¹⁰ Ginyas Simon Pidro, ka ha diya talibong, dagos wa nagonos, nabasing ka gorangon fag fagalan sogowan, natigbas ka balis sihon fag talinga. Tonya fag sogowan kawas Malko. ¹¹ Is Hisos nafwayong han Pidro, Halobanan yap im talibong. Aho awkin fag idwa ginom ginko Ama disagon angko fanginoman kahoriyan, ha gayfan? ¹² Yabay, ka manga sondalo taga Roma, hanggan it fagtahinan, hanggan ka manga polis gis Fanimbaan-Dahol nagamat in Hisos, nagafos ya-

di hanya. ¹³ Bago bago ta nataban in Hisos han Anas. Gis nanya fag fangaraw is Kayfas ka gorangon fag fagalan, dapat is Anas in Kayfas nogang, kawat anak ina in Kayfas wa babay. ¹⁴ Is Kayfas kagfwayong itfagonan has manga fagtahinan Hodyo kitay fiya man no sadi dik taw ka matay, kaarakitay ka sadik layonan Hodyo idwa matay. ¹⁵ Is Simon Pidro hanggan sadi yak katogbong naoyan in Hisos. To fag katogbong ka gorangon fagalan fakilalaon, yakanga naofod in Hisos nasakbaw has basad aladan gorangon fagalan balay. ¹⁶ Dapat is Pidro malindogan sasta dayo sakbawan alad. Yakanga ka sadik katogbong, ka gorangon fagalan fakilalaon, nadokson gis basad alad a, nahampang has sogowan ina kagbantay sakbawan, ginya nataban in Pidro has basad aladan. ¹⁷ Ka sogowan ina kagbantay sakbawan gintaw in Pidro, Bohonwa awkin haw in Hisos katogbong sadi? Is Pidro nasagot, Bohonwa aho yabay. ¹⁸ Magnaw gis nanya fag masohod, yakanga ka manga sogowan hanggan manga polis nafagba afoy, manga baga, ginya ta malindogan sas akbang afoy igfanayang wan. Yakangas Pidro gofodan has taw, igfanayang yadi. ¹⁹ Ginya ka gorangon fag fagalan naintaw in Hisos kawat manga katogbong hanggan no kanat faadalon has taw. ²⁰ Is Hisos igsagot hanya kitay, Sawasta fagdogan aho nahampang has manga taw fagayo. Sas iba fag manga banwa ahog faadal basad manga fanimbaan Hodyo, hanggan sas Hirosalim sas Fanimbaan-Dahol, sinya ka fanifonan manga Hodyo fagayo. Hodwa ha nafaadal mafyaloman. ²¹ Kana mayon no aho ka hayo fagintawon? Intawan ka manga nadog angko aho nogtolto has taw. Ta fadi wadtwa angko manga fwayong. ²² Is Hisos no nalwang di nga kitonya, sadik polis natofa marigon in Hisos, ginya nalwang, Kitonya aw ha nogsagot has gorangon fag fagalan? ²³ Is Hisos igsagot hanya, Aho no ha nafalamang angko hampang, fadogan is taw fagayo istay no kana tonya. Dapat angko fwayong no maanod wan, kana mayon haw nogtofa angko? ²⁴ Ginya madis Anas nafafangolo in Hisos, magafosan yapdi, han Kayfas, ka gorangon fag fagalan. ²⁵ Is Simon Pidro malindogan yapdi, igfanayang afoy sinya. Ginya tiba kagfanayang yadi iglwang hanya, Haw tonya fag ama it katogbong sadi, idwa aw? Dapat is Pidro igtangkod, iglwang, Bohonwan, bohonwa aho yabay. ²⁶ Kan Pidro natigbas it talinga ha kaiban sinya. Pariho ka gorangon fag fagalan sogowan. Kat kaiban gintaw yadin Pidro. Bohonwa aw haw kangko lagan it ofod basad iyab haraw? ²⁷ Sadi ya ginan is Pidro natangkod, iglwang, Bohonwan. Ginya madi ka tabag nataraoak wa dagos. ²⁸ Araw, no kasirang wan, ta nataban in Hisos gin Kayfas balay has balay gobirnadador Roma. Ka manga fagtahinan Hodyo idwan sakbaw has basad balay gorangon kaarakitay idwa alafitan it fagliyong, maskin araw ta kasaya homwan yafon Fanohodan Nagsagayan, ta

nogtohod ka anghil no nasagaya ista manga balay hyabi hyabi. ²⁹ Yakangas Pilato, ka gobirnadador, nadokson has taw, gintaw kitay, Kana araw ka hayo fagsombongon to fag taw? ³⁰ Tagsagot in Pilato kiti, Nodwa ha nahalig dwat, gwadi midwa yadi twa tabanon ha hyamo. ³¹ Ginyas Pilato iglwang has taw, Tabanan wan, ham wa ka bahala fatohoyan it fadosaan no kinday hayo manga ogali. Ka manga Hodyo igfwayong han Pilato, Ka batas Roma idwag faangay hyami nogfahatay taw, nyawa faktaw. ³² Inbali kito kaarakitay im-anod in Hisos fwayong itfagonan, no nafwayong no kinday hanya no matay. ³³ Is Pilato infwali ya has basad balay dahol, nafatawag in Hisos, ginya gintaw hanya, Haw awkin ka gorangon manga Hodyo? ³⁴ Is Hisos gintaw in Pilato, Hyamo aw sadili fangayofan haw no gintaw kitonya, ngatay ista odi fadahit ha hyamo? ³⁵ Is Pilato igsagot, Aho awkin Hodyo, ha gayfan? Hyamo sadili fag layonan taw, hanggan manga fagtahinan fagalan ka nataban hyamo hangko. Kanam naibolon dwat? ³⁶ Is Hisos igsagot in Pilato, Aho bohonwa kastay is baba daga fag gorangon. No ka odis baba daga fag gorangon kangko sakop, angko manga sogowan lomaban wan, kaarakitay ahodwam disag has manga fagtahinan Hodyo. Dapat ay, bohonwa has baba daga angko fag kabali gorangon. ³⁷ Is Pilato gintaw in Hisos, Ya mangharaw, haw wa aw ka sadik gorangon? Is Hisos igsagot, Haw wa ka gwas kitay aho sadik gorangon. Ahon sagaya anak dararag hyabi, hanggan inbangkad hastay has baba daga kaarakitay aho faorongon ka fakaoronganan. No fakta ka sakop fakaoronganan, tonya kagtalinga angko fwayong. ³⁸ Is Pilato gintaw hanya, Yabay, kana ka fakaoronganan? No nalwang di nga kitonya, is Pilato nadokson ya has sokayan, hawas manga Hodyo, iglwang, Ahodwa ha faglagon kasalanan to fag taw. ³⁹ Dapat ay, tam ha ogali kitay sa hayo Fanohodan Nagsagayan, ahog falfas ha hayo sadi kanporiso. Ham aw kasaya kitay aho fag fomalfas ka gorangon manga Hodyo? ⁴⁰ Ta natawag marigon nogsagot, Fag bohonwa to fag taw, fag is Barabas kantam fagfalfason. Yabay, is Barabas tolisan wan.

19 Ginya madis Pilato nafadokson in Hisos, nafabakbak is manga sondalo. ² Ka manga sondalo nahoskos di lamnon dogi a, nafasangbaw tonya in Hisos boknga alfoyo, ginya ta nafasolong yadi hanya rotay aba, boragaw. ³ Tagmaswag odi hanya, igbarangkadan hat atobangan, iglwang, Anod, kafiyaon mangharaw ka gorangon manga Hodyo. Ginya tagtofa ya ngadin Hisos marigon. ⁴ Sadi ya ginan is Pilato nadokson has sokayan a, igfwayong has taw, Fandog ngay, hogfadokson ya hanya ha hayo, kaarakitay ham tomwa wagdog kitay ahodwa ha donggon it kasalanan. ⁵ Yakangas Hisos nadokson ya ngay, ha solog sangbaw dogi, hanggan balokas boragaw. Is Pila-

to igfwayong has taw, Fanlag ngay, to wa ka ama. ⁶ Ka manga fagtahinan fagalan, hanggan ka manga polis gis Fanimbaan-Dahol, natawag marigon ta no nalag in Hisos, taglwang, Fapakowan hanya, fapakowan hanya sas nafatimbangan hayo. Is Pilato igfwayong, Sogi, tabanan wa hanya. Fag ham ka pomako hanya, sas nafatimbangan hayo. Maskin ahodwag dog it kasalanan. ⁷ Aywan fag manga Hodyo ka nasagot, Hami ha togon kagfatohoyan kitay, hanya fag matay wan maskin igfabali hanya in Diyos wa Anak hono. ⁸ Is Pilato labi wak kadalag fatohoyan in Hisos has kahatayan no nadog ista fwayong. ⁹ Is Pilato nasakbaw ya ngawan has basad balay dahol, naintaw in Hisos, Ha taga ginday? Dapat is Hisos idwa nasagot hanya. ¹⁰ Yakangas Pilato iglwang han Hisos, Ha awkin dayo kampang angko? Haw aw idwag tohod kitay aho ka bahala ngatay igfal-fas hyamo, ngatay igfapako hyamo sas nafatimbangan hayo? ¹¹ Is Hisos nasagot hanya, Hadwa ha bahala angko no bohonwas Diyos kagfaangay kitonya. Yakanga ka manga nataban angko ha hyamo, it kasalanan dwat man hyamo. ¹² Is Pilato no nadog in Hisos fwayong, naligaw it halimbawan kaarakitay fomalfas nangos in Hisos. Dapat ka fakaaywanan fag manga Hodyo nanarawagan ya, Haw nogfalfas to fag taw haw bohonwan Sisar amigos. Kagfadaholon it sadili, sadik gorangon, iglaban in Sisar. ¹³ Is Pilato no nadog ista fwayong nataban in Hisos has sokayan a, intokaw sas fanokawan fangabaya, sasta fagngayanon Salogan Bato. No sas fangampangan Hibriyo tagngayan tonya Gabata. ¹⁴ Yabay kati kaboknga wa sirang sas sirang Fatalagaan has Fanohodan Nagsagayan. Is Pilato igfwayong has manga Hodyo, Fanlag ngay to wa hayo Gorangon. ¹⁵ Ta nanarawagan di ngap, Mi dayo hanya, mi dayo wan, fapakowan wan sas nafatimbangan hayo. Is Pilato gintaw, Aho aw fapako hayo gorangon sas nafatimbangan hayo? Ka manga fagtahinan fag fagalan nasagot, Midwa ha gorangon no bohonwas Sisar. ¹⁶ Ginya madi yabay, is Pilato nafabahala in Hisos has manga fagtahinan fagalan kaarakitay ta fapako wa hanya sas nafatimbangan hayo. Yakanga ta nataban in Hisos. ¹⁷ Is Hisos noglahaw ha fasan nafatimbangan hayo kasta fag fapakowan araw hanya, hawas sadik foyo ta nogngayan, Botol Alfoyo, dapat no sas fangampangan Hibriyo, it ngayan Golgota. ¹⁸ Sinya ta nafapako in Hisos sas nafatimbangan hayo hanggan dowayak taw san Hisos dayo, myasa sadik taw mapakowan sas dowayak hayo, baliw baliw sadi, is Hisos sasta fagbokngan. ¹⁹ Is Pilato ka nafasorat is taw kasta sombong hanggan nafatokba san Hisos tongod alfoyo sas nafatimbangan hayo. Kansorat kiti, Is Hisos, taga Nasarit, ka gorangon manga Hodyo. ²⁰ Kaaywanon fag manga Hodyo kagbasa tonya fag sorat maskin akbang has banwa kasta nagfapakowan in Hisos sas nafatimbangan hayo. Ka sorat insorat sas sanglitan manga Hi-

briyo, manga taga Roma, hanggan manga Girigo. ²¹ Ka manga fagtahinan fagalan-han-Diyos iglwang han Pilato, Fag idwag sorat, Gorangon manga Hodyo, dapat ka fiya, haw fag sorat kitay hanyag Iwang, hono, hanya ka gorangon manga Hodyo. ²² Is Pilato igsagot, Kangko nasorat aho nasorat wan. ²³ Ginya ka manga sondalo nontabo wagpako in Hisos, nabol in Hisos manga rotay kasta naloslos haraw. Ta nahoray ofat ik layonan, nafahafod has manga sondalo, dapat ka rotay aba, gis tongod hanggan wa has daga, inhalig sadik dahonya, idwa ha bolig. ²⁴ Yakanga tagtoltolan kiti, Tam fag idwag gisi toy. Anogon. Tam mamostahan yap no fakta ara ka domaog, toy ara hanya wan. Inbali kitonya kaarakitay kansorat sas Kasoratan hyabi im-anod wan, kitay, Ta nafahafod angko manga rotay has taw, Ta nafapostahan yap angko solong. Kitonya ngay ka manga sondalo naibolon. ²⁵ Dapat in Hisos ina, hanggan in Hisos ina fadwasay ina, malindogan san Hisos dayo, sas akbang nafatimbangan hayo. Sinya yadis Mariya, in Kilyopas babay, hanggan is Mariya Magdalina. ²⁶ In Hisos fagalwasiyon fag katogbong gofod yadis taw sinya. Is Hisos noglag it ina hanggan tonya fag katogbong, natogon it ina hanya, iglwang, Yabay, ina, to kam anak kati. ²⁷ Ginya natogon yadi hat katogbong, iglwang, Yabay, to wam ina kati. Ginya wa ginan yabay, tonya fag katogbong nafaoliyan in Hisos ina sat sadili balay. ²⁸ Ginya madi, is Hisos no natwa kitay gis nanya intonglos wan it manga bato ibolonon fagayo, kaarakitay im-anod kansorat sas Kasoratan, iglwang, Aho kainom. ²⁹ Ha sadik mangkok sinya it sohad langgaw. Ta natogna famasopsop sas langgaw ginya naosok sas tobwan bagahay, nafasopsop in Hisos bibig. ³⁰ Is Hisos no nasopsop ka langgaw, iglwang, In-anod wa kati. Ginya hanyan tarohong wan it alfoyo, nafalfas wat ipsaw. ³¹ Kawa gis nanya fag sirang, famatalagaan was Fanohodan Nagsagayan, ka manga Hodyo idwa kasayag fagoyan ka manga habilogan sas tongod nafatimbangan hayo, labi man kawa to fag Sirang Kafahowayan araw, bohondi kito ka tiba no mahalga. Yakanga ka manga fagtahinan Hodyo nasagad gin Pilato kitay, is Pilato faangayan nangos, fodan ista bitis kanpako sas nafatimbangan hayo. Ginya ta no natay wan, bomol ista manga habilogan ginya. ³² Yakanga ka manga sondalo nabakbak marigon, nafod it manga bitis ka gona hanggan ka sadi ya, ista napako sas nafatimbangan hayo san Hisos akbang. ³³ Dapat ay, ta no gakbang in Hisos, taglag hanya danwa natay, yabay tadwa nafod it manga bitis. ³⁴ Dapat ka sadik sondalo naoros in Hisos daga tagyangan. Dagos wan-olan it folot hanggan danom. ³⁵ Ka nalag tonya kagfwayong it mata lagan kaarakitay ham katiwala wan. Kat fwayong orongan wan, hanggan hanya twa kitay hanya idwag bohag. ³⁶ In-anod kitonya kaarakitay imtonglos kansorat sas Kasoratan

kitay, Idwa hamfod it botol, nyawa di sadi. ³⁷ Insorat yadi kitay, Ta bomantay hanya kat naoros. ³⁸ Ginya madi, araw ogbot, is Hosi, gis banwa Arimatiya, nanagad gin Pilato kitay, fiya di aw no bomol in Hisos habilogan. Is Pilato nafaangay wan. No kitay di is Hosi in Hisos katogbong yadi, dapat mafyaloman di, kawa kadala ka manga fagtahinan Hodyo. Yakangas Hosi nabol in Hisos habilogan. ³⁹ Hanggan is Nikodimo, ka nasabang in Hisos hyabi basad yabi, naofod in Hosi. Is Nikodimo ha diya banglo fag tagok mira, ha aktom banglo fag rogrog hayo, aloi. Ka famabanglo fagayo kayosagboknga haban fayay it kaaywanan. ⁴⁰ Ka dowak ama nadiya in Hisos habilogan a, nasafot sas rotay madamol, ha famabanglo yadi, no kinday ka ogali Hodyo nogfatalaga has lobgoban. ⁴¹ Ha sadik iyab akbang sasta nagpakowan in Hisos sas nafatimbangan hayo. Sas basad iyab ha akwa sadik bago fag lohib lobgoban, idyapdi ha naglobgobanan taw sinya. ⁴² Kawa gis nanya, sirang Famatalagaan has Fanohodan Nagsagayan, hanggan tonya fag lohib akbang di, yakanga ta sinya wak nafaigyan in Hisos habilogan.

20 Yabay, nondasog sas sirang Simba, dayo marom marom yapdi, is Mariya Magdalena, in-bangkad has lohib fanlobgobanan. Nalag kitay ka toplan bato gis sakbawan lohib inbol wan. ² Yakangas Mariya nadalandan wan, hawan Simon Pidro hanggan sadik katogbong kan Hisos fagalwasiyon, nafwayong has taw, Ta nabol kagfon intam it habilogan gis basad lohib bato. Tam idwa twa no hadawan ta no nafwalid. ³ Yakangas Pidro, hanggan tonya fag katogbong sadi, inlahaw wan, hawas lohib fanlobgoban. ⁴ Tagbandalandanan wan, dapat ay, ka sadik katogbong nagona man in Pidro nadasog has lobgoban. ⁵ Tonya fag katogbong nogbantay has basad lohib, nalag ka manga fanamong rotay, dapat idwa nasakbaw has basad. ⁶ Is Simon Pidro man kandasog goyan, nasakbaw has basad lohib bato, nalag ka manga fanamong rotay. ⁷ Nalag yadi ka famogong rotay ka san Hisos alfoyo itfagonan, idwa mafaaktoman ka gis habilogan, bokod man di, mafogongan yapdi. ⁸ Ginya madi ka sadik katogbong, ka nagonan dasog has lobgoban, insakbaw yadi a, hanya nalag wan, haggan intiwala wan kitay is Hisos inboyag ya. ⁹ Dapat ay, ka manga katogbong idya twagdog kansorat sas Kasoratan kitay, hanya fag imboyag ya gis kahatayan. ¹⁰ Ginya madi ka dowak katogbong nwali wan hat manga fagoliyanan manga balay. ¹¹ Dapat ay is Mariya idwan lahaw a, malindogan odi sas sokayan, akbang has lohib bato, goraw wan. No goraw yapdi, is Mariya igtarohongan kaarakitay bomantay has basad lohib. ¹² Iglag dowak anghil, ha solong rotay abohay, matokawan sasta nagfwalidan in Hisos habilogan, insadi sas akbang alfoyo nangos, insadi sas akbang bitis. ¹³ Ka manga anghil gintaw in Mariya, Ina, kanam fagorawon? Is

Mariya igsagot, Maskin ta naanggong kagfon angko it habilogan. Ahodwa twa ta no hadak nafwalid. ¹⁴ Is Mariya nogfwayong kitonya, inbalihid a, iglag wan Hisos malindogan sinya, dapat ay, idwa kilala kitay tonyas Hisos. ¹⁵ Is Hisos gintaw hanya, Ina, kanam fagorawon? Faktam fagsayahon? Is Mariya gayfan ngandi ka giyab sinya, yakanga nasagot kiti, Ama, no haw wa ka naanggong it habilogan, fwayongan angko, haw no hadak nafwalid. Aho bomol ya. ¹⁶ Is Hisos nangayan hanya, Mariya. Is Mariya insayango wa han Hisos, iglwang, sas fangampangan Hibriyo, Raboni. It kahologan santam sanglitan, Kagfaadal. ¹⁷ Is Hisos nafwayong han Mariya, Ha hagtawid yap angko maskin ahodyan sakbaw hangko ama sam tongod. Ha fag hawangko manga fadwasay, hangko manga katogbong, fwayongan has taw kitay ho goli wan hangko Ama has tongod, ha hayo yadi Ama, hawangko Diyos hanggan ha hayo yadi Diyos. ¹⁸ Ginya madis Mariya Magdalena hanya wan, nafwayong han Hisos manga katogbong kitay, Ho nalag kagfon intam, natoltol yadi has taw in Hisos fwayong. ¹⁹ No kayabi wan araw gis nanya mandi fag sirang, ka sirang gona sa sadik simba, in Hisos manga katogbong matifonan sa sadik balay, dapat matahohan di kawa ta kadala ka manga fagtahinan Hodyo. Ginyas Hisos indasog sasta fagbokngan, nafwayong has taw, Hayo manga fangayofan fag malokmay wan. ²⁰ No nalwang di nga kitonya, is Hisos nafalag has taw it manga gamat, hanggan tagyangan. Ginya madi in Hisos manga katogbong kasolong wa dahol iglag kagfon intam. ²¹ Is Hisos naolit ya has taw, iglwang, Hayo manga fangayofan fag malokmay wan. No kinday angko Ama igsogo angko, kitonya yadi aho nogsogo hayo istay sas baba daga. ²² No nafwayong wa kitonya, is Hisos naoyop has taw, nafwayong, Ham fag tanggap ka Maliyaw fag Falad sa hayo manga basad fangayofan. ²³ Ham nogfaliyam ista manga ogali dwat, is Diyos igfaliyam yadi tonya, dapat ham nodwag faliyam ista manga ogali dwat, is Diyos idwa yadig faliyam tonya. ²⁴ Dapat ay, is Tomas, kasta fangngayanon, Singan, insadi gis Safolo ha Dowa, idwa sinya is Hisos nondasog. ²⁵ Ginya ka tiba in Hisos manga katogbong igfwayong han Tomas kiti, Mi nalag kagfon intam. Dapat ay, is Tomas igfwayong has taw, Aho nodwa lomag ista nagbaranan pako sat gamat, angko timoyo nodyag dog yadi tonya, angko gamat nodyag dog it daga tagyangan, hodwa katiwala kitay hanyan boyag ya. ²⁶ Nonsagaya sadik simba, in Hisos manga katogbong matifonan ya nga basad balay. Gis nanya yabay, is Tomas sinya yadi wan. Nyawa ta nafaganit ka tahop sakbawan, is Hisos igtolas di has basad balay, sawasta fagbokngan, iglwang, Hayo manga fangayofan fag malokmay wan, ham fag idwa kadala. ²⁷ Ginya madi nafwayong han Tomas, Ha fandog istay im timoyo a, ha famantay angko manga gamat. Fag falogday

im gamat, fandog angko daga tagyangan. Ha fag bohonwa kitay idwa katiwala, yatokitay, ha ngap fag katiwala wan. ²⁸ Ginya madis Tomas iglwang, Haw wa kagfon angko, angko wa Diyos. ²⁹ Is Hisos nasagot han Tomas, Maskin ha nalag wangko, ha awkin katiwala wa kati? Ka manga taw ka katiwala hangko, nyawadya nalag angko, ka bomaya wan. ³⁰ In Hisos manga naibolon falagon madolaw sat manga katogbong faglagan, aywan di kadwan sorat istay fag kasoratan. ³¹ Dapat ay, kansorat istay insorat kaarakitay ham imtiwala kawas Hisos kan Diyos-natogon-Famawi, in Diyos yadi wa Anak, hanggan maskin ham igsyag hanya, ham ha haboyagan wan.

21 Ginya madis Hisos nafalag ya domwag it sadili hat manga katogbong sas bintalan linaw Tibiriyadis. Kito no nafalag has taw. ² Da Simon Pidro, da Tomas, kasta nangayan Singan, da Natanail, taga Kana, sakop Galiliya, hanggan in Sibidiyo manga anak, ginya doway ya in Hisos manga katogbong, gofodan kito mandi ka hyabi. ³ Is Simon Pidro igfwayong has taw, Aho mangoyang ya nga wan. Taglwang, Mi mahin yadi wa hyamo. Ginya tanlahaw wan, nasahay wa has basad baloto, dapat ay, sadi wak yabi, tadwa ha iktan. ⁴ No kasirang wan is Hisos malindogan sas bintalan, dapat ay, it manga katogbong idya kilala kitay is Hisos wa tonya. ⁵ Ginyas Hisos gintaw has taw, Manga anahan, ham aw ha iktan nga oyang? Tag-sagot, Idwa akwa ngap. ⁶ Is Hisos igfwayong handa Pidro, Fag fadagdag hayo sarap has sihon baliwa baloto, ham omiktan wa araw manga oyang. Ginya madi ta nafadagdag ngay hanya ka sarap, dapat tadwa syagan igfasahay ka oyang kawa aywan wa dahol dahol, mabyat wan. ⁷ Kan Hisos fagalwasiyon fag katogbong nafwayong han Pidro, Tonya wa kagfon intam. Is Pidro nadog di nga kitay ka nahampang gis baba bintalan kawa kagfon intam, nasolong it rotay, ginya nafogong sat boknga habilogan, maskin naloslos wa haraw kaarakitay mangibolon, ginya nalokso has basad danom. ⁸ Dapat ay ka tiba manga katogbong indasog yadi, masahayan yapdi sas basad baloto, goyod wa ka sarap napno oyang, kawa idwa ayayo gis bahalan danom sinya, manga odi limak safolok dofa it kaayayowan. ⁹ Ta nondokson wan is fakadagsaan baloto, ta nalag sinya ha manga baga afoy a, manga sinogba oyang basad afoy hanggan tinapay. ¹⁰ Is Hisos iglwang has taw, Diyan hastay hayo iktan oyang tiba. ¹¹ Ginya madis Simon Pidro hawas basad baloto natogbong istaw nagoyod has bahalan linaw, baba bintalan, ka sarap napno wa manga oyang, myasa wa dahol. ¹⁵³ gamtanan ka oyang. Nyawa kitay kayonya wan, ka sarap idwan ragyang. ¹² Is Hisos iglwang has taw, Fag hastay, tam manyabas wan. Dapat ay, in Hisos manga katogbong fagayo kadala gintaw hanya no faktaw, maskin ta natwa wa kitay hanya wa kagfon intam. ¹³ Is

Hisos hawas bilog afoy, nabol ka tinapay, nadisag hat manga katogbong, hanggan ka oyang, kitonya yadi. ¹⁴ To kat fatolo ginan is Hisos nogfalag it sadili hat manga katogbong hanya nonboyag ya gis kahatayan. ¹⁵ Nontabo wagyabas, is Hisos gintaw in Simon Pidro kiti, Simon, in Hwan anak, haw awkin galwasi angko bohondi kito kam manga ofod no galwasi angko? Is Pidro nasagot, Ala ngay, angko Fon, haw fadi wad twa kitay ho galwasi hyamo. Ginyas Hisos iglwang, Bahogan angko manga anak topa. ¹⁶ Sadi ya ginan is Hisos gintaw hanya, Simon, in Hwan anak, haw awkin galwasi angko? Is Pidro igsagot, Ala, angko Fon, haw fadi wad twa kitay aho galwasi hyamo. Is Hisos iglwang, Anowan angko manga topa. ¹⁷ It fatolo wa ginan is Hisos nogfatanggap in Pidro kiti, Simon, haw in Hwan anak, haw aw galwasi angko? In Pidro fangayofan inrongkot wan maskin tolo wa ginan is Hisos naintaw hanya, Haw aw galwasi angko? Yakangas Pidro nalwang ha hanya, angko Fon, haw twa wa fagayo, haw twa kitay aho galwasi hyamo. Is Hisos nafwayong ya hanya, Bahogan angko manga topa. ¹⁸ Orongan wan, bohonwa bohag angko fwayong ha hyamo kitay haw no bago yapdi, haw igسالawid yanga hyamo fotol hanggan iglahaw nyawa hadawam fakasayaon, dapat aban, haw no magorang wan, ha aba igfalogday im gamat has taw a, ta gomafos di hyamo aban, ginya tomaban hyamo bohonwa ha hyamo fakasayaon fag hadasogan. ¹⁹ Is Hisos noglwang kitonya, igfatohoyan no kinday fag kahatayan ka mamalag in Diyos kafiyan aban is Pidro no matay. No nafwayong wa kitonya, nalwang han Pidro, Tahinan wangko. ²⁰ Ginyas Pidro natakfili hat ginanan a, nalag ka goyan hanya kan Hisos fagalwasiyon fag katogbong ka masorayan san Hisos akbang ta no nangwan, ka mandi ka naintaw, Hyami Fon, fakta ka omoyon hyamo kalaban? ²¹ Is Pidro no nalag hanya, naintaw in Hisos, Angko Fon, kinda tonya fag taw aban? ²² Is Hisos nalwang ha hanya, Ho no kasaya wa kitay hanya fag domogay hanggan aho nombangkad ya domwag, kana ara hyamo fagmawaton? Haw fag tahin wa ngap angko. ²³ Manga taw nafadahit has mangag tahin in Hisos kitay, is Hisos iglwang tonya fag katogbong idwa matay. Dapat is Hisos idwa nalwang kitay hanyadwa matay, nalwang odi kitay, nongko fakasayaon kitay tonya fag taw fag boyagan fagaba, hanggan no ginahin aho nombangkad ya, kana araw hyamo fagmawaton? ²⁴ To fag katogbong kagtoltol to fag manga bagay hanggan nasorat. Tam twa yadi kitay kat fwayong it mata wa lagan, sonson wa fakaoronganan. ²⁵ Dapat aywan yapdin Hisos manga naibolon kadwan sorat istay. No nangos tonya fagayo imsorat digsadig sadi, lomabi distay is baba daga it fwalidan manga famasaan it kaaywanan.

NAIBOLON

1 Hogsorat ya ha hyamo Tiyofilo kati. Sangko sorat gona, ho nafwayong fagayo in Hisos manga naibolon hanggan it manga nafwayong gis bago mamwayong has taw, ² hanggan wanabwat ham tongod. Is Hisos bagon abwat ham tongod, natogon hat manga nafili Fandiya-Barita gis Maliyaw fag Falad. ³ Is Hisos, nonsagaya wagdog mahori, fagaba wagfalag it sadili habilogan hat manga Fandiya-Barita. Kawa kitonya is Hisos nafaorongan wa kitay hanyan boyag ya ngay. Nafalag has taw ofat ik safolok sirang, natoltol yadi han Diyos sakop baliwa. ⁴ Is Hisos no gofodan yapdi has taw, hanya natogon has taw kitay, Ham fag idyag lahaw gis banwa Hirosalim. Ham fanayan yapdi sinya angko Ama natogon it bato disagon ha hayo, kangko yadi faglwangon. ⁵ Kawa sas danom is Hwan nogfatogna manga taw, dapat ay, ngalay wa aban, sas Maliyaw fag Falad ham nomtogna. ⁶ Ta no gofodan yapdin Hisos, ta gintaw hanya kitay, Hyami Fon, ha aw fafwali ya nangos ha hyami kati in Israil sakop banwanan? ⁷ Kiti is Hisos nogsagot, Angko ama ka bahala no ginahin fag masohod ka kitonya fag bagay, nyawa ham idwa twa no ginahin. ⁸ Dapat ham tomanggap karigonan ka Maliyaw fag Falad nomdokson ha hayo. Ginya madi, ham bago digfaorongan angko sas banwa Hirosalim, sas sakop Hodiya sadi wak dahonya, sas sakop Samariya, hanggan wa sadik dahonya baba daga. ⁹ Is Hisos nontabo wagfwayong kitonya, hanya dagos wan-abwat has tongod, it manga ofod no mabantayan yapdi hanya. Ginyas Hisos infarom wa has basad linyabo. ¹⁰ In Hisos manga ofod no mabantayan yapdi has tongod, is Hisos no kaayayo, ha dowak ama, balokasan abohay nalindog sasta akbang. ¹¹ Tonya nalwang kitay, Ham manga taga Galiliya, kana mayon ham no mabantayan yapdi has tongod? To fag is Hisos, kan-abwat has tongod, imbangkad ya aban hastay is baba daga, kito mandi ka hayo lagan kati non-abwat ham tongod. ¹² Ginya madi ka manga Fandiya-Barita infwali ya has Hirosalim gis Moyod Oliboan, ngandayo manga sadik liho it kaayayowan gis Hirosalim. ¹³ To ka mandi da Pidro, da Hwan, da Santyago, da Andris, da Filipi, da Tomas, da Bartolomi, da Matiyo, hanggan in Santyago sangay kan Alfiyo anak, in Simon yadi sangay kagbaliwa it kapariho Hodyo, hanggan kan Santyago anak fag Hodas. Ta no nadasog hat fangigyanan sas banwa, fagayo

nadagos wa nasakbaw has tongod fag salogan. ¹⁴ To fag manga ama, hanggan yadi manga ina, hanggan in Hisos manga fadwasay hanggan wat ina, is Mariya, fagaba gofodan igdarangin sinya. ¹⁵ Nonsagaya manga fihin ik sirang, ka manga fadwasay nanifonan, manga sadik daan ha dowak safolo fagayo fagayo. Ginyas Pidro nalindog sasta fag bokngan, nafwayong kiti, ¹⁶ Manga fadwasay, fag im-anod wan kanfwalid sas Kasoratan, ka Maliyaw fag Falad fwayong lan Dabid, kawa han Hodas ka nafangolo ka manga nagamat in Hisos. ¹⁷ Is Hodas danwa hyami ofod hyabi, igtogbong yadi gibolon. ¹⁸ In Hodas natanggap kwarta git naibolon dwat nasali daga. Is Hodas no nasongon, sinya wa kandagdag hanya nontobong. It tiyan inbosni wan, imbangkad yadi wat bitoha. ¹⁹ Fagayo natwa wan sa sadi wak dahonya Hirosalim. Yakanga ta noglwang, tonya fag daga, Akildama, it kahologan, Daga Folot. ²⁰ Is Pidro igfwayong ya, Maskin insorat sas Kasoratan manga Ambahan, Fag idwa ha goli taw sat baba daga, Fag idwa hagbanwanan sinya nyawa fakta fag taw. Insorat yadi, Fag iba taw man ka fadagos it ibolonon. ²¹ Kati nangos, tam fag fomili ya intam ofod sadi, kaarakitay faorongan yadit mata lagan kawas Hisos inboyag ya. ²² Ka nangos omofod intam, fag ka mandi ka danwa koyog hyami, is Hisos no gofodan hantam hyabi. Fag ka sadik taw ka nalag in Hisos is Hwan nogfatogna hanya, hanggan balin Hisos non-abwat has tongod. ²³ Ta nafili dowak ama, da Matiyas da Hosi, kasta fan-ngayanan is Barsabas, it bansagan is Hosto. ²⁴ Ginya madi ta nandarangin kiti, Hyami Fon, haw twa no kinday sasta basad fangayofan fagayo. Fatohoyanan nangos ha hyami no faktaw gis dowak ka hyamo nafili, ²⁵ kaarakitay hanyam bali Fandiya-Barita ka fadagos in Hodas ibolon kat nadayo no hawat hadasogan. ²⁶ Ginya madi ta nafaaraktoman ka dowak ngayan. In Matiyas ngayan kasta nabol. Ginya madi tonya wa kanbali ista ofod indogang has safolo ha sadik Fandiya-Barita.

2 Nondasog ka sirang Pintikostis, ta matifonan fagayo sa sadik balay. ² Ta nadog wa madali sadik hasnog gis tongod kito was hinagoman nogfawas. Ka hasnog napno wa sinya fag balay ista fagtifonan. ³ Ta nalag sinya bilang wa manga dila afoy nayokfo has taw ha sadi ha sadi. ⁴ Ka Maliyaw fag Falad sawas fagayo sasta manga fangayofan sadi wak dahonya.

Ginya madi ta kampang bokod bokod fag manga sanglit, no kinday ka Maliyaw fag Falad igfadonong. ⁵ Ha manga Hodyo masimbaon han Diyos, gis fagayo fag manga layonan daga iba, igdogayan wa sas Hirosalim gis nanya fag manga masohod. ⁶ Ka fakaaywanan fag manga taw, no nadog tonya fag hasnog, ta nagobok wa a, nanifonan wa sinya. Tandolaw wa dahol maskin tagdog in Hisos manga katogbong kampang sat manga fangampangan fagayo. ⁷ Kawa ta kataka wagdog, maskin tadwa kamin gisip, taglwang, Bonwa awkin manga taga Galiliya tonya fagayo ka kampang? ⁸ Kana mayon ta no kampang yadi wantam manga sadili fangampangan? ⁹ Tam manga taga Partiya, manga taga Midya, manga taga Ilam, mangag banwanan sas Misopotamya, manga gis Hodiya, gis Kapadosya, gis Ponto hanggan gis Asya, ¹⁰ gis Firigya, gis Panfilya, gis Ihipto hanggan gis manga sakop Libya ka akbang has sakop Sirini, hanggan ka manga famaklay gis Roma, nyawa manga Hodyo orongan, nyawa mangan bali manga Hodyo, ¹¹ manga taga Kirita, hanggan manga taga Arabya. Nyawa kayonya, tam igdog intam wa manga fangampangan ta nogtolto hantam kawa han Diyos manga marigon fag ibolon. ¹² Tadwa kamin gisip it donggon, hanggan dayo wa falfason garintawan ha sadi ha sadi kiti, Kana kat kahologan tonya? ¹³ Dapat ay, ka tibag fasidyowan odi, iglwang, Tyamo fag manga taw ngandayo kalango odi. ¹⁴ Dapat is Pidro, hanggan it manga ofod safolo ha sadi, nalindog. Is Pidro kampang marigon, iglwang, Ham ka mandi gis sakop Hodiya, hanggan ka mangag sabang yadi sas Hirosalim kati, ham fag talinga fiya fiya angko bato fwayongon ha hayo. ¹⁵ Mi fagayo bonwa kalango, kito ka hayo fatoga. No kito yapdi fag manga masohod, myanit yapdi kaabwat, bonya fanlangoon. ¹⁶ Yatokitay, to ngap igfaanod wa kati kan Howil, in Diyos fangampang fwayong hyabi, noglwang kitay, ¹⁷ Is Diyos danwa nalwang hyabi kitay, sas ginanan fag manga sirang, kangko ibolonon kito, Ho fahafod angko Falad has fagayo fag manga taw. Ginya hayo manga anak imbali yadi abangko manga fangampang has manga taw. Yakanga aban, is Diyos ha falagon ha hayo manga anahan manga bagay madolaw. Ka manga magorang ama sa hayo ha akwa yadi aba tagimfanon. ¹⁸ Gis nanya fag manga sirang, ho fahafod yadi angko Falad Hangko manga sogowan, nyawa ama nyawa ina. Ginya tambali yadi angko manga fangampang. ¹⁹ Aho mamalag manga falagon madolaw sas banwa sam tongod, Hanggan manga madolaw sas baba daga, Folot, afoy hanggan songaw anos dahol dahol. ²⁰ Imharom ka myanit a, Ka magdanon imbali wa dararag kitos folot, Bagom dasog kagfon intam it Sirang, Ka mahalga hanggan masilaw yadi fag Sirang. ²¹ Yabay, nyawa faktaw nogsyag in Diyos, imbawi wan. ²² Ham manga taga Israil, kati ham fag matalingan. Is

Hisos, ka taga Nasarit, kan Diyos nasogo hantam. Kan Diyos manga fatimawa hanggan manga falagon madolaw kat nafaibolon in Hisos, kagfaorongan kitay hanya giwan Diyos. Tam fadi wad natwa no kinday kan Hisos manga naibolon maskin inlag wan santam fagbokngan. ²³ Dapat in Diyos wa kafangayofanan domisag hantam to fag is Hisos, hanggan is Diyos natwa wan gis hyabi hyabi kitay, tonya wat bato ibolonon. Ginya madi, to fag taw ham nafapako hanggan wa nafahatay gis manga gamat taw dwat. ²⁴ Dapat ay, is Diyos nafaboyag ya domwag hanya, nafalfas hanya gis karigonan kahatayan, maskin ka kahatayan idwa nasyagan natarabing hanya sas Daga Salad. ²⁵ Kito kan Dabid fwayong kawa han Hisos, Ho nalag in Diyos fagaba sangko akbang Hanya sawangko balis sihon, yakanga hodwa kadala. ²⁶ Kawa kitonya, angko fangayofan kasolong, angko bibig gambahan igbaya Nyawa ho matay aban, ho ha fagsyagon yapdi, ²⁷ Maskin hadwag fabayaan angko falad sas Daga Salad. Hadwag faangay kitay kam Maliyaw fag imboyok. ²⁸ Haw nafwayong angko ka manga dalan has haboyangan. Maskin haw wan kangko ofod, ho kasolong wa dahol dahol. ²⁹ Manga fadwasay, ho twa wagfatohoyan hayo kitay intam hafofowan ama, is Dabid natay wa a, inlobgob yadi wan. Istay wat lobgoban hanggan kati. ³⁰ Kawas Dabid in Diyos fangampang danwa natwa in Diyos bato disagon hanya kitay, git hasokfonan aban, hambali gorangon sadi, kito yadi hanya. ³¹ In Dabid lagan, hanggan it fakatwawon kawan Diyos-natogon-Famawi imboyag ya domwag noglwang, Hanyadwan obon sas Daga Salad. Idwan angay kitay it habilogan fag imboyok. ³² To fag is Hisos is Diyos nafaboyag ya domwag. Migfaorongan hyami mata lagan kawas Hisos inboyag ya. ³³ Hanyan abwat san Diyos balis sihon, hanggan natanggap git Ama it Ama natogon bato disagon, ka Maliyaw fag Falad. To kan Hisos nafahafod ha hyami, kito ka hayo lagan, hayo donggon kati. ³⁴ Is Dabid idwa gis tongod, dapat hanya kagfwayong kitay, Is Diyos nafwayong hasagfon angko, Haw fag matokawan sangko balis sihon, ³⁵ No kandogay day ahodya nafasakop fiya fiya ha hyamo im manga kalaban fagayo. ³⁶ Yakanga ka fiya, tam manga taga Israil, sadik kayonya, tam fag danwa twa kitay, to fag is Hisos, ka hayo nafapako sas nafatimbangan hayo, is Diyos nafabali hanya kagfon intam hanggan it natogon-Famawi hanggan Gorangon. ³⁷ Yakanga ka manga matalingan nangayfanan wan sat basad fangayofan ta no nadog kitonya. Ginya ta gintaw in Pidro hanggan ka manga Fandiya-Barita tiba, Yabay yabay, manga fadwasay, kana araw ka hyami halimbawan? ³⁸ Is Pidro igsagot, Ham fagayo fag soyo wan han Diyos, ham fag fatogna wa hayo, ham nogfasakop san Kiristo Hisos ngayan, kaarakitay hanya faliyam hayo manga ogali dwat. Ginya madi, is Diyos fahafod it Maliyaw fag Fal-

ad ha hayo. ³⁹ Maskin in Diyos natogon bato disagon hawa hayo nomdisag, hanggan ha hayo manga anak, hanggan has fagayo fag manga taw, nyawa ka manga sawas ayayo, hawas fagayo kan Diyos kagfon intam it fagtawagon. ⁴⁰ Aywan yapdin Pidro manga natoltol has taw kaarakitay faorongon hanggan nafaaronganon yadi has taw kitay, Kaarakitay ham imbawi wan, ham fag idwag tolad kito ka kati fag manga taw ka ha ogali dwat. ⁴¹ Yakanga fagayo kantiwala in Pidro manga fwayong intogna wan. Tanaywan manga tolok libo taw gis nanya lamang fag sirang. ⁴² Tagfadagos yadig talinga ka manga Fandiya-Barita adal, nangaraktoman it manga botang, igsayowan iglifongan tinapay, hanggan igdarangin fagaba. ⁴³ Kawa ka manga Fandiya-Barita gibolon aywan fag manga falagon madolaw, yakanga ka manga taw fagayo kataka ya, kadala ya. ⁴⁴ Ka mangan tiwala fagayo gofodan di. It manga botang nafaaraktoman di fagayo. ⁴⁵ Ta nafasalit manga kaakwa, ginya madi kat sali nangorayan has taw kaarakitay idwa komorang ista fanganon. Ta nangafod, nafahosto ha sadi ha sadi. ⁴⁶ Sirang sirang tagtifonan sas Fanimbaan-Dahol, fagaba masolong, hanggan igsayowan ta no kwan hanon sasta manga balay. ⁴⁷ Ka mangan tiwala igfasayagdog in Diyos, hanggan fagayo fag manga taw kasaya waglag kasta manga ogali. Sirang sirang kagfon intam igfadogang has Tifonan sinya ka manga taw kanbawi.

3 Sadi ginan da Pidro da Hwan hawas Fanimbaan-Dahol dayo myanit kalibaba, maskin gis nanya manga taw igdarangin fagaba sinya. ² Fagaba manga taw igboklid sadik ama kanfihong it bitis gi yapdit kasagayan. Sirang sirang tagfwalid hanya sas bilog sakbawan alad, kat ngayan, Maangay fag Sakbawan, kaarakitay hanya managad togbong gis manga taw kagsakbaw has basad Fanimbaan-Dahol. ³ Ka ama fihong, no nalag inda Pidro da Hwan, dayo kasakbaw has basad alad Fanimbaan-Dahol, hanyag sagad wan. ⁴ Yakanga ka dow, da Pidro, nangolanganan hanya. Is Pidro iglwang kitay, Ha fag bantay hyami. ⁵ Hanya nabantay ngay, gayfan ta ngandayo ha bato nga disagon hanya. ⁶ Dapat is Pidro iglwang hanya, Hodwa ha pilak, hodwa yadi ha ginto, dapat aho ha akwa disagon iba ha hyamo, kakitay, san Kiristo Hisos ngayan, ka taga Nasarit, haw fag lomindog wa a, fag lomahaw wan. ⁷ Is Pidro nagamit ka ama fihong sat balis sihon fag gamat a, nafalindog wan. It bitis dagos wanrigan hanggan it manga halisan. ⁸ Hanya nalokso nalindog, ginya yabay igfabago waglahaw, igfatahin waglokso nogsakbaw has basad aladan Fanimbaan-Dahol. Nahin wanda Pidro a, masolong wagfasayagdog han Diyos. ⁹ Fagayo fag manga taw ka sas Fanimbaan-Dahol gis nanya iglag ka ama noglahaw igfasayagdog in Diyos. ¹⁰ Tandolaw wa dahol dahol maskin ta kilala kitay, to fag ama ka matokawan fagaba sas bilog Sakbawan Fiya

Kabantay, sas alad Fanimbaan-Dahol, dapat ay, kati iglahaw, ogali mandi. ¹¹ Ka ama no matawidan yapdi inda Pidro da Hwan san Salomon bilog Famahowayan, manga taw nanhadalandanan wan nagobok no kana mayon ka sinya, maskin tandolaw wa dahol. ¹² Is Pidro no nalag ka manga taw gobok, igfwayong kiti, Manga taga Israil, kana ham no kadolaw to fag bagay? Kana mayon ham nogdoro hyami kitonya? Ham gayfan ham aw ka nafalahaw to fag ama hyami odi kadonongan, ngatay hyami odi kafiyang? ¹³ Yatokitay, intam hafofowan, it Diyos, inda Abraham da Isaak da Hakob Diyos, ka nadisag dahol man has fagayo fag kangayanan han Hisos it sogowan. Dapat ham nafagamat hanya has manga ha kangayanan. Ham nadayo hanya san Pilato atobangan, nyawas Pilato danwa ha fangayofan fomalfas hanya. ¹⁴ Ham nadayo ka Maliyaw hanggan ka Maslong, ham nasagad fag ka sadik taw famahatay taw ka malfas. ¹⁵ Ham nafahatay di ngap kagdisag haboyagan, dapat ay, is Diyos nafaboyag ya hanya. Migfaorongon hyami wa sadili mata lagan. ¹⁶ In Hisos lamang ngayan karigonan ka nafafiya to fag ama, kawa hanyag syag in Hisos. Kawa hanyag syag lamang in Hisos, hanyan fiya wa orongan kito ka hayo lagan fagayo kati. ¹⁷ Manga fadwasay, ho twa kitay ham idwa natwagdog no kanat kahologan hayo naibolon han Hisos, nyawa ham, nyawa hayo manga gorongan, idwa yadi natwa. ¹⁸ Dapat kawa ham nafahatay in Hisos, in-anod wan kan Diyos nafadog gis hyabi hyabi, git manga fangampang kawa kan Diyos-natogon-Famawi kitay, it ibolon idyam tabo hanya nodya domog mahori. ¹⁹ Yakanga ham fag soyo wa kati. Fag kafwali ya han Diyos kaarakitay hanyadwag botang sat basad fangayofan hayo manga naogali dwat, ²⁰ fahoway yadi hayo manga fangayofan fagaba. Ginya madi aban, hanya somogo yadi kat nafatohoyan Famawi hanggan Gorongan kaarakitay ha hayo, kawas Hisos. ²¹ Kati is Hisos fag sam tongod yapdi nodyan dasog gis nanya fag manga masohod, kitay ka manga bagay fagayo imbago wan kito kan Diyos nalwang lat manga maliyaw fag fangampang gi yapdis hyabi hyabi. ²² Is Mwisid danwa nalwang kitay, Is Diyos, intam Fon ka fomili yadi aban sadi gi hayo, fabali hanyat fangampang kito yadingko. Ham fag talingat manga bato fwayongon fagayo ha hayo. ²³ Is Diyos domayo git sakop hanggan domwat nyawa faktaw kadwag talinga tonya fag fangampang aban. ²⁴ Fagayo fag manga fangampang hyabi, gin Samwil ginan, hanggan fagayo ka nanarosonan nahalili hanya, nafwayong yadi kawa has manga bagay kan-anod kati fag kasohodan. ²⁵ In Diyos manga natogon gona, it manga bato disagon lat manga fangampang danwa ha hayo, hanggan ham inaktom yadi han Diyos taranggapan gi hayo hafofowan ginan, no nafwayong han Abraham, Gi hyamo hasokfonan aban, fagayo fagayo fag manga layonan taw

sadik baba daga bomaya wan. ²⁶ Yakanga ha hayo bago bago is Diyos no nafatohoyan it Sogowan, no nasogo hanya kaarakitay ham bomaya wan, hanya nogtobong hayo domayo hayo manga ogali dwat.

4 Da Pidro da Hwan nogtoltol yapdi has manga taw, manga fagalanhan-Diyos hanggan wasta tahinan sondalo ka mangag bantay sas Fanimbaan-Dahol hanggan wa manga Sadosiyo indasog wa sinya. ² Ta kaisog wa dahol dahol has dowak Fandiya-Barita maskin tagfwayong kitay is Hisos inboyag ya, kagfaorongon kitay ha akwa ya haboyagan sas dayo kahatayan. ³ Ta nagamat inda Pidro, ginya, kawa kayabi wan gis nanya, ta nafaporiso yapdi hanggan wansirang. ⁴ Nyawa kitonya kaaywanon ka nanalinga inda Pidro toltol intiwala han Hisos, ngandayo gamtanan manga 5,000 gis fagonan ka manga ama kantiwala. ⁵ Nonsirang wan, ka manga gorangon, ka manga fagtahinan sas banwa, hanggan ka mangag faadal Batasan Hodyo nanifonan sas Hirosalim. ⁶ Hanggan wa da Anas sinya, ka gorangon fag fagalan-han-Diyos, da Kaifas, da Hwan, da Alihandro, hanggan ka gorangon fag fagalan, it manga kaiban fagayo sinya yadi wan. ⁷ Ta nafalindog ka manga Fandiya-Barita sasta fagbokngan, ginya ta naintaw yadi handa Pidro kitay, Gindak kadonongan ham nabol tonya? Faktat ngayan ka hayo nasokfon ham no naibolon kitonya? ⁸ Ginya madis Pidro, kawa ka Falad Maliyaw sa hanya sadi wak dahonya, nasagot, Ham ka manga gorangon hanggan manga fagtahinan sas banwa, ⁹ no kadi has ama fi-hong, no kinday hami no natogbong hanya hanggan wanfiya, no tonya di ka hayo fagintawon hyami, ¹⁰ ham fagayo istay, hanggan fagayo fagayo taga Israil, ham fag twa kitay, in Kiristo Hisos, taga Nasarit, it ngayan karigonan, ka hayo nafapako sas nafatimbangan hayo, dapat ay, is Diyos nafaboyag ya hanya, hanya ka nafasyagan to fag taw nalindog sa hayo faglagan, orongan wanfiya. ¹¹ To fag is Hisos, Ka hayo fagdayoon fag bato, ham ka kalig balay, Hanyan bali ka bato kagganit has tiba sadik dahonya balay. ¹² Is Kiristo Hisos lamang kagbawi manga taw, maskin, sadik baba daga, is Diyos idwa ha nadisag has taw iba ngayan kagbawi intam. ¹³ Ka tifonan gorangon Hodyo intaka wagdog inda Pidro da Hwan maskin ta nahampang maslong has taw, labi wa ta no nadog kitay hanya basta odi taw, idwa ha nagadalan. Ta natwa wagdog kitay, maskin mangharaw inbali kitonyak madonong, kawa ta naofod in Hisos hyabi. ¹⁴ Ginya madi, ta no nalag ka taw kanfiya malindogan sanda Pidro da Hwan akbang, ta kyabog it bato lwangon gis nanya. ¹⁵ Yakanga ta nafadokson yapdi inda Pidro gis fanoltolan manga gorangon Hodyo. Ginya madi ta nangampangan yapdi. ¹⁶ Ta nangarintawan, Kinda araw intam halimbawan hanya fag manga taw, maskin fagayo fag manga taw sas Hirosalim nadog kawasta naibolon madolaw,

yakanga tam idwa syagan igfabohag ista fwayong.

¹⁷ Dapat, kaarakitay to idwam barita domwag has iba taw, tam fatagak to fag manga ama kitay, ta fag idwag barita domwag to fag ngayan, nyawa haday. ¹⁸ Ginya madi ta nafasakbaw ya inda Pidro. Taglibit wa hampang, Ham hawag fwayong, hawag faadal domwag no kawa han Hisos ngayan. ¹⁹ Dapat da Pidro da Hwan nasagot, Ham wak gisip no sida ka fiya san Diyos faglagan, ngatay hami fag ha hayo no katanog, ngatay fag han Diyos. ²⁰ Idyadi wa fiya mi nodwa fadog ka hyami lagan hanggan ka hyami donggon. ²¹ Ginya ta no nabando ya domwag, marigon man ka haraw, ta nafalfas wanda Pidro. Tadwa ha lagan halimbawan fadosa tonya fag dowak ama, maskin ka fakaaywanan igfasayagdog in Diyos kawasta lagan, ²² maskin kasta nafafiya fag ama iglabi wa ofat ik safelok fangaraw it kagorangan. ²³ Ta no nafalfas wan inda Pidro da Hwan, da Pidro hawat manga fakilalaon, namwayong ka manga fagtahinan fagalan, hanggan manga fagtahinan sas banwa fwayong kitay, ta fag idwag barita domwag. ²⁴ Ta no nadog kitonya, ta gofodan sinya fagayo, igdarangin han Diyos. Taglwang, Hyami Fon, haw ka nahalig banwa, hanggan daga, hanggan dagat, hanggan fagayo fag manga bagay ka sinya. ²⁵ Haw danwa nafwayong gi yapdi hyami hafofowan ginan, gin Dabid, hyamo fangibolon, ka Maliyaw fag Falad no nafadonong hanya, noglwang kitay, Kana mayon ka manga Hintil no kaisog wa dahol dahol? Ka manga taw no gwas it bato ibolonon idwa ha kahologan? ²⁶ Ka manga gorangon sas baba daga igfatalaga wa kitay ta lomaban wan Kasta manga fagtahinan matifonan wan Kaarakitay lomaban han Diyos hanggan hat natogon-Famawi-hanggan-Gorangon. ²⁷ Maskin orongan wan da Hirodis da Pontiyo Pilato, hanggan ka manga Hintil, hanggan ka manga taga Israil sadi wak dahonya, ta nanifonan istay fag banwa, ta nalaban im Sogowan Maliyaw, is Hisos, ka hyamo nafatohoyan. ²⁸ Ta nafatonglos wa fagayo fag manga bagay ka hyamo nafwayong kitay fag im-anod wan. ²⁹ Ginya madi, hyami Fon, kati tagfadalag dog hyami. Ha nangos togbongan wa hyami, hyamo manga sogowan, kaarakitay mi bomarita ya marigon has taw hyamo hampang. ³⁰ Ha falogdayan yadim gamat kaarakitay mamafiya ka manga ha sagit. Haw fag faangay nangos mi omibolon ka manga falagon madolaw san Hisos ngayan, ka hyamo Maliyaw fag Sogowan. ³¹ Ta nontabo wagdarangin, kasta nagtifonan fag balay inhawig. Maskin ka Maliyaw fag Falad sawas taw fagayo sadi wak dahonya, inrigon yasta fangayofan idwa ha madalag barita in Diyos hampang. ³² Fagayo fagayo kantiwala, insadi it fangayofan hanggan wat isip. Nyawa faktaw, idwag sadili it manga botang, dapat nafaaraktoman di fagayo. ³³ Ka manga Fandiya-Barita ha kadonongan marigon ta nogfaorongon kitay,

is Hisos intam Fon inboyag ya domwag. In Diyos mal-ooy fag kahowayan inlag sas fagayo. ³⁴ Idwa ha taw korang it fanganon gis nanya, maskin ka maakwa nafasali ngatay it daga, ngatay it balay, ³⁵ ginya ta nadisag it sali has manga Fandiya-Barita. Ginya madi ka manga Fandiya-Barita nangorayan ha sadi ha sadi kaarakitay idwa komorang ista fanganon. ³⁶ Kitonya yadi kan Hosi naibolon. Is Hosi taga Sipri, gin Libi hasokfonan. Ka manga Fandiya-Barita nafangayan hanya is Birnabi, it kahologan, Is Matogbongon. ³⁷ Is Hosi nafasalit iyab, ginya nadisag it sali has manga Fandiya-Barita.

5 Dapat ay, sadik talsawa, da Ananiyas, da Safira, nafasali yadi wat daga ka sadi. ² Is Ananiyas nabohin kat sali hanggan is Safira nafaangay wan. Ginya madis Ananiyas nadisag kat sawad has manga Fandiya-Barita. ³ Dapat is Pidro nafwayong han Ananiyas, Kana mayon haw nogtalinga in Satanas, kaarakitay ha bomohag has Falad Maliyaw? Kana ha nogbohin yapdi ka sali daga? ⁴ Ha nodyapdi harag fasali, bohonwa awkin hyamo yapdi ka daga? Haw no nafasali wan, ka hyamo kawa kwarta, idwa aw? Kana mayon haw no gibolon yapdi kitonya? Idwa has taw, dapat han Diyos haw nogbohag. ⁵ Is Ananiyas no nadog tonya fag hampang natay wa dagos, nakfo odi. Fagayo indala wa dahol iglag. ⁶ Ka manga anahan nalindog, nasafot ka natay, nadiya has sokayan a, nalobgob. ⁷ Manga tolok oras araw, it kadogayan, it babay inbangkad yadi, idwa ha fangayofan kitay it indogan natay wan. ⁸ Is Safira nondasog, is Pidro naintaw hanya, nalwang, Fwayongan angko, ngatay hayo natanggap it sali hayo daga dahonya wa aw? Ka ina nasagot, Dahonya ngay. ⁹ Dapat is Pidro nafwayong, Kana mayon hayo nagkasadiyan somolay kagfon intam it Falad? Fanlag ngay, ka manga taw ka nalobgob im indogan sawas sokayan, hanggan wa araw haw kasta lobgobon. ¹⁰ Is Safira dagos wa nakfo san Pidro akbang, natay yadi wan. Ginya madi ka manga anahan no nasakbaw ya, nalag kitay is Safira mahatayan. Ta nadiya yadi wan, nalobgob hanya sat indogan akbang. ¹¹ In Diyos Tifonan sadi wak kayonya indala wa dahol dahol, hanggan fagayo ka nadog to fag manga bagay indala yadi wan. ¹² Ka manga Fandiya-Barita gibolon aywan fag manga falagon madolaw sasta faglagan. Fagayo kantiwala fagaba wagtifonan san Salomon Famahowayan. ¹³ Dapat ka mangadyan tiwala kadala gaktom has mangan tiwala nyawa tagfaanod kitay fiya ista ogali. ¹⁴ Dapat ka manga ama hanggan manga ina kagsyag hasagfon intam kaaywan wa kaaywan wan. ¹⁵ Manga taw nadiya ka manga ha sagit has bilog dalan, nafwalid baba sagmak, kaarakitay is Pidro nogdalan sinya, ngadit anino fag omanino ka ha sagit. ¹⁶ Aywan kandasog gis fakadogan banwa Hirosalim. Ta nadiya ka manga ha sagit hanggan ka

manga labang nafahoriyan. Infiya wa fagayo fagayo. ¹⁷ Dapat ka gorangon fag fagalan, hanggan it manga ofod sadik layonan manga Sadosiyo, kaingli wa dahol ka manga Fandiya-Barita. ¹⁸ Yakanga ta nagamat was taw, nafaporiso basad banwa. ¹⁹ Dapat basad yabi, in Diyos anghil sadi, naboklas ka fanahop porisowan, nataban ka manga Fandiya-Barita has sokayan, nalwang, ²⁰ Sogi, ham fag hawas Fanimbaan-Dahol, ham fag toltol has taw kawa has Bago fag Haboyagan. ²¹ Ginya madi yabay, tantanog wan. Dayo yapdi kayawa, ka manga Fandiya-Barita hawas basad Fanimbaan-Dahol, natoltol has taw. Dapat ka gorangon fag fagalan hanggan it manga ofod nondasog araw, has akbang porisowan, ta nafatawag ka tifonan manga fagtahinan Hodyo fagayo sasta fanoltolan. Ginya madi ta nasogo kitay, famantay ka mangan poriso fafon, tabanan hastay. ²² Dapat ka manga namantay idwa ha lagan taw sinya. Yakanga ta nwali wan. nafwayong, Idwa akwa sinya. ²³ No kitay di, kat fanahop maganitan mandi, ha bantay ya ngadi, dapat ay idwa ha taw sas basad. ²⁴ Kasta tahinan ka manga sondalo kagbantay sas Fanimbaan-Dahol, hanggan ka manga fagtahinan fagalan nangarisipon wan ta no nadog kitonya kitay, hada wa mayon ka manga Fandiya-Barita. ²⁵ Ginya madi handasog sadik taw igfwayong, Yatokitay maporisowan tonya, sawas basad Fanimbaan-Dahol, igtoltol ya nga wa ngap has taw. ²⁶ Ginya ka tahinan sondalo nafaofod it sakop tiba has Fanimbaan-Dahol. Nataban ka manga Fandiya-Barita, igfahowayan odi, maskin kadala ngandayo ka fakaaywanan bomintok hanya, hanya no mangisog has taw. ²⁷ Ta no nataban ka manga Fandiya-Barita, ta nafaatobangan hanya has fanoltolan manga Hodyo. Ka gorangon fagalan naintaw wa fiya fiya, ²⁸ igfwayong, Gwadi marigon hyami bando ha hayo kitay fag idwag toltol tonya fag taw it ngayan, dapat ham nafahaskat di ngap sadi wak dahonya Hirosalim, hanggan ham igbangdan yadi wa hyami it kahatayan. ²⁹ Dapat da Pidro, hanggan ka iba Fandiya-Barita nasagot, taglwang, Ka fiya hami imtanog yap han Diyos bago has manga taw. ³⁰ Intam manga hafofowan Diyos ka nafaboyag ya in Hisos ka hayo nafahatay, ham no nafasakbit ya ngadi hanya sas nafatimbangan hayo. ³¹ Is Diyos nataban in Hisos ham tongod, han Diyos balis sihon, nafabali hanya intam Fagtahinan hanggan Famawi kaarakitay in Israil hasokfonan somoyo wan, hanggan is Diyos faliyam wan it manga naogali dwat. ³² To fagayo fagayo hyami wa sadili mata lagan, hami hanggan ka Falad Maliyaw kan Diyos nadisag has manga katanog hanya. ³³ Dapat ka fanifonan Hodyo inhuri wa dahol dahol igdog. Ta kasaya wagfahatay ka manga Fandiya-Barita. ³⁴ Dapat sadik ama Farisiyo, is Gamaliyal, kagfaadal in Mwisitogon, nalindog sasta fagbokngan fanifonan. Ta fagayo magalang fiya fiya hanya. Hanya nafwayong ki-

tay, Fadoksonan yap ngalay to fag manga taw. ³⁵ Ginya nafwayong has taw, Manga ama taga Israil, isipan yap fiya fiya hayo bato ibolonon has nwa fag manga taw. ³⁶ Hyabi, idya dogay, is Tiyodas, inbangkad igfada-holon it sadili, nataban manga ofat ik daan ama. Dapat ta no nafahatay in Tiyodas, it manga ofod nalagyo lamang, idwa ha kahologan. ³⁷ Ginya madi, is Tiyodas no natay wan, is Hodas man, taga Galiliya, inbangkad dayog falista manga taw, hanya nataban aywan ogbot fag manga taw. Dapat is Hodas natay, hanggan it manga ofod nalagyo yadi. ³⁸ Yakanga, hogfwayong hayo kati, ham hawag mawat tonya fag manga taw, fabayaan lamang sinya. It fakasayaon hanggan ibolonon no gi odis kapariho taw, imliyam yadi kito kas taw. ³⁹ Dapat to no gin Diyos, ham idwa syagan do-maog, dapat kamlag aban ngandayo ham wa kaglaban in Diyos. Ka manga fagtahinan Hodyo nafaangay di. ⁴⁰ Ta no nafasakbaw ya ka manga Fandiya-Barita, ta nabakbak is taw, ginya tagbando kitay, Ham fag idwag fwayong domwag in Hisos ngayan has taw. Ginya madi ta nafalahaw ya. ⁴¹ Ka manga Fandiya-Barita kaso-long wan noglahaw gis fanoltolan manga Hodyo maskin is Diyos nafaangay kitay ta fag gagwanta wan, nyawa manga taw igyod hanya, kawa ta galwasi in Hisos. ⁴² Sirang sirang sas Fanimbaan-Dahol, hanggan ha balay ha balay, tadwag logak igtoltol kawas Hisos kan Diyos-natogon-Famawi-hanggan-Gorongon.

6 Gis nanya fag masohod in Hisos manga katogbong no kaaywan, ka manga Hodyo ka kampang fangampangan Girigo igsogat has manga Hodyo ka kampang it sadili sanglitan. Taglwang, Kana ham nogfabayaan ka manga ina ka balo sa hyami? Kati ham fawa koray ha hyami manga ina balo kat bato tanggapon sirang sirang. ² Yakanga ka Safolo-ha-Dowa nafatawag ka fakaaywanan fag manga katogbong, igfwayong has taw, Idwa fiya hami nogtohas igbarita in Diyos hampang kaarakitay igbahala has hanon. ³ Yakanga filiyon fitok ama gi hayo ka ha akwa ka Falad Maliyaw sat fangayofan sadi wak dahonya, fiyat ogali, madonong yadi. Ginya tam mamatohoyan tonya fag manga taw kagfahafod hanon has fagayo. ⁴ Dapat ham idwa fahoyangon igdarangin hanggan igbarita in Diyos hampang. ⁵ Fagayo nafaangay wan. Ta nafili in Istiban, ka marigon no katiwala in Diyos hanggan igfasakop has Falad Maliyaw. Ta nafili yadinda Filipi, da Forokoro, da Nikanor, da Timon, da Parminas, hanggan is Nikolas, ka taga Antiyokya, sadik Hintil ka nafasakop has fakatiwalaon Hodyo. ⁶ Ta nataban ka fitok ama has manga Fandiya-Barita. Ka manga Fandiya-Barita nandarangin hanggan nafwalid it manga gamat sasta baba alfoyo. ⁷ In Diyos hampang kaskat wan. In Hisos manga katogbong sas Hirosalim kabagat wa kaaywan, hanggan aywan fag manga fagalan-han-Diyos intiwala yadi. ⁸ In Diyos malooy fag

kahowayan hanggan kadonongan sawan Istiban fangayofan sadi wak dahonya. Yakanga hanya nasyagan gibolon manga madolaw fag manga bagay hanggan manga fatimawa. ⁹ Dapat tiba taw gi sadik fanimbaan Hodyo, tagngayan Ista Nafalfas, nalaban in Istiban. Manga Hodyo gis Sirini, gis Alihandriya kagsimba sinya fag fanimbaan. Tonya hanggan manga Hodyo gis Silisya hanggan gis Asya ka nalaban in Istiban. ¹⁰ Tadwa syagan nadaog maskin in Istiban kadonongan gis Falad Maliyaw. ¹¹ Yakanga ta natangdan odi mafyaloman manga ama bohagon kaglwang kitay, Mi nadog wan hanya no kampang igsalan han Mwisit hanggan han Diyos. ¹² Maskin kitonya, tagfaisogon ka manga fagtahinan sas banwa, hanggan ka mangag faadal Batasan Hodyo kaarakitay omisog yadi in Istiban. Ginya madi ta nagamat in Istiban, nataban hanya has fanifonan Hodyo. ¹³ Taglwang, To fag ama idwag tohas igsalan kampang, iglwang ka Fanimbaan-Dahol idwa fiya, iglaban yadi ka Batasan Hodyo. ¹⁴ Mi nadog it hampang kitay, tonya fag is Hisos, taga Nasarit, fahakfo ka Fanimbaan-Dahol, hanggan faoman yadi in Mwisit manga faobonan ogali hantam. ¹⁵ Fagayo fag manga taw ka matokawan sas fanoltolan manga fagtahinan Hodyo igdoro wa fiya fiya in Istiban. Taglag it walong bilang yadi wa walong anghil.

7 Ginya ka gorangon fag fagalan gintaw in Istiban, Ista sombong hyamo orongan wa aw? ² Is Istiban nasagot, Manga fadwasay, hanggan manga magorang, ham fag matalingan. Is Abraham intam pinagkaama no sayapdis sakop Misopotamiya, nodya nalin has banwa Haran, ka marigon hanggan kafiyaon fag Diyos nasabang hanya. ³ Nafwayong hanya kitay, Haw fag galin gim banwanan, obonan im manga kaiban. Haw fag hawangko fagfwayongon banwanan ha hyamo. ⁴ Ginya madis Abraham nalin wa ngay gis manga banwanan Kaldiyo, nabanwanan has Haran. Ginya madit ama no natay sas Haran, is Diyos nafaalin ya domwag in Abraham gis Haran, nafangolo hanya hastay fag banwanan, kantam banwanan kati. ⁵ Dapat ay, is Abraham no bago yapdi dasog, is Diyos idyag disag daga hanya, ngadi dahos basad dalohap, nyawas Diyos nafwayong hanya kitay, is Abraham hanggan it manga hasokfonan ka omafo tonya fag banwanan aban. No kitay di, is Abraham idya ha anak gis nanya. ⁶ Is Diyos nafwayong han Abraham kitay, Im hasokfonan domogayan sas iba banwanan aban. Tambali ista manga sogowan sinya, hanggan ka manga taga sinya mamahoriyan im manga hasokfonan ofat ik daan fangaraw. ⁷ Dapat is Diyos iglwang, Aho mamosa yadi ka mangag fahoriyan im manga hasokfonan, ginya madi ta falahaw yas taw. Istay yadi fag banwanan im manga hasokfonan somimba ya hangko aban. ⁸ Is Diyos ha taranggapan han Abraham, hanggan natogon ka ogali igfatoli bilang tandaan kitay tan-

aktom sas taranggapan. Yakangan Abraham anak, is Isaak nonsagaya, is Abraham natoli hanya sas fawalo fag sirang. Kitonya yadis Isaak natoli in Hakob hanggan is Hakob natoli it manga anak ama, safolo ha dowak layonan in Israil manga hasokfonan. ⁹ Tonyantam hafofowan, intam fagngayanon tiba, in-ingli in Hosi hyabi. Ta nafasali ya ngadi hanya has taga Ihipto. Ka taga Ihipto nafabali in Hosi it sogowan. Dapat is Diyos sawa hanya, ¹⁰ nabawi hanya git lagan mahori fagayo. Is Diyos nafabali kitay is Faraon, ka gorongan sas sakop Ihipto, fag igbaya in Hosi kadonongan. Yakanga nafabali in Hosi ista tahinan sas Ihipto hanggan san Faraon sadili balay. ¹¹ Gis nanya fag manga masohod, ka manga taw sas sakop Ihipto, hanggan sas sakop Kanaan sadi wak dahonya, gwayan wan, kawa kalonos wa dahol dahol. Intam manga pinagkaama idwa yadi ha faglagon it bato hanon. ¹² Dapat ay, is Hakob no nadog kitay ha hanon sas Ihipto, nasogot manga anak hanya. ¹³ Ginya madi, sasta fadowa fag swali, is Hosi bago di nafadog hat manga fadwasay hanya no faktaw, hanggan is Faraon bago di nadog yadi is Hosi no ginda fag layonan taw. ¹⁴ Is Hosi nafatawag it ama hanggan it manga kaiban fagayo, gamtanan fitok safolo ha limak taw. ¹⁵ Ginya madis Hakob nadasog yadi has sakop Ihipto. Sinya wak natay hanggan wat manga anak, intam manga pinagkaama. ¹⁶ Ta natibo mandi ista habilogan, tiba tiba nyawasta botol odi, nadiya mandi nafaalin man has Sikim han Abraham nasali daga, it bato lobgobanan, it nasali gin Hamor manga anak. ¹⁷ Ginya madi aban, is Diyos no kaakbang wa kadisag it nagtongan daga han Abraham hasokfonan, intam iba sas Ihipto inbali ayo ayo. ¹⁸ Ginya, no dogay, hanbali ya sadik gorongan sas Ihipto kadwa nahilala in Hosi. ¹⁹ Tonya yadi fag gorongan kagbohag ya ngadi intam manga hafofowan hyabi, hanggan igfahoriyan. Nafasognod has taw kitay, okasan ista manga anak dararag kaarakitay matay. ²⁰ Gis nanya fag masohod is Mwisid nonsagaya, taglag kafiyaon fag anak, yakangat magorang naano hanya tolok magdanon sas basad balay. ²¹ Ginya ta no nafaalin in Mwisid has sokayan, matagowan yapdi, in Faraon dayaga nalag, nasafat, naano bilang wat sadili anak. ²² Ta nafadonong in Mwisid fagayo fag kadonongan taga Ihipto. Is Mwisid inbali marigon igtoltol hanggan gibolon. ²³ Ginya madis Mwisid no ofat ik safolok fangaraw it kagorangan, kasaya manabang hat kaiban manga taga Israil. ²⁴ Is Mwisid no nalag kitay ka sadik taga Ihipto gisog ka sadik taga Israil, is Mwisid naapin ka taga Israil hanggan nafahatay ka taga Ihipto. ²⁵ In Mwisid fangayofan it manga kaiban nangos tomwa wagdog kitay, is Diyos nafili in Mwisid kaarakitay omapin is taw. Dapat tadwa twagdog. ²⁶ Nonbago marom, is Mwisid no nasabang ya, nalag ya ngay ka

mandi kapariho taga Israil gawayan, gayfan lomilang is taw, nalwang, Ham myasa wa taga Israil, kana mayon ham no gawayan? ²⁷ Dapat kagdaog it ofod, natolod ogbot in Mwisid, iglwang, Faktaw ka nafabali hyamo hyami fangabaya? ²⁸ Ngatay haw kasaya ya ngay mamahatay angko, kito kam naibolon fafon ha sadik taga Ihipto? ²⁹ Is Mwisid no nadog ista hampang, hanya nalagyo dan. Nabanwanan sas sakop Madian. No madogayan sinya, it anak ama dowak. ³⁰ Ginya madi, nonsagaya ofat ik safolok fangaraw sinya, is Mwisid no ayayo gista manga banwanan, akbang has moyod Sinay, is Diyos nafalag hanya sadik anghil sas fon hayo libaba, gigang. ³¹ Is Mwisid indolaw wat lagan. Ginya, no gakbang kaarakitay bomantay fiya fiya, is Mwisid nadog kagfon intam it hasnog iglwang kitay, ³² Aho im manga hafofowan Diyos, inda Abraham, da Isaak, da Hakob Diyos. Is Mwisid karokog wa kadala, kadala wagbantay. ³³ Ginyas Diyos nafwayong hanya, Bol yap im lapak maskin im faglidan daga intohoyan han Diyos. ³⁴ Ho fadi wadag lag kitay ka taga Ihipto igdaog angko sakop. Hogdog wa kitay ta gwayanan wan. Hogdokson wan kaarakitay bomawi is taw. Kati yabay ho somogo hyamo has Ihipto. ³⁵ To fag is Mwisid kasta fakaplaon igdog, ta noglwang Fakta ka nafabali hyamo hyami fangabaya? Is Mwisid kan Diyos nasogo kaarakitay imbali ista fagtahinan hanggan famawi, hanya no nalag in Diyos anghil sas fon hayo libaba. ³⁶ Is Mwisid ka nataban ka manga taga Israil gis Ihipto, hanya no gibolon manga fatimawa hanggan falagon madolaw, ta no sas sakop Ihipto yapdi, ta no sas Dagat Dararag, hanggan ta no basad fakahyabogan ofat ik safolok fangaraw. ³⁷ To wa fag Mwisid ka nalwang han Israil manga hasokfonan, Is Diyos fatohoyan gi hayo aban sadik fangampang kito mandingko. ³⁸ To wa fag Mwisid ka sinya in Israil manga hasokfonan nontifonan basad fakahyabogan. Hanya ka kampang has anghil hyabi, ka anghil no kampang ha hanya hanggan hantam manga hafofowan sas Moyod Sinay. Hanya ka natanggap gin Diyos ka hampang kagfaboyag is taw kaarakitay igdisag hantam. ³⁹ Dapat ay, intam manga hafofowan dayo katanog in Mwisid, ta napla odig dog, fagaba gayfan has Ihipto. ⁴⁰ Taglwang han Aaron, Falowan hyami manga faglohodan malagan ka foman-golo hyami, kawas Mwisid ka nataban hyami gis Ihipto, midwa twa no kinday sinya. ⁴¹ Gis nanya, ta nahalig tolad anak baka faglohodan. Nasogba yadi manga hayopan has bilog tolad, hanggan nafanolodan wa sinya. ⁴² Yakangas Diyos nagoyoyan has taw, nafabayaan wa ta noglohod has manga fanggasan sas banwa sam tongod, kito kansorat san Diyos fangampang sorat, Ham mangan Israil hasokfonan, ham no nadogay ofat ik safolok fangaraw basad fakahyabogan, Hawangko anod awkin ham igsogba manga hayopan, hanggan igdisag manga disagon? ⁴³ Bonwa mawat, in Molok

balay-rotay ka hayo nadiya hanggan in Rimfan fang-gasan ka hayo faglohodan. Ka hayo nadiya kawa hayo sadili gamat nahalig manga tolada faglohodan, Yakan-ga ho omokas odi hayo has dayo Babilonya. ⁴⁴ Intam hafofowan nogdogayan yapdi basad fakahyabogan, ka Balay-Rotay kagfatohoyan in Diyos taranggapan has taw, sinya yadi wan. Inhalig fiya fiya kiton Diyos togon han Mwis no nafalag hanyat fagtoladon. ⁴⁵ Ginya madis Mwis no natay, it manga anak man ka nabahala ka Balay-Rotay, hanggan is Hosi no sasta fagonan is Diyos no nafaalin tibak layonan taw gin Diyos disagon fag banwanan, is Hosi no nataban in Israil hasokfonan hanya, tagdiya yapdi ka Balay-Rotay. Sinya yapdi ka Balay-Rotay hyabi hanggan nadasog han Dabid kasta Gorongan. ⁴⁶ Is Dabid in Diyos wa fagbayaon, hanggan hanyag sagad kitay is Diyos faangayan kitay hanya mangalig balay ka maangay han Hakob Diyos. ⁴⁷ Dapat is Salomon odi, kan Dabid anak, ka nahalig tonya fag balay. ⁴⁸ Dapat ay, is Diyos ka Abwat man has Fagayo, idwag banwanan sasta manga gamat nahalig balay, kito kan Diyos fangampang fwayong, ⁴⁹ Ka banwa sam tongod angko tokawan fanokawan gorongan, Hanggan ka daga angko yadi lidan. Kana fag balay hayo torokon domwag hangko, Siday nangos hayo falo angko famahowayan? ⁵⁰ Bonwa awkin aho ka nahalig to fag manga bagay fagayo? ⁵¹ Is Istiban igtoltol yapdi has taw, iglwang, Hayo manga fangayofan maganit wa dahol. Idwan bago hayo manga ogali. Ham kito yadi ka hayo manga hafofowan gis hyabi. Ham fagaba wagsongat ka Falad Maliyaw. ⁵² Hayo manga hafofowan nafahoriyan in Diyos manga fangampang fagayo. Ta nafahatay yadi kagfwayong kitay, is Maslong imbangkad aban, hanggan ham naoyon it manga kalaban hanggan wa nafahatay in Maslong. ⁵³ Ham fadi wad nadog in Diyos manga togon git manga anghil, dapat ham idwan tanog. ⁵⁴ Ka fanifonan Hodyo sadi wak kayonya, no nadog in Istiban toltol, nangarigitan it manga ngifon kawa ta kaisog hanya. ⁵⁵ Dapat is Istiban, kawa ka Falad Maliyaw sawa hanya sadi wak dahonya, hanya nabantay has tongod, nalag in Diyos kayawaan, nalag yadin Hisos malindogan san Diyos balis sihon. ⁵⁶ Is Istiban iglwang, Yabay yabay, hoglag in Diyos banwanan maboklasan, hanggan Kanbali Taw, malindogan san Diyos balis sihon. ⁵⁷ Dapat ka manga taw nataklob it manga talinga, dayog dog in Istiban fwayong, naringgit wan. Ginya ta natarabangan natoklos in Istiban. ⁵⁸ Ta nagoyod hanya has sokayan banwa, nabintok hanggan wa nafahatay hanya. Ka manga nadog in Istiban hampang haraw, naloslos it manga balokas, nafamataw sas anahan akbang, kawas Sawlo. ⁵⁹ Ta nogbintok yapdin Istiban, is Istiban nandarangin, nalwang, Hisos, angko Fon, ha tanggapan wangko falad kati. ⁶⁰ Ginyas Istiban nan-

lingkohodan natawag marigon, Angko Fon, haw nangos fag idwag botang ista naibolon dwat hangko.

8 Is Sawlo igfaangay yadi was taw ta nogfahatay in Istiban. Gis nanya yadi fag sirang manga taw igfadagos igfahoriyan wa dahol dahol in Diyos Tifonan sas banwa Hirosalim. Ka mangan tiwala nanhalagoyowan wan gis banwa Hirosalim, hawas manga sakop Hodiya hanggan Samariya. Dapat ka manga Fandiya-Barita idwa nalagyo. ² Ka manga taw ka katanog in Diyos nalobgob in Istiban, nangodgorawan yadi. ³ Dapat ay, is Sawlo talaga wagdwat in Diyos Tifonan. Nagombalay, igsakbaw, goyod yadi ginya ka mangan tiwala, nyawa ama, nyawa ina, ginyag faporiso. ⁴ Ka mangan tiwala nonsarowayan, ta nabarita di ngap in Diyos hampang nyawa hada kandasog. ⁵ Is Filipi hawas sadik banwa sakop Samariya, nabarita has taw in Diyos-natogon-Famawi-hanggan-Gorongan. ⁶ Ka fakaaywanan no nadog it hampang, hanggan nalag it manga falagon madolaw, insadi ista fangayofan tomalinga fiya fiya. ⁷ Aywan fag manga labang nalin gis taw, igharokyan no galin wan. Aywan yadi fag manga gafilay hanggan fihong in fiya wan. ⁸ Yakan-ga sinya fag banwa tagbaya wa dahol. ⁹ Dapat ha sadik ama sinya, is Simon, dogay wagfataka has manga taga Samariya, iglipat maskin. Hanyag fabali kitay hanya kasta fagdogan. ¹⁰ Nyawa ka ha manga kangayanan abwat, hanggan kadwa ha manga kangayanan, fagayo igtalinga hanya. Fagayo iglwang, To fag ama kasta faglwangon in Diyos karigonan, is Marigon. ¹¹ Dogay wa gis hyabi is Simon idwag logak igfatakas taw, kawag lipat. Yakanga fagayo igtalinga wa hanya. ¹² Dapat is Filipi no nabarita kawa han Diyos sakop, hanggan kawa han Kiristo Hisos ngayan, ta katiwala yadi wan, nyawa ama, nyawa ina, hanggan intogna yadi. ¹³ Hanggan was Simon intiwala, hanggan nontogna wan, gofod in Filipi, nyawa haday. Is Simon kataka waglag in Filipi manga fagfalagon madolaw hanggan fatimawa. ¹⁴ Ka manga Fandiya-Barita sas Hirosalim no nadog kitay manga taga Samariya intiwala han Diyos hampang, ta nasogo inda Pidro da Hwan has sakop Samariya. ¹⁵ Ta no nadasog, ta nandarangin yapdi kawa has mangan tiwala sas Samariya, kaarakitay ka Falad Maliyaw fag sas taw yadi, ¹⁶ maskin idya ha akwa, nyawa faktaw, kawa san Hisos kagfon intam it ngayan lamang ta nontogna. ¹⁷ Ginya madi da Pidro da Hwan nafwalid ista manga gamat hasta baba alfoyo kaarakitay ta tomanggap ka Falad Maliyaw. ¹⁸ Is Simon no nalag kitay ka Falad Maliyaw indisag has taw ka manga Fandiya-Barita nogfwalid ista manga gamat hasta baba alfoyo, is Simon iglwang, ¹⁹ Ho manlobos yadi wan. Ho somali wa hayo kaarakitay aho nangos fag kitonya yadi hayo, igdisag ka Falad Maliyaw has taw aho nogfwalid angko gamat hasta baba alfoyo. ²⁰ Is Pidro nasagot, Im kwarta imtahin yadi hyamo

imdwat. Maskin haw gayfan in Diyos disag ngandayo fagsaliyon. ²¹ Hadwa ha tanggapon tonya fag bagay. Idwa maangay sa hyamo, kawas Diyos twa kitay hyamo fangayofan dwat yapdi. ²² Haw fag soyo yap, fag darangin hasagfon intam, kaarakitay nomtwa di, hanya faliyam nangos im fagayfanon dwat. ²³ Kawa hoglag haw kaingli wa dahol, bilang magafosan sas ogali dwat. ²⁴ Is Simon iglwang, Ham fag sakop angko igdarangin hasagfon intam kaarakitay kam nafwayong angko manga dwat idwa omakbang hangko. ²⁵ Ginya da Pidro infwali ya has banwa Hirosalim nonsagaya wagbarita hanggan igfaorongon kagfon intam it hampang has fakaaywanan fag manga banwanan sas Samariya. ²⁶ Ginya madin Diyos anghil nasogo in Filipi, nalwang, Haw fag hanya wa dagos has Ihipto baliwa, has dalan has Gasa. Tonyag dalan sas fakahyabogan. ²⁷ Yakangas Filipi hanya wan. No sawas dalan is Filipi nalag sadik ama bating, taga Itiyopya, kagbahala han Kandasi manga botang fagayo, kawas Kandasi ka gorangon ina gis nanya sas sakop Itiyopya. Ka ama bago di goli gis Hirosalim, kawa nanimba ginya. ²⁸ Ka ama masahayan basad kalisa, igbasa in Isayas, in Diyos fangampang nasorat. ²⁹ Ka Falad Maliyaw nafwayong han Filipi, Ha hoyogan wan tonya fag kalisa. ³⁰ Is Filipi nadalandaan wa ogbot, naakbang has ama ka masahayan, igdog ka ama igbasa in Isayas, in Diyos fangampang nasorat. Ginya madis Filipi gintaw hanya, Haw aw twa ngagdog kam fagbasaon? ³¹ Ka ama nasagot, Kinda araw aho no tomwa wagdog nodwa hagfwayong angko? Ginyag lwang han Filipi, Haw fag sahay yadi wan, fag is nwa, sangko akbang. ³² To kat fagbasaon gis nanya, No kinday ka topa idwa gawang ta nogtaban has famahatayan, Hanggan no kinday ka anak topa idwa gawang ta noglokfog hanya, Kitonya yadi hanyadwa gawang. ³³ Ta nogfahoriyan hanya, tadwag fadalan hasagtalinga hampangan, ta nafahayan odi hanya, Idwa akwa sokfon Maskin it haboyagan sas baba daga inbol di. ³⁴ Ginya madi ka ama taga Itiyopya naintaw in Filipi kitay no faktaw kan Diyos fangampang faglwangon sat nabasa, ngatay it sadili ngatay iba taw ya kat faglwangon. ³⁵ Ginyat fagbasaon, is Filipi natoltol ka Fiya fag Barita kawa han Hisos. ³⁶ Ta noglahaw yapdi tandasog sas ha danom. Ka amag lwang, Idwa aw fiya haw no mamatogna angko? ³⁷ Is Filipi nasagot, iglwang, Fiya di haw nomtiwala sadi wak dahonya fangayofan. Ka amag sagot, Ahon tiwala wan kitay is Kiristo Hisos in Diyos wa Anak. ³⁸ Ka ama nafatorosan wat kalisa a, ta dowanadokson wan, hawas basad danom. Is Filipi nafatogna ka ama sinya. ³⁹ Ta no nalahaw gis basad danom, kagfon intam it Falad dagos wa nataban in Filipi. Ginya ka ama idwa nalag domwag in Filipi. Nafadagos wat lahawan, masolong wan. ⁴⁰ Dapat is Filipi indasog sas banwa Asoto. Ginya madi natoltol ka Fiya fag

Barita kat nagdalanan banwa fagayo hanggan wandasog sas banwa Sisariya.

9 Dapat ay is Sawlo igfadagos wagfahoriyan hanggan wagfahatay kagfon intam it manga katogbong. Yakangay hanya naakbang has gorangon fag fagan, ² nanagad manga sorat famalag has manga fanimbaan Hodyo sas banwa Damasko, kaarakitay faangayan hanya no gomamat nyawa faktat lagan sinya, nyawa ama, nyawa ina, kagfasakop has Ogali Bago. Ginya madi tomaban tonya, magafosan, has Hirosalim. ³ Da Sawlo no kaakbang wa has banwa Damasko, sadi odi ginan nayawa masilaw gim tongod san Sawlo ligongan. ⁴ Yakangas Sawlo inlohob odi. Ginya madi nadog sadik hasnog kampang ha hanya, iglwang, Sawlo, Sawlo, kana mayon haw nogfahoriyan angko? ⁵ Is Sawlo naintaw, Faktaw haw, angko Fon? Ha nasagot hanya, Aho kawas Hisos kam fagfahoriyon. ⁶ Haw fag lindog, fag hawas basad banwa. Haw no hanya, ha bago domog kam bato ibolonon. ⁷ In Sawlo manga ofod idwa gawang gawang. Ta nadog ongay ka hasnog dapat tadwa ha lagan taw. ⁸ Is Sawlo inlindog, mafogan di ongay it mata, dapat idwag lag. Yakanga ta nagamit odi hanya has basad banwa Damasko. ⁹ To lo wak sirang is Sawlo idwag lag, idwa ha nahwan, idwa nainom. ¹⁰ Yabay, gis nanya, in Hisos katogbong sadi sinya yadis Damasko, kawas Ananiyas. Kagfon intam no nafalag madolaw hanya, nangayan hanya, nalwang, Ananiyas. Is Ananiyas nasagot, Angko Fon, kana tonya? ¹¹ Kagfon intam nafwayong, Haw fag kalindog, haw fag hawas karsada kat ngayan, Maslong, haw intawan sinya in Hodas balay, ligawan in Sawlo, taga Tarso sinya. Katis Sawlo igdarangin wan. ¹² Ha nafalag hanya madolaw. Nalag haw igsakbaw hat oliyanan, ginyag fwalid im gamat ha hanya kaarakitay it mata lomag ya. ¹³ Dapat is Ananiyas iglwang, Angko Fon, gwa di aywan fag manga taw kagfwayong angko kitay tonya fag taw dwat it ibolon fagayo has manga taw kantohoyan ha hyamo sas Hirosalim. ¹⁴ Ginya madi hanya, hono, inbangkad yadi hastay is Damasko, madiyan it kasoratan gis manga fagtahinan fagan, kaarakitay gomafos fagayo istay kagsyag ha hyamo. ¹⁵ Dapat ay, kagfon intam nafwayong han Ananiyas, Ha ngap fag hanya wan. Maskin hanya kangko nafili kaarakitay igfahilala angko ngayan has manga Hintil, has manga gorangon, hanggan han Israil manga hasokfonan. ¹⁶ Ho fadog hanya fagayo kat bato agwantaon aban maskin galwasi angko. ¹⁷ Ginya madi yabay, is Ananiyas hanya wa ngay. Nasakbaw basad balay, igfwalid it gamat san Sawlo, iglwang, Fadwasay Sawlo, kagfon intam, is Hisos, ka nafalag ha hyamo sas boknga dalan, haw noglahaw hastay, kagsogo angko hastay kaarakitay im mata lomag ya, hanggan ka Maliyaw fag Falad fag sawa hyamo sadi wak dahonya. ¹⁸ Dagos handagdag manga bilang siksik gin Sawlo mata. Ginya

hanya nalag ya. Dagos wa nalahaw, nafatogna yadi wan. ¹⁹ Ginya madi yabay, hanya no nangwan ya hanon, inrigon wan. Is Sawlo nadogay yapdi ogbot sas Damasko, gofodan in Hisos manga katogbong sinya. ²⁰ Dagos wagfadog sas manga fanimbaan Hodyo kawa han Hisos, igfaorongan kitay hanyan Diyos wa Anak. ²¹ Fagayo intaka wagdog, taglwang, Bohonwa awkin to ka ama ka dan igfahoriyan has mangag syag han Hisos ngayan sas Hirosalim? Bonwa awkin tonya yadi kanbangkad hastay kaarakitay gomamat tonya fag manga taw, tomaban yadi magafosan has manga fag-tahinan fagalan? ²² Dapat kawas Sawlo kabagat wa kafiyaon nogfaadal, ka manga Hodyo ka mabanwanan istay sas Damasko, idwa twag sagot, maskin hanya gorongan wagfatohoyan kitay, is Hisos kan Diyos nga natogon-Famawi. ²³ No dogay ogbot, ka manga Hodyo nangoyonan kitay fahatayan in Sawlo. ²⁴ Dapat is Sawlo nadog wan. Yabi sirang ta golog in Sawlo sas manga sakbawan alad banwa kaarakitay fahatay hanya. ²⁵ Dapat basad yabi it manga katogbong nanton in Sawlo basad baban dahol, has dayo alad bato. ²⁶ Ginya madis Sawlo nondasog sas Hirosalim, gwayan wa kasaya omaktom has manga katogbong sinya. Dapat ta kadala yapdi, tadwa katiwala kitay kati is Sawlo sadi yadik katogbong. ²⁷ Dapat is Barnabi nataban in Sawlo has manga Fandiya-Barita. Is Barnabi nafatwagdog has taw no kinday no sas boknga dalan, is Sawlo nalag kagfon intam, hanggan kagfon intam nahampang hanya. Nalwang yadi kitay is Sawlo no sas Damasko idwa kadala igfaorongan kawa han Hisos. ²⁸ Ginya yabay is Sawlo gofodan has taw sas Hirosalim, idwa yadi kadalag toltol sinya sat ngayan kagfon intam. ²⁹ Hanyag fatoltolan hanggan igfabodbohagan has manga Hodyo ka kampang fangampangan Girigo. Dapat ta kasaya wagfahatay in Sawlo. ³⁰ Ka manga fadwasay natwa di ngay, ta nataban in Sawlo has lwad, has banwa Sisariya, ginya ta nafaoli mandi hanya has banwa Tarso. ³¹ Ginya madi yabay, sa sadi wak dahonya sakop Hodiya, sakop Galiliya, hanggan sakop Samariya, idwa hagfahoriyan in Diyos Tifonan. Kawa ta katanog kagfon intam it manga togon, ka mangan tiwala inrigon ya, inaywan ya, hanggan igfadagos yapdi kaayo kawa ka Maliyaw fag Falad igtogbong yadi. ³² Is Pidro noglahaw igsabang has manga fadwasay sas ligongan, indasog has lwad, igsabang has mangan tiwala sas banwa Lida. ³³ Sinyas Pidro nalag sadik ama, is Iniyas, idwa syagan kimot, walok fangaraw maigyanan odi. ³⁴ Is Pidro iglwang hanya, Iniyas, is Kiristo Hisos kagfafiya hyamo. Ha fag lindog wan, fafiyanan yap im sagmak. Hanyan lindog wa dagos. ³⁵ Fagayo ka sas banwa Lida hanggan sas banwa Saron nalag is Iniyas nonfiya, yakanga tantiwala hasagfon intam. ³⁶ Sas banwa Hopi man ha sadik ina in Hisos katogbong, is Tabita, fagaba wa gibolon fiya, igtog-

bong has manga myabog. In Tabita ngayan sas fangampangan Girigo, is Dorkas. ³⁷ Gis nanya fag manga masohod, is Dorkas insagit, natay wan. Ta no nafyad it habilogan, ta nafwalid sas tongod fag salogan. ³⁸ Ka banwa Lida akbang di has banwa Hopi, yakanga manga katogbong no nadog kitay is Pidro sadis Lida mangharaw, ta nasogo dowak ama fana-bang hanya, iglwang, Sabangan nangos hyami, fag ngalay wan. ³⁹ Is Pidro naofod wa ka dowak ama. Nondasog sinya, ta nafasakbaw wa dagos in Pidro has tongod fag salogan. Ka manga ina balo fagayo goraw yapdi, gobok in Pidro. Ta nafalag in Pidro manga homot, manga balokas in Dorkas nahalig, hanya no boyagan yapdi. ⁴⁰ Dapat is Pidro nafadokson yap fagayo. Ginya nanlingkohodan, nandarangin. Ginya madi nasayango has natay, iglwang, Tabita, ha fakabangon wan. Ginya in Dorkas mata infoga ya. No nalag in Pidro, intokaw wan. ⁴¹ Is Pidro natawid it gamat, natogbong igfalindog. Ginya madis Pidro nafatawag ka mangan tiwala hanggan ka manga ina balo. Nafalag is taw kitay is Dorkas boyagan ya. ⁴² Indog wan ha sadik dahonya sas banwa Hopi. Yakanga aywan kantiwala hasagfon intam. ⁴³ Is Pidro nandogayan yapdi sas Hopi sat sangay Simon balay kagfafiyan anit baka fakaligon.

10 Sas banwa Sisariya ha sadik ama, is Kornilyo, sadik fagtahinan sondalo taga Roma. It sakop habanan sondalo sadik daan gis sakop Italya. ² Is Kornilyo igsimba han Diyos hanggan katanog yadit manga togon. It manga ofod sas balay kitonya yadi. Is Kornilyo fagabag togbong has manga Hodyo myabog. Fagaba yadig darangin han Diyos. ³ Sadi ginan, dayo myanit kalibaba, is Kornilyo ha lagan madolaw, nalag fiya fiya in Diyos anghil sadi igsakbaw hat basad balay, igngayan hanya, iglwang, Kornilyo. ⁴ Is Kornilyo nadoro wa fiya fiya ka anghil kawa kadala wa dahol dahol, ginyag sagot, Kana tonya? Ka anghil iglwang, Is Diyos igdog im manga darangin hanggan iglag hyamo togbong has manga myabog, yakanga hanyag tohod hyamo. ⁵ Yabay, sogowan manga taw has banwa Hopi kati, kaarakitay tomaban hastay sadik ama, is Simon, kawasta faglwangon is Pidro. ⁶ Hanya maoliyanan sas bahalan dagat, sat sangay Simon balay kagfafiyan manga anit baka fakaligon. ⁷ Ka anghil nonlahaw, is Kornilyo natawag dowak sogowan hanggan sadik sondalo, ka katanog yadin Diyos manga togon, ka maofodan fagaba hanya. ⁸ Is Kornilyo no nafwayong hat manga sogowan it lagan fagayo, nasogo was taw has banwa Hopi. ⁹ No bago marom, in Kornilyo sogowan no kaakbang has Hopi, no kaboknga wa sirang, is Pidro nafanyak has baba balay kaarakitay mandarangin sinya. ¹⁰ Is Pidro kalonos wa dahol dahol gis nanya, dapat ta nogfatalaga yapdi fanganon, is Diyos nafalag madolaw han Pidro. ¹¹ Hanya nalag kitay, ka

banwa maboklasan, hanggan bilang homot dahol katon-ton gis tongod, matagbongan gis ofat ik fongfongan. ¹² Fagayo fag manga hayopan sinya wan basad homot, ka mangag lahaw hanggan ka manga gilafang sas baba daga, hanggan ka manga manok kaglayog sas tongod. ¹³ Is Pidro ha donggon hasnog kaglwang kitay, Pidro, ha fag lindog wan, ha fag fahatay a, fakwan wan. ¹⁴ Is Pidro igsagot, Angko Fon, no ngayan di aho, hodwa mananog tonya. Nyawa ginahin hodya ha nahwan no kadintam fagbaybayon. ¹⁵ Ginyas Pidro nadog ya domwag ka hasnog iglwang kitay, Haw fag idwag ngayan fagbaybayon kan Diyos manga nafabali maangay. ¹⁶ Tolo ginan naolit kitonya. Ginya madi ka bilang homot in-abwat has tongod. ¹⁷ Is Pidro no garisipon yapdi no kanat kahologan it lagan, in Kornilyo manga sogowan, no natwa wan in Simon balay, naakbang has sakbawan a, ¹⁸ igtawag kitay, ngatay is Simon Pidro sinya no goli. ¹⁹ Is Pidro no garisipon garisipon yapdit manga lagan, in Diyos Falad nafwayong hanya kitay, Yabay, tolok ama igsayak hyamo. ²⁰ Ha fag dokson wan, fag idwa kafang gofod is taw, maskin aho ka nasogo tonya hastay. ²¹ Yakangas Pidro nadokson wan, iglwang has taw, Aho ka hayo fagligawon. Kana hayo bolon? ²² Tagsagot kitay, Sadik fag-tahinan sondalo Roma, is Kornilyo, ka nasogo hyami hastay. Is Kornilyo fiya fag taw, katanog yadin Diyos. Sadi wak layonan manga Hodyo fagayo iggalang hanya. Sadik anghil maliyaw kagfwayong han Kornilyo, Fasonsonan manga taw han Pidro kaarakitay ham domog it fwayong. ²³ Is Pidro nafasakbaw ka manga ama, nafatoyog sinya gis nanya fag yabi. No marom marom, da Pidro natahin yadi was taw, hanggan manga fadwasay tiba gis banwa Hopi naofod yadi hanya. ²⁴ No domwag sirang, ta nadasog wan has banwa Sisariya. Da Kornilyo hanggan it manga kaiban, hanggan it manga fakilalaon fiya fiya, kat nasabang, sinya wak matifonan, mafanayan is taw. ²⁵ Da Pidro no kadasog, is Kornilyo natagbo was taw, nanlingkohodan yapdi han Pidro, iglohod hanya. ²⁶ Dapat is Pidro igfalindog hanya, iglwang, Ha fag lindog. Aho taw di kito yadi hyamo. ²⁷ Tagfadagos wagtoltolan hanggan wa ha basad balay. Is Pidro iglag taw kaaywanon matifonan sinya. ²⁸ Is Pidrog fwayong, Ham fadi wadagdog ka manga ogali Hodyo igbando, fag idwa gofod ngadig sabang has manga bonwa Hodyo. Dapat is Diyos nafatohoyan angko kitay, aho fag idwag lwang nyawa faktaw fagbaybayon. ²⁹ Yakanga ham no nafasabang angko, hodwa kafang hastay ha hayo. Kati ho kasaya domog no kana ka hayo fagsabangon angko. ³⁰ Ginya madis Kornilyo igsagot, Manga ofat ik yabi itfagonan, dayo myanit kalibaba, kito ka kati, ahog darangin istay sangko balay. Yabay, sadi wa ginan sadik ama, it so-long masilaw wan, nalindog sangko atobangan, ³¹ iglwang, Kornilyo, is Diyos igdog im manga

darangin, igbaya yadig lag hyamo manga natogbong. ³² Ha fasabangan in Simon Pidro sas banwa Hopi, hanya maoliyanan sat sangay Simon balay, sas gobang dagat, ka Simon kagfafiyan anit baka fakaligon. ³³ Yakanga ho nasogo wa dagos ha hyamo. Salamat, ha ngap inbangkad wa ngay. Kati mi fagayo istay wan matifonan san Diyos faglagan kaarakitay tomalinga hyamo, haw nogtolto ha hyami kagfon intam it fwayongon. ³⁴ Ginyas Pidro igfwayong kitay, Ho bago di natwa fiya fiya kitay is Diyos idwa ha fagfiliyon taw, mangharaw. ³⁵ Ka manga katanog hanya hanggan gogali yadi fiya, maangay han Diyos nyawa ginda fag layonan taw. ³⁶ Ham nadog in Diyos natogon hampang has manga taga Israil nogfadog ka Fiya fag Barita no kinday tam noglag kahowayan nomsadi san Kiristo Hisos, hanya kagfon fagayo fagayo. ³⁷ Ham natwa wan no kana kan-anod sas sakop Hodiya sadi wak dahonya, gis Galiliya tonya no nafabago, giwan Hwan igfaadal hasagfatogna baliwa. ³⁸ Ham twa wan no kinday is Diyos nafatohoyan kitay is Hisos taga Nasarit ngay it natogon Famawi, maskin nadisag hanyat Falad Maliyaw, hanggan it kadonongan. Maskin is Diyos sawa hanya, it manga naibolon kafiyaon. Hanya, nyawa hadak nalahaw, nafafiya fagayo kan Fandaya nafahorihan. ³⁹ Hyami wa mata lagan it manga naibolon fagayo sas fakadaholan banwanan Hodyo hanggan sas banwa Hirosalim. Ta nafapako di ngap hanya, nafasakbit sas nafatimbangan hayo. ⁴⁰ Dapat ay, sas fatolo fag sirang, is Diyos nafaboyag ya hanya, ginya nafalag hanya has taw, ⁴¹ idya has fakaaywanan, hayapdi hyami kan Diyos manga nafili gis hyabi, kaarakitay hami faorongon hyami mata lagan. Ha hyami is Hisos nogsayowan kwan, manga ginom, hanya nonboyag ya domwag. ⁴² Is Diyos natogon ha hyami kitay mi fag tomoltol hanggan fag faorongon kawas Hisos kan Diyos nafatalaga ka fangabaya has manga taw, nyawa ka manga boyagan yapdi, nyawa ka natay hyabi. ⁴³ Tonya wa kan Diyos manga fangampang faglwangon fagayo kitay, nyawa faktaw kamtiwala hanya, imliyam it manga naogali dwat, ta nogsyag in Hisos ngayan. ⁴⁴ Is Pidro idya katabo kampung, ka Maliyaw fag Falad dagos wa nadokson has fagayo kagtalinga hanya. ⁴⁵ Kan Pidro manga taban Hodyo ka danwan tiwala, indolaw wan ta no nalag ka Falad Maliyaw inlobos yadi has manga Hintil. ⁴⁶ Tagdog yadi ka manga Hintil kampung manga sanglitan madolaw, hanggan igfasayagdog han Diyos. Yakangas Pidro iglwang, ⁴⁷ Kito yadintam ka Maliyaw fag Falad inlobos yadi has taw. Fakta fag taw nangos, ham gayfan, ka bomando kaarakitay to fag manga taw idwam toguna? ⁴⁸ Ginyas Pidro nalwang, Fatognaan wan to fag manga taw san Kiristo Hisos ngayan. Ginya madi taglwang kitay is Pidro nangos fag domogay yapdi sinya no kayodak yabi.

11 Yakanga ka manga Fandiya-Barita hanggan ka manga fadwasay sas sakop Hodiya nadog kitay ha manga Hintil katiwala yadi wa han Diyos hampang. ² Ginya da Pidro no nalahaw has bohid, has Hirosalim, ka manga fadwasay ka mahogod yapdi has ogali Hodyo, nangato in Pidro. ³ Taglwang ha hanya, Kana haw no mailihodan yadi has nwa fag manga Hintil kadwan toli? Hagsayo yadi was taw ta no kwan. ⁴ Dapat is Pidro natoltol has taw gis fabagowanan kat lagan fagayo. ⁵ Is Pidro igfwayong kitay, Itfagonan, aho no sas banwa Hopi, aho ha lagan madolaw gin Diyos. Aho nogdarangin, kangko lagan bilang wa kitos sadik homot dahol, matagbongan, intonton gis tongod hangko akbang. ⁶ Ho nabantay wa fiya fiya. Hoglag sinya ha akwa wan fagayo fagayo fag manga hayopan kaglahaw, hanggan ka gilafang sas baba daga, idwa ha yod, hanggan ka manga manok kaglayog sam tongod. ⁷ Ginya madi ho nadog sadik hasnog iglwang kitay, Kalibang Pidro, fag fahatay wa a, fakwan wan. ⁸ Dapat hoglwang, Angko Fon, nyawa kindawan hodwa kasaya. Ngadi sadi ginan hodwa ha nahwan kantam manga fagbaybayon. ⁹ Ginya ho nadog ya domwag ka hasnog gim tongod iglwang kitay, Fag idwag lwang fagbaybayon kan Diyos nafabali maangay. ¹⁰ Ka bilang wa homot tolo ginan intonton. Yakangan fwali ya ham tongod. ¹¹ Gis nanya fag kasohodan fiya fiya, tolok ama kasta nasogo hangko gis banwa Sisariya indasog sangko fagoliyanan fag balay. ¹² Ka Maliyaw fag Falad nalwang hangko, Haw fag idwag fadogayon, tahinan wastaw. To fag onom ik fadwasay natahin yadi wangko. Ginya madi mi nasakbaw han Kornilyo basad balay. ¹³ Is Kornilyo nafwayong yadi ha hyami kitay, itfagonan hanya nalag in Diyos anghil sadi malindogan sat basad balay, igfwayong hanya, Haw sogowan manga taw has banwa Hopi, fasabangan in Simon Pidro. ¹⁴ Hanya fomwayong ha hyamo no kinday haw, hanggan sadi wak kayonya sam balay, nombawi. ¹⁵ Ginya madi, araw, hogfabago wa ongay igtoltol. Ka Maliyaw fag Falad dagos wa nadokson has manga taw, kito yadi nogdokson hyabi hantam. ¹⁶ Ho natohod yadi kantam Fon fwayong kitay, Sas danom is Hwan nogfatogna manga taw, dapat ay, sas Maliyaw fag Falad ham nomtogna aban. ¹⁷ Is Diyos nogdisag yadi has taw kito yadi kat nadisag hantam hyabi, tam nontiwala hantam Fon is Kiristo Hisos, faktaw aho, ham gayfan, kaarakitay bomando in Diyos ibolon? ¹⁸ Yabay, ta nadog di ngay kitonya, ta dagos wantohas gidolog in Pidro. Yabay, tagfasaya yadi wagdog han Diyos. Taglwang, No kitonya mangharaw, is Diyos igdisag has manga Hintil kitay, ta fag somoyo yadi kaarakitay imbawi wan. ¹⁹ Giwasta nafahatay in Istiban, ha mangag fahoriyan ka mangam tiwala, yakanga ta nanarowayan wan. Tiban dasog has sakop Finisya, tiba has foyo dagat Sipri, tiba has banwa An-

tiyokya sas sakop Siriya. Ta nabarita in Diyos hampang nyawa siday kandasog, dapat has manga Hodyo lamang. ²⁰ Ginya madi ha mangam tiwala, manga taga banwa Sirini sas foyo dagat Sipri, indasog has Antiyokya. Ta nogfaadal, ha yadis manga Girigo ka Fiya fag Barita kawa han Hisos intam Fon. ²¹ Intam Fon karigonan sawas taw. Yakanga kaaywanon wan kantiwala, igsyag hantam Fon. ²² Ginya madin Diyos Tifonan sas Hirosalim, no nadog kitonya, nasogo in Birnabi has banwa Antiyokya. ²³ Is Birnabi nondasog sinya, nabaya waglag kitay in Diyos kafiyan sawas taw. Kawas Birnabi fiya fag taw, hanggan ka Falad Maliyaw sawa hanya sadi wak dahonya, marigon yadi nogsyag hantam Fon, yakanga natogon has taw kitay, ta fag fadagos orongan hantam Fon, ta fag idwag fagomon. Ka manga taw kantiwala sinya in-aywan wan. ²⁵ Ginya madi yabay, is Birnabi hawas banwa Tarso, igsayak in Sawlo. ²⁶ No nalag in Sawlo, nafaofod hanya has banwa Antiyokya. Bog-os wa sik fangaraw ta no gofodan han Diyos Tifonan sinya, igfaadal has fakaaywanan. Sinya sas banwa Antiyokya ka manga taw no nafabago nangayan in Diyos manga katogbong, In Kiristo fag manga taw. ²⁷ Gis nanya fag masohod ha akwa yadin Diyos manga fangampang indasog gis Hirosalim has banwa Antiyokya. ²⁸ Insadi is Agabo. Kawa ka Falad Maliyaw karigonan sa hanya, hanya danwa nafatagak has taw kitay sadi wak baba daga aban imlonos. Tonya fag lonos in-anod ngay in Kalawdiyo fag kasohodan gorongan sas sakop Roma sadi wak dahonya. ²⁹ In Hisos manga katogbong nagkasadiyan ta fadiya togbong has manga fadwasay ka mabanwanan sas Hodiya no daho day kasta fagsyaganon. ³⁰ Kitonya wa nga kan-anod. Da Birnabi da Sawlo nadiya wasta manga togbong has manga fagtahinan Tifonan sas banwa Hirosalim.

12 Gis nanya fag manga masohod, is Hirodis, ka gorongan sas sakop Hodiya, nafagamat is taw tiba san Diyos Tifonan kaarakitay fahoriyan wan. ² Hanya nafalifong in Santyago liyog, in Hwan fadwasay fag Santyago. ³ Ginya madi, is Hirodis no natwa kitay manga Hodyo igbayat naibolon, nadagos nasogo manga sondalo kaarakitay gomamat man in Pidro. Gis nanya fag masohod, ka manga Hodyo igtohod ka Fanohodan Tinapay Mayangfis. ⁴ Ta no nagamat in Pidro ta nafaporiso hanya. Ofat ik layonan sondalo igtarobosan igbantay hanya, myasa ofat sa sadik layonan. In Hirodis fangayofan fabangkad in Pidro has fakaaywanan taw kaarakitay mangampangan nonsagaya wa ka Fanohodan Nagsagayan. ⁵ Yakanga ha manga sondalo igbantay yapdin Pidro basad porisowan, dapat ay, in Diyos Tifonan dagos wagdarangin mahogod han Diyos kawa hanya. ⁶ Ginya madi, kati wa fag basad yabi kitay, nomsirang araw is Hirodis nangos fabangkad in Pidro has hampangan, is

Pidro matoyogan, it gamat matarabingan tarikada has sondalo baliw baliw. Ha akwa yadi manga sondalo matanodan dayo sakbawan porisowan. ⁷ Sadi odi ginan in Diyos anghil inlag sinya, nayawa fiya fiya basad lingoban ogbot ogbot. Ka anghil natingfi in Pidro tagyangan nafafolaw hanya, ginyag lwang, Kalibang, ha fag kabangon wan. Ka manga tarikada inlohas wan gin Pidro gamat. ⁸ Ginya ka anghil iglwang, Fag fafiyowan im rotay, solongan im lapak. Ginyas Pidro intanog wan. Ka anghil nafwayong ya domwag, Fag solong wam rotay aba, ginya ha fag tahin wangko. ⁹ Is Pidro nadokson wan gis porisowan, naoyan ka anghil, dapat idya twa ngatay orongan ha anghil igfangolo hanya, gayfan hanya ngandig tagimfan. ¹⁰ Ta nontolas manga dowak layonan sondalo kagbantay sinya, tandasog has fanahop baol sas sakbawan aladan has sokayan. Ka fanahop inboklas wa kitonya, yakanga ta nadokson wan. Ta no nadalan ha sadik karsada, ka anghil inliyam wa dagos. ¹¹ Ginya madis Pidro natwa wa kitay bonwa tagimfan. Yakangag lwang, Ya mangharaw, orongan wan angko nadalanan. Is Diyos nasogot anghil kaarakitay bomawi angko gin Hirodis hanggan gis manga mahori ka manga Hodyo bato ibolonon hangko. ¹² Is Pidro no naayfan fiya fiya, hawan Mariya balay, kan Hwan ina, ka Hwan kasta fangngayanon yadi is Markos. Kaaywanon fag manga fadwasay sinya matifonan igdarangin. ¹³ Is Pidro no nataraktak sas fanahop sakbawan, sadik sogowan dayaga, is Roda, nabantay no faktaw kagtaraktak. ¹⁴ Is Roda nahilala wa kitay, is Pidro mangharaw ka kampang sinya. Kawas Rodag baya wa dahol, idya naboklas ka sakbawan, nadalandan yapdi has basad balay, iglwang kitay, Is Pidro is nwa wan, dayo balay. ¹⁵ Taglwang has dayaga, Ha ngandi kapaong. Dapat ka dayaga garonganon igfwayong, Sinya wan. Yakanga taglwang, Ngandayo in Pidro odi falad tonya. ¹⁶ Dapat is Pidro mahogod wagtarakatak yapdi sas dayo balay. Ta no naboklas wa ka sakbawan, taglag is Pidro wa ngay, yakanga tandolaw wan. ¹⁷ Dapat is Pidro igfaaman kitay, Ham ha gawang gawang. Ginya madis Pidro natoltol is taw no kinday is Diyos nafalfas hanya gis porisowan, nalwang, Fwayongan han Santyago hanggan hantam manga fadwasay tiba. Ginyas Pidro nalahaw wan, hawas iba banwanan. ¹⁸ Nonsirang, ka manga sondalo di kahodhorian wan. Ta garintawan kitay no hadawas Pidro? ¹⁹ Is Hirodis nafasayak it manga sondalo in Pidro, dapat tadwa ha lagan. Yakanga ta naintaw fiya fiya ka manga bantay. Ginyas Hirodis nafasognod kitay fahatayan wan ka manga bantay poriso. Ginya madis Hirodis nalahaw wan, hawas lwad has banwa Sisariya, nandogayan sinya. ²⁰ Gi yapdis fagonan, is Hirodis dogay wa kaisog has manga taga banwa Tiro, manga taga banwa Sidon. Yakanga tansadi wat fangayofan kitay ta omakbang han Hirodis

kaarakitay imfafiyanon ya. Ta nahampang han Balasto kagbahala in Hirodis balay kitay, Ofodan nangos hami han Hirodis kaarakitay mimfafiyanon ya, maskin ka manga taga Tiro hanggan taga Sidon nogbol it manga fanganon, gin Hirodis baba daga. ²¹ Nondasog ista togonan fag sirang, is Hirodis nasolong it rotay, kalag wa kitay ha kangayanan, ginya natokaw sat tokawan fanokawan gorongan a, natoltol has taw fiya wa dongon. ²² Manga taw igharokyanon wan, taglwang, Bilang wa sadik diyos ka kampang ti, bilang nangos bonwa taw. ²³ Gis nanya yadi in Diyos anghil dagos wa nafaiktan in Hirodis, maskin hanyag fahap in Diyos kangayanan. Hanya naolodan a, hanggan wa natay. ²⁴ Dapat ay, in Diyos hampang inlangba sasta manga basad fangayofan, hanggan wa naskat sadi wak dahonya banwanan. ²⁵ Nontabot ibolon sas Hirodalim, da Birnabi da Sawlo nwali wan has banwa Antiyokya. Ta nafaofod yadin Hwan, kasta fangngayanon is Markos.

13 Gis nanya fag manga masohod ha akwa in Diyos manga fangampang hanggan mangag faadal san Diyos Tifonan sas banwa Antiyokya sas sakop Siriya. Ka mangan aktom sinya da Birnabi, da Simyon kasta fangngayanon is Nigro, da Losyo taga banwa Sirini, da Sawlo, da Manain. Da Manain da Hirodis, ka gorongan sas Hodiya, no anahan yapdi, fagaba gofodan hyabi. ² Ka Tifonan nogfasayagdog in Diyos, hanggan idwa kwan hanon kaarakitay mandarangin, ka Falad Maliyaw nafwayong has taw, Fabokodan inda Birnabi da Sawlo hangko, kaarakitay ta fatonglos ka ibolonon kangko nafatohoyan ha hanya. ³ Ginya madi, tadya nangwan hanon a, nandarangin mahogod, ginya nafwalid it manga gamat has dowak ama baba alfoyo, ginya ta nafalahaw inda Birnabi da Sawlo kaarakitay mamarita has manga taw. ⁴ Yakanga ka Falad Maliyaw igsogo inda Birnabi da Sawlo kaarakitay mamarita. Tandasog has lwad has banwa Salosya sas gobang dagat. Ginya ta nasahay baba dagat hawas foyo dagat Sipri. ⁵ Nondasog has banwa Salamina sinya, ta natoltol in Diyos hampang sas manga fanimbaan Hodyo. Is Hwan Markos ista ofod, inda Barnabi katogbong. ⁶ Ta nadagos wa nalahaw gi sadik gobang dagat has banwa Papos sas bali fongfongan daga. Ta nalag sinya sadik ama Hodyo, is Bar Hisos, ka lipatan lipatan. Hanya sadik Hodyo kagfaniring kitay hanya in Diyos fangampang. ⁷ Is Bar Hisos in Sirgiyo Pawlo ka gobirnadador fakilalaon. Is Sirgiyo Pawlo sadik taw fiya it isip. Hanya nafatawag inda Birnabi da Sawlo maskin kasayagdog in Diyos hampang. ⁸ Dapat ka lipatan lipatan, is Ilimas it ngayan sas fangampangan Girigo, igbando di ka Gobirnadador kaarakitay idwam tiwala. ⁹ Dapat is Sawlo, kasta nangayan yadis Pablo, kawa ka Maliyaw fag Falad sawa hanya sadi wak dahonya, igsinayan wat mata han Ilimas, ginyag lwang, ¹⁰ Haw in Fandaya odi anak. Haw

iglaban ka fiya fagayo. Sonson wa dwat, madaya ya ngadim manga ibolon. Kana mayon haw no fagabag fabarikwang ka fakaoronganan kawa han Diyos? ¹¹ Lag ngay, kati araw, fadosa wa hyamo. Is Diyos fabota wa hyamo mata, dogay hadwa lomag ka yawa myanit. Is Ilimas dagos wa nadog bilang wa ha sadik linyabo masding nataklob it mata. Iglahaw gayohapan odig ligaw no faktaw ka gomamithanya. ¹² Ka Gobirnadur no nalag kitay is Ilimas inbota wan, hanyan tiwala wa han Diyos, hanggan indolaw wagdog ta nogfaadal kagfon intam it barita. ¹³ Ginya madi da Pablo nasahay has baba dagat, in-ginan gis banwa Papos. Tandasog has banwa Pirgi, sakop Fanfilya. Dapat is Hwan Markos naobon is taw, nwali has Hirosalim. ¹⁴ Da Pablo da Birnabi nafadagos it lahawan hanggan wandasog has banwa Antiyokya, sakop Pisidya. Ka Sirang Kafahowayan nondasog, da Pablo nasakbaw has basad fanimbaan Hodyo, intokaw wan. ¹⁵ Ka manga Hodyo no namasa gin Mwisid manga togon hanggan gin Diyos manga fangampang sorat, ka mangag bahala sas tifonan Hodyo sas fanimbaan, iglwang handa Pablo, Manga fadwasay, ham no ha bato fwayongon has manga taw, fag fwayong wan. ¹⁶ Ginyas Pablo nalindog, nafaaman is taw kitay ta fag idya gawang. Ginya nalwang, Ham in Israil manga hasokfonan, hanggan ka manga Hintil istay kagsimba yadi han Diyos, ham fag matalingan fiya fiya. ¹⁷ Is Diyos, kantam tifonan Israil fagsimbaon, ka danwa nafili intam manga hafofowan. Ta no sayapdis sakop Ihipto is Diyos nafabali intam manga hafofowan sadik layonan taw kaaywanon. Ginya madi, maskin marigon wa dahol dahol is Diyos, hanya nafalahaw is taw gis Ihipto. ¹⁸ Nyawadwa fiya bangan ista ogali, is Diyos naagwan-ta naano yapdis taw ofat ik safolok fangaraw ta no basad fakahyabogan. ¹⁹ Ginya madi, is Diyos nontabo wagfadwat ka fitok layonan taw sas Kanaan, hanya nadisag man hantam manga hafofowan ista banwanan. Gi wasta nalin has Ihipto, ²⁰ hanggan ta no nwali ya has sakop Kanaan hanggan nadaog it manga kalaban, gamtanan 450 fangaraw it kadogayan. Ginya madis Diyos nadisag ka manga fangabaya has taw balin Diyos fangampang is Samwil. ²¹ Ginya madi intam manga hafofowan no nasagad gorangon gin Samwil, is Diyos nafaangay kitay fag is Sawlo, in Kis anak, in Binhamin hasokfonan, kambali ista gorangon ofat ik safolok fangaraw. ²² Is Diyos no nabol in Sawlo kangayanan, nafabali man in Dabid ista gorangon. Kiti in Diyos faorongon kawa han Dabid. Is Diyos iglwang, Hogbaya waglag in Dabid, in Hisi anak ogali. Talaga wamtanog angko manga kafangayofanan fagayo. ²³ Ginya madi, gi yadin Dabid hasokfonan, is Diyos nadisag han Israil hasokfonan kat natogon-Famawi, kawas Hisos. ²⁴ Is Hisos nodyag toltol has taw, is Hwan namarita sadik dahonya banwanan Israil kitay, ta fag

somoyo wan, fag dayo ista manga ogali dwat, ginya fag fatogna wan. ²⁵ Is Hwan no kaakbang wa katabo igbarita, naintaw has taw, Faktaw aho, ham gayfan? Bonwa aho kan Diyos-natogon-Famawi, dapat ha kadasog wan ka omoyan sangko ginanan. Ho kaya ngadig lohas it famaganit lapak. ²⁶ Angko manga fadwasay, kan Abraham yadi hasokfonan, hanggan manga Hintil kagsimba han Diyos, hawantam kandiya to fag barita no kinday tam nombawi. ²⁷ Ka manga taga Hirosalim, hanggan ista manga fagtahinan, idwa natwa nadog kitay hanya wa ka Famawi. Tadwa natwa wagdog kan Diyos manga fangampang nafwayong gona, kasta fagbasaon fagayo fag Sirang Kafahowayan. Dapat taw mandi ka nafatonglos it nabasa no nafatohoyan kitay fahatayan in Hisos. ²⁸ Nyawa kasta fagsombongon idya fiya fahatayan, ta nasagad wa ngap gin Pilato kitay fahatayan wan in Hisos. ²⁹ Ta no nafatonglos wa fagayo fag manga bagay kansorat sas Kasoratan kawa han Hisos, ta nabol wat habilogan gis nafatimbangan hayo a, nafwalid basad lohib. ³⁰ Dapat ay, is Diyos nafaboyag ya domwag hanya. ³¹ Ginya madi, aywan fag manga sirang is Hisos nafalag yapdit sadili hat manga ofod ka naofod hanya itfagonan hanya noglahaw gis sakop Galiliya, hawas banwa Hirosalim. Tonya fag manga taw kagfaorongon kati has manga taga Israil. ³² Kati mistay wan kaarakitay fomwayong ha hayo ka Fiya fag Barita in Diyos natogon hantam manga hafofowan, ³³ kan Diyos nafatonglos hantam no nafaboyag ya in Hisos, kito kansorat sas fadowa fag ambahan, Haw angko wa anak, Aho im Ama. ³⁴ Kawas Diyos nafaboyag ya domwag hanya kaarakitay idwam dasog kaboyok, is Diyos iglwang kitay, Ho domisag ha hyamo ka maliyaw fag manga kafiyon Kangko nafatohoyan han Dabid. ³⁵ Nafwayong yadi sas iba fag ambahan, Hadwag faangay kitay is Maliyaw imboyok. ³⁶ Kawas Dabid nontabo wa gibolon in Diyos fakasayaon hyabi, kat manga kasohodan no boyagan yapdi, hanya natay wan, inlobgob sat manga magorang akbang, it habilogan inboyok wan. ³⁷ Dapat kan Diyos nafaboyag ya idwan boyok. ³⁸ Manga fadwasay, ham fag twagdog kitay, kati nabarita wa ha hayo kitay, giwan Hisos naagwanta, intam manga naogali dwat imliyam wan, ³⁹ hanggan gi wa hanya fagayo kagsyag hanya, intam manga naogali dwat imliyam wan, nyawa hyabi tam idwa syagan igfaliyam no katanog in Mwisid togon. ⁴⁰ Yakanga ham fag matagahan kaarakitay idwa hamlag sa hayo kito kan Diyos manga fangampang nafwayong kitay, ⁴¹ Ham ka mangag yod, lag ngay, Ham imdolaw wa aban, ham hawas fadosaan. Aho omibolon sadik madolaw fag bagay ham nostay yapdi, Nyawa kindawan ham idwa katiwala, nyawa tagtoltol wa hayo. ⁴² Da Pablo da Birnabi, no kadokson wa gis fanimbaan Hodyo, ka manga taw nafwayong kitay, Ham aban fanoltol ya to fag manga

bagay sas domwag fag Sirang Kafahowayan. ⁴³ Ta nontabo wagtoltolan, aywan fag manga Hodyo orongan, hanggan manga Hintil kanbali manga Hodyo, natahin wanda Pablo da Birnabi. Da Pablo natoltol has taw nafwayong, Fag fadagos gogali ka maangay han Diyos malooy fag kahowayan. ⁴⁴ No domwag wa Sirang Kafahowayan, fagayo fag manga taw sinya fag banwa nanifonan kaarakitay domog in Diyos hampang. ⁴⁵ Dapat ka manga fagtahinan Hodyo kaingli waglag inda Pablo nogtoltol, maskin kaaywanon fag manga taw katiwala wan. Yakanga ta nafabohag wan, hanggan nafadwat igdog in Pablo. ⁴⁶ Dapat da Pablo da Birnabi nafwayong marigon, Ka fiya hami fag fomwayong yap in Diyos hampang ha hayo manga Hodyo. Dapat kawa ham nadayo in Diyos hampang, ham kagfathoyan kitay ham idwa maangay has haboyagan idwa ha katabowanan. Gis kati ginan mi aba hawas manga Hintil no bomarita. ⁴⁷ Kito kagfon intam nogfasognod ha hyami kitay, Ho nafathoyan hyamo bilang salong has manga Hintil Kaarakitay bomarita ka Famawi hanggan has kafongfongan daga. ⁴⁸ Ka manga Hintil kabaya wagdog inda Pablo nafwayong, igfasayagdog kagfon intam it hampang. In Diyos manga nafathoyan has haboyagan idwa ha katabowanan, intiwala wan. ⁴⁹ Ginya madi kagfon intam it hampang naskat wa sinya, sadi wak dahonya banwanan. ⁵⁰ Dapat ay, ka manga fagtahinan Hodyo nafasognod has manga ina masimbaon han Diyos, kasta manga fakilalaon sas banwa, hanggan ista manga fagtahinan fag manga ama kitay, ta fag fahoriyan inda Pablo da Birnabi. Ta nasogo wa ginya fag banwanan. ⁵¹ Ginya madi ka dowak ama nafadagdag ka fogis daga gista manga bitis, bilang igfalag kitay ka taga sinyag dayo in Hisos, ginya hawas banwa Ikonyo. ⁵² Dapat ay, in Hisos manga katogbong sas banwa Antiyokya, sakop Pisidya, kasolong wa dahol dahol, hanggan ka Maliyaw fag Falad sawas taw sadi wak dahonya.

14 Kitonya yadi kasta naibolon sas banwa Ikonyo. Da Pablo da Birnabi nasakbaw has basad fanimbaan Hodyo, kafiyaon kadog ta nogbarita. Yakanga aywan fag manga Hodyo hanggan Girigo katiwala. ² Dapat ka manga Hodyo ka dayo katiwala, nafasognod ka manga Hintil, nafadwat igdog yadi kaarakitay ta domayo ka mangam tiwala. ³ Da Pablo da Birnabi nadogay ogbot sinya, igtoltol marigon has taw kawa hantam Fon baliwa. Intam Fon nafaanod yadi kitay orongan kasta nafwayong kawa hat kahowayan. Nafasyagan yadinda Pablo da Birnabi gibolon manga falagon madolaw. ⁴ Dapat ka manga taw inbali dowak layonan sinya fag banwa. Ka sadik layonan balis manga Hodyo, ka sadi balinda Pablo. ⁵ Ginya madi ka manga Hintil, manga Hodyo tiba, hanggan ista manga fagtahinan insadi kitay, ta mamahoriyan ka manga

Fandiya-Barita hanggan wa bomintok. ⁶ Dapat ka manga Fandiya-Barita nadog di ngay, ta nalibya wa dagos has banwa Listra hanggan has banwa Darbi, sas sakop Likaonya, hanggan sas manga ligongan. ⁷ Ta nafaadal yadi sinya ka Fiya fag Barita. ⁸ Gis nanya fag masohod, sadik ama sas banwa Listra idwa syagan iglahaw, kawa gis ogbot ginan danwa fihong. ⁹ Hanyag talinga is Pablo nogtoltol. Is Pablo igdoro has ama fihong, nasarom kawa hanya kasyag kitay hanyam fiya. ¹⁰ Yakangas Pablo nahampang marigon, nalwang, Ha fag lindog maslong. Ka ama nalokso, ginyag lahaw ngay. ¹¹ Ka fakaaywanan no nalag in Pablo naibolon, ta nanarawagan sas fangampangan Likaonya, iglwang, Manga diyos inbangkad hantam ha habilogan taw. ¹² Ta nafangayan in Birnabi is Siyos fag diyos, hanggan ta nafangayan yadin Pablo, is Hirmis fag diyos, maskin hanya wa kagtoltol. ¹³ In Siyos fag diyos fanimbaan balis dasogan banwa. Kasta fagalan han Siyos, no nadog kitay hanbangkad, nagoyod manga todo baka, ha ono borahan, has dasogan banwa, ista fagsogbaon fangafiyan handa Pablo nangos. ¹⁴ Dapat da Birnabi da Pablo natwa di ngay ista bato ibolonon, ta naragyang it sadili manga balokas, nadalandan hasta fagbokngan, natawag marigon, iglwang ¹⁵ Ham manga ama, fag idwa gibolon kityamo. Hami taw yadi kito hayo. Hamig faadal lamang ha hayo ka Fiya fag Barita kaarakitay ham domayo wan ka kitonya fag manga bagay, kadwa ha kahologan. Ham fag kafwali ya ka has Diyos boyagan, ka nahalig banwa, hanggan daga, hanggan dagat, hanggan fagayo ka maoliyanan sinya. ¹⁶ No hyabi di is Diyos igfabayaan fagayo fag manga layonan taw, nyawa gibolon no kana kat sadili fakasayaon. ¹⁷ Dapat nyawa kitonya, hanya danwag disag hosto kagfahilala hantam in Diyos, hanggan igfaorongan kitay hanya mahoway hantam, kawa hanya mandi kagfahwayan gim tongod, kagfabohad aywan sas fanganion, kagdisag manga fanganon kaarakitay igfahapsog intam, hanggan kagfasolong igdog intam manga fangayofan. ¹⁸ Nyawa kitay da Birnabi da Pablo kampang kindawan kitonya, ta ganong wadwa nasyagan nabando manga taw kaarakitay idwag sogba fangafiyan ha hanya. ¹⁹ Dapat ha manga Hodyo naoyan yadi inda Pablo gis banwa Antiyokya sas sakop Pisidya, hanggan gis banwa Ikonyo. Ta nafasognod ka manga taw hanggan nabintok in Pablo. Ginya madi yabay, ta nagoyod hanya has dayo banwa, maskin ta gayfan hanya natay wan. ²⁰ Dapat ay, in Hisos manga katogbong no nasafongan in Pablo, is Pablo dagos wanlindog ya, infwali ya, hayas basad banwa. No bago marom is Pablo naofod in Birnabi hawas banwa Darbi yabay. ²¹ Ginya madi da Pablo da Birnabi no natoltol ka Fiya fag Barita sas banwa Darbi, hanggan nafabali aywan fag manga taw in Hisos manga katogbong, tanfwali ya has banwa Listra, has banwa Ikonyo hanggan

has banwa Antiyokya, sas sakop Pisidya, ²² igfarigon sinya in Hisos manga katogbong fangayofan. Igtogon yadi kitay, ta fag fadagos wa katiwala orongan, iglwang yadi kitay, Tam domog yapdi aywan fag mahori bago di masog han Diyos banwanan. ²³ Ta nafili manga fagtahinan kagbahala han Diyos manga Tifonan fagayo. Ginya yabay, nontabo wagdarangin, idwa nangwan hanon, ta nafaano ka manga Tifonan hantam Fon kasta fagsyagon. ²⁴ Ginya ta nadalan has sakop Pisidya, yakanga ta nadasog has sakop Panfilya. ²⁵ Ta no natoltol in Diyos hampang sas banwa Pirgi, ta nalahaw has lwad, has banwa Atalya. ²⁶ Ginya fag banwa ta nasahay baba dagat, infwali ya has banwa Antiyokya, sas sakop Siriya. Gistay fag Antiyokya hyabi da Pablo da Birnabi no nafabago it ibolon igbarita giwasta nafaano ginan inda Pablo hantam Fon kafiyan. Kati in-anod wan kat manga ibolon kitay intonglos wan. ²⁷ Da Pablo nondasog wan, ta nafatifon ka manggan tiwala sinya fag banwa. Ta natoltol kan Diyos naibolon fagayo ginda Pablo, hanggan no kinday is Diyos nafaangay kitay manga Hintil fiya yadi nomtiwala. ²⁸ Da Pablo nadogay nangofodan in Hisos manga katogbong sinya.

15 Dapat ay, ha manga fihin ik taw nadasog has banwa Antiyokya, sas sakop Siriya, gis sakop Hodiya. Tagfaadal has manga fadwasay kitay, ham nodwag fatoli hayo, kito kan Mwisis togon, ham idwam bawi. ² Da Pablo da Birnabi nalaban has taw, inbali wa gagran kawa noglabanan kitonya. Yakanga ista nagkasadiyan, ta somogo inda Pablo da Birnabi hanggan manga fadwasay tiba gis Antiyokya has Hirosalim, kaarakitay mangampangan has manga Fandiya-Barita sinya, hanggan has manga fagtahinan kawa tonya wa fag bagay. ³ Ka Tifonan nasogo tonya fag manga taw, yakanga ta no nadalan has sakop Finisya hanggan sakop Samariya, ta nafadahit no kinday ka manga Hintil intiwala yadi wan. Ka manga fadwasay sinya nabaya wa dahol igdog. ⁴ Ginya da Pablo nondasog has Hirosalim, ka manga Fandiya-Barita, hanggan ka manga fagtahinan, hanggan sadi wak dahonya Tifonan nabaya wa dahol dahol igdog. Da Pablo natoltol fagayo, nyawa kana, kan Diyos naibolon ta nogbarita. ⁵ Dapat tiba Farisiyo kantiwala nafwayong yadi, Ka manga Hintil kamtiwala fag imtoli wan. Ham fag fwayong kitay ta fag imtanog wan in Mwisis togon. ⁶ Ka manga Fandiya-Barita hanggan manga fagtahinan nanoltolan yapdi, ta nangayfan yapdi to fag mahori. ⁷ Ginya madi ta noglabanan dogay las hampang, is Pidro nalindog, nalwang kitay, Manga fadwasay, tam twa wa kitay, itfagonan, is Diyos nafili angko, kaarakitay gingko bibig ka manga Hintil fag domog ka Fiya fag Barita hanggan imtiwala yadi wan. ⁸ Is Diyos kaglag santam manga basad fangayofan nafaorongan kitay, hanyag tanggap yadi ka manga Hintil, hanya no

nadisag it Maliyaw fag Falad has taw, kito yadi no nadisag hantam, is manga Hodyo. ⁹ Pariho is Diyos nogbantay has manga taw hanggan hantam. Is Diyos nafalinay yadista manga fangayofan maskin tagsyag yadi han Hisos in Diyos-natogon-Famawi. ¹⁰ Ya kana mayon tam nogsolay in Diyos, ham gayfan? In Mwisis togon tiba hantam, nyawa tam, nyawantam manga magorang, tam idwa nasyagan nafaanod. Kana mayon tam nogfahoriyan tonya has manga Hintil kamtiwala? ¹¹ No kinday tam nonbawi tam nontiwala, kawa gin Hisos intam Fon malooy fag kahowayan, ta kitonya yadi nombawi. ¹² Fagayo tantohas wagtoltolan, basta odi matalingan inda Birnabi da Pablo nogtoltol in Diyos naibolon madolaw has manga Hintil ta nogbarita. ¹³ Da Pablo nontabo wagtoltol, is Santyago man ka kampang kitay, Manga fadwasay, ham fag matalingan man angko. ¹⁴ Kati yadi haraw, is Simon Pidro no natoltol no kinday is Diyos no nafatawag ka manga Hintil bago bago, kaarakitay tibak Hintil imbali yadit sakop, ¹⁵ tonyag faanod in Diyos manga fangampang fagfwayongon hyabi, noglwang kitay, ¹⁶ Ginya madi ho kafwali ya, Farigon ya in Dabid oliyanan kandwat, Ho fatobo ya, falindog ya tonya ¹⁷ Kaarakitay tiba taw lomigaw intam Fon, Kawa fagayo fag layonan taw angko yadi sakop ¹⁸ Kitonyan Diyos fwayong kagfathoyan tonya fag manga bagay, gi yapdis hyabi. ¹⁹ Yakanga, angko fangayofan nangos, tam fag idwag fahoriyan ka manga Hintil ka kaakbang han Diyos. ²⁰ Dapat, tam fag somorat yap man has taw ka fiya, kitay, ta nangos fag idwa kwan nyawa kana fag bagay kasta nadisag has labang taw, fag idwag fabayowan, fag idwa kwan ka hayopan ka natay kantagbong, fag idwa yadi kwan folot. ²¹ Maskin gi yapdis hyabi ta fagaba wagbasa in Mwisis manga togon sas manga fanimbaan Hodyo sas Sirang Kafahowayan. It manga hampang indog yadi has fagayo fag manga banwa. ²² Yakanga ka manga Fandiya-Barita hanggan ka manga fagtahinan, hanggan ka Tifonan sadik dahonya, ista nagkasadiyan, fiya nogfili ka tibak taw kaarakitay tomahin inda Pablo da Birnabi has Antiyokya sas sakop Siriya. Ta nasogo inda Hodas, kasta faglwangon is Barsabas, hanggan da Silas. To fag manga ama ka manga fadwasay fagtahinan sas Hirosalim. ²³ Ka manga Fandiya-Barita nafadiya sorat has Antiyokya, kaglwang kitay, Hami ka manga Fandiya-Barita hanggan ka manga fagtahinan, mi gwas hayo, hyami manga fadwasay Hintil sas banwa Antiyokya, sas sakop Siriya, hanggan sas sakop Silisya. ²⁴ Mi nadog kitay ha akwa gi hyami Tifonan igfaagran hayo, dapat tonya bonwa hyami nasogo. Kasta manga nafwayong hayo, nafaadowan odi hayo. ²⁵ Yakanga hyami nagkasadiyan mi somogo ya ka tiba taw ha hayo. Ta omofod intam fagbayaon da Birnabi da Pablo, ²⁶ kadwa nahwangit it haboyagan maskin ta galwasi in Kiristo Hisos, kagfon

intam. ²⁷ Yakanga migsogo nga ha hayo inda Hodas da Silas kaarakitay fatwagdog hayo ka hyami bato lwan-gon gistay fag sorat. ²⁸ Maskin hyami nagkasadiyan ka Maliyaw fag Falad nafatwagdog hyami kitay, mi fag id-wag fahoriyan hayo no bonwa to fag manga bagay ka hyami fakasayaon orongan, ²⁹ kitay, ham fag idwa kwan nyawa kana fag manga bagay kandisag has la-bang taw, fag idwa kwan folot hayopan, fag idwa yadi kwan manga hayopan kantagbong. Fag idwa yadig fabayowan. Kafiyaon ham no bomaybay tonya fag manga bagay. Balinya lamang hyami sorat kati.

³⁰ Ginya madi ta nafalahaw wan inda Birnabi. Yakanga yabay, ta nondasog has banwa Antiyokya, sas sakop Siriya, ta nafatifon ka mangan tiwala. Ta nadisag has taw tonya fag sorat. ³¹ Ta no nabasa ka sorat, ka man-ga taga sinya inrigon yat fangayofan maskin tansaya wagdog. ³² Da Hodas da Silas in Diyos manga fangam-pang yadi. Aywan it nafwayong has mangam tiwala nafarigon ista manga fangayofan hanggan nafabali yadi maganit ta no katiwala. ³³ Gis nanya fag manga masohod ta nadogay yapdi ogbot sinya. Ginya madi ka manga taga Antiyokya nafaoli ya inda Hodas hasag-sogo is taw. Ka manga fadwasay nadarangin kitay, fag fiya it manga lahawan nangos. ³⁴ Dapat is Silas naay-fan kitay fiya hanya nomgoyan yapdi nangos sinya.

³⁵ Da Pablo da Birnabi nadogay yapdi sinya sas banwa Antiyokya. Aywan yadista manga ofod igfaadal hang-gan igtoltol in Diyos hampang sinya. ³⁶ Ginya madi, aban ogbot, is Pablo iglwang han Birnabi kitay, Tam nangos fag kafwali ya, tam manabang intam manga fadwasay has fagayo fag manga banwa kantam nafaadal intam Fon hampang hyabi. Tam mamantay ya no kinday ka manga taw sinya kati. ³⁷ Is Birnabi kasaya kitay mamaofod ya nangos in Hwan, kasta fangngayanon is Hwan Markos. ³⁸ Dapat is Pablo dayo wagtaban maskin is Hwan hyabi idwa nafadagos naofod hanggan wa nafatabo ista lahawan, dapat naobon was taw, infwali wa dagos gis sakop Panfilya. ³⁹ Da Pablo da Birnabi kahodhoriyan wa gis nanya fag ma-sohod, yakanga ta nanarowayan wan. Is Birnabi nata-ban in Markos, nasahay has baba dagat hawas foyo dagat Sipri. ⁴⁰ Dapat is Pablo nataban man in Silas. Ka manga fadwasay nontabo wagdarangin kitay intam Fon nangos fag ganos taw, da Pablo nalahaw wan.

⁴¹ Da Pablo hawas sakop Siriya, hanggan sakop Silisy, nafarigon sinya in Diyos manga tifonan.

16 Da Pablo hawas banwa Darbi hanggan banwa Listra. Ya mangharaw sinya ha akwa yadin Hisos katogbong sadi, kawas Timotiyo. In Timotiyo ina inti-wala yadi wan, sadik Hodyo, dapat it ama sadik Girigo. ² Fagayo ka mangan tiwala sas Listra hanggan sas Ikonyo nafaorongon kitay in Timotiyo ogali fiya. ³ Is Pablo kasayang taban in Timotiyo, yakanga ta natoli hanya maskin fagayo fag manga Hodyo sinya fag

manga banwa natwa wa kitay it ama Girigo. ⁴ Nyawa siday fag banwa kanda Pablo nagsabangan, ta nafwayong has mangan tiwala ka manga Fandiya-Bari-ta, hanggan manga fagtahinan san Diyos Tifonan sas Hirosalim it nagkasadiyan manga togon. Ta nafway-ong yadi kitay fag katanog tonya fag manga togon.

⁵ Yakanga yabay, ka manga Tifonan fagayo inbali marigon ta no katiwala. Sirang sirang ha kadogang san Diyos manga Tifonan manga taw. ⁶ Da Pablo nadalan has fagbokngan manga sakop Firigya hang-gan sakop Galasya maskin ka Maliyaw fag Falad idyag faangay kitay ta fag bomarita has sakop Asya. ⁷ Ta nondasog has bahalan sakop Misya, ta gayfan ta hawas sakop Bitinya, dapat in Hisos Falad idya nafaan-gay. ⁸ Yakanga ta natolas di sas sakop Misya, yakanga hawas lwad has banwa Toroas. ⁹ Gis nanya fag yabi, is Pablo ha lagan gin Diyos sadik bagay madolaw. Hanya ha lagan sadik ama taga sakop Masidonya malindo-gan, igsagad kitay, Ham nangos fag hawastay has di-fay, has Masidonya, togbongan hyami. ¹⁰ Yakanga non-sagaya kan Pablo lagan, mi nangalimbotangan wa da-gos, maskin mi natwa kitay, is Diyos igfatawag hyami kaarakitay tomoltol ka Fiya fag Barita has sakop Masi-donya. ¹¹ Gis banwa Toroas hyami sahayon nadagos has baba dagat has foyo dagat Samotrasya. No marom marom wan, mi nasahay ya baba dagat, hawas banwa Niyapolis. ¹² Ginya fag banwa mi nalahaw baba daga has banwa Filipos. Ka banwa Filipos sadik banwa dahol sas sakop Masidonya, ka mangag bahala sinya gis sakop Roma. Mi nadogay ogbot sinya. ¹³ No Sirang wa Kafahowayan, mi nalahaw has dayo banwa, ha sadik foyo sas gobang safa. Mi gayfan ngandayo sinya ka manga Hodyo nogtifonan igdarangin. Mintokaw sinya a, migtoltol has manga ina ka matifonan sinya. ¹⁴ Ka sadik ina ka sinya, kawas Lidya, taga banwa Tiy-atira, iglako manga rotay masding, madamol. Is Lidyang simba han Diyos. Kagfon intam nafatwagdog sat basad fangayofan, yakangas Lidya intiwala in Pablo toltol. ¹⁵ Is Lidya hanggan wat manga ofod sas balay, nontogna wan, is Lidyang lwang ha hyami kitay, Ham noglag kitay, aho orongan wantiwala hasagfon intam, ham fag sawa hyamik migya. Naaronganon nogtaban hyami hat balay. Maskin ngay midwa na-dayo. ¹⁶ Sadi ginan mi no haya ngawas fandaranginan, sadik dayaga, ista nasali sogowan, natagbo hyami. Ha labang kagbahala hanya, kagfasyagan hanyag pinto ista madalanan aban. Ka mangag fon tonya fag daya-ga iglag dahol fag fakinabang ginya fag dayaga, kawa nogpinto is taw, tagtangdan hasagfon ka dayaga. ¹⁷ Ka dayaga goyan yadi goyan yadi hyami da Pablo, igtawag kiti, To fag manga taw in Diyos, ka Abwat man has Fagayo Fagayo, it manga sogowan. Tagfadog ha hayo no kinday ham nombawi. ¹⁸ Is Pablo kahori wag-dog maskin sirang sirang fagaba wa kitonya. Is Pablo

nasayango has dayaga, ginya nalwang has labang, Hogsogo hyamo san Kiristo Hisos ngayan, haw fag galin wan gis nyamo fag dayaga. Yabay, ka labang dagos wa nalin. ¹⁹ Dapat ay, ka mangag fon tonya fag dayaga no nalag di ngay tadwa ha fagfakinabangon ginya fag dayaga, ta natoklos, nagamat inda Pablo da Silas, nagoyod has falhang manga balay has fagbokngan banwa, nataban has manga fagtahinan sas banwa. ²⁰ Ta no nataban inda Pablo has manga gorangon taga Roma, kagtalinga hampangan, taglwang, To fag manga ama manga Hodyo kagfaagran manga taw istay fag banwa. ²¹ It fagfaadalon iglaban hantam manga ogali taga Roma. Idwa fiya tam nogtanggap, idwa fiya tam no katanog ista manga adal hantam. ²² Ka manga taw fagayo nangoyonan gisog inda Pablo. Ka mangag talinga hampangan nalanit inda Pablo manga balokas, ginya ta nafabakbak manga sondalo has taw. ²³ Ka manga sondalo nontabo wagbakbak inda Pablo, ta nafaporiso wa hanya, nafabantay fiya fiya has bantay. ²⁴ Yakanga, kagbantay nataban is taw has fakabokngan balay porisowan. Ta nabinggas yadi inda Pablo manga bitis. ²⁵ Dapat araw, no kaboknga wa yabi, da Pablo da Silas igdarangin, garambahanan yadi han Diyos. Ka tiba poriso sinya matalingan odi. ²⁶ Ginya madi sadi odi ginan, nalinog marigon, kanga kitay ka fagriganon torok porisowan inbolang wan. Fagayo fag manga sakbawan porisowan dagos wanboklas, ista manga gafos kadina fagayo inlohas wan. ²⁷ Ka bantay nonfolaw, nalag di nga kitay ka manga sakbawan porisowan inboklas wan, hanya madali wanbangon. Nagonos wa dagos it talibong. Hanya ganong wa fahatay it sadili maskin hanya gayfan ka manga poriso nalfas wan. ²⁸ Dapat ay, is Pablo natawag marigon, Haw fag idwag tobok hyamo, mi fagayo istay di. ²⁹ Kagbantay nanagad salong a, nadalandan has basad porisowan, karokog waglingkohodan handa Pablo da Silas akbang. ³⁰ Ginya nataban inda Pablo has sokayan, iglwang kitay, Manga ama, kana kin ka fiya angko ibolonon kaarakitay ahom bawi? ³¹ Taglwang, Haw fag katiwala han Hisos kagfon intam, ginya madi haw imbawi wan, haw hanggan im talanahan. ³² Da Pablo natoltol kagfon intam it hampang has bantay hanggan has fagayo fag manga taw ka sat balay. ³³ Gis nanya yadi fag basad yabi, ka bantay nafyad inda Pablo manga baran. Ka bantay hanggan it manga ofod fagayo sas balay nafatogna wa dagos. ³⁴ Ginya madi ka bantay porisowan nataban inda Pablo hat sadili balay, nandisag hanon. Ka bantay hanggan it talanahan igbaya wa dahol maskin ta katiwala han Diyos. ³⁵ Nonbago wa marom, ka manga gorangon sas banwa nasogo manga sondalo, iglwang kitay, Falfasan wa tyamo fag dowak ama. ³⁶ Kagbantay nafadahit kitonya handa Pablo, iglwang, Ka manga gorangon sas banwa iglwang kitay, Falfasan wa hayo. Yabay ham

fag lahaw wa a, fag mahoway wa hayo manga fangayofan. ³⁷ Dapat ay, is Pablog lwang has manga sondalo, Gwadi ta nafabakbak hyami sasta faglagan, nyawa tadwa nafadalan las hampangan, nyawa mi ha kasoratan kitay hami bilang wa yadi taga Roma, hanggan tagporiso wa hyami. Ginya madi mafyaloman odi ta nogfalahaw hyami kati. Idwam himo. Fag ka mandi manga gorangon ka kabangkad hastay, ka fomalfas hyami. ³⁸ Ka manga sondalo nafadahit has mangag talinga hampangan kan Pablo nafwayong. Yakanga tandala wan ta no nadog di nga kitay, da Pablo da Silas bilang wa yadi manga taga Roma. ³⁹ Yakanga ka manga gorangon banwa hanya wan, nasoyo handa Pablo. Ta nataban inda Pablo has sokayan, ginya madi nalwang yadi kitay, Ham nangos fag lahaw wa gistay fag banwa, no fiya di. ⁴⁰ Ginya madi da Pablo da Silas indokson di ngay gis porisowan, ta nadagos wa han Lidya balay. Ta no natahod manga fadwasay sinya, ta natogon has taw kitay ta fag karigon no katiwala. Ginya madi ka dowak ama nalahaw ya.

17 Ginya madi ta no nadalan sas banwa Amfipolis hanggan banwa Apolonya, tandasog has banwa Tisalonika. Sinya fag banwa ka manga Hodyo ha fanimbaan. ² Tolok Sirang Kafahowayan, kawat ogali kitonya, is Pablo nasakbaw sinya, hanggan natoltol has taw. ³ Igfaorongon kitay ka Kasoratan danwag lwang kawan Diyos-natogon-Famawi it ibolon idyam tabo hanya nodwa omagwanta basad mahori hanggan imboyag ya, iglwang yadi, To fag is Hisos kangko fagfwayongon ha hayo, tonya wa nga kan Diyos-natogon-Famawi. ⁴ Manga fihin ik Hodyo katiwala in Pablo fwayong, gofod yadi inda Pablo da Silas, hanggan wa manga Girigo kaaywanon ka danwag simba han Diyos, hanggan manga ina ayo, kasta manga fakilalaon, gofod yabay inda Pablo. ⁵ Dapat ka manga fagtahinan Hodyo kaingli inda Pablo. Ta nafatifon ka manga ama malamangan odi basad manga karsada, nafaagran fagayo fag manga taw sas falhang manga balay, boknga banwa. Ginya idwag fasakbawon, nasakbaw wa dagos in Hason balay, igsayak inda Pablo da Silas kaarakitay falag has fakaaywanan. ⁶ Ta nodwa nalag inda Pablo sinya, ta nagoyod in Hason, hanggan ka tibak fadwasay has atobangan mangag talinga hampangan sas banwa. Ginya ta naringgit kitay, Ka manga taw kagfaagran nyawa haday kandasog, indasog yadistay. ⁷ Is Hason nafasakbaw tonya fag manga taw hat basad balay. Ta fagayo iglaban ka gorangon taga Roma manga togon, maskin taglwang ha sadi yak gorangon, hono, it ngayan is Hisos. ⁸ Ka fakaaywanan fag manga taw sas banwa hanggan ka mangag talinga hampangan galibitan it fangayofan no nadog kitonya. ⁹ Ginya madi ka manga gorangon no nafabayad ginda Hason it fangafang wan Pablo, ta nafalfas yadi inda Hason. ¹⁰ Yakanga no yabi wan, ka manga fadwasay nasogo

inda Pablo da Silas has banwa Biriya. Ta nondasog sinya, ta nasakbaw has basad fanimbaan Hodyo. ¹¹ Ka manga Hodyo istay sas Biriya fiya hampangon, bondi kito ka manga taga Tisalonika. Ta kasaya wagdog is Pablo nogtoltol. Sirang sirang tagligaw ka Kasoratan kat afo, ngatay orongan in Pablo manga fwayong. ¹² Kawa kitonya, aywan fag manga Hodyo kantiwala sinya, hanggan aywan yadi fag manga Girigo, manga ama hanggan manga ina, kasta manga fakilalaon fiya fiya sas banwa Biriya. ¹³ Dapat ay, ka manga Hodyo sas banwa Tisalonika no nadog kitay da Pablo igtoltol in Diyos hampang sas Biriya yadi, ta naoyan hanya, nafa-sognod ka fakaaywanan fag manga taga Biriya, nafa-a-gran is taw. ¹⁴ Ginya madi yabay, ka manga fadwasay intiwala nasogo wa dagos in Pablo has gobang dagat. Dapat da Silas da Timotiyo in-goyan yapdi sas Biriya. ¹⁵ Ka manga nafangolo in Pablo naofod wa hanya balis banwa Atinas. Ta nonfwali ya has banwa Biriya, ta nafadahit in Pablo togon handa Silas da Timotiyo kitay, ta fag idwa dogay no goyan hanya. ¹⁶ No mafanayan yapdi inda Silas da Timotiyo sas banwa Atinas, is Pablo inbalaw waglag kaaywanon fag manga tolada faglohodon sas basad banwa. ¹⁷ Yakangas Pablo igtoltol has manga Hodyo sasta basad fanimbaan, hanggan has manga Hintil kagsimba yadi han Diyos sinya. Ginya madis Pablo natoltol yadis taw sirang sirang nyawa faktaw kat lagan sas faktaban manga balay. ¹⁸ Ha akwa sinya manga Ipikoriyo hanggan manga Istoyko, mamga taw matoltolon, iglaban in Pablo. Tibag yod hanya, taglwang, Kana ngap araw to fag taw kat fwayongon hantam, igfabali hanya madonong? Ka tibag lwang, No kadog di to fag taw bokod fagfakatiwalaon it fagfaadalon. Taglwang kitonya maskin is Pablo nabarita kawa han Hisos, hanggan no kinday tam nomboyag ya aban. ¹⁹ Ta nataban in Pablo has fanoltolan, ta nogngayan Ariyopago, ginya taglwang, Mi kasaya tomwa no kana tonya fag adal bago im fagfwayongon ha hyami. ²⁰ Mi bago nadog kati kam fagfwayongon ha hyami madolaw, yakanga mi kasaya tomwa no kanat kahologan. ²¹ Maskin ta gintaw kitonya, ka manga taga banwa Atinas hanggan ka mangan aktom sinya gis iba banwanan, idwa ha fakamolon, gobok odi has manga taw, igtalinga igtalinga odi, igtoltolan nyawa kanat donggon fag manga bagay madolaw. ²² Yakangas Pablo nalindog sasta atobangan, sas fanoltolan Ariyopago, nalwang kitay, Ham manga taga Atinas, hoglag hayo manga fangayofan mahogod has iba iba fag manga fakatiwalaon. ²³ Maskin aho no gayayag basad banwa, aho nogbantay hayo manga tolada faglohodon, ho ha lagan sadik danglayan ha sorat kitay, To intohoyan ha sadik faglohodon midya kilala. Ka hayo faglohodon nyawa ham idya kilala, tonya wan kangko fagfwayongon ha hayo. ²⁴ Is Diyos wa ka nahalig sadik dahonya

intam daga, hanggan fagayo fag manga bagay sinya, hanggan hanya wa kagfon ka banwa hanggan ka daga, yakanga hanyadwa maoliyanan sasta manga nahalig fanimbaan. ²⁵ Bonwa kitay ka manga taw ha fag-togbongon han Diyos, maskin hanya idwa ha korang, nyawa kana. Yatokitay, is Diyos man kagdisag haboyagan, ipsaw, hanggan fagayo fag manga bagay has taw. ²⁶ Gi di sadik taw is Diyos no nahalig fagayo fag manga layonan taw kaarakitay bomanwanan istay is baba daga. Is Diyos kagfatohoyan no ginahin ka manga layonan taw nomrigon hanggan no siday fiya fiya ista sakop banwanan. ²⁷ Is Diyos naibolon kitonya kaarakitay manga taw somayak hanya, ngandayo ta lomang hanya, ta no galingawan. Ka orongan wan is Diyos idwa ayayo gintam fagayo, ²⁸ maskin Intam haboyagan giwa hanya, hanya yadi kagfahimot intam, hanggan igdisag fangayofan. Kito yadi ka hayo mangag fasangay tiba noglwang, Tam wa nga kat manga anak. ²⁹ Kawa tam in Diyos wa manga anak, tam fag idwa gayfan is Diyos bilang odi tolada ginto, ngatay pilak, ngatay bato, tonya fagayo ista odi naayfan kitay fag kitonya, ista odi gamat nahalig. ³⁰ Dogay wa fag manga fangaraw is Diyos idwag bati kitay manga taw idwa kilala hanya, dapat kati hanyag fwayong has fagayo fag manga taw, nyawa hadat banwanan, ta fag somoyo wan, fag domayo it manga ogali dwat, ³¹ maskin is Diyos iglwang kitay, gis nanya fag sirang aban hanya mamatohoyan has taw, sadik baba daga, it fadosaan, sas fakafiyon wa fiya fiya, kawan Diyos nafili fag ama ka mamatohoyan tonya. Is Diyos nafatwagdog has fagayo kitay, tonya wan kat nafili fag ama no nafaboyag ya hanya gis kahatayan. ³² Ta no nadog kitay is Pablo gwas kawa ha haboyagan sas dayo kahatayan, tibag yod odi, dapat tibag lwang, Aban, fag sadi ya ginan haw no fomwayong hyami kawa hanya baliwa. ³³ Ginya yabay is Pablo nalahaw gis fanoltolan. ³⁴ Ha akwa yadi tibak ama natahin hanya, intiwala wan. Insadi is Diyonisyo, ka sadi gis tifonan kagbahala sas fanoltolan Ariyopago, hanggan sadik ina is Damaris, ha akwa yadi tiba.

18 Ginya madis Pablo nalahaw wa gis banwa Atinas, hawas banwa Korinto. ² Nondasog wa sinya, hanya nalag in Akila, sadik Hodyo taga Ponto, ka ngalay yapdin dasog gis sakop Italya, hanggan wat babay, is Pirusila, kawas Kalawdyo nasogo ka manga Hodyo kitay fag galin gis banwa Roma. ³ Is Pablo hawanda Akila, ginya nadogayan sasta balay maskin ta kalig balay rotay kito yadin Pablo, yakangas Pablo naibolon yadi sinya. ⁴ Fagaba sas Sirang Kafahowayan, is Pablo igfatoltolan sas fanimbaan Hodyo, igfaaronganon has manga Hodyo hanggan manga Girigo kitay ta fag katiwala wa nangos in Hisos. ⁵ Da Silas da Timotiyo nondasog has banwa Korinto gis sakop Masidonya, is Pablo igbarita lamang hanggan ig-

faoronghan has manga Hodyo kitay kan Diyos-natogon-Famawi hanggan Gorangon is Hisos wan. ⁶ Dapat ka manga Hodyo tiba nogsongat, igyod ya ngadin Pablo. Is Pablo igfagfag ka fogis git boknga rotay, igfatagak is taw kitay, Ham bahala wa gisip no ham wa kadwan tiwala, ham has fadosaan wan. Hodwa ha sagoton. Gis kati ho hawas manga Hintil ho no bomarita. ⁷ Ginya madis Pablo nalin wan, hawan Tisyo Hosto balay, ka sadik Hintil kagsimba in Diyos. In Tisyo balay sas dayo fanimbaan Hodyo. ⁸ Is Kirispo, kagbahala sas fanimbaan Hodyo gis nanya, intiwala hasagfon intam, hanggan wat manga ofod sas balay. Aywan fag manga taga Korinto tiba no nadog in Pablo toltol intiwala wan, hanggan intogna wan. ⁹ Ginya madi sadi ginan basad yabi, is Diyos ha nafalag madolaw han Pablo, igfwayong hanya, Ha fag idwa kadala. Fag fadagos haw nogfaadal istay, fag idwag tohas igbarita, ¹⁰ maskin aho sawa hyamo. Hadwam kinday maskin aywan kambali angko fag manga taw istay fag banwa. ¹¹ Is Pablo nadogay yapdi sadik fangaraw hagboknga sas Korinto, igfaadal has taw in Diyos hampang. ¹² Dapat ay, aban, nos Galyon wa kanbali gobirnadur sas sakop Akaya, ka manga Hodyo nagkasadiyan ta gomamat in Pablo, tomaban has fangabaya. ¹³ Tagfasogbo in Pablo kitay, Is Pablo igfayayom manga taw igsimba han Diyos sa sadik halgan kadwa maangay has manga Batasan Hodyo. ¹⁴ In Pablo fangayofan homampang yap han Galyon, dapat is Galyon iglwang has taw, Ham fag toltol yap gis nyamo. No hayo sombong orongan wa kasalahan dahol, ngatay iglaban has ogali Roma, ho tomalinga wan. ¹⁵ Dapat hayo donggon nosta odi manga hampang, manga ngayan, ka odi hayo manga ogali Hodyo, ho bonwa hayo fangabaya no kitonya di. Ham fag bahala man di. ¹⁶ Is Galyon nasogo nga inda Pablo gis balay fangabaya. ¹⁷ Ginya ka manga Hodyo nagamat in Sostinis kagbahala sas fanimbaan Hodyo. Ta nabakbak hanya sas sokayan balay fangabaya, dapat is Galyon idwag bati ista naibolon. ¹⁸ Ginya madis Pablo nadogay yapdi ogbot sas banwa Korinto. Ginya no nanogon yapdi has manga fadwasay, inlahaw wan. Nondasog sas Kinkiriya sas gobang dagat, is Pablo namalokfog it bok, kawat togonan han Diyos intabo wan. Ginya nasahay has baba dagat, kaginan has sakop Siriya. Da Pirisila da Akila, talsawa, nahoyog wan Pablo. ¹⁹ Nondasog wa sas banwa Ifiso, is Pablo nafamataw inda Pirisila da Akila sinya. Ginyas Pablo hawas fanimbaan Hodyo, nafatoltolan has manga taw. ²⁰ Taglwang han Pablo, Haw nangos fag domogay yapdistay, dapat is Pablo idwag faangay is taw, ²¹ natogon odi, iglwang, Aho aba kabangkad ya non Diyos wa kafangayofanan. Ginya nalahaw ya gis Ifiso, nasahay ya ngawan has baba dagat. ²² Nondagsa sas banwa Sisariya, is Pablo nalahaw ya has banwa Hirosalim, namadog has Tifonan kantiwala sinya, ginya bago di

nadagos has banwa Antiyokya sas sakop Siriya. ²³ Ginya madis Pablo nadogay yapdi ogbot sinya, ginya nalahaw ya ngay. Nasabang ha banwanan ha banwanan sas sakop Galasya hanggan Firigya, igfarigon intam Fon manga katogbong fagayo sinya. ²⁴ Yabay, ha akwa sadik ama Hodyo, is Apolos, nadasog has banwa Ifiso, it kasagayan hyabi, sas banwa Alihandiriya. Is Apolos nogtolto fiya wa kadog, hanggan aywan yadit fakatwawon gin Diyos sorat. ²⁵ Hanya indonong ka Ogali Bago gintam Fon, mahogod hanggan maslong yadi nogfaadal kawa han Hisos, dapat kito yadin Hwan yapdi nogfaadal hasagfatogna baliwa. ²⁶ Is Apolos idwag fahoyangon igtolto sas fanimbaan Hodyo. Da Pirisila da Akila talsawa, no nadog in Apolos toltol, ta nataban wa hanya hat balay, nafwayong wa fiya fiya ka manga bagay ka bonyan Apolos fakatwawon sas Ogali Bago gin Diyos. ²⁷ Ginya madis Apolos no kasaya domifay has sakop Akaya, ka manga fadwasay nafaangay wan. Ta nafadiya yadi sorat has manga fadwasay sinya, ta nasorat kitay, Ham fag igbaya in Apolos hanya nomdasog ha hayo. Nondasog sinya, dahol in Apolos togbong has mangam tiwala kawa in Diyos malooy fag kahowayan sawa hanya. ²⁸ Ka manga Hodyo idwa ha halimbawan lomaban in Apolos kawa fakaoronganan wan hanggan marigon nogtolto gis Kasoratan kitay kan Diyos-natogon-Famawi is Hisos wan.

19 Is Apolos no sayapdis banwa Korinto, is Pablo dan wa nalahaw has moyod fag dalan hanggan wandasog sas banwa Ifiso. Is Pablo nalag mangan tiwala sinya. ² Is Pablo naintaw has taw, Ham awkin natanggap ka Maliyaw fag Falad ham nontiwala? Taglwang, Idyapdi, midyapdi ha donggon kitay ha akwa Maliyaw fag Falad. ³ Is Pablo naintaw, No kitonya, kinday ham nontogna? Tagsagot, Kitos Hwan nogfatogna manga taw hyabi. ⁴ Is Pablo iglwang, Is Hwan nogfatogna manga taw kawa igfathoyan kitay manga taw igsoyo wan. Is Hwan iglwang has manga taga Israil hyabi, Fag is Hisos ka goyan sangko ginanan ka hayo fakatiwalaon. ⁵ Ta no nadog, tantogna yadi san Hisos intam Fon ngayan. ⁶ Ginyas Pablo nogfwalid it gamat hasta baba alfoyo, ka Maliyaw fag Falad nadokson has taw, ta nahampang manga sanglit madolaw, hanggan nafadog has taw in Diyos fagfwayongon. ⁷ Ngandayo manga safolo ha dowak ama ka natanggap ka Maliyaw fag Falad kitonya. ⁸ Tolok magdanon is Pablo fagaba has fanimbaan Hodyo, igfaaronganon ka sinya fag manga taw, idwa ha mabalaw nogfwayong ka han Diyos sakop baliwa. ⁹ Dapat ha akwa yapdig farigon it sadili fangayofan, igdayo has katiwala, igfadwat yapdig dog has fakaaywanan ka Ogali Bago. Yakangas Pablo nalin wa gis fanimbaan nogfaadal, nataban yadi ka mangan tiwala, hawan Tirano famaadalan, igfaadal sinya sirang sir-

ang. ¹⁰ Dowak fangaraw is Pablo nogfaadal sinya, yakanga fagayo fag manga taw, nyawa Hodyo, nyawa Girigo, ka mabanwanan sas sakop Asya, nadog kagfon intam it hampang. ¹¹ Gis nanya fag manga masohod, is Diyos nafasyagan in Pablo gibolon ka bonwa faglagon fag manga madolaw. ¹² Yakanga nyawa taong ogbot ogbot, nyawa sangbaw in Pablo sangkap, ta no nadiya has manga ha sagit, tanfiya wan. Ka manga labang nalin yadi wan gis manga ha sagit. ¹³ Ha akwa sinya manga Hodyo malahawan malahawan igfaalin yadi manga labang. Tagsolay yadi golit in Hisos, kagfon intam it ngayan, nogfaalin manga labang. Ta nalwang kitay, San Hisos ngayan, kan Pablo fagfaadalon, hogsogo hayo, Ham fag galin wan gis taw. ¹⁴ In Iskiba manga anak ama fito ka tiba ka gibolon kitonya. Is Iskiba Hodyo, sadik fagtahinan fagalah-Diyos. ¹⁵ Dapat ay, ka labang nasagot has taw, iglwang kitay, Ho kilala in Hisos hanggan in Pablo, dapat fakta fag manga taw ham? ¹⁶ Ginya madi ka ama ka ha labang yapdi naogwan is taw, nadaog ya, nafalobas ya. Yakanga baranon ya malobasan ya ta no nalagyo ginya fag balay. ¹⁷ Ka mabanwanan sas banwa Ifiso, nyawa Hodyo, nyawa Girigo, ta nadog wa fagayo, tandala wa dahol dahol. Dapat is Hisos, kagfon intam it ngayan labi wanbantog. ¹⁸ Aywan kantiwala igsoyo, igbaya wan, taglwang, Mi gibolon yadi kitonya. ¹⁹ Gis nanya ka mangan tiwala ka ha manga botang yapdi nabangkad manga botang famasaan, nasonog sasta faglagan. Ta no nafahalga kasta nasonog fag manga botang, it halga 50,000 kwarta pilak gamtanan. ²⁰ Yakanga ka manga taw kantiwala intam Fon hampang kaayo hanggan karigon. ²¹ Ginya madis Pablo naayfan kitay hanya fag domalan nangos has sakop Masidonya hanggan sakop Akaya bago di has banwa Hirosalim aban. Is Pablog Iwang, Aho no giwas Hirosalim aban, ho fag domasog wan has banwa Roma. ²² Ginya madis Pablo nafagona ka dowak katogbong da Timotiyo da Irasto has sakop Masidonya. Dapat is Pablo in-goyan yapdi ngalay sas sakop Asya. ²³ Gis nanya yadi fag manga masohod, ka manga taw sinyas Ifiso, gagran wan maskin ta kadwat igdog ka Ogali Bago gin Hisos. ²⁴ Ha sadik fandayan pilak sinya, is Dimitriyo, ka kalig manga balay garogbot garogbot, in Diyana manga oliyanan. Is Diyana sadik tolad ina ista fagsimbaon. Dahol inda Dimitriyo fagfakinabangon giwat manga nahalig. ²⁵ Is Dimitriyo nafatifon it manga sogowan hanggan ka tiba taw ka kitonya yadit fangaboyagon, nalwang kitay, Manga taw ham, ham fadi wadtwa kitay tam ha fakinabang dahol gintam manga fakaligon. ²⁶ Ham fadi wadag lag, ham fadi wadag dog to fag is Pablo, it fagfaadalon. Hanyag Iwang kitay no ka odi nahalig taw faglohodon, bonwa orongan diyos. Yakanga aywan it nafatiwala hanggan nafatanog, bondi istay is banwa Ifiso, hanggan sadi

wak dahonya sakop Asya. ²⁷ Mahori aban kamlag ginya fag adal, bondi kitay ta yomod intam manga fakaligon kantam fangaboyagon, intam faglohodon ina yadi, is Diyana, it oliyanan imbali idwa mahalga, hanggan nyawas Diyana, ka manga taga Asya, hanggan sadi wak baba daga faglohodon kati, aban idwa ha gomalang hanya domwag. ²⁸ Ka manga taw nadog di ngay kitonya, tanhorit manga fangayofan, ta narawagan kitay, Kafiyaon, kafiyaon is Diyana, kantam manga taga Ifiso faglohodon. ²⁹ Yakanga sadi wak dahonya banwa nangagran. Manga taw nagoyod inda Gayo da Aristarko, manga taga Masidonya, kan Pablo manga ofod sas lahawan, nagoyod hasta fanifonan fag balay basad banwa. ³⁰ No kitay di, nos Pablo di, kasayag falag hanya has fakaaywanan, dapat ka manga fadwasay idwag faangay. ³¹ Ka tiba fag manga gorangon sas Asya, kan Pablo fakilalaon, nasogo yadi manga sogowan, nabando marigon kitay, is Pablo fag idwa has balay fanifonan. ³² Ka fakaaywanan fag manga taw mawang wa dahol gis nanya. Ka tibat faglwangon sadik bagay, ka tiba bokod wan it faglwangon maskin ka fakaaywanan idwa twa no kana mayon ta nogtifonan igtifonan sinya. ³³ Ka tiba gayfan ka sinya is Alihandro ka fagfonan fagagraon maskin ka Hodyo nasyag hanya. Yakangas Alihandro nafaaman is taw kitay ta fag idwa gawang gawang kaarakitay hanya homampang fiya fiya has taw. ³⁴ Dapat ta no nahilala kitay, Hodyo di mangharaw is Alihandro, ta nasohodan natawag dowak oras, taglwang, Kafiyaon kafiyaon is Diyana, kantam manga taga Ifiso faglohodon. ³⁵ No dogay wa araw, ka fagtahinan banwa nabando is taw, idwa nafaawang domwag, nalwang kitay, Ham manga taga Ifiso, faktaw kadwa twa kitay ka banwa Ifiso ka gano in Diyana manga oliyanan, ham gayfan? Tam ka gano yadi ka bato mahalga kandagdag gis banwa gim tongod. ³⁶ Idwa ha fabohag to fag manga bagay gin Diyana, yakanga ham fag kahoway wan hayo manga fangayofan, ham fag idwa gadaliyan. ³⁷ Bonwa kitay ka hayo nataban fag manga taw ignahaw gin Diyana balay. Bonwa yadi kitay tagyod intam faglohodon ina, is Diyana. ³⁸ Labi was Dimitriyo hanggan it manga ofod fandayan, no ha fagsombongon ngadi haday fag taw, ka manga fangabaya tomalinga wan, hanggan ha manga gorangon. Ham fag hanya wan nogfwayong, ngadi faktaw sa hayo. ³⁹ Dapat ham no ha faglwangon ya tiba, fiya di nomtabo sa sadik hampang ka maangay hantam ogaliyon. ⁴⁰ Ngandayo ka mangag bahala sas Roma bomangdan intam kitay, tam kagfaagran kati maskin idwa ha nagfonan hayo fagagraon, idwa yadi ha kahologan ngadi ogbot ogbot. ⁴¹ No nalwang di nga kitonya, ka fagtahinan banwa nafaoli wa ka manga taw.

20 Ka manga taw nontabo wa gagran, is Pablo nafatawag ya in Hisos manga katogbong, na-

farigon ya ista manga fangayofan. Ginya madi nato-
gon is taw, nalahaw has sakop Masidonya. ² Nasabang
ha banwa ha banwa, nafaadal ya domwag in Hisos
manga katogbong. Nafadagos wat lahawan hanggan
wandasog has sakop Girisy. ³ Is Pablo nadogay yapdi
sinya tolok magdanon. Ginya hanya nangos somahay
has baba dagat, kafwali ya has sakop Siriya. Dapat no
nadog kitay ha manga Hodyo goyonan wa fahatay
hanya boknga dalan, it fangayofan hanya fag kafwali
ya, domalan sas sakop Masidonya no goli. ⁴ Is Sopatir
in Piro anak gis banwa Biriya naofod in Pablo hanggan
da Aristarko da Sigondo gis banwa Tisalonika, is Gayo
gis banwa Darbi, da Timotiyo, da Tikiko da Torofimo
gis sakop Asya. ⁵ Ta nagona in Pablo, nafanaya hyami
sas banwa Toroas. ⁶ Nonsagaya wa ka Fanohodan
Tinapay Mayangfis, hami nasahay las dagat gis banwa
Filipos. Sas falima fag sirang mindagsa sas banwa
Toroas. Mi nadogay yapdi sinya fitok sirang. ⁷ Ka sir-
ang gona basad simba, hami no matifonan kaarakitay
manayowan kwan, igfaarogbotan tinapay, is Pablo na-
toltol has taw hanggan wa boknga yabi maskin no
bago marom lomahaw wan. ⁸ Aywan fag salong sas
tongod fag salogan sa hyami nagtifonan. ⁹ Is Iyotiko,
sadi anahan, matokawan sas baba gaha. Ginya madi,
kawas Pablo igtoltol yapdi ayo ayo, is Iyotiko intongka
wan, intoyog wa fiya fiya. Yakanga indagdag gis fatolo
fag salogan has daga gis baba gaha. Mahatayan wan
ta nogfoyot hanya. ¹⁰ Dapat is Pablo nadokson wan,
nafohot hanya. Iglwang has taw, Ham fag idwa galibi-
tan, hanya boyagan di. ¹¹ Is Pablo insakbaw ya, ig-
faarogbotan tinapay, igsayowan has taw, kwan wan.
Ginya nafadagos yapdit toltol has taw hanggan wa
kayawa, ginya madi bago di nalahaw. ¹² Ista manga
fangayofan inhoway wa orongan ta no nafaoli ya ka
anahan hat sadili balay boyagan di. ¹³ Ginya madi, mi
nasahay baba dagat, hawas banwa Ason. In Pablo to-
gon kitay mi fag sinya wa kagtagbo hanya maskin it
fangayofan hanya lomahaw sas nakamayan sas baha-
lan dagat. ¹⁴ Mi no nangablengan ya sas Ason, is Pablo
nasahay, ginya mi nangoyogan has banwa Mitilini.
¹⁵ Mi nalahaw ginya sas baba dagat. No bago marom
mindasog sas masohod foyo dagat Kiy. No domwag
sirang mindagsa sas foyo dagat Samos. Nondasog sa-
di yak sirang, mindagsa sas banwa Milito. ¹⁶ Is Pablo
iglwang kitay, Tam fag somagaya yapdi sas banwa
Ifiso kaarakitay tam idwam libang sas sakop Asya
maskin is Pablo gatagon it lahawan. It fakasayaon,
no somyagan di, fag sawas Hirosalim sas sirang Pin-
tikostis. ¹⁷ Yakangas Pablo nafatawag has Milito ka
manga fagtahinan gis Tifonan sas banwa Ifiso. ¹⁸ Ta
nondasog, is Pablo iglwang, Ham fadi wadtwa no kana
kangko ogali aho nogdogayan sa hayo gingko bago
dasog sas sakop Asya. ¹⁹ Ahodwag faabwatan angko
fangayofan no gibolon intam Fon ibolon. Nyawa ho

goraw wa gagwanta aywan fag mahori kagsolay
angko, kawa manga Hodyo goyonan wa kaisog angko.
²⁰ Aho nogtoltol hanggan igfaadal hayo, nyawa
sawasta fagdogan fagayo, nyawa ha hayo manga bal-
ay, hodwa kaya igfadog ha hayo nyawa kana fag
bagay kagtagbong hayo. ²¹ Hogfwayong nyawa has
manga Hodyo, nyawa has manga Girigo, kitay tam fag
domayo intam manga ogali dwat, fag kafwali han
Diyos, fag syag hantam Fon is Hisos. ²² Kati, kawa ka
Maliyaw fag Falad kagtaban angko, ho hawas Hirosal-
im. Hodwa twa no kana ka madalanan sangko sinya.
²³ Nonman, nyawa haday fag banwa aho nogsabang,
ka Maliyaw fag Falad igfathoyan kitay ahom poriso
aban sas Hirosalim, hanggan ta fahoriyan yadingko
sinya. ²⁴ Dapat no kadi angko haboyagan idwa ha kin-
day sangko. Fag imtonglos di ngay angko lahawan.
Fag imtabo in Hisos intam Fon disag hangko fai-
bolonon, kawag fadog ka Fiya fag Barita, in Diyos mal-
ooy fag kahowayan. ²⁵ Aho nogfaadal ha hayo kawa
han Diyos sakop baliwa, tam gofodan yapdi. Dapat gis
kati ginan ho twa wa kitay ham idwa lomag domwag
angko. ²⁶ Yakanga hoglwang kati bonwa aho ka hayo
sogaton nyawa faktaw sa hayo no hawas kadwatan,
²⁷ maskin ho natoltol wa fiya fiya ha hayo in Diyos
kafangayofanan hantam, sadi dahonya. ²⁸ Dapat ham
fag matagahan hayo sadili hanggan hayo manga
sakop ka Maliyaw fag Falad nafaano hayo. Ham fag
gano fiya fiya in Diyos Tifonan, maskin it sadili Anak it
kahatayan ka nabawi tonya. ²⁹ Ho twa wa kitay angko
ginanan aban, ha akwa manga taw, bilang manga ido
maisog gi sayo basad talon, idwa fadaogon domwat
ka Tifonan. ³⁰ Gi yadi hayo aban hamlag manga taw
kampang bohagon kaarakitay in Hisos manga katog-
bong imdiya wa hanya maskin kasayag fatalang man-
ga taw, nomtwa di. ³¹ Yakanga ham fag matagahan,
fag tohod kitay tolok fangaraw ho galowan wa kaawa
hayo aho nogfaadal hayo, yabi sirang. ³² kati hogfaano
hayo han Diyos, hanggan hat hampang kagfathoyan
it malooy fag kahowayan. Hanya ka fasyagan hayo,
hanya ka twag disag ha hayo fagayo fag kafiyon kat
nafatalaga has fagayo kat nafabokod hat sadili.
³³ Nyawa ginahin hodwa ha fagayfanon hayo pilak,
hayo ginto, hayo manga rotay, nyawa gafo. ³⁴ Ham twa
wa kitay kangko fangaboyagon, hanggan angko man-
ga ofod fangaboyagon, gi wangko sadili nakayayan.
³⁵ Nyawa ginahin hogfalag kitay ka kito kangko
nakayayan ka fiya, kaarakitay tam ha togbongan has
manga magomo it habilogan. Tam fag tohod in Hisos
kagfon intam it fwayong kitay, Kagdisag bomaya man
kagtaggap. ³⁶ Nontabo wa kampang kitonya, is Pablo
nalingkohodan, ginya ta nandarangin igsohodan.
³⁷ Fagayo ta nangoraw wan, nafohot, naayok in Pablo.
³⁸ Kasta fakarongkoton dahol kawa tagdog kitay is
Pablo iglwang, Ham aba idwa lomag domwag angko.

Ginya ta nafangolo in Pablo has sahayon sas baba dagat.

21 Nontabo wagtogon is taw, mi dagos wa nalahaw baba dagat hawas foyo dagat Kos. Nonbago marom, mindasog sas foyo dagat Rodas. Ginya madi mi hawas banwa Patara. ² Sas Patara mi natahod sadi yak sahayon kagdifay has sakop Finisya, yakanga mi nasahay sinya, ginyan ginan wan. ³ Mi nadalan sas masohod foyo dagat Sipri, kabantay balis wala baliwa. Ginya madi migdagos wan hanggan wandasog has sakop Siriya. Mindagsa sas banwa Tiro maskin ta nafadokson it manga diya sinya. ⁴ Mi nasayak in Hisos manga katogbong sinya. Mi no nalag, mi nadogay sinya fitok sirang. Ka Maliyaw fag Falad nafaayfan in Hisos manga katogbong, tagbando in Pablo kitay, Fag idwa has Hirosalim. ⁵ Nonsagaya sadik simba, mi nalahaw ya ginya, nafadagos wa hyami lahawan. Fagayo, hanggan wat manga babay, manga anak, nafangolo hyami hanggan wa nadasog sas dayo banwa Tiro. Nondasog sas gobang dagat, mi fagayo nanlingkohodan a, nandarangin, hanggan nanarogonan ha sadi ha sadi. ⁶ Ginya mi nasahay ya ngawan hanggan ka manga taw ka nafangolo hyami nwali wan. ⁷ Gis banwa Tiro mi nalahaw ya has baba dagat hanggan wandasog has banwa Tolimaida. Mi sadi wak sirangan nanabang manga fadwasay sinya. ⁸ Ginya madi nonsirang mi nalahaw ya ngawan baba dagat hanggan mindagsa wan sas banwa Sisariya. Mi nigya san Filipi balay. Is Filipi sadi kagbarita, sadi yadi kasta nafili hyabi sas fito sas Hirosalim. ⁹ It manga anak dayaga ofat sonson wan Diyos manga fangampang. ¹⁰ Nonsagaya fihin ik sirang, ha akwan dasog gis Hodiya in Diyos fangampang sadi ya, it ngayan is Agabo. ¹¹ Hanya nanabang hyami, nabol in Pablo fagyahos, nagafos it sadili bitis, manga gamat, ginyag Iwang, Ka Maliyaw fag Falad nafwayong kitay, Kitonya yadi ka manga Hodyo sas Hirosalim gomafos kagfon to fag fagyahos, ginya ta fagamat hanya has manga Hintil. ¹² Mi no nadog kitonya, migfwayong wagfwayong, hanggan ka taga sinya iglwang yadi han Pablo kitay, Gwadi haw fag idwa has Hirosalim. ¹³ Is Pablog Iwang. Kana ham no goraw hanggan igfagomo angko fangayofan? Maskin ho galwasi in Hisos kagfon intam, ho talaga wa fagafos angko, nyawa hanggan wa matay sas Hirosalim, no tonya wat fasadan. ¹⁴ Mi nodwa nasyagan nabando, mi fawa ha naawang domwag hanya baliwa, miglwang, No kindawan kagfon intam it fasadan, fag kitonya wan. ¹⁵ Nonsagaya fihin ik sirang, mi galimbotangan wan, mi hawas Hirosalim. ¹⁶ In Hisos manga katogbong tiba gis banwa Sisariya nahin hyami, nafangolo hyami han Manason balay maskin mi sinya wak migya. Is Manason taga Sipri, dogay wantiwala han Hisos. ¹⁷ Mi nondasog sas Hirosalim, intam manga fadwasay nabaya waglag hyami. ¹⁸ No

bago marom mi nanabang in Santyago. Sinya yadi ka manga fagtahinan fagayo san Diyos Tifonan. ¹⁹ Nonsagaya kampang ogbot magalang has taw, igbaya, is Pablo nafwayong igsadig sadi ka manga bagay in Diyos naibolon has manga Hintil kawas Pablo nogbarita. ²⁰ Ta no nadog kitonya, tagfasayagdog in Diyos. Dapat ta nalwang han Pablo, Fadwasay Pablo, haw fadi wadtwa no kayodawak libo fag manga Hodyo kawa mangag syag in Hisos, mahogod yapdi no katanog in Mwisitogon. ²¹ Ha akwa nafadahit has manga Hodyo istay kitay, haw igfwayong has manga Hodyo kan-aktom sas manga banwanan Hintil kitay, Ta fag domayo in Mwisitogon. Haw, hono, iglwang fag idwag fatoli ista manga anak, fag idwa yadi katanog ka ogali Hodyo. ²² Kinda araw intam halimbawan? Matohoyanan ta domog kitay haw indasog wastay kati. ²³ Fag kito nangos kam ibolonon. Istay ha ofat ik ama Hodyo ha taranggapan has Fanimbaan-Dahol. ²⁴ Ha tabanan wa nangos ka ofat ik ama, haw fag fadagos ka ogali igfalinay kagfatonglos intam Batasan Hodyo. Fag haw wa kagsakop ista gastos. Ginya madi ta falinay it manga alfoyo. No kitonya fagayo tomwa kitay ista fadahit ya mangharaw idwa orongan. Haw katanog yapdi ka Batasan Hodyo. ²⁵ No kadi has manga Hintil kantiwala, mi nafadiya sorat no kinday ka hyami fangayofan. Ta fag idwa kwan kasta manga nadisag has manga tolad faglohodon. Fag idwa kwan folot hayopan, hanggan ka manga hayopan kantagbong. Ta fag idwa yadi g fabayowan. ²⁶ Yakanga nonbago marom, is Pablo naofod ka manga ama, nafadagos ka ogali igfalinay, hanggan nasakbaw has basad Fanimbaan-Dahol. Nafadog has taw no ginahin imtabo ta nogfatonglos ka ogali nogfalinay kito, hanggan no ginahin hanya no domisag ka manga bato disagon kagsakop ka manga ama ofat. ²⁷ No kaakbang wa kasagaya tonya fag fitok sirang, is Pablo nasakbaw has basad Fanimbaan-Dahol. Tiba Hodyo sinya, manga taga Asya, ka nalag in Pablo it fagonan, nafasognod has fakaaywanan, naogwan in Pablo, ²⁸ natawag ya ngadi kitay, Manga kapariho Hodyo, kalibang, togbongan hyami. To fag taw, nyawa haday kandasog, nogfaadal has taw, iglaban has tifonan Israil, iglaban ka Batasan Hodyo, iglaban has Fanimbaan-Dahol. Bondi tonya, hanya nataban yadi manga Girigo has basad Fanimbaan-Dahol, igsagaya wa ogali istay sas basad balay kantohoyan han Diyos. ²⁹ Taglwang kitonya maskin ta nalag is Pablo no gayayag basad banwa, ha ofod is Torofimo, sadik Hintil, taga Ifiso. Ista odi asolop kitay ngandayo tonyan Pablo ofod has basad aladan Fanimbaan-Dahol. ³⁰ Sadi wak dahonya banwa gagran. Ka manga taw igsarosonan wa kadasog, ngadi ginday, nagamat in Pablo, nagoyod hanya has dayo aladan Fanimbaan, ginya ta natahop wa madali ka sakbawan. ³¹ Ista fangayofan ta fahatay wa nangos in Pablo. Dapat ha nafadahit hasta

gorangon tifonan sondalo taga Roma kitay, sadi wak dahonya Hirosalim gagran wa hono. ³² Ka gorangon sondalo nataban madali manga fagtahinan sondalo hanggan ista manga sakop sondalo. Ta nanhadalandanan hasta fag tifonan manga taw. Kagdaog in Pablo, no nalag ka manga fagtahinan sondalo, hanggan ista manga sakop kadasog, tantohas wagbakbak hanya. ³³ Ginya ka gorangon sondalo naakbang, nagamat in Pablo, nafagafos dowak kadina hanya. Ginya naintaw is taw, Fakta to fag taw? Kanat kasalanan maskin ham igdaog hanya? ³⁴ Bokod bokod ista faglwangon ta nogtarawagan, yakanga ka gorangon sondalo idwa twagdog no kana kasta fagbangdanon in Pablo kawa ta gagran wan. Yakanga ka gorangon sondalo nasogo kitay tabanan wan Pablo has basad balay sondalo. ³⁵ Nondasog sas bilog talangtang, ka manga sondalo nasafat wan Pablo maskin ka fakaaywanan fag manga taw kaisog wa dahol dahol hanya. ³⁶ Ta goyan yapdi, igtawag marigon, Fahatayan wa tyamo fag taw. ³⁷ Ta no kaakbang wa kafasakbaw in Pablo basad balay sondalo, is Pablog lwang hasta gorangon, Fiya di aw aho no homampang ha hyamo? Ka gorangon sondalo indolaw wan, nasagot, Ya mangharaw, haw madonong kampung fangampangan Giri-go. ³⁸ No kitonya, haw bonwa ka taga Ihipto ka nataban 4,000 ama, has basad fakahyabogan, kaarakitay lomaban has gobirno itfagonan. ³⁹ Is Pablo nasagot, Aho sadik Hodyo kansagaya sas banwa Tarso, sakop Silisya, hanggan ta kilala wangko sinya fag banwa kabantog. Hogsagad hyamo nangos, no fiya di, aho homampang yapdi has manga taw. ⁴⁰ Ka gorangon sondalo nafaangay wan. Yakangas Pablo nalindog sas bilog alitang bato, sas bahalan fantaw, nafaaman has manga taw. Ta nodwa gawang, is Pablo nalwang sas sanglitan Hibriyo,

22 Manga magorang, hanggan manga fadwasay, ham fag talinga angko bato lwangon ha hayo kati, aho nogfatohoyan ha hayo angko manga ogali. ² Ka fakaaywanan no nadog kitay is Pablo kampung sas fangampangan Hibriyo, labi wa tadwa gawang. Ginyas Pablo nafadagos it toltol. ³ Aho sadik Hodyo kansagaya sas banwa Tarso, sakop Silisya, dapat aho istay sas banwa Hirosalim kandahol. Ho nangadal san Gamaliyal. Hanya mahogod wagfatonglos in Diyos manga natogon ogali kito hayo fagayo kati. ⁴ Hyabi hogfahoriyan yadi hanggan wagfahatay ka mangag fasakop to fag Ogali Bago. Ho nafagafos hanggan wa nafaporiso is taw, nyawa ina, nyawa ama. ⁵ Ka gorangon fag fagalanhan-Diyos hanggan ka tifonan manga fagtahinan Hodyo fagayo twag faorongan kitay kitonya angko ibolon hyabi. Hyabi ta nadisag angko manga sorat has manga Hodyo sas banwa Damasko, yakanga ahon bangkad hanya kaarakitay gomamat sinya ka katanog to fag Ogali Bago, tomaban maga-

fosan tonya fag manga taw has Hirosalim kaarakitay fadosa. ⁶ Gis nanya hyabi, aho noglahaw yapdi, no kaboknga wa sirang, aho kaakbang wa kadasog has banwa Damasko. Sadi odi ginan nayawa gim tongod sangko ligongan, masilaw wa dahol dahol. ⁷ Honlohob has baba daga. Ginya ho nadog sadik hasnog ka nalwang hangko kitay, Sawlo, Sawlo, kana mayon haw nogfahoriyan angko? ⁸ Hogsagot, Faktaw haw kagfon angko? Hanyag lwang, Ahos Hisos, ka gis Nasarit, aho kam fagfahoriyan. ⁹ Yabay angko manga ofod nalag madi ngap ka yawa, dapat tadwa nadog ka hasnog it fakatignan hangko. ¹⁰ Aho naintaw yadi, Angko Fon, kana ara angko bato ibolonon? Hanyag lwang ya domwag, Haw fag lindog wa a, fag hawas basad banwa Damasko, ginya ta bago di fomwayong hyamo no kana kam ibolonon fagayo. ¹¹ Honbota wan maskin masilaw wa dahol dahol tonya fag yawa, yakanga angko manga ofod nagamit odingko has basad banwa Damasko. ¹² Ha sadik ama sas Damasko, kawas Ananiyas. Hanya orongan wa matanogon in Diyos, katanog yadintam manga Batasan Hodyo. Fagayo fag manga Hodyo ka mabanwanan sinyag galang hanya. ¹³ Is Ananiyas nanabang gingko, nalindog sangko akbang, ginyag lwang hangko, Fadwasay Sawlo, kati im mata fag iglag ya. Gis nanya yadi angko mata iglag ya, ogali wan a, ho nalag in Ananiyas. ¹⁴ Hanyag lwang ya kitay, Intam manga magorang it Diyos nafili hyamo kaarakitay haw tomwa no kana kat fasadan, haw lomag it Maliyaw fag Sogowan hanggan haw domog yadit hasnog, ¹⁵ maskin haw imbali famaorongan hanya, kaarakitay fomwayong has fagayo fag manga taw kam mata lagan, hanggan kam talinga donggon. ¹⁶ Yabay kati, kana yapdim fagfanayaon, ha gayfan? Fag kabanngon, fag syag han Hisos ngayan kati, fag fatogna wa hyamo, ginyam manga naogali dwat imliyam wan. ¹⁷ Ginya madi aho nonfwali hastay has Hirosalim, aho nogdarangin sas basad Fanimbaan-Dahol, is Diyos ha nafalag hangko. ¹⁸ Ho nalag kagfon intam, hanyag lwang hangko, Kalibang, haw fag lahaw wa gistay gis Hirosalim maskin ka manga taw istay idwa tomalinga hyamo faorongan kawa hangko. ¹⁹ Hogsagot kitay, Angko Fon, ta fadi wadtwa kitay itfagonan aho kagfaporiso gis manga fanimbaan Hodyo ka mangan tiwala ha hyamo, hanggan wagfabakbak. ²⁰ Hanggan hyabi ta no nafahatay in Istiban, hyamo famaorongan sadi, aho sinya yadi, igfaangay ista ibolon, igbantay ista manga rotay ka mangag fahatay in Istiban. ²¹ Ginya madi kagfon intam nalwang hangko kitay, Haw fag lahaw wan maskin ho somogo hyamo has ayayo has manga Hintil ka bomarita. ²² Balinya yapdi ka manga taw igtalinga in Pablo toltol. Dapat ta no nadog kitay is Pablo gwas has manga Hintil baliwa, ta nanarawagan kitay, Fahatayan wa tyamo fag taw. Idwa fiya hanya nomboyag. ²³ Ta nodwag fagomon igharinggitan

iglafog manga fogis daga has bagyo, igloslos it manga balokas, igdwatan odi maskin kahori wa dahol dahol ista manga fangayofan, ²⁴ ka gorangon manga sondalo nasogo kitay fasakbawan in Pablo ha basad balay sondalo, fag bakbak hanya kaarakitay igpilit igfasagot, tomwa no kana mayon ka manga Hodyo igharinggitan kitonya no kahorin Pablo. ²⁵ Dapat ta no nagafos wan Pablo, kaarakitay bomakbak hanya, is Pablo nahampang has fagtahinan sondalo, nalwang kitay, Ka ogali Roma igfaangay awkin kitay nyawa sadik taw ha kasoratan gis Roma, fiya digbakbak hanya, ham gayfan, nyawa idyan tohoyan gis hampangan? ²⁶ Ka fagtahinan sondalo nadog di nga kitonya, nadagos wa has gorangon sondalo, nalwang, Kinda odi tonya? Ya mangharaw, tonya fag taw ha kasoratan gis Roma. ²⁷ Yakanga ka gorangon sondalo hawan Pablo, naintaw hanya, Haw awkin orongan wa ha kasoratan gis Roma? Is Pablo iglwang. Ala. ²⁸ Ka gorangon sondalo nalwang, Dahol angko nabayad kaarakitay ha kasoratan gis Roma. Dapat is Pablo nalwang, Aho danwa ha kasoratan kitonya gingko kasagayan ginan. ²⁹ Ka manga haraw nangos mangintaw in Pablo, madali wa nalahaw ginya. Ka sondalo gorangon indala yadi wan kawa nafagafos in Pablo nyawa hanya ha kasoratan gis Roma. ³⁰ Ka gorangon sondalo kasaya tomwa no kana ka manga Hodyo sombong ka dwat san Pablo. Yakanga nonbago marom, ka gorangon sondalo nafahampangan ka manga fagtahinan fagalan-han-Diyos hanggan ka sadik tifonan fagtahinan Hodyo fagayo. Yabay ta no nalohas in Pablo gafos, ta nafadokson hanya hanggan nafabangkad has taw.

23 Ginyas Pablo igbantay has taw, iglwang, Manga kaiban Hodyo, balis kati hodwa ha fagtagahon angko naibolon dwat, nyawa sawan Diyos faglagan. ² Is Ananiyas, ka gorangon fag fagalan-han-Diyos, no nadog in Pablo fwayong, nalwang has manga malindogan san Pablo akbang, Tofaan marigon in Pablo bibig. ³ Is Pablo nafwayong han Ananiyas kitay, Is Diyos ka bomakbak hyamo, kawa haw ha takan wa dahol dahol. No fiya fiya di, im fagtokawon is nyamo, haw mangabaya nangos angko no kinday ka Batasan Hodyo fwayong, dapat ay, haw igfatofa odi ngap angko, nyawa idwa maangay santam togon no kitonya. ⁴ Ka manga malindogan sinya iglwang han Pablo kitay, Haw igsalan odi kampang han Diyos gorangon fag fagalan. ⁵ Is Pablog sagot, Hodwa twa kitay tonya mangharaw ka gorangon fagalan-han-Diyos. Maskin anod, danwan sorat kitay, Fag idwa kampang salan ha hayo fagtahinan. ⁶ Dapat is Pablo no natwa kitay ha akwa manga Sadosiyo sinya hanggan manga Farisiyo, hanya nafadahol it hampang, iglwang kitay, Manga fadwasay, aho sadik Farisiyo hanggan angko manga magorang Farisiyo yadi. Maskin aho katiwala kitay ka manga natay imboyag ya

domwag, tonya wa kasta fakahoriyon angko kati. ⁷ Is Pablo nontabo di ngaglwang kitonya, ka manga Farisiyo hanggan manga Sadosiyo nandaraogan. Ka tifonan manga Hodyo inbali wa dowak layonan. ⁸ Maskin ka manga Sadosiyo idwa katiwala kitay ka manga natay imboyag ya domwag, hanggan idwa hono ha manga anghil, idwa yadi ha manga falad. Dapat ka manga Farisiyo katiwala kitay manga taw imboyag ya, hanggan ha akwa manga falad, manga anghil. ⁹ Inlabi di ngap ka dowak layonan nogharinggitan. Ka mangag faadal Batasan Hodyo tiba, ka balis manga Farisiyo, nalindog nafabohag marigon, iglwang, Midwa ha lagon it naibolon dwat to fag taw. Nyawa halimbawa ha falad nahampang hanya, ngatay sadik anghil. ¹⁰ Ka manga taw no kahodhoriyan wan kawag daraogan, ka gorangon sondalo kadala ta homaragawan, ngandayo in Pablo habilogan imbokngan wan. Yakanga ka gorangon sondalo nafadokson manga sondalo, nafataban in Pablo a, nafasakbaw hanya has basad balay sondalo. ¹¹ Nonyabi wa araw, kagfon intam naakbang han Pablo, nalwang, Fag marigon im fangayofan, no kinday haw nafaorongan kawa hangko, istay sas Hirosalim, kitonya mandi im ibolonon aban sas banwa Roma. ¹² Dapat ay, nonsirang, ha manga Hodyo nanaranggapan kitay tadwa homwan yafon, idwa yadi ominom danom, ta nodya nafahatay in Pablo. ¹³ Iglabi wa ofat ik safolok ama ka nanaranggapan kitonya. ¹⁴ Ta hawas manga fagtahinan fagalan-han-Diyos hanggan has manga fagtahinan sas banwa, iglwang kitay, Midwag sway, mi nanaranggapan kitay midwa homwan yafon hami nodya nafahatay in Pablo. ¹⁵ Gwadi kati ham, hanggan ka tifonan fagtahinan manga Hodyo, sagadan gis gorangon sondalo kitay fadoksonan ya nangos in Pablo. Ham fag lwang, ham manalinga ya ngay it hampang. Yakanga mi fahatay wa hanya boknga dalan, idya kadasog ha hayo. ¹⁶ Dapat ay, in Pablo bapa, in Pablo fadwasay ina bago ama fag anak, nadog kasta toltolan kitay ta omolog in Pablo. Yakanga nafwayong han Pablo. ¹⁷ Is Pablo nahampang ha sadik fagtahinan manga sondalo, iglwang, Ha ofodan nangos to fag bago ama has gorangon manga sondalo, maskin hanya ha bato fwayongon hanya. ¹⁸ Yakanga kagsogo manga sondalo nataban in Pablo bapa has gorangon, ginya nalwang, Ka nganporiso fag Pablo nafaofod angko to fag bago ama ha hyamo, maskin hanya hono ha bato fwayongon ha hyamo. ¹⁹ Ka gorangon sondalo nagamit ka bago ama, nafasaman gis taw, ginya naintaw hanya, Kana kam bato fwayongon hangko? ²⁰ Ka bago ama nasagot, Ha manga Hodyo nanaranggapan kitay, ta somagad gi hyamo kawa bago marom ha fadoksonan nangos in Pablo kaarakitay falag ya hanya has manga fagtahinan manga Hodyo. No kadog di ta labi man omintaw wa fiya fiya hanya. ²¹ Dapat

haw fag idwa katiwala maskin iglabi wa ofat ik safolok ama ka maologan in Pablo kati. Ta nanarangganan kitay tadwa homwan hanggan idwa yadi ominom no baliday tadya nafahatay in Pablo. Ta danwa maologan fiya fiya sas dalan kati. Hyamo odi sogo in Pablo kasta fagfanayaon. ²² Ka gorangon sondalo iglwang, Ha fag idwag fwayong nyawa haday kitay haw nafadahit angko kitonya. Yakanga hanya nafaoli wa ka bago ama. ²³ Ginya madi ka gorangon sondalo nafatawag dowak fagtahinan sondalo nalwang kitay, Ham fag fatalaga dowak daan sondalo kaglahaw baba daga, hanggan fitok safolo ka masahayan baba habayo, ginya dowa yak daan ka ha bitbit bangkaw, kaarakitay lomahaw has banwa Sisariya araw, kaakbang wa boknga yabi. ²⁴ Fag fatalaga yadin Pablo manga sahayayan habayo. Ham tabanan wa hanya han Gobir-nador Filis. Anowan in Pablo fiya fiya. ²⁵ Ka gorangon sondalo nafadiya yadi sorat han Gobir-nador Filis, nalwang kitay, ²⁶ Ahos Kalawdiyo Lisiyas kagsorat ha hyamo, Gobir-nador Filis. Kinday ham is nyamo? ²⁷ Ka manga Hodyo naiktan to fag ama hanggan ta nangos fahatay wa hanya. Ho nadog kitay hanya ha kasoratan gis Roma, yakanga ho nataban manga sondalo, hanggan nabawi hanya gis manga Hodyo. ²⁸ Maskin ho kasaya tomwa no kana kasta fagsombongon it naibolon dwat, ho nafadiya hanya has manga fagtahinan manga Hodyo itfagonan. ²⁹ Dapat ho natwa wagdog kitay kasta fagsombongon hanya, kawa ta ha fakahoriyon hasta ogali baliwa, dapat idya fiya kafahatay, idwa yadi fiya ngadi kaporiso. ³⁰ Ho no natwa kitay ka manga Hodyo nagkasadiyan ta omolog fahatay wa nangos in Pablo, ho dagos nafataban wa hanya ha hyamo. Hoglewang has mangag sombong hanya, Fag hawa hyamo, Filis, ta nogsombong aban in Pablo naibolon dwat. ³¹ Ka manga sondalo intanog wa ngay ka gorangon sondalo sogo has taw. Yakanga no yabi wan ta nataban in Pablo, hawas banwa Antipatris. ³² Domwag sirang ka manga sondalo kaglahaw baba daga nwali ya has balay sondalo sas Hirosalim. Ka mangag sahay sas habayo in-goyan di kaarakitay omofod yapdi omano in Pablo. ³³ Ta no nadasog sas banwa Sisariya, ta nataban in Pablo has Gobir-nador hanggan nadisag ka sorat hanya. ³⁴ Ka gobir-nador no nabasa di ngay ka sorat, naintaw in Pablo kitay, Haw ginday fag banwanan? No natwa kitay is Pablo gis sakop Silisya, ³⁵ Hanyag lwang kitay, Ho tomalinga hyamo hampangan aban ka mangag sombong hyamo nombangkad hastay. Yakanga ka gobir-nador nafaoliyanan in Pablo san Hirodis nafahalig balay dahol. Ha akwa ya ngadig bantay hanya sinya.

24 Ginya madi, nonsagaya limak sirang, ka gorangon fag fagalan-han-Diyos, is Ananiyas, hanggan tiba fag manga fagtahinan banwa gis Hirosalim, hanggan sadik fangayat, is Tirtolo, indasog has banwa

Sisariya. Ta dagos wa nafadog has Gobir-nador it sombong han Pablo. ² Ta no nafabangkad in Pablo, is Tirtolo nafabago wa nafadog kan Pablo naibolon dwat. Hanya nafwayong kitay, Migbaya wa hyamo, Gobir-nador Filis. Dahol hyami fagfasalamaton ha hyamo maskin kawa madonong im manga sogowan, yakanga dogay midwa ha fakahoriyon istay hyami banwanan. Aywan yadi kam manga natogbong manga bagay bago, hawa hyami manga Hodyo banwanan. ³ To mi twa wa fiya fiya, nyawa ginahin, nyawa siday, aywan hyami fagbayaon gi hyamo. ⁴ Haw nangos fag talinga yap hyami sadik ngalay, idwa dogay araw mi noglibang hyamo. ⁵ Mi nalag to fag ama igfaawayan manga Hodyo, nyawa sida kandasog. Hanya sadik fagtahinan sas tifonan manga taga Nasarit. ⁶ Hanyag tikis waglaban hyami ogali sa hyami Fanimbaan-Dahol. Yakanga mi naiktan hanya. Itfagonan mi kasaya nangos bomolay fangabaya gi hanya, no kinda ka maangay ha hyami manga Batasan Hodyo, ⁷ dapat is Lisiyas, ka gorangon tifonan sondalo indasog, nahagaw hanya gi hyami. ⁸ Is Lisiyas iglwang ha hyami, fag ha hyamo mi nogsombong to fag taw. Haw no gintaw hanya, ha tomwa wan no kana ka hyami sombong ha hanya fagayo. ⁹ Fagayo fag manga Hodyo ka sinya insadi san Tirtolo, nafaanod yadit manga fwayong fagayo.

¹⁰ Ginya ka gobir-nador no nafaaman kaarakitay is Pablo somagot yadi, is Pablo igfwayong han Filis kitay, Ho twa wa kitay haw dogay wa fangabaya istay sa hyami banwanan Hodyo. Yakanga hogbaya wan, nyawa idwa hagbaliwa angko, aho mandi ka kampang sa hyamo fagdogan. ¹¹ Idya safolo ha dowak sirang itfagonan, aho nondasog sas Hirosalim kaarakitay manimba sinya. Tonya haw twa wagfatohoyan haw no gintaw is taw. ¹² Nyawa ginahin tadwa ha lagan angko nafaa-gran is taw sa hyami Fanimbaan-Dahol, tadwa ha lagan angko nafahoriyan sa hyami manga iba fag fanimbaan, ngadi siday fag foyo basad banwa Hirosalim.

¹³ Tadwa ha lagan ista faorongon it manga fagbang-danon angko. ¹⁴ Dapat hogbaya kitay ahog simba ha hyami manga hafofowan Diyos kito ka maangay sas Ogali Bago. Hami sadik tifonan taw, taw noglwang, mi hono igfalamang. Dapat ho katiwala yadi wan fagayo fag manga bagay kansorat sas Kasoratan, nyawa ka Batasan Hodyo, nyawan Diyos manga fangampang sorat. ¹⁵ Kitonya yadi, hogsyag in Diyos kito kagsombong hanggan iglaban angko nogsyag ha hanya kitay, is Diyos faboyag ya fagayo fag manga taw aban, nyawa ka fiya it manga ogali, nyawa kadwa fiya. ¹⁶ Yakanga no baliday angko fagsyaganon, nyawa ginahin aho fag idwa ha fagtagahon kangko naibolon dwat, nyawa san Diyos faglagan, nyawa sas manga taw faglagan.

¹⁷ Kayodawak fangaraw ahodwa gis Hirosalim. Ginya, itfagonan, ahon fwali ya kaarakitay manibo ista tog-bong hangko manga kaiban, hanggan aho nangos

mandisag yadi han Diyos. ¹⁸ Kitonya nga kangko ibolon itfagonan ta no natahod angko sas Fanimbaan-Dahol. No kitay di, mintabo wagfatonglos hyami togonan nogfalinay no kinday ka maangay sa hyami Batasan Hodyo. ¹⁹ Bago bago sayok di fag manga taw ka sinya, idwa yadi ha gagran. Ginya madi araw, ka odi manga Hodyo gis Asya inbangkad sinya. Tonya nanggog ka fiya imbangkad hastay kati, ta no ha fagsogaton angko naibolon. ²⁰ Ngatay ka manga Hodyo, kastay kati, fag fwayong no kana kasta lagan dwat sangko ta no nataban angko has fanoltolan Hodyo. ²¹ Ngatay ta lomwang kitay aho nafalamang aho noglwang sasta fagdogan, Maskin hogsyag kitay ka manga natay imboyag ya, yakanga tagfahampangan angko kati. ²² Ginya madi, maskin is Filis danwa twa wagdog no kana tonya fag ogaliyon, ta nongngayan ka Ogali Bago, hanya nafaliban yapdin Pablo hampangan, nalwang, Ho bago di fatohoyan hayo hampangan, is Lisiyas nomdasog aban. ²³ Ginya nasogo yapdi hasta fagtahinan sondalo kitay, Bantayan in Pablo, dapat fag idwa mahigpit. Fag idwag bando it manga fakilalaon ta nogsabang hanggan igtogbong hanya. ²⁴ Nonsagaya fihin ik sirang, is Filis inbangkad ya, hanggan wat babay, is Dorosila, sadik ina Hodyo. Ta nafatawag in Pablo, ta kasayag dog no kinday no katiwala han Kiristo Hisos. ²⁵ Ginyas Pablo nogfadagos wagtoltol kawa has fiya fag ogali, has igfasad intam sadili, hanggan kitay ha fatohoyan has fadosaan aban, is Filis indala wagdog. Hanyag lwang, Nyawa haw lomahaw wa kati. Ho fatawag ya hyamo aban ho nodwa ha libang. ²⁶ Is Filis fagaba wagfatawag in Pablo, kampung hanya, maskin gasolop kitay ngandayos Pablo ha fagdisagon kwarta ha hanya. ²⁷ Dapat ay, nonsagaya dowak fangaraw, is Porsiyo Fisto natobos in Filis, hanggan is Filis nafabayaan yapdin Pablo basad porisowan maskin is Filis kasaya ka manga Hodyo fag baya hanya.

25 Yakangas Fisto indasog hat bato sakopon fag banwanan. Ginya madi nonsagaya tolok sirang, hanya nalahaw gis banwa Sisariya, hawas banwa Hirosalim. ² Ka manga fagtahinan fagalan-han-Diyos hanggan manga fagtahinan Hodyo sas Hirosalim nafwayong han Fisto kat sombong in Pablo naibolon dwat. ³ Ta nanagad kitay ka gobirnadofafwali ya nanggog in Pablo has Hirosalim maskin ta ha fangayofan kitay omolog hanggan fahatay hanya boknga dalan. ⁴ Is Fisto nasagot kitay, Is Pablo sadis Sisariya maporisowan a, hogdali yadi goli hanya. ⁵ Fatahinan wangko hayo manga fagtahinan. Hanya no orongan wa ha naibolon dwat, fag sinya wak fadog hayo sombong. ⁶ Is Fisto nadogay yapdi manga safolok sirang sas Hirosalim. Ginya bago di nwali has Sisariya. Nonsirang is Fisto natokaw sas fanokawan Fangabaya a, nafatawag yadi kitay, is Pablo fag imbangkad sinya. ⁷ Is Pablo nondasog di ngay ka manga Hodyo gis Hirosalim nasafong

hanya. Ta nafadog it manga sombong aywan, myasa wa mahori kadog fag manga sombong han Pablo. Dapat tadwa twag faorongan kat manga fagbangdanon. ⁸ Ginya madis Pablo igfatohoyan has taw it sadili ogali, iglwang kitay, Hodwa ha naibolon dwat kitay iglaban nyawa has Batasan Hodyo, nyawa has Fanimbaan-Dahol, nyawa han Sisar, ka gorangon Roma. ⁹ Dapat ay, is Fisto kasaya kitay ka manga Hodyo fag bomaya hanya, yakanga naintaw in Pablo kitay, Haw aw kasaya tam fag hawas Hirosalim kaarakitay sinya aho no tomabo im hampangan? ¹⁰ Is Pablo igsagot, Ho istay was gorangon Roma fanokawan fangabaya. Fag istay wa ham nogfatabo. Ha twa wan hodwa ha naibolon dwat has manga Hodyo. ¹¹ Aho no ha naibolon dwat, aho no ha naibolon nyawa kana fag bagay ka fiya fadosaon kahatayan, hodwa ha lwangon. Dapat nodwa ha fakaorongan ista sombong kawa hangko, ham idwa syagan tomaban angko has Hirosalim. Angko fakasayaon, fag hawan Sisar nogfatabo. ¹² Is Fisto naintaw it manga katogbong ka madonong twag dog ista katowidan. Ginya madi nalwang han Pablo, Kawa haw iglwang kitay, haw kasaya han Sisar ka gorangon Roma, haw hanya wan aban. ¹³ Ginya madi nonsagaya manga fihin ik sirang, is Gorangon Agripa, kan Sisar fadowa sinya fag banwanan, hanggan is Birinisi indasog sas banwa Sisariya, nasabang magalang in Fisto. ¹⁴ Ta no dogay wa ogbot sinya, is Fisto natoltol han Agripa kawa han Pablo baliwa, iglwang, Is Filis ha nafaporiso sadik ama gin Filis ginan hanggan wa hangko kati. ¹⁵ Aho no gis Hirosalim itfagonan, ka manga fagtahinan fagalan-han-Diyos hanggan ka manga fagtahinan Hodyo nanagad kitay fatohoyanan hanya has fadosaan. ¹⁶ Ho nasagot is taw kitay, ka ogali Roma idwag fadosa sadik taw, nyawa faktaw, nodya nangatohoyanan baliw baliw, kaarakitay kasta nasombong twag fatohoyan it sadili. ¹⁷ Maskin aho idwag fadogayon ta nondasog di ngay, nonsirang ho nafatawag wa dagos tonya fag taw has fanokawan fangabaya. ¹⁸ Ho gasolop kitay orongan wa ha naibolon dwat. Nonman no myasa wa sinya, tadwa ha fagsombongon orongan matohoyanan. ¹⁹ Dapat kasta fagdaraogon, kayadista fagsimbaon, hanggan ka odi sadik taw, is Hisos. Tonya fag taw natay wan hyabi, dapat ay is Pablo igfaaronganon kitay hanya hono boyagan wa kati. ²⁰ Hodwa twa no kana kangko fwayongon kawa to fag manga bagay, maskin nga ho naintaw hanya kitay ngatay fag sas Hirosalim nomtabot hampangan. ²¹ Dapat is Pablo idwag faangay, nafadog kitay hanya kasaya fag is Sisar ka gorangon Roma, ka fomwayong no kinday hat hampangan. Yakanga ho nafabantay hanya manga sondalo kaarakitay aho fatahin hanya han Sisar aban. ²² Ginyas Agripa iglwang han Fisto, Ho kasaya yadi manalinga tonya fag taw. Is Fisto nasagot, Bago marom haw domog wa hanya.

²³ Yakanga nonsirang da Agripa da Birinisi, mataka wa kalag, hanggan ka manga abwat fag fagtahinan sondalo hanggan ista fakilalaon fag manga taw sinya fag banwa, indasog hanggan nasakbaw has basad balay fanabowan hampangan. Ginyas Fisto nafatawag kitay, Tabanan in Pablo hastay. ²⁴ Ginyas Fisto iglwang, Hogfadog ha hyamo, haw, gorangon Agripa, hanggan has fagayo intam ofod istay, ka manga Hodyo nasombong angko sas Hirosalim, hanggan nyawa istay itfagonan, tagharinggitan kitay, to fag ama is Pablo, fag idwa boyagan. ²⁵ Dapat aho nogsolay gintaw, hodwa ha donggon fabangdanan hanya kaarakitay fadosa hanggan kahatayan. Dapat, kawa hanyag lwang kitay hanya kasaya has gorangon Roma, hogsogo wa hanya has Roma. ²⁶ Dapat ho gadowan maskin hodwa ha bato soraton fadiya han Sisar to fag taw it naibolon dwat. Yakanga ahog fatalinga yadi hayo, labi wa ha hyamo, Agripa, kaarakitay tam nomtabo wa gintaw hanya araw, ho ngandayo ha lagon angko bato soraton. ²⁷ No sangko, idwa fiya igfatahin han Sisar, ka gorangon Roma, sadik poriso, nodwa yadi ha fagfwayongon it naibolon dwat.

26 Ginya madi yabay is Agripa iglwang han Pablo, Nyawa haw tomoltol kati, kinday kam bato fwayongon im sadili? Is Pablo no nafaaman it gamat, kawa galang in Agripa, dagos wa nahampang nafatohoyan it ogali. ² Nalwang kitay, Tabi tabi Agripa, hogbaya wa dahol no haw ka tomalinga no kinday aho no fabohag araw has manga Hodyo kagsombong hangko.

³ Maskin haw twa wa fiya fiya ka Hodyo manga ogali hanggan manga fakahoriyon. No fiya di, ha fag gawantag talinga angko toltol. ⁴ Ka manga Hodyo fagayo twa wan no kinday angko ogali giyapdingko ogbot ginan sangko sadili banwanan, hanggan sas Hirosalim. ⁵ Ta fadi wadtwa angko manga ogali, hanggan ta no kasaya, ta syagan yadig faanod kitay, hyabi aho mahogod nogfasakop has mahigpit fag layonan sas manga Hodyo, ka layonan manga Farisiyo. ⁶ Ginya madi kati, tagfabali hampangan hangko kawa hogsyag han Diyos natogon bato disagon hantam manga hafofowan. ⁷ Tonya mandi ka safolo ha dowak layonan Hodyo fagsyagon maskin ngay ta mahogod wagsimba han Diyos, yabi sirang. Tabi tabi, gorangon Agripa, ginya mandi fagsyagon ka manga Hodyo fagsombong angko. ⁸ Kana mayon ta no gayfan kitay, is Diyos idwa faboyag domwag ka manga natay, ham gayfan? ⁹ Hyabi hanggan aho, ho gayfan aho fag lomaban fiya fiya ka ngayan is Hisos, gis Nasarit. ¹⁰ Kitonya nga ngap kangko naibolon sas Hirosalim. Bondi kitay aywan fag mangan tiwala han Hisos kangko nafaporiso, kawa ka manga fagtahinan fagalan-han-Diyos igfasognod, dapat hanggan ta no nafaampo was taw fahatay, hanggan aho, aho nafaoyon yadi wan. ¹¹ Sas fagayo fag manga fanimbaan Hodyo, nyawa faktaw

kangko tahodon sinya kantiwala han Hisos, hogfadosa kaarakitay pomilit homampang domayo in Hisos. Maskin ho kalabi wan no gisog has taw, ho hanggan wa naoyan nyawa siday fag banwa sas iba fag layonan daga. ¹² Yakanga tonya nangos kangko bato ibolonon aho no hawas banwa Damasko hyabi. Gis nanya ho ha diya manga kasoratan gis manga fagtahinan fagalan-han-Diyos, faangay fahoriyan ka mangan tiwala han Hisos. ¹³ Ay ay, tabi tabi, Agripa, no boknga wa sirang, hami noglahaw yapdi has Damasko, mi nalag nayawa gim tongod, bondi kitos myanit no masilaw. Nayawa masilaw wa dahol dahol sa hyami ligongan fagayo. ¹⁴ Hami fagayo inlohob has baba daga. Ginya ho nadog sadik hasnog, nahampang hangko sas fangampangan Hibriyo, nalwang kitay, Sawlo, Sawlo, kana mayon haw nogfahoriyan angko? Haw mandi kamikitan haw nogsihad ka hayo madogi kagfasognod hyamo. ¹⁵ Yakanga ho naintaw. Faktaw haw, angko Fon? Hanyag lwang, Aho is Hisos, kam fagfahoriyon. ¹⁶ Haw fag kalindog wan, maskin aho nafalag angko sadili ha hyamo kati, kaarakitay aho fatohoyan hyamo hangko faibolonon hyamo. Haw aban faorongon has taw ka hyamo lagan kati, hanggan angko bato falagon ha hyamo aban. ¹⁷ Ho bomawi hyamo gis manga Hodyo hanggan gis manga Hintil, kangko fagsogoon hyamo. ¹⁸ Aho somogo hyamo hanya fag manga taw, kaarakitay ista manga mata fangayofan lomag wan hanggan fafwali ya has mayawa gis marom, fafwali yadi han Diyos gin Satanas karigonan. Ta nogsyag angko ho faliyam ista manga ogali dwat, tam-aktom yadi hangko sakop fag manga taw kangko nafatohoyan hangko sadili. ¹⁹ Maskin kitonya, tabi tabi, Agripa, ahodwa nafasigpala angko lagan madolaw gin Diyos. ²⁰ Bago bago ho nabarita has banwa Damasko, ginya has Hirosalim. Ho nabarita yadi sadi wak dahonya Hodiya, ginya madi hanggan wa has manga Hintil. Hogfwayong has taw kitay, tam fag somoyo, tam fag kafwali ya han Diyos, fag intam manga ogali kanbago kagfaorongon kitay tam nasoyo wan. ²¹ Kawa tonya fag manga bagay ka manga Hodyo maskin naiktan angko, aho no sas Fanimbaan-Dahol. Ta fahatay wa nangos angko. ²² Dapat ay, balis kati is Diyos idwa nafabayaan angko, yakanga kati aho malindogan yapdistay, hogfaorongon to fag manga bagay has mangadwa ha kangayanan, hanggan has manga gorangon. Ahodwa ha fagfwayongon no bonwa kan Diyos manga fangampang hanggan in Mwisid fwayong kitay imlag aban, ²³ kawa kan Diyos-natogon-Famawi fag lomag mahori, ginya madi hanya fag ka gomona imboyag ya domwag kaarakitay falag kayawaan has manga Hodyo hanggan has manga Hintil. ²⁴ Is Pablo no kampang yapdi igfatohoyan it ogali, is Fisto nafwayong marigon, Pablo, haw kapaong wan. Im katonongan iglabi wan maskin nga haw kapaong

wan. ²⁵ Dapat is Pablo nasagot, Tabi tabi, Fisto, aho bonwa kapaong. Fakaoronganan wan, maanod yadi wan kangko fagfwayongon fagayo fagayo. ²⁶ Istay wa kati is Agripa, in Sisar fadowa istay fag banwanan. Hodwa fagomon homampang hanya maskin hanya twa wa tonya fag manga bagay, fagayo fagayo. Bonwas fyaloman tonya non-anod, yakanga matohoyanan hanya nadog wan. ²⁷ Tabi tabi, Agripa, haw aw katiwala wan Diyos manga fangampang fwayong hyabi? Ho twa wa kitay haw katiwala wan. ²⁸ Is Agripa nasagot han Pablo kitay, Haw nogtoltol hangko manga sadik tama sinyahod, haw ngandayo gayfan kitay, haw igfabali angko in Kiristo taw. ²⁹ Is Pablo igsagot, Nyawa ngalay, nyawa dogay aho nogtoltol, angko fagdaranginon kitay, fag bondi haw, dapat fag fagayo kagdog angko manga hampang kati, fag imbali nangos kito yadingko, dapat fag idwa nangos magafosan. ³⁰ Ginya madi ka gorangon hanggan ka gobirnadador hanggan is Birinisi hanggan it manga ofod fagayo nalindog a, ³¹ nadokson wan. Kiti kasta toltolan, To fag taw idwa gibolon dwat, nyawa kana kaarakitay fatohoyan hanya has kahatayan, nyawa has porisowan. ³² Ginya madis Agripa iglwang han Fisto, Nonman to fag taw nafahasa kitay fag ka gorangon Roma ka tomalingat hampang, fiya wamtabo no kitay di, malfas yadi wan.

27 Nontohoyan kitay hami somahay baba dagat, hawas layonan daga Italya, ta nafabantay in Pablo hanggan ka tibak manga poriso han Holyo. Is Holyo sadik fagtahinan sas tifonan sondalo Roma, tagngayan, In Sisar tifonan. ² Mi nasahay ha sadik sahayan baba dagat ka gis banwa Adramitiyo, ka kaginan wan hawas manga fangadagsaan sas sakop Asya. Ginya yabay min-ginan wan. Is Aristarko gis banwa Tisalonika, sakop Masidonya, naofod hyami. ³ No bago marom mi natorosan sas banwa Sidon. Is Holyo mahoway han Pablo, nafaangay di nyawa manabang hat manga fakilalaon kaarakitay ta tomogbong hanya. ⁴ Ginya madi min-ginan ya ngawan ginya. Maskin ka bagyo igtagbo wa hyami, mi nabaybay has salogan myanit baliwa foyo dagat Sipri, has faroman bagyo bangan. ⁵ Ginya mi no nadalan has masohod sakop Silisya hanggan sakop Panfilya, mindagsa has Mira, sadik banwa dahol sas sakop Lisy. ⁶ Ka fagtahinan sondalo nalag sinya sadi yak sahayan igdalan gis banwa Alihandriya, hawas layonan daga Italya, yakanga nafasahay hyami sinya. ⁷ Hyami sahayan kabayan kaoson, magomo wa dahol dahol iglahaw, aywan ik sirang baba dagat. Minhori wan bagon dasog has masohod banwa Ginido. Gis masohod Ginido midwa nasyagan nadagos has fakadaholan dagat, maskin ka bagyo igtagbo wa hyami. Yakanga mi nabaybay ya ngawan, has salogan myanit baliwa foyo dagat Kirita sas faroman bagyo. Mi nadalan sas fakaogbotan danom sas masohod banwa Salmon. ⁸ Mi naagwanta wagbaybay

las bahalan bahalan kaarakitay mimdasog ha sadik forowan balay kasta fagngayanon, Fiya fag dagsaan, akbang has banwa Lasya. ⁹ Kawa dogay hyami sahayan itfagonan, insagaya wa fanlahawon, madala wa kasahay has baba dagat, maskin ista tandaan insagaya wan ka sirang Fanohodan ka manga Hodyo nodwa kwan hanon. Yakangas Pablo igfatagak is taw, ¹⁰ iglwang, Manga taw ham, tam no lomahaw kati, mahori aban intam sahayang hanggan it sohad, nyawa ngap ka tam, madala wan. ¹¹ Dapat ka fagtahinan sondalo natalinga man hasagfon sahayang hanggan hasag falahaw. Idwan tiwala in Pablo fwayong. ¹² Kawadwa fiya igdogayan sinya fag fandagsaan sahayang dayo abagat, ka fakaaywanan iglwang kitay, fiya man tam no lomahaw ya, tagfahasa kitay fag masog nangos has banwa Finisi, ka sadik fandagsaan sahayang sas foyo dagat Kirita sas sangdayan myanit baliwa. Yakanga sinya fiya di nogdogayan no abagat yapdi. ¹³ Ginya madi ka bagyo nogfarayfayan ogbot gis balitangan baliwa, ta gayfan fiya wa nga nogfalahaw it sahayang has baba dagat. Yakanga ta nafasakbaw ka famondo sahayang, ta naaroyan has akbang foyo dagat Kirita. ¹⁴ Dapat idya dogay araw, sadi odi ginan, ka gorangon fag bagyo amihan indasog wan gis foyo dagat baliwa. ¹⁵ Ka bagyo nasirig dahol dahol hasta boknga sahayang baba dagat. Ka sahayang idwa syagan iglaban ka bagyo, yakanga mi kadiya odi. ¹⁶ Hami no nafafarom ha sadik foyo dagat ogbot, it ngayan Kalawda, nyawa mahori wa dahol, mi nafasahay ka baloto ogbot ogbot has basad sahayang ka dahol. ¹⁷ No sawas basad sahayang, ta nahalawid wan ka ogbot fag baloto has dahol fag sahayang, dahol yadi fag lobid. Ginya mi noglahaw ya, ta nafalibaba ka layag maskin ta kadala kitay ka sahayang ngandayo imgarod ha sayo bato, yakanga migfalimos odi. ¹⁸ Nonsirang wan, kawa ka bagyo igfatowang towang yapdi hyami sahayang, tagfabago wa gokas ka sahayang manga diya. ¹⁹ No domwag sirang, ta naokas yadi ka sahayang manga sangkap tiba. ²⁰ Kawa fagaba malinyabo, dogay midwa nalag myanit no sirang, midwa yadi nalag manga fanggasan no yabi, hanggan ka marigon fag bagyo idwa kasiwang. Yakanga mi gayfan mi fawa malfas, isyay wan. ²¹ Maskin dogay wan ka sas basad sahayang idwa ha nahwan hanon, is Pablo nalindog a, nalwang, Ham angko manga ofod, ham nangos no natalinga dingko, tam idwa nalahaw gis foyo dagat Kirita. Yato araw tam idwa kitoy basad mahori. ²² Dapat ay, angko fagfwayongon ha hayo kati kito, Fag marigon hayo manga fangayofan maskin tam fagayo idwam kinday, nonman ka sahayang imdwat wan. ²³ Maskin is Diyos kangko fagsimbaon hanggan fakatanogon nafalag hangko sadik anghil sayabi. ²⁴ Ka anghil nalwang hangko, Pablo, haw fag idwa kadala, matohoyanan haw lomindog yapdi san Sisar atobangan. Kawa haw

istay yadi sas sahayon, is Diyos bomawi yadim manga ofod. ²⁵ No kitonya, tam fagayo fag marigon intam manga fangayofan. Maskin hogsyag in Diyos kitay imanod wat fwayong. ²⁶ Dapat ay, intam sahayon imtoktok yapdi ha sadik foyo dagat. ²⁷ Safolo ha ofat ik yabi ka bagyo nogfadiya diya hyami baba dagat Adriyatiko. Ginya madi araw, no kaboknga wa yabi, ka manga fangibolon sas sahayon natwa wagdog kitay ta kaakbang has fakalibabawan. ²⁸ Ta nafasohod lobid kat kaabasadan dagat. Taglag dowak safolok dofa it kaabasadan. Mi no naoson ya ogbot, taglag safolo odi ha limak dofa. ²⁹ Kawa ta kadala wa kitay imtoktok ha sayo bato, ta nafadagdag ofat ik famondo sahayon sas ginanan. Tagdarangin wa kitay, fag imsirang wa nangos. ³⁰ Basad yapdi marom, ka manga fangibolon tiba kasaya lomihos is taw. Ta natonton ha basad danom kasta nafasahay baloto itfagonan. No kalag di, ya hono, tagfatonton di famondo sahayon sas fagonan, ya mangharaw, ta kalihos wan. ³¹ Dapat is Pablo nalwang has fagtahinan hanggan has manga sondalo, To fag manga taw no lomihos di, tam idwam bawi. ³² Yakanga ka manga sondalo nalifong ka siyok a, nafadagdag lamang kasta fagfatontonon baloto ogbot. ³³ No kasirang wan, is Pablo igfaaronganon has taw fagayo kitay, ta fakwan hanon. Nalwang kitay, Safolo ha ofat ik sirang ham idwa ha nahwan. Ham kalibang odi galibitan igfanaya no kadasog. ³⁴ Tam fakwan wan. Tam nodwa mangwan, tam ara idwa malfas. Gwadi tam idwam kinday. ³⁵ Is Pablo nalwang di nga kitonya, nabangkad tinapay, nafasalamat han Diyos sasta faglagan fagayo. Ginya nafaarogbotan ka tinapay. Yabay, igfabago kwan. ³⁶ Ka manga taw insayag lag, ta nangwan yadi. ³⁷ Hami fagayo, 276 taw. ³⁸ Mi no napsog wan, ta naokas ha basad dagat ka tirigo kaarakitay ka sahayon imhagan wan. ³⁹ No mayawa ogbot araw, ta nalag sadik foyo dagat, dapat tadwa kilala no kana fag banwanan tonya. Taglag sas bahalan ha onay ogbot. Ista fangayofan ta fadagsa sinya ka sahayon nomtwa di. ⁴⁰ Yakanga ta nabogloy ka lobid gis manga famondo, naobon wa sinya basad dagat. Ta nalohas yadi wa ka tahod gis famalahaw kagfahaslong. Ginya ta nafaabwat ya ka layag sahayon sas fagonan baliwa, kaarakitay ka bagyo domiya ka sahayon has bahalan, hanyas onay nangos. ⁴¹ Dapat ka sahayon intansak has fakalibabawan has fagonan baliwa, it baliw inlogbob, yakanga idwa kabol. Dapat ay, balis habot baliwa, kamin wa kadwat maskin ka taob myasa wa marigon nogbakkak. ⁴² Ka manga sondalo fangayofan ta fahatay lamang ka manga poriso fagayo kaarakitay idwa ha omabang, idwa malfas. ⁴³ Dapat ka fagtahinan manga sondalo kasayag bawi in Pablo. Yakanga hanya nabando ka manga sondalo kitay, fag idwag fahatay ka manga poriso. Ginya madi, hanya nalwang has manga taw ka madonong gabang,

Ham fag lokso ha basad dagat. ⁴⁴ Nalwang has tiba, Fag bol tabla, manga lifong hayo gis sahayon, ginya fag sahay sinya. Yakanga hami fagayo indasog has bahalan dagat.

28 Mi no nalfas gis basad danom, mi nalahaw has bohid. Mi bago di natwa kitay tonya fag foyo dagat it ngayan Malta. ² Ka manga taga sinya tan-awa wa dahol dahol hyami. Maskin natoyongan wa dahol dahol, magnaw ya ngadi, ta nafagba afoy, naano wa fiya fiya hyami. ³ Is Pablo igligaw ya ngadi hayo famagba. No nafagba has afoy kat lagan hayo, ha abyanon mangharaw inbangkad gis basad hayo. No kyanit afoy, nahoskos san Pablo boknga gamat, nahagat hanya. ⁴ Ka manga taga sinya no nalag ka abyanon mahoskosan san Pablo boknga gamat, tagtoltolan ha sadi ha sadi, ta gasolop kitay, To fag ama, mangharaw, ha nafahatay taw. Hanyan bawi ongay gis basad dagat, dapat ka sas tongod idwag faangay kitay hanya fag boyagan yapdi. ⁵ Dapat is Pablo nafadagdag lamang ka abyanon has basad afoy, idwa yadin kinday. ⁶ Ka manga taw igdoro in Pablo, ta gayfan hanyam baga, ngatay makfo sadi odi ginan, matay wan. Ta no dogay wa madorowan, hanggan hanyadwan kinday, ta nafaoman it fangayofan, taglwang, To ngan wa ngap sadik diyos. ⁷ Gis nanya fag masohod is Pobliyo ka fagtahinan sinya fag foyo dagat. It manga fangiyaban sinyas gobang dagat. Kawat fangayofan wa kitonya, hanya nafaoliyanan hyami sat balay manga tolok yabi. ⁸ Natoon gis nanya kitay, in Pobliyo ama maigyanan kagnaw ya, gifot ya. Ginyas Pablo namantay hanya. Nontabo wagdarangin, is Pablo nafwalid it gamat has ha sagit, ginyan fiya wan. ⁹ Kawa kitonya, ka tiba taw ka ha manga sagit igdasog wa ngay gis baliw gis baliw. Is Pablo nafafiya yadi tonya. ¹⁰ Ta nagalang hyami, yakanga aywan ista natogbong hyami. Ginya mi no kalahaw wa aban, aywan ista nadisag ha hyami, nafa-hosto hyami manga sangkap fagayo has lahawan. ¹¹ Ginya madi, nonsagaya tolok magdanon, mi bago din-ginan ginya. Mi nasahay sadi yak sahayon gis banwa Alihandriya, ka danwa matarosanan sas faroman bagyo, igfasagaya yapdi abagat sinya, it ngayan, Da Kastor da Polok. ¹² Ginya madi mindagsa tolok sirang sas banwa Sirakosa. ¹³ Ginya mi nadagos has baba dagat has banwa Rigyo. Nonbago marom, nabagyo ogbot gis balitangan, yakanga sas fadowa fag sirang, mindasog madali has banwa Potyoli ¹⁴ Mi nalag manga fadwasay sinya. Taglwang kitay mi nangos fag domogay yapdi sinya sadik simba. Ginya madi mindasog has banwa Roma. ¹⁵ Intam manga fadwasay sas Roma, no nadog kitay mi kaakbang wan, ta hawas fanaliyan Foro Apiyo, hanggan has Fandasogan Tolok Balay, kaarakitay tomagbo hyami. Is Pablo no nalag was taw, hanyag baya wa han Diyos, inrigon yat fangayofan. ¹⁶ Ginya mi nondasog has basad banwa Roma, ta

nafaangay kitay is Pablo fag lomag it sadili fagoliyanan fag balay, dapat fagaba ha bantay di sondalo. ¹⁷ Non-sagaya tolok sirang, is Pablo nafatawag ka manga fag-tahinan Hodyo kaarakitay ta manoltolan. Ta no matifonan wan, is Pablo iglwang, Angko manga kaiban Hodyo, no kitay di hodwa ha naibolon dwat iglaban intam manga iba, nyawa hantam manga ogali magorang. Dapat kapariho manga Hodyo nagamat angko sas Hirosalim. Ta nasombong has mangag bahala sas gobirno Roma. ¹⁸ Nontabo angko hampangan hyabi, no kitay di hogdog ka gis gobirno Roma fomalfas wangko, maskin hodwa ha naibolon dwat ka fiya fadosaon kahatayan. ¹⁹ Dapat ka manga Hodyo idwag faangay, yakanga, nyawa hodwa ha bato fagsombongon iglaban intam manga iba, hogpilit wagsyag has gorangon Roma. ²⁰ Kati aho magafosan kawa ha hanya, kan Israil manga hasokfonan fagfahasaon. Kawa kitonya hogsagad kitay tam fag mangampangan wan. ²¹ Ka manga Hodyo nasagot, Midwa ha natanggap sorat gis Hodiya kawa ha hyamo. Nyawa gintam manga iba kagsabang hastay, tadwa ha nafadahit kitay haw sadik taw dwat. ²² Nyawa kitonya mi kasaya domog im toltol maskin mi twa kitay nyawa siday fag banwanan manga taw igfwayong aywan fag manga bagay, igfadwat igdog tonya fag layonan taw it fakatiwalaon. ²³ Yakanga ta nafatohoyan sadik sirang kitay gis nanya aban ta manifonan. Nondasog gis nanya fag sirang, aywan kanbangkad han Pablo balay. Sadi wak sirangan is Pablo igtoltol has taw, igfaorongon kawa

han Diyos sakop baliwa. No baliday in Pablo fagsyaganon, hanya nafatiwala manga taw han Hisos, nogtoltol gin Mwisid manga togon hanggan gin Diyos manga fangampang nasorat. ²⁴ Ha akwan tiwala in Pablo nafwayong, ha akwadwan tiwala. ²⁵ Yakanga tadwan sadi, ta nanarowayan lamang. Is Pablo iglwang yapdi kiti fag manga hampang, Orongan wan ka Maliyaw fag Falad fwayong gin Isayas, in Diyos fangampang, no nafwayong ha hayo manga hafofowan, ²⁶ Haw fag hawas manga taw, haw fag fwayong hanya, Nyawa ham igtalinga wagtalinga wan, ham idwa tomwagdog, Nyawa ham igbantay wabantay wan, ham idwa lomag. ²⁷ Maskin ista manga fangayofan idwag sarom it kahologan, Tagfabongkohon wan it manga talinga, Tagfotihan wat manga mata, Maskin ta dayo wag lag, Dayo wag dog, Dayo tomwagdog, Dayo yadi kafwali hangko kaarakitay hogfafiya is taw. ²⁸ Is Pablo igdogang yat hampang, iglwang, Ham fag twa kitay to fag barita gin Diyos, no kinday tam nombawi, fadog yadi aban has manga Hintil, hanggan manga Hintil tomalinga wa fiya. ²⁹ Is Pablo nontabo wagtoltol, ka manga Hodyo nalahaw wan. Ta mahogod wadaraogan. ³⁰ Is Pablo nabanwanan sas banwa Roma sat nagtangdanan fag balay manga dowak fangaraw. Nafasakbaw fagayo kagsabang hanya. ³¹ Nogfaadal kawa han Diyos sakop baliwa, hanggan kawa han Kiristo Hisos kagfon intam, idwas fyaloman, idwa yadi ha nabando hanya.

ROMA

¹ Ahos Pablo, in Kiristo Hisos nasali sogowan. Hanya nafatawag angko kaarakitay ahom bali it Fandiya-Barita, nafabokod yadingko hastay fag ibolon. ² Hyabi yapdi is Diyos nafasorat hat manga fangampang it Fiya fag Barita sas manga Kasoratan maliyaw. ³ To fag Fiya fag Barita kawa hat Anak, is Kiristo Hisos, kagfon intam. No has habilogan taw baliwa, hanya gin Dabid hasokfonan, ⁴ dapat ay, no hat Falad ka-halyawan baliwa, intohoyan kitay hanyan Diyos wa Anak, ka ha akwa it sadili karigonan, maskin inboyag ya gis kahatayan. ⁵ Gi mandin Hisos hami natanggap in Diyos disag fiya kitay, maskin mi galwasi in Hisos, hami fag imbali it manga Fandiya-Barita, kaarakitay igtaban manga taw gis fagayo fag manga layonan daga, hasagsyag in Hisos hanggan katanog hanya. ⁶ Ham manga taga Roma, ham in-aktom yadi wa sinya, maskin ham yadi kan Diyos manga nafatawag. ⁷ Maskin ngay hogssorat ha hayo fagayo sas banwa Roma, kan Diyos manga fagalwasiyon, kat nafatawag kaarakitay ham imtohoyan ha hanya. Ham nangos fag domog kitay, is Diyos, intam Ama, hanggan is Kiristo Hisos, kagfon intam, mahoway ha hayo fagaba, hanggan igfalokmay hayo manga fangayofan. ⁸ Bago bago, hogbaya han Diyos gin Kiristo Hisos, kawa indog wa fiya fiya sadik dahonya baba daga kitay ham katiwala in Hisos. ⁹ Ho gibolon in Diyos ibolon aho nogfaadal mahogod ka Fiya fag Barita kawa hat Anak, yakanga hanya twag faorongan kitay, aho fagaba wagdarangin kawa ha hayo. ¹⁰ Aho fagaba wagsagad kitay, aho nangos fag lomag halimbawan kaarakitay somabang has nyamo hayo, is Diyos nogfaangay di. ¹¹ Ho gwayan wa kasaya lomag hayo, kaarakitay ho fahoray ha hayo manga disag has fangayofan baliwa, ka mamarigon ya domwag hayo manga fangayofan. ¹² Ka orongan angko bato fwayongon, ho kasayag sabang hayo, kaarakitay tam igtarogbongan igfaridrigonan ha sadi ha sadi, kawa tam pariho igsyag han Diyos. ¹³ Manga fadwasay, hogfadog ha hayo, aho fagaba wagfatalaga, aho kalahaw wa nangos has nyamo hayo, no kitay di, dapat idwa katonglos. Ho kasaya yapdig fatiwala nangos han Kiristo tiba is nyamo hayo, kito kangko nafatiwala manga Hintil sas tiba banwanan. ¹⁴ Aho ha sago-ton mamaadal has fagayo, nyawa ka sas banwa, nyawa ka sas manga moyod, nyawa has manga naadal, nyawa has manga idya ha nagadalan.

¹⁵ Maskin kitonya, ho kasaya wa dahol mamaadal ka Fiya fag Barita is nyamo hayo sas banwa Roma. ¹⁶ Hod-wa kayag fadog has taw ka Fiya fag Barita, maskin tonyan Diyos wa katonongan kagbawi fagayo fagayo ka mangag syag hanya, bago bago manga Hodyo, ginya madi hanggan wa manga Hintil. ¹⁷ Ka Fiya fag Baritag Iwang is Diyos igfatohoyan kitay, tam manga taw nangafiyon wa han Diyos tam nogsyag hanya. Sinyat fabagowanan, sinya yadi wa kat nakatabowanan, tam nogsyag hanya. Kito kansorat, Ka mangag syag in Diyos nangafiyon wa hanya, hanggan fagaba boyagan. ¹⁸ Kawas Diyos igfadog git banwanan sam tongod kitay, hanya kaisog is taw kawag sagaya wa ogali ta nogsway hanya, yakanga tagtaktak ka fakaorongan. ¹⁹ Is Diyos kaisog has taw maskin ka han Diyos baliwa, malpos tohodon, twa wa kadog, kawas Diyos igfatohoyan has taw. ²⁰ Gi yapdis kalig daga, manga taw noglag in Diyos manga nahalig, katwa wagdog no kinday is Diyos, kadwa malagan, kakitay kalag kan Diyos katonongan kadwa ha katabowanan, hanggan katwa wagdog kitay hanya ka Diyos orongan. Yakanga manga taw idwa ha fabangdanan. ²¹ Nyawa ta twa kitay ha akwa wa Diyos, tadowag galang hanya, idwa yadig baya hanya kito ka maangay. Yatokitay, ta gisip di ngap kadwa ha kahologan. Ista manga fangayofan kaidagdog odi, inharom wan. ²² Tagfaniring kitay ta madonong wan, dapat ay, inlag kitay manga taw paong paong odi, maskin ²³ tagdayo di ngap in Diyos kafiyon, ka Diyos kadwa katay, hadi ngap is manga tolad ta nogsyag, manga tolad odi taw ka katay, manga tolad manok, manga tolad hayopan, manga tolad odi ka manga gilafang, ta nogsyag. ²⁴ Yakangas Diyos igfabayaan was taw hasta ogali has kahayan baliwa, manga ogali dwat ha sadi ha sadi has habilogan. ²⁵ Maskin tadwa kasayagdog no hadin Diyos, nyawa hanya ka orongan, kasaya di ngap igdog has mangadwa orongan. Kasta faglohodon, hanggan fakatanogon ka odi manga bagay kanhalig, bonwa ka Nahalig fagayo. Nangos fag ka Nahalig kantam fagbayaan, hanggan wa aban aban. Fag kitonya wa ngay. ²⁶ Yakangas Diyos igfabayaan wan ka manga taw has mahaya wa dahol fag manga ogali has taw baliwa. Manga ina kafang igdoyog has ama, igdoyog di ngap has kapariho ina. ²⁷ Kitonya yadi ka manga ama kafang igdoyog has ina, kapariho ama it fakasayaon fagdoyogon. Gi-

bolon mahaya has kapariho ama. Yakangas Diyos igfadosa hosto sat manga sadili, ka gibolon kitonya fag dwat. ²⁸ Maskin ta dayo igtohod ka fakaoronganan han Diyos baliwa, is Diyos igfabayaan wan ista manga fangayofan has manga sitam sitam, yakanga manga taw gogali kadwa fiya. ²⁹ Ista manga ogali sonson wa dwat, gisip odi ka dwat, masayaon ya ngadi, kasayag fahoriyan has taw. Maingliyon ya, iglibon taw, igdaraoan ya, madayaon ya, mafadahiton ya. ³⁰ Igfadwat igdog has taw, kaisog in Diyos. Idwag galang has manga taw, ha takan ya, mafasalagwaon ya, igsayak ya domwag has kadwatan, fanway hat magorang. ³¹ Manga idagdog wa dahol dahol, idwag fatonglos it manga togon. Idwa mahoway has tiba taw, idwa twa kaawa. ³² Is Diyos fadi wadagfadala wagdog is taw kitay, ka gogali kitonya, fag matay wan, dapat tagfadagos di ngap gogali kitonya fag dwat. Hanggan bondi kitay kitonya, tagbaya di ngap iglag tiba taw no gogali yadi kitonya.

2 Yakanga, haw awkin ka kabaya ka tiba, ha gayfan? Ongay, hadwa ha faglwangon, nyawa faktaw, maskin haw no gogali kito yadi kam fakabayaan, haw igfathoyan yadim sadili has fadosaan. ² Tam twa kitay fakafiyon wan is Diyos nogfathoyan has fadosaan, ka manga taw ka gogali kitonya. ³ Haw no gogali kito yadi kam fakabayaan, ha awkin gayfan is Diyos idwa fathoyan hyamo has fadosaan? ⁴ Ngatay ha gayfan kitay ogbot di fag bagay kawas Diyos mahoway wa dahol, maagwantaon, idya dagos kaisog? Ha awkin idwa twa kitay is Diyos mahoway wa dahol ha hyamo maskin igfanaya yapdi kitay, haw nangos fag somoyo wan, fag fabago im fangayofan? ⁵ Dapat im fangayofan magan-it, no hadisagsoyo baliwa, yakanga hagfabagat wagfahabyat is Diyos nogfadosa hyamo sas katabowanan fag Sirang mahalga. Gis nanya fag Sirang in Diyos kaisogan hanggan it kahaslongan imlag wan hanya nogfadosa has manga taw. ⁶ Maskin hanya ka gomanti has fagayo fagayo fag manga taw, no kinday ista manga naogali. ⁷ Is Diyos domisag haboyagan idwa ha katabowanan has manga taw ka fadagos gogali has fiya, maskin ta kasaya ka fakafiyon, ka maangay, hanggan ka haboyagan kadwa ha katabowanan. ⁸ Dapat ay, is Diyos omisog marigon ka manga taw ka fagabag daraogan, dayo katanog ka fakaoronganan, katanog odi ka manga dwat fagaba. ⁹ Fagayo kagfadagos gogali has dwat lomah mahori, maalibitan wan, bago bago manga Hodyo, ginya hanggan manga Hintil. ¹⁰ Dapat ay, is Diyos domisag it kafiyan, kangayanan, hanggan kahowayan has fagayo kagfadagos gogali has fiya, bago bago has manga Hodyo, ginya hanggan has manga Hintil, ¹¹ maskin is Diyos idwa ha fagihidon taw. ¹² Ka manga Hintil idyapdi nadog ka Batasan Hodyo, yakanga ta no gogali dwat, hawas kadwatan, nyawa bonwa ka Batasan Hodyo kagfathoyan. Dapat,

ka manga Hodyo ha akwa ka manga Batasan Hodyo, yakanga ta no gogali dwat, ka Batasan ka mamatohoyan has taw it fadosaan. ¹³ Maskin is Diyos iglwang ka manga taw kagtalinga hanggan katanog ka Batasan Hodyo ka nangafiyon hanya, bohondi kitay, ka mangag talinga odi. ¹⁴ Ka manga Hintil no danwa gogali has fiya, ka maangay sas Batasan Hodyo, nyawadyan sakop sinya, inlag wa kitay ha akwa yadit sadili batasan. ¹⁵ It manga ogali no fiya kitonya igfathoyan kitay ka Batasan Hodyo fakasayaan bilang wansorat sasta basad fangayofan. Gista sadili isip kagfathoyan yadi tonya, maskin it sadili fangayofan ha fagtagahon nomtoon, nomtoon kabaya, nomtoon igbaliwat sadili naogali. ¹⁶ Yakanga, angko fagfwayongon Fiya fag Barita iglwang kitay, tonyam anod wan sas Mahalga fag Sirang aban, is Diyos nogfathoyan ngatay fiya, ngatay dwat ista manga fangayofan, is Kiristo Hisos nogfathoyan yadi fagayo fag manga taw it manga fagayfanon kadyag fadogon has tiba taw. ¹⁷ Dapat haw noglwang kitay, Aho Hodyo wan, hanggan igsyag kitay haw fiya di, kawa haw nadog ka Batasan Hodyo, igfadaholon yadi kitay haw in Diyos wa nafili, ¹⁸ haw natwa wan in Diyos fakasayaan, ha kilala wan ka fiya fag manga ogali maskin ka Batasan Hodyo kagfwayong. ¹⁹ Sama, ya hono haw noglwang, haw wa ka gamit ka bilang bota, haw kagfayawa has manga taw basad marom, ²⁰ no kadog di, haw ka kabaya man ka mangag falamang, haw kagfaadal has manga idya twagdog fiya fiya, maskin haw ha botang ka Batasan Hodyo, haw gayfan haw twa wa fagayo, hanggan im fwayong sonson wa orongan. ²¹ Haw igfaadal has manga iba, dapat ay, haw awkin igfaadal yadim sadili? Haw igfaadal kitay fag idwag nahaw, dapat haw awkin ignahaw yapdi? ²² Haw iglwang has taw fag idwag fabayowan, dapat haw awkin igfabayowan yadi? Anod, haw kadwat iglag manga tolad faglohodon, dapat haw awkin ignahaw lamang ginya fag manga fanimbaan? ²³ Haw igfadaholon hyamo kitay, haw igfasakop has Batasan Hodyo, dapat haw awkin igfadwat igdog in Diyos maskin hadwa katanog ka Batasan Hodyo? ²⁴ Anod wan, insorat kitay, Maskin tam manga Hodyo idya fiya intam manga ogali, yakanga ka manga Hintil igyod in Diyos. ²⁵ No kadi kitay haw intoli wan, ha fakina-bang wan haw no katanog ka Batasan Hodyo. Dapat, idwa ha kahologan haw nontoli, haw nogfalamang ka Batasan. ²⁶ Sadik Hintil it ogali no maangay sas Batasan Hodyo, nyawa hanya idyan toli, is Diyos noglag, hanya bondi kito kantoli ik fiya. ²⁷ Yatokitay, ka mangadwan toli fathoyan man hayo, ka mangan toli has habilogan, fathoyan hayo has fadosaan, maskin ka mangadwan toli katanog ka Batasan Hodyo, dapat ham ka ha akwa ka Batasan Hodyo insorat wan, ham di ngap kagsway tonya. ²⁸ Ham bonwa orongan manga Hodyo, nos Diyos kaglag, ka odi kitay in-ngayan

Hodyo maskin hayo manga magorang manga Hodyo, hanggan ham intoli odi sas habilogan. ²⁹ Dapat ay, kanbago it fangayofan ka orongan wa Hodyo nos Diyos kaglag. Ka mahalga san Diyos, ka manga taw ka ha tandaan sas fangayofan, bonwa ka tandaan toli sas habilogan, ka Batasan Hodyo fagfwayongon. Is Diyos, bonwa manga taw, kagfasayagdog has taw ka ha tandaan sas fangayofan.

3 No kitonya mangharaw, kanat fakinabang tam no manga Hodyo? Kanat fakinabang nontoli, ham gayfan? ² Aywan fag fakinabang. Bago bago, is Diyos nafabahala has manga Hodyo it manga bato fwayongon. ³ Kinda araw tiba Hodyo nodwan tanog? It kahologan awkin in Diyos hampang idwa ha kahologan maskin ka tiba idwa katanog, ham gayfan? ⁴ Balaw kitonya. Is Diyos igfaanod wan it fwayong nyawa fagayo fag manga taw bohagon. Kitonya wa kansorat, Kaarakitay ta homilala kitay im manga hampang myasa wa maanod, Nyawa faktaw nogsolay hyamo, hadwam daog. ⁵ Dapat kinday nangos tonya, ham gayfan, intam manga ogali dwat nogfahilala kitay fakafiyon wan is Diyos nogfadosa? No kitonya, no fangayofan odi taw, tam lomwang ka ogali dwat ha fakinabang ogbot. No kitonya, is Diyos awkin idwa maslong nogfadosa intam, ham gayfan? ⁶ Yatokitay, bon lamang. Is Diyos nodwa maslong, idwa syagan fatohoyan, ngatay fiya, ngatay dwat, ista manga naogali sadik baba daga. ⁷ Halimbawa nangos, aho no lomwang kitay maskin aho bohagon, in Diyos kafiyon labi man imlag, kawat fakaoronganan imtohoyan, kana mayon nogfatohoyan angko has fadosaan kawa ha ogali dwat, ham gayfan? ⁸ Kana ara tam nodwag maswag kitay, Tam fag gogali dwat no fiya kamlag ginya? Ka mangag fadwat igdog angko iglwang hono, kitonya angko fwayong. Fakafiyon wan tonya fag manga taw nomtohoyan has fadosaan. ⁹ Kinda ara tonya? Tam manga Hodyo fiya man aw has manga Hintil, ham gayfan? Idwan. Maskin ho nafatohoyan kitay tam fagayo fagayo, nyawa Hodyo, nyawa Girigo, tam insakop has karigonan ogali dwat. ¹⁰ Kito kansorat, Idwa ha akwa maslong it ogali, ngadi sadik taw. ¹¹ Idwa ha twagdog, idwa hagsayak in Diyos. ¹² Fagayo fag manga taw igtalang gin Diyos, fagayo igfalamang wan. Idwa ha gogali fiya, ngadi sadik taw. ¹³ Ista manga bibig bilang wagtaban manga taw has kahatayan. Podo wa madaida ista manga dila hampang. Ista manga anit bibig hampang bilang wa ha dalit kitos abyanon. ¹⁴ Sonson wa sabayon ista manga hampang, madwat wa ngap igdog. ¹⁵ Ista manga bitis igdali hasaglibon taw. ¹⁶ Nyawa hadak nalahaw igfahoriyan hanggan igfarongkot manga taw. ¹⁷ Tadwag lag ka kahowayan fag dalan ogali, ¹⁸ tadwa yadin yayom katanog in Diyos. ¹⁹ Yabay tam twa kitay ka manga Batasan Hodyo fagayo intoon has mangag fasakop tonya fag manga To-

gon, kaarakitay nyawa faktaw idwa ha fabangdanan aban, is Diyos no mamatohoyan has taw it fadosaan, ²⁰ maskin is Diyos idwag fatohoyan kitay, tam mangafiyon wa hanya, kawa tam no katanog ka Batasan Hodyo, kawa ka manga Batasan Hodyo igfatwagdog intam kitay, tam ha ogali dwat. ²¹ Dapat kati, in Diyos halimbawan, kadwan ganit sas manga Batasan, kagfalag no kinday tam mangafiyon wa hanya. Ka Batasan Hodyo, hanggan in Diyos manga fangampang igfaorongon yadit halimbawan, ²² kagfatohoyan kitay, tam fagayo kantiwala, nyawa Hodyo, nyawa Hintil, tam fagayo mangafiyon wa han Diyos tam nogsyag lamang han Kiristo Hisos, ²³ maskin fagayo fag manga taw ha naogali dwat, idwag sohod in Diyos kafiyon. ²⁴ Kawa malooy in Diyos kahowayan, it disag hantam kitay, tam mangafiyon wa hanya kawas Kiristo Hisos igfalfas intam. ²⁵ Is Hisos kan Diyos nafatalaga fangafiyon kaarakitay it folot nomwatwat, hanggan tam nogsyag hanya, intam manga naogali dwat imliyam wan. Maskin hyabi is Diyos idya kasadi ginan in-isog, gagwanta yapdista manga ogali dwat, yakanga hanya nafatalaga fangafiyon kaarakitay it sadili kahaslongan imlag. ²⁶ Kati yadi tam fag ha fangafiyon han Diyos kaarakitay faorongon kitay, is Diyos maslong hanggan hanya kagfatohoyan kitay, fagayo kagsyag in Hisos mangafiyon wa hanya. ²⁷ Kati tam awkin syagan igfadaholon intam sadili, ham gayfan? Idwan. Kana mayon? Maskin ka lamang tam nogsyag han Kiristo, is Diyos nogfatohoyan kitay tam mangafiyon wa hanya, bonwa kitay kawantam ogali no fiya. ²⁸ Maskin katwa wa kadog fiya fiya is Diyos igfatohoyan kitay tam mangafiyon wa hanya, bonwa kitay kawa tam katanog ka manga Batasan Hodyo, dapat kawa tam nogsyag lamang han Kiristo. ²⁹ Ham awkin gayfan is Diyos nogbahala, ha odis manga Hodyo? Idwa awkin igbahala yadi has manga Hintil? Yatokitay, hanya kagbahala has fagayo fag manga layonan taw. ³⁰ Is Diyos idwam dowan, nyawa Hodyo, nyawa Hintil, is Diyos igfatohoyan kitay tam mangafiyon wa hanya kawa tam nogsyag han Kiristo. ³¹ No kitonya, ham awkin gayfan tam nogsyag han Kiristo, tam igfabali ka Batasan Hodyo idwa ha kahologan? Idwan. Yatokitay, kati tam ngap igfarigon ka Batasan Hodyo.

4 Kana kantam tohodon gin Abraham, ka manga Hodyo hafofowan? Kanat nadalanan hastay baliwa? ² Is Abraham no nangafiyon han Diyos kawat manga ogali fiya, is Abraham syagan igfatakas taw. Dapat is Abraham idwa ha fagfatakaon san Diyos faglagan. ³ Maskin ka Kasoratan iglwang, Is Abraham igsyag han Diyos, yakangas Diyos nafatohoyan kitay is Abraham nangafiyon wa hanya. ⁴ Tam no ha disag is taw maskin gibolon, bonwa kitay disag odi, dapat tangdanan wan kawa naibolon. ⁵ Dapat intam fagsyagon no bohonwantam sadili ogali, dapat, nos

Diyos intam fagsyagon, kagfafiyan hanya ka manga taw ka ha ogali dwat, ginya madis Diyos igtanggap intam, kawa tam igsyag ha hanya. ⁶ Yakangas Dabid nalwang, ka taw bomaya wan is Diyos noglwang kitay, tonya fag taw nangafiyan wa hanya, bonwa kitay kawa ha naibolon fiya. Is Dabid iglwang, ⁷ Ka manga taw bomaya wan is Diyos nogfaliyam it manga naibolon dwat, Nodwag botang it manga naogali kadwa fiya. ⁸ Yabay, nyawa faktaw bomaya yadi wan, kagfon intam nodwag tohod it naogali dwat. ⁹ Ham gayfan awkin ka mangan toli lamang ka bomaya kito? Bohondi ka mangan toli, hanggan kadwan toli, fiya yadi no bomaya kitonya. Tam naolit kitay is Abraham nangafiyan wa han Diyos maskin, igsyag hanya. ¹⁰ Ginahin tonya nonlag, ham gayfan? Is Diyos danwag lwang kitay is Abraham nangafiyan wa hanya, nyawas Abraham idyan toli hyabi. ¹¹ Aban yas Abraham intoli, bilang odi falagon kitay is Diyos igfatohoyan kawas Abraham nangafiyan wa hanya, maskin is Abraham igsyag in Diyos hyabi, nyawa idyapdin toli. Inlag kitonya kaarakitay is Abraham imbali ista wa pinagkaama has fagayo kagsyag han Diyos, yakangas Diyos kagfatohoyan kitay nangafiyan wa hanya, nyawadwan toli. ¹² Kitonya yadi, is Abraham ista wa pinagkaama has mangan toli, manga Hodyo, kagsyag han Diyos kiton Abraham kagsyag in Diyos nyawa hanyadyan toli. ¹³ Is Diyos idwa natogon han Abraham hanggan hat manga hasokfonan kitay, tonya wa ka omafo sadik baba daga, kawa ta no katanog ka Batasan Hodyo, dapat ta no mangafiyan wa han Diyos kawag syag hanya. Kawa nogsyag in Diyos, is Diyos iglwang is Abraham nangafiyan wa hanya. ¹⁴ Ka omafo in Diyos togon bato disagon, no ka odi ka manga katanog ka Batasan Hodyo, idwa ha kahologan nogsyag in Diyos, bonwa yadi disagon in Diyos natogon. ¹⁵ Maskin ka manga Batasan Hodyo nafadog wa has taw, yakangan Diyos kaisogan inlag wan ta nogsway, dapat no nangos idwa ha akwa ka Batasan Hodyo, bonwa kitay manga taw igsway. ¹⁶ Maskin ngan tohoyan kawa ka mangag syag han Diyos ka tomanggap it togon bato disagon, kawa malooy in Diyos kahowayan. Yakangam bali sadik disag matohoyanan han Abraham manga hasokfonan, bondi ka mangag fasakop has Batasan Hodyo, dapat has fagayo kagsyag in Diyos, kito yadin Abraham nogsyag, kawas Abraham intam fagayo pinagkaama hasagsyag baliwa. ¹⁷ Kito kansorat Hogfabali hyamo ista pinagkaama has aywan fag manga layonan taw. To fag togon ha fakaanodan wan san Diyos faglagan, kan Abraham fagsyagon. Hanya kagfaboyag ya ka manga natay hanggan kagfabangkad yadi fagayo fag manga bagay kadya haraw ha akwa. ¹⁸ No ogali di taw, is Abraham idwa gasolop kitay it babay omanak aban, dapat ay, idwag fagomon igsyag kan Diyos nafwayong kitay, hanyam bali ista pinagkaama has aywan fag lay-

onan taw. Is Abraham kasyag wa ngap kitay, im-anod wan in Diyos togon hanya kitay, Hyamo hasokfonan kayo was fanggasan aban. ¹⁹ Gis nanyas Abraham kaakbang wa sadik daan ik fangaraw it kagorangan, mayan mayan odi noglahaw, hanggan it babay, is Sara idwa ganak. Nyawa kitonya, is Abraham idwag fagomon igsyag in Diyos. ²⁰ Is Abraham idwa gadowan kitay, in Diyos togon bato disagon idwam anod, labi wa ngap inrigon di ngap nogsyag in Diyos, nafasayagdog yadi hanya. ²¹ Orongan wa ngap is Abraham kasyag kitay is Diyos syagan igfaanod it togon bato disagon. ²² Kawa kitonya, is Diyos igfatohoyan kitay is Abraham nangafiyan wa hanya. ²³ Dapat ka manga hampang kansorat kitay is Abraham nangafiyan wa han Diyos, idwan sorat kaarakitay igfarigon lamang in Abraham fangayofan, ²⁴ dapat hanggan wa hantam kati kat fagfwayongon. Is Diyos iglwang kitay, tam mangafiyan wa hanya tam nogsyag hanya ka nafaboyag ya kagfon intam, kawas Hisos. ²⁵ Is Hisos kasta nafahatay kawa hantam manga ogali dwat, ginyan boyag ya kaarakitay tam mangafiyan han Diyos.

5 Yakanga maskin tam igsyag han Kiristo Hisos, intam Fon, tam nangafiyan wa han Diyos hanggan tam inbalit manga fakilalaon. ² Kawa tam igsyag han Kiristo Hisos, hanyag disag hantam in Diyos malooy fag kahowayan kantam fagbayaon kati. Ginya madi tam igbaya wa dahol maskin tam ha fagsyagon yapdi kitay, aban tam mangofodan yadi wan san Diyos kayawaan. ³ Bondi tonya madi ngap kantam fagbayaon. Tam igbaya yadi tam no basad mahori, maskin tam twa kitay ka mahori kagfabali intam maagwantaon. ⁴ Tam no maagwantaon, tam idwa ha fagadowanon. Hanggan tam nodwa ha fagadowanon, tam ha fagsyagon wan. ⁵ Tam nogsyag in Diyos kitonya, tam idwam balaw maskin is Diyos igfatohoyan fiya fiya santam basad fangayofan kitay, hanya galwasi intam. Ka Maliyaw fag Falad kan Diyos disag hantam kagfatohoyan intam kitonya. ⁶ Maskin tam nodya ha fagsyaganon, gis nanya fag masohod kan Diyos nafatalaga, is Kiristo natay kawa has manga taw dwat. ⁷ No tam di, tam imhafang wa matay kaarakitay bomawi sadik taw, nyawa fiyat ogali. Twa man, ngatay ka tibak taw idwam hafang matay kaarakitay bomawi sadik taw mahoway wa dahol dahol. ⁸ Dapat ay, is Diyos nafatohoyan kitay hanya galwasi wa dahol dahol intam, kawa tam no ha ogali yapdi dwat, is Kiristo natay kawa hantam. ⁹ Yabay, kawan Kiristo folot intam fangafiyan han Diyos, labi was Kiristo bomawi intam gin Diyos kaisogan aban, ¹⁰ kawa hyabi, tam nogdayo yapdi hanya, tam inbalin Diyos wa manga fakilalaon, kawat Anak natay, labi wa matohoyanan kitay, kati, kawas Kiristo boyagan, hanya bomawi intam kawa tam in Diyos wa fakilalaon. ¹¹ Bondi kitay kitonya, tam igbaya wa dahol in Diyos, maskin kagfon intam, kawas Kiristo Hisos,

nafabali intam in Diyos wa manga fakilalaon. ¹² Kito it kahologan, bago bago sadi dik taw ka nafabangkad ogali dwat istay is baba daga. It ogali dwat nataban kahatayan. Ginya wa ginan ka kahatayan nasakop fagayo fag manga taw, maskin fagayo ha naogali dwat. ¹³ Nyawa manga taw idya natanggap hyabi ka Batasan Hodyo, ta danwa ha ogali dwat, dapat nodya ha manga batasan, idya ha somogat kitay manga taw igsway ka togon. ¹⁴ Nyawa kitonya, giyapdin Adan ginan, balin Mwisid, ka manga taw danwan sakop has karigonan kahatayan, nyawasta manga ogali dwat idwa fagayo kito kan Adan, ka nasway fiya fiya sadik batasan. Is Adan hyabi ka nafahalimbawa sadi yak taw fiya ka kabangkad aban. ¹⁵ Dapat tonya fag dow a idwa pariho, maskin in Diyos disag, kadwa ha bayad, idwa kiton Adan naogali dwat. Nyawa ka kahatayan nalafit has fagayo fag manga taw, maskin is Adan nasway, labi man inyak marigon in Diyos malooy fag kahowayan, hanggan it disag kadwa ha bayad, kawa gi yadi sadik taw, kawas Kiristo Hisos, giwat malooy fag kahowayan, in Diyos disag igdasog has fagayo fag manga taw. ¹⁶ In Diyos disag idwa kiton Adan nafabangkad kadwatan. Maskin sadik taw nasway sadi ginan, intohoyan wa ka fadosaan, dapat giwan Diyos disag, tam, nyawa ayo intam naogali dwat, intohoyan kitay tam nangafiyon wa han Diyos. ¹⁷ Orongan wan, kawa ka sadik taw nasway, fagayo insakop wa ngap has kahatayan, dapat labi man inyak marigon in Diyos malooy fag kahowayan disag kitay, tam ka manga nangafiyon hanya, nyawa tam idwa ha nabayad, tam omofod yadi hanya, boma-hala aban sas haboyagan, kawas Kiristo Hisos intam fagsyagon. ¹⁸ Yakanga, no kinday ka sadik taw it nafalamang nafatohoyan fagayo has fadosaan, kitonya yadi, sadik taw it ibolon maslong ka nafatohoyan kitay is Diyos igfaliyam ista manga naogali dwat fagayo, hanggan faboyag fagayo. ¹⁹ Maskin kawa sadik taw nasway in Diyos, aywan kanbali ha ogali dwat, kitonya yadi, kawa sadik taw intanog in Diyos, aywan kan Diyos nafatohoyan kitay nangafiyon wa ha hanya. ²⁰ Ka Batasan Hodyo indisag kaarakitay imlag kawa ka ogali dwat kaaywan. Dapat ay, no kaaywan wa ka ogali dwat, in Diyos malooy fag kahowayan bondi kitonya no kabagat has fiya. ²¹ Maskin ngay, no kinday ka ogali dwat nasakop ka manga taw kawa ha kahatayan, kitonya yadi in Diyos malooy fag kahowayan kagsakop intam kati, kawa ha kahaslengan kagtaban intam has haboyagan, tam nogsyag in Kiristo Hisos kagfon intam.

6 Kinday tam kati, ham gayfan? Tam aw fag fadagos has ogali dwat kaarakitay bondi kitonyan Diyos malooy fag kahowayan hantam? ² Yatokitay, kinday tam ka natay has ogali dwat no kaboyag yapdi hanya baliwa? ³ Tam fadi wadtwagdog kitay fagayo kantogna, kansadi han Kiristo Hisos, insadi yadi hat

kahatayan. ⁴ Tam nontogna, intam fangayofan dan intahin wa han Hisos kahatayan hanggan inlobgob. Inanod wa kitonya kaarakitay, no kinday intam Ama kadonongan nafaboyag ya in Kiristo, tam kitonya yadi kaboyag has bago fag ogali. ⁵ Intam fangayofan dan no orongan intahin han Kiristo kahatayan, matohoyonan yadi kitay tam imtahin yadi hanya, tam imboyag ya yadi has haboyagan bago. ⁶ Tam twa wagdog kitay intam fangayofan dan intahin wan Hisos hanya nonpako wan sas nafatimbangan hayo, kaarakitay intam dwat fag ogali karigonan fag matay yadi wan, hanggan tam fag idwam bali domwag it sogowan, ⁷ kawa ka natay nalfas wan gis karigonan ogali dwat. ⁸ Yabay, tam katiwala kitay intam fangayofan dan nontahin wan Kiristo kahatayan, tam kitonya yadi, tam imtahin hanya has haboyagan, ⁹ hanggan tam twa kitay is Kiristo inboyag ya, fawa matay domwag. Ka kahatayan fawa bomolay domwag hanya. ¹⁰ Kawa sadi ginan lamang hanya natay kawa has ogali dwat, hanggan kati, in Kiristo haboyagan kawa han Diyos wa malayon. ¹¹ Tam fag tohod kitay intam sadili fangayofan fag kitonya yadi, natay has karigonan ogali dwat, dapat boyagan han Diyos, kawa tam insadi han Kiristo Hisos. ¹² Intam habilogan ka katay fag idwag fasakop has ogali dwat, kaarakitay tam idwa katanog intam bali fangayofan masayaon. ¹³ Tam fag idwag fasakop ngadi sadik layonan gintam manga habilogan has ogali dwat, ka kabali sangkap kadwatan. Yatokitay, tam fag fasakop sadi wak dahonya han Diyos, kitos manga taw natay, ginyan boyag ya. Tam fag fasakop intam habilogan han Diyos, manga sangkap has fiya fag ogali. ¹⁴ Fag bonwa ka ogali dwat kantam fakatanogon kawa tam idwan sakop has manga Batasan Hodyo kati, dapat tam insakop han Diyos malooy fag kahowayan. ¹⁵ Kati tam awkin igfadagos ya has ogali dwat, ham gayfan, kawa tam bonwa sakop manga batasan, dapat tam in Diyos malooy fag kahowayan it sakop? Yatokitay, ¹⁶ tam fadi wadtwa tam nogfasakop, nyawa haday, bilang sogowan, tam kabali wasta sogowan wa orongan. Tam no sogowan karigonan ogali dwat, kamlag kahatayan, dapat tam no sogowan has katanog in Diyos, kamlag is Diyos igfatohoyan kitay tam nangafiyon wa ha hanya. ¹⁷ Tam igbaya wa dahol dahol in Diyos kitay, nyawa tam danwa sogowan ogali dwat hyabi, dapat kati tam intanog wa ngap, sadi wak dahonya, kantam donggon barita. ¹⁸ Kawa tam nalfas wa gis karigonan ogali dwat, kati tam inbali yadi manga sogowan kahaslengan. ¹⁹ Hogfwayong ha hayo ka malpos malpos katwagdog. Hyabi tam nafasakop intam sadili, sadi wak dahonya, bilang sogowan has manga karigonan ogali dwat has ka taw, kalabi wa has kadwatan. Kati tam fag fasakop intam sadili, sadi wak dahonya, kitonya yadi, dapat sogowan has kahaslengan, intohoyan malayonan wa han Diyos ibolon. ²⁰ Tam

hyabi no sogowan yapdi karigonan ogali dwat, tam idwag fasakop has kahaslongan. ²¹ Dapat ay, tam awkin ha nafakinabang ngay gis dwat fag ogali hyabi, ham gayfan? Idwa akwa. Ka dwat fag ogali hyabi intam odi fakayaon kati. Ka kitonya fag manga ogali kagtaban has kahatayan. ²² Dapat kati tam nalfas wa gis karigonan ogali dwat, inbali in Diyos manga sogowan. Ka kati ka santam, fakinabang wan, kawa tam intohoyan han Diyos, sadi wak dahonya, hanggan tonya kagtaban has haboyagan idwa ha katabowanan. ²³ Maskin ka ogali dwat igbayad it tangdan, kawa kahatayan. Dapat in Diyos disag, kadwa ha bayad, haboyagan kadwa ha katabowanan, kansadi san Kiristo Hisos kagfon intam.

7 Angko manga fadwasay, ham fadi wad natwagdog angko bato fwayongon kawa tam inyayom has manga ogali taw. Intam ogali fawag sakop sadik taw hanya no natay wan. ² Halimbawa, intam ogali iglwang ka sadik ina fag fasakop hat indogan, it indogan no boyagan yapdi. Dapat no kawa kitay it indogan natay wan, yadwag fasakop domwag hanya. ³ No kitay di, no tam kaglwang, fabayowan wa dahol, ka ina no gofod has iba ama, it indogan no boyagan yapdi. Dapat, it indogan no natay wan, idwa ha fagbandoon. Nyawa omindogan ya domwag has iba ama, ya bohonwa kitay fabayowan. ⁴ Tam kitonya yadi, angko manga fadwasay. Tam nonsadi san Kiristo habilogan, tam bilang wa natay has Batasan Hodyo. Kati is Kiristo, kanboyag ya domwag kagfon intam, kaarakitay tam bilang wagbohad han Diyos baliwa, tam no gogali ka maangay hanya. ⁵ Hyabi tam nogfasakop yapdi hantam bali fangayofan masayaon, ka manga Batasan igfatohod yapdi intam manga ogali dwat, kagfaoyon intam habilogan has manga ogali kagbohad has kahatayan baliwa. ⁶ Dapat kati tam natay wan has manga ogali dwat kagfasognod intam hyabi, yakanga tam nalfas gis Batasan Hodyo karigonan. Kati ka Maliyaw fag Falad ogali bago kantam fakatanogon, bonwa ka manga batasan masoratan hyabi. ⁷ No kitonya, ham awkin gayfan kitay ka Batasan Hodyo idwa fiya? Balaw kitonya. Nodya ha manga Batasan Hodyo, hodya twagdog no kana fag manga ogali kadwa fiya. Ka Batasan Hodyo nodyag lwang, Fag idwa kaingli, hodyapdi twa no kana ka kaingli. ⁸ Kawa ha togon kitay, Fag idwa kaingli, ka karigonan ogali dwat igfatohod ngap angko kaingli has aywan fag manga bagay. Nodya ha batasan igbandi, idya kalwang dwat ka ogali. ⁹ No hyabi ho gayfan angko fangayofan boyagan di, nyawa tadya ha togon angko. Dapat, ho no natwa wan ka manga batasan, ho bago di nadog ka karigonan ogali dwat, ginya ho natwa kitay angko fangayofan natay wan. ¹⁰ To fag batasan, ka nangos faboyag angko, igfatohoyan di ngap angko has kahatayan. ¹¹ Kawa ka karigonan ogali dwat nadaya angko gis

manga batasan, ginya madi nafahatay di ngap angko gi yadis manga togon. ¹² Yakanga ka Batasan Hodyo maliyaw, hanggan ka manga fasognod maliyaw, maslong hanggan fiya. ¹³ No kitonya, ka fiya fag bagay awkin kagtaban angko has kahatayan, ham gayfan? Yatokitay, ka karigonan ogali dwat kagtaban angko has kahatayan hyabi. Ka ogali dwat igsangkap ka fiya, kaarakitay labi man imtohoyan kitay dwat wa dahol ka ogali dwat. Yakanga kawa ka batasan kagfatohoyan ka manga bagay kadwa fiya, labi man intohoyan kitay ka ogali dwat madaya wa dahol dahol. ¹⁴ Tam twa kitay ka Batasan Hodyo igtogbong ka fangayofan fiya, dapat aho ha bali fangayofan masayaon, aho ka ogali dwat it sogowan. ¹⁵ Hodwa twagdog angko sadili ogali, maskin hodwa katanog angko fakasayaon fiya, kalabi wa ngap ho no katanog yapdi ka manga bagay kangko fagdayoon. ¹⁶ Kati aho no gogali ka bonwa angko fakasayaon, hogfaanod kitay ka Batasan Hodyo hyabi fiya ngay. ¹⁷ Yabay, no kitonya, bonwa aho orongan ka gogali kitonya, ka karigonan ogali dwat kadyapdi galin gingko basad fangayofan, tonya wa ka gogali kitonya. ¹⁸ Ho twa kitay idwa ha kafiyan sangko sadili fangayofan, kangko faglwangon sangko bali fangayofan masayaon. Nyawa ho gwayan wa kasaya gogali ka fiya, idwa kaanod kitonya. ¹⁹ Hodwa gogali ka has fiya kangko fakasayaon, dapat ay, ka has dwat ngap hodwag fagomon gogali, nyawa ho dayo wan, no kitay di. ²⁰ Aho no katanog ngap ka bohonwa angko fakasayaon, bonwa aho ka orongan gogali kitonya, ka karigonan ogali dwat kadwa galin gingko basad fangayofan kagfasognod has dwat. ²¹ To kangko lagan, aho no kasaya gogali fiya, kadi ngap ka dwat ka gakbang dingko. ²² Ho no maayfanan sangko basad fangayofan, ahog baya wan Diyos manga batasan. ²³ Dapat hogdog tiba ginan sangko fangayofan, ho ha ogali iba. Toy iglaban angko fangayofan it baliw. Kawa kitonya, ka karigonan ogali dwat kagbanwanan yapdi sangko bali fangayofan masayaon, igsakop yappingko. ²⁴ Yabay, yabay, isyay wan no kitonya aho. Faktaw ka bomawi angko gistay fag habilogan kagtaban angko has kahatayan? ²⁵ Fadi wan, hogbaya wan han Diyos, kawas Kiristo Hisos, kagfon intam, ka bomawi angko gingko bali fangayofan masayaon. Kawa kitonya, no aho odi, gingko fangayofan bago, ho kasaya katanog in Diyos manga togon, dapat kawa gingko bali fangayofan masayaon, ho kasaya yapdi katanog has karigonan ogali dwat.

8 Yakangas Diyos idwag fatohoyan has fadosaan ka manga taw kansadi san Kiristo Hisos, ² kawa, tam nonsadi san Kiristo Hisos, ka karigonan gintam boyagan fag fangayofan igfalfas intam gis karigonan ogali dwat, hanggan gis karigonan kahatayan. ³ Ka manga Batasan Hodyo idwa nasyagan nalfas manga taw gis ogali dwat maskin magomo di ka fangayofan

taw. Dapat ay, is Diyos nasyagan nafalfas manga taw gis ogali dwat. Hanya nasogot Anak hastay, ha habilogan taw, kitontam ka ha manga ogali dwat, kaarakitay imbali intam fangafiyon. Kawa hanya ha habilogan taw, ka ogali dwat fagayo intohoyan has fadosaan. ⁴ Is Diyos naibolon kitonya kaarakitay ka Batasan Hodyo fasognodon fag ogali imlag santam ka gogali ka maangay sas Falad Maliyaw, kadwa katanog intam bali fangayofan masayaon. ⁵ Ka manga taw no gogali fagabat bali fangayofan masayaon fasognod, igfasakop yapdi hat bali fangayofan masayaon. Dapat ay, ka gogali fagaba ka bago fag fangayofan fasognod, igfasakop has fangayofan bago. ⁶ Tam nogfasakop hantam bali fangayofan masayaon, tam imdiya has kahatayan. Dapat ay, tam nogfasakop has fangayofan bago, imdiya has haboyagan hanggan has kahowayan. ⁷ Maskin, nyawa faktaw, no hadit bali fangayofan masayaon nogfasakop, iglaban in Diyos. Hanyadwa katanog in Diyos togon, idwa yadi somyagan katanog tonya. ⁸ Ka gogali fagabat bali fangayofan masayaon fasognod, idwa syagan kabali in Diyos fagbayaon. ⁹ Dapat ay, ka Maliyaw fag Falad no sawantam orongan, tam idwa gogali has bali fangayofan masayaon baliwa, dapat tam gogali intam bago fag fangayofan fasognod. In Kiristo Falad nodya santam, tam idyan bali in Kiristo sakop. ¹⁰ Dapat ay, is Kiristo no sawantam basad fangayofan, nyawantam habilogan matay wa aban kawa has ogali dwat, intam fangayofan bago boyagan fagaba kawa tam nangafiyon wa han Diyos. ¹¹ Ka nafaboyag ya in Hisos, it Falad no santam, hanya mamaboyag yadintam manga habilogan ka katay. ¹² Yakanga, angko manga fadwasay, tam ha sagoton. Tam fag idwa gogali kantam bali fangayofan masayaon fasognod. ¹³ Tam no gogali yadintam bali fangayofan masayaon fasognod, tam katay wan. Dapat, no ka Maliyaw fag Falad kagfasyagan intam igfahatay ka manga ogali dwat, tam kaboyag wan. ¹⁴ Kawa non Diyos Falad kantam fagtahinan, tam in Diyos wa manga anak. ¹⁵ Maskin kantam natanggap fangayofan bago idwag fabali intam sogowan ya domwag madalaon. Yatokitay, kantam natanggap in Diyos wa manga anak fangayofan. Yakanga tam igngayan in Diyos kitay, Mama, intam Ama. ¹⁶ In Diyos Falad hanggan intam sadili fangayofan bago goyonan igfaorongan kitay, tam in Diyos wa manga anak. ¹⁷ Maskin tam in Diyos wa manga anak, tam omafo yadi aban kan Diyos bato disagon. Tam ha horay yadi hat disag han Kiristo kawa tam nonsadi hanya, gagwanta yadit manga donggon mahori, aban tam imsadi yadi ha hanya, omafo wat kafiyon. ¹⁸ No sa dingko, ogbot di kantam manga fagdogon mahori kati, tam nogtohod kitay labi man inyak fiya ka kafiyon kantam lagon aban. ¹⁹ In Diyos manga nahalig fagayo fagayo gwayan wa kasaya lomag aban is Diyos nogfahilala it manga anak.

²⁰ Fagayo fag manga bagay kanhalig kabway wan. Is Diyos ka nafabali kitonya, bonwa ka manga bagay kanhalig fasadan. Dapat nyawa kitonya, ha fagfanayaon yapdi, ²¹ maskin fagayo kanhalig imfafiyan ya, malfas gis sakop kaboyohan, mafalfasan kafiyon aban, kito yadin Diyos manga anak. ²² Tam twa kitay, balis kati, kanhalig sadi wak dahonya, bilang wagdyang sas basad mahori. ²³ Dapat ay, bondi tonya ka bilang wagdyang, hanggan wa tam ka natanggap in Diyos Falad, it disag gona, tam bilang wagdyang basad fangayofan, kawa tam gwayan wagfanaya is Diyos nogfatohoyan kitay, tam it manga wa anak, tam no mafalfasan orongan. ²⁴ To kantam fagfanayaon tam nonbawi. Tam no nalag intam fagfanayaon tanggapon aban, bonwa kitay tam ha fagfanayaon yapdi. Nyawa faktaw, fawag syag yapdi kitay ha tanggapon aban, no malagan wa kati. ²⁵ Dapat tam no ha fagfanayaon yapdi, kadyan lag, tam idwa kayayag fanaya. ²⁶ Kito in Diyos Falad nogtogbong intam kagomowan, kawa tam idya twag darangin hosto han Diyos, dapat it Falad mandi kagfalo intam igdyang nogsagad gin Diyos, bondi kito kantam no kampung. ²⁷ Is Diyos ka twa waglag santam basad fangayofan, tomwa yadi wagdog it Falad fwayong, kawat Falad igfalo igsagad it manga sakop hakorangan, no kinday in Diyos fakasayaon. ²⁸ Tam twa wa kitay ka manga galwasi in Diyos, kan Diyos manga nafatawag maskin tonya wat fasadan, it manga madalanan fagayo imaraktoman has kafiyon baliwa. ²⁹ Gi yapdis hyabi hyabi, is Diyos danwa kilala ka manga taw kambalit sakop, ginya nafatohoyan kitay tonya fag manga taw fag imbali kito yadi kat Anak, kaarakitay it Anak imbali intam man ahan has fadwasay aywan. ³⁰ Is Diyos nafatawag kat manga danwa nafatohoyan ha hanya hyabi. Kan Diyos manga nafatawag, tonya yadi kat nangafiyon wa hanya. Ginya madi, kan Diyos manga nangafiyon, tonya yadi kat manga nafahafod it sadili kafiyon. ³¹ No kitonya mangharaw, kana yapdi kantam bato fwayong hanya baliwa? Is Diyos nogbaliwa intam, fakta ka lomaban intam, ham gayfan? ³² Hanyadwa nahwangit it sadili Anak, dapat nafabali hanya fangafiyon hantam fagayo. No nadisag wat Anak hantam, idwa awkin domisag yadi hantam fagayo fag manga bagay koyongan wa hat Anak, ham gayfan? ³³ Fakta ka somombong han Diyos it manga nafili naibolon? Is Diyos yadi kaglwang it manga nafili nangafiyon wa hanya. ³⁴ Fakta ka fatohoyan intam has fadosaan, ham gayfan? Idwa akwa. Is Kiristo Hisos ka natay hyabi, ka san Diyos balis sihon kati, bondi kitay hanya natay, hanyan boyag ya domwag, kati inbali wa ngap intam fagalan, igfaorongan han Diyos kawa hantam. ³⁵ Fakta ka syagan igfaoman kitay is Kiristo idwa galwasi intam, ham gayfan? Idwa akwa. Nyawa kana kantam madalanan, nyawa kana fag fakabalawon, fakaalibiton, manga taw

nogfahoriyan intam maskin tam intiwala, ngatay kalonosan, ngatay kalobasan, ngatay manga fakadalaon, ngatay talibong, nyawa kitonya, is Kiristo idwa kaoman no galwasi intam. ³⁶ Kito kansorat, Kawa hami galwasi hyamo, sadi wak sirangan mi kadala wa kitay, mi ngan wa matay. Tagfatimbang hyami kito odis manga topa ista bato fahatayon. ³⁷ Dapat ay, tam syagan digdaog fiya fiya, nyawa tam ha lagan to fag manga mahori fagayo, kawas Hisos, ka galwasi intam, kagfasyagan intam. ³⁸ Kawa ho twa matohoyanan kitay nyawa kana kantam madalanan, nyawa kahatayan, nyawa haboyagan, nyawa manga anghil, nyawa manga karigonan, nyawa ka kati fag manga bagay, nyawa ka manga bagay kamdasog aban, ³⁹ nyawa ka manga kaabwatan, nyawa ka manga kaabasadan, nyawa kana kanhalig, idwa ha syagan igfaoman in Diyos fangayofan no galwasi intam, kantohoyan hantam gin Kiristo Hisos kagfon intam it naagwanta.

9 Orongan wan angko bato fwayongon kati, kawa ahonsadi san Kiristo, hodwag bohag. Ka Falad Maliyaw kagfarigon yadingko fangayofan kitay hodwa ha fagtagahon aban kitay ho nabohag, nyawa hoglwang kito ha hayo. ² Kito kangko bato fwayongon ha hayo, ho kabalaw wa dahol dahol, hanggan hogdog angko fangayofan idwa kahoway. ³ Ho kaawa wa dahol dahol angko manga kapariho Hodyo. Bilang fiya man no aho kan Diyos fadosaon, hanggan aho nom-saman gin Kiristo, no nangos angko manga kapariho imbawi yap man. ⁴ Angko manga kapariho kan Israil manga hasokfonan. No kitay di, is Diyos nafabali tonyat manga wa anak. Nafalag yadit kafiyan has taw, narananggapan has taw, nadisag yadi has taw ka Batasan Hodyo. Ta natwa no kinday nogfasayagdog in Diyos, hanggan is Diyos natogon yadit manga bato disagon has taw. ⁵ Angko manga kapariho, inda Abraham yadi manga hasokfonan. Ginya madi, gi wasta kaiban is Kiristo nonbali taw. Fag is Diyos kagbahala has fagayo fagayo kantam fagfasayaon igdog hanggan aban aban. Fag kitonya wa ngay. ⁶ Hodwag fwayongon kitay in Diyos natogon bato disagon idwan anod maskin idwa fagayo ka manga taga Israil in-aktom han Diyos nafili fag manga taw. ⁷ Idwa yadi fagayo ka gin Abraham in-ngayan it manga hasokfonan anak. Is Diyos nafwayong han Abraham kitay, Ka lamang gin Isaak fag hasokfonan kamngayan hyamo hasokfonan. ⁸ Kitot kahologan, bonwan Abraham manga anak fagayo kanngayan in Diyos wa manga anak. Ka lamang in Abraham manga hasokfonan kansagaya maskin in Diyos wa togon bato disagon, tonya lamang kanngayan in Abraham manga hasokfonan orongan. ⁹ Maskin kiti in Diyos togon han Abraham, Aban, gis nanya sangko nafatohoyan fag kasohodan, ho kabangkad ya, ginyas Sara omanak, sadik anak ama. ¹⁰ Dapat bondi gis nanya tam noglag kitay, idwa myasa

kitonyan Abraham manga hasokfonan. Kitonya yadi sanda Ribika manga anak ama dow. Ista ama sadi di, tonya yadi, kawantam hafowon, is Isaak. ¹¹ Dapat ay, is Diyos nafatwagdog kitay hanya nogfili manga taw, giwat sadili kafangayofanan, idwa gista manga naibolon. Maskin inda Ribika anak nodyan sagaya, idya nasyagan gibolon, ngatay fiya, ngatay dwat, ¹² is Diyos danwa nafwayong han Ribika, kat foyo fag anak fasnognod man hat ahan. ¹³ Kito kansorat sas Kasoratan, Angko fagalwasiyon is Hakob, Dapat ho kadwat diglag in Isaw. ¹⁴ No kitonya, tam awkin lomwang kitay is Diyos idwa fiya, bilang wa ha fagihidon taw? Balaw kitonya, ¹⁵ maskin is Diyos igfwayong han Mwis, No faktaw kangko fakasayaon angko fakaawaon, ho kaawa tonya. Hanggan no faktaw kangko fakasayaon angko fagtogbongon, ho tomogbong wa tonya. ¹⁶ Yakangas Diyos no kaawa manga taw, bonwa kitay manga taw ka kasaya, ngatay kafiyaon ista naibolon, kawas Diyos ka kasaya kaawa. ¹⁷ Maskin insorat kitay is Diyos nafwayong han Faraon, ka gorongan sas sakop Ihipto, Ho nafabali hyamo ha kangayanan kaarakitay giwa hyamo ibolon ho mamalag angko karigonan, hanggan angko ngayan imbantog sadi wak dahonya baba daga. ¹⁸ Yakanga nyawa faktaw is Diyos no kasaya kaawa, ya kaawa wan, hanggan nyawa faktaw hanya no kasayag faganit it fangayofan, yamganit wan. ¹⁹ Haw awkin somagot angko kitay, No kitonya, kana mayon is Diyos nogsogat yapdi manga taw? Fakta ka lomaban in Diyos kafangayofanan, ham gayfan? ²⁰ Dapat tam taw odi, kinda araw tam no somagot kitonya han Diyos? Maangay awkin, ham gayfan, ka anglit nogsogat ka nahalig hanya, noglwang, Kana haw no nahalig angko kitoy? ²¹ Halimbawa, no tam ka ganglit, idwa awkin tam ha bahala kalig nyawa sadik dahol, sadik ogbot, ginya mandi fag foholan daga? ²² Kitonya yadi, is Diyos bahala wan no kasayag falag it kaisogan hanggan it karigonan. Dapat ay, dogay is Diyos naagwanta ka manga taw, nyawa fiya wa isogon, nyawan tohoyan kitay, tonya fag manga taw imliyam wa aban. ²³ Is Diyos kasaya yadig falag it maakwa fag kafiyan kat nadisag mahogod hantam it manga fakaawaon, hantam it manga nafatalaga has kafiyan gi yapdis hyabi. ²⁴ Tam wa tonya fag manga taw kat nafatawag, bohondi gis manga Hodyo, dapat gi yadis manga Hintil. ²⁵ Kito kan Diyos nafwayong san Osiyas Kasoratan, kitay, Ka manga taw ka bonwangko sakop hyabi, ho ngomayan angko wa sakop Ka layonan manga taw ka bonwa angko fagalwasiyon hyabi, ho ngomayan angko fakabalon kati. ²⁶ Hanggan, sinya mandi fag banwanan aho noglwang hyabi, Ta bonwa angko sakop fag manga taw, Sinya mandi kati ho ngomayan has taw kitay, ka boyagan fag Diyos, it manga wa anak. ²⁷ Ginya madi, is Isayas nafwayong kawa han Israil, Nyawa kayowas onay dagat in Israil manga ha-

sokfonan, dapat sayok di kambawi. ²⁸ Maskin madali hanggan marigon intam Fon nogfatonglos it nafatohoyan fadosaan sas baba daga. ²⁹ Kito yadin Isayas fwayong gona, Tam inbali yadi wa ara kitos taga Sodoma, Manga taga Gomora, idwa hansawad, no bonwa kitay intam Fon, ka marigon man has fagayo, nafasawad yapdi ka tiba gintam layonan taw. ³⁰ Kinda odi kati kantam fagfwayongon, ham gayfan? Ka manga Hintil kadyapdi kasaya kabali fiya san Diyos faglagan hyabi, kati is Diyos igfatohoyan kitay, ta nangafiyen wa hanya, kawa tagsyag hanya. ³¹ Dapat ka taga Israil kagsayak ka manga ogali kagfabali hanya fiya san Diyos faglagan, idwa nangafiyen ha hanya. ³² Kana mayon no kitonya, ham gayfan? Maskin ista sadili odi ibolon kasta fagsyagon, bonwa kitay tagsyag in Diyos. Ta bilang wantahid sas bato fatahidon. ³³ Kito kansorat, Lag ngay, hogfwalid sas banwa Siyon sadik bato kagfatahid manga taw, Sadik bato dahol kagfahakfo manga taw. Dapat nyawa faktaw kagsyag hanya fag bato, idwa aban imbway.

10 Angko manga fadwasay, no kawangko manga kapariho Hodyo, ho gwayan wa kasaya, hanggan angko fagdaranginon yadi han Diyos kitay, ta fag imbawi nangos. ² Hoglag kitay angko manga kapariho Hodyo mahogod gibolon, kaarakitay is Diyos nangos, fag bomaya was taw no kitay di, dapat ay, tadwa twagdog no kana kan Diyos fagbayaon orongan. ³ Tadya twagdog no kinday is Diyos nogfatohoyan kitay manga taw mangafiyen wa hanya, yakanga, tadwag fagomon kalig it sadili halimbawan, idyag fasakop han Diyos halimbawan. ⁴ Is Kiristo kagfatonglos ka Batasan Hodyo, kaarakitay nyawa faktaw kagsyag hanya, is Diyos iglwang tonya fag taw nangafiyen ha hanya. ⁵ No kinday tam no mangafiyen han Diyos, no hadis Batasan Hodyo baliwa, is Mwisik ka nasorat kitay ka syagan gogali ka kahasslongan ka maangay has Batasan Hodyo, ka Batasan Hodyo faboyag hanya. ⁶ Dapat, kawa tam no mangafiyen wa han Diyos maskin tam igsyag in Kiristo, iglwang kiti, Haw fag idwa gayfan kitay fakta ka domasog han Diyos banwanan ham tongod, it kahologan fadokson in Kiristo gim tongod, ⁷ ngatay fakta ka domasog ham daga has Daga Salad, it kahologan faboyag ya in Kiristo. ⁸ Dapat kito kat bato fwayongon, Ka barita no kinday tam no mangafiyen wa han Diyos idwa ayayo gintam. Sawantam manga bibig hanggan fangayofan. Kat kahologan kawa hyami fagbaritaon, kawa hasagsyag han Kiristo akbang hantam. ⁹ Nontam wa bibig kagfaanon kitay is Hisos kagfon intam, hanggan intam fangayofan katiwala kitay is Diyos nafaboyag ya hanya, is Diyos bomawi intam. ¹⁰ Maskin ngay, intam fangayofan fag syag han Kiristo, kaarakitay is Diyos mamatohoyan kitay, tam nangafiyen wa hanya. Hanggan intam bibig fag fadog has taw kitay, hanya wantam fagsyagon,

ginya tam imbawi wan. ¹¹ Ka kasoratan iglwang, Nyawa fakta fag taw kagsyag hanya, idwam balaw. ¹² Idwa ha giba ka Hodyo has Hintil, no pariho igsyag han Hisos. Is Diyos sadi di kagfon fagayo, hanggan hanya kagdisag mahogod it kafiyen has fagayo kagdarangin ha hanya. ¹³ Kito ka Kasoratan iglwang, Fagayo kagsyag hasagfon intam imbawi wan. ¹⁴ Kinda ara ta no somyag hanya, nodya katiwala, ham gayfan? Kinday ta nomtiwala nodya nadog kawa ha hanya? Kinda ara ta no domog nodya hagfwayong has taw? ¹⁵ Kinda ka barita nomdog nodya ha manga Fandiyabarita nasogo? Kito kansorat sas Kasoratan, Masaya waglag ka mangag diya ka Fiya fag Barita nondasog wan. ¹⁶ Dapat nyawa nadog wan, idwa fagayo intiwala has Fiya fag Barita. Kito kan Isayas nafwayong, Angko Fon, fakta katiwala hyami nafwayong? ¹⁷ Yakanga ta nogtalinga ka Fiya fag Barita, ta bago di katiwala. Ka Fiya fag Barita imdog no hagtoltol kawa han Kiristo. ¹⁸ Dapat angko intaw ha hayo kiti, Manga taw idwa awkin nadog ka Fiya fag Barita, ham gayfan? Ta nadog wa ngay, maskin insorat kitay, Ista manga hasnog indog wan sas fagayo fag banwanan, Hanggan ista manga fwayong naskat wa sadi wak dahonya baba daga. ¹⁹ Tongko intaw sadi ya, Ka manga taga Israil idwa awkin natwagdog, ham gayfan? Gwadi hyabi yapdi is Mwisik nalwang, Ho aba bago digfainglig lag hayo ka manga taw kadyan bali sadik layonan orongan. Ho aba faisog hayo ha sadik layonan taw kadya manga madonong. ²⁰ Ginya madis Isayas nafwayong yadi marigon, Ka mangadyag sayak angko ka nalag angko. Kati aba ho falag wangko sadili has manga idya galin-gawan angko hyabi. ²¹ Dapat is Isayas yadi ka nafwayong kawa has manga taga Israil kitay, Sadi wak sirangan hogfaaronan ha sadik layonan taw kadwa katanog angko fwayong, malaban wa dahol.

11 Kati tongko intaw ha hayo sadi ya, Is Diyos nadayo aw it sadili layonan fag manga taw, ham gayfan? Idwa ngap nadayo. Aho sadi yadi taga Israil, gin Abraham hasokfonan, ho gi yadin Binhamin hasokfonan. ² Is Diyos idwa nadayot sadili layonan fag manga taw, kat nahilala gis bago bago yapdi. Ham awkin idwa natwa ka Kasoratan fwayong kawa han Iliyas, ka galibitan igdarangin igfaawaon hanya han Diyos, kawa kasayag fadosa ka manga taga Israil? ³ Is Iliyas nalwang, Angko Fon, ta nafahatay wa hyamo manga fangampang. Ta natastas wa hyamo manga fanogban. Aho odi kansawad, isyay wan. Kati ta kasaya ya fahatay angko. ⁴ Dapat kinday kan Diyos sagot han Iliyas? Is Diyos nalwang, Aho ha nafasawad yapdi 7,000 ama kadwag lohod hasta tolod fagsyagon, kawas Baal. ⁵ Kitonya mandi kati fag manga masohod, kawa malooy in Diyos kahowayan, ha akwa yapdi manggan sawad gin Diyos manga nafili. ⁶ Is Diyos nafili tonya fag manga taw, bonwa kitay maskin it manga

ogali fiya, dapat kawa malooy in Diyos kahowayan. Is Diyos no nafili lamang manga taw ka fiya it manga ogali, bohonwa kitay in Diyos malooy fag kahowayan kan-awas taw. ⁷ Kinda kati, ham gayfan? Ka manga taga Israil, it fakaaywanan, idya ha nabol it fakasayaon han Diyos baliwa. Dapat kan Diyos nafili, sayok, ha nabol. Ka tiba in-ganit odista manga fangayofan. ⁸ Kito ka Kasoratan fwayong, Is Diyos idyag fatwagdog ista manga fangayofan, Igfatapyaton wan ista manga mata, igfabongkohon wan ista manga talinga hanggan wa kati fag masohod. ⁹ Is Dabid yadi ka nafwayong, Fag gi yadista manga fanohodan ta nomtahid, nom-ik-tan nangos. Fag imtobong, fag imdosa wan. ¹⁰ Ista manga mata fag imharom wa nangos, kaarakitay tadwag lag. Ta no boyagan yapdi, fag fagaba mabokongan it goyoy, kawat manga fakabyaton. ¹¹ Ho gintaw ya ha hayo manga Hintil. Ka manga taga Israil dagos wa nakfo aw, nontahid wan? Idwa twa kabangon aw, ham gayfan? Bonwa kitay. Dapat kawa ka manga taga Israil nafalamang wan, ka Famawi nadasog has manga Hintil. Ginya madi aban, ka manga taga Israil im-ingli waglag ka manga Hintil nomtiwala. ¹² Maskin ka manga taga Israil nadayo, kawa tiba fag manga layonan taw ka nalag fiya. Manga Hintil nalag fakinabang dahil maskin manga taga Israil nafasigpala wan. Ginya madi, manga taga Israil, it fakaaywanan, no somoyo ya, fagayo lomag labi man inyak fiya. ¹³ Kiti nangos angko bato fwayongon ha hayo, has manga Hintil. Kawa aho Fandiya-Barita has manga Hintil, mahogod aho nogfatonglos angko bato ibolonon, ¹⁴ kaarakitay angko manga iba, manga Hodyo, im-ingli waglag hanggan ka tiba imbawi yadi wan. ¹⁵ Maskin kawas Diyos no nadayo in Israil fag layonan manga taw, ka nafabali tiba taw it manga fakilalaon. Yabay, is Diyos nogtanggap yan Israil fag layonan manga taw, labi man kafiyaon. Bilang kitos nafaboyag ya ka manga natay. ¹⁶ Halimbawa, ka tinapay gona gis sadik foholan nondisag han Diyos, bilang yadi sadi wak dahonya foholan indisag. Ka dalid hayo, nondisag wa han Diyos, hanggan wat manga sanga indisag yadi wan. ¹⁷ Ta nalifong tibat sanga gi sadik fon olibo, kasta tanom, ginya madi, ham, bilang manga sanga gis iba fon olibo, ka natobo odi basad talon, ta nafasokfon has fon olibo ista tanom, kaarakitay ham ha tagok yadi hanggan dalid ginya fag fon olibo. ¹⁸ Yakanga, ham fag idwag fasalagwa ka danwa manga sanga gona. Ham idwa ha fagfatakaon. Ham fag tohod kitay bonwa ham, ka manga sanga, kagdiya dalid, ka dalid kagdiya hayo. ¹⁹ Dapat, ngatay sadik Hintil somagot wa kitay, Gwadi ka manga sanga gonan lifong wan kaarakitay ahom sokfon. ²⁰ Anod wa tonya, ta nalifong wan kawa nodwag syag han Kiristo, dapat haw insokfon wan kawa haw igsyag hanya. Haw fag idwag fadaholon hyamo. Yatokitay, haw fag kadala wan. ²¹ Is Diyos nodwag

faanogon ka manga Hodyo, ka bilang ka dan wat manga sanga, idwa yadig faanogon hyamo. ²² Istay tam iglag in Diyos kahowayan hanggan it kaisogan. Maisog has manga idwag syag han Kiristo, dapat mahoway ha hayo ham nogfadagos hat malooy fag kahowayan. Dapat nodwan, ham is manga Hintil kamlifong aban. ²³ Ka manga Hodyo nodwag faganiton domwag kitay, dayo igsyag in Kiristo, fiya mandi kamsokfon ya, maskin is Diyos syagan igfasokfon ya. ²⁴ No haw, sadik sanga olibo ka natobo odi basad talon, insokfon has orongan wa fon olibo, nyawadwa ginya nogbanwan, malpos man inya is Diyos nogfasokfon ya ka mandit manga sanga gona, ginya mandi fag fon. ²⁵ Manga fadwasay Hintil, ho kasaya ham tomwa nangos sadik bagay madolaw, kaarakitay ham idwa ha takan. Ka manga taga Israil, nyawa kitay maganit ista manga fangayofan, idwa fagaba kitonya hanggan aban. Ka manga Hintil, sadi wak kayonya kan Diyos nafili, nomtiwala hanya, ²⁶ gis nanya aban, ka manga taga Israil, it fakaaywanan, imbawi yadi wan, kawan sorat kiti, Ka Famawi kabangkad aban gis banwa Siyon, Bomol fagayo fag kadwatan gin Hakob manga hasokfonan. ²⁷ Tongko taranggapan has taw aban, Aho no bomol ista manga ogali dwat. ²⁸ Maskin ka manga Hodyo nadayo ka Fiya fag Barita, tanbalin Diyos manga kaaway, hanggan ham manga Hintil nalag fakinabang. Dapat, maskin is Diyos igtohod yapdi ka manga Hodyo hafowon, kat manga nafili, ka manga Hodyo in Diyos wa manga fakilalaon yapdi. ²⁹ Maskin is Diyos idwag faoman it fangayofan no fakta kat fagfiliyon, hanggan no haday it bato disagon it malooy fag kahowayan, ³⁰ ham manga Hintil, nyawa ham hyabi danwag sway in Diyos, kati ham it fakaawaon, kawa ka manga taga Israil nasway in Diyos. ³¹ Kitonya yadi ka manga Hodyo igsway in Diyos kati, kawa ham nonbalin Diyos fakaawaon, kaarakitay ka manga Hodyo imbali yadit fakaawaon aban. ³² Maskin is Diyos nafatohoyan kitay fagayo fag manga taw dan wa sogowan has karigonan ogali dwat, kaarakitay falag has taw kawa hanya kaawa has fagayo. ³³ In Diyos kaakwaon, it kadonongan hanggan it fakatwawon idwa twa haminon. Tam idwa syagan fahalposan it manga kafangayofanan. Tam idwa kamin gisip it manga ogali. Kito kansorat sas Kasoratan, ³⁴ Fakta kagsarom intam Fon fangayofan, ham gayfan? Fakta ka syagan igfaadal hanya? ³⁵ Fakta ka ha nadisag han Diyos nyawa kana Kaarakitay is Diyos bahala gomanti bomayad ya hanya? ³⁶ Yatokitay, giwa ngap hanya kanginan fagayo fag manga bagay, hanya ka gano fagayo, hanggan fagayo igfalag it kafiyan. Fag is Diyos wa ngap ka tomanggap fiya fiya, fagayo fag kangayanan, nyawa ginahin. Fag kitonya wa ngay.

12 Yakanga manga fadwasay, maskin in Diyos kaawaon hantam idwa twa haminon, hog-

faaronganon ha hayo kitay, tam fag disag ngap intam sadili han Diyos, sadik disag boyagan, intohoyan hanya hanggan maangay. No kitonya, tam orongan wagfasayagdog in Diyos. ² Tam fag idwag tolad kastay is baba daga fag manga ogali taw. Dapat fag is Diyos ka faoman intam ogali nogfabago intam manga fangayofan, kaarakitay tam tomwa no kana kan Diyos kafangayofanan, no kana ka fiya, ka maangay hanya, hanggan hosto wa orongan. ³ Maskin in Diyos malooy fag kahowayan indisag hangko, hogfwayong ha hayo fagayo kitay, tam fag idwa gisip santam basad fangayofan kitay tam kafiyaon. Yatokitay, fag fakafiyon wan tam no gisip intam fagsyaganon no kinday is Diyos nogtobong intam igsyag hanya. ⁴ Santam manga habilogan aywan fag manga layonan, dapat fagayo it manga ibolonon bokod bokod. ⁵ Kitonya yadi, nyawa tam aywan kantiwala, no kitay di, dapat tam inbali sadik habilogan, insadi san Kiristo, insarokfonan ha sadi ha sadi. ⁶ Maskin malooy in Diyos kahowayan hantam, hanya nadisag hantam intam manga fakatwawon, bokod bokod, yakanga tam fag faanod gibolon tonya. Not disag hantam fakatwawon igtoltol in Diyos hampang, no kinday tam nogsyag hanya, tam fag toltol wan. ⁷ Not disag hantam kitay tam matogbongon, tam fag togbong has taw. Tam no natanggap ka fagsyaganon igfaadal, tam fag faadal wan. ⁸ Not disag hantam fagsyaganon igfarigon ista manga fangayofan, tam fag farigon wa ngay. Tam nogdisag fag idwa kwangit. Kagbahala in Diyos sakop, fag gano wa fiya fiya. No ka maawaon, fag kasolong kaawa is taw. ⁹ Fag orongan tam no galwasi manga taw. Tam fag dayo marigon ka manga dwat. Fag matawidan marigon ka manga fiya. ¹⁰ Fag kitos manga fadwasay tam no gadgalwasiyan. Fag idwag fasalagwa hantam manga iba, yatokitay fag fasayagdog ha sadi ha sadi. ¹¹ Tam fag idwa kaoman no galwasi intam Fon, fag mahogod gibolon it ibolon. ¹² Tam fag kasolong fagaba kawa tam ha fagfanayaon. Ta nogfahorihan intam maskin tam intiwala, tam fag gagwanta wan. Fag darangin fagaba. ¹³ Intam manga fadwasay no ha manga kakorangan, tam fag togbong has taw. Tam fag mafasakbawon manga famaklay. ¹⁴ Fag darangin kitay kagfahorihan intam lomag fiya. Fag idwag sabayon tonya fag manga taw. ¹⁵ Tam fag tarogbongan igbaya, nyawa bonwantam sadili fagbayaon. Tam fag tarogbongan yadi karongkot, iba taw no ha mahori. ¹⁶ Tam fag kasadi intam manga fangayofan. Tam fag idwag fadaholon intam sadili, fag idwa kafang gofod has manga taw kadya ha kangayanan. Tam fag idwa gayfan kitay tam madonong man has iba taw. ¹⁷ Fag idwag ganti ka dwat has dwat. Tam fag gogali ka maangay sasta faglagan fagayo. ¹⁸ No baliday intam fagsyaganon, tam fag gofodan mahoway has fagayo. ¹⁹ Angko manga fakilalaon, tam fag idwag ganti dwat. Tam

fabayaanan wa han Diyos kagfadosa ka mangag fahorihan intam, maskin insorat sas Kasoratan kitay, Intam Fon iglwang, aho wa ka bahalag ganti, hanggan aho gomanti wan. ²⁰ Yatokitay, hyamo wa kalaban no kalonos, ha fahwanan ya, no kainom, ha fainoman wan. Ginya madi hanya maya wan. ²¹ Tam fag idwa gadaogan ka dwat, yatokitay fag ka fiya fag ogali kagdaog ka dwat.

13 Tam fagayo fag fasakop has gobirno, maskin idwa ha gobirno ka bonwan Diyos nafaangay. Ka manga gobirno kati is Diyos ka nafabahala. ² Yakanga, kaglaban has gobirno, iglaban in Diyos nafabahala hantam a, igfathoyan yadit sadili has fadosa. ³ Kagbahala sas gobirno bonwa fakadalaon, no fiya intam ogali, dapat fakadalaon ngay tam no gibolon dwat. Tam awkin kasaya kitay tam fag idwa kadala kagbahala sas gobirno? No kitonya, fag fiya intam ogali, ginya madi kagbahala mamasaya wagdog intam. ⁴ Kagbahala sas gobirno in Diyos wa sogowan kaarakitay tomogbong wantam. Dapat tam fag kadala hanya, tam no gibolon dwat, maskin hanya bahala wagfadosa ka gibolon dwat. Kagbahala sas gobirno in Diyos wa sogowan kaarakitay igfadosa ka gibolon dwat. ⁵ Yakanga tam fag dan wagfasakop has gobirno, bondi kitay maskin tam kadala in Diyos, hanya nogfadosa maisog, tam fag fasakop kaarakitay tam idwa ha fagtagahon santam fangayofan. ⁶ Kitonya yadi, tam fag bayad bohis maskin ka mangag bahala, gibolon in Diyos ibolon ta nogfatonglos it manga ibolonon. ⁷ No fagbayadon wa fiya fiya, tam fag bayad wan, nyawa has fangaboyagon hanggan has daga. Tam fag magalang yadi has taw ka fiya wa faggalangan. ⁸ Tam fag idwa ha bayadon nyawa haday no bohonwa kitay tam fag galwasi ha sadi ha sadi, ka bilang wantam fagsagoton yapdi. Ka galwasi iba taw, tonya wa ka katanog ka Batasan Hodyo. ⁹ Ka manga togon fagayo, kitos Haw fag idwag fabayowan, fag idwag fahatay taw, fag idwag nahaw, fag idwa kaingli, hanggan fagayo fag manga togon ka kitonya, imsakop sa sadi dik fwayong kitay, Fag galwasi intam kapariho kito mandintam sadili. ¹⁰ Ka galwasi iba taw idwa gogali dwat has iba taw, yakanga katanog ka Batasan Hodyo sadik dahonya. ¹¹ Tam fag imtanog wa tonya maskin tam twa wan no ginahin fag manga kasohodan kati, tam fag kafo-law wan. Kati ka Famawi kaakbang wa dahol dahol, kabagat wa kaakbang, bondi kito ka hyabi tam no bago digsyag hanya. ¹² Ka yabi kasagaya wa kati, kaakbang wa ka balabagan. Tam fag dayo wa marigon ka manga dwat fag ogali, ka basad marom. Tam fag dan wagsangkap ka manga sangkap yawa, manga fanlaban has dwat. ¹³ Tam fag gogali ka maangay kitos manga taw basad sirang. Tam fag idwa kalibang kalango, ngatay has manga dwat fag kasolongan, tam fag idwag fabayowan. Tam fag dayo ka manga bagay has

hayana baliwa, manga gidgisogan, manga kaid-ingliyan. ¹⁴ Fag is Kiristo Hisos, kagfon intam, kantam bilang fagsolongon kitos fanaktak has ogali dwat. Fag idwag talinga intam bali fangayofan masayaon kaarakitay tam idwam diya hat manga fakasayaon dwat.

14 Tam fag tanggap ka malombay yapdi no katiwalaan Diyos, bonwa kitay maskin kasaya odig daraogan. ² Tiba taw katiwala in Diyos iglwang fiya di no kwan, nyawa kana. Dapat, ka malombay yapdi katiwala, it fanganon ofi odi. ³ Ka kwan nyawa kana, fag idwag yod ka kwan ofi odi, hanggan ka kwan manga ofi odi, fag idwa gato ka kwan nyawa kana, maskin is Diyos igtanggap yadi hanya. ⁴ Kana tam no gato ista sogowan? Gwadi ista fon lamang ka lomwang ngatay fiya ista ibolon, ngatay idwan. It fon ka fabali hanya maangay, maskin it fon syagan wan. ⁵ Tiba taw igfahanga ka sadik sirang fiya man has iba sirang. Tiba taw iglwang myasa di kitonya ka manga sirang fagayo. Tam fagayo fag fatohoyan intam sadili fangayofan hanya fag manga bagay. ⁶ Kagfabokod sadik sirang, igfabokod maskin iggalang intam Fon. Ka kwan nyawa kana iggalang yadintam Fon maskin igbaya in Diyos it nahwan. Kadwa kwan kitonya, iggalang yadi hantam Fon, igbaya yadi han Diyos it nahwan. ⁷ Tam no boyagan yapdi, intam ogali ha kahologan has iba taw. Tam no matay aban, ha kahologan yadi has iba taw. ⁸ Tam no boyagan yapdi, intam haboyagan ha kahologan hantam Fon. Ginya madi, tam no matay aban, intam kahatayan ha kahologan yadi hantam Fon. Yakanga, nyawa tam boyagan, nyawa tam matay, is Diyos kagfon intam. ⁹ Maskin hyabi is Kiristo natay, ginya madin boyag ya domwag, kaarakitay hanya wa kagfon ka manga natay hanggan ka manga boyagan. ¹⁰ Yakanga, kana tam no gato yapdintam manga fadwasay? Kana tam nogyod hanya? Tam fagayo aban somagot san Diyos fanokawan fangabayan, ¹¹ maskin ka Kasoratan iglwang, Kagfon intam iglwang, aho boyagan fagaba, yakanga fagayo fag manga taw manlingkohodan sangko atobangan aban, Fagayo fag manga bibig taw mamasayagdog in Diyos. ¹² Yakanga, tam fagayo somagot han Diyos aban kantam manga ogali istay sas baba daga. ¹³ Maskin kitonya, tam fag idwa gato ha sadi ha sadi. Ka fiya man tam nogfatohoyan santam basad fangayofan kitay tam idwag falag intam fadwasay has ogali dwat. ¹⁴ Kawa ahon sadi san Hisos, intam Fon, ho twa kitay idwa ha fanganon inhalig fagbaybayon. Dapat nyawa faktaw no gayfan sadik fanganon fagbaybayon, ya kawa ha hanya, fagbaybayon ngay. ¹⁵ Ya tam idwa galwasi intam fadwasay tam no nahwan di ngap it fagbandoon. Is Kiristo natay kaarakitay igbawi hanya, yakanga tam fag idwag faadowan hanya kawa tam ha nahwan. ¹⁶ Tam no gayfan bonwa fagbaybayon, tam fag matagahan kitay idwam bali gagan has iba taw tam no kwan. ¹⁷ In Diyos sakop

bohonwa kitay ha fagbaybayon fanganon, manga inomon, ngatay idwa ha fagbaybayon, dapat in Diyos sakop kawa ha kahalongan, kahowayan hanggan kasolongan, sas Maliyaw fag Falad. ¹⁸ Ka katanog in Kiristo kitonya, in Diyos wa fagbayaon, hanggan manga taw magalang yadi hanya. ¹⁹ Yakanga tam fag idwag fagomon gogali ka manga bagay ka has kahowayan baliwa hanggan kagfarigon ha sadi ha sadi. ²⁰ Tam fag idwag fadwat in Diyos ibolon kawa tam kasamok fanganon. Idwa ha fanganon inhalig fagbaybayon. Ka dwat tam no ha nahwan kagfalag iba taw has ogali dwat. ²¹ Fiya man tam nodwa kwan tagoban, idwa yadi ginom alak, idwa yadi gibolon nyawa kana fag bagay, intam manga fadwasay no somokfon yadi kitonya, nyawa ta gadowan yapdi kitay ngatay dwat ka kitonya. ²² Tam lamang hanggan is Diyos ka fiya fag tomwa no kinday intam fangayofan ka has fanganon baliwa. Nyawa faktaw masolong it fangayofan nodwa ha fagtagahon no gibolon ka manga bagay idwa ha fagadowanon sa hanya. ²³ Dapat ay, nyawa faktaw no gadowan yapdi, dapat kwan wan, is Diyos igfatohoyan hanya has fadosaan maskin no kwan, idwag syag hanya. Nyawa kana fag bagay, tam nodwag syag in Diyos, ya ogali wa dwat.

15 Tam ka manga marigon intiwala, fag togbong ka manga malombay kaarakitay tamrigan. Fag bonwantam sadili fakasayaon lamang intam fagayfanon. ² Yatokitay, tam fag fasolong ngap igdog intam iba has fiya baliwa, kaarakitay tamrigan no katiwala. ³ Kawas Kiristo idwan tanog it sadili fakasayaon kito kansorat, Ta nogyod hyamo, aho kasta fagyodon. ⁴ Fagayo kansorat sas Kasoratan hyabi insorat kaarakitay tam tomwa wagdog kitay, tam no omagwanta wan, hanggan intam manga fangayofan nomrigan gis Kasoratan, ginya madi tam ha fagsyagon orongan. ⁵ Is Diyos kagfasyagan intam gagwanta hanggan kagfarigon intam, hanya fabali nangos intam manga fangayofan sadi di, kawa tam igtolad in Kiristo Hisos, ⁶ kaarakitay tam fagayo gofodan, bilang sadi dik bibig kagfasayagdog in Diyos, kan Kiristo Hisos, intam Fon, it Ama. ⁷ No kindas Kiristo natanggap intam, tam fag kitonya yadi igtanggap ha sadi ha sadi, kaarakitay in Diyos kafiyan imlag. ⁸ Hogfwayong ha hayo kitay is Kiristo inbali sogowan Hodyo kaarakitay igfatohoyan kawas Diyos igfaanod it manga togon hasta manga hafofowan hyabi. ⁹ Hanggan manga Hintil mamasayagdog yadin Diyos, kawas Diyos kaawa was taw, kito ka Kasoratan fwayong kitay, Yakanga ho mamasayagdog hyamo sas manga Hintil fagdogan. Ho mangambahan bomaya hyamo ngayan. ¹⁰ Nalwang ya domwag, Ham manga Hintil ham fag gofodan han Diyos nafili fag layonan taw, fag baya yadin Diyos. ¹¹ Ginya nafwayong ya domwag, Ham manga Hintil fagayo fag fasayagdog intam Fon. Fagayo fag manga

layonan taw fag fasayagdog hanya. ¹² Is Isayas nado-gang yat hampang kitay, In Hisi hasokfonan imdasog aban. Hanya ka bomahala has manga Hintil. Hanyam bali ka manga Hintil fagsyagon. ¹³ Is Diyos kagfasyag intam, fabali nangos intam fangayofan kasolong wa dahol hanya, hanggan fahoway yadintam, tam no kati-wala hanya, kaarakitay ka Maliyaw fag Falad karigo-nan fahogodan intam igsyag in Diyos. ¹⁴ Angko manga fadwasay, hogbaya wa hayo kitay, ham kafiyaon, hosto wa hayo kadonongan, ham twa yadi wagfatohod ha sadi ha sadi. ¹⁵ Nyawa kitonya, hodwa kayag fatohod ha hayo marigon ka tiba bagay kangko nasorat istay fag sorat. Ho nasorat kito kawas Diyos nadisag hangko it malooy fag kahowayan, ¹⁶ kaarakitay hom-bali in Kiristo Hisos fangibolon has manga Hintil. Ho bilang sadik fagalan-han-Diyos aho nogtolto has taw ka Fiya fag Barita gin Diyos, kaarakitay ka manga Hintil imbali sadik disag, ka Maliyaw fag Falad fagfalayonon han Diyos, maangay hanya. ¹⁷ Yakanga, kawa ahon sadi san Kiristo Hisos, fiya di aho nogfasayagdog angko naibolon, ¹⁸ maskin kangko faglwangon, aho nogtolto has manga Hintil, hanggan gibolon, ka orongan is Kiristo ka gibolon, kaarakitay manga Hintil imtanog yadi hanya. ¹⁹ Ka lamang angko fagwason, ka Maliyaw fag Falad karigonan kanlag sas manga falagon hanggan ibolon madolaw. Yakanga ho nafahaskat ka Fiya fag Barita kawa han Kiristo has fagayo fag manga banwanan gi yapdis banwa Hirosalim hanggan balis sakop Iliriko. ²⁰ Dandi angko fakasayaon gis bago, kangko fagbaritaon fag kayapdidya nadog kawa han Kiristo, kaarakitay kangko fagbaritaon fag manga taw bohon-wa ka danwagdog gis iba taw. ²¹ Kito ka Kasoratan fwayong, Kadya ha nagdogan barita kawa ha hanya, homilala wa hanya, Ka mangadya nadog hyabi, tomwa yadi domog aban. ²² Kawa honlibang yapdig barita fagaba, maskin ngay ahodya nadagos has nyamo hayo. ²³ Dapat kati hontabo wagbarita istay fag manga banwanan taw. Gi yapdis hyabi ho danwa kasaya man-abang hayo, ²⁴ yakanga hogsyag wa kitay ho manabang hayo, aho no domalan aban, ho no hawas layonan daga Ispanya. Ginya madi ho kasaya kitay, aho no domogay ogbot is nyamo hayo aban, ham nangos tomogbong angko, fadagos angko lahawan has Ispanya. ²⁵ Dapat kati aho hayapdis Hirosalim, ha diya togbong han Diyos Tifonan sinyas. ²⁶ Maskin gis manga Tifonan sas sakop Masidonya hanggan sakop Akaya, ta nadisag togbong hantam manga fadwasay myabog sas Hirosalim. ²⁷ Tagbaya wagdisag, talaga wa kitay ta kasaya omibolon kitonya. No kitay di, ta ha sagoton tomogbong has taw, maskin ka manga Hodyo igfahoray yadi has manga Hintil it manga fagbayaon has fangayofan baliwa, yakanga fiya yadi ka manga Hintil no tomogbong has manga Hodyo git manga fagbayaon malagan. ²⁸ Nomtabo wan, aho no nadisag wan ka

togbong kasta nafadiya has manga fadwasay sas Hirosalim, homginan wan, ho domalan las nyamo hayo sas banwa Roma, bago di has layonan daga Ispanya. ²⁹ Ho twa wa kitay, aho nomdasog is nyamo hayo, aywan intam donggon gin Kiristo, hasagbaya baliwa. ³⁰ Angko manga fadwasay, maskin tam pariho igsyag in Kiristo Hisos intam Fon, hanggan gadgalwasiyan, kawa tam insadi sat Falad, hogsagad kitay ham fag togbong igdarangin han Diyos kawa hangko kitay, ³¹ aho no hawas Hirosalim, ka mangadya katiwala hasagfon intam sas sakop Hodiya, ta fag idwa nangos omiktan angko. Hanggan fag darangin kitay intam manga fadwasay sas banwa Hirosalim, fag nangos bomaya yadi angko diya togbong has taw. ³² Ginya madi, non Diyos wa kafangayofanan, ho bomaya wan ho nombangkad has nyamo hayo, hanggan angko fangayofan imhoway ya sa hayo akbang. ³³ Is Diyos kagfon kahowayan fag sawa hayo fagayo. Fag kitonya wa ngay.

16 Hogfaano ha hayo in Fibi, intam fadwasay ina kagtogbong in Diyos Tifonan sas banwa Kinkiriya itfagonan. ² Ham tanggapan wa hanya kito ka fiya has manga kapariho intiwala. Nyawa kana ka korang sa hanya, togbongan, maskin aywan yadit natogbong, hanggan wa aho kat sadi. ³ Fag fwayong handa Pisisila da Akila kitay ho gwas hanya. Tonya kangko manga ofod, in Kiristo Hisos yadi manga fangibolon. ⁴ Ta natogbong angko, nyawa ta natwa kitay, ngandayo hanya wa kasta fagfahatayon. Yakanga bondi aho kagbaya hanya, hanggan intam Fon manga Tifonan fagayo sas manga banwanan Hintil igbaya yadi wan. ⁵ Fag fadog yadi han Diyos Tifonan kagtifonan sat balay, kitay ho gwas yadi was taw. Ham fadogan yadi hangko fakilalaon fiya fiya, is Ipinito, ka gonan tiwala han Kiristo sas sakop Asya, kitay, ho gwas hanya. ⁶ Ho gwas yadin Mariya kadwag fagomon gibolon sinyas nyamo hayo. ⁷ Ho gwas yadi inda Andoroniko, da Honya, manga kapariho Hodyo, ka naofod angko sas porisowan. Tonya gona man angko intiwala, manga Fandiya-Barita ya ngadi. ⁸ Ho gwas yadin Ampiliyato, angko yadi fakilalaon fiya fiya, kawa minsadi santam Fon. ⁹ Ho gwas yadin Orbano, intam ofod, in Kiristo fangibolon, hanggan is Istagwis angko fakilalaon fiya fiya. ¹⁰ Kitonya yadi ho gwas in Apilis. Inlag wa kitay hanya katiwala orongan hantam Fon, nyawa ha lagan mahori. Ho gwas yadin Aristobolo talanahan, ¹¹ hanggan in Hirodiyong, kapariho Hodyo, hanggan ka mangan sadi hantam Fon, san Narsiso balay. ¹² Ho gwas yadi inda Tirifina da Tirifosa, intam Fon manga fangibolon. Kitonya yadi ho gwas in Pisisida angko fakilalaon fiya fiya. Hanya mahogod no gibolon intam Fon ibolon. ¹³ Ho gwas yadi in Rofo intam Fon fangibolon marigon, hanggan wat ina, ka bilang yadi wangko ina. ¹⁴ Ho gwas yadi inda Asinkirito da Filigonti da Hirmis

da Patrobas da Hirmas, hanggan intam manga fadwasay tiba, ista manga ofod. ¹⁵ Ho gwas yadi inda Filologo da Holya da Niriyo, hanggan wat fadwasay ina. Kitonya yadi ho gwas in Olimpas, hanggan intam manga fadwasay fagayo ka gofod is taw. ¹⁶ Tam nogladlagan, tam fag badbayaan ha sadi ha sadi. In Kiristo manga Tifonan fagayo gwas yadi hayo. ¹⁷ Angko manga fadwasay hogfaaronganon ha hayo kitay, ham fag matagahan fiya fiya ka mangag faagran hayo, mangag faadowan hayo, bilang odig fadayo hayo gi hayo naadal Barita. Ham fag idwag talinga ista fwayong. ¹⁸ Ka kitonya fag manga taw idwa gibolon in Kiristo kagfon intam it ibolon. Ista fagtogbongon ista sadili odi bali fangayofan masayaon. Ista hampang no kadog di, bilang wa fakyason, dapat ista toltol igfatang lang odi gintam Fon ka mangadya ha fakatwawon. ¹⁹ Ho kasolong wagdog kitay indog wa fiya fiya nyawa siday, kawa ham igfadagos katiwala han Kiristo. Dapat angko fakasayaon, no hadis manga fiya, ham fag myasa wa madonong, dapat no kadi has manga dwat, ham fag idwa ha fakatwawon. ²⁰ Ginya madi, idwa dogay aban, is Diyos, kagfon kahowayan, romogrog wan Satanas sa hayo daga bitis. Ham nangos fag domog kitay is Hisos kagfon intam mahoway ha hayo fagaba.

²¹ Is Timotiyo angko ofod fangibolon, hanggan da Losyo da Hason da Sosipatro, angko yadi manga kاپariho Hodyo, gwas hayo. ²² Ahos Tirsiyo kagfalo igso-rat to fag sorat, ho gwas yadi hayo santam Fon ngayan. ²³ Is Gayo kangko fandogayan gwas yadi hayo. Sat balay in Diyos Tifonan nogtifonan. Is Ilasto yadi, kagbahala has kwarta sas banwa, hanggan intam fadwasay is Kwarto, gwas yadi hayo. ²⁴ (Ham nangos fag domog kitay is Kiristo Hisos intam Fon fagaba mahoway ha hayo fagayo. Fag kitonya wa ngay.) ²⁵ Fag fasayagdog in Diyos, ka syagan igfarigon intam manga fangayofan, kito kangko natoltol ha hayo Fiya fag Barita, kawa han Kiristo Hisos. To fag Fiya fag Barita sadik bagay madolaw, dogay gis hyabi hyabi bilang matagowan yapdi, dapat kati inlag wa fiya fiya. ²⁶ Hanggan indog wa gin Diyos manga fangampang ka nasorat, indog sas fagayo fag manga layonan taw, sadik baba daga, maskin is Diyos, kadwa ha katabowanan, kagfasognod kitay, fag imdog wan kaarakitay manga taw imtiwala hanggan imtanog yadi hanya. ²⁷ Kawas Kiristo Hisos intam wa Fangafiyan hanggan Fagalan, tam fag fasayagdog in Diyos fagaba, ka sadi di ka madonong. Fag kitonya wa ngay.

1 KORINTO

1 Ahos Pablo in Diyos nafatawag kaarakitay imbali in Kiristo Hisos Fandiya-Barita. To fag sorat gi hyami da Sostinis intam fadwasay. ² Migsorat ha hayo, han Diyos Tifonan sas banwa Korinto, ha hayo kantohoyan han Kiristo Hisos, kan Diyos manga nafatawag kaarakitay kabali it sakop, kito yadis fagayo fag manga taw, nyawa siday fag banwanan, ta nogsyag han Kiristo Hisos kagfon intam, kasta Fon hanggan wantam. ³ Ham nangos fag domog kitay, is Diyos intam Ama, hanggan is Kiristo Hisos intam Fon mahoway ha hayo fagaba, hanggan igfalokmay hayo manga fangayofan. ⁴ Ho fagaba wagbaya han Diyos kawa ha hayo, maskin hanyag disag it malooy fag kahowayan ha hayo gin Kiristo Hisos. ⁵ Yakanga, kawa ham insadi ha hanya, ham bohondi kito ka hyabi sas fagayo, ham inbali madonong hanggan twag toltol fiya fiya. ⁶ Kawa hyami nafaorongan ha hayo, kawa han Kiristo, in-anod yadi wan sa hayo manga ogali, ⁷ yakanga idwa ha korang in Diyos disag ha hayo manga fangayofan bago, no kandongay day tam no mafanayan yapdi kagfon intam, is Kiristo Hisos, nomlag aban. ⁸ Is Diyos kagfarigon intam manga fangayofan hanggan wa has katabowanan, kaarakitay idwa ha fakabayaon intam ogali gis nanya fag sirang aban kagfon intam, is Kiristo Hisos nombangkad. ⁹ Is Diyos idwa bohagon ka nafatawag intam kaarakitay tam imsadi hat Anak, is Kiristo Hisos intam Fon. ¹⁰ Angko manga fadwasay, hogfaoronganon ha hayo san Kiristo Hisos, kagfon intam, it ngayan, kitay, ham fag kasadi sa hayo manga hampang, hanggan fangayofan hanggan bato ibolonon kaarakitay ham idwag daraogan. ¹¹ Maskin in Kolowi manga iba nafwayong hangko kitay ham, hono, manga fadwasay, ham gagran. ¹² Kangko fagfwayongon, insadi, hono, iglwang, Aho han Pablo, insadig lwang, Aho han Apolos. Intibag lwang, Aho han Pidro, tibag lwang, Aho han Kiristo. ¹³ Is Kiristo awkin inhorayan, ham gayfan? Aho awkin kanpako sas nafatimbangan hayo kawa ha hayo? Ta nafatogna awkin hayo sangko ngayan, is Pablo? ¹⁴ Highbaya han Diyos kitay hodwa ha nafatogna is nyamo hayo, no bohonwa da Kirispo da Gayo. ¹⁵ Yakanga manga taw idwa twag fwayongon kitay tantogna sangko ngayan. ¹⁶ Ho bago di natohod kitay aho, mangharaw, ha akwa ya nafatogna, da Istifanas talanahan. Nonsagaya di tonya, hodwa ha natohod kitay, aho ha nafatogna yas nyamo hayo. ¹⁷ Dapat

ay, is Kiristo idwa nasogo angko kaarakitay fagaba mamatogna has taw. Is Kiristo nasogo angko kaarakitay manoltol ka Fiya fag Barita, bohonwa kitay sas fakyason fag hampang gis kadonongan istay is baba daga, dapat sas hampang ka malpos kadog, kaarakitay in Kiristo kahatayan karigonan idwam bohin, it kahatayan sas nafatimbangan hayo. ¹⁸ Ka manga taw kagdagos has kadwatan nogdog kawa han Kiristo kahatayan sas nafatimbangan hayo, taglwang tonya habongolan odi. Dapat santam, ka manga dagos wambawi, tam nogdog kawa han Kiristo kahatayan, to wa kan Diyos kadonongan. ¹⁹ Maskin insorat kitay, Ho domwat ka manga kadonongan manga taw, Hogfabali idwa ha kahologan kasta fakatwawon. ²⁰ Da ngap ka manga ha kadonongan? Da ngap kagfaadal Batasan Hodyo? Da ngap ka madonong igfabarohagan istay is baba daga, ham gayfan? Is Diyos igfabali kapaongan odi ka kadonongan istay is baba daga. ²¹ Maskin in Diyos wa kadonongan ka nafabali kitay manga taw idwa syagan homilala hanya, no kadi kadonongan gistay is baba daga. Dapat ay, is Diyos nafaangay kitay, tam nogtolto ka Fiya fag Barita, hanya ka bomawi manga taw kagsyag ha hanya, nyawa kastay is baba daga fag manga taw iglwang tonya fag barita habongolan odi. ²² Ka manga Hodyo igsagad fag hamlag sadik falagon madolaw kaarakitay ha faorongan. Ka manga Girigo, it fagsayahon, kadonongan odistay is baba daga. ²³ Dapat kantam fagbaritaon kawas Kiristo kanpako sas nafatimbangan hayo, ka manga Hodyo fasingyanan, hanggan ka manga Hintil faglwangon, habongolan odi. ²⁴ Dapat, no kawan Diyos manga nafatawag fag manga taw, nyawa Hodyo, nyawa Girigo, is Kiristo wa kan Diyos karigonan hanggan it kadonongan. ²⁵ Hogfahasayan odi hayo, maskin, tam no lomwang, is Diyos nahalig it habongolan, ya tonya fag bilang habongolan, kadonongan wan, bohondi kito ka kadonongan taw. Tam no gayfan is Diyos magomo nomtoon, gis nanyas Diyos marigon man has fagayo fagayo fag manga taw. ²⁶ Angko manga fadwasay, tam fag tohod no kinday tam is Diyos no nafatawag intam. Sayok di santam ka manga madonong hanggan ka ha manga magorang kanbantog. ²⁷ Dapat is Diyos nafili ka magadwa madonong istay is baba daga, kaarakitay igfahaya ka manga madonong, hanggan ka manga magomo sasta faglagan, kaarakitay igfahaya ka manga

marigon. ²⁸ Is Diyos nafili yadi kasta manga fagyodon, kadwa bangan mahalga no kalag di, idwa ha kahologan istay is baba daga, no taw dik lomwang, kaarakitay igfabali idwa mahalga kasta faglwangon manga gorangon sas baba daga, ²⁹ kaarakitay nyawa fakta fag taw, idwag fatakgdog san Diyos faglagan it sadili fagsyaganon. ³⁰ Maskin giwa ngap in Diyos intam haboyagan kansadi san Kiristo Hisos. Hanya kan Diyos nafabali intam kadonongan, intam kahaslongan, intam fangafiyan, hanggan intam Famawi. ³¹ Yakanga kito ka Kasoratan fwayong, Taw no kasayag fatakgdog has taw, fag kagfon intam kat fagfasayaon igdog.

2 Angko manga fadwasay, hyabi aho no gis nyamo hayo, ho natoltol ha hayo in Diyos kafangayofanan kadya nafadog has taw hyabi. Dapat angko hampang bonwa famasayaon igdog, bohonwa yadi abwat fag kadonongan. ² Ho danwa ha fangayofan kitay, hodwa ha fagfwayongon ha hayo no bohonwas Kiristo Hisos, hanggan kawa hanyan pako sas nafatimbangan hayo. ³ Aho no sawa hayo atobangan, aho magomo, kadala wa dahol, karokog ya ngadi. ⁴ Aho no natoltol hanggan nafaadal hayo, hodwa nahampang masaya wagdog fag manga hampang hanggan madonong. Dapat ho natoltol ha hayo san Diyos Falad falagon hanggan it kadonongan, ⁵ kaarakitay in Diyos kadonongan ka hayo fagsyagon, bohonwa kadonongan odi taw. ⁶ Dapat ka orongan, tam igfaadal kadonongan has manga in-ganit sas bago fag fangayofan, dapat bohonwa ka kadonongan taw, bohonwa yadi ka manga gorangon kadonongan istay is baba daga kati, kawa tonya kaliyam di. ⁷ Kangko fagfwayongon kawan Diyos kadonongan kadya nafadog has taw hyabi. Nyawa ka daga idyan halig, in Diyos kafangayofanan kitay, to fag kadonongan imbali hantam kafiyon. ⁸ Ngadi sadik gorangon kagbahala kati fag manga masohod idwa ha natwa nadog. Ta nangos no natwa wagdog in Diyos kafangayofanan, ya nangos tadwa nafapako sas nafatimbangan hayo kagfon intam, kagfon yadi kafiyon. ⁹ Dapat ay, kito ka Kasoratan fwayong, Ka kafiyon kadya ha taw nalag, idya ha taw nadog, Idya ha taw naisip, Tonya fag kafiyon kan Diyos nafatalaga has manga galwasi ha hanya. ¹⁰ Is Diyos nafatwagdog hantam to fag manga bagay git Falad. In Diyos Falad kagsayak fagayo fag manga bagay, hanggan wa ka abasad wa dahol dahol kan Diyos kafangayofanan. ¹¹ Ista sadili falad lamang ka twagdog kasta naisip. Kitonya yadin Diyos Falad lamang ka twagdog kan Diyos manga naisip. ¹² Yabay kantam natanggap bohonwa ka falad gistay is baba daga, dapat in Diyos Falad, kaarakitay tam tomwa wagdog in Diyos kahowayan manga disag hantam. ¹³ In Diyos Falad ka nafadonong hyami to fag manga bagay, ka hyami fagfwayongon, bohonwa kadonongan taw ka nafadonong hyami. Yakanga migfatwagdog has man-

ga taw, in Diyos Falad manga disag hantam, manga taw ka ha akwa in Diyos Falad santam manga fangayofan. ¹⁴ Maskin nyawa faktaw kadya ha akwa in Diyos Falad, kafang yapdig tanggap it manga disag. No sas taw, tonya bilang odi habongolan, hanyadya twagdog, maskin, ka ha akwa in Diyos Falad lamang ka tomwa wagdog tonya fag manga bagay. ¹⁵ Nyawa fakta fag taw no ha akwa in Diyos Falad, tomwa wagdog fagayo fag manga bagay ngatay ha fakinabang, ngatay idwa ha akwa. Dapat ka manga taw kadwa ha akwa in Diyos Falad idwa tomwa wagdog tonya fag taw it kafiyon.

¹⁶ Kito kanfwalid sas Kasoratan, Fakta ka tomwa intam Fon fangayofan, ham gayfan? Fakta ka syagan faadal hanya? Dapat ay, in Kiristo fangayofan sawantam.

3 Angko manga fadwasay, nyawa kitonya, hodwa nasyagan nahampang ha hayo kito ka has taw kagfasakop han Diyos Falad. Aho no nahampang ha hayo, bilang has manga goyon yapdi ka bali fangayofan masayaon, kito yapdi ka manga anak dararag, no has katiwala han Kiristo baliwa. ² Ho nafahwan ha hayo gatas, kawa bohon yapdi maganit fag fanganon, maskin ham idyapdi syagan kwan. Hanggan wa kati ham idyapdi syagan. ³ Maskin ham kasaya has bali fangayofan masayaon yapdi. Ham ha akwa yapdi manga kaid-ingliyan, mangag daraogan. Tonya kagfahilala kitay ham kito mandi ka nogbanwan intam manga ogali istay is baba daga. Ham gogali yapdi ka hayo bali fangayofan masayaon. ⁴ Insadi noglwang, Aho han Pablo, insadi noglwang, Aho han Apolos, tonya kagfalag kitay ham gogali yapdi kito ka nogbanwan intam ogali istay is baba daga. ⁵ Maskin faktaw is Apolos? Faktaw is Pablo, ham gayfan? Hami in Diyos odi manga fangibolon kat manga nafafalo, ka nataban hayo hasagsyag han Kiristo. Mi pariho wan naibolon intam Fon nadisag faibolonon ha hyami. ⁶ Aho ka natanom. Is Apolos kagdamog, dapat is Diyos kagfatobo hanggan igfalangba. ⁷ Bohonwa kagtanom, bohonwa yadi kagdamog ka mahalga, dapat is Diyos ka mahalga kagfatobo hanggan igfalangba. ⁸ Kagtanom hanggan kagdamog fagayo fangibolon odi a, fagayo myasa wa ha tanggapon git nakayayan. ⁹ Hami pariho in Diyos wa ofod fangibolon. Ham in Diyos wa iyab. Ham in Diyos yadi wa fakaligon balay. ¹⁰ Kawas Diyos nadisag angko it malooy fag kahowayan, aho ka nafwalid fatokawan balay basad daga, kito sadik madonong kalig balay. Iba taw kagfadagos igfabilog ka balay. Dapat nyawa fakta fag taw ka kalig balay, fag idwag fahalbason, ¹¹ kawa fawa ha iba fatokawan balay igsak sinyal, no bohonwa kan Diyos nafwalid wan, kawas Kiristo Hisos. ¹² Ha akwag fadagos kalig balay, ginto, pilak hanggan bato maganit, sinyal fag baba fatokawan, hanggan ha akwa yadi kalig balay sonson wa manga hayo, manga fon fayay, hanggan kasta manga nagafasan odi. ¹³ Nomdasog ka sirang igsolay, imlag wan

intam naibolon, igsadig sadi no kinday. Maskin gis nanya fag sirang, afoy ka somolay, hanggan igfatohoyan no kinday ka orongan intam ibolon ha sadi ha sadi. ¹⁴ Nyawa gafo nahalig balay sas baba fatokawan nodwa mayab, ka nahalig ha tanggapon fasalamat. ¹⁵ Dapat ay, nomsonong di ka balay, ka nahalig fawa ha tanggapon ngadi kana. Nyawa kitonya, hanyam bawi di, no kitay di, dapat ay, idwa ha taktak taktak. ¹⁶ Tam awkin idya natwa kitay tam in Diyos wa fanimbaan, hanggan in Diyos Falad sawantam no maoliyanan? ¹⁷ Is Diyos ka domwat nyawa faktaw kagfadwat it fanimbaan. Maskin in Diyos fanimbaan intohoyan hanya, hanggan tonya fag fanimbaan kawa tam. ¹⁸ Nyawa fakta fag taw fag idwag daya it sadili. Hanya no gayfan kitay hanya madonong ka gistay is baba daga fag kadonongan, hanya fag tomwa kitay hanya bilang odi paong paong kaarakitay orongan imbali madonong. ¹⁹ Maskin nos Diyos kaglag, ka kadonongan istay is baba daga, kapaongan odi. Maskin insorat kiti, Is Diyos giktan ka manga madonong git sadili kadayaan. ²⁰ Kitonya yadi, Intam Fon twa wa kitay ka manga madonong fag manga taw it naisip idwa ha kahologan. ²¹ Yakanga nyawa fakta fag taw fag idwag fatakagdog ka sadik taw it naibolon. Fagayo hayo wan. ²² Nyawas Pablo, nyawas Apolos, nyawas Pidro, nyawa to fag daga, nyawa haboyagan, nyawa kahatayan, nyawa ka kati fag manga masohod, nyawa ka has aban, to fagayo hayo wan, ²³ hanggan ham sawan Kiristo hanggan is Kiristo sa yadi wan Diyos.

4 Ka fiya fag kito ka hayo fagisipon kawa ha hyami kitay, hami in Kiristo manga fangibolon kat nafaano in Diyos manga madolaw fag bagay kadya nafadog has taw hyabi. ² Kasta fon no ha nafaano hat fangibolon, it fangibolon fag gano fiya fiya tonya. ³ Idwa ha kana sangko nyawa ham somolay angko ibolon, nyawa fakta fag fanalinga hampangan ka somolay. Nyawa aho, ahodwa yadi somolay angko sadili ibolon. ⁴ Hodwa ha fagtagahon sangko basad fangayofan. Dapat ay, nyawa hoglwang kitonya, bohonwa kitay ahodwa ha ogali dwat. Intam Fon ka somolay angko ogali. ⁵ Tam fag idya ha faglwangon ngatay fiya, ngatay dwat, ista ogali, intam Fon nodyam bangkad. Aban, intam Fon bago falag ka bilang yapdi matagowan basad marom, hanggan falag yadi wa aban, igsadig sadi, ka manga fakasayaon taw kadyan dog yapdi. Gis nanya fag masohod aban, is Diyos mamasayagdog no kinda ka fiya hantam igsadig sadi. ⁶ Angko manga fadwasay, hami da Apolos kangko nafabali halimbawa kawa ha hayo manga fakinabang, kaarakitay ham tomohod kasta togon it kahologan noglwang, Fag idwag sagaya kansorat sas Kasoratan. Fag idwag fadaholon ka sadik taw, ginyag yod ka tiba. ⁷ Kinda ham no fiya man ka tiba, ham gayfan? Gwadi bohonwa awkin in Diyos wa disag ha hayo fagayo fag kadonongan ka sa hayo? No

kitonya, kana mayon ham nogfataka yapdig dog, bilang wadwan disag ha hayo? ⁸ Ham mangharaw hosto wan kati, ham gayfan. Ham maakwa wan. Ham mangharaw inbali manga gorongan, ham fawa nafaofod hyami. Kafiyaon nangos ham nonbali manga gorongan orongan, kaarakitay hami yadi fag imbali gorongan, hayo yadi manga ofod. ⁹ Maskin no aho di kaglag, is Diyos igfalag hyami has taw, hami manga Fandiya-Barita, sas ginanan ginanan odi, idwa kitos taw ik fiya, kitos manga taw kantohoyan has kahatayan, ista odi fagdoroon istay is baba daga, manga anghil hanggan manga taw fagdoroon. ¹⁰ Kawa hami galwasi in Kiristo, manga taw gayfan hami paong paong odi, dapat anod, ham madonong wan, kawa han Kiristo baliwa. Hami magomo, ham ka manga marigon. Ham kasta fagfasayaon igdog, hami kasta fagyodon. ¹¹ Hanggan wa kati fag masohod, mi kalonos ya, kainom ya, ka odi kitay idwa malobasan. Ta hanggan wagbakkab hyami, midwa yadi ha oliyanan. ¹² Hami gibolon hanggan wa kagayamonan kaarakitay hami ha fangaboyagon yadi. Migdarangin kawa has mangag yod hyami. Mi gagwanta odi ta nogfahoriyan hyami. ¹³ Ta nogyod hyami, migsagot is taw mayan mayan odi. Hanggan wa kati, ta noglag hyami, hami bilang odi manga boga okason, kawa hami idwa kitos taw ik fiya sadi wak dahonya baba daga. ¹⁴ Bohonwa kitay ahog tikis wagfahaya hayo, aho nogsorat kito, dapat kaarakitay igfaadal hayo, kawa ham bilang wangko manga fagalwasiyon fag manga anak. ¹⁵ Nyawa kayodak libo ka gano hayo, idwa ayo ka hayo pinagkaama. Ahon bali kwinta wa hayo ama ham nogsyag in Kiristo Hisos, kawa aho ka natoltol ha hayo ka Fiya fag Barita. ¹⁶ Yakanga hogfaaronganon ha hayo kitay, fag aho ka hayo fagtoladon. ¹⁷ Kawa kitonya, hogsogo has nyamo hayo in Timotiyo, angko fagalwasiyon hanggan matanogon fag anak santam Fon. Hanya kagfaayfan hayo kangko manga ogali sangko haboyagan kansadi san Kiristo Hisos, manga ogali kangko fagfaadalon sas manga Tifonan fagayo, nyawa siday. ¹⁸ Ha akwa sa hayo tibag fatakag dog maskin ta gayfan hodwam bangkad has nyamo hayo. ¹⁹ Dapat ay, nontam Fon wa kafangayofanan, hombangkad ya ngalay has nyamo aban. Ho bomantay ngatay syagan gibolon ngay ta no kampang kitonya ayo ayo. ²⁰ Maskin in Diyos sakop kafiyan bohondi baba odi bibig, fag hanggan wat kadonongan kamlag sat ogali. ²¹ Kana nangos ka hayo fakasayaon aho nombangkad has nyamo hayo, ngatay aho fag ha famakbak, ngatay fag imlag kitay ho galwasi hayo hanggan mahoway di angko fangayofan?

5 Bohonwa bohag, aho ha donggon barita kitay, insadi sa hayo dwat wa dahol it naogali, kawa hanggan dit ama babay, igtaban wan. Gwadi manga taw nyawa idyapdi katiwala in Diyos idyadi wa ha kitonyak fabayowan. ² Ham ha takan ya ngadi. Gwadi ham fag

twa kaya, fag karongkot wan. Ham fag domayo gi hayo Tifonan ka gogali kitonya. ³ Nyawa ahodwas nyamo hayo, angko fangayofan gofod yadi hayo, yakanga ho bilang dis nyamo hayo. Kawa kitonya, san Hisos intam Fon ngayan, ho nafatohoyan it fadosaan ka gogali kitonya. ⁴ Ham fag matifonan, hanggan angko fangayofan gofod yadi hayo, ginya san Hisos intam Fon karigonan, ⁵ ham faanowan yap han Satanas tonya fag taw, kaarakitay it habilogan imhori, ginya madi, it falad ngan aram bawi gis nanya fag sirang is Hisos kagfon intam nombangkad ya. ⁶ Idwa fiya ham nogfataka. Ham awkin idwa twa kitay, nyawa ogbot di fag famadahol tinapay, igfalafit sadi wak dahonya longgong tinapay? ⁷ Ham fag danwag bol ka daanon fag famadahol tinapay, kawa ogali dwat, kaarakitay ham imbali kitos sadik longgong tinapay bago, kadwa ha aktom famadahol. Ka orongan kitonya wa tam, maskin is Kiristo kantam fangafiyan Anak Topa indisag wan, kito kasta nasogba topa ta nogtohod ka Fanohodan Nagsagayan hyabi. ⁸ Yakanga kati tam fag manohodan ya ngay, dapat bohonwa kitay ha tinapay ka ha aktom famadahol daanon, ka dwat fag ogali hanggan ibolon, dapat kawa ha tinapay kagfahalimbawa ka fangayofan malinay hanggan orongan, idwa ha aktom famadahol kagfalafit kadwatan. ⁹ Hoglwang sangko sorat gona kitay, ham fag idwa gamigosan has mangag fabayowan. ¹⁰ Kangko fagfwayongon bohonwa ka mangadwan tiwala fag manga taw kagfabayowan, manga masayaon, mangag nahaw, ka manga ha fagsyagon iba karigonan, maskin tam nostay yapdis baba daga, tam idwa syagan kabokod is taw kadyan tiwala ka gogali kitonya. ¹¹ Dapat kangko fagfwayongon, tam fag idwa gamigosan has manga taw kaglwang, Ala, hontiwala wan Kiristo, dapat hanya igfabayowan yapdi, masayaon, ngatay ka manga iba karigonan it fagsyagon, ngatay igfadwat igdog ka sadi, ngatay iglango, ngatay ignahaw. Ngadig sayowan, tam fag idwag sayowan kwan ka kitonya fag taw. ¹² Hodwa ha bahala gato kadyan tiwala han Kiristo. Is Diyos ka bahala gato has taw. Bohonwa awkin tam ka bahala gato ka san Diyos Tifonan fag manga taw, ham gayfan? Kiton Diyos sorat iglwang, Ham fag dayo gi hayo Tifonan ka hayo ofod ka gogali dwat.

6 Nomtoon insadi sa hayo kahori ha sadik fadwasay kantiwala. Ham awkin idwa kaya domiya tonya has idwan tiwala kagtalinga hampangan? Gwadi fag ha mandis manga taw kantohoyan han Diyos nogdiya hayo hampangan. ² Ham awkin idwa natwa kitay, ka manga taw kantohoyan han Diyos kambali aban manga fangabaya kastay is baba daga fag manga taw? No tam kambali fangabaya kastay is baba daga fag manga taw aban, tam idwa awkin somyagan igfatabo hampangan kati, no ogbot di fag manga bagay? ³ Ham awkin idwa twa kitay tam kambali

fangabaya has manga anghil aban? Labi man tam somyagan fatabo ka mangastay is baba daga fag manga hampangan. ⁴ Yakanga, ham no ha manga hampangan, kana mayon ham nogdiya yapdis manga taw kadyan tiwala, kadwa ha kwinta san Diyos Tifonan? ⁵ Ham awkin idwa twa kayas taw? Sa hayo Tifonan idwa aw ha akwa ngadi sadi ka madonong igfatabo hampangan manga fadwasay pariho intiwala? ⁶ Dapat ay, ham no pariho intiwala kahodhoriyan, fadwasay gayat has fadwasay, saya ngadista faglagan mangadwam tiwala. ⁷ Kawa ham tiba gadgayatan ka sadik bagay kagfadwat hayo Tifonan. Gwadi fiya man tam no gagwanta di no hagfahoriyan intam, nyawa tagdaya intam. ⁸ Dapat ay, ham mandi kagfahoriyan hayo manga iba. Ham igdaya yadi, hanggan ka hayo fagdayaon ka mandi hayo manga fadwasay. ⁹ Ham awkin idwa twa kitay ka ha manga ogali dwat idwam ofod san Diyos sakop? Ham fag idwa gadayaan hayo sadili. Ka gogali dwat has ka taw, ka mangag syag has iba karigonan, ka mangag fabayowan, ka bilang wa talsawa kapariho ama, ngatay kapariho ina, ¹⁰ ka manga fangnahaw, ka manga masayaon, ka mangag lango, ka mangag fadwat igdog, hanggan ka mangag daya, ka kitonya fag manga taw idwam ofod san Diyos sakop. ¹¹ Hyabi ongay, tiba santam kitonya yadi, dapat ay, kati, san Kiristo Hisos, kagfon intam, sat ngayan karigonan, hanggan san Diyos Falad, tam inbali malinay, intohoyan han Diyos hanggan nangafiyan wa hanya. ¹² Ha akwa taw kaglwang, Fiya di aho no gibolon nyawa kana. Ala, no kitay di, dapat tibak ogali idwag togbong. Aho syagan yadig fwayong, Fiya di aho no gibolon nyawa kana, dapat ho dayo igfasakop nyawa haday fag ogali karigonan. ¹³ Ka tibag lwang, Ka fanganon ka odi kitay has basad tiyan, hanggan ka tiyan intalaga has fanganon. No kitay di orongan tonya. Dapat is Diyos pariho domwat fagayo dowababan. Intam habilogan idwan talaga hasagfabayowan baliwa, dapat intalaga hasagfon intam, hanggan intam Fon intalaga hantam habilogan. ¹⁴ Is Diyos nafaboyag ya intam Fon habilogan, hanggan it karigonan yadi ka faboyag ya intam manga habilogan aban. ¹⁵ Ham awkin idwa twa kitay tam manga layonan san Kiristo habilogan? Aho awkin bomol nangos in Kiristo habilogan manga layonan, ginyag fabali tonya manga layonan sas habilogan ina famabayowan? Nyawa ginahin, bohonwa aho ka omibolon kitonya. ¹⁶ Ham awkin idwa twa ka gofod kitonya fag ina kasadi sinyag fag ina hat habilogan? Maskin in Diyos kasoratan iglwang, Tonya fag dowababali sadi di. ¹⁷ Dapat ay ka kasadi hantam Fon, it fangayofan kasadi yadi hantam Fon fangayofan. ¹⁸ Tam fag idwa gogali dwat has ka taw. Nyawa kana kasta ogali dwat tiba, idwa hasta sadili habilogan nogfahoriyan, dapat nogfabayowan hayadi wat sadili habilogan nogfahoriyan. ¹⁹ Tam

awkin idwa twa kitay, intam habilogan ka Maliyaw fag Falad fanimbaan? Hanya kantam natanggap gin Diyos hanggan hanya maoliyanan santam habilogan? Bohonwa kitay tam kagfon intam sadili habilogan. ²⁰ Is Diyos nasali intam, nabayad wan. Yakanga intam habilogan ogali fag falag in Diyos kafiyan.

7 Kati yabay ho somagot ka hayo nasorat hangko fag manga bagay. Fiya madi ngap ka ama nodwa gakbang has ina. ² Dapat kaarakitay idwa hagfabay-owan, fiya no kafod sadili babay, sadili indogan. ³ Ka talsawa fag gogali ka maangay ha sadi ha sadi. ⁴ Maskin bohondi ka ina, dapat it indogan kagbahala hat babay habilogan, hanggan bohondi ka ama, dapat it babay kagbahala hat indogan habilogan. ⁵ Ham fag idwa kwangit hayo habilogan ha sadi ha sadi, no bohonwa hayo togonan kitay, gis nanya fag masohod ham manaramanan yapdi kaarakitay mandarangin. Nomsagaya gis nanya, ham fag gofodan ya, no kinda mandi katfagonan ham no gofodan, kaarakitay is Fandaya idwag faloksowan hayo has dwat maskin ham idwa gagwanta hayo sadili. ⁶ Bohonwa kitay hoglwang fagayo fag ha babay, fag ha indogan, dapat fiya di no ha akwa wan. ⁷ No aho di kaglwang, fiya nangos fagayo no kito yadingko. Dapat is Diyos kagfahafod it disag hantam igsadig sadi, idwa myasa kitonya. ⁸ Angko fagfwayongon has mangadya ha indogan, idya ha babay, hanggan has manga ina balo kitay, fiya nangos ta no kito yadingko, ahodwam dow, hodwa ha babay. ⁹ Dapat ta nodwa gagwantat sadili, ta fag ha babay di, fag ha indogan di, fiya man nodwa kanbang fagaba. ¹⁰ Angko togon has manga talsawa, no kitay di, bohonwa aho kagfon kampang kitonya, kagfon intam kagfwayong, ka ina fag idwa gobon it indogan. ¹¹ Dapat, ka ina no omobon it indogan, fag idwa somayak tiba ama domwag, no bonwa kitay goli ya hat sadili indogan. Ka ama fag idwa yadi gobon it babay. ¹² Aho noglwang ha hayo tiba, bohonwantam Fon kagfon kampang kitonya, aho odi, hoglwang kitay, sadik ama kantiwala no ha babay kadyan tiwala, dapat kawilit indogan, ka ama fag idwa gobon. ¹³ Kitonya yadi, no ha sadik ina kantiwala, dapat it indogan idyan tiwala, it indogan no kawili yapdi hanya, ka ina fag idyadidi wa gobon. ¹⁴ Maskin kawat babay kantiwala intohoyan han Diyos, kalafit yadi wat indogan nyawa idyan tiwala. Hanggan kawat indogan kantiwala intohoyan han Diyos, kalafit yadi wat babay, nyawa idyan tiwala. Nodwa kitonya, ista manga anak idwa fiya san Diyos faglagan. Dapat ka orongan, ista manga anak ka maangay wan san Diyos faglagan. ¹⁵ Ka indogan, ngatay babay kadyan tiwala no kasaya wa gobon, nyawa omobon wan. Kadyan tiwala no naobon wa kitonya, ka indogan ngatay babay kantiwala, idwa ha fagayfanon, maskin in Diyos wa fangayofan kitay, tam fag gogali ka mahoway. ¹⁶ Dapat ay, ham manga ina

kantiwala, ngandayo is Diyos bomawi hayo manga indogan kawa ham it fakabotongan. Hanggan ham manga ama kantiwala, ngandayo is Diyos bomawi yadi hayo manga babay, kawa ham it fakabotongan yadi. ¹⁷ No kinda mandi hyabi intam Fon nadisag hantam, hanya no nafatawag intam, tam fag kitonya mandi. Kitonya wan angko togon has fagayo fag manga Tifonan. ¹⁸ Ka sadik taw no danwa toli is Diyos no nafatawag hanya, fag idwa kasayag faoman tonya. No danwadya toli, fag idwam toli. ¹⁹ Idwa ha kinday nyawa toli, nyawadwan, dapat, ka fiya, fag katanog in Diyos manga togon. ²⁰ No kinda mandi ka nogbanwan is Diyos no nafatawag intam, tam fagayo fag kitonya mandi. ²¹ Is Diyos no nafatawag hyamo, haw awkin danwan bali ista nasali sogowan, haw fag idwa gisip tonya. Dapat hyamo fon nogfaangay digfalaw hyamo, haw fag galin wa gi hanya. ²² Maskin intam Fon nogfatimbang ka danwasta nasali sogowan fag manga taw, hanya kabali bilang wad bohonwasta nasali sogowan sat faglagan kagfon intam. Kitonya yadis Kiristo nogfatimbang ka bohonwasta nasali sogowan, tambali yadin Kiristo wa sogowan kawas Diyos nasali. ²³ Is Diyos nabayad wan, nasali yadintam. Tam fag idwa kabali ista nasali sogowan odi manga taw. ²⁴ Yakanga manga fadwasay, nyawa kinday tam nogbanwanan, is Diyos no nafatawag intam, tam fag kitonya mandi no gofodan in Diyos. ²⁵ No kadi has manga idwa ha indogan, idwa ha babay, hodwa ha fagtogonon ha hayo gintam Fon. Dapat, kawa kagfon intam in-awa angko, honbali yadi sadik matanogon hanya. Yakanga ho fadog yadi ha hayo angko sadili fangayofan. ²⁶ No kito wa kati fag mahori fag kasohodan, no aho di kagdog, no kinday hayo lagan kati, fag idwag faoman. ²⁷ Haw awkin ha babay? Fag idwa kasaya gobon. Hadwa aw ha babay? Fag idwa garonganon igligaw. ²⁸ Bohonwa kitay haw no bomabay, haw naibolon dwat, hanggan sadik dayaga no omindogan, fiya di. Dapat ham no ha babay, ngatay indogan, ham lomag manga mahori kati istay is baba daga. Kangko fakasayaon ham bomaybay tonya fag manga mahori. ²⁹ Angko manga fadwasay, to kangko bato lwangon, sayok di intam sawad fangaraw kantohoyan hantam. Yakanga gis kati ginan ka ha babay, it babay fag idyapdig falibang it indogan, hanya no gibolon intam Fon ibolon. ³⁰ Ka manga karongkot, fag idwa kalibang goraw, ka manga kaso-long fag idwa kalibang kasolong. Ka mangag sali fag idwa kalibang igsali. ³¹ Hanggan ka mangag fasad-saliyan yapdi istay is baba daga, fag idwa kalibang hanya baliwa. Maskin to fag daga hanggan fagayo fag manga ogali istay imliyam wa aban. ³² Nangos angko fakasayaon, ham fag idwa ha fagayfanon istay. Ka ama kadwa ha babay, nontam Fon ibolon it fagalibiton, intam Fon bomaya wa hanya. ³³ Dapat ay, ka ama ka ha

babay, ka manga bagay istay is baba daga it fagalibiton kaarakitay it babay bomaya hanya. ³⁴ Kawa kitonya igfabokngan dit fagayfanon. Kitonya yadi ka ina kadwa ha indogan, ka manga bagay hantam Fon kat fagalibiton maskin kasayag fatohoyan it habilogan hanggan fangayofan hantam Fon ibolon. Dapat ka ina ka ha indogan, ka manga bagay istay is baba daga it fagalibiton maskin kasaya kitay, it indogan fag bomaya hanya. ³⁵ Maskin hoglwang kitonya, ho kasayag togbong hayo, bohonwa kitay igfahoriyan hayo. Ho kasaya nangos igtaban hayo has maangay fag ogali, kaarakitay ham somyagan omibolon mahogod intam Fon ibolon, maskin idwa hagfalibang hayo. ³⁶ No kadi ha manga togonan kadwan tonglos, ka anahan no gayfan bomohag hat fagalwasiyon, hanggan nodwa kaagwanta sat sadili, maskin gwayan wa kasaya hanya fag ina, ka fiya, tam fag fadagos wa tonya fag dow, maskin danwat togonan, idwa ha dwat no kitonya. ³⁷ Dapat fagayo dow, not fangayofan idwa bomabay, idwa omindogan, kafiyaon no kitonya, no matohoyanan wat sadili fangayofan, bohon wasta napilit, no gagwanta di nga ngap it sadili. ³⁸ Kadwag faaywanon hampang, fiya madi ngap kagbabay hat togonan, dapat fiya man inya, ta no pariho gagwantat sadili, idwag babay, idwa yadi gindogan. ³⁹ Ka ina ka ha indogan fag bilang wa salawid loka hat indogan, it indogan no boyagan yapdi. No kawa kitay it indogan natay wan, fiya di nyawa lomigaw iba ama, nyawa faktat fakasayaon, dapat ay, fag hamandis mangam tiwala. ⁴⁰ Dapat nongko di fangayofan, nodwa lomigaw yap it indogan, hanya labi wa bomaya, hanggan no aho di kagdog, in Diyos Falad sa yadi wangko.

8 Kati ho fomwayong ha hayo no kadi has manga fanganon indisag has labang taw. Tam twa wa kitay, kito ka tiba noglwang, Tam fagayo madonong wan. Ka kitonya fag kadonongan igfadaholon odit sadili, dapat ay ka galwasi manga taw igfarigon ka tiba. ² Nyawa fak taw no gayfan kitay hanya madonong, hanya idyapdi twa fiya fiya nyawa kana fag bagay. ³ Dapat ka galwasi in Diyos, in Diyos wa fakilalaon. ⁴ Yabay, no kadi has fanganon kandisag has labang taw, tam twa wa kitay ka manga labang taw idwa ha kahologan, hanggan is Diyos lamang ka sadi dik fagsyagon orongan. ⁵ Nyawa kitay ta ha faglwangon manga fagsyagon tiba, ngatay sam tongod, ngatay istay is baba daga, hanggan aywan ista fagngayanon manga fagsyagon fag manga afo. ⁶ Dapat no kadi hantam, tam twa, is Diyos sadi lamang, kawantam Ama ka nahalig fagayo fag manga bagay hanggan intam haboyagan intohoyan ha hanya. Sadi di kagfon intam, is Kiristo Hisos, in Diyos wa katogbong no nahalig fagayo fag manga bagay, hanggan igdisag intam ipsaw. ⁷ Dapat tadya fagayo natwa kitonya. Tibag tohod yapdi ta nogfiya labang taw, yakanga hanggan wa kati ta no

kwan kitonya fag fanganon, ha fagtagahon yapdi kitay, idwa fiya kat naibolon. ⁸ Bohonwa ka fanganon kagfabali intam fiya san Diyos faglagan. Nyawa tam idwa homwan, intam fangayofan bonwa kitay dwat man, tam no kwan idwa yadim bali fiya man. ⁹ Dapat ay, tam fag matagahan, nyawa halimbawa, fiya di tam no kwan tonya fag fanganon, tam fag idwag falag has dwat ka iba taw ka gadowan yapdit fangayofan. ¹⁰ Halimbawa, no tam ka marigon katiwala imsakop sasta famiyan, homwan yadi, ginya ka magomo yapdi no katiwala lomag kitay tam kwan yadi wa sinya, hanyadwa awkin imlombay wa dagos, ham gayfan, homwan yadi wan kandisag has labang taw? ¹¹ Maskin tam no kwan, kawa tam twa kitay ka manga labang taw idwa ha kahologan, tam igfadwat intam fadwasay fangayofan, ka magomo yapdi. Is Kiristo natay wan kaarakitay igbawi intam fadwasay, yakanga tam fag idwag falombay intam fadwasay fangayofan. ¹² No kitonya, tam ha kasalanan wan han Kiristo kawa tam ha kasalanan hantam fadwasay hanggan igfalombay it fangayofan, tam nafaadowan di ngap hanya. ¹³ No aho di ka hayo faglagan, no fanganon kagfalombay angko fadwasay fangayofan, hodwa homwan domwag tagoban, kaarakitay bohonwa ahot fasingyanan, angko fadwasay no has ogali dwat.

9 No kitay di aho fawa ha fagintawon domwag gis iba taw. Aho wa sadik Fandiya-Barita. Aho sadi ka nalag yadin Hisos intam Fon. Gwadi ham wa kat manga bohad kawa aho no gibolon intam Fon ibolon. ² Nyawa ka tiba taw igfabohag kitay, aho bohonwa Fandiya-Barita, dapat ham idwag fabohag. Ham wa kagfaorongan kitay aho kagfon intam it Fandiya-Barita. ³ Aho no somagot has mangag solay angko, ho lomwang kiti, ⁴ No kitay di, hami manga Fandiya-Barita no somagad fanganon, ngatay inomom gin Diyos Tifonan, fiya di. ⁵ Fiya yadi nyawa mi tomaban hyami manga babay kito yadinda Pidro hanggan tiba Fandiya-Barita hanggan intam Fon manga fadwasay, ta nafaofod yadit manga babay. ⁶ Hami lamang da Barnabi awkin ka nangos fag iglag hyami sadili fanganon, ham gayfan? ⁷ Fakta fag sondalo kat sadili wa fanangdanon no gibolon, ham gayfan? Fakta fag taw kagtahom obas kadwa ha fakinabang it bohad? Fakta fag gano manga topa, manga hambing, kadwa ha fakinabang ginya, ngadig toris it afo soso, ham gayfan? ⁸ Kangko fagfwayongon bohondi kitay gis manga ogali taw. Kitonya yadi ka Batasan Hodyo fwayong. ⁹ In Mwisit togon iglwang yadi, Haw fag idwag bangkas ka oyong baka no dayog giling. Ka baka awkin kan Diyos fagisipon orongan, ham gayfan? ¹⁰ Bohonwan. Kawa ngap tam is manga taw kan Diyos fagfwayongon. Kawa ka gadado hanggan kaggiling fag ha fagsyagon kitay hanya ha kahorayan kasta naani. ¹¹ Hami ka nananom ha hayo manga kafiyon has fangayofan bago baliwa,

mahori wa dahol awkin ha hayo, hami no ha tanggapon gi hayo manga bagay malagan? ¹² Ka tiba taw igsagad yap madi ngap, bago man no hami, labi man nyawa mi managad yadi hayo. Nyawa kitonya, midwa nanagad hayo. Mi gagwanta wa fagayo kaarakitay ham idwa ha fabangdanan hyami ogali. Yakanga midwam bali hayo fasingyanan ham nodwa kasaya ka Fiya fag Barita kawa han Kiristo. ¹³ Ham awkin idwa natwa kitay tagdisag di fanganon gis Fanimbaan-Dahol has manga gibolon sinyo, hanggan tagdisag yadi kahorayan gista manga nasogba has mangag togbong sas fanogban? ¹⁴ Kitonya yadi kagfon intam natogon kitay, ka mangag toltol ka Fiya fag Barita, fag lomag yadi it fangaboyagon ginya. ¹⁵ Dapat hodwag faanod igsagad nyawa ginahin, nyawa hoglwang kitay maangay no kitonya. Hodwa yadig sorat ha hayo kitay ham disagan hayo togbong angko. Ngawa hanggan ho matay lonos, ho kasayag baya yapdi angko ogali kitay hodwa nanagad. ¹⁶ Aho bohonwa kitay igfadaholon angko, aho nogtolto ka Fiya fag Barita kati. Tonyantam Fon nafatohoyan angko bato ibolonon. Isyay wan, aho nodwa bomarita. ¹⁷ Aho nogbarita nongko di sadili fangayofan, aho ha fagsyagon ta tomangdan arangko. Dapat ahog faanod odi ka ibolonon kantoheyon hangko. ¹⁸ Kana arangko tanggapon, ham gayfan? Angko tanggapon kiti lamang, ahog faadal ka Fiya fag Barita, idwa ha fagtanggapon tangdanan, nyawa fiya di aho nogsagad madi ngap ka fiya hangko. ¹⁹ Aho bohonwasta nasali sogowan, dapat aho natikis wagfabali angko ista sogowan has fagayo, kaarakitay aywan man angko tabanon hasamtiwala. ²⁰ Aho no gofodan has manga Hodyo, hogfaangay yadista ogali Hodyo, kaarakitay ho fatiwala hanya. Nyawa aho bohonwa sakop Batasan Hodyo kati, aho no gofod ka kitonya fag manga taw, hogfasakop yadi has Batasan Hodyo kaarakitay ho fatiwala hanya. ²¹ Ginya madi, aho no sawas manga bohonwa Hodyo, kadwag fasakop has Batasan Hodyo, ho bilang yadi bohonwa Hodyo, idwag fasakop has Batasan Hodyo, kaarakitay ho fatiwala yadi ka bohonwa Hodyo. Bohonwa kitay hodwa katanog in Diyos togon, aho ngap igfasakop yadin Kiristo togon. ²² Aho no gofod yadi has manga magomo, ahog faangay yadi. Hogfaangay di yadi has taw fagayo kaarakitay, nyawa kindawan, ngadi tiba, fag imbawi wan. ²³ Ho gibolon to fag manga bagay fagayo fagayo kawa has Fiya fag Barita, kaarakitay aho ha kahorayan yadi git kafiyan. ²⁴ Tam twa wa kitay ta nogsaringgonaan, sadi lamang ka ha tanggapon fasalamat, nyawa fagayo pariho igdalandan. Yakanga tam fag marigon nogdalandan kaarakitay tam ha tanggapon fasalamat. ²⁵ Fagayo kagfayayom igsaringgonaan idwag falabi it habilogan fakasayaon nyawa kana, maskin kasaya tomanggap sangbaw ka ngalay kadwat. Dapat kantam fakasayaon fag sangbaw kawadwa

kadwat. ²⁶ Yabay, ahog dalandan ha sadik hadasogan matoheyonan, aho bohonwa kitay bilang odig sontok has bagyo, idwa ha iktanon. ²⁷ Hogfarigon angko habilogan fagaba a, hodwag falabi angko fakasayaon nyawa kana kaarakitay aho nomsagaya wagtoltol has tibak taw, bohonwa aho kadwa ha tanggapon.

10 Angko manga fadwasay, ho kasaya nangos ham fag twagdog ka hyabi intam manga hafofowan nadalanan. Ta noglahaw yapdi, ka linyabo nalanbong sasta tongod fagayo, hanggan ta fagayo nadifay ka Dagat Dararag. ² Kawa kitonya, ta fagayo bilang wantogna sas linyabo hanggan dagat san Mwisis arofodan. ³ Ta fagayo wa nahwan ka sadik fanganon madolaw. ⁴ Fagayo nainom yadi sadik inomon madolaw ka nabolos gis madolaw fag bato, ka fagaba naofod is taw. Tonya fag bato madolaw kawas Kiristo. ⁵ Nyawa kitonya aywan sas taw bohonwan Diyos fagbayaon, yakanga aywan natay ta no basad yapdi fakahyabogan. ⁶ Kasta manga nadalanan fagayo igfatohod intam kitay, tam fag idwa kasaya ka manga ogali dwat, kito kasta fakasayaon hyabi. ⁷ Tam fag idwa ha fagsyagon iba karigonan, kito kan Mwisis manga kahoyog tiba hyabi. Kito kansorat, Ka manga taw natokaw kaarakitay homwan, manga ominom, ginya ta nalindog a, natayok yadi. ⁸ Tam fag idwa gogali dwat has ka taw, kito kasta naibolon tiba hyabi, yakanga sadi dik sirang 23,000 ka natay. ⁹ Tam fag idwag so lay intam Fon kito kasta naibolon tiba hyabi, yakanga manga abyanon nadaog ka manga taw. ¹⁰ Tam fag idwag sogat in Diyos kito kan Mwisis nataban manga taw tiba hyabi, yakanga kan Diyos anghil, kawas Fadosa, nafadosa was taw. ¹¹ Tonyan anod hyabi has taw. To kawa famatagak has tiba. Insorat yadi kaarakitay igfatohod intam, ka manga taw ka natahod ka katabowanan fag manga sirang kati. ¹² Yakanga, nyawa faktaw ka gayfan hanya marigon hantam Fon, fag matagahan kitay fag idwam lombay yat fangayofan. ¹³ Tam idya ha donggon mahori igsolay intam, kaglabi man ista donggon mahori tiba taw. Is Diyos idwag fabayaan intam. Hanyadwag faangay kitay ka mahori kagsolay intam iglabi intam fagsyaganon. Yatokitay, kagsolay intam nomdasog, is Diyos domisag ya halimbawan kaarakitay tam omagwanta wan. ¹⁴ Yakanga angko manga fakilalaon, fag idwag syag has iba karigonan. ¹⁵ Hogfwayong ha hayo kitonya, kawa ham ha fangayofan wan. Ham wa kagfatohoyan ngatay fiya, ngatay idwa fiya angko fwayong. ¹⁶ Idwa awkin tam no ginom gintam Fon ongot fanginoman kantam fagbayaon, tam ha kahorayan yadi in Kiristo folot? Idwa awkin tam no kwan tinapay kantam nafaarogbotan, tam ha kahorayan yadi gin Kiristo habilogan? ¹⁷ Yakanga maskin ka tinapay sadi di, tam bilang di sadik habilogan nyawa kitay tam aywan, maskin gi sadi dik bilog tinapay tam ha kahorayan ginya. ¹⁸ Fandog

ngay, tam fag tohod ka manga taga Israil ogali hyabi. Idwa awkin ka kwan ista nadisag sinogba han Diyos kasadi han Diyos, ham gayfan? ¹⁹ Kana arat kahologan kangko nafwayong? Ka manga iba karigonan ha kahologan awkin, ngatay kasta disag fanganon hanya baliwa? ²⁰ Idwa ha kahologan. Kangko fagfwayongon ka mangadyan tiwala igdisag it famiya has manga labang taw, idwa han Diyos. Hodwa kasaya kitay tam kasadi has manga labang taw. ²¹ Tam no ginom wan gintam Fon ongot fanginoman, tam idwa syagan ominom gis fanginoman labang taw. Tam no manayowan hantam Fon, tam idwa syagan manayowan yadi has manga labang taw. ²² Tam awkin kasayag fadwat iglag intam Fon, ham gayfan? Tam awkin gayfan tam marigon man hanya? ²³ Ha akwa taw kaglwang, Fiya di aho no gibolon nyawa kana. Ala, no kitay di, dapat idwa fagayo igtogbong. Ginya sadi ya ka omolit, Fiya di aho no gibolon nyawa kana. Anod, dapat bohonwa fagayo kagfarigon intam iba. ²⁴ Fag ka fiya has iba taw kantam fagisipon, fag bohonwa kantam sadili fakina-bang. ²⁵ Nyawa kana kantam nasali gis fanalian tagoban, tam fag danwa kwan. Hawa gintaw gintaw maskin intam fangayofan ha fagtagahon. ²⁶ Kawa ka Kasoratan iglwang, Kagfon intam ka gafo intam daga hanggan fagayo ka sinya. ²⁷ Intam fakilalaon sadi, kadwam tiwala no nataban intam, tam nonsaya wagdog, nyawa kanat nadisag hantam, tam fag kwan wan, tam hawa gintaw gintaw maskin tam ha fagtagahon. ²⁸ Dapat no ha nafwayong intam, To ista famiya labang taw, maskin tonya fag taw kantam fagayfanon, tam hawa kwan. ²⁹ Kangko faglwangon, bohonwa kitay tam ka ha fagtagahon, tam fag idwa kwan kaarakitay ka nafwayong idwa ha fagtagahon. Ka tiba nogtadlongan kiti, Kana mayon no iba taw angko fagisipon fagaba? Gwadi ho kasamok wan. ³⁰ Kana mayon ta nogsogat angko, aho no nafasalamat yadi han Diyos kangko nahwan? ³¹ Angko sagot kiti, Nyawantam nahwan, nyawa hanggan intam nainom, nyawa kana kantam ibolon, fag sonson wa fiya, kaarakitay in Diyos kafiyon imlag. ³² Fag bohonwa tam kasta faglagon igtaban manga taw has dwat, nyawa manga Hodyo, nyawa manga Girigo, nyawa hanggan has mangan aktom san Diyos tifonan. ³³ No kadi aho, no bali day angko fagsyaganon, hodwag fagomon omogali fagayo has fiya sasta faglagan fagayo. Fag bonwangko sadili fak-inabang kangko fagsayahon, dapat fag hanggan ka tiba taw fag ha fakinabang gingko ogali, kaarakitay tambawi yadi.

11 Ham fag tolad angko ogali no kinday aho nogtolad yadin Kiristo ogali. ² Hogbaya hayo kawa ham igtahod angko fagaba, hanggan ham katanog ka manga ogali kangko natogon ha hayo. ³ Dapat ay, angko fakasayaon ham fag twagdog kitay is Kiristo igsakop fagayo fag manga ama, bilang wasta alfoyo,

ginya ka manga ama ka bilang wat babay alfoyo, hanggan is Diyos in Kiristo alfoyo. ⁴ Ka ama no ha sambalilo, ngatay taong nogdarangin, hanggan igtoltol in Diyos hampang, bilang mahaya wa kalag, idwa magalang han Kiristo, ka bilang wat alfoyo. ⁵ Ka ina nodwa ha taong nogdarangin, ngatay nogtoltol in Diyos hampang, mahaya wa kalag, idwa magalang hat indogan ka bilang wat alfoyo, bilang sadik ina malitis it alfoyo tam nogfahalimbawa. ⁶ Ka ina no kafang wagtaong, fag dan wa falinayan wat alfoyo. Dapat kawa ka ina kaya no malitis, ngatay malinay it alfoyo, ka fiya, fag ha taong. ⁷ Idwa maangay ka ama nogtaong, kawa hanyag tolad in Diyos, hanggan igfalag in Diyos kafiyon, dapat ka inag falag ka ama kafiyon, ⁸ maskin hyabi ka ina gis ama kan-ginan, bohonwa ka ama ka gis ina. ⁹ Is Diyos idwa nahalig ama kaarakitay omofod has ina, dapat nahalig ina omofod has ama. ¹⁰ Fiya has manga anghil ka ina nogtaong, kagfalag kitay hanyag fasakop hat indogan. ¹¹ Nyawa kitonya, intam Fon kafangayofanan kitay, ka ina fag ha ofod ama, hanggan ka ama fag ha ofod ina. ¹² Nyawa bago bago ka ina gis ama, kati ina man ka ganak ama, hanggan fagayo giwan Diyos. ¹³ Ham wa kagfatohoyan ngatay fiya, ngatay dwat, ka ina nogdarangin han Diyos sas fanimbaan nyawadwa ha taong. Maangay di awkin ham gayfan? ¹⁴ Idwa awkin intam ogali yadi kagfayayom intam kitay, mahaya wa kalag ka ama no abat bok? ¹⁵ Dapat no has ina baliwa it bok no aba, ya fiya kabantay. Dandi aba no manga ina ka ha bok, kwinta wat taong maskin ha bok kayonya. ¹⁶ Dapat no ha akwa yapdi kasayag fabohag angko hanya baliwa, hodwa ha lwangon domwag no bohonwa kitay hyami ogali kitonya wan mi nogsimba, hanggan in Diyos manga Tifonan iba kitonya yadi. ¹⁷ Katingko fagfwayongon ha hayo, ahodwag fasayagdog hayo. Idwa has fiya ham nogtifonan, ha odis manga dwat. ¹⁸ Bago bago kangko donggon sa hayo, ham nogtifonan, hayo fangayofan idwa pariho. Ho katiwala wa bangan kitay anod wa tonya, ¹⁹ maskin inbali kitonya, idwa pariho hayo fangayofan kaarakitay imlag no fakta ka manga orongan imtiwala. ²⁰ Dapat ay, kangko faglwangon, ham nogtifonan, bohonwan Hisos Yafon ka hayo nahwan. ²¹ Maskin ham gona wa kwan hayo diya hanon, yakan-ga tiba kalonos, tiba kalango. ²² Ham awkin idwa ha sadili balay? Gwadi fag sinya wan no kwan manga ginom. Ham awkin igyod in Diyos Tifonan hanggan igfahaya ka manga myabog? Kana araw angko fwayongon ha hayo? Ngatay hogfasayagdog hayo, ham gayfan? Idwan. Ho fawa mamasayagdog hayo. ²³ Kito kangko donggon togon gisagfon intam, kangko nafadog ha hayo. Gis nanya fag yabi hyabi, in Hisos ofod no naoyon in Hisos kalaban, is Hisos kagfon intam nabol tinapay, ²⁴ nabaya in Diyos, nafaarogbotan, ginyag lwang, Toy angko habilogan kangko fagdisagon kaarakitay ha

hayo. Ham fag sokfon yadi aban kito fag ogali kaarakitay ham omayfan fagaba angko. ²⁵ Kitonya yadi ta nontabo wayafon, is Hisos nabol ka fanginoman, iglwang, To fag fanginoman ka bago fag taranggapan sangko folot. No kayoday ginan ham no ginom kito, ham fag sokfon to fag ogali kaarakitay ham omayfan ya angko. ²⁶ Yabay, no kandogay day kagfon intam nodyam bangkad ya, nyawa ginahin tam no kwan kito ka tinapay, hanggan ginom kito gis fanginoman, tam igfaayfan ya has taw intam Fon kahatayan. ²⁷ Yakanga nyawa faktaw ka homwan ka tinapay hanggan ominom gisagfon intam it fanginoman, kadya fiya ominom, ha kasalanan, igsway yapdi hantam Fon habilogan hanggan it folot. ²⁸ Yakanga ka fiya, tam fag maisipan yapdintam sadili, tam bago di homwan ka tinapay hanggan ominom ginya fag fanginoman. ²⁹ Maskin nyawa faktaw kadwag fahalga intam Fon habilogan, dapat kwan hanggan ginom it yafon, tonya fag taw kagfathoyan it sadili has kahoriyan gin Diyos. ³⁰ Maskin tonya wat fagfonan aywan sa hayo magomo, masagiton hanggan tiba natay wan. ³¹ Tam fag gisip yapdi fiya fiya intam sadili fangayofan, tam bago mangwan, ginya madi intam Fon idwa somolay hanggan mangabaya intam. ³² Dapat intam Fon no kabaya intam, igfasoyo odi intam ha hanya, kaarakitay tam idwam sakop has fadosaan manga taw kadwa katiwala. ³³ Angko manga fadwasay, ham no matifonan kaarakitay mangwan, ham fanayan yapdi hayo iba fagayo. ³⁴ No ha kalonos sa hayo, fag danwa nangwan yap gis balay, kaarakitay idwam bali kitay ham nogtifonan matohoyanan kitay is Diyos mangabaya hayo. No kadi has manga iba bagay, ho fafiyan wa tonya ho nomdasog is nyamo aban.

12 Manga fadwasay, kati kangko fagfwayongon ha hayo kawa has Maliyaw fag Falad manga disagon, kaarakitay ham tomwa wagdog. ² Hyabi hyabi ham nodyapdin tiwala in Diyos, ham fadi wadtwa kitay, nyawa kana fag karigonan, manga boyon odi, ka hayo manga fagsyagon. ³ Yakanga hogfathoyan hayo kitay nyawa faktaw non Diyos Falad kagfadonong hanya, idwa somyagan igsabayon in Hisos, nyawa ginahin. Hanggan idwa yadi ha somyagan iglwang, nyawa faktaw kitay, Is Hisos kagfon angko, no bohonwa ka Maliyaw fag Falad it fagtahinan sat fangayofan. ⁴ Bokod bokod it manga disag, dapat sadi di ka Maliyaw fag Falad kagdisag tonya. ⁵ Bokod bokod ista halimbawan ta no gibolon intam Fon ibolon, dapat ay, kagfon intam sadi di kagfasognod fagayo. ⁶ Bokod bokod kasta bato ibolonon, dapat sadi di is Diyos, sayadis fagayo fag manga taw ka gibolon it ibolon. ⁷ In Diyos disag ha sadi ha sadi kagfathoyan kitay ka Maliyaw fag Falad sawas taw, kaarakitay farigon has fagayo. ⁸ Ka Maliyaw fag Falad disag ha sadi ha fagsyaganon igtoltol in Diyos manga togon, ginya yadi

fag Falad ka sadi ha fagsyaganon igfatwagdog fiya fiya in Diyos manga togon. ⁹ Tonya yadi fag sadi dik Falad kagdisag has iba kitay, marigon man has fagayo nogsyag han Diyos. Ka tiba taw ha kadonongan igfafiya ka manga ha sagit. ¹⁰ Ha sadi yak fagsyaganon, igfatimawa, bohonwag falipatan. Ha yadis tibat disag kitay, kabali in Diyos fangampang. Kandisag has tiba taw, ta homilala ka manga falad, ngatay gin Diyos, ngatay idwan. Tiba natwa wa kampang manga fangampangan madolaw. Ginya tiba twag fatwagdog tonya fag sanglitan kaarakitay manga taw tomwa wagdog. ¹¹ Dapat sadi dik Falad ka gibolon tonya fagayo no kinday kat fakasayaon, igfahafod has taw bokod bokod it manga disag. ¹² No kinday ka habilogan no sadi di, dapat aywan fag manga layonan, hanggan nyawa aywan fag layonan, ka habilogan sadi di, kitonya yadis Kiristo. ¹³ Tam fagayo, nyawa Hodyo, nyawa Girigo, nyawasta nasali sogowan, nyawa bohonwan, tam fagayo intogna sa sadi dik Falad, kaarakitay imbali tonya fag sadi dik habilogan. Sadi dik Falad kan Diyos bilang wa nafainom hantam fagayo. ¹⁴ Aywan fag manga layonan, bohondi sadi, ka sadi wak dahonya habilogan taw. ¹⁵ Halimbawa ka bitis nogfayodon odi hanya, iglwang, Aho bohonwa gamat, yakanga ahodwan sakop sas habilogan sadi wak dahonya, kaglwang kitonya, bohonwa awkin sadik layonan sas habilogan sadi wak dahonya, ham gayfan? ¹⁶ Halimbawa yadi, ka talinga bohonwa awkin sadik layonan sas habilogan, kawag lwang, Aho bohonwa mata, yakanga aho bohonwa sadik layonan sas habilogan sadi wak dahonya? ¹⁷ Ka habilogan no fagayo wa mata, kinday ara no tomwa domog, ham gayfan? Ka habilogan no fagayo wa talinga, kinday araw no tomwa omayok? ¹⁸ Dapat is Diyos ka nafwalid ka manga layonan santam manga habilogan sadi wak dahonya, no siday hanya naayfan fiya. ¹⁹ No sadi yapdik layonan, idya kalwang kitay habilogan wa tonya. ²⁰ Dapat ka orongan, aywan fag layonan, dapat ka habilogan sadi wak dahonya, sadi di. ²¹ Yakanga ka mata idwa tomwag lwang has gamat, Hodwa kasaya hyamo, nyawa alfoyo has bitis, idwa yadi tomwag lwang, Hodwa kasaya hyamo. ²² Yatokitay, ka manga layonan santam manga habilogan ka bonwa bangan intam fagtagondaon, tonya wa ngap ka mahalga man. ²³ Ka manga layonan santam habilogan sadi wak dahonya, tam kayag falag, ya mangharaw, labi man tam no gano a, ka manga layonan santam habilogan sadi wak dahonya, kadwa fiya kabantay, dapat labi wa ngap tam igfabali fiya. ²⁴ No kawa danwa fiya kabantay, nyawa tam idwag fafiya domwag. Is Diyos no nahalig intam habilogan, dan wa fiya, hanggan tikis wa nadisag dahol man fag kangayanan has manga layonan habilogan tiba, ka sas taw idwa bangan fagtagondaon, ²⁵ kaarakitay idwa ha akwa fakaingliyon. Yatokitay, fa-

gayo igtarogbongan odi. ²⁶ Ka sadik layonan habilogan no ha masagit, fagayo fag layonan karongkot yadi. Kitonya yadi ka sadik layonan no nadog fiya, fagayo kasolong wan. ²⁷ Tam fagayo in Kiristo wa habilogan sadi wak dahonya, hanggan igsadig sadi in Kiristo wa manga layonan sat habilogan. ²⁸ Kan Diyos nafwalid gona sat Tifonan ka manga Fandiya-Barita. It fadowa kat manga Fangampang. Kat fatolo kawa mangag faadal. Ginyas Diyos nafwalid yadi sat Tifonan, ka manga twa gibolon ka manga madolaw, ka manga madonong igfafiya ka manga ha sagit, ka mahogod wagtogbong, ka manga madonong igbahala has Tifonan, ka madonong yadi kampung sas manga sanglitan madolaw. ²⁹ Fagayo awkin manga Fandiya-Barita, manga Fangampang, mangag faadal? Fagayo awkin twag falag manga madolaw? ³⁰ Fagayo awkin madonong igfafiya ka manga ha sagit? Fagayo awkin twa kampung manga sanglitan madolaw, ngatay igfatwagdog tonya fag manga sanglitan, ham gayfan? ³¹ Dapat tam fag gwayan wa kasaya ka manga disag has fangayofan ka fiya man ka tiba. Kati ho fomwayong ha hayo ka halimbawan ka maangay man has fagayo fagayo.

13 Nyawa halimbawa, aho madonong wa kampung manga fangampangan taw hanggan manga fangampangan anghil, dapat ay, aho nodwa galwasi has manga taw, aho bilang odi agong ganingalan, ngatay dowak agong ta nogfalidlintogan, maisngil wan. ² Nyawa aho in Diyos wa fangampang, hanggan natwa wagdog ka fagayo kan Diyos idya nafadog has taw, hanggan madonong has fagayo, nyawa ho syagan igfaalin manga moyod, halimbawa, kawa marigon nogsyag han Diyos, dapat aho nodwa galwasi manga taw, ahodwa ha kahologan. ³ Nyawa ho domisag angko botang fagayo has taw, nyawa nangos hanggan ta no somogba angko habilogan, hogfaangay wan, dapat aho nodyadi wa galwasi is taw, idwa ha fakinabang sangko. ⁴ Ka orongan galwasi in Diyos hanggan has manga taw, maagwantaon, mahoway, idwa maingliyon, ⁵ idwa ha takan, idwag fasalagwa, idwa masongat, idwag sadili it fangayofan, idwa kaplagdog, idwag botang ista manga naibolon dwat ha hanya. ⁶ Ka orongan galwasi idwa kasayag dog ista manga naibolon kadwa fiya, dapat kasaya wa dahol igdog ka fakaorongan. ⁷ Ka galwasi idwag fagomon, kasyag has fiya hanggan ha fagfanayaon yadi fiya, idwa kayaya gagwanta, nyawa kana. ⁸ Aban fawa ha akwa kan Diyos manga fangampang, idwa ha taw homampang manga sanglitan madolaw, ka katonongan imtabo wa balinya, dapat kawa galwasi idwa ha katabowanan. ⁹ Intam fakatwawon idya hosto, korang yapdi tam nogtoltol in Diyos hampang, ¹⁰ dapat ay, ka hosto nomdasog, kadya hosto imliyam wan. ¹¹ Hyabi, aho no anak yapdi, angko hampang idwa kito ka kati, angko fangayofan hanggan katadlongan kito

odis manga anak. Kati aho dahol yadi wa taw a, ho nadoyo ka ogali manga anak. ¹² Balis kati tam idyag lag fiya fiya, bilang odi basad anino salamin, dapat ka gis nanya fag sirang nomdasog aban, tam manladlagan masayangowan. Kati hodwa bangan madonong, dapat nomdasog gis nanya fag sirang aban, ho tomwa wa fiya fiya, kito yadis Diyos no kilala angko fiya fiya kati. ¹³ Istay yapdi to fagayo tolok bagay fiya, katiwala, hanggan igsyag, hanggan galwasi, dapat ay, ka galwasi ka orongan matohoyanan fiya man sinyas tolok bagay.

14 Yakanga ka mahalga man has fagayo, tam fag gadgalwasiyan. Dapat tam fag kasaya yadi manga disag has fangayofan, labi wan ka fakatwawon igtoltol in Diyos hampang. ² Ka kampung sas sanglitan madolaw, hawan Diyos no kampung, idwa has taw, maskin idwa ha taw natwa wagdog, nyawan Diyos Falad igtogbong hanya igtoltol manga madolaw fag manga bagay kadya nafadog has taw. ³ Dapat ay, kagtoltol in Diyos hampang, igtoltol has manga taw kaarakitay imlangba hanggan imrigan ista manga fangayofan, tamlibang yadi no ha fakahoriyon. ⁴ Ka kampung sas sanglitan madolaw, it sadili fangayofan bago kat fagfarigonon. Dapat ay, kagtoltol in Diyos hampang, in Diyos Tifonan sadi wak dahonya it fagfarigonon. ⁵ Angko fakasayaon nangos, ham fag fagayo wa tomwa kampung sas sanglitan madolaw, no kitay di, dapat kangko fakasayaon bohondi kitonya, ham fag madonong igtoltol in Diyos hampang. Nogtoltol in Diyos hampang, fiya man has kampung sas sanglitan madolaw, no bohonwa kitay hagfatwagdog has taw it nafwayong, kaarakitay igfarigon in Diyos tifonan. ⁶ Yakanga angko manga fadwasay, aho nombangkad has nyamo hayo, aho no kampung sas manga sanglitan madolaw, ham idwa ha kinabang gingko, aho nodwag fwayong ha hayo in Diyos manga nafatohoyan angko, ngatay manga katonongan gin Diyos, ngatay igtoltol in Diyos hampang, ngatay igfaadal hayo. ⁷ Kitonya yadi kasta manga famaoni kadwa ha fangayofan, kitos manga palawta, manga gitara, kind a ta no tomwa wagdog it hasnog nodwa ha fakaatowan, ham gayfan? ⁸ Kinday yadi ka manga sondalo nogfatalaga has labanan nodwa ha fakaatowan ta nogfaoni bodyong? ⁹ Kitonya yadi, kinday araw ta no tomwa wagdog it kahologan tam no homampang sas madolaw fag sanglitan, ka bohonwasta fakatwawon igdog, ham gayfan? Tam bilang odi kampung has bagyo. ¹⁰ Aywan fag manga fangampangan bokod bokod istay sas baba daga, ha kahologan fagayo fagayo. ¹¹ Dapat aho nodwa twagdog no ha kampung it sanglitan, mi bilang dowak famaklay, idwa twa kampung. ¹² Yakanga kawa ham kasaya wa dahol ka Maliyaw fag Falad manga disag, no baliday hayo fagsyaganon, fag mahogod has manga disag kagfarigon in Diyos Tifonan. ¹³ Kawa

kitonya, ka kampang sas madolaw fag sanglitan, fag darangin yadi kitay hanya tomanggap kadonongan igfatwagdog tonya. ¹⁴ Aho nogdarangin sas sanglitan madolaw, angko falad kagdarangin, dapat angko isip idwa hanya baliwa. ¹⁵ Kana nangos ka fiya, ham gayfan? Aho nogdarangin bohondingko falad ka mandarangin, ho omisip yadi angko bato daranginon. Aho no gambahan, angko falad ka mamasayagdog han Diyos, dapat aho omisip yadit kahologan angko bato ambahanon. ¹⁶ Tam nogbaya han Diyos gintam falad lamang, kinday tiba taw no tomwa waglwang, Anod, fag kitonya wa ngay, ka manga taw nodwa natwa wagdog intam manga hampang? ¹⁷ Matohoyanan kafiyaon tam nogbaya han Diyos, dapat idwag farigon ista fangayofan bago, iba taw, ta nodwa natwagdog. ¹⁸ Hoggabaya han Diyos kitay aho bohondi kito hayo fagayo no madonong kampang manga sanglitan madolaw. ¹⁹ Dapat, in Diyos Tifonan no matifonan, aho no kampang nga odi manga limak hampang kasta fakatwawon igdog, igfarigon yadi has tiba, tonya fiya man kadog sangko, has manga hampang ayo ayo, ta nodwa natwa wagdog. ²⁰ Angko manga fadwasay, intam isip fag bondi kitos manga anak. Tam no gisip, fag kito yadi was dahol taw. Dapat no hadis dwat baliwa, tam fag kito odis manga anak ogbot yapdi. ²¹ Ka Kasoratan iglwang, Kagfon intam iglwang, Sas manga sanglitan madolaw Hanggan manga famaklay bibig, Aho no homampang hastay fag manga taw, Dapat nyawa kitonya, tadwa tomalinga angko. ²² No kitonya, ka disag fakatwawon kampang sas manga sanglitan madolaw, sadik falagon has manga idyam tiwala, idwa has manga danwan tiwala, dapat ka fakatwawon igtoltol in Diyos hampang idwa has mangadyam tiwala hadis mangam tiwala it fakinabang. ²³ In Diyos Tifonan no matifonan, tam fagayo no kampang sas manga sanglitan madolaw, ginya no handasog manga taw idwa ha natanggap fakatwawon kitonya, ngatay idyan tiwala, ta lomwang, tam ngandayo kapaong di. ²⁴ Dapat ay, fagayo nogtoltol in Diyos hampang, ginya madi ha taw indasog sinya, idyan tiwala, ngatay idya ha natanggap fakatwawon kitonya, hanya tomwa wagdog kitay hanya ha ogali dwat, faisip hanya fiya fiya, ²⁵ tomwa yadi ka manga mafyaloman yapdi sat basad fangayofan. Yakanga hanya manlibabaan mamasayagdog in Diyos, dagos wa lomwang, Is Diyos matohoyanan sawa hayo fagbokngan. ²⁶ Angko manga fadwasay, kana ham gayfan kangko nafwayong tonya fagayo it kahologan? Tam nogtifonan ha akwa mangambahan, ha akwa yadi mamaadal, ha akwa manoltol in Diyos kafangayofanan, ha akwa yadi mangampang sas sanglitan madolaw, ngatay mamatwagdog it nafwayong. Fagayo fag manga bagay fag im-anod kaarakitay imrigan in Diyos Tifonan. ²⁷ No ha mangampang sas sanglitan madolaw, fiya wan, ngadi dowa

ngatay tolo, golbosan. Fag ha akwa yadi kagfatwagdog has manga taw ista nafwayong. ²⁸ Dapat nodwa hagfatwagdog, ka twa kampang sas sanglitan madolaw fag mainokan odi, fag maisipan odit sadili, hanggan igdarangin han Diyos. ²⁹ Fag manga dowa ngatay tolok taw ka manoltol ka natanggap fagsyaganon igtoltol in Diyos hampang. Ka tiba fag gisip fiya fiya kat manga natoltol. ³⁰ Is Diyos no nafatwagdog sadik bagay ha sadik taw ka matokawan yapdi sinya, ka kampang gona fag tohas yap. ³¹ Gwadi tam fagayo, fiya di tam no manoltol igsadig sadi in Diyos hampang, kaarakitay fagayo imdonong, imrigan yadi intam manga fangayofan. ³² Ka manga natanggap kito kat fagsyaganon, fag gagwanta igfanaya ka sadi nodyan tabo, ³³ maskin is Diyos idwag faagran intam, dapat igfaad-angayan wantam. Ka fiya san Diyos manga Tifonan, tam no matifonan yapdi, ³⁴ ka manga ina fag idyapdi gawang. Maskin idyapdig faangay has manga ina no kampang, tam nogtifonan yapdi. Kito ka fiya, ta fag matalingan yap kito kan Diyos togon fwayong. ³⁵ Ka manga ina no kasaya tomwa araw, fag gintaw it indogan, fag sayas balay. Maskin mahaya wa kadog ka ina no kampang in Diyos Tifonan no matifonan. ³⁶ Ngatay ham gayfan giwa hayo in Diyos hampang non-ginan? Ngatay ham lamang ka ha natanggap kitonya? ³⁷ Nyawa faktaw no gayfan is Diyos nafatwagdog hanya sadik bagay, ngatay hanya ha natanggap fagsyaganon, hanya fag tomwa wagdog kitay, kawantam Fon togon kangko fagsoraton ha hayo. ³⁸ Nyawa faktaw kadwa kasayag talinga angko togon, ham fag idwa yadig talinga hanya. ³⁹ Yakanga angko manga fadwasay, tam fag kasayag toltol in Diyos hampang, dapat fag idwa yadig bando ta no kampang sas sanglitan madolaw. ⁴⁰ Fag ka lamang fiya hanggan maangay intam ogaliyon has fagayo.

15 Angko manga fadwasay, yabay kati hogfatohod ya hayo kangko fagtoltolon ha hayo Fiya fag Barita, ka hayo natanggap kanbali hayo fag ganitan has katiwala baliwa. ² Is Diyos kagbawi hayo gi wangko nafadog hampang ha hayo, ham nodwag fasigpala ka hayo donggon, no bohonwa kitay idwa ha kahologan ham nontiwala. ³ Maskin kangko donggon ka mahalga man has fagayo, kangko nafwayong ha hayo, kawas Kiristo natay kawantam manga ogali dwat, kito kansorat sas Kasoratan. ⁴ Ginyan lobgob wan, hanggan inboyag ya sas fatolo fag sirang, kito kansorat, ⁵ hanggan nafalag han Pidro, ginya has Safolo ha Dowak ama. ⁶ Ginya madi hanya nafalag it sadili ha mandis manga fadwasay iglabi 500 ka matifonan sinya. Nyawa kitay tonya tiba natay wan, ka fakaaywanan boyagan yapdi hanggan wa kati. ⁷ Ginya nafalag yadit sadili han Santyago, ginya bago di has fagayo fag manga Fandiya-Barita, ta no matifonan. ⁸ Ginya madi, no dogay, is Hisos nafalag yadi hangko,

nyawa aho bilang wa anak kansagaya bohonwa sat kasagayan, bilang odin loskos. ⁹ Ahodwa kitos iba Fandiya-Barita ik fiya. Idwa maangay ta nogngayan angko sadik Fandiya-Barita, maskin hyabi aho nafahoriyan in Diyos Tifonan. ¹⁰ Dapat kawan Diyos malooy fag kahowayan sawangko, ahonbali kito ka kati. It dis-ag malooy fag kahowayan hangko idwa yadin bali idwa ha kahologan. Aho bohondi kito ka tibak Fandiya-Barita no kogodan igbarita. To kawan Diyos malooy fag kahowayan sawangko, bohonwangko sadili fagsyaganon. ¹¹ Yakanga nyawa aho, nyawa ka tiba kagbarita, kitonya yadi ka hyami fagfaadalon, tonya yadi ka hayo fakatiwalaon. ¹² Yabay, hami nogfaadal kitay is Kiristo inboyag ya, kana mayon tiba sa hayo noglwang ka manga natay idwam boyag ya aban? ¹³ Halimbawa ka natay no orongan wadwa abam boyag ya, is Kiristo idwa yadin boyag ya. ¹⁴ Is Kiristo nodwan boyag ya, hyami fagfaadalon has taw idwa ha kahologan, idwa yadi ha kahologan ham nomtiwala. ¹⁵ No kitonya, hami in Diyos odi manga saksi bohagon, maskin migfaorongan kitay is Diyos nafaboyag ya in Kiristo, kadwa orongan, ka manga natay nangos nodwam boyag ya domwag. ¹⁶ Ka manga natay nodwam boyag ya, is Kiristo fawan boyag ya domwag. ¹⁷ Is Kiristo nodyan boyag ya, idwa ha kahologan tam no katiwala, hanggan tam idyan bawi gintam manga ogali dwat. ¹⁸ Yabay, is Kiristo nodwan boyag ya, fagayo ka natay gona, kansadi han Kiristo, hawas kadwatan. ¹⁹ Intam fagsyagon no ka odistay lamang fag baba daga fag haboyagan, isyay wan, tam ista fakaawaon, bohondi kito ka tiba. ²⁰ Dapat ay, ka orongan wan, is Kiristo inboyag ya, ka bilang bohad gona gis manga natay, kagfatohoyan kitay ha akwa yadi aban. ²¹ Maskin no kinday gi sadik taw ha kahatayan, kitonya yadi gi sadik taw ha haboyagan sas dayo kahatayan. ²² Maskin no kinday fagayo fag manga taw matay, kawa fagayo insadi san Adan hasokfonan, kitonya yadi, fagayo imboyag ya nonsadi san Kiristo. ²³ Dapat ay, fagayo imboyag ya no ginahin fag masohod is Diyos nogfatohoyan. Bago bago is Kiristo ka gona man has fagayo, ginya madi ka dan wansadi san Kiristo, imboyag ya gis nanya fag masohod is Kiristo nombangkad ya. ²⁴ Ginya madi, ka katobowanan nomdasog, is Kiristo nomtabo wagdaog fagayo fagayo kagsakop manga taw, hanggan kagbahala hanggan ka karigonan fagayo istay is baba daga, hanya fasakop fagayo fagayo han Diyos, intam Ama, kambali hari has fagayo fagayo. ²⁵ Maskin fag is Kiristo yapdi kaghari, is Diyos nodyapdi nadaog it manga kalaban hanggan nodya nafasakop fiya fiya fagayo fagayo han Kiristo. ²⁶ Ka kahatayan ka goyan goyan fag kalaban kamdaog hanggan imliyam wan, ²⁷ kito kansorat sas Kasoratan, Is Diyos igfasakop fagayo fagayo fag manga bagay ha hanya. Dapat ay, noglwang kitay fagayo fagayo fag

manga bagay, kadog wa kitay is Diyos idyapdin sakop sinya kawa hanya kagfasakop fagayo fag manga bagay han Kiristo karigonan. ²⁸ Ginya madi fagayo no nafasakop wa han Kiristo, hanya, in Diyos wa Anak, ka fasakop han Diyos karigonan, ka nafasakop fagayo fag manga bagay han Kiristo, kaarakitay is Diyos wa kagfon wa fiya fiya fagayo fagayo. ²⁹ Ka manga natay nodwam boyag ya, kanat kahologan ta nogfatogna kawa has manga natay? No orongan wan ka manga natay nodwam boyag ya, kana mayon nogfatogna yapdi kawa hanya, ham gayfan? ³⁰ Hanggan aho yadi, kana aho noglaban yapdi ka madala sirang sirang? ³¹ Angko manga fadwasay, sirang sirang hodwa twa ngatay ho matay wa araw. Hoglwang kitonya kawa hogfasayagdog hayo, kawa tam insadi san Kiristo Hisos, kagfon intam. ³² Kanat fakinabang hangko, ham gayfan, aho no taw lamang kadwam boyag ya, aho nonsayango has manga maisog fag kalaban istay sas banwa Ifiso? Ka manga natay nodwam boyag ya, fiya man aho nogfaangay ista fwayong kitay, Tam fag kasolong yap kwan, manga ginom odi, No marom tam ngan wa matay. ³³ Tam fag idwa gadayaan, Intam manga ofod no dwat, intam manga ogali imbali yadi dwat. ³⁴ Tam fag ha fangayofan wan. Fag domayo ka ogali dwat. Tiba sa hayo igfalamang yapdi, idya kilala no kinday is Diyos orongan. Hoglwang kitonya kaarakitay igfahaya hayo tiba. ³⁵ Ngatay ha gintaw kitay, Kinday ka manga natay nomboyag ya domwag? Kindat habilogan gis nanya? ³⁶ Paong paong ka gintaw kitonya. Kantam natanom binhi nodyan boyok, idwa ha tomobo bago. ³⁷ Binhi yapdi kantam natanom, ngatay bolhog tirigo, ngatay tiba fag binhi, bohonya kitay dahol it fon. ³⁸ Is Diyos kagdisag habilogan hanya fag binhi no kinday kat nafatalaga, has manga binhi it habilogan bokod bokod no kinday nomlangba. ³⁹ Kanhalig hayopan boyagan idwa myasa kitonyat anit. Ka taw bokod it anit, bokod yadi ka anit hayopan. Bokod ka manok, ha olad, bokod ka oyang it anit. ⁴⁰ Ha akwa yadi manga habilogan ka sas banwa sam tongod, ha akwa yadi manga habilogan istay sas baba daga. Ka habilogan sas baba daga bokod it kafiyan has kafiyan manga habilogan sam tongod. ⁴¹ Ka yawa myanit bokod, bokod yadi ka yawa magdanon. Ka yawa fanggasan bokod, kawa sadik fanggasan idwa kito ka sadik fanggasan it kafiyan. ⁴² Kitonya yadi ka manga taw nomboyag ya domwag. Ka habilogan kanlobgob kaboyok wan, dapat ka habilogan kamboyag ya ginya, idwam boyok nyawa ginahin. ⁴³ Nonlobgob wan, idwa fiya kalag, fawa homimot, dapat nomboyag ya, fiya kabantay a, marigon mandi. ⁴⁴ Ka habilogan kanlobgob ka sas baba daga fag habilogan, kamboyag ya ka man has banwa sam tongod fag habilogan. No kinday ha akwa habilogan istay sas baba daga, kitonya yadi ha habilogan mandi sam tongod. ⁴⁵ Kito kansorat sas Kasoratan, Is

Adan ka gona fag taw inhalig boyagan istay is baba daga, dapat ay, ka goyan fag Adan inbali Falad kag-faboyag manga taw. ⁴⁶ Dapat bohonwa ka sam tongod ka nagona, ka yapdi ka sas baba daga bago bago, bago di aban ka sam tongod. ⁴⁷ Ka Adan gona gistay is baba daga maskin nahalig gis lotok daga. Kat fadowa fag Adan kawa gim tongod. ⁴⁸ Ka sas baba daga fag manga taw igtolad kanhalig gis lotok daga. Ka manga taga man di gim tongod fag manga taw igtolad ka taw gim tongod. ⁴⁹ No kinday tam nogtolad kanhalig gis lotok daga istay, kitonya yadi aban, tam tomolad yadi aban ka gim tongod. ⁵⁰ Manga fadwasay, angko bato lwanon kito, intam manga habilogan, ka ha folot hanggan faknol, idwa tomahin han Diyos sakop banwanan. Bohonwa ka habilogan kamboyok ka omafo ka habilogan kadwam boyok. ⁵¹ Fandog ngay, ho fomwayong hayo sadik bagay madolaw, ka ham idya nadog. Tam idwa fagayo matay, dapat tam fagayo imbago wan, ⁵² somohod wa ka hasnog bodyong goyan goyan. Madali wa dahol dahol, idwam foga mata, ka bodyong homasnog, ka natay gona imbangon ya, fawa matay domwag yabay. Intam habilogan fagayo imbago wan. ⁵³ Maskin to fag habilogan ka kaboyok di, fag tomobos wa kadwa kaboyok hanggan ka katay fag tomobos yadi kadwa katay. ⁵⁴ Ka kaboyok nonbalyo wan kadwa kaboyok, hanggan ka katay inbalyo wan kadwa katay, gis nanyam anod kansorat sas Kasoratan kitay, Inlag wa kitay ka kahatayan indaog wa fiya fiya. ⁵⁵ Haw, kahatayan, siday haw nogdaog kati? Siday, kahatayan, im dalit kati? ⁵⁶ Ka dalit kahatayan kawa manga ogali dwat, hanggan ka karigonan ogali dwat gis Batasan Hodyo. ⁵⁷ Dapat ay, tam igbaya han Diyos kagdisag intam it haboyagan, gin Kiristo Hisos, kagfon intam, kaarakitay tam domaog ka kahatayan. ⁵⁸ Yakanga angko manga fadwasay, kawa kitonya, tam fag marigon, fag idwa gadowan, fag mahogod yadi no gibolon intam Fon ibolon, kawa tam twa kitay tam idwag faanogon intam nakayayan.

16 Yabay, kawa has manga togbong hantam manga fadwasay sas sakop Hodiya. Ham fag kitonya yadi ngap kangko nafwayong has manga Tifonan sas sakop Galasya. ² Sas sirang gona sa sadik simba, ham fagayo, igsadig sami, fag fabokod fagaba hayo bato disagon, no dahoday hayo bolay kwarta gis nanya fag masohod. Fag matifonan wa tonya, kaarakitay aho nomdasog is nyamo hayo, tam fawa ha fagtoltolon hanya baliwa. ³ Aho nomdasog is nyamo hayo, ho domisag sorat ha hayo manga nafili fag manga taw ka domiya has Hirosalim hayo disag. ⁴ No fiya kitay, aho fag hanya yadi has Hirosalim, ho tomaban hayo manga nafili fag manga taw. ⁵ Ho domagos has nyamo hayo, aho no giwas sakop Masidonya, kawa ho kasaya

yapdi domalan sinya. ⁶ Ho domogay yapdi ogbot is nyamo hayo, balis faginan ka fangaraw, kaarakitay ham farigon angko fangayofan, aho nomlahaw ya domwag, no hada angko bato hadasogan. ⁷ Angko fangayofan, aho fag domogay yapdi ogbot is nyamo hayo aban. Hodwa kasayag dalan lamang is nyamo, kagfon intam nogfaangay. ⁸ Dapat angko fangayofan ho domogay yapdistay sas banwa Ifiso balis sirang Pintikostis, ⁹ kawa aywan kagtalinga fagabastay, nyawa aywan yadi kagfadwat igdog. ¹⁰ Is Timotiyo nombangkad is nyamo hayo, ham fag maofod hanya fiya fiya, kaarakitay it fangayofan idwa kabalaw. Is Timotiyo intam Fon fangibolon yadi kitongko. ¹¹ Ham fag idwag yod hanya. Ham ngap togbongan hanya kaarakitay masolong wat fangayofan no mwali hastay, maskin hami, aho hanggan intam manga fadwasay, mafanayan yadi hanya. ¹² Nontam man fadwasay, is Apolos, ho nafaaronganon kitay hanya fag gofodan yadi intam manga fadwasay kati manabang has nyamo hayo, dapat, is Apolos idyam bangkad is nyamo kati. Hanya aban manabang, nodwa ha fakalibangon. ¹³ Tam fag matagahan, tam fag idwa gadowan nogsyag in Diyos. Fag maisog intam fangayofan, fag maganit han Diyos. ¹⁴ Nyawa kana kantam ibolonon, fag gibolon fagayo maskin tam galwasi in Diyos hanggan has manga taw. ¹⁵ Angko manga fadwasay, ham twa kitay in Istifanas talanahan ka bago bago intiwala sas sakop Ikaya. Talanahan nafatohoyan it sadili kitay hanya ka tomogbong fagaba ka manga taw kantohoyan han Diyos. ¹⁶ Hogfaaronganon ha hayo, manga fadwasay, ham fag fasakop yapdi ka kito yadinda Istifanas, hanggan it manga ofod kadwag fagomon gogali fiya. ¹⁷ Hogbaya waglag inda Istifanas, da Fortonato da Akaiko nondasog hastay, nyawa ham idwa nasyagan igsabang angko. ¹⁸ Tonya fag tolok ama ka nafarigon yangko fangayofan no kinday ta nogfarigon yadi hayo. Ham fag baya wan ka kitonya fag manga taw. ¹⁹ In Diyos manga Tifonan sas sakop Asya gwas hayo. Da Akila da Pisisila hanggan intam manga fadwasay, kagtifonan sat balay, gwas yadi hayo santam Fon ngayan. ²⁰ Intam manga fadwasay fagayo fagayo istay gwas yadi hayo. Tam nogladlagan, tam fag badbayaan yadi, kawa tam manga dowasay san Kiristo. ²¹ Ahos Pablo, angko sadili gamat kagsorat ha hayo, kinday ham sinya? ²² Kadwa galwasi intam Fon, fag is Diyos ka mamatohoyan has kadwatan. Marana Ta. It kahologan santam sanglitan, bilang igdarangin, Haw kagfon hyami, fag kabangkad wa ngay. ²³ Ham nangos fag domog kitay is Hisos, kagfon intam, mahoway ha hayo fagaba. ²⁴ Ho galwasi hayo fagayo fagayo san Kiristo Hisos ngayan.

2 KORINTO

1 Mi da Timotiyo, intam fadwasay, kagsorat ha hayo, in Diyos Tifonan sas banwa Korinto, kalafit yadi has fagayo kantohoyan han Diyos sas sakop Akaya. Ahos Pablo in Kiristo Hisos Fandiya-Barita kawan Diyos wa kafangayofanan fag kitonya. 2 Ham nangos fag domog kitay is Diyos, intam Ama, hanggan is Kiristo Hisos, intam Fon, mahoway ha hayo fagaba, hanggan igfalokmay yadi hayo manga fangayofan. 3 Tam fag fasayagdog in Diyos, in Kiristo Hisos intam Fon it Ama, kantam yadi Ama maawaon, kawas Diyos ka fagabag farigon intam manga fangayofan. 4 Tam no ha lagan manga mahori, hanyag farigon intam manga fangayofan, kaarakitay tam man ka syagan igfarigon iba taw, ta no ha mahori, gi wantam nadalanan is Diyos no nafarigon intam. 5 No kinday mi fagabag dog mahori, kawa minsadi san Kiristo, kitonya yadi, is Kiristo fagabag farigon hyami. 6 Mi no galabawan, mi galabawan ongay kaarakitay ham imrigan gis basad mahori, hanggan imbawi yadi. Hami nomrigan ya, nalafit yadi ha hayo, ham imrigan yadi wan, is Diyos nogfarigon hayo, kaarakitay ham omagwanta hayo manga donggon fakahoriyon, kito yadi hyami. 7 Maskin ngay migsyag marigon ha hayo, maskin mi twa yadi kitay, ham no ha horay sas mahori, kito yadi hyami, is Diyos mamarigon hayo, kito yadis Diyos nogfarigon hyami. 8 Angko manga fadwasay, migfadog ha hayo hyami nadalanan mahori sas sakop Asya. Yabay, hyami nadalanan sinya orongan wa mahori wa dahol dahol. Mi gayfan mi fawam tolas. 9 Mi gayfan wa kitay gis nanya mintohoyan has kahatayan. Inbali kitonya kaarakitay midwag syag hyami sadili karigonan, dapat migsyag han Diyos kagfaboyag ya gis kahatayan ka manga natay. 10 No kadog di gis nanya, is Diyos nabawi hyami gis kahatayan, hanggan kati igfadagos yapdig bawi hyami. Hanya wa hyami fagsyagon fagaba ka bomawi yapdi hyami aban, 11 kawa ham igtogbong yadi hyami, ham nogdarangin. Ginya madi aywan ka bomaya han Diyos kawat malooy fag kahowayan ha hyami. 12 Miglwang kitonya kawa hyami fagbayaon sa hyami sadili fangayofan, mi twa kitay fiya hyami naogali has fagayo fag manga taw, hanggan labi wa ha hayo, idwa yadi ha fagfyalomon maskin hyami ogali giwan Diyos, gin Diyos malooy fag kahowayan, idwa gis katonongan taw. 13 To fag manga hampang ka hayo fagbasaon kati, ham twa wagdog,

hanggan idwa ha kahologan matagowan. Balis kati ham natwa wagdog bangan hyami ogali, dapat angko fakasayaon kitay, 14 aban, ka Sirang ka mahalga han Hisos, kagfon intam, nomdasog, ham homilala fiya fiya hyami, ginya madi tam pariho igbadbayaan ha sadi ha sadi sasta fagdogan. 15 Kawa hogsyag kitonya, ho naayfan ho has nyamo yapdi hayo kaarakitay ham bomaya waglag hyami dowag ginan. 16 Ho naayfan ho domalan yap has nyamo, ho bago has sakop Masidonya, ginya ho domalan ya domwag no goli, ginya ham nangos tomogbong yadingko ho no kalahaw has Hodiya. 17 Kati aho nodwa nafatonglos kitonya, ham awkin lomwang ahog faoman fagaba angko fwayong? Angko fangayofan awkin goman goman, kito kastay is baba daga fag manga taw ka katig lwang, ala, dapat ay, araw araw, lomwang idwan? 18 No kinday is Diyos idwag balibad, hyami hampang ha hayo idwa yadig balibad. Mi noglwang kati ala, midwa ara lomwang idwan. 19 Ka hyami da Silbano da Timotiyo fagbaritaon, kan Diyos Anak, is Kiristo Hisos, bohonwa kitay ala, hanggan idwan. Is Hisos in Diyos wa ala fagaba. 20 Maskin kawa hanya kagfatonglos in Diyos natogon bato disagon fagayo. Kawa gin Hisos tam syagan igsagot, Anod, fag kitonya wa ngay, nogfasayagdog han Diyos. 21 Is Diyos kagfarigon hyami hanggan hayo san Kiristo. Hanya yadi ka nafili hyami hastay fag ibolon. 22 Is Diyos ka nafwalid it tandaan sa hyami basad fangayofan, nadisag yadit Maliyaw fag Falad ha hyami, kwinta wagfatohoyan kitay hanya fatonglos it manga togon bato disagon tiba. 23 Is Diyos ka twag lag angko fangayofan kitay ahodyapdin bangkad gis nyamo hayo hyabi, maskin hodwa kasayag fahoriyan hayo. 24 Bohonwa kitay mi kasaya yapdi fag hami ka hayo fakatanogon ham no katiwala in Diyos, maskin ham marigon nogsyag in Diyos is nyamo hayo. Mi kasaya odig togbong, kaarakitay ham masolong no gogali ka maangay han Kiristo.

2 Yakanga angko fangayofan hodya lomahaw has nyamo hayo hyabi, kaarakitay hodwag farongkot domwag hayo. 2 Maskin aho nogfarongkot hayo, fakta ara ka falibang angko, ham gayfan? Idwa akwa, aho no sadi ya ginan igfarongkot hayo. 3 Yakanga ho nasorat tonya fag sorat ha hayo, kaarakitay aho nombangkad ya aban has nyamo hayo, ham idwag farongkot angko, maskin ham ka fiya nangos angko

fagbayaon. Aho twa kitay aho nogbaya, ham igbaya yadi wan. ⁴ Aho nogsorat ha hayo itfagonan, angko fangayofan inhuri wa dahol dahol, angko lowa igtarik-tihan wan, baliday aho nogsorat yapdi ha hayo. Bohonwa kitay ho kasayag farongkot hayo, dapat ho kasayag fatwagdog hayo kitay, ho galwasi wa dahol dahol hayo. ⁵ Hanya no ha nafahoriyan manga iba taw, bohonwa aho kat nafahoriyan. Ham ganong wa fagayo fagayo kanhuri, dapat idwa fiya aho nogfalabiyon angko hampang. ⁶ Dapat aywan sa hayo nangabaya hanya, hayo habaya hosto wa a, fiya wan. ⁷ Kati ham faliyaman wan it naogali dwat. Ham fag fasaya yagdog hanya, kaarakitay idwa dagos imlombay. ⁸ Kati ahog faaronganon ha hayo kitay ham fag falag hanya fiya, ham ogali mandi mahoway ha hanya. ⁹ Maskin ngay ho nasorat ha hayo, ho kasaya tomwa ngatay ham katanog fiya fiya angko manga togon fagayo ha hayo. ¹⁰ Nyawa faktaw ham nogfaliyam it naogali dwat, ahog faangay yadi. Aho nangos nogfaliyam ista naogali dwat, kawa ha hayo fakinabang aho nogfaliyam tonya, bilang san Kiristo faglagan. ¹¹ Fiya no kitonya kaarakitay is Satanas idwag daog intam. Tam fadi wad twa it fakasayaon. ¹² Aho no hawas banwa Toroas kaarakitay manoltol ka Fiya fag Barita kawa han Kiristo, kagfon intam, ista manga fangayofan danwa nafatalaga. Aywan kagtalinga fagaba. ¹³ Dapat angko fangayofan idwa kahoway kawa ahodwa nalag intam fadwasay is Tito. Idwa ha natagbo angko. Yakanga aho natogon di ngay, ho nadagos wa has sakop Masidonya. ¹⁴ Dapat ay, tam igbaya in Diyos. Is Kiristo fagabag daog it manga kalaban, bilang waglahaw sasta fagonan ayo ayo, ta nogbaya hanya. Is Diyos fagabag faofod intam han Kiristo, tam kansadi ha hanya, ta nogbaya hanya kitonya. ¹⁵ Giwantam is Diyos nogfahaskat ka Fiya fag Barita kawa han Kiristo, ka bilang wa banglo wa dahol dahol, ka mangan bawi gayok banglo, hanggan ka mangadwan bawi gayok yadi. ¹⁶ No kadi has manga taw ka hawas fadosaan, bilang baw kagfatohod has kahatayan baliwa, dapat no has mangan bawi, to sadik banglo igfatohod has haboyagan. Fakta ka syagan igfaanod kitonya fag ibolonon, ham gayfan? ¹⁷ Hamidwa kito ka tiba ka bilang odi famalidya in Diyos hampang. Yatokitay, sonson wa maanod hyami hampang maskin gin Diyos hyami fwayong, hanggan hami nogtoltol has taw, san Diyos yadi faglagan, kawa hami insadi san Kiristo.

3 Ham awkin gayfan hami bilang wagfadaholon ya hyami sadili? Hami awkin kito yadis iba taw kitay, fag ha sorat gis taw kagfatohoyan ngatay fiya hyami ogali mi nogsabang hayo, ngatay mi noglahaw gi hayo? ² Ham wa ngay ka bilang sorat kagfatohoyan kitay hyami ogali fiya. Ham bilang wansorat sa hyami fangayofan, fagayo kilala wan, hanggan bilang wagbasa. ³ Ham wan Kiristo sorat kalag wa fiya fiya, ka

hyami fagfalagon has taw, kawan Diyos boyagan it Falad ka fanorat sas fangayofan taw, bohonwa ka fama-hasding sas manga bato dalafi. ⁴ Mi twag fwayong kitonya kawa mi nogsyag in Diyos gin Kiristo. ⁵ No hyami di sadili, midwa ha fagsyaganon, hyami fagsyaganon fagayo in Diyos wa disag. ⁶ In Diyos kafangayofanan kitay, hami fag tomanggap fagsyaganon kaarakitay imbalit manga fangibolon sat taranggapan bago. To fag taranggapan bohonwa sas togon masoratan it nakatabowanon, dapat sas fangayofan bago. Maskin ka togon masoratan igfatohoyan has kahatayan, dapat in Diyos Falad igdisag haboyagan. ⁷ Hyabi hyabi, is Diyos no nafatohoyan it manga togon kantigib sas bato dalafi, manga togon kagfatohoyan has kahatayan ka mangag sway, in Diyos kasinayan inlag wan, inlafit yadi han Mwiswalong, yakanga araw in Israil manga hasokfonan idyadi wagsompong in Mwiswalong, nyawa kitay kasagaya wan Diyos kasinayan sinya. Ka gibolon taranggapan kanganit sas togon sorat kagfatohoyan has kahatayan, no ha hoyog masinay, ⁸ idwa awkin labi man inya in Diyos kasinayan it Falad nondisag hantam, ham gayfan? ⁹ Ka taranggapan kagfatohoyan has fadosaan, no ha hoyog masinay, labi man inyak masinay ka togonan kagfatohoyan kitay, tam nangafiyan han Diyos.

¹⁰ Kawa kitonya, tam iglwang wa ongay, ka gona fag kasinayan insagaya wan, kawa labi man inyak masinay ka natobos ka gona. ¹¹ Ka taranggapan kansagaya no ha kasinayan hyabi, labi man inyak fiya ka kasinayan sas taranggapan kadwa ha katabowanon. ¹² Kawa tam ha fagsyagon kitonya, tam idwa ha fakadalaon. ¹³ Tam idwa kiton Mwiswalong ka nataklob it mata kaarakitay manga taga Israil idwa lomag kitay tonya fag kasinayan kasagaya di. ¹⁴ Dapat ka manga taga Israil in-ganit it manga fangayofan hanggan wa kati, maskin tonya fag taklob mata idyan bol gista manga fangayofan ta nobasa ka Batasan Hodyo. San Kiristo lamang tonya fag taklob fangayofan nombol. ¹⁵ Anod, hanggan wa kati, nyawa ginahin ta nobasa yapdin Mwiswalong manga togon, ha taklob yapdi sat basad fangayofan. ¹⁶ Dapat ay, kito yadi kansorat kawa han Mwiswalong, hanya nogsayango han Diyos, imbol wa ka taklob. ¹⁷ Intam faggwason istay kagfon intam, kawan Diyos Falad. Hanggan no siday in Diyos Falad nogbanwanon, sinya ka manga taw mafalfasan. ¹⁸ Kati ka taklob santam manga walong inbol wan. Tam fagayo kabali silaw gin Diyos kasinayan, kagfabago intam fangayofan kaarakitay labi man inyak masinay hanggan wa tam imbali kito yadi hanya fiya. Intam Fon, ka Maliyaw fag Falad, kagfadagos tonya fag ibolon santam.

4 Yakanga, marigon yapdi angko fangayofan, kawas Diyos nafili angko kaarakitay hastay fag ibolonon, maskin hanya maawaon. ² Ho nadayo wan ka manga ogali mafyaloman hanggan mahaya wa

kalag. Hodwag daya, idwa yadig fabarikwang in Diyos hampang. Yatokitay, malagan wa ngap ka fakaorongan kangko fagtoltolon. Yakanga tadwa ha lwangon angko, nyawa faktaw, hanggan is Diyos twa yadi wan. ³ Ka hyami fagtoltolon fag Fiya fag Barita, no bilang yapdi matakloban has taw, kawa tonya fag manga taw intohoyan yapdi has fadosaan. ⁴ Tadwa katiwala maskin kastay is baba daga fag diyos nafabota ista mata fangayofan. Nafabota wan kaarakitay tadwa lomag ka yawa gis Fiya fag Barita kawan Kiristo kasi-nayan, kagfalag intam no kindas Diyos. ⁵ Kangko fagtoltolon, bohonwa angko sadili, dapat is Kiristo Hisos kantam Fon, tonya lamang. Kawa han Hisos ahon bali hayo wa sogowan. ⁶ Maskin is Diyos ka nalwang, hyabi hyabi, Fag ha mayawa gis basad marom, hanya yadi kagfayawa santam manga fangayofan kaarakitay tam homilala in Diyos kasinayan ka kalag san Kiristo mata. ⁷ Dapat hami kito odis anglit fag sohadan kaakwaan, inhalig odi gis daga, kaarakitay imlag wa fiya fiya kitay, ka madolaw wa dahol fag karigonan giwan Diyos, idwa gi hyami sadili. ⁸ Gis baliw gis baliw taglibit hampang hyami, dapat midwa kadala. Nomtoon mi gadowan wa ongay, dapat ay, midwan liyam hyami fagsyagon. ⁹ No kitay di tagfahorihan wa hyami, dapat ay, ha akwa yapdi kaawa hyami. Ta bilang wagfahakfo hyami, dapat midwa nakfo no nangos fagfahakfoon di. ¹⁰ Ho bilang wa madiyan sangko habilogan in Hisos kahatayan, kaarakitay it haboyagan imlag yadi gingko habilogan. ¹¹ Hami, nyawa boyagan yapdi, bilang wanthohoyan fagaba has kahatayan, kawa han Hisos, kaarakitay in Hisos haboyagan imlag sa hyami manga habilogan ka katay. ¹² Yakanga aho no kaakbang wa kaakbang wa has kahatayan, ham man ka ha haboyagan has aban aban. ¹³ Dapat insorat sas Kasoratan kitay, Ho ha fakatiwalaon wan, yakanga hogfwayong wan. Ho katiwala yadi kitonya, yakanga hogfwayong yadi wan, ¹⁴ kawa ho twa wa kitay is Diyos ka nafaboyag ya in Hisos kagfon intam, hanya yadi ka faboyag yangko, koyogan in Hisos, ginya tomaban hayo hanggan angko hat akbang. ¹⁵ Hawa hayo fakinabang kangko naagwanta fagayo, kaarakitay no kaayo in Diyos malooy fag kahowayan fakalafiton, kaayo yadi kagbaya in Diyos, hanggan igfalag it kafiyan. ¹⁶ Yakanga kati angko fangayofan idwa kagomo. Nyawa angko habilogan gis daga kagomo, angko fangayofan bago dagos wa karigon, sirang sirang. ¹⁷ Kangko manga nadalanan mahori kati, bilang ogbot odi, ngalay odi katolas. Dapat it bohad kafiyan dahol, kadwa ha katabowanan, idwa ha kitonyak fiya, ¹⁸ kawa hyami mata fangayofan fagaba matoonan has manga bagay kadwa malagan, idwa has manga bagay malagan. Ka manga bagay malagan ha katabowanan di, dapat kadwa malagan idwa ha katabowanan, nyawa ginahin.

⁵ Intam manga oliyanan habilogan sas baba daga, bilang odi balay rotay kamfolhot aban. Dapat tam twa wa kitay balay man maganit, kan Diyos nafatalaga hantam sat banwanan sam tongod, ka balay kadwa ha nahalig gamat taw, idwa yadim dwat hanggan aban aban. ² Intam oliyanan no toy yapdi intam habilogan, tam galibitan wa kasaya tonya fag oliyanan sam tongod, ³ kaarakitay tam no ha nasolong wa tonya fag habilogan bago, ta fawa lomag intam idwa ha solong. ⁴ No kandogay day tam no maoliyanan basad balay rotay yapdi, tam kahori yapdi, galibitan wan. Bohonwa kitay tam kasaya ka habilogan istay is baba daga fag imliyam wan, tam galibitan wa kasaya tam tomobos wan, fag ka man habilogan bago, kaarakitay ka haboyagan tomobos ka habilogan ka katay. ⁵ Is Diyos ka nafatalaga intam kaarakitay imbago kitonya, nadisag yadi hantam it Maliyaw fag Falad kat nafagona nadisag kagfasyag intam kitay, aban, tam ha akwa yapdi tanggapon. ⁶ Yakanga angko fangayofan fagaba marigon. Ho twa wa kitay no kandogay day intam oliyanan no to yapdi fag manga habilogan, tam idya maoliyanan santam Fon akbang. ⁷ Maskin nga angko ogali kito ka kati, kawas Diyos kangko fagsyagon, bonwa ka manga bagay malagan kangko fagisipon fagaba. ⁸ Kawa kitonya, marigon wa dahol angko fangayofan. No aho di kagdog, fiya man nangos no omobon toy angko habilogan, kaarakitay hawantam Fon. ⁹ Yakanga kangko fakasayaon nangos, nyawa ahostay yapdis baba daga, nyawa aban ho no hawangko oliyanan sam tongod, angko fangayofan hanggan ogali fag in Diyos wa fagbayaon. ¹⁰ Maskin tam igsadig sadi aban lomindog san Kiristo fanokawan fangabayan kaarakitay tam tomanggap ka maangay hantam naogali, ngatay fiya, ngatay dwat, tam nostay yapdis baba daga. ¹¹ Maskin ho twa wa kitay tam fag katanog kagfon intam, no baliday angko fagsyaganon, hodwag fagomon igfaaronganon has taw kitonya. Is Diyos twa angko fangayofan, hanggan ham nangos kilala yadingko fiya fiya. ¹² Bohonwa kitay ahog fadaholon angko sadili, nyawa ahog lwang kitonya. Ka odi kitay ahog fadog hayo kaarakitay ham syagan igfasayagdog angko ogali has taw. Ginya madi ham syagan somagot has taw, kasta fagbayaon ka odit mata lagan, bohonwa ka iba taw it fangayofan orongan. ¹³ Nyawa kitay aho bilang wadwa ha fangayofan nomtoon, kawa han Diyos kangko fagisipon. Dapat aho fadi wad ha fangayofan, hanggan hawa hayo it fakinabang. ¹⁴ Kawas Kiristo galwasi angko kagpilit angko ogali. Ho twa wa kitay sadik taw natay kaarakitay has fagayo, yakanga fagayo, ista manga fangayofan bilang yadi wa natay. ¹⁵ Is Kiristo natay kawa has fagayo, kaarakitay ka boyagan kati, it haboyagan sadi wak dahonya, fag idwag sadili odi, dapat fag imtohoyan han Kiristo, ka natay, ginyan boyag ya. ¹⁶ Yakanga gis kati

ginan, hyami fagbantayon bohonwasta habilogan, nyawa faktaw. Hyami fangayofan no kitonya han Kiristo hyabi, kati fawa kitonya. ¹⁷ Yakanga kati, nyawa faktaw, nonsadi san Kiristo, hanya sadik bagon halig. It fangayofan dan inliyam wan, hanyan bago wan. ¹⁸ Is Diyos ka gibolon tonya. Giwan Kiristo naagwanta, is Diyos nafaamigos angko ha hanya, ginya nafili yadingko kaarakitay aho faamigos yadi iba taw han Diyos, ¹⁹ aho nogfatwagdog has taw kitay, is Diyos sawan Kiristo kaarakitay faamigosan ya ha hanya fagayo fag manga taw, idwa nangos igbotang ista manga naogali dwat. Is Diyos nafaano yadi hangko to fag barita no kinday manga taw nom-amigos ha hanya. ²⁰ Yakanga aho in Kiristo wa nasogo. Is Diyos kagfaaronganon ha hayo gi hyami bibig hampang. Yakanga, san Kiristo ngayan, hogfaaronganon hayo kitay, ham fag danwan amigosan han Diyos. ²¹ Kawa hantam is Diyos nafabali in Kiristo bilang wa ha kasalanan hyabi, nyawas Kiristo idwa ha ogali dwat, kaarakitay tam nomsadi ha hanya, tam mangafiyan wa han Diyos.

6 Kawa hami in Diyos wa manga katogbong fangibolon, migfaaronganon ya ha hayo kitay ham fag idwag fasigpala in Diyos malooy fag kahowayan hantam. ² Maskin is Diyos iglwang, No ginahin ka maangay, ho natalinga hyamo, Sas Sirang Famawiyon, ho natogbong hyamo. Fandog ngay, kati wan ka maangay fag kasohodan, kati wan ka Sirang Famawiyon. ³ Hogtikis wagbaybay nyawa kana kadwa fiya, kaarakitay tadwa ha fabangdanan gingko. ⁴ Yatokitay sangko manga ogali fagayo fagayo, hogfatwagdog has taw kitay ahon Diyos wa fangibolon. Ho maagwantaon wan nyawa basad mahori, nyawa ta kaisog angko, nyawa ho galibitan wan. ⁵ Nyawa ta nabakbak angko hanggan nafaporiso, nyawa ha gagran, nyawa ho gibolon mabyat, nyawadwag toyog, nyawadwa ha fanganon nomtoon, hodwag fagomon. ⁶ Kawa angko ogali maangay kagfatwagdog has taw kitay ahon Diyos wa fangibolon, hanggan ha fakatwawon, maagwantaon, mahoway yadi kawa ka Maliyaw fag Falad sawangko, hanggan ho orongan wa galwasi manga taw. ⁷ Kawa fakaoronganon kangko fagtoltolon, hanggan in Diyos karigonan. Ka fakafiyan kangko fanlaban hanggan angko fanaktak. ⁸ Ho ha nadalanan wa fagayo, nyawa tagbaya angko, nyawa tagfadwat igdog, nyawa tagyod tiba ginan, nyawa tagfasayagdog. Fakaoronganon wan kangko nafwayong, dapat taglwang yapdi kitay aho bohagon. ⁹ Tagfaiba tawon angko, dapat ta kilala di, ho kahatay wa tiba ginan, dapat boyagan yapdi aho. Nyawa tagfadosa wangko, tadwag fahatay. ¹⁰ Ho karongkot ongay, dapat fagaba kasolong, myabog, dapat hogfaakwa has aywan fag manga taw. Hodwa akwa akwa no kalag di, dapat ay, fagayo fag manga bagay angko wan. ¹¹ Angko manga fakilalaon sas Korinto, hodwa ha nafyalom ha hayo angko manga ham-

pang. No kana sangko basad fangayofan, tonya wa kangko fagfwayongon ha hayo. ¹² No aho di, ho galwasi wa dahol dahol hayo, dapat ham idwa bangan mahoway hangko. ¹³ Ho bilang wa hayo ama, aho no kampang ha hayo, yakanga hayo fangayofan fag mahoway yadi hangko, kito yadi aho no mahoway ha hayo. ¹⁴ Tam fag idwa kasadi has mangadwan tiwala. Ka maslong hanggan barikwang syagan awkin gofodan, ham gayfan? Ngatay ka mayawa hanggan ka marom syagan kasadi? ¹⁵ Da Kiristo da Bilyal syagan awkin gamigosan? Kinday kantiwala hanggan kadwan tiwala nombali maamigosan? ¹⁶ Kinda araw ka manga tolad faglohodon nomaktom han Diyos fanimbaan, ham gayfan? Kawa tam wa kan Diyos boyagan it fanimbaan. Maskin hanya yadi kagfwayong, Homsadi sas taw hanggan domogayan sasta akbang. Aho aban it Diyos wan, tambali yadi wangko manga taw. ¹⁷ Is Diyos iglwang yadi, Yakanga ham fag ayayo gis iba taw, Ham fag idwag sapkid ka manga ogali dwat, Ginya ho tomanggap yadi hayo. ¹⁸ Intam Fon, kadwa ha bosal, iglwang, Ahom bali hayo ama a, Ham imbali yadi wangko manga anak.

7 Angko manga fakilalaon, kawas Diyos natogon to fag manga bagay hantam, gwadi tam fag domayo fagayo fag manga ogali dwat sas fangayofan hanggan sas habilogan. Tam fag fagaba katanog in Diyos, hanggan fag fatohoyan ha hanya intam sadili, sadi wak dahonya. ² Ngadi kabayan ogbot, ham fag galwasi yap man hyami. Nyawa ginahin midwa ha nabangdan hayo. Midwa ha nafahoriyan hayo. Midwa ha nabolay gi hayo. ³ Nyawa hoglwang kitonya, bohonwa kitay hogsogat hayo. Kitongko fwayong fagaba ha hayo, ho galwasi wa dahol dahol hayo. Yakanga, nyawa has haboyagan, nyawa hawas kahatayan, tam fag mangofodan nangos. ⁴ Ho katiwala wa orongan hayo. Hobbaya wa dahol hayo. No has baliw, nyawa hyami fakahoriyan kaaywanon, angko fangayofan kasolong wa dahol. ⁵ Hami nondasog has sakop Masidonya, midwa kahoway, fagayo ka mahori ka hyami nadalanan. Gis baliw, gis baliw, taglaban hyami, mi kadala yadi wa dahol dahol. ⁶ Dapat ay, is Diyos idwag fabayaan ka manga ha fakahoriyan, kawas Tito nonbangkad wan, angko fangayofan inhoway ya. ⁷ Bohondi kitay aho no nalag in Tito, ka nafahoway angko fangayofan, dapat kawa ham, hono, naano yadi hanya fiya fiya. Is Tito nafwayong kitay ham galwasi angko, ham inrongkot wan, hanggan gafalowan yadi wangko, no kitay di. Yakanga kati ho labi wansayagdog in Tito toltol. ⁸ Nyawa angko sorat nafarongkot hayo, hodwag fanisi kitay ho nasorat kitonya. Ho twa wa kitay tonya angko sorat nafarongkot hayo fangayofan sadik ngalay, yakanga honbalaw yadi wan. ⁹ Dapat ay, kati hobbaya wan, bohonwa kitay kawa ho nafarongkot hayo, dapat kawa hayo karongkotan nataban hayo hasagsoyo wa

a, ham nadayo wa hayo ogali dwat. Kitonya fag karongkotan giwan Diyos, yakanga midwa nafad-watan hayo fangayofan. ¹⁰ Maskin nos Diyos kag-farongkot intam fangayofan, igfaisip odi kaarakitay tam somoyo, imbago yadi intam fangayofan kaarakitay tam imbawi. Dapat ka karongkotan gistay is baba daga, has kahatayan di it hadasogan. ¹¹ Fanlag ngay, ham fag gisip. Tonya fag karongkotan gin Diyos no kanat nabohad sa hayo manga ogali. Ham inbali mahogod has fakafiyan, ham kasayag fatohoyan kitay ham idwa ha ogali dwat kati tonya fag manga bagay, ham kahori ya, kadala ya, galwad yadingko. Ham kasaya mangabaya ka naogali dwat. Hayo manga halimbawan fagayo igfatohoyan kitay, ham idwa naoyon ka kitonya fag manga bagay. ¹² Is Diyos twa wan kangko sorat ha hayo bohonwa kitay kawa has naogali dwat, bohonwa yadi kitay kawa hat nafahoriyan, dapat kaarakitay ham tomwa wa fiya fiya, san Diyos faglagan kitay, ham mahogod yapdi no katiwalangko. ¹³ Yakanga ka hayo naibolon nafarigon wa dahol angko fangayofan. Minsaya wagdog yadi, maskin is Tito no nanabang gi hayo, ham nafasayagdog hanya. ¹⁴ Hodwa naya yadi, kawa ho no nafasayagdog in Tito hayo manga ogali, itfagonan, no kinday sonson wa orongan hyami fwayong fagayo ha hayo. Kitonya yadis Tito nalag kitay, hyami famasayagdog hanya, ka hayo ogali fiya, orongan yadi wan. ¹⁵ Ya labi man is Tito no galwasi hayo hanya no gisip yapdi kitay, ham mangharaw matanogon, magalang wa dahol no natanggap hanya. ¹⁶ Yakanga ho kasolong yadi wagdog kitay hodwa ha fakahoriyon hayo ogali kati.

8 Angko manga fadwasay, ho kasayag fadog ha hayo no kinday in Diyos malooy fag kahowayan indisag hat manga Tifonan sas sakop Masidonya. ² Tanhyabog wa dahol dahol a, sadi wak solay mahori has taw, dapat ay, tadwag fagomon kasolong igdisag, mahogod ya ngadi, nyawa tanhyabog wa dahol. ³ Kawat sadili fangayofan ta nadisag bohondi kitay no dahoday odi ogbot, dapat ay, ta nafalabi ya ngadit dis-ag. ⁴ Tadwa nafagomon igfaaronan hangko kitay, ta fag domisag yadi hantam manga fadwasay sas Hodiya. ⁵ Kasta disag igsagaya wangko fagasolopon. Bago bago ta nadisag yapdit sadili hasagfon intam, ginya madi bago di ha hyami, kawan Diyos wa kafangayofanan kitonya. ⁶ Ya kawas Tito ka nafwayong bago bago ha hayo hasagdisag baliwa, yakanga ho nafaaronan in Tito kitay, fag hanya ka tomogbong yadi hayo, kaarakitay ham igfaanod wa fiya fiya igdisag yadi togbong has manga taw sas Hodiya. ⁷ Yabay, ham kafiyaon nomtiwala, kafiyaon nogtolto, madonong yadi wa dahol. Ham maibolon wan, hanggan ham galwasi wa dahol hyami. Kati, ham fag kafiyaon yadi hasagdisag baliwa. ⁸ Bohonwa kitay aho kagfasognod hayo, ka odi kitay hogfadog hayo, kawa

tibak taw kasolong igdisag, kaarakitay imlag kawa ham orongan wa galwasi yadis taw. ⁹ Tam fadi wad twaglag in Kiristo Hisos, kagfon intam, it malooy fag kahowayan. Nyawa hanya maakwa wa dahol dahol, hanya natikis wanbali myabog kaarakitay falobos hantam it kaakwa. ¹⁰ Kitingko fwayong kawa hasagdisag baliwa. Hyabi fag fangaraw ham ka naowas gona gona, hanggan nafabago yadig togbong. ¹¹ Kati ham fag fadagos wa tonya. Ham mahogod wa nogfabago hanggan wa kati ham fag mahogod mandig fatabo. Ham fag disag no dahoday hayo fagsyaganon.

¹² Maskin ham no kasayag disag, is Diyos tomanggap no dahoday hayo fagsyaganon igdisag. Dapat ay, is Diyos idwag manaw, ham nodwa nasyagan igdisag dahol. ¹³ Bohonwa kitay angko fangayofan kasta disag nyawa ogbot, dapat ka hayo fag dahol man. Fag fakafiyan wan. ¹⁴ Ham kati ha akwa wan. Gwadi ham fag togbong yadi has manga myabog. No aba ham man kadwa ha akwa, ta aba tomogbong yadi hayo. Yakanga no kitonya, ham pariho igtarogbongan ha sadi ha sadi. ¹⁵ Ginya madi im-anod yadi kansorat sas Kasoratan kitay, Kagtifon aywan, idwa ha labi, Kagtifon sayok idwa yadi komorang. ¹⁶ Hogbaya han Diyos kawas Tito galibitan wa ha hayo kafiyan, kito yadingko no galibitan hayo. ¹⁷ Hogfwayong han Tito kitay, sabangan nangos hayo, dapat is Tito danwa ha fangayofan kitonya, nyawa hodya naowas. ¹⁸ Ho nafaofod yadi han Tito intam fadwasay ka dan wasta fakilalaon sas fagayo fag Tifonan, kawa nogtolto ka Fiya fag Barita. ¹⁹ Bohondi kitay tonya, dapat ka manga Tifonan nafili yadi hanya kaarakitay omofod hyami hami noglahaw, tomogbong yadi hyami igbahala hasta manga disag. Ka kitonya fag ibolonon, igtogbong has taw, igfasayagdog intam Fon, igfalag yadi kitay aho gwayan wa kasaya yadig togbong hayo. ²⁰ Mi matagahan fiya fiya kaarakitay tadwa ha lwangon hyami, nyawa faktaw, kawa hami wa kagbahala toy, ista disag gorangon. ²¹ No baliday hyami fagsyaganon, migfatonglos fiya fiya to fag ibolonon, bohondi kitay maangay santam Fon faglagan, dapat maangay yadi sas taw faglagan. ²² Yakanga hami nafaofod has taw intam fadwasay sadi ya. Mi danwa nalag fagaba kitay, kafiyaon hanya nogtogbong. Kati hanya labi man fiya no matogbongon kawa katiwala wa fiya fiya hayo. ²³ Kawa han Tito, is Tito kawangko ofod igtogbong yadingko ibolon. Kawan Tito manga ofod, ka manga Tifonan ka nasogo intam manga fadwasay has taw, kawa manga matanogon fiya fiya han Kiristo. ²⁴ Yakanga ham falagan wa kitay ham orongan wa galwasi tonyantam manga fadwasay, kaarakitay ka manga Tifonan idwa lomwang kitay hami igbohag di noglwang kitay ham mahoway wa dahol.

9 Nyawa hodwa somorat domwag ha hayo, no kadi hasagtogbong baliwa has manga fadwasay,

² maskin ho twa wa kitay ham talaga wa tomogbong. Ho nafasayagdog has manga taga Masidonya kitay ham matogbongon wa dahol. Itfagonan yapdi fag fan-garaw, hoglwang kitay, ham manga taga Akaya dan wa kasayag togbong. Kawa ham kasayag togbong, aywan taga Masidonya kan-abay wagdog, igdisag yadi. ³ Yakanga aho nafagona intam manga fadwasay has nyamo hayo, kaarakitay hodwa maya aban, kawa ho nafasayagdog is taw kitay, ham matogbongon, kaarakitay ham mamatalaga hayo togbong kito kangko nafwayong. ⁴ Aho ongay maya wan, dapat ham labi man maya wan, no ha tomahin angko taga Masidonya, ta noglag kitay ham idya nafatalaga, mangharaw, hayo bato disagon has taw. ⁵ Yakanga ho nafaaronganon hantam manga fadwasay kitay, ta nangos fag gomona wangko has Korinto kaarakitay ka hayo natogon kitay ham tomogbong, fag matohoy-anan intalaga wan. No kitonya, imlag wa kitay ham igdisag, bohonwa kitay sas pilitan, giwas sadili fangay-ofan. ⁶ Fanlag ngay, ham fag tohod, kagtanom sayok, gani yadi sayok. Kagtanom aywan, aywan yadit aniyon. ⁷ Tam fag kafod igfathoyan kantam bato disagon, ginya disagan wa tonya, idwa mabyat sas fangayofan, bohonwa kitay napilitan. Maskin is Diyos galwasi kagdisag masolong. ⁸ Is Diyos syagan igfaaywan hayo manga kaakwaon fagayo, iglabi hayo sadili fakasayaon, kaarakitay ham syagan igtogbong has fagayo fag ibolon fiya, kawa idwa korang ka hayo sadili. ⁹ Kito ka Kasoratan iglwang, Hanyag fahafod fagaba has taw, Madisagon has manga myabog, Ta tomohod it kahowayan hanggan has aban aban. ¹⁰ Is Diyos kagdisag binhi ista bato tanomon, hanggan ka tinapay ista fanganon, hanya yadi kagdisag ha hayo binhi hanggan igfatobo hanggan igfalangba tonya, kaarakitay hayo kahowayan ham nogdisag has taw bomohad aywan. ¹¹ Is Diyos faaywan hayo kaakwaon fagayo, kaarakitay ham labi man syagan igtogbong has fakaaywanan fagaba. Yakanga aywan ka bomaya han Diyos, kawa hayo togbong aho domiya has taw. ¹² To hayo togbong hantam manga fadwasay, bohondi kitay tomogbong kasta kakorangan, dapat ginya wa ginan aywan ka bomaya han Diyos. ¹³ Kawa ham idwa kwan-git igdisag kagfalag has taw kitay, ham katanog wa orongan in Kiristo Fiya fag Barita. Kawa kitonya, ham mamalag in Diyos kafiyan. ¹⁴ Ta lomag kitay is Diyos mahoway wa dahol ha hayo, hanggan ta fagaba wa aban domarangin yadi ha hayo kawa ta galwasi hayo. ¹⁵ Dapat ay, tam igbaya wa dahol han Diyos, kawat dis-ag hantam idwa ha somohod, no taw di.

10 Maskin is Kiristo mahoway hanggan idwag fadaholon it sadili, ho ha fagfadogon ha hayo. Ka tibag lwang, ahos Pablo, nos fagdogan wan mahoway, dapat nodypdis fagdogan, no kadog di, maisog wan. ² Hogsagad gi hayo, ham fag idwag pilit

angko homampang mahori ha hayo, kito ka tiba kaglwang kitay, aho goyon ka bali fangayofan masayaon. ³ No kalag di, aho basta odi taw, dapat ay aho noglaban, idwa kito kastay fag baba daga fag manga taw noglaban. ⁴ Angko fanlaban bohonwa ka gistay baba daga fag manga fanlaban. Angko fanlaban karigonan giwan Diyos, syagan yadig fahakfo ka bi-lang manga fanaktak alad bato. Hogdaog ka manga idwa orongan fag katadlongan. ⁵ Ho bilang wagtastas yadi fagayo fag manga toltol kagfaabwaton it sadili, kagtoplan manga taw kaarakitay tadwa homilala in Diyos. Ho gahot yadi fagayo fag manga isip kaarakitay katanog in Kiristo. ⁶ Ginya madi ham fagayo no katanog wa fiya fiya, ho talaga wa mamadosa fagayo kagsway yapdi han Diyos. ⁷ Ayfanan ka hayo lagan ista ogali. Nyawa fakta fag taw no gayfan hanyan sadi han Kiristo, hanya fag tomohod kitay aho kitonya yadi, honsadi han Kiristo. ⁸ Nyawa aho bilang wagfadaholon angko kangayanan, hodwa yadi kaya kan Diyos disag angko kangayanan, kaarakitay igfarigon hayo fangay-ofan, bohonwa kitay has kadwatan. ⁹ Ham fag idwa gisip kitay hogfadalagdog hayo aho nogsorat. ¹⁰ Intibag lwang, Sa odit manga sorat no maisog donggon, no sawas fagdogan, idwa syagan ngap kabaya. ¹¹ Ka manga taw kaglwang kitonya, ta fag tomwa kitay no kana kangko nasorat kati, aho no ayayo gi hayo, tonya mandi kangko ibolonon, nyawa aba sa hayo fagdogan. ¹² Hodwa ha fagfasalagwaon has tiba taw ka fagaba gayfan hanya bohondi kitos taw ik fiya. Nyawa ta gayfan kitay hanya madonong man is taw, tam nalag wa kitay tadwa yadi ngap ha fakatwawon igdog. ¹³ Dapat kangko fagfadaholon lamang, kawan Diyos natogon ha hyami, ka hyami bato ibolonon, kasakop yadi hayo hami nogfaadal ha hayo. ¹⁴ Hodwag fasagaya tonya maskin ham insakop yadi han Diyos natogon ibolonon ha hyami, aho ka gonan bangkad gis nyamo hayo, nadiya ka Fiya fag Barita, kawa han Kiristo. ¹⁵ Ahodwag falabi aho nogbaya, maskin bohonwa iba taw nakayayan kangko fagbayaon, ka mandingko sadili nakayayan. Hogsyag wa kitay ham imrignon ham no katiwala in Diyos, ginya madi angko ibolon sa hayo, imdahit yadi wan ha sayo taw taw, dapat idwa somagaya in Diyos nagtogonan ha hyami. ¹⁶ Ginya madi, fiya aho no manoltol ka Fiya fag Barita sa yapdi hayo ligongan. No kitonya bohonwa kastaw fag nakayayan kangko fagbayaon. ¹⁷ Kito ka Kasoratan fwayong, Nyawa fakta fag taw ka kasayag fadaholon, fag bohonwat sadili it fagfadaholon, fag hasagfon intam. ¹⁸ Intam Fon nogbaya intam ibolon ka mahalga, bohonwa kitay tam nogbaya intam sadili.

11 Ham fag idya kahori angko, hogfahalimbawa odi. ² Aho kabayong hayo, bilang yadi was Diyos no kabayong, kawa ham bilang sadik dayaga kadya ha ofod iba anahan hyabi, aho no nafaindogan hayo ha

sadik ama, han Kiristo. ³ Dapat ho gayfan wa gayfan wan, no kinday ka abyanon nafaadowan in Iba hyabi, ho kadala kitay ha faadowan hayo, ginya ham aban ngandayo idwa kito fag kawili hanggan orongan igsyag in Kiristo. ⁴ Maskin ham mahogod wagtalinga ngadi faktaw kandasog igtoltol ka tiba fag Hisos, bohonwa kangko fagtoltolon fag Hisos. Ham igtanggap yadi tiba falad hanggan toltol, bohonwa kangko fagfwayongon ha hayo. ⁵ Dapat ay, ngadi aho, aho bohondi kitonya fag manga kafiyaon fag @Fandiya Barita, no aho di kagdog. Hogmanwali odi. ⁶ Anod, ngandayo idwa masaya kadog aho nogtoltol, dapat ay, idwa ha akwa madonong man angko. Ho fagaba igfathod hayo kitonya, nyawa ginahin. ⁷ Aho no natoltol ka Fiya fag Barita ha hayo, hodya nanagad tangdanan gi hayo, nyawa kana. Ham yapdi kangko fagisipon, idyapdi hangko sadili. Ham awkin lomwang to kangko kasalanan? ⁸ Aho no gibolon has nyamo hayo, iba fag Tifonan ka nadisag angko fangaboyagon kaarakitay tomogbong hayo. Aho bilang awkin nalogos is taw, ham gayfan? ⁹ Aho nodwa akwa is nyamo hayo, hodwa nanagad ngadi kana ogbot gi hayo, maskin intam manga fadwasay gis Masidonya nafadiya yadi togbong hangko. Gi yapdis fagonan, ho danwa gisip ho fag idwag fahoriyan hayo igsagad igsagad, nyawa kana. Hanggan aban, kitonya yadingko ogali. ¹⁰ Maskin no kinday in Kiristo fakaoronganan sawangko basad fangayofan, hogfathoyan kitay hanggan wa aban, nyawa siday is nyamo sas Akaya, angko ogali kitonya wan. ¹¹ Kana mayon, ham gayfan, angko ogali no kitonya? Ham gayfan awkin ahodwa galwasi hayo? Is Diyos fadi wadtwa. Yatokitay, ho galwasi wa dahol dahol hayo. ¹² Dapat hogfadagos kitonya angko ogaliyon, kaarakitay tadwa ha lwangon kaglwang kitay, ta kito yadi hyami nogbarita. ¹³ Tonya bohonwa orongan manga Fandiya-Barita, ka odi kitay igdaya, igfaniring odi in Kiristo manga Fandiya-Barita. ¹⁴ Tam fag idwa katakagdog, maskin nyawas Satanas syagan yadig faniring sadik anghil gis kayawaan nomtoon, nogfasayagdog intam. ¹⁵ Yakanga bohonwa fakatakaon igdog in Satanas manga fangibolon nogfaniring yadi manga fangibolon has kafiyon. It hadasogan aban ka maangay lamang hat manga ogali. ¹⁶ Ho golit wa kati, ham fag idwa gayfan ho kakot odi hayo. Dapat ham no gayfan kitay ngatay ho kakot di hayo, hogfaangay yadi kaarakitay ho syagan igfadaholon kitos sadik mahakot. ¹⁷ Kangko fagfwayongon idwa gintam Fon, bilang odi sadik mahakot nogfadaholon. ¹⁸ Kawa aywan kagfadaholon kawa has manga bagay istay is baba daga, hanggan ahog fadaholon yadi angko manga nadalanan. ¹⁹ Maskin ham madonong nga wan, ham gagwantag talinga ka manga korang it isip. ²⁰ Ham gagwanta nyawa tagfabali hayo ista nasali sogowan, iglogos, igdaog hayo, bilang odigyod hayo, igtoga

hayo. ²¹ Ho kaya wa dahol igfadog hayo kitay, hodwa gogali kitonya. Ta no syagan igfadaholon it sadili, aho syagan yadig fadaholon angko. Ho kakot odi ka orongan. ²² Ta awkin manga Hibriyo, mangharaw? Aho Hibriyo yadi. Taga Israil awkin tonya? Aho taga Israil yadi. In Abraham yadi awkin manga hasokfonan tonya? Ahot kaiban yadi wan. ²³ Ta awkin in Kiristo manga fangibolon? Hogtikis wagmanwali odi, dapat aho in Kiristo fangibolon fiya man tonya fag manga taw. Angko nakayayan labi man is taw. Kayodawa ginan ahon poriso, ta nabakbak angko, nafahoriyan hanggan ho kaakbang wa katay. ²⁴ Lima ginan ka manga Hodyo nabakbak angko, myasa tolok safolo ha siyam ik tigna. ²⁵ Tolo ginan ka manga taga Roma nabakbak angko. Sadi ginan manga taw nabintok angko. Tolo ginan aho ha nadalanan angko nagsahayan baba dagat indwat wan. Hanggan sadi ginan aho maalohayagan odi baba linaw dagat, sadi wak sirangan hanggan wandasog kayawa. ²⁶ Kawa ho fagaba wa malahawan, ho ha nadalanan fagayo fag manga fakadalaon, las manga safa, las manga tolisan, las manga kapariho Hodyo, hanggan manga Hintil, manga madala sayo manga basad banwa, sayo basad fakahyabogan, sas dagat hanggan gis manga bonwa manga fadwasay orongan. ²⁷ Honyaya wa gibolon, hanggan naagwanta mahori fagaba, fagaba mafolawan no yabi, malonos ya, mainom ya, fagabadwa hanon. Nomtoon ho kagnaw wan, dapat ngadi balokas idwa akwa. ²⁸ Bohondi tonya fagayo, yabi sirang, ho gayfan wa gayfan wan in Diyos manga Tifonan. ²⁹ No ha kagomo, ho karongkot yadi, no ha akwa yadi naogali dwat, angko fangayofan karongkot yadi wa dahol. ³⁰ Dapat ay, aho nangos no manfatakan di, angko fagfatakaon kitay, ho ngap magomo di. ³¹ Is Diyos, in Hisos, kagfon intam, it Ama, kantam fagfasayaon igdog nyawa ginahin, hanya twa wa kitay ahodwag bohag. ³² Hyabi aho no sas banwa Damasko yapdi, ka gobirnadador, in Gorangon Aritas sakop, nafabantay manga taw sas sakbawan alad banwa kaarakitay faiktan angko. ³³ Dapat ay, intam manga fadwasay hantam Fon natonton angko sas basad baban dahol dahol, gis tongod, has dayo alad, ginya ho nalagyo wan, nalfas wan.

12 Nyawadwa fiya no kitonya, aho fag fadaholon yapdingko nadalanan. Kangko fagfwayongon, intam Fon nafalag, hanggan nafatwagdog angko manga bagay madolaw. ² Ho ha fakilalaon sadik kamtiwala kandiya has fatolo ya fag banwa, tongod ya fangasan. Safolo ha ofat ik fangaraw kantolas gis nanya. Hodwa yadi twa matohoyanan ngatay it habilogan ginya, ngatay it falad lamang. Is Diyos ka twa. ³ Ho golit kitay hanyan diya has fiya fag oliyanan ka manga natay. Dapat ho golit kitay hodwa yadi twa ngatay it habilogan ginya, ngatay it falad odi. Is Diyos ka twa. ⁴ Ka nalag tonya idwa syagan igfwayong it manga

donggon sinya, idwa yadi fiya omowas kitonya. ⁵ Ho mamadaholon tonya fag taw, dapat ay hodwag fadaholon nongko di sadili, no bohonwa kitay kawa aho magomo. ⁶ Dapat ay, aho bohonwa kitay kakot aho nogfadaholon angko, maskin kangko fagfwayongon orongan yadi wan. Dapat ay, hogtikis idwag fadaholon angko has taw, kaarakitay tadwa ha fagayfanon hangko baliwa kaglabi ista lagan angko ogali, hanggan ista donggon angko hampang. ⁷ Dapat, kaarakitay hodwag fadaholon angko has taw, kawan Diyos nafatwagdog hangko madolaw wa dahol dahol, is Diyos nafaangay kitay, aho fag ha akwa fagdogon, ka bilang wa ongon dogi, mahori sangko habilogan. Tonya kwinta wan Satanas famakbak angko kaarakitay hodwa ha takan. ⁸ Tolo wa ginan aho nadarangin hantam Fon, fag nangos imbol wa tonya fag bilang wa dogi. ⁹ Dapat kito kat sagot angko, Angko malooy fag kahowayan hosto ha hyamo. Haw no magomo di, angko karigonan labi man imlag wa sa hyamo ogali. Yakanga ho kasolong wa dahol igfatakagdog kitay, aho magomo di, kaarakitay in Kiristo karigonan mamarigon angko. ¹⁰ Idwa ha kinday sangko, nyawa aho magomo, nyawa tagdaog angko, nyawa mahori nomtoon angko nadalanan, nyawa tagtikis wagfahoriyan, hodwag fagomon gagwanta, kawa aho galwasi in Kiristo. No ginahin aho magomo, gis nanya ahom rigon. ¹¹ Ahon bali mahakot, dapat ay, ham kagpilit angko igmanwali. Fag ham nangos ka mamasayagdog angko, kitay aho fiya. Nyawa aho bilang wadwa ha kahologan, aho bohondi kitonya fag manga kafiyaon fag Fandiya-Barita. ¹² Hodwa nafagomon igfaorongon ha hayo, gingko manga naibolon falagon madolaw hanggan tiba fag manga bagay ka bohonwa fakatwawon kitay, aho in Diyos Fandiya-Barita orongan. ¹³ Kana ka mahori man sa hayo, idwa kitos iba Tifonan, ham gayfan? Idwa akwa gwadi, no bohonwa kitay hodwa ha nasagad gi hayo nyawa odi kana. No tonya kangko naogali dwat ha hayo, ham nangos fag idwag botang tonya. ¹⁴ Fato lo wa ginan aban, aho no manabang hayo, dapat hodwa mamahoriyan hayo. Ham wan kangko fakasayaon, bohonwa ka hayo manga botang. Ka magorang bahalag tifon it manga anak bato famayadon, bohonwa ka manga anak ka bahalag tifon it manga magorang bato famayadon. ¹⁵ Ho kasolong omagwanta fagayo, hanggan domisag angko karigonan ha hayo fakinabang. Nyawa aho galwasi wa dahol dahol hayo, ham idwag fatimbang angko galwasi. ¹⁶ Ham fadi wad twa kitay hodwa ha nafahoriyan nyawa faktaw sa hayo. Dapat ka tibag lwang aho fanlogos a, madaya ya ngadi ha hayo. ¹⁷ Kana mayon ta noglwang kitonya? Aho no nasogo manga taw has nyamo hayo, aho awkin nanagad togbong maskin ham mahoway? ¹⁸ Aho ka nafaaronganon han Tito kitay, fag has nyamo hayo nangos. Ho nafaofod yadi hanya intam fadwasay sadi.

Is Tito aw nanagad gi hayo? Idwa awkin hyami fangayofan pariho? Hyami ogali myasa wa kitonya. ¹⁹ Ham awkin gayfan ho gapin angko sadili ogali? Idwan. Aho kampang han Diyos fagdogan no kinday in Kiristo fakasayaon. Angko manga fagalwasiyon, ho gibolon wa fagayo kaarakitay ham imrigan han Diyos. ²⁰ Ho karokog wa kadala aho nombangkad has nyamo hayo, ho ngandayo ha lagon sa hayo ogali manga bagay kadwa maangay sangko. Ginya madi, ham yadi ka lomang manga ogali gingko kadwa maangay ha hayo. Ho ngan lomang ham igdaraogan, manga kaid-ingliyan, gidgisogan. Ham ngandayo kwadkwangitan, igfadad-dwatan igdog ha sadi ha sadi, ha faglibakon di has tiba taw, manga ha takan, igfaagran has tiba taw. ²¹ Ho kadala kitay aho nomdasog ya has nyamo hayo domwag, angko Diyos ngandayo igfahaya angko sa hayo faglagan. No kitonya ho omoraw wan, maskin aywan ka gogali dwat hyabi, hanggan nafabayowan, hayapdis dwat fag kasolong, tadya nasoyo, idya nadayo it manga ogali dwat.

13 Kati aban it fatolo wa ginan aho no manabang has nyamo hayo. Ka Kasoratan iglwang, Nyawa kana fag sombong, ngatay fag dow, ngatay tolo ka nalag. ² Kati aho nostay yapdis ayayo, ho golit kangko nafwayong it fadowa fag swali, aho no gis nyamo hayo. Kangko nafwayong has manga gogali dwat, hanggan has fagayo, ho mangabaya hayo fiya fiya, ho fawag fahowayon aban. ³ Ho mangabaya hayo kitonya kaarakitay ham tomwa kitay, is Kiristo ka kabaya hayo, nyawa angko odi bibig kagfwayong. Is Kiristo idwa magomo ha hayo baliwa. Yatokitay hanyag falag wa ngap it karigonan ha hayo. ⁴ Hanya nyawa magomo hyabi, ta no nafapako hanya sas nafatimbangan hayo, kati boyagan wan gin Diyos karigonan. Kawa ahonsadi han Kiristo kahoriyan, aho magomo yadi, dapat kati, aho boyagan yadi gin Diyos karigonan kiton Kiristo, kaarakitay mamaadal hayo. ⁵ Ham fag gisip fiya fiya hayo sadili, ngatay hayo manga ogali maangay has mangam tiwala, ngatay idwan. Ham awkin idyag dog sa hayo sadili kitay, is Kiristo Hisos sawa hayo, no bohonwa kitay ham kat nadayo. ⁶ Hogsyag kitay ham tomwa wa kitay, aho bonwat-nadayo. ⁷ Hogdarangin han Diyos kitay, ham nangos fag idwa gogali has dwat. Bohonwa kitay maskin aho kasaya fag imlag kitay hodwa nadaogan, dapat kaarakitay ham omogali has fiya, nyawa halimbawa, no kadog di, ho bilang wa nadaogan. ⁸ Maskin idwa fiya aho noglaban ka fakaoronganon no bohonwa kitay hogfaanod odi. ⁹ Ham nangos fag karigon, ginya madi, nyawa angko habilogan kagomo, ho kasolong yapdi. Yakanga hogdarangin yadi kitay hayo manga ogali fag nangos imhosto wa fiya fiya. ¹⁰ No baliday aho nodyapdis nyamo, hogsorat ha hayo to fag manga bagay, kaarakitay aho nomdasog is nyamo hayo, aho fawa ha fakampangon mahori ha

hayo gintam Fon nadisag hangko karigonan. Is Diyos nadisag hangko to fag karigonan kaarakitay manog-bong hayo, bohonwa hasagfadwat baliwa. ¹¹ Angko manga fadwasay, hogtogon ha hayo. Balistay lamang angko sorat kati. No baliday hayo fagsyaganon, ham fag mahogod, kaarakitay hayo manga ogali imbali hosto. Ham fag katanog angko manga togon ha hayo. Ham fag kasadi, fag mahoway yadi ha sadi ha sadi. No

kitonya, is Diyos, ka mahoway hanggan galwasi hayo, sawa hayo. ¹² Tam fag badbayaan ha sadi ha sadi tam nogladlagan. Intam manga fadwasay fagayo sas manga Tifonan gwas yadi hayo. ¹³ Ham nangos fag domog kitay, is Kiristo Hisos, kagfon intam, mahoway ha hayo, is Diyos galwasi hayo, hanggan ka Maliyaw fag Falad kasadi ha hayo fagayo fagayo.

GALASYA

1 Ahos Pablo kagsorat to fag sorat. Bonwa taw ka nafabali angko in Hisos Fandiya-Barita. Bonwa ya-di taw ka nafasayagdog angko hastay fag ibolon, dapat is Kiristo Hisos hanggan is Diyos intam Ama, ka nafaboyag ya hanya, ka nafabali angko it Fandiya-Barita. 2 To fag sorat gi yadintam manga fadwasay fagayo istay. Migsorat ha hayo fagayo san Diyos manga Tifonan sas sakop Galasya. 3 Ham nangos fag domog kitay is Diyos intam Ama hanggan is Kiristo Hisos, kagfon intam, mahoway ha hayo fagaba, hanggan igfalokmay yadi hayo manga fangayofan. 4 Kawa tam ha manga ogali dwat, is Kiristo Hisos nadisag it sadili haboyagan kaarakitay igbawi intam gis kadwatan kagsakop ka manga taw sas baba daga kati. In-anod kitonya maskin intam Diyos hanggan intam Ama wa kafangayofanan. 5 Yakanga fag han Diyos tam nogfasayagdog hanggan aban aban. Fag kitonya wa ngay. 6 Ho kadolaw wa dahol dahol igdog kitay, ham madalig dayo in Diyos, ka nafatawag hayo no nafalag ha hayo in Kiristo malooy fag kahowayan. Ginya kati ham igtalinga has sadi yak toltol, fiya yadi fag barita, hono. 7 Ka orongan idwa ha akwa Fiya fag Barita domwag, ka odi kitay tibak taw igfaadowan hayo, hanggan ta kasayag faoman ka Fiya fag Barita kawa han Kiristo. 8 Dapat ay, no ha mamaadal ha hayo, nodwa kito ka hyami nafaadal ha hayo Fiya fag Barita hyabi, fag is Diyos kagfadosa hanya mahori, nyawa hami halimbawa, nyawa sadik anghil gin Diyos banwanan sam tongod kagfaadal kitonya. 9 Mi dan wagfwayong ha hayo hanggan ho golit ya, no hagfaadal ha hayo, nodwa kito ka hayo natanggap Fiya fag Barita, fag is Diyos kagfadosa hanya mahori. 10 Aho noglwang kitonya, aho awkin kasaya kitay fag manga taw kagbaya angko, ngatay fag is Diyos kagbaya? Aho awkin kasaya kitay manga taw fag fasayagdog angko toltol, ham gayfan? No tonya di kangko fakasayaon, hodwan bali in Kiristo nasali sogowan. 11 Manga fadwasay, ho nangos kasayag fatohoyan hayo kitay, kangko nafwayong Fiya fag Barita bonwa fadahitan taw. 12 Bonwa taw ka nafadog angko ka Fiya fag Barita. Bonwa yadi taw ka nafaadal angka tonya. Is Kiristo Hisos wan ka nafatwagdog angko it Fiya fag Barita. 13 Ham fadi wadnadog angko manga ogali hyabi, aho no mahogod yapdig fasakop has manga ogali Hodyo. Gis nanya hyabi ho mahogod no naisog, hanggan talaga wa

nafadwat in Diyos manga Tifonan, no nasyagan di. 14 Hyabi ho bondi kitongko manga kasohodan Hodyo no katanog ka manga ogali Hodyo, kawa ho gwayan wa kasaya katanog intam manga magorang togon. 15 Dapat ay, is Diyos danwa nafili angko, nyawa hodyan sagaya hyabi, ginya madi, kawa malooy it kahowayan, hanya nafatohoyan angko kitay, aho fag imbalit fangibolon. 16 Ginya madis Diyos no nafatwagdog angko no faktat Anak, kaarakitay ho manoltol has manga Hintil ka Fiya fag Barita, kawa hat Anak, hodwa naintaw gis taw no kinday tonya. 17 Hodwa yadi gis banwa Hirosalim kaarakitay manabang has manga gona man angko nonbali Fandiya Barita. Ho nadagos man has sakop Arabya, ginya aban honfwali ya has banwa Damasko. 18 Ginya madi, aban ya, nonsagaya tolok fangaraw gingkon tiwala ginan, ho bago di has Hirosalim kaarakitay manabang in Pidro. Dowa dik simba hami da Pidro no nangilhodan. 19 Hodwa nalag tibak Fandiya Barita sinya no bohonwas Santyago intam Fon fadwasay. 20 Orongan wan fagayo kangko fwayong istay fag sorat. Is Diyos twa kitay hodwag bohag. 21 Ginya madi, aho no gis Hirosalim hyabi, aho hawas sakop Siriya hanggan sakop Silisya. 22 Gis nanya ka manga taw san Diyos manga Tifonan sas sakop Hodiya idyapdi kilala angko. 23 Dapat ta nadog kitay, ka gisog has taw hyabi, katin tiwala wan hanggan igbarita yadi has manga taw, nyawa hyabi hanyag laban wan, kaarakitay idwa ha taw katiwala in Kiristo, nomtwa di. 24 Yakanga tagfasayagdog in Diyos kawat naitbolon sangko.

2 Aban, nonsagaya safolo ya ha ofat ik fangaraw, hami da Barnabi inbangkad ya domwag has banwa Hirosalim. Mi nataban yadin Tito. 2 Maskin honfwali ya sadi ya ginan has Hirosalim, is Diyos nafatwagdog angko kitay, aho fag hanya ya. Mi nanoltolan has manga fagtahinan, masamanan wa gis fakaaywanan san Diyos Tifonan. Ho nafwayong fiya fiya has manga fagtahinan ka Fiya fag Barita kangko fagfaadalon has manga banwanan Hintil, maskin ho gwayan wagfaanogon angko ibolon, gis fagonan hanggan wa kati, ta nodwag faangay angko faadalon has taw. 3 Angko ofod gis nanyas Tito. Nyawa hanya sadik Girigo, ka manga fagtahinan idwa yadi napilit igfatoli hanya. 4 Tadwa hara gwas hanya baliwa, nonman ha akwa manga kasaya kitonya, kagfaniring kitay tantiwala

wan, igsoglatan has mangan tiwala, kaarakitay lomag no kinday tam nalfas gis ogali Hodyo, maskin tam insadi san Kiristo Hisos. Ta kasaya kitay, tam nangos fag fasakop yapdi has ogali Hodyo. ⁵ Dapat, midwa nafasakop hasta fasadan ngadi sadik ngalay, maskin mi kasaya kitay, ka Fiya fag Barita ka hayo fagtagapon, fag idwa ha aktom kadwa orongan. ⁶ Dapat kasta ngayanon ista manga fagdogan idwa yadi nafabohag angko fwayong. No kitay di, idwa ha kana sangko no fakta fag manga taw tonya, maskin is Diyos idwa ha fagfiliyon taw. ⁷ Yatokitay, ta natwa wagdog kawas Diyos nafili angko kaarakitay manoltol has manga Hintil ka Fiya fag Barita, kito yadis Diyos nogfili in Pidro, kaarakitay manoltol has manga Hodyo ka Fiya fag Barita. ⁸ No kinday is Diyos no nafabali in Pidro it Fandiya-Barita has manga Hodyo, kitonya yadis Diyos nafabali angko it Fandiya-Barita has manga Hintil. ⁹ Da Santyago da Pidro da Hwan, kasta manga fagdogan san Diyos Tifonan, no natwa wagdog kitay is Diyos ka nafatohoyan hangko danwa malayonan angko ibolonon, ta natanggap hyami da Barnabi, mi pariho wa fangibolon. Mi nanarangapan kitay hami has manga Hintil, taw has manga Hodyo no bomarita. ¹⁰ Ta nafwayong odi kitay, mi fag idwag fabayaan ka manga myabog fag manga Hodyo san Diyos Tifonan sas Hirusalim. Ho danwa kasayag togbong tonya fag manga taw. ¹¹ Is Pidro nonbangkad has banwa Antiyokya, sas sakop Siriya, ho nangabaya hanya sasta fagdogan, maskin matohoyanan idwa fiyat naibolon. ¹² Maskin in Santyago manga fakilalaon nodyan dasog, is Pidro igsayowan kwan has manga Hintil. Dapat, ta nonbangkad, is Pidro nafasamanon wan maskin kadala ka manga taw ka mahogod hasagfatoli baliwa. Yakangas Pidro idwag falagon kitay hanyag sayo has manga taw kadyan toli. ¹³ Tiba fag manga Hodyo katiwala sinyanafaniring yadin Pidro, inbali madalaon. Hanggan is Barnabi inhalag yadi wa kitonya. ¹⁴ Aho no nalag fiya fiya kasta manga ogali, kawa idwa maangay has Fiya fag Barita orongan, sasta fagdogan fagayo, ho nalwang han Pidro kitay, Itfagonan, haw no sadik Hodyo gogali ka ogali Hintil, ka bonwa ogali Hodyo, kinda araw haw no pomilit ka manga Hintil kitay, ta fag omogali ka manga ogali Hodyo? ¹⁵ No kitay di, hami manga Hodyo, maskin hyami manga hafofowan Hodyo yadi. Hami bohonwa kasta faglwangon manga Hintil ka gogali dwat. ¹⁶ Nyawa kitonya, hami twa wa kitay, manga taw no nangafiyan han Diyos, bonwa kawa ta manga Hodyo ka katanog ka Batasan Hodyo, dapat kawa ta nogsyag in Kiristo Hisos. Hamig syag yadin Kiristo Hisos, kaarakitay hami mangafiyan wa han Diyos, bohonwa kitay kawa mi no katanog ka Batasan Hodyo. ¹⁷ Yakanga hami manga Hodyo, no gwayan wa kasaya mangafiyan han Diyos, kawa mi nonsadi san Kiristo, ginya nonlag kitay, mi ha ogali yapdi dwat has

Batasan Hodyo baliwa, kitos manga Hintil, it kahologan awkin is Kiristo kagfasognod hyami has manga ogali dwat, ham gayfan? Balaw kitonya. ¹⁸ Aho nogfaganit ya ka Batasan Hodyo, kangko nadayo, kamlag kitay, ho ha ogali yapdi dwat, kagfatohoyan angko has kahatayan. ¹⁹ Yakanga, no hadis Batasan Hodyo baliwa, ho bilang wa mahatayan kati, maskin ka Batasan Hodyo mandi kagfatohoyan angko has kahatayan, kaarakitay ho kaboyag han Diyos wa malayon. Angko fangayofan dan intahin wa han Kiristo, hanya no natay sas nafatimbangan hayo. ²⁰ Yakanga bohonwa aho ka boyagan kati, dapat is Kiristo ka boyagan sangko. Kati angko fangayofan hanggan ogali giwan Diyos Anak, maskin hogsyag hanya. Hanya ka galwasi angko hanggan nadisag it haboyagan kaarakitay igbawi angko. ²¹ Nyawa kindawan hodwag fasigpala in Diyos malooy fag kahowayan. Maskin halimbawa, manga taw no nangafiyan han Diyos kawa no katanog ka Batasan Hodyo, in Kiristo kahatayan idwa ha kahologan.

3 Ham fiya fiya fag manga taga Galasya. Fakta ka nafaadowan hayo? Gwadi bilang wa hayo mata lagan ham no nadog no kinday is Kiristo Hisos no natay sas nafatimbangan hayo. ² Todi angko intaw ha hayo. Ham awkin natanggap in Diyos Falad kawa ham katanog ka Batasan Hodyo, ngatay kawa ham katiwala ka hayo natalingaka Fiya fag Barita? ³ Kana ham no kabali odi idagdog? In Diyos Falad ka hayo fagsyagon bago bago, dapat kati hayo odi ogali kabali hayo fagsyagon. ⁴ Hayo manga nadalanan idwa awkin ha kahologan? Gwadi ha kahologan wan. ⁵ Kanas Diyos no nadisag ha hayo it Falad hanggan naibolon manga fatimawa, ham gayfan? Kawa ham katanog awkin ka Batasan Hodyo, ngatay kawa ham no katiwala ka hayo donggon Fiya fag Barita? ⁶ Tam fag tohod in Abraham nadalanan hyabi. Ka Kasoratan iglwang kitay, Is Abraham igsyag han Diyos, yakangas Diyos nafatohoyan kitay is Abraham nangafiyan hanya. ⁷ No kitonya, tam twa wagdog kitay ka mangag syag in Diyos kati, tonya fag manga taw kan Abraham manga hasokfonan orongan. ⁸ Ka Kasoratan nagona wa nafwayong kitay, manga Hintil aban mangafiyan yadi han Diyos ta nogsyag hanya. Yakanga sas Kasoratan tam igdog no kinday is Diyos nafwayong ka Fiya fag Barita han Abraham no nalwang, Gi hyamo hasokfonan aban fagayo fag manga layonan taw bomaya wan. ⁹ Is Abraham igsyag in Diyos. Yakangas Diyos iglwang kitay, fagayo kagsyag hanya bomaya wan, kito yadin Abraham kagbaya wan, maskin nasyagin Diyos. ¹⁰ Fagayo fag manga taw kagsyag kitay ta mangafiyan wa han Diyos, maskin ta katanog ka Batasan Hodyo, imtohoyan has fadosaan, maskin ka Kasoratan iglwang, Nyawa faktaw kadwa katiwala hanggan katanog fagayo fagayo kansorat sas Batasan Hodyo, is Diyos mamatohoyan hanya has fadosaan. ¹¹ Yabay, katwa wagdog ki-

tay idwa ha taw nangafiyan han Diyos kawa no katanog ka Batasan Hodyo, maskin ka Kasoratan iglwang, Ka manga taw ka nangafiyan han Diyos maskin igsyag hanya, tonya lamang ka boyagan fagaba. ¹² No katanog ka Batasan Hodyo, hanggan nogsyag in Diyos, tonya fag dowak ogali idwa pariho. Kito man ka Kasoratan fwayong, Nyawa faktaw no gibolon fagayo ka Batasan Hodyo fagsagadon, ka Batasan Hodyo faboyag hanya. ¹³ Dapat ay, maskin is Kiristo natobos intam, hanyan tohoyan has fadosaan no natay sas nafatimbangan hayo, yakanga hanya nabawi intam gis fadosaan kantohoyan sas Batasan Hodyo. Kawa ka Kasoratan iglwang, Nyawa faktaw kasta nafahatay sas tongod hayo, tonyan Diyos nafatohoyan has fadosaan. ¹⁴ Is Kiristo natobos intam kitonya, kaarakitay ka kafiyan kan Diyos natogon it bato disagon han Abraham, fag imdasog yadi gin Kiristo Hisos has manga Hintil, hanggan tam tomanggap yadin Diyos Falad kat natogon bato disagon, tam nogsyag hanya. ¹⁵ Manga fadwasay, to ka sadik halimbawa tam fagaba waglag. No ha sadik taranggapan nwaya faktaw kantahin sinya, idwa mahimo nodwag fatonglos, idwa yadi mahimo igdogang has taranggapan, nyawa manga odi taw ka nanaranggapan. ¹⁶ Yabay is Diyos natogon it bato disagon han Abraham hanggan hat hasokfonan. Ka Kasoratan idwa yadi nafwayong, Hat manga hasokfonan. No manga hasokfonan, aywan kat fagwason. Dapat Ha hyamo hasokfonan, it kahologan sadi di, kawas Kiristo in Diyos fagwason in Abraham hasokfonan. ¹⁷ Kangko bato lwangon kiti, nonsagaya 430 fangaraw gin Abraham, is Diyos bago di nadisag has taw ka manga Batasan Hodyo. Dapat ka Batasan Hodyo idwag faoman in Diyos taranggapan han Abraham, idwa yadig faoman kitay is Diyos idwag fatonglos it taranggapan hanya. ¹⁸ Maskin in Diyos disag nomganit sas Batasan Hodyo, idwam ganit san Diyos bato disagon. Dapat is Diyos nadisag wa ngay it natogon han Abraham. ¹⁹ No kitonya mangharaw, kana ka Batasan Hodyo, it fakinabang, ham gayfan? Dogay in Abraham ginanan is Diyos nadisag ka Batasan Hodyo, kaarakitay igfatohoyan has taw no kana fag manga ogali ka dwat, no kandogay day in Abraham hasokfonan sadi, kan Diyos nagtogonan yadi, nodyan bangkad hastay is baba daga. Manga anghil nadisag ka Batasan Hodyo han Mwis, ginya madi hanya ka fagalan has taw. ²⁰ Dapat ka sadi di idwag fahasa ha fagalan, hanggan is Diyos sadi di. ²¹ No kitonya mangharaw, ka Batasan Hodyo iglaban awkin in Diyos natogon manga bato disagon has taw, ham gayfan? Balaw kitonya. Halimbawa, is Diyos no nadisag has taw sadik togon ka syagan igfaboyag manga taw, fagayo fag manga taw mangafiyan wa han Diyos no katanog tonya fag togon. ²² Dapat ka Kasoratan kagfatohoyan kitay, fagayo fag manga taw, sadik baba

daga, insakop has karigonan ogali dwat, kaarakitay is Diyos domisagit togon bato disagon has mangan tiwala maskin tagsyag in Kiristo Hisos. ²³ Dapat ay, hyabi hami manga Hodyo nodya twag syag in Kiristo Hisos, mi bilang wa mahofitan sas Batasan Hodyo, no kandogay day is Diyos nodyag falag hyami no kinday mi nogsyag in Kiristo Hisos. ²⁴ Yakanga ka Batasan Hodyo kagfasognod hyami, manga Hodyo, is Kiristo nodyan bangkad hastay, kaarakitay, is Kiristo nonbangkad, mi mangafiyanwa han Diyos kawa migsyag in Kiristo. ²⁵ Yabay kati fag kasohodan, manga taw fag syag in Kiristo, yakanga bonwa ka Batasan Hodyo kagfasognod hyami kati. ²⁶ Kawa ham, manga taga Galasya, igsyag yadin Kiristo, ham fagayo inbali in Diyos manga anak, hanggan isadi san Kiristo Hisos. ²⁷ Ham fagayo kantogna sa Kiristo, ginya wa ginan ham igtolad yadi hanya. ²⁸ Yakanga manga taw myasa wa kitonya no kasadi han Kiristo, nyawa Hodyo, nyawa Hintil, nyawasta sogowan, nyawa bonwasta sogowan, nwaya ama, nyawa ina, tam fagayo bilang sadi di, tam no myasa wansadi san Kiristo Hisos. ²⁹ Ham manga taga Galasya, ham non Kiristo sakop fag manga taw, ham in-aktom yadi han Abraham manga hasokfonan, ham tomanggap yadi in Diyos natogon it bato disagon.

4 To kangko bato Iwangon. Halimbawa, ista anak ka omafo it ama faobonan aban. Dapat hanya no anak yapdi idwa labi man it ama manga sogowan, nyawa hanya ka omafo fagayo aban. ² Maskin ista anak nodyan dahol, igtalinga yapdit ama manga fangibolon ka ganot anak afoon aban, no kandogay day kat ama nafatohoyan. ³ Kitonya yadi bangan hyabi, tam nodya twagdog ka fakaoronganan gin Diyos, ka manga Afo Daga igsakop intam. ⁴ Dapat nondasog gis nanya fag masohod kan Diyos nafatohoyan, is Diyos nasogo hastay, has baba daga, it sadili Anak, ha ina taw, hanggan igfasakop has manga Batasan Hodyo, ⁵ kaarakitay igfalfas ka manga Hodyo kagfasakop has manga Batasan Hodyo, hanggan igfabali hyami in Diyos wa manga anak. ⁶ Kaarakitay igfatohoyan kitay ham yadi, manga taga Galasya, ham in Diyos manga anak, is Diyos nadisag ha hayo it Anak Maliyaw fag Falad. Tonya fag Falad kagfasyagan intam igsyag han Diyos kiti, Mama, hyami Ama. ⁷ Yakanga kati, hanggan wa ham, ham bonwa manga sogowan dapat ham in Diyos wa manga anak. Maskin ham it manga wa anak, ham yadi ka omafo fagayo kan Diyos bato disagon hat manga anak. ⁸ Hyabi, ham idya nahilala in Diyos, yakanga ham inbali sogowan manga tiba karigonan, ka bonwa manga fagsyagon orongan. ⁹ Dapat kati, ham nahilala in Diyos, ngatay fiya man aho no lomwang kitay, kati is Diyos kilala wa hayo. Yakana ham no kafwali ya has manga magomo fag manga Afo Daga, kadwa yadi ha fakinabang? Kana mayon ham no

kasaya yagfasakop tonya manga bagay? ¹⁰ Ham gwayan wagfahalg manga sirang, manga magdanon, manga gis nanya fag manga masohod, hanggan manga tiba fag fangaraw. ¹¹ Ho gafalowan hayo, ho kadala ngandayo kangko nakayayan kawa ha hayo idwa ha fakinabang. ¹² Manga fadwasay, hogfaaronan ha hayo, ham fag tolad angko kitay ahodwag fasakop kati has manga Batasan Hodyo. Aho kito ka hayo, manga taga Galasya. Hyabi ham bonwa manga sakop Batasan Hodyo. Hyabi ham idwa nafahoriyan angko. ¹³ Ham fadi wadtwa kitay, ahogfaadal hayapdi hayo gis nanya ka Fiya fag Barita sangko swali gona, kawa aho ha fagdogon gis nanya. ¹⁴ Nyawa kitonya, ham idwan dwat iglag angko, Ham idwa yadig dayo angko, nyawa angko fagdogon mahori ha hayo. Ham natanggap di ngap angko kafiyaon, bilang in Diyos anghil ka hayo tanggapon, hanggan labi man inya, bilang was Kiristo Hisos. ¹⁵ Kana mayon hayo fangayofan non-oman kati? Aho natwa wagdog kitay hyabi, ham no nasyagan di, nyawa hayo sadili mata, ham naswat ginya nadisag wangko. ¹⁶ Kati ham awkin igfabali angko hayo kalaban maskin hogfwayong hayo ka orongan? ¹⁷ Ka kasayag faoman in Diyos Fiya fag Barita gwayan wa gafalo hayo, dapat kaodikitay ta ha fagalwasiyon idwa fiya. Ta kasaya igfaayayo hayo gingko, kaarakitay has taw baliwa ham nomdiya. ¹⁸ Ka gafalo has taw idwa dwat no kitay di, no fiya ista fakasayaon, nyawa bonwa aho kas nyamo hayo. ¹⁹ Angko fakabalon fag manga anak, no kandogay day in Kiristo fangayofan nodyan hosto sa hayo, aho sadi ya ginan igdog mahori sangko fangayofan, halimbawa, kito sina nogfasagaya anak. ²⁰ Kafiyaon nangos aho nos nyamo hayo kati, kaarakitay idwa maisog donggon angko hampang tam no kampanyan masayangowan, maskin masaliwawa wa dahol angko fangayofan kawa ha hayo ²¹ To kangko intaw ha hayo, ham ka kasayag fasakop has Batasan Hodyo. Ham idwa aw nadog ka Batasan Hodyo fwayong? ²² Insorat sinya kawas Abraham ha dowak anak ama, insadi inda Abraham sogowan di kat ina, dapat insadi, kawan Abraham wa babay, kat ina, bohonwa sogowan. ²³ Inda Abraham sogowan ina no gabosog hyabi, hanggan ganak, idwa ha madolaw. Dapat in Abraham babay idwa ha anak no bohonwas Diyos ka ha natogon it bato disagon han Abraham. ²⁴ To sadik halimbawa. Ka dowak ina igfahalimbawa dowak taranggapan. Is Agar igfahalimbawa ka taranggapan kanhalig sas Moyod Sinai, hanggan in Agar manga anak nonsagaya, inngayan yadi manga sogowan. ²⁵ Is Agar kagfatohoyan ka taranggapan sas moyod Sinai, sas sakop Arabya. Hanyag toladi yadi ka kati fag Hirosalim, hanggan it manga sakop fag manga taw kanbali manga sogowan fagayo. ²⁶ Dapat ka Hirosalim sas tongod bonwa sogowan. Hanya ka bilang intam wa ina. ²⁷ Maskin kiti in Diyos sorat fwayong, Haw ka ina kad-

wa ganak hyabi, Haw fag kasolong wan, Haw kadwa ha nagdogan masagit nogfasagaya anak, Haw fag rokyaw masolong, kawa omanak wan. Maskin nyawat indogan igfasigpalat babay, it anak aywan man Kat babay kagtahon fagabat indogan. ²⁸ Yabay, manga fadwasay, no kinday is Diyos nadisag han Abraham in Isaak, kawat tongon domisag, kitonya yadi tam nonbali in Diyos wa manga anak. ²⁹ No kinday hyabi ka anak kansagaya kito mandis nogbanwan nangawayan han Diyos Falad disag anak, kitonya mandi kati. ³⁰ Dapat kana ka Kasoratan fwayong? Faalinan ka sogowan ina hanggan wat anak, maskin ka anak sogowan idwa mahimo omafo ka bato faobonan has anak git babay ka bonwa sogowan. ³¹ Maskin ngay manga fadwasay, tam bonwasta sogowan hasokfonan, dapat tam gis ina ka bonwa sogowan.

5 Is Kiristo nafalfas intam kaarakitay tam bonwa manga odi sogowan. Gwadi ham fag idwa kabali sogowan domwag has manga togon ka hayo fagfasakopon hyabi. ² Kati ham fag talinga angko bato fwayongon ha hayo. Ahos Pablo kagfwayong ha hayo kitay, ham nogfatoli hayo, kaarakitay mangafiyan han Diyos, it kahologan in Kiristo naagwanta sas nafatimbangan hayo kawa ha hayo, idwa ha fakinabang. ³ Hogfatagak hayo fiya fiya, nyawa faktaw nogfatolit sadili, idwa maangay nodwa katanog ka manga togon fagayo fagayo sas Batasan Hodyo. ⁴ Ka manga taw sa hayo ka kasaya katanog ka Batasan Hodyo, kaarakitay mangafiyan han Diyos, tansaman gin Kiristo, hanggan in Diyos malooy fag kahowayan idwag dasog has taw. ⁵ Dapat kawa hami, in Diyos Falad kagfaasolop hyami, kawas Diyos mamatohoyan aban kitay, maskin migsyag in Kiristo, hami nangafiyan wa ha hanya. ⁶ Kawa tam nonsadi san Kiristo Hisos, idwa ha kinday, nyawa tam intoli, nyadwan, dapat ay, ka mahalga intam ogali fag falag kitay tam galwasi manga taw maskin tam igsyag in Kiristo. ⁷ No kitay di, hyabi, ham nogsyag in Kiristo, ham kalabi man has kafiyen baliwa. Fakta kagtoplan hayo kati, kaarakitay ham idwag fadagos has fakaoronganan. ⁸ Matohoyanan kagfaadowan hayo idwa gin Diyos ka nafatawag hayo. ⁹ Ngadi ogbot fag famadahol tinapay igfadahol sadi wak dahonya foholan harina. ¹⁰ Nyawa kitonya, angko fangayofan marigon yapdi kawa ha hayo. Maskin tam myasa wansadi santam Fon, ho twa wa kitay hayo fangayofan kito yadingko, hanggan no fakta fag taw kagfaadowan hayo, nyawa faktaw, is Diyos mamadosa hanya. ¹¹ Manga fadwasay, no kawa aho, aho no orongan igfaadal yapdi kitay fagayo fag imtoli, kana mayon ta nogfahoriyan yadingko hanggan wa kati, ham gayfan? Aho no orongan igfaadal kitonya, kangko fagfaadalon, kawan Kiristo kahatayan sas nafatimbangan hayo, idwa nangos inbali fasingyanan has taw. ¹² No sadingko, ka mangag faadowan hayo, fag bondi kitay

imtolli, fag imlosa wa nangos. ¹³ Dapat no kadi ham, angko manga fadwasay, is Diyos nafatawag hayo kaarakitay ham imbali mafalfasan fagaba, bonwa manga sogowan has Batasan Hodyo. Dapat ay, maskin tam mafalfasan, tam fag idwa gayfan kitay, fiya di nyawa tam katanog intam bali fangayofan masayaon. Yatokitay, maskin tam gadgalwasiyan, tam fag tarogbongan. ¹⁴ Kawa ka Batasan Hodyo, sadik dahonya, inngayan sa sadik sanglitan kitay, Haw fag galwasi im kapariho taw kito mandi haw no galwasi im sadili. ¹⁵ Dapat ham no bilang kitos manga hayopan karagatan hanggan igfadaddwatan ha sadi ha sadi, ham fag matagahan, ham mamin wa fadwat ka Tifonan. ¹⁶ Tongko fwayong ha hayo. Fag ka Maliyaw fag Falad kambali intam fagtahinan santam manga ogali. No kitonya, tam idwa katanog intam bali fangayofan masayaon. ¹⁷ Kawa ka bali fangayofan masayaon iglaban ka Maliyaw fag. Falad fakasayaon, hanggan ka Maliyaw fag Falad fakasayaon iglaban ka bali fangayofan masayaon. Iglabanan to fag dowa. No kitonya tam idwa syagan omibolon kantam fakasayaon. ¹⁸ No ka Maliyaw fag Falad kantam fagtahinan, bonwa ka Batasan Hodyo kagsakop intam. ¹⁹ Tam fadi wadaglag ka bali fangayofan masayaon manga ogali, kawa gogali dwat has ka taw, manga ogali sitam, idwa ha nahayan, ²⁰ mangag syag has iba karigonan, mangag fintas, mangag labanan, igfabarohagan, kabayong, gidgisogan, kabali masadiliyon, igfasarowayan, mangag daraogan, ²¹ manga kaid-ingliyan, manga kalango, mangag sagaya wa ngap kasolongan, ha akwa yadi tiba manga ogali kitonya. Hogfatagak hayo kito katfagonan, is Diyos idwa tomanggap hat sakop ka gogali kitonya. ²² Dapat ay, ka Maliyaw fag Falad no sawantam, kamlag santam ogali, bilang it bohad, kawa tam gadgalwasiyan, ha kasolongan, malokmay intam fangayofan, tam maagwantaon, mahoway, fiya intam ogali, maanod intam hampang, ²³ magop, igfasad yadintam sadili, nyawa kana. Idwa ha togon igbando to fag manga ogali. ²⁴ Tam ka mangan balin Kiristo Hisos fag manga taw, tam nafahatay sas nafatimbangan hayo intam sadili bali fangayofan masayaon, hanggan wat manga fakasayaon dwat. ²⁵ Ka Maliyaw fag Falad kagdisag haboyagan hantam kati, yakanga fag tonya kantam fagtalingaon hanggan fakatanogon. ²⁶ Tam fag idwa ha takan, fag idwag fasalagwa intam iba, fag idwa maingliyon.

6 Angko Manga fadwasay, tam no twa kitay sadik taw san Diyos Tifonan ha naogali dwat, fag ka katanog ka Maliyaw fag Falad kagfatobli hanya has fiya, dapat fag mahoway no kabaya. Fag matagahan

yadintam sadili ogali, kaarakitay tam idwa yadim loksowan has ogali dwat. ² Tam fag tarogbongan igdiya ka bilang ista manga fasanon. No kitonya tam katanog in Kiristo togon. ³ Nyawa faktaw no gayfan kitay hanya kasta fagbayaon, nyawa ka orongan hanya basta odi taw, igdaya odit sadili. ⁴ Tam fagayo fag gisip intam sadili ogali. No fiya intam ogali, tam igbaya wan. Tam fag idwag fatimbang intam ogali hasta ogali tiba taw, ⁵ maskin tam fagayo bahala wagdiya ka bilang intam sadili boklid. ⁶ Ka gadal in Diyos hampang fiya no homoray hasagfaadal hanya, manga bagay kat natanggap fiya gin Diyos. ⁷ Tam fag idwa gadayaan, maskin idwa ha taw syagan igdaya in Diyos. No kana kasta natanom, tonya mandi kat aniyon. ⁸ Tam nogtanom santam bali fangayofan masayaon fangiyaban, kahatayan kantam aniyon ginya. Dapat ay, tam nogtanom sas Maliyaw fag Falad fangiyaban, haboyagan kadwa ha katabowanan intam aniyon gis Maliyaw fag Falad. ⁹ Tam fag idwa yadi kabodlay no gogali fiya. Nomdasog gis nanya fag masohod aban, tam nodwam bodlay, tam ha aniyon kafiyaon. ¹⁰ Kawa kitonya, tam fag idwag fasigpala nyawa ginahin tam no ha lagan togbongan has taw, labi man hantam manga fadwasay kamtiwala. ¹¹ Ham iglag kitay dakdaholan ka manga ragit istay fag sorat, kangko gamat ka nasorat to. ¹² Ka manga kasayag pilit hayo fatoli hayo kasaya odig fatakagdog has taw kawa has manga bagay malagan. Ta kadala kitay, ta nogbarita in Kiristo kahatayan sas nafatimbangan hayo, manga Hodyo omisog hanya. ¹³ Nyawa ka mangag fatolit sadili idwa katanog ka Batasan Hodyo. Ta kasaya odig fatakagdog kitay, ham imtanog yadi to fag ogali sas baba anit, ham namtoli. ¹⁴ Dapat ay, no sadingko, in Kiristo Hisos kagfon intam it kahatayan lamang sas nafatimbangan hayo kangko fagbayaon. Maskin hanya natay sinya, ka manga oglali dwat istay is baba daga bilang odi mahatayan sangko, hanggan aho bilang yadi mahatayan no sas ogali dwat baliwa. ¹⁵ Idwa ha kana nyawa tam intoli, nyawadwan. Ka mahalga, is Diyos no nahalig intam fangayofan bago. ¹⁶ Fagayo ka kitonya yadit fangayofan hanggan ogali, hanggan fagayo kan Diyos nafili fag manga taw, fag domog kitay is Diyos kaawa hanya hanggan igfalokmay yadit fangayofan. ¹⁷ Tongko fwayongon goyan goyan. Gis kati ginan, nyawa faktaw, fag idwag fahoriyan angko domwag, maskin ka manga fakdat sangko baba anit ka bilang manga tandaan kagfatohoyan kitay, aho in Hisos nasali sogowan. ¹⁸ Angko manga fadwasay, ham nangos fag domog kitay, is Kiristo Hisos kagfon intam mahoway ha hayo fagaba. Fag kitonya wa ngay.

IFISO

1 Ahos Pablo kagsorat to fag sorat. Aho in Kiristo Hisos Fandiya Barita, kawa tonyan Diyos wa kafangayofanan. Hogsorat ha hayo sas banwa Ifiso, ka manggan sadi san Kiristo Hisos, katanog yadi hanya, ha hayo kantohoyan han Diyos. ² Ham nangos fag domog kitay is Diyos, intam Ama, hanggan is Kiristo Hisos kagfon intam mahoway ha hayo fagaba, hanggan igfalokmay hayo manga fangayofan. ³ Tam fag baya han Diyos, kan Kiristo Hisos, kagfon intam, it Diyos hanggan it Ama, kawa hangyag disag hantam fagayo fag manga fagbayaon has fangayofan baliwa, kito ka san Diyos banwanan sam tongod, maskin tam insadi san Kiristo. ⁴ Gi yapdis hyabi, ka daga nodyan halig, is Diyos danwa nafili intam san Kiristo Hisos, kaarakitay tam imbali maliyaw, idwa yadi ha fabangdanan san Diyos faglagan. Maskin is Diyos galwasi intam, ⁵ hanya danwa nafatohoyan kitay is Kiristo Hisos ka fabali intam in Diyos manga anak, kawan Diyos fakasayaon hanggan kafangayofanan kitonya wan. ⁶ Tam fag fasayagdog in Diyos, kawa hanya nafalag hantam it malooy fag kahowayan sat fagalwasiyon fag Anak. ⁷ In Kiristo folot kanwatwat kagfalfas intam, kitay tonya kagfaliyam intam manga ogali dwat. Maskin kitonya wak mahalga is Diyos no galwasi intam, ⁸ kitonya kat nafalag hantam. Maskin is Diyos madonong igligaw halimbawan, ⁹ nondasog gis nanya fag masohod kat nafatalaga, hanya nafatwagdog intam it kafangayofanan madolaw kadya nafadog has taw hyabi, kat nafatonglos san Kiristo. ¹⁰ To in Diyos kafangayofanan madolaw kitay, fagayo ka san Diyos banwanan sam tongod hanggan sas baba daga fag imsadi wan san Kiristo. ¹¹ Is Diyos ka bahala has fagayo fagayo fag manga bagay kaarakitay it sadili kafangayofanan fag im-anod wan, hanggan hami manga Hodyo kantiwala, kat nafili bago, kaarakitay imbalit sadili layonan fag manga taw. ¹² Yakanga, hami ka nagona nasyag in Kiristo, fag hami kagfalag has taw in Diyos kafiyan. ¹³ Ginya madi, ham manga Hintil, kitonya yadi, ham no nadog ka toltol orongan, ka Fiya fag Barita no kinday tam nombawi, ham nasyag yadin Kiristo, hanggan is Diyos nadisag hahayo ka Maliyaw fag Falad kitot natogon. Ka Maliyaw fag Falad santam in Diyos wa tandaan kitay tam it manga taw, ¹⁴ hanggan in Diyos disag gona kagfatohoyan hantam kitay aban, tamnombawi fiya fiya, tam tomanggap fagayo in Diyos nato-

gon bato disagon hat manga nafili, kaarakitay manga taw fasayagdog in Diyos kafiyan. ¹⁵ Yakanga, gi wangko nadog no kinday ham nogsyag in Hisos kagfon intam, hanggan no kinday ham no galwasi fagayo fag manga taw kantohoyan han Diyos, ¹⁶ ho fagaba wagbaya in Diyos aho nogdarangin kawa ha hayo. ¹⁷ Hogdarangin han Diyos, kan Kiristo Hisos kagfon intam it Diyos, hanggan intam Ama kagfon kafiyan, kitay, hanya fag domisag ha hayo manga fangayofan bago, manga fakatwawon hanggan falag ha hayo in Diyos; kaarakitay ham homilala hanya. ¹⁸ Sadi ya angko fagdaranginon kitay, hayo manga mata fangayofan fag imfoga yadi wan, kaarakitay ham lomag in Diyos yawa, ginya ham tomwa kitay is Diyos nafatawag intam ha sadik fagfanayaon matohoyanan, hanggan tomwa kitay, kafiyaon it manga madolaw fag manga kafiyan, kat natogon hat manga nafili. ¹⁹ Ham tomwa yadi kitay, in Diyos karigonan ka gibolon santam ka mangag syag hanya. Tonya yadit karigonan kadwa hat dayo domwag, ²⁰ ka nafaboyag ya in Kiristo, hanggan nafatokaw hanya san Diyos balis sihon, sat banwanan sam tongod. ²¹ Yakangas Kiristo kagsakop fagayo fag manga gorangon, fagayo ka ha manga kangayanan, fagayo ka ha manga karigonan, hanggan kasta manga fagtahinan. Bondi kati fag manga kashodan, dapat hanggan has aban, in Kiristo kangayanan abwat man has fagayo fagayo. ²² Is Diyos kagfasakop han Kiristo kangayanan fagayo fag manga bagay, hanggan nafabali hanya ka pinagka alfoyo hat Tifonan. ²³ In Diyos Tifonan in Kiristo wa habilogan. Ka alfoyo hanggan habilogan nomsarokfonan, imhosto wan ka sawat Tifonan fagayo fagayo sadi wak dahonya.

2 Hanggan ham manga Hintil, hyabi hayo manga fangayofan mahatayan wan, kawa ham igsway in Diyos, hanggan dwat hayo manga ogali. ² Gis nanya hyabi, ka manga ogali dwat istay is baba daga ka hayo fakatanogon, kawa ham igfasakop hasagfon kadwatan, kawa tahinan labang, kagfasognod fagayo fag manga taw kagsway in Diyos. ³ No kitay di, tam fagayo kitonya yadi hyabi, tam katanog intam bali fangayofan masayaon, no kana odintam sadili habilogan, ngatay fangayofan fakasayaon, ya tonya kantam naogali. Kito yadi ka tiba taw, tam hyabi in Diyos wa fakaisogon. ⁴ Dapat ay, kawas Diyos galwasi wa dahol dahol intam,

hanyan awa intam. ⁵ Yakanga, intam manga fangayofan no mahatayan yapdi hyabi, kawa tam igsway in Diyos, hanya nafatahin intam han Kiristo, nafaboyag yadintam. In Diyos malooy fag kahowayan ka nabawi intam. ⁶ Kawa tam insadi san Kiristo Hisos, tam intahin hanya, inboyag ya, hanggan tam intokaw san Diyos banwanan sam tongod. ⁷ Is Diyos naibolon kitonya kaarakitay fagaba falag aban kitay, idwa hat dayo domwag it malooy fag kahowayan hantam, kat nafalag hantam san Kiristo Hisos. ⁸ Maskin kawa tam igsyag in Diyos, it malooy fag kahowayan kagbawi intam. Bonwantam sadili ogali kagbawi intam. Yatokitay, in Diyos wa disag hantam kitay, tam fag imbawi wan. ⁹ Bonwantam sadili ogali kagbawi intam, kaarakitay tam, nyawa faktaw, idwag fatakagdog intam sadili kafiyan. ¹⁰ Tam in Diyos wa nahalig, hanggan it nafasadi san Kiristo Hisos, kaarakitay myasa wa fiya intam manga ogali hanggan ibolon. Gi yapdis hyabi hanya danwa nafatalaga hantam tonya fag manga ibolonon. ¹¹ Kawa hayo manga magorang manga Hintil, yakanga hyabi ka manga Hodyo igngayan hayo, manga idwan toli. Dapat manga Hodyog Iwang hanya ka mangan toli, kawa ta ha nabol ogbot gista manga habilogan. Ham manga Hintil, ham fag tohod no kinday ham no mabanwanan hyabi. ¹² Hyabi ham idyan sadi san Diyos-natogon-Famawi. Hyabi ham iba wa taw, idyan aktom san Israil fag layonan manga taw. Hyabi ham idwa ha tanggapon gis manga taranggapan kantohoyan kawas Diyos natogon has taw it manga bato disagon. Hyabi ham idwa ha fagfanayaon matohoyanan, idwa yadig syag in Diyos. ¹³ Hyabi, ham manga Hintil ayayo wa dahol gin Diyos, dapat ay, kati, in Kiristo kahatayan kagfaakbang hayo, kawa ham insadi sa hanya. ¹⁴ Is Kiristo kagfaamigosan intam, hami manga Hodyo, hanggan ham manga Hintil. Hanya no nadisag it sadili habilogan, no natay, ka nafabol ka faktaban ka hyabi igfasarowayan manga Hintil gis manga Hodyo, ka nafabol ka manga Hodyo hanggan Hintil bodbotangan sas isip. ¹⁵ Is Kiristo nafatolas ka Batasan Hodyo, ka ha manga togon aywan, hanggan manga bato ogaliyon, kaarakitay igfasadi sa hanya, ka dowak layonan taw, yakanga kahowayan ka bomahala hantam. ¹⁶ In Kiristo kahatayan sas nafatimbangan hayo ka nafabol ka faktaban, nafawali yadi fagayo dowak layonan han Diyos, nafasadi intam. ¹⁷ Hyabis Kiristo inbangkad hastay hanggan natoltol has fagayo ka kahowayan Fiya fag Barita, natoltol ha hayos manga Hintil ka hyabi ayayo gin Diyos, hanggan ha hyamis manga Hodyo ka danwa akbang hanya. ¹⁸ Kawas Kiristo naagwanta mahori, tam fagayo, nyawa manga Hodyo, nyawa manga Hintil, tam pariho gakbang hantam Ama, kawat Falad sadi di kagfasyagan intam. ¹⁹ Kawa kitonya, kati ham manga Hintil, ham bonwa iba taw, bonwa manga odi famaklay, dapat ay, ham pariho into-

hoyan han Diyos. Ham inaktom yadi han Diyos talanahan. ²⁰ Ham yadin halig sas balay kan-ganit sas fagriganon Fandiya-Barita, hanggan manga Fangampang, hanggan kagfaganit has fagayo fagayo kawas Kiristo Hisos. ²¹ Ka manga layonan sas balay sadik dahonya, nonsadi sa hanya insarokfonan, kaarakitay kabali in Diyos kafiyaon fag Fanimbaan-Dahol. ²² Ham manga Hintil, kawa ham insadi san Kiristo, ham kito yadi hyami, ka Maliyaw fag Falad fakaligon in Diyos oliyanan.

3 Kawa kitonya, ahog darangin han Diyos. Ahos Pablo, in Kiristo Hisos poriso kawa ha hayo manga Hintil. ² Ham fadi wadnadog kitay is Diyos, kawa malooy it kahowayan, nafatohoyan angko to fag ibolon kaarakitay tomogbong hayo. ³ Is Diyos nafatwagdog angko it kafangayofanan kadya nafadog has taw hyabi, kangko nafwayong sas sorat haraw. ⁴ Ham nogbasa angko sorat ham domog kitay aho natwa wagdog ka madolaw fag bagay kawa han Kiristo. ⁵ To fag bagay madolaw idya nafatwagdog has manga taw hyabi, dapat kati is Diyos iglwang kitay, it Falad fag fatwagdog tonya hat maliyaw fag manga Fandiya-Barita hanggan Fangampang. ⁶ To ka madolaw kadya nafatwagdog has taw hyabi kitay, kawa manga Hintil katiwala ka Fiya fag Barita, ta ha tanggapon yadi kafiyan, kito yadis manga Hodyo. Tanbali yadi manga layonan sa sadi dik habilogan sadi wak dahonya, intahin yadi han Diyos togon bato disagon kantonglos san Kiristo Hisos. ⁷ Maskin is Diyos mahoway wa dahol dahol, it karigonan nafabali angko it Fiya fag Barita fangibolon. ⁸ No kitay di, ka tiba taw kantohoyan han Diyos, bondi kitongko. Nyawa kitonya, is Diyos nafaangay kitay fag aho kagfadog has manga Hintil ka Fiya fag Barita kitay, intam fagbayaon san Kiristo idwa twa haminon. ⁹ Fadog yadi has fagayo fag manga taw no kanan Diyos kafangayofanan kadya nafatwagdog has taaw hyabi, hanggan no kinday tonya nomanod. Is Diyos ka nahalig fagayo fag manga bagay, dogay hyabi nafyalom yapdi has taw it bato ibolonon, ¹⁰ kaarakitay gi wat Tifonan hanya falag aban has manga gorangon hanggan has manga ha kangayanan san Diyos banwanan sam tongod, falag was taw it sadili manga kadonongan, bokod bokod, kadwa ha katabowanan. ¹¹ Is Diyos naibolon kitonya, kawa gi yapdis fabagowanan, tonya wat fasadan kitay, fatonglos it kafangayofanan san Kiristo Hisos kagfon intam. ¹² Maskin tam insadi san Kiristo hanggan igsyag hanya, tam idwa gadowan, idwa yadi kaya gakbang han Diyos. ¹³ Yakanga, hogfaaronganon ha hayo kitay, ham fag idwa kabalaw maskin tagfahoriyan angko kati, kawa hogtogbong hayo. Kangko fakahoriyon imbali hayo fakinabangon. ¹⁴ Kawa kitonya, hoglingkohodan wan san Diyos intam Ama atobangan. ¹⁵ Intam Ama sam tongod, kasta manga ama taw fagtoladon sas manga talanahan fagayo, nyawa san Diyos ban-

wanan sam tongod, nyawa sas baba daga. ¹⁶ Angko fagdaranginon kitay, git kafiyan kadwa twa haminon, hanya fag farigon nangos hayo manga fangayofan kawat Falad sawa hayo. ¹⁷ Is Kiristo fag maoliyanan sa hayo manga fangayofan fagaba, kawa ham igsyag hanya, kaarakitay ham, no bilang wagdalid abasad hanya, kawas Kiristo galwasi hayo, ¹⁸ ham kito yadi ka tiba kantohoyan han Diyos, ham tomwa wagdog kitay, idwa hat dayo domwag is Diyos no galwasi hayo. ¹⁹ Ala ngay, ham fag domog kitay is Diyos galwasi hayo, nonman ham idwa mamin domog it kafiyan, kaarakitay in Diyos kafiyan fagayo, fag sawa hayo manga fangayofan, sadi wak dahonya. ²⁰ Tam fag fasayagdog in Diyos ka syagan gibolon bondi kito kantam fagsagadon, ngatay fagisipon, kawadwa hat dayo domwag fag karigonan ka gibolon santam. ²¹ Tam fag fasayagdog fagaba in Diyos, hanggan aban aban, kawat Tifonan kansadi san Kiristo Hisos kagfalag it kafiyan. Fag kityona wa ngay.

4 Kawa kitonya, aho, kanporiso maskin ho gibolon kagfon intam it ibolon, hogfaaronanganon ha hayo kitay, ham fag gogali kito ka maangay han Diyos manga nafatawag. ² Tam fag idwa ha takan, fag mahoway hanggan maagwantaon fagaba. Tam fag falag has taw kitay tam gadgalwasiyan kawa tam idwa kahod-horiyan. ³ In Diyos Falad kagfasadi intam git kahowayan kagfogong intam. Pilitan intam manga fangayofan igfadagos kitonya. ⁴ In Kiristo habilogan sadi wak dahonya sadi di, hanggan it Falad sadi di, kito yadis Diyos no nafatawag intam kaarakitay sadi di intam fagfanayaon. ⁵ Sadi di kagfon intam. Sadi di intam fagsyagon. Sadi di it kahologan tam nogfatogna. ⁶ Sadi di is Diyos kantam Ama has fagayo. Hanya abwat man has fagayo, gibolon sas fagayo, hanggan sawas fagayo. ⁷ Dapat ay, giwat kaakwaan is Kiristo nafahafod hantam fagayo, igsadig sadi, it manga fakatwawon kat nafatalaga hantam, ⁸ yakanga ka Kasoratan igfwayong kitay, Hanya no nwali ham tongod im tongod, Aywan kat manga nataban hat banwanan, Nafahafod yadit manga disagon has taw. ⁹ (Kanat kahologan hanya no nwali ham tongod, ham gayfan? It kahologan hanya bago bago hawam dagas, daga daga, has Daga Salad. ¹⁰ Ka ginyas dagas, daga daga, tonya yadi ka nwali ham tongod im tongod, has dayo ya fag banwa kaarakitay it kafiyan fag sawat nahalig fagayo fagayo.) ¹¹ Hanya ka nadisag manga fagsyaganon has taw, kawa hanya nafabali tibat manga Fandiya-Barita, tibat manga Fangampang, tibat manga Famabotong manga taw, tibat manga Fangano Tifonan hanggan it manga Famaadal. ¹² Hanya naibolon kitonya kaarakitay fayayom fagayo kantohoyan hanya hasta bato ibolonon kaarakitay falangbat Tifonan. ¹³ Ginya madi, tam fagayo kasadi nogsyag hanggan kilala in Diyos Anak, hanggan intam manga fangayofan kabali hosto

kito yadin Kiristo fangayofan ka hosto wan. ¹⁴ No kitonya tam idwa kitos manga anak ka kadiya igdog has manga toltol idwa orongan. Tam idwa kitos sahayayan baba dagat, taob kagfatowang towang, hanggan bagyo odi kagdiya. Ka manga taw ka kasayag taban intam has idwa orongan, idwa syagan igfaadowan intam. ¹⁵ Yatokitay intam manga bibig hampang fag sonson wa orongan kawa tam gadgalwasiyan, kaarakitay tam ka labi wa has kafiyan baliwa, sas manga ogali fagayo, kabali fiya kito yadin Kiristo ka alfoyo sat Tifonan. ¹⁶ Is Kiristo kagfasadi it habilogan sadi wak dahonya, gis manga layonan kansarokfonan kitos manga halisan. Ginya madi, fagayo fag layonan nogfatonglos it ibolonon, ka habilogan sadi wak dahonya karigon hanggan kadahol, kawa ka manga layonan gadgalwasiyan wan. ¹⁷ Santam Fon ngayan, hogfaaronanganon ha hayo kitay ham fag idwa gogali domwag kito ka manga tibak Hintil, kat manga fagayfanon idwa ha kahologan, ¹⁸ tadwa yadi twagdog. Tadwan aktom han Diyos disag haboyagan maskin tadwa ha fakatwawon hanggan ista manga fangayofan maganit. ¹⁹ Tandiya has manga dwat fag kasolongan, hanggan ngadi ogbot idwa ha nahayan. Bokod bokod ista manga ogali ka fiya nangos fakayaon, igsagaya wa ogali. ²⁰ Dapat ay, idwa kitonya kantam fakatwawon kawa han Kiristo baliwa. ²¹ Tam fadi wadnadog kawa han Kiristo hanggan ha nafaadal hantam ka fakaoronganon ka san Hisos. ²² Yakanga tam fag dayo intam manga ogali dan. Fag dayo yadi intam manga ogali dan. Fag dayo yadi intam fangayofan dan, ka dwat kawag fasakop has bali fangayofan masayaon kagdaya intam. ²³ Intam manga fangayofan fag imbago wan sadi wak dahonya. ²⁴ Fag ka bago fag fangayofan kantam fagsolongon, ka fangayofan kanhalig igtolad in Diyos, kagfalag yadin Diyos kahaslongan hanggan kahalyawan, maskin giwas fakaoronganon. ²⁵ Yakanga, tam fag idwagbodbohagan. Fag sonson wa orongan intam manga hampang hantam manga fadwasay kawa tam myasa wa manga layonan san Kiristo habilogan. ²⁶ Tam nangos nom-isog, fag idwag fadasog has kasalanan. Bago dimsangday ka myanit, intam fangayofan fag imhoway ya. ²⁷ Tam fag idwa goyon in Fandaya. ²⁸ Kagnahaw hyabi fag idwag nahaw domwag, dapat fag maangay no gibolon kaarakitay lomag it sadili fangaboyagon, hanggan ha fagtogbongon has manga taw myabog. ²⁹ Nyawa ginahin tam fag idwa kampang dwat donggon. Tam fag fili intam manga hampang, fag kawa myasa wa fiya hanggan maangay gis nanya fag masohod, kaarakitay kagdog intam manga hampang ha fakinabang wan. ³⁰ Tam fag idwag farongkot in Diyos Maliyaw fag Falad, maskin hanyan Diyos tandaan santam, kagfatohoyan kitay tam in Diyos fag manga taw, gis nanya fag Sirang mahalga aban, is Diyos nogfalfas intam. ³¹ Tam fag idwag bodb-

otangan intam manga fakahoriyon ha sadi ha sadi. Fag idwa gidgisogan, manga kadwat iglag iba taw. Tam fag idwag haringgitan, fag idwag yod intam iba, fag idwa yadi gisip ka dwat. ³²Yatokitay, tam fag kabali mahoway hanggan maawaon ha sadi ha sadi, hanggan fag falidliyman ha sadi ha sadi intam manga fakahoriyon, kito yadis Diyos nogfaliyam intam manga naogali dwat, kawa tam insadi san Kiristo.

5 Kawa tam in Diyos wa manga fagalwasiyon fag manga anak, tam fag tolad hanya. ²Intam manga ogali hanggan ibolon fag falag kitay tam galwasi manga taw kito yadis Kiristo no galwasi intam, hanggan nadisag it haboyagan kawa hantam, sadik fangafiyhan Diyos, banglo hanya hanggan it fagbayaon. ³Kawa tam manga taw kantohoyan han Diyos, ngadi gwas, tam fag idwa gwas ka dwat has ka taw baliwa. Fag idwa gogali ka mahaya, fag idwa yadi kasaya kitonya. Kitonya fag manga toltolon idwa maangay santam. ⁴Kitonya yadi tam fag idwa kampang kadwa fiya donggon, fag idwag toltolan kadwa ha kahologan, hanggan fag idwa golit manga dwat fag hakot. Yatokitay, intam hampang fag baya in Diyos fagaba. ⁵Tam fadi wad twa kitay ka gogali dwat has ka taw baliwa, hanggan kadwa twa kaya, hanggan kasaya kitonya, idwam aktom san Diyos hanggan san Kiristo sakop, maskin it sadili fakasayaon dwat kat fagsyagon. ⁶Tam fag idwa gadayaan nyawa fakta fag taw kat manga katadlongan nodwa ha kahologan, maskin is Diyos kaisog has mangadwa katanog hanya kawa gogali kitonya. ⁷Yakanga tam fag idwa gamigos ka kitonya fag manga taw. ⁸Hyabi tam basad yapdi marom, dapat kati tam basad mayawa maskin tam insadi santam Fon. Yakanga tam fag gogali ka maangay has manga taw ka sas basad mayawa. ⁹Maskin ka yawa kagfabohad manga ogali fiya kitos kahowayan, kahaslongan hanggan fakaoronganan. ¹⁰Tam fag gadal no kana fag manga ogali ka maangay handtam Fon. ¹¹Tam fag idwa kadiya has manga ogali kadwa ha kahologan, ka manga taw basad marom it manga ogali. Yatokitay, tabanan ka manga taw has mayawa, fadogan ista manga ogali kadwa fiya. ¹²Mahaya wan ngadi gwas ista manga ogali mafyaloman. ¹³Fagayo no maladladan aban sas mayawa, imlag no kinday tonya, ngatay fiya ngatay idwan, ¹⁴maskin ka yawa kagfalag fiya fiya. Yakanga inlwang kitay, Haw ka matoyogan, haw fag kafolaw wan, Haw fag kabangon gis kahatayan, Ginya madis Kiristo fayawa hyamo. ¹⁵Yakanga tam fag matagahan no kinday intam ogali. Tam fag gogali kitos manga ha fakatwawon, idwa kitos manga paong paong. ¹⁶Tam fag idwag fasigpala nyawa ginahin tam no ha bato ogaliyon, ngatay ibolonon fiya, maskin kati fag manga masohod, dwat kasta manga ogali tiba taw istay sas baba daga. ¹⁷Tam fag idwag falamang, fag tomwa wagdog no kana kagfon intam it fasadan in-

tam ogaliyon. ¹⁸Tam fag idwag lango maskin tonya igfadwat odi intam manga ogali, yatokitay fag in Diyos wa Falad ka sawantam manga fangayofan sadi wak dahonya. ¹⁹Tam fag fadoddogan ha sadi ha sadi manga fwayong gin Diyos Sorat fag manga ambahan, gintam fangambahanan hanggan manga ambahan kagfarigon intam manga fangayofan. Tam fag gambahan, igfasayagdog intam Fon santam basad fangayofan. ²⁰Nyawa kana kantam nadalanan, tam fag baya fagaba in Diyos intam Ama, san Kiristo Hisos kagfon intam, it ngayan. ²¹Tam fag fasodsolonan ha sadi ha sadi kagfatohoyan kitay tam iggalang in Kiristo. ²²Ham manga ina, kasta manga babay, ham fag fasakop ha hayo manga sadili indogan, kito yadi nogfasakop hasagfon intam. ²³Maskin ka ama ka mamahalat babay, kito yadin Kiristo, hanya kagbahala hanggan igbawi it Tifonan, kan Kiristo habilogan sadi wak dahonya. ²⁴Yakanga no kinday ka Tifonan nogfasakop han Kiristo, ista manga babay fag kitonya yadi nogfasakop fiya fiya hat manga sadili indogan. ²⁵Ham man manga ama kasta manga indogan, ham fag galwasi hayo manga sadili babay, kito yadin Kiristo, hanya no galwasit Tifonan hanggan nadisag it haboyagan kawa ha hanya. ²⁶Is Kiristo naibolon kitonya kaarakitay igfahalyaw it Tifonan nontabo wagfalinay tonya sas danom hanggan sat hampang, ²⁷kaarakitay faakbang yadi hat sadili it Tifonan, maangay, fiya, idwa ha fawangdanan, kitos rotay kadwa ha tarongkoon, idwa ha firot, kafiyaon, kafiyaon. ²⁸Manga ama fag galwasi hayo sadili manga babay, kito yadi ham no galwasi hayo sadili habilogan. Ka ama no galwasit babay, galwasi yadit sadili. ²⁹Anod, idwa ha taw kadwat iglag it sadili habilogan. Yatokitay tam igfahwan intam sadili, hanggan gano intam manga habilogan, kito yadin Kiristo hanya no gano it Tifonan, ³⁰kawa tam manga layonan sat habilogan. ³¹Kito ka Kasoratan fwayong, Kawa kitonya, ka ama somaman git ama hanggan git ina, imsadi hat babay, ginya madi ka dow aimbali sadi di. ³²Sadik dahol fag fakaoronganan it fagfwayongon sas Kasoratan, kawa no kinday is Kiristo hat Tifonan. ³³Dapat hayadintam it bato lwangon kitay, fagayo fag manga ama fag galwasi it sadili manga babay, kito yadi hanya no galwasi it sadili, hanggan fagayo fag manga ina fag magalang hat manga indogan.

6 Ham manga anak, fag katanog hayo manga magorang fwayong, maskin tonya ka maangay, kawa ham igsyag hasagfon intam. ²Ka gona fag togon sas Batasan Hodyo, ka ha fasalamat tam no katanog, iglwang kiti, Fag magalang ham ama hanggan ham ina, ³kaarakitay haw lomag kahowayan, hanggan im haboyagan imdogay istay is baba daga. ⁴Ham man kasta manga magorang, fag idwag falabi ham no kabaya hayo manga anak kaarakitay ta aba idwag botang hayo naibolon. Dapat ay, fag kasahan di no

kabaya kitos mangan tiwala in Kiristo hanggan fag faadal ha hayo manga anak intam Fon manga togon. ⁵ Ham, kasta manga sogowan, ham fag katanog kagfasognod hayo istay is baba daga. Fag magalang, fag katanog, hanggan fag bilang was Kiristo kagfasognod hayo. ⁶ Fag bondi gis nanya ta no mabantayan, ham no gibolon kitonya kaarakitay ta fasayagdog hayo, dapat fag sadi wak fangayofan ham no gibolon in Diyos fakasayaon, kiton Kiristo fag manga sogowan. ⁷ Ham fag idwag fahafangon no gibolon, fag kasolong wan, kitos gibolon intam Fon ibolon, bilang bonwa basta taw kagfasognod hayo. ⁸ Tam fag tohod kitay kagfon intam gomanti fiya hantam fagayo, nyawa tam ista sogowan, nyawa bonwan, intam ibolon no fiya. ⁹ Ham yadi kagfasognod manga sogowan, hayo manga ogali fag fiya yadi. Ham fag idwag fadalagdog hayo manga sogowan. Ham fag tohod kitay san Diyos banwanan sam tongod, tonya yadi kagfasognod hayo hanggan kagfasognod hayo manga sogowan. Hanyadwa ha fagihidon taw. ¹⁰ Sas katabowanan tingko sorat, kawantam Fon Karigonan idwa ha bosal, hanggan tam insadi sa hanya, tam fag farigon intam manga fangayofan. ¹¹ Solongan in Diyos disag hantam manga sangkap fanaktak fagayo, kaarakitay tam idwa makfo is Fandaya no kasaya giktam intam. ¹² Maskin bonwa taw kantam kalaban, dapat manga dwat fag karigonan kadwa malagan sas fakayawan, ka manga gorangon ka ha manga kangayanan hanggan karigonan kagbahala kati sas sakop marom. ¹³ Yakanga tam fag solong in Diyos manga sangkap fanaktak kati. Ginya madi nyawa ginahin ka dwat nogtahod intam, tam idwa gadaogan intam kalaban sangkap, hanggan nyawa tam nalaban hanggan has katabowanan, tam idwam fwali has ginanan ngadi kabayan. ¹⁴ Yakanga tam fag malindogan matagahan. Tam fag mafagyahosan ka fakaoronganan. Solongan yadi ka kahaslongan ka

fanaktak sas dobdob. ¹⁵ Falapakan intam bitis kawa tam matalagan fomwayong ka Fiya fag Barita kagfaamigosan manga taw han Diyos. ¹⁶ Fag matawidan fagaba ka fanangga kawa tam igsyag in Kiristo, tonya ka fanaktak famahapsa has fagayo in Kadwatan manga famana gigang. ¹⁷ Tam solongan yadi ka sambalilo baol kawa tam inbawi, hanggan fag matawidan fagaba in Diyos Hampang ka bilang intam talibong, in Diyos Falad disag hantam. ¹⁸ Fag fagabag darangin igsagad in Diyos togbong tam nogsolong to fag manga fanaktak. Nyawa ginahin, fag in Diyos Falad kagfadonong intam igdarangin. Yakanga intam manga fangayofan fag fagaba mafolawan, fag idwag fagomon. Fag darangin fagaba kawa has fagayo fag manga taw kantohoyan han Diyos. ¹⁹ Fag darangin yadi kawa hangko kitay, aho no tomoltol has taw, is Diyos fomwayong hangko it bato fadogon has taw, kaarakitay ho tomoltol marigon hanggan fatwagdog has taw ka madolaw sas Fiya fag Barita, ka hyabi mafyaloman yapdi. ²⁰ Honbali in Diyos sogowan kaarakitay fadog has taw tonya, nyawa kati aho maporisowan. Ham fag darangin kitay, aho fag idwa kadala aho nogtoltol, maskin kitonya ka maangay. ²¹ Is Tikiko, intam fagbayaon fag fadwasay hanggan intam Fon matanogon fag sogowan, ka fadahit ha hayo no kinday angko lagan istay, kaarakitay ham tomwa aho no kinday kati. ²² Yakanga hogsogo hanya has nyamo hayo kaarakitay fadog ha hayo no kinday hami fagayo istay kati, hanggan farigon hayo manga fangayofan. ²³ Angko fagdaranginon kitay is Diyos intam Ama hanggan is Kiristo Hisos kagfon intam fag domisag ha hayo, ka tasayan, manga fangayofan malokmay, ka gadgalwasiyan hanggan igsyag ha hanya. ²⁴ Ham nanggog fag domog kitay, is Diyos mahoway has fagayo fag manga taw kadwa kaoman no galwasi in Kiristo Hisos kagfon intam.

FILIPOS

1 Ahos Pablo kagsorat has fagayo fag manga taw kantohoyan han Diyos sas banwa Filipos, hanggan has manga fagtahinan, manga fangibolon san Diyos Tifonan. To fag sorat gi yadin Timotiyo. Hami da Timotiyo, mi pariho in Kiristo Hisos nasali manga sogowan. 2 Ham nangos fag domog kitay, is Diyos intam Ama hanggan is Kiristo Hisos kagfon intam mahoway ha hayo fagaba, hanggan igfalokmay hayo manga fangayofan. 3 Nyawa ginahin aho nogtohod hayo, hogbaya in Diyos, kangko fagsyagon. 4 Hanggan nyawa ginahin aho nogdarangin kawa ha hayo, aho kasolong wan, 5 maskin hogtohod no kinday ham natogbong angko igfadog ka Fiya fag Barita has taw, gi yapdis hyabi gis nanya fag sirang tam no bago di nanladlagan hanggan wa kati. 6 Yakanga, ho twa matohoyanan kitay is Diyos, ka nafabago gibolon kitonyak fiya sa hayo manga fangayofan, hanya fadagos yapdi gibolon hanggan wamtabo it fakasayaon, gis nanya fag sirang is Kiristo Hisos nombangkad ya hastay. 7 Hogtohod hayo fagaba, yakanga maangay aho nogbaya kawa ha hayo, maskin ham fagayo igtogbong angko, aho nogfatonglos in Diyos nadisag angko to fag ibolonon malayonan. Nyawa hyabi aho no syagan yapdig sabang has iba banwanan, hanggan wa kati, aho no maporisowan, ham igtogbong yapdingko. 8 Is Diyos twag faorongan kitay ahodwag bohag aho noglwang kitay, aho kito yadin Kiristo Hisos no galwasi hayo. 9 Hogdarangin han Diyos kitay, ham fag fadagos kalabi wan no gadgalwasiyan, kaarakitay ham imdonong orongan hanggan twag fatohoyan no kana ka fiya. 10 Ginya madi ham twag fili no kana ka fiya man has fagayo fag manga ogali. No kitonya ham idwa ha aktom dwat sa hayo manga fangayofan, hanggan tadwa ha fagsogaton hayo gis nanya fag sirang aban is Kiristo nombangkad ya. 11 Hayo manga ogali imbali sonson wa maangay orongan, kawas Kiristo Hisos lamang ka syagan igfabali hayo kitonya, kaarakitay manga taw mamasayagdog in Diyos kafiyan. 12 Ho kasaya kitay ham, angko manga fadwasay, ham fag tomwa kitay kangko manga nadalanan natogbong hasagfahaskat ka Fiya fag Barita. 13 Kawangko manga nadalanan, ka manga sondalo kagbantay sas balay gorongan, hanggan ka manga tiba taw istay, ta fagayo natwa kitay ahon poriso kawa aho in Kiristo wa sogowan. 14 Hanggan ka fakaaywanan fag manga fadwasay labi wanrigon

nogsyag hantam Fon, yakanga, labi man inrigon yadig barita in Diyos hampang, idwa ha madala. 15 Anod ngay, tiba nogbarita kawa han Kiristo, kaingli odingko, kasaya odig daraogan sas hampang, dapat ay, tiba nogbarita kafiyaon it fakasayaon. 16 Ka manga fiya it fakasayaon igbarita kawa ta galwasingko, maskin ta natwa wagdog kitay, ahon poriso kawa ahog fadahit kitay ka Fiya fag Barita orongan wan. 17 Dapat ka tiba fag manga taw nogbarita kawa han Kiristo, idwa sonson wa fiya ista fakasayaon. Ta kasaya nangos, fag hanya kambantog, hanggan ta gayfan ta falabi wangko kahorihan aho no maporisowan istay kati. 18 Nyawa kindawan, hodwa kahori, hogbaya wa ngap. Ka fiya is Kiristo fag imbarita wa ngay, nyawa dwat, nyawa fiya kasta fakasayaon ta nogbarita. Hogfadagos yapdi kasolong, 19 maskin hogsyag kitay aho aba malfas ya gistay maskin ham igdarangin kawangko, hanggan in Kiristo Hisos Falad igtogbong yadi. 20 Angko fakasayaon bondi kito ka tiba, aho fag fatonglos fiya fiya angko bato ibolonon, hanggan nyawa ginahin, aho fag idwa madalaon, dapat labi man kati, kaarakitay manga taw noglag angko manga ogali fagayo, ta mamasayagdog in Diyos, nyawa aho boyagan yapdi, nyawa ta fahatay angko. 21 Kanat fakinabang tam no boyagan, ham gayfan? No sadingko, it fakinabang aho no kilala in Kiristo. Ginya madi aho no matay, labi man inyak fiya. 22 Dapat ay, aho no boyagan yapdistay, aho no syagan yapdig fadagos gibolon bondi kito katfagongan, hodwa twa no sida kangko fagfiliyon, ngatay haboyagan, ngatay kahatayan. 23 Dowa angko fakasayaon. Bago bago, ho fag malin gistay fag haboyagan, kaarakitay aho fag san Kiristo akbang, maskin tonya ka fiya wa dahol sangko. 24 Dapat ay, no has baliw angko isip, fiya man aho no boyagan yapdistay, kaarakitay tomogbong hayo. 25 Kawa kitonya ho twa kitay ho domogay yapdistay. Ho omofod yapdi hayo fagayo, kaarakitay tomogbong yapdi hayo mamadagos masolong nogsyag in Kiristo. 26 No kitonya, tam no mangofodan ya aban, ham labi man bomaya in Kiristo Hisos, kawa hogtogbong hayo haboyagan kansadi sa hanya. 27 Kati yabay, ka mahalga, hayo manga ogali fag maangay han Kiristo Fiya fag Barita fagsagadon. Ginya madi, no kitonya, nyawa ho syagan igsabang hayo, nyawadwan, ho domog kitay, ham idwag fagomon kawa hayo fangayofan sadi di, hanggan

hayo fakasayaon sadi di yadi kitay, ham igtarogbongan gibolon mahogod, kaarakitay manga taw igsyag han Kiristo no kinday ka maangay has manga taw ka katiwala ka Fiya fag Barita. ²⁸ Ham fag idwa kadala ka mangag fahoriyan hayo, hayo fangayofan fag marigon fagaba. Ginya madi, kagfahoriyan hayo tomwa waglag kitay tandaog wan, hanggan ham ka domaog is taw kawas Diyos kagfasyagan hayo domaog. ²⁹ Maskin is Diyos igfaangay kitay hanggan wa ham, ham fag gibolon in Kiristo ibolon, bondi kitay igsyag hanya, dapat gagwanta yadi mahori maskin galwasi hanya. ³⁰ Yabay kati, ham goyon angko, iglaban has toltol ka kasayag faoman ka Fiya fag Barita. Tonya yadi kangko faglabanon hyabi, hanggan ham igdog, angko faglabanon hanggan wa kati.

2 Maskin tam insadi san Kiristo, marigon intam manga fangayofan, hanggan tam idwa galabawan, maskin is Kiristo galwasi intam. Tam gamigosan han Kiristo Falad, hanggan tam mahowaya, kaawa ya ha sadi ha sadi. ² Maskin kitonya, gwadi ham fagfasolong wa dahol dahol igdog angko. Ham fag kasadi, fag gadgalwasiyan, fag sadi di hayo fangayofan. ³ Nyawa kana, tam fag idwa kasaya intam sadili odi fakinabang, ngatay kasaya odig fatakas taw. Yatokitay, tam fag fasodsolonan wan, fag gisip kitay iba taw ka fiya man intam. ⁴ Fag bohondi hantam sadili fakasayaon tam nogligaw halimbawan, fag hanggan has tiba taw. ⁵ Intam fangayofan fag libaba, kito yadin Kiristo Hisos, ⁶ Gi yapdis hyabi hyabi, is Kiristo Hisos Diyos yadi wan. Nyawa kitonya, hanyadwag pililit kitay it kangayanan fagsohod yadin Diyos kangayanan fagaba. ⁷ Yatokitay, hanya naobon yapdit kangayanan, natikis wa nafabalit sadili kito odis sogowan. Hanyan bali taw, kito yadin tam, pariho has iba taw no kalag di. ⁸ Hanya natikis wa nafalibabat kangayanan, inbali wa matanogon, hanggan wa has kahatayan, ala ngay, hanggan wat kahatayan sas nafatimbangan hayo. ⁹ Yakanga yabay, is Diyos nafaabwat in Hisos kangayanan abwat man has fagayo fagayo, idwa ha abwat man inya. Nafabali yadin Hisos ngayan mahalga man has iba ngayan fagayo fagayo, ¹⁰ Kaarakitay fagayo fagayo ka san Diyos banwanan sam tongod, hanggan ka sas baba daga, hanggan ka sas Daga Salad, Manlibabaan hanggan gomalang in Hisos. ¹¹ Ginya fagayo fagayo lomwang kitay, Is Kiristo Hisos kagfon intam fagayo fagayo, kaarakitay mamasayagdog in Diyos intam Ama. ¹² Maskin ngay, angko manga fakilalaon fiya fiya, kawa ham fagabag talinga angko, aho no gofod hayo hyabi, kati labi man ham fag talinga yapdingko fwayong, nyawa ahodwas nyamo hayo. Tam fag kadalag sway in Diyos, kafang gogali kadwa maangay ha hanya, hanggan katanog fagabat fwayong. No kitonya tam igfalag kitay, tam in Diyos nabawi fag manga taw, ¹³ maskin is Diyos ka gibolon fagaba san-

tam manga fangayofan, kaarakitay tam kasaya katanog hanggan syagan katanog it fakasayaon. ¹⁴ Nyawa kana fag bagay, tam fag idwag sarogatan, fag idwag daraogan, ¹⁵ kaarakitay manga taw idwa ha fabangdanan intam, sonson wa fiya intam ogali, kito ka maangay han Diyos manga anak kafiyaon, kagbanwanan istay sas baba daga sas fagbokngan fakaaywanan manga taw madayaon, kadwag fagomon gogali dwat. ¹⁶ Tam nogfadog has taw ka barita kagfaboyag intam, intam ogali fag yawa fiya fiya sasta fagbokngan, kitos fanggasan kagyawa sam tongod no yabi. Hayo ogali no kitonya, ho bomaya wa hayo aban san Kiristo kabangkadan fag sirang, maskin giwa hayo ogali imlag wa kitay, kangko naibolon hanggan syagan yapdi, bonwa fagfaanogonon. ¹⁷ Ham nogsyag in Kiristo, tonya ka hayo disag han Diyos. Twa man, ngatay ta fahatay angko aban, ginya madi angko folot nomwatwat, bilang wagdogang ha hayo disag han Diyos. No kitonya kam-anod, ho bomaya wan, hanggan hogfasolong yadigdog hayo fagayo. ¹⁸ Ham fag kitonya yadi, ham fag baya wan, fag fasolong yadigdog angko. ¹⁹ Is Hisos, kagfon intam nogfaangay, idya dogay aban, ho somogo nangos in Timotiyo has nyamo hayo, kaarakitay angko fangayofan imrigan ya, maskin ho kasaya domog no kinday ham is nyamo. ²⁰ Is Timotiyo sadi di ka ha fangayofan kitongko kitay, gafalo wa dahol hayo. ²¹ Tibak taw fagayo kalibang odit sadili manga fakasayaon, bonwan Kiristo ibolon it fagisipon. ²² Dapat ham fadi wadtwa in Timotiyo ogali kawa gofod angko, kitos anak no koyog it ama, mi nogtarogbongan gibolon kaarakitay manga taw domog ka Fiya fag Barita. ²³ Maskin ngay, hanya kangko sogoon has nyamo hayo, aho no domog no kinday kasta ibolonon hangko istay. ²⁴ Hogsyag yadi marigon hantam Fon kitay, ngalay wa aban aho wa nangos kambangkad has nyamo hayo. ²⁵ Ho naayfan kitay aho fag somogo ha hayo intam fadwasay is Ifapradito. Hanya ka hayo nasogo natogbong angko istay, angko yadi ofod fangibolon, hanggan fanlaban, mi nogfaaronganon has taw kitay, in Diyos Fiya fag Barita ka fakaoronganon. ²⁶ Is Ifapradito galwad hayo fagayo, hanggan inrongkot it fangayofan kawa ham nadog kitay hanya ha fagdogon. ²⁷ Orongan wansagit itfagongan, ganong wa natay. Dapat is Diyos in-awa hanya, hanggan bondis Ifapradito in Diyos fakaawaon, hanggan wa aho, is Diyos in-awa yadingko kaarakitay idwam abagat angko karongkotan. ²⁸ Maskin ngay ho kasayag faoli hanya has nyamo hayo kaarakitay ham igbaya waglag hanya, ginya madi angko karongkotan kawas Ifapradito nonsagit, imliyam wa balinya. ²⁹ Hanya no mwali has nyamo hayo, tanggapan ya hanya fiya fiya, fag baya hanya kawa hanya intam wa fadwasay santam Fon. Fag magalang has fagayo fag manga taw ka ha fangayofan kitan Ifapradito,

³⁰ maskin hanya ganong wa natay kaarakitay omibolon in Kiristo ibolon. Hanya naibolon kitonya kaarakitay manogbong angko nyawad bohonwa ham, kawa ham idwa syagan igtobgong angko gis nyamo.

3 Angko manga fadwasay, sas katabowanan tingko sorat, hogfatohod intam kitay, tam fag kasolong fagaba maskin tam insadi hasagfon intam. Hodwa kaya golit angko soraton ha hayo kati, hanggan fiya man ha hayo aho nogfatagak hayo. ² Ham fag matagahan ka manga taw kadwa fiya it ibolon, it ogali kito odis hayopan, ka manga ama ka garonganon kitay fag imlifong ogbot gista habilogan. ³ Bonwa tonya fag manga taw, dapat tam ka manga ha natanggap ogali hasagfatoli orongan, maskin tam idwag syag kitay tam nangafiyhan han Diyos kawa tam ha naogali santam labi anit. Tam ka manga ha tandaan orongan maskin in Diyos Falad kagfasyagan intam igfasayagdog in Diyos, hanggan tam igbaya fagaba kawa tam insadi san Kiristo Hisos. ⁴ No kitay di, aho no kasaya di, ho syagan digsyag kitay, ho mangafiyhan han Diyos aho nogfatonglos kitonya fag manga ogali. No ha taw gayfan kitay hanya nangafiyhan han Diyos kawag fatonglos manga ogali malagan, aho labi man, aywan man kangko nafatonglos ogali malagan. ⁵ Hyabi, aho no masagayan sadik simba, ta natoli angko. Angko manga magorang baliw baliw in Israil manga hasokfonan. Aho gin Binhamin fag layonan, hanggan angko manga hafofowan sonson wa manga Hibriyo. No hadis Batasan Hodyo baliwa, hyabi ho katanog fagayo fag manga togon Hodyo, kawa aho sadik Farisiyo. ⁶ Maskin ho mahogod no gibolon in Diyos ibolon, aho hanggan wa gisog in Diyos Tifonan. Ka manga taw ka gayfan kitay tam mangafiyhan han Diyos kawa tam no katanog ka Batasan Hodyo fwayong, tadwa ha oliton angko. ⁷ Dapat ay, kati, maskin is Kiristo lamang kangko fagsyagon, tonya fag manga ogali kangko manga fagfatakaon hyabi, hogdog idwa ha kahologan sangko kati. ⁸ Bondi tonya fag manga ogali kangko nangayan, hanggan fagayo angko manga ogali hyabi, hogfatimbang kitay idwa ha kahologan, maskin labi man mahalga man inya kangko fakasayaon, aho fag homilala in Kiristo Hisos, kagfon angko. Kawa ha hanya, ho nadayo wan angko fagfatakaon hyabi, kitos manga boga fag-okason, kaarakitay ho fag sa di ngan Kiristo gamat, fiya wan, ⁹ hanggan imsadi orongan ha hanya. Kati hodwa gayfan kitay aho nangafiyhan han Diyos maskin ho katanog ka Batasan Hodyo. Kati ho twa wa kitay, aho nangafiyhan han Diyos kawa hogsyag in Kiristo, yakangas Diyos igfatohoyan kitay aho nangafiyhan hanya. ¹⁰ Hodwa ha fakasayaon domwag no bonwa kitay, aho fag homilala wa fiya fiya in Kiristo, aho fag domog in Kiristo karigonan hanya nonboyag ya, katahin yadi sat fakahoriyon hanggan hat kahatayan. ¹¹ No kitonya hogsyag wa kitay, ahom ban-

gon yadi gis kahatayan aban. ¹² Hodwag lwang kitay ho nasyagan wan. Bonwa kitay angko ogali inbali wa hosto. Dapat ay, hodwag fagomon igdalandan kaarakitay ho omafo angko bato tanggapon, kan Kiristo Hisos natanggap kawa hangko, hanya no nadalandan hyabi. ¹³ Manga fadwasay, ka orongan, hodwa gayfan kitay ho nafatonglos tonya, dapat ay, sadi di kangko fagisipon, no bali day angko fagsyaganon, ho homogodan wan has fagonan, hodwam libang maayfanan ka hyabi. ¹⁴ Yakanga hogdalandan madagos has fagonan kaarakitay ho omafo angko bato tanggapon. To fag tanggapon ka haboyagan bago san Diyos banwanan sam tongod, kan Diyos fagfatawagan angko gin Kiristo Hisos. Tonya kangko fagisipon nangos. ¹⁵ Kitonya yadi nangos intam manga fangayofan fagayo, tam, ka mangan ganit santam Fon. No ha akwa tiba santam kadya kitonyat manga fangayofan, is Diyos mamatwagdog has taw tonya. ¹⁶ Nyawa kindawan, tam fag fadagos intam lahawan ogaliyon has fagonan, kito kantam fakatwawon balis kati. ¹⁷ Angko manga fadwasay, ham fagayo, ham fag tolad angko manga ogali. Ka hyami naogali sa hayo faglagan ka fiya hayo fagtoladon. Ham fag matohodan ka gogali kitonya. ¹⁸ Ho fagabag fwayong ha hayo hyabi, hanggan kati ho galowan wan no golit ha hayo kitay, aywan santam it manga ogali igfabali bilang idwa ha kahologan in Kiristo kahatayan sas nafatimbangan hayo. ¹⁹ Ka kitonyat ogali, hawas fadosaan it hadasogan, maskin it manga habilogan fakasayaon dwat ka bilang wat fagsimbaon. Tagfatakagdog it manga ogali ka fiya orongan it fakayaon. It fagayfanon ka odi ka manga tagastay is baba daga fagfagayfanon. ²⁰ Dapat ay tam, tam manga taga banwa sam tongod, maskin sinya wantam banwanan ka orongan. Tam gwayan waganayan intam Famawi, is Kiristo Hisos, kagfon intam, kambangkad ginya aban. ²¹ Hanya fabago intam manga magomo fag habilogan ka ha kahatayan, fabali kito yadi sadili habilogan kafiyaon, maskin hanya so-mangkap it kadonongan ka syagan igsakop fagayo fagayo fag manga bagay.

4 Maskin ngay, angko manga fadwasay kafiyaon, ham nogtohod angko togon fagayo ha hayo, hayo manga fangayofan kansadi santam Fon, fag imganit wan. Ham angko wa fakabalon, ho galwasi wa dahol hayo. Ham angko fagbayaon, hogfasayagdog has manga taw hayo manga ogali. ² Ham da Iyodiya da Sintiki, hogfaaronganon ha hayo, gwadi ham fag gamigosan wan, kawa ham myasa wansadi santam Fon. ³ Hanggan wa haw, angko ofod fangibolon kafiyaon, hogfwayong yadi ha hyamo, ha nangos togbongan to fag dowak ina, kaarakitay tadwa ha fagbotangan ha sadi ha sadi, maskin hyabi ta naofod inda Kiliminti, naibolon mahogod no natogbong angkog fahaskat ka Fiya fag Barita. Tonya fagayo angko manga

ofod fangibolon, it manga ngayan insorat san Diyos listahan kat nadisag haboyagan bago. ⁴ Tam fag kasolong fagaba kawa tam insadi santam Fon. Ho golit ya hayo, tam fag kasolong wan. ⁵ Fag mahoway intam ogali has fagayo fag manga taw. Kagfon intam kaakbang wan. ⁶ Tam fag idwa galibitan nyawa kana fag bagay, dapat, fag darangin, fag baya yadin Diyos tam nogsagad ka manga korang santam. ⁷ Ginya madi in Diyos kahowayan, kagsagaya intam nagdogan hyabi, ka omano intam manga fangayofan hanggan isip kansadi san Kiristo Hisos. ⁸ Angko katabowanan fag manga togon kito, angko manga fadwasay, tam fag fili intam fagayfanon. Fag ka lamang ka orongan, ka fiya, hanggar maslong kantam fagayfanon, ka manga maliyaw, magalang, kadwa ha aktom dwat, ka fiya fagbayaon, hanggan ka tam idwa kayag fadog has taw fag tonya lamang kantam fagayfanon. ⁹ Sadi ya, ka hayo natohodan angko manga togon, hanggan hayo lagan fagtoladon gingko manga hampan hanggan manga ogali, fag tonya wa ka hayo fagogalieron fagaba. Ginya madi Diyos kagfon kahowayan sawa hayo fagaba. ¹⁰ Kawa ahon sadi santam Fon, hogbaya wa dahol kitay sadi ya ginan ham nalag hayo halimbawan kaarakitay falag angko hayo kahowayan. Angko bato lwanon, bonwa kitay ham idwa mahoway angko fagaba, kakitay dogay ogbot ham idyag lag hayo halimbawan falag angko hayo kahowayan. ¹¹ Bonwa yadi kitay ho kalonos maskin hoglwang kitonya. Hodwag manaw, honyayom wan, nyawa dahoday sangko, fiya wan. ¹² Ho ha nadalanan yadi wan, nyawa korang, nyawag labi angko fakasayaon. Honyayom di nyawa kinday, hodwag manaw. Nyawa siday aho, nomtoon

napsog, nomtoon kalonos, nomtoon angko kwarta iglabi angko fakasayaon, nomtoon korang di. ¹³ Is Kiristo kagfarigon angko fagaba, yakanga ho syagan digfadagos nyawa kana kangko lagan. ¹⁴ Nyawa hoglwang kitonya, hogbaya wa dahol hayo kawa ham natogbong angko, aho no ha mahori. ¹⁵ Ham manga taga Filipos, ham fadi wadtwa kitay, aho no nalahaw gis sakop Masidonya hyabi, aho no fagabag toltol ka Fiya fag Barita sa hayo ligongan, ham lamang fag Tifonan ka naisip ka manga gastoson hanggan tanggapon kwarta. ¹⁶ Hyabi, aho no sas banwa Tisalonika, bondi sadi ginan ham nafadiya angko hayo kwarta, no korang angko sadili. ¹⁷ Bonwa kitay ho kasayag tanggap fagaba hayo manga disag. Kangko fakasayaon hayo nabotang san Diyos faglagan, fag kaaywan. ¹⁸ Toy wa toy fag sorat kati hogfatohoyan ha hayo kitay ho natanggap hayo disag fagayo, iglabi angko fakasayaon. Hodwa ha korang kati, maskin is Ifapradito natibo angko hayo manga disag fagayo, bilang sadik disag banglo han Diyos, kitos sinogba, maangay hanya hanggan it fagbayaon. ¹⁹ Hanggan angko Diyos fahosto ha hayo ka hayo manga kakorangan fagayo, git kaakwaan kadwa twa haminon, gin Kiristo Hisos. ²⁰ Tam fag fasayagdog intam Diyos kantam Ama hanggan aban aban. Fag kitonya wa ngay. ²¹ Ho gwas hayo, igsadig sadi, ka mangan tohoyan han Diyos, ka mangan sadi san Kiristo Hisos. Intam manga fadwasay istay gwas yadi hayo. ²² In Diyos fag manga taw fagayo istay, labi man ka manga gibolon sasta Gorongan fag Sisar balay, gwas yadi hayo. ²³ Ham nangos fag domog kitay, is Kiristo Hisos kagfon intam fagaba mahoway ha hayo fagayo.

KOLOSAS

1 Ahos Pablo kagsorat to fag sorat. Ahon bali in Kiristo Hisos Fandiya-Barita maskin in Diyos wa kafangayofanan kitonya. To fag sorat gi yadin Timotiyo intam fadwasay. ² Migsorat ha hayo ka mangan tohoyan han Diyos sas banwa Kolosas, ha hyami matanogon fag manga fadwasay kansadi yadi san Kiristo. Ham nangos fag domog kitay is Diyos intam Ama mahoway ha hayo fagaba, hanggan igfalokmay hayo manga fangayofan. ³ Hami nogdarangin kawa ha hayo, mi fagaba wagbaya in Diyos, kan Kiristo Hisos kagfon intam, it Ama, ⁴ maskin mi nadog kitay, ham igsyag in Kiristo Hisos, hanggan ham galwasi has fagayo fag manga taw kantohoyan han Diyos, ⁵ kawa ham ha fagfanayaon matalagaan ha hayo san Diyos banwanan sam tongod. Hyabi, ta no nafwayong ha hayo ka orongan wa Fiya fag Barita, ham nadog no kana kantam fagfanayaon. ⁶ Ka Fiya fag Barita kadahit kadayo kadayo, hanggan igfadasog yadi in Diyos kafiyan ha sadik baba daga kito yadi ka hayo lagan gi yapdis hyabi, gis nanya ham no bago di nadog kawa han Diyos malooy fag kahowayan, hanggan natwa waglag tonya sa hayo sadili nadalanan. ⁷ Is Ifapras, hyami fakawiliyon fag ofod sogowan, ka nafatwagdog ha hayo in Diyos malooy fag kahowayan. Hanyan Kiristo matanogon fag fangibolon ka hyami famarita is nyamo hayo. ⁸ Is Ifapras ka nafadog ha hyami kitay ham galwasi has manga taw, kawa ka Maliyaw fag Falad sawa hayo. ⁹ Maskin ngay, gi yapdis hyabi, mi no bago di nadog, kawa ha hayo, mi fagaba wagarangin. Hyami fagsagadon gin Diyos kitay, ham fag tomwa matohoyanan no kana kan Diyos kafangayofanan, hanggan fag ha akwa katonongan sa hayo manga fangayofan bago ka tomwa wagdog tonya. ¹⁰ Migdarangin yadi kitay ham nangos fag gogali kagfon intam it fakasayaon fagaba, hanggan imbalit fagbayaon. Hayo manga ogali bomohad yadi manga kafiyan bokod bokod, hanggan ham kalabi wa kilala in Diyos. ¹¹ Migdarangin yadi kitay, in Diyos kafiyaon fag karigonan fag faganit hayo manga fangayofan, kaarakitay ham idwag fagomon hanggan gagwanta yadi, nyawa kana ka hayo madalanan, ¹² kasolong yadi nobgaya intam Ama ka nafabali hayo fangayofan maangay, hanggan fiya tomanggap ka hayo afoon kan Diyos nafatalaga sat sakop kayawaan, kawa has manga taw kantohoyan hanya. ¹³ Is Diyos nabawi intam gis

sakop karigonan marom, hanggan igtaban yadintam hat fagalwasiyon fag Anak sakop. ¹⁴ It Anak kagfalfas intam, hanggan igfaliyam intam manga naogali dwat. ¹⁵ Is Kiristo no mabanwanan istay is baba daga hyabi, hanya nafalag hantam no kinday is Diyos kadwa malagan. Is Kiristo in Diyos anak gona, hanggan it kangayanan abwat man has fagayo fag manga bagay kanhalig. ¹⁶ Maskin hyabi hyabi, is Diyos nafahalig in Kiristo fagayo fag manga bagay sat banwanan sam tongod, hanggan ka manga bagay istay is baba daga, ka manga malagan hanggan kadwa malagan, manga gorangon, manga fon, manga ha kangayanan kadwa malagan, is Kiristo yadi ka nahalig tonya. Is Diyos nafahalig in Kiristo fagayo, sadi wak dahonya, kaarakitay fagayo mamasayagdog yadin Kiristo. ¹⁷ Is Kiristo danwa ha akwa hyabi, nyawa ka tiba bagay fagayo idyan halig. Hanya yadi kagfaganit fagayo fagayo no kinday ka maangay. ¹⁸ Hanya ka bilang alfoyo sat Tifonan, ka bilang wat habilogan. Hanya ka nafabagot Tifonan, hanya ka gonan boyag ya gis kahatayan, yakan-gat kangayanan abwat man has fagayo fagayo kat nahalig. ¹⁹ Maskin in Diyos sadili kafangayofanan kitay, no kinday is Diyos, it Anak fag kitonya yadi, sadi wak dahonya. ²⁰ Yakanga, gi wat Anak, in Diyos kafangayofanan fafwali ya hat sadili, sadi wak dahonya kat nahalig. Maskin it Anak folot in-olan, hanya no natay sas nafatimbangan hayo, is Diyos igfaangay kitay fagayo kanhalig, nyawa sas baba daga, nyawa san Diyos banwanan sam tongod, fag mangafiyan wa hanya. ²¹ Hyabi tam ayayo gin Diyos, hanggan tam it manga kalaban maskin dwat intam manga fangayofan hanggan ogali. ²² Dapat kati, maskin it Anak natay, kitos manga taw no katay, is Diyos igfabali intam it manga fakilalaon, kaarakitay fadasog intam aban hat atobangan, fiya, malinay, idwa ha fabangdanan ngadi ogbot. ²³ Tam fag fadagos kaganit no katiwala ka Fiya fag Barita. Tam fag idwam hawig gintam fagfanayaon, kantam nasyag tam no nadog ka Fiya fag Barita. Ahos Pablo inbalin Diyos sogowan kaarakitay fomwayong to fag Fiya fag Barita kantam nafadog has fagayo fag manga taw, sadi wak dahonya baba daga. ²⁴ Kati yabay hogbaya wan, maskin sangko fagdogon mahori ahog fadagos in Kiristo naagwanta hyabi kadyan tabo kawa hat Tifonan, ka kitay in Kiristo habilogan. ²⁵ Ahon bali ka Tifonan sogowan is Diyos no nafatohoyan angko to

fag ibolonon kaarakitay igfadog ha hayo it hampang. It nafaibolon angko kitay, aho fag fadog fiya fiya ha hayo in Diyos fagfwayongon, ²⁶ kadya nafadog nyawa haday fag manga taw gi yapdis hyabi hyabi, dapat kati is Diyos nafatwa wagdog tonya has manga taw kanto-hoyan hanya. ²⁷ In Diyos fasadan, hanya fatwagdog has fagayo fag manga taw to kat fagfwayongon madolaw, kadya nafadog has taw hyabi, fiya wa dahol dahol kitay, is Kiristo sawantam, yakanga tam ha fagfanayaon, kawa tam omofod yadin Diyos sat kayawaan aban. ²⁸ Kawa kitonya is Kiristo kantam fagaritaon has fagayo fag manga taw. No baliday hyami fagsyaganon, migfili ka manga hampang matwagdog hami nogfatagak hanggan igfaadal has taw kaarakitay igfadasog fagayo, igsadig sadi han Diyos atobangan, idwa ha korang, kawan sadi san Kiristo. ²⁹ Kaarakitay fatonglos tonya angko ibolonon, ho kogodan wan, nyawa mahori, kawan Kiristo disag karigonan, kagfasyagan angko.

2 Ho kasayag fwayong ha hayo kitay ho kogodan wan kaarakitay igtogbong hayo, hanggan in Diyos Tifonan sas banwa Laodisyia, hanggan fagayo kadya nahilala angko sas iba fag Tifonan. ² Ho kogodan kito kaarakitay ista manga fangayofan imrigan hanggan gadgalwasiyan ka bilang sadik fogong. No kitonya, ta tomwa wagdog fiya fiya kan Diyos idya nafatwagdog has taw hyabi, kawa ta kilala in Kiristo. ³ Is Kiristo lamang ka nafalag intam in Diyos katonongan hanggan it fakatwawon, ka bilang it kaakwaan ka hyabi matagowan yapdi. ⁴ Maskin ngay hogsorat ha hayo, ho kasayag fatagak hayo. Ham fag idwa gadayaan nyawa haday fag taw kagfwayong hayo manga toltol kadwa orongan, nyawa kinda wak fiya kadog. ⁵ Nyawa hodwas nyamo hayo, ho fagabag tohod hayo, yakanga angko fangayofan bilang wa gofod hayo. Hogbaya wagdog kitay ham idwa kaoman hanggan hayo manga fangayofan kaganit nogsyag in Kiristo. ⁶ Kawa tam natanggap kitay is Kiristo Hisos kagfon intam, intam fangayofan hanggan ogali fag fadagos kasadi hanya. ⁷ Intam manga fangayofan fag bilang wagdalid abasad san Kiristo fagaba. Intam manga ogali fag bilang yadintam fakaligon balay kanganit yadi hanya, hanggan fag karigon nogsyag hanya, kito kasta nafaadal hayo. Fag fagaba wagbaya in Kiristo. ⁸ Fag matagahan kitay ham idwam iktan sasta toltol kadwa ha fakinabang, igdaya ya ngadi, gi odis katonongan taw, idwa gin Kiristo. Gi odista hafofowanan adal tonya, gi odis manga afo daga. ⁹ Ham fag idwa kadiya igdog ka kitonya fag manga toltol maskin is Kiristo nonbali taw, in Diyos fangayofan sadi wak dahonya sa yapdi hanya, ¹⁰ hanggan hayo manga haboyagan in-bali hosto kawa ham insadi san Kiristo. Is Kiristo kagsakop yadi fagayo fag manga karigonan sas tongod hanggan sas baba daga. ¹¹ Kawa ham manga Hin-

til insadi san Kiristo, ham bilang wantoli yadi, dapat bonwa taw fag natoli, in Kiristo fag natoli, kagfalfas intam gintam bali fangayofan masayaon. ¹² Maskin tam nontogna, intam ogali gona bilang wantahin in Kiristo nonlobgob, hanggan tam intahin yadin Kiristo nonboyag ya, kawa tam igsyag in Diyos karigonan ka nafaboyag ya in Kiristo gis kahatayan. ¹³ Hyabi ham, manga Hintil, bilang mahatayan kawa dwat hayo manga ogali, hanggan ham idyag dog ka manga Batasan Hodyo. Dapat kati is Diyos nafaboyag hayo, gofodan in Kiristo. Is Diyos nafaliyam intam manga naogali dwat fagayo fagayo, ¹⁴ nadwat yadi ka kasoratan kagfathoyan intam manga bayadon ha hanya, hanggan nafaliyam ka ogali igsohot kantam bayadon, kagfadala intam hyabi. Tonya fag kasoratan, kagfathoyan intam bayadon han Diyos, bilang wanpako sas nafatimbangan hayo, yakangadwa ha kahologan kati. ¹⁵ Is Kiristo no natay sinya sas nafatimbangan hayo, hanya nalfas gis karigonan manga labang, manga afo daga kagbahalat sakop, ginya madis Kiristo nataban tonya fag manga labang, manga afo magafosan sasta faglagan, hanya noglahaw sasta fagonan ayo ayo, ta nogbaya hanya, kawa hanya nadaog it manga kalaban. ¹⁶ Kawa kitonya, fag idwa ha taw gato hayo has manga fanganon, ngatay inomom baliwa, has manga fagtohodon fag sirang, sas manga bangkad lati, nyawa sas sirang fahoway. ¹⁷ Hyabi, tonya fag manga bagay anino lamang manga bagay kadyan dasog hyabi, dapat ka orongan it afo, kawas Kiristo. ¹⁸ Ham fag idwa gadaogan nyawa faktaw kagfasalagwahayo maskin, hono, ha lagan madolaw, hanggan igfaarongan hayo kitay, ham fag falibaba hayo fangayofan, ka famalagon od has taw, hanggan fag has manga anghil nogfasayagdog. a kitonya fag manga taw basta odi taw, ista fangayofan, fangayofan odi taw, tagfadaholon odista sadili. ¹⁹ Ka kitonya fag manga taw fawag syag in Kiristo, ka bilang alfoyo hat Tifonan, ka bilang wat habilogan. Is Kiristo kagbahala it habilogan sadik dahonya, kagfarigon hanggan igfasadi it habilogan, kawa ha manga halisan hanggan manga ogat. Yakan-ga, no kinday in Diyos fasadan, it Tifonan, ka bilang in Kiristo habilogan sadi wak dahonya, kadahol wan. ²⁰ Is Kiristo no natay, intam bali fangayofan masayaon natay yadi wan, yakanga tam nalfas gis karigonan mang labang, manga afo kagbahalat sakop. Yabay, kana mayn ham nogfadagos yapdi hayo ogali kitos manga taw kastay yapdi fag baba daga fag sakop? Kana mayon ham nogfasakop yapdi has manga togon kitos, ²¹ Fag idwag boya to fag bagay, fag idwa kwan tyamo fag fanganon, fag idwag sapkid tonya fag bagay? ²² Tonya fag manga fagliyon fag manga bagay kaliyam di no namin wan. Taw odi kagtogon hanggan igfaadal kitonya. ²³ No kadog di, kagfwayong kitonya fag manga togon, madonong nga wan, ta nog-

faaronganon has taw kitay, fag fasayagdog has manga anghil. Tagfadogon odi has taw, ta noglwang kitay tadwa ha takan, hanggan ta nogtikis wagfahoriyan it sadili habilogan kaarakitay is Diyos nangos fag bomaya wastaw. Dapat tam no kasayag daog intam bali fangayofan masayaon, ka kitonya fag manga togon idwa tomogbong intam.

3 Tam yadi inboyag ya, intahin in Kiristo. Yakanga, fag ka manga bagay san Diyos banwanan sam tongod, kantam fagayfanon fagaba. Is Kiristo matokawan sinya san Diyos balis sihon. ² Tam fag fagaba maisipan han Diyos banwanan sam tongod, idwa has manga bagay istay is baba daga. ³ Maskin intam fangayofan dan natay wa a, dapat intam bago fag haboyagan intahin in Kiristo mabotangan san Diyos. ⁴ Is Kiristo kantam haboyagan bago, hanggan hanya nomlag aban, tam koyogan yadi hanya, ha horay yadin Kiristo kafiyan. ⁵ Kawa kitonya, tam fag faliyam intam bali fangayofan masayaon kagfatohod intam has ogali dwat has ka taw baliwa, kadwa ha nahayan, ka gogali dwat wa malayon hanggan ka maingliyon wa dahol. Ka manga maingliyon kitonya igsyag lamang has kaakwaan. ⁶ Maskin manga taw gogali kitonyak dwat, is Diyos omisog has manga taw kadwa katanog hanya. ⁷ Hyabi intam manga ogali kitonya yadi, intam bali fangayofan masayaon nogsakop yadpintam. ⁸ Dapat ay kati, tam fag dayo yadi to fag manga dwat fagayo, kitos kahori has taw, kaisog, kasaya gibolon dwat has tibataw. Intam bibig fag idwag yod has taw, hanggan tam fag idwa golit manga dwat fag hakot. ⁹ Tam fag idwag bodbohagan ha sadil ha sadil, kawa tam nadayo intam fangayofan dan ka gogali dwat, ¹⁰ hanggan tam natanggap ka bago fag fangayofan. Is Diyos ka nahalig tonyantam bago fag fangayofan, hanggan igfadagos igfabali bondi kito kat fagonan nogtolad hanya, kaarakitay tam homilala hanya fiya fiya. ¹¹ Yakanga, kati idwa ha fagihidon manga taw, nyawa manga Hintil, nyawa manga Hodyo, nyawan toli, nyawadwan, nyawa famaklay, nyawa ka manga matagowan yapdi basad moyod, nyawasta manga nasali sogowan, nyawa ka bonwasta sogowan, dapat ay, is Kiristo lamang ka mahalga, kawas Kiristo sawantam fagayo fagayo kansadi hanya. ¹² Tam kan Diyos manga fagalwasiyon hanggan it nafili kaarakitay imtohoan ha hanya. Yakanga intam manga ogali fag falag has taw kitay tam maawaon, mahoway, idwa ha takan, magop has taw, hanggan maagwantaon. ¹³ Tam fag idwa kahodhoriyan, hanggan no ginahin tam no ha fakahoriyan ha sadil ha sadil, tam fag falidliyaman wan. No kinday kagfon intam nogfaliyam intam manga naogali dwat, tam fag kitonya yadi. ¹⁴ Ginya madi ka fiya man has fagayo, tam fag gadgalwasiyan, ka bilang wa fogong kagfahosto intam, tam no kasadi santam Fon. ¹⁵ Fag in Kiristo disag hantam kahowayan kagbahala

santam manga fangayofan. Maskin ngay is Diyos igfaaronganon intam kitay, tam fag domog in Kiristo kahowayan kitonya, kaarakitay tam fagayo kabali sadil dik habilogan sadil wak dahonya. Tam fag baya yadin Diyos. ¹⁶ Ka Fiya fag Barita kawa han Kiristo, fag malangba santam manga fangayofan. Tam fag faadal hanggan igfatagak ha sadil ha sadil kantam natohodan. Tam fag baya in Diyos santam manga fangayofan tam no gambahan manga ambahan gin Diyos sorat, gis fangambahanan, hanggan tibak ambahan ka maangay has Falad Maliyaw. ¹⁷ Nyawa kana kantam hampang, ngatay fakamolon, fagayo fag san Hisos kagfon intam it ngayan, hanggan fagbaya in Diyos gin Hisos. ¹⁸ Ham kasta manga babay, ham fag fasakop ha hayo manga sadil indogan, maskin tonya wa ka maangay kawa ham in Kiristo fag manga taw. ¹⁹ Ham kasta manga indogan, fag galwasi hayo manga sadil babay, fag idwag fadaliyan hanya fagaba. ²⁰ Ham yadi manga anak, ham fag katanog hayo manga magorang fagaba, maskin tonya wa kan Diyos fagbayaon fag ogali, ham nonbalin Kiristo fag manga taw. ²¹ Ham, kasta manga magorang, fag kasahan di no kabaya hayo manga anak kaarakitay tadwam bway. ²² Ham, kasta manga sogowan, ham fag katanog kagfasognod hayo istay is baba daga, nyawa kana kasta sogo, bondi kitay kawa ta noglag hayo ibolon, yakanga ta bomaya wan, dapat fag katanog maskin ham idwa madaya, hanggan ham iggalang in Hisos intam Fon. ²³ Nyawa kana hayo ibolon, fag sadil wak dahonya hayo karigonan, fag bilang was Hisos kagfon intam kagfasognod hayo. ²⁴ Ham fag tohod kitay hayo ibolon no fiya hasagfasognod hayo istay is baba daga, is Hisos kagfon intam domisag ha hayo ka fasalamat kat nafatalaga has manga taw kagsyag hanya. Is Kiristo kagfasognod hayo orongan, ham it manga wa sogowan. ²⁵ Ka gogali dwat imdosa aban, maskin is Diyos idwa ha fagihidon taw.

4 Ham yadi kagfasognod manga sogowan, hayo ogali fag fiya yadi ha hayo mango sogowan. Ham fag idwag daya has taw. Ham fag tohod kitay kagfon hayo sam tongod igfasognod yadi hayo. ² Tam fag idwa kayayag darangin. Tam nogdarangin tam gaf maayfanan fiya fiya, hanggan fag baya han Diyos fagaba ³ Ham fag darangin yadi kawa ha hyami kitay, mi somyagan igtoltol nangos has taw ka madolaw kan Diyos idya nafadog has taw hyabi, kawa han Kiristo. Maskin hogtoltol kawa han Kiristo, ahon poriso wan. ⁴ Yakanga ham nangos fag darangin kitay, aho fag fiya nogtoltol kaarakitay ka mangag talinga tomwa yadigdog. ⁵ Fag fiya intam ogali has mangadyan tiwala. Nyawa ginahin tam no gofod has mangadyan tiwala, ta fag tomwa kitay tam intiwala in Kiristo. ⁶ Intam manga hampang fag sonson wa fiya kadog hanggan tam fag twag sagot maangay has taw, ta no gintaw in-

tam kaarakitay tamsaya wagdog. ⁷ Is Tikiko, hyami fakawiliyon fag fadwasay, fomwayong ha hayo fagayo kangko nadalanan. Is Tikiko sadik fangibolon matanogon, hanggan intam Fon sogowan ka gofod yadi hyami gibolon it ibolon. ⁸ Kawa kitonya, hanya kangko fagsogoon ha hayo kaarakitay farigon ya hayo manga fangayofan, nogfwayong ha hayo no kinday hami fagayo istay. ⁹ Is Onisimo omofod yadin Tikiko. Is Onisimo intam fadwasay matogbongon, gi yadis nyamo hayo. Da Tikiko da Onisimo fomwayong ha hayo fagayo ka hyami lagan istay. ¹⁰ Is Aristarko, ka maporisowan yadistay, gwas hayo, hanggan is Markos, in Barnabi insan, gwas yadi hayo. Ham nadog hyami togon kitay, ham fag magalang in Markos hanya nomdasog is nyamo hayo. ¹¹ Is Hoswi yadi, kasta fangngayanon is Hosto, gwas yadi hayo. To fag tolok ama kafiyaon nogtogbong angko. Tonya lamang ka manga Hodyo kantiwala ka gofod angko igtoltol kawa han Diyos sakop baliwa. ¹² Is Ifapras, sadi yak intiwala gis nyamo hayo, in Kiristo Hisos yadi sogowan, hanya gwas yadi hayo. Hanya fagabag darangin mahogod

kawa ha hayo. In Ifapras fagdaranginon han Diyos kitay, ham fag kaganit hantam Fon, hosto no katiwala, idwa yadi gadowan nogsyag hanya, hanggan fagaba katanog in Diyos kafangayofanan. ¹³ Hogfaorongon kitay, is Ifapras mahogod gibolon kaarakitay igtogbong hayo, hanggan ka manga taga banwa Laodisya, hanggan ka manga taga banwa Hiyarapolis. ¹⁴ Is Lokas, hyami fagbayaon fag famolongan, hanggan is Dimas, gwas yadi hayo. ¹⁵ Ham fag fadog yadi hantam manga fadwasay sas banwa Laodisya, hanggan han Ninfas, hanggan han Diyos Tifonan kagtifonan sat balay kitay, mi gwas yadis taw. ¹⁶ Ham nomtabo wagbasa to fag sorat, fabasaan yadi has Tifonan sas Laodisya. Ham fag basa yadi ka sorat ka manga fadwasay sas banwa Laodisya disagon ha hayo. ¹⁷ Ham fag fwayong han Arkipo kitay, fag fadagos kat natanggap ibolonon gis-agfon intam. ¹⁸ Angko sadili gamat kagsorat to fag manga hampang ha hayo, Ahos Pablo gwas hayo. Ham fag tohod kitay aho maporisowan yapdi. Ham nangos fag domog kitay, is Diyos mahoway ha hayo fagaba

1 TISALONIKA

¹ Ahos Pablo kagsorat ha hayo, hanggan to fag so-
rat gi yadinda Silas da Timotiyo. Migsorat ha hayo
fagayo ka san Diyos Tifonan sas banwa Tisalonika, ha
hayo kantohoyan han Diyos intam Ama, hanggan han
Kiristo Hisos kagfon intam. Ham nangos fag domog ki-
tay is Diyos mahoway ha hayo, hanggan igfalokmay
yadi hayo manga fangayofan fagaba. ² Mi fagabag
baya in Diyos kawa ha hayo hanggan nyawa ginahin
hami nogdarangin, ³ migfasalamat hantam Diyos
hanggan intam Ama kawa migtohod kitay, maskin
ham igsyag in Hisos, hayo ogali inbali fiya, hanggan
maskin ham galwasi hanya, ham gibolon mahogod in
Kiristo Hisos ibolon, ham gagwanta yadi, kawa hayo
fakasyagon is Kiristo Hisos kagfon intam. ⁴ Hyami
manga fadwasay, mi twa kitay is Diyos ka galwasi
hayo, nafili yadi hayo. ⁵ Kawa hami no natoltol ha hayo
ka Fiya fag Barita, ham bondi kitay nadog hyami ham-
pang, ham nalag yadi ka Maliyaw fag Falad manga
naibolon madolaw. Hami nafalag yadi ha hayo kitay,
midwa gadowan nogtoltol ha hayo, mi twa kitay in
Diyos Fiya fag Barita fakaoronganan wan. Tam hyabi
no gofodan is nyamo hayo, ham fadi wadnalag hyami
manga ogali. Ka hayo lagan igtogbong yadi hayo.
⁶ Ham natolad hyami ogali hanggan kagfon intam.
Ham no natanggap ka Fiya fag Barita, nyawa aywan
hayo donggon mahori, ka Maliyaw fag Falad nafaso-
long igdog hayo. ⁷ Yakanga fagayo kantiwala sas
sakop Masidonya hanggan sakop Akaya nalag sadik
fagtoladon fiya gi hayo manga ogali. ⁸ Bondi sinya sas
manga sakop Masidonya hanggan Akaya, ta no nadog
gi hayo ka toltol kawa hantam Fon, indog yadi sas
manga banwanan fagayo, kawa ham intiwala in Diyos,
kakitay, nyawa bonwa hami kagbarita kati, gi wa hayo,
ta nogdog. ⁹ Tonya fag manga taw fagayo igtoltolan ki-
tay ham natanggap hyami kafiyaon mi no gi hayo ban-
wanan, hanggan ham nadayo hayo manga fagsyagon
gona, kaarakitay igsyag in Diyos, ka boyagan hanggan
orongan fag Diyos, hanggan gibolon yadit ibolon,
¹⁰ hanggan igfanaya yadit Anak kabangkadan aban gin
Diyos banwanan sam tongod, kawas Hisos, kan Diyos
nafaboyag ya gis kahatayan. Is Hisos ka bomawi intam
aban, is Diyos nogfadosa manga taw kawa hanya
omisog ka manga gogali dwat.

² Hyami manga fadwasay, ham fadi wadtwa kitay,
hami nonbangkad has nyamo hayo hyabi, bonwa

kitay idwa ha kahologan. ² Ham twa wa kitay mi
nodyan dasog ha hayo sas banwa Tisalonika, ta nafa-
horiyan hanggan nafasidyowan odi hyami sas banwa
Filipos. Nyawa aywan kaglaban hyami toltol, is Diyos
nafarigon hyami fangayofan, kaarakitay midwa
kadalag toltol ha hayo ka Fiya fag Barita gin Diyos.
³ Hyami fagfaaronganonon ha hayo hyabi, midwag fa-
taglowan hayo, bonwa yadi kitay mi ha fakasayaon
kadwa fiya, midwa yadig falingo manga taw. ⁴ Yatoki-
tay ngap, no kinday in Diyos fakasayaon, kitonya mi
nogtoltol has taw, kawa hami in Diyos nagfatohoy-
anan kitay, hami ka bahala manoltol ka Fiya fag Barita.
Midwa kasaya kitay, fag manga taw kagbaya hyami.
Hyami fakasayaon fag is Diyos, kaglag hyami manga
basad fangayofan, fag hanya kagbaya waglag hyami
ibolon. ⁵ Ham fadi wadtwa hami nonbangkad has
nyamo hayo, midwa kampang igmanwali ha hayo, id-
wa yadi myasa wa masayagdog maskin ha bato
sagadon. Is Diyos iglag ka sa hyami basad fangayofan.
⁶ Midwag fahasa kitay nyawa ham, nyawa faktaw ma-
masayagdog hyami, ⁷ nyawa, no kitay di, kawa hami in
Kiristo manga Fandiya-Barita, idwa ha dwat mi no
gasolop hayo togbong. Dapat ay, mi nos nyamo hayo
hyabi, mi gafalo waglag hayo, kito was ina no gano it
anak dararag. ⁸ Maskin mi galwasi hayo, bondi ka Fiya
fag Barita ka hyami nahoray ha hayo, midwa yadi nah-
wangit hyami sadili haboyagan kaarakitay igtogbong
hayo. ⁹ Manga fadwasay, ham fadi wadag tohod kitay,
hami nangibolon hanggan wa kagayamonan yabi sir-
ang, kaarakitay ham, nyawa faktaw, idwam hori hyami
fanganon, hami nogtoltol ha hayo ka Fiya fag Barita
gin Diyos. ¹⁰ Ham twa wagfaorongan kitay hyami ogali
ha hayo, ka mangan tiwala sonson wa fiya, maangay,
hanggan ham idwa ha fabangdanan hyami. Is Diyos
twa yadig faorongan kitonya. ¹¹ Ham nalag kitay hami
bilang wa hayo ama fagayo. ¹² Mi gofod hayo, mig-
farigon hayo manga fangayofan, migfaaronganon
hayo kitay, hayo manga ogali fag maangay han Diyos
kagfatawag hayo, kaarakitay ham imaktom hat sakop
kafiyani. ¹³ Hyabi hami no natoltol ha hayo in Diyos
hampang, ham nanalinga hanggan natanggap kitay
ka hyami toltol bonwasta fadahit, dapat giwan Diyos
ka gibolon sa hayos mangam tiwala. Tonya ka sadi yak
bagay ka hyami fagbayaon han Diyos. ¹⁴ Manga fad-
wasay, ka hayo nadalanan kito yadi kan Diyos manga

Tifonan sas sakop Hodiya, ka manga taw kansadi san Kiristo Hisos, ista nadalanan sinya. Hayo manga kapariho nafahoriyan hayo, kito yadi ka manga Hodyo no nafahoriyan ka mangan tiwala sas sakop Hodiya. ¹⁵ Hyabi hyabi, manga Hodyo nafahatay in Diyos manga fangampang, ginya ta nafahatay yadin Hisos kagfon intam, hanggan wa kati tagfahoriyan hyami. Is Diyos kahori wa dahol tonya fag manga taw, ta gaway yadi manga taw fagayo. ¹⁶ Mi nogtolto ka Fiya fag Barita has manga Hintil kaarakitay manga Hintil imbawi yadi wan, ta kasayag balag hyami. Kawa mang kasalanan Hodyo gi yapdis hyabi iglabi wan, yakanga kati is Diyos idwa hat dayo domwag fag kaisog ka manga Hodyo. ¹⁷ Manga fadwasay, kati angko bato lwangon kitay hami no nalin gi hayo hyabi, mi galwad wa dahol hayo, mi kasaya wa dahol manabang hayo. Nyawa tam nanarowayan, tam bilang digladlagan. ¹⁸ Itfagonan no kitay di, ho kalahaw wa kalahaw has nyamo hayo, dapat hodwan lahaw, kawas Satanas natakta hyami. ¹⁹ Ho kasayag sabang hayo maskin ham kito ka tiba, ham yadi hyami fagasalopon, hyami fakasolongon, hyami falagon kitay, mi nafadagos hyami ibolon. Ham hyami famasayagdog san Hisos kagfon intam it faglagan, hanya nombangkad ya aban. ²⁰ Anod, ham ka hyami famalagon kitay, hyami ibolon fiya, hanggan ham ka hyami fakasolongon.

3 Ginya madi midwa gagwanta hami nodwag sabang hayo, yakanga mi gayfan hami da Silas fag imgoyan sas banwa Atinas, ² dapat mi nasogo ha hayo in Timotiyo, intam fadwasay, ka gofod yadi hyami gibolon in Diyos ibolon, hami nogtolto ka Fiya fag Barita kawa han Kiristo. Mi nasogo hanya kaarakitay marigon hayo manga fangayofan ham nogsyag hasagfon intam, ³ kaarakitay ngadi sadi sa hayo fag idwam bway kawa tagfahoriyan hayo. Ham fadi wadtwa kitay in Diyos kafangayofanan hantam idwag fabaybay fagayo ginan ta nogfahoriyan intam. ⁴ Kawa hami no gofod yapdi hayo hyabi, mi danwa nafatagak hayo kitay, tam domog mahori, hanggan ham fadi wadnalag kitay tonyan anod wan, ta nafahoriyan intam. ⁵ Maskin ngay, ahos Pablo, hodwa gagwanta ho nodwag sogo in Timotiyo has nyamo hayo. Yakanga ho nasogo hanya kaarakitay mi tomwa ngatay ham marigon yapdi nogsyag hantam Fon. Ho kadala kitay is Fanlaban ngatay nafaadowan hayo. No kitonya mi gwayan wagaanogon hyami nakayayan is nyamo hayo hyabi. ⁶ Dapat ay, kati is Timotiyo nwali wan a, nafadahit ha hyami kafiyaon fag barita kitay, ham igsyag yapdin Diyos hanggan ham gadgalwasiyan yadi. Nafwayong yadi ha hyami kitay, ham fagaba wa maowasan, igbaya hyami, hanggan ham galwad hyami kito yadi hyami, mi no galwad hayo. ⁷ Yakanga, manga fadwasay, nyawa mi sawas basad fakahoriyan kati, hyami fangayofan inrigon ya kawa ha hayo, kawa ham marigon nogsyag in

Kiristo, ⁸ hanggan minsaya yagdog kawa hayo manga haboyagan kansadi hasagfon intam, karigon sinya. ⁹ Kati idwa hat dayo domwag mi nogbaya intam Diyos kawa ha hayo. ¹⁰ Yabi sirang migdarangin mahogod kitay, hami nangos fag lomag ya hayo hanggan tomogbong hayo, kaarakitay idwa ha korang ham nogsyag in Kiristo. ¹¹ Hyami fagdaranginon kitay, intam Diyos hanggan Ama, hanggan is Hisos kagfon intam ka falag hyami halimbawan kaarakitay hami manabang has nyamo hayo. ¹² Kagfon intam fag fabali yadi hayo kalabi man no gadgalwasiyan ha sadi ha sadi, hanggan has fagayo fag manga taw, kito yadi hyami mi no galwasi hayo. ¹³ Farigon nangos hayo manga fangayofan, kaarakitay, is Hisos kagfon intam nombangkad ya aban, koyogan yadi hanya ka manga taw kantohoyan ha hanya, imlag kitay, ham maliyaw hanggan hosto santam Diyos hanggan Ama atobangan gis nanya.

4 Manga fadwasay, sas katabowanan tingko sorat, mi nafwayong ha hayo hyabi no kana fag manga ogali ka maangay, kaarakitay is Diyos igbaya intam, hanggan mi nadog kitay kitonya nga ngap ka hayo ogali. Kati, kawa hami in Hisos kagfon intam, it nasogo, migfaaronganon ha hayo mahogod kitay, fag bondi kitonyak fiya hayo manga ogali. ² Kawa ham fadi wadtwa kitay ka hyami fwayong ha hayo, in Hisos intam wa Fon togon. ³ In Diyos fakasayaon intam fangayofan fag maliyaw, hanggan tam fag domayo fagayo fag dwat fag kasolongan has ka taw baliwa. ⁴ Ka manga ama fagayo fag gofod maangay it sadili manga babay. It ogali hat babay fag fiya san Diyos faglagan, hanggan sas taw faglagan, ⁵ bohonwa kitay kasaya odi ina, kitos manga Hintil kadwa kilala in Diyos. ⁶ Nyawa fakta fag ama fag idwa ha kasalanan hasta babay baliwa. Fag idwag dayat fadwasay kantiwala sinya, fag idwag fabalaw ista fangayofan. Mi nafwayong ha hayo hyabi yapdi, mi danwa nafatagak hayo marigon kitay, kagfon intam mamadosa ka gibolon kitonya fag dwat. ⁷ Is Diyos nafatawag intam hanya, kaarakitay intam manga ogali fag kabali maliyaw has manga ina has manga ama baliwa, idwa has manga ogali dwat has ka taw. ⁸ Yakanga nyawa faktaw ka kafang igfasakop tonya fag togon, bonwa taw kat fagdayoon, dapat is Diyos kat fagdayoon kagdisag it Maliyaw fag Falad hantam. ⁹ No kitay di nyawa hodwag fatohod hayo no kadi has galwasi intam manga kapariho intiwala baliwa, kawas Diyos kagfaadal hayo no kinday ka maangay tam no gadgalwasiyan. ¹⁰ Kitonya wa ngay ka hayo naogali has manga fadwasay fagayo sas sakop Masi-donya sadi wak dahonya. Nyawa kitonya, manga fadwasay, migfaaronganon ha hayo kitay, ham fag kalabi man no galwasi has manga kapariho intiwala. ¹¹ No bali day hayo fagsyaganon, ham fag idwag faagran has taw, fag idwa mamawaton, fag sayak hayo sadili fangaboyagon kito ka hyami fwayong ha hayo hyabi.

¹² Hayo ogali no kitonya, ka mangadyan tiwala goma-lang hayo, hanggan ham idwag syag has iba taw hayo fangaboyagon. ¹³ Hyami manga fadwasay, kati bokod wan angko fagfwayongon, mi kasayag fatohoyan ha hayo no kinday orongan ka manga natay, kaarakitay ham idwam rongkot kito ka manga taw kadwa ha fagfanayaon aban. ¹⁴ Tam katiwala kitay is Hisos natay, ginyan boyag ya. Kitonya yadi ka manga danwan tiwala han Hisos ta no natay, is Diyos fatahin yadi han Hisos aban. ¹⁵ Kati hyami faadalon ha hayo, ka mandi kagfon intam, it nafaadal kitay, tam, ka manga boyagan yapdi gis nanya kagfon intam no kabangkad aban, idwa gomona has manga taw ka natay. ¹⁶ Gis nanya aban, ha fasognod marigon, ka fagtahinan anghil homampang yadi, ha omoni in Diyos bodyong, ginya madi kagfon intam mandi ka domokson gin Diyos banwanan sam tongod. Bago bago ka manga danwan tiwala in Kiristo ta no natay, tonyam bangon ya aban, boyagan, ¹⁷ ginya madi ka tam, ka boyagan yapdi gis nanya, tam im-anggong yadi koyogan has taw, ha sayo manga linyabo, kaarakitay tomagbo kagfon intam sam tongod. Ginya madi tam omofod hanya hanggan aban aban. ¹⁸ Yakanga fag fatohod hantam iba tonya fag manga hampang, kaarakitay igfarigon ha sadi ha sadi.

5 Manga fadwasay, nyawa hodwa manorat ha hayo no ginahin fag masohod to kangko manga naowas nom-anod aban, ² maskin tam fadi wadtwa kitay intam Fon kabangkadan fag Sirang no kadasog, idwa ha fatagak intam, kito yadis fangnahaw basad yabi idwag fatagak. ³ Aban, manga taw noglwang, Ogali wa kati, tam idwa ha fakadalaon, yatokitay gis nanya aban, sadi odi ginan, ka kahoriyan imdasog has taw, kitos ina kadwa twa no ginahin hanya no domog masagit kawa kasagayat anak, hanggan manga taw idwa yadi twag baybay tonya fag kahoriyan. ⁴ Dapat ay, tam, manga fadwasay, tam idwa basad marom, yakanga tonya fag Sirang nomdasog aban, tam idwam hinol kitos fangnahaw nogfahinol intam. ⁵ Maskin tam fagayo sakop mayawa, basad sirang. Tam bonwa sakop marom basad yabi. ⁶ Yakanga tam fag idwa matoyogan kito ka tiba, tam fag mafolawan fagaba, idwa kalango. ⁷ Fagaba yabi taw nogtoyog, fagaba yabi ta no kalango. ⁸ Dapat tam ka sakop sirang. Tam fag gisip fiya fagaba, fag idwa kitos kalango. Tam fag syag in Diyos hanggan galwasi hanya, ginya tam bilang wa ha fanaktak famana hantam dobdob, hanggan kawa tam ha fagfanayaon matohoyanan kitay, is Diyos bomawi

intam, ka bilang intam solong sambalilo baol, fanaktak sas alfoyo. ⁹ Is Diyos idwa nafili intam kaarakitay tam domog it kaisogan aban basad fadosaan, dapat hanya nafili intam kaarakitay is Kiristo Hisos kagfon intam bomawi intam. ¹⁰ Is Hisos natay kawa hantam kaarakitay, nyawa tam boyagan yapdi, hanya nombangkad ya, nyawa tam nagona wa natay, tam maofodan yadi hanya aban, boyagan. ¹¹ Yakanga ham fag fadagos igfarigon ha sadi ha sadi hanggan igtarogbongan, kito ka hayo ogali kati. ¹² Manga fadwasay, migfaaronganon ha hayo kitay ham fag galang in Diyos manga fangibolon is nyamo hayo, kito ka maangay. Ham fag galang ha hayo manga fagtahinan kagfaadal hayo has manga ogali ka maangay han Kiristo fag manga taw. ¹³ Ham fag galang hanggan gamigosan yadi ha hanya kawa ta nogfarigon hayo manga fangayofan. Ham fag gamigosan ha sadi ha sadi. ¹⁴ Manga fadwasay, migfaaronganon ha hayo kitay ham fag fwayong has manga mafang kitay, ta fag idwa kafang gibolon. Fag farigon ista manga fangayofan ka manga madalaon. Togbongan ka manga magomo. Ham fag idwag sagot mahori donggon nyawa haday fag taw. ¹⁵ Nyawa faktaw santam fag idwa ganti dwat, taw no nafahoriyan intam. Nyawa ginahin tam fag kasaya gogali ka mahoway has fagayo fag manga taw. ¹⁶ Tam fag kasolong fagaba, ¹⁷ fag fagabag darangin, ¹⁸ hanggan fag baya in Diyos nyawa kana kantam nadalanan. Ka kitonya fag manga ogali kan Diyos fakasayaon santam, kawa tam insadi san Kiristo Hisos. ¹⁹ Fag idwag toplan ka Maliyaw fag Falad ibolon. ²⁰ Tam fag idwag yod ista toltol ta noglwang kitay it toltol gis Falad Maliyaw. ²¹ Solayan fagayo fag manga bagay, fag katanog ka fiya, ²² fag domayo fagayo fag ogali kadwa maangay. ²³ Angko fagdaranginon kitay, fag is Diyos mandi kagdisag kahowayan, ka fabali intam manga fangayofan maliyaw, hanggan omano intam fangayofan, isip hanggan habilogan, kaarakitay tadwa ha fangangan intam, is Kiristo Hisos kagfon intam nombangkad ya hastay aban. ²⁴ Kagfatawag intam ha hanya idwa bohagon, yakanga hanyag fatonglos it togon hantam. ²⁵ Manga fadwasay, ham fag darangin yadi kawa ha hyami. ²⁶ Tam fag badbayaan ha sadi ha sadi tam nogladlagan, kawa tam tasayan wan san Kiristo. ²⁷ Hogfaaronganon ha hayo, kawa kagfon intam kagfasognod hyami, ham fag basa to fag sorat has fagayo katiwala in Kiristo is nyamo hayo. ²⁸ Ham nangos fag domog kitay, is Kiristo Hisos kagfon intam mahoway ha hayo fagaba.

2 TISALONIKA

1 Ahos Pablo kagsorat ha hayo, hanggan to fag sorat gi yadinda Silas Da Timotiyo. Migsorat ha hayo ka san Diyos Tifonan sas banwa Tisalonika, ha hayo kantohoyan han Diyos intam Ama, hanggan han Kiristo Hisos kagfon intam. ² Ham nangos fag domog kitay, is Diyos intam Ama hanggan is Kiristo Hisos kagfon intam mahoway ha hayo fagaba, hanggan igfalokmay yadi hayo manga fangayofan. ³ Hyami manga fadwasay, mi fagbaya in Diyos kawa ha hayo, nyawa ginahin. Maangay mi nogbaya kitonya kawa hayo fangayofan kalangba wan hasagsyag in Kiristo baliwa, hanggan ham kalabi wan no gadgalwasiyan. ⁴ Kawa kitonya migfasayagdog hayo manga ogali mi nogfadog han Diyos manga Tifonan iba kitay, ham idwag fagomon igsyag in Kiristo, hanggan ham gagwanta nyawa tagfahoriyan hayo hanggan aywan hayo fagdogon mahori. ⁵ Kawa ham idwag fagomon igfalag kitay is Diyos nogfahoriyan intam fagtangapon, fakafiyon wan. Yakangas Diyos lomwang ham maangay wamaktom hat sakop, maskin ham gagwanta mahori kati. ⁶ Is Diyos gomanti no kinday ka fiya. Hanya fahoriyan aban has manga taw kagfahoriyan hayo kati. ⁷ Hanya fahoway yadi hayo, ham kagdog mahori kati, hanggan fahoway yadi hyami. Is Diyos gomanti kitonya, is Hisos kagfon intam nomlag, no kabangkad gin Diyos banwanan sam tongod, ha hoyog yadit manga anghil ka syagan gibolon marigon. ⁸ Hanya nombangkad aban sas fagbokngan afoy gigang. Hanya mamadosa ka kafang kilala in Diyos hanggan kafang katanog ka Fiya fag Barita kawa han Hisos kagfon intam. ⁹ Kasta fadosaan aban idwa ha katabowanan fag kadwatan, saman yadi aban gisagfon intam. Tadwa yadi lomag it karigonan kafiyan. ¹⁰ Tonya fag fadosaan im-anod wan gis nanya fag Sirang mahalga, intam Fon nombangkad kaarakitay ka manga taw kantohoyan han Diyos masayagdog in Hisos, hanggan fagayo kantiwala gomalang yadi hanya gis nanya. Maskin ham intiwala ka hyami natoltol barita ha hayo, ham yadi im-aktom sinya fag manga taw ka masayagdog kagfon intam. ¹¹ Kawa kitonya, hami fagabag darangin kawa ha hayo. Hyami fagdaranginon han Diyos kitay, kawa hanya marigon, hanya fatonglos hayo manga fakasayaon fagayo has kafiyan baliwa, hanggan fatabo hayo manga ibolonon fagayo ka hayo manga bato ibolonon kawa ham igsyag hanya. ¹² Intam manga

ogali hanggan ibolon no kitonya, tam igfasayagdog in Hisos kagfon intam, hanggan hanya masayagdog yadintam. Imbali kitonya kawantam Diyos hanggan is Kiristo Hisos kagfon intam mahoway wa dahol dahol hantam.

2 Manga fadwasay, tam mafanayan odi no ginahin is Kiristo Hisos kagfon intam nombangkad hastay hanggan tam nomtifon yadi ha hanya. Dapat ay, hogfaaronganon ha hayo kitay, ² ham fag idwa gadowan hayo manga fangayofan. Fag idwa yadi kabalaw ham nogdog barita kitay, intam Fon kabangkadan fag Sirang, hono, indasog wan. Ngatay manga taw gayfan kitay, hami ka nalwang kitonya hami, no nafwayong in Diyos Falad bato lwangon, ngatay no natoltol in Diyos hampang, ngatay mi no nasant has taw. ³ Nyawa kindawan tam fag idwa gadayaan nyawa faktaw, kawa tam twa matohoyanan kitay tonya fag Sirang mahalga idyam dasog manga taw nodiyag tangkod hanggan iglaban fiya fiya in Diyos, ka goyan fag labanan, hanggan is Fanway kantohoyan has fadosaan nodiyon lag. ⁴ Gis nanya aban is Fanway ha habilogan taw, hanggan lomaban hasta manga fagsyagon, ista manga fagsimbaoon fagayo, hanggan igfaabwat yadit sadili kangayanon, abwat man has fagayo. Hanya somakbaw hanggan tomokaw ya ngadi san Diyos basad Fanimbaan-Dahol, lomwang kitay hanya wa ka Diyos. ⁵ Ham awkin idwag tohod kitay, ho danwa nafwayong ha hayo tonya fagayo, aho no sayapdi hayo? ⁶ Balis kati ha akwa yapdig taktak in Fanway. Ham twa wan no kana tonya. No ginahin fag masohod aban is Fanway imlag wan. ⁷ Is Fanway danwag faibolon ka madolaw fag kadwatan kati istay is baba daga, dapat kangko faglwangon idyam anod is Diyos nodiyag bol kagtaktak in Fanway. ⁸ Ginya madi is Fanway imlag wan, dapat ay, is Hisos kagfon intam nombangkad, it ipsaw fahatay in Fanway, hanggan ka masilaw sat atobangan domwat yadi hanya. ⁹ Aban is Satanas domisag it karigonan han Fanway. Is Fanway nombangkad, hanya fatimawa fagayo hanggan omibolon yadi manga falagon madolaw, dapat igfalingo odis taw. ¹⁰ In Fanway ogali dwat wa dahol maskin fagayo digfalingo ka manga taw ka has kadwatan, maskin tadwa kasayagdog, idwa yadig fahalga ka fakaoronganon kaarakitay tambawi. ¹¹ Yakangas Diyos igsoyo has taw ka karigonan kagfalingo is taw kaarakitay igdaya has

taw, yakanga ta katiwala kadwa orongan. ¹² Maskin kitonya fagayo kadwa katiwala ka fakaoronganan, dapat kawili manga ogali dwat, tonya fag manga taw fagayo imtohoyan has fadosaan. ¹³ Manga fadwasay, hami fag fagabag baya in Diyos kawa ha hayo. Ham in Diyos fagalwasiyon, maskin ham in Diyos nafili gona sinya, kaarakitay ham imbawi hanggan it Falad karigonan fabali hayo manga taw kantohoyan han Diyos, kawa ham igsyag has fakaoronganan. ¹⁴ Mi no natoltol ha hayo ka Fiya fag Barita hyabi, is Diyos nafatawag hayo kaarakitay ham imtohoyan hanya. Hanya nafatawag hayo kaarakitay ham domog yadi in Kiristo Hisos kagfon intam, it kafiyan. ¹⁵ Yakanga, manga fadwasay, fag idwag fagomon, hanggan fag karigon no katiwala ka hyami nafaadal ha hayo manga fakaoronganan, mi no natoltol ha hayo hanggan nasorat. ¹⁶ Is Kiristo Hisos kagfon intam, hanggan is Diyos intam Ama ka galwasi wa dahol intam, mahoway yadi hantam, hanggan igfarigon intam manga fangayofan, hanggan igfathoyan intam fagfanayaon. ¹⁷ Hanya fag farigon hanggan igfaganit yapdi intam manga fangayofan, kaarakitay intam manga ogali hanggan hampang fagaba maangay.

3 Manga fadwasay, kati katabowan angko sorat ha hayo. Ham nangos fag fadagos igdarangin kawa ha hyami kitay, in Diyos hampang madali wa maskat, hanggan aywan ka mamasayagdog kagfon intam, kito ka hayo. ² Ham fag darangin yadi kitay ka manga dwat wa dahol fag manga taw idwa nangos domaog hyami, maskin idya fagayo intiwala hasagfon intam. ³ Dapat kagfon intam idwag fabayaan intam. Hanya farigon intam manga fangayofan, idwa yadig faangay kitay ka dwat domaog intam. ⁴ Kagfon intam kagfarigon hyami manga fangayofan kawa ha hayo, mi twa kitay ham katanog hyami fwayong ha hayo, hanggan ham igfadagos hayo ogali kitonya. ⁵ Kagfon intam nangos falangba hayo manga fangayofan kaarakitay ham labi man domog kitay is Diyos galwasi hayo, hanggan is

Kiristo kagtogbong hayo gagwanta mahori, kito yadi hanya no naagwanta. ⁶ Manga fadwasay, maskin hami in Kiristo Hisos, kagfon intam, it manga sogowan, migfwayong ha hayo kitay, ham fag idwa maafod has manga taw ka mafang, kadwa katanog hyami manga togon has taw. ⁷ Ham fadi wadtwa kitay ka hyami ogali ka maangay yadi hayo fagtoladon. Hami idwa kafang gibolon, hami nos nyamo hayo hyabi. ⁸ Nyawa ginday fag taw, midwa natanggap fanganon mi nodwa nabayad. Yatokitay, mi gibolon hanggan wa kagayamonan, yabi sirang, kaarakitay ham idwa ha gastoson kawa ha hyami. ⁹ Bonwa kitay idwa fiya mi nogsyag hayo togbong, migtikis wa gibolon kitonya kaarakitay igfalag ha hayo fiya fagtoladon. ¹⁰ Mi no sayapdi hayo, to ka hyami togon ha hayo kitay, Fag idwag fahwan hanon nyawa fakta fag taw ka kafang gibolon.

¹¹ Migfwayong kitonya kawa mi ha donggon kitay is nyamo hono hayo, ha akwa manga taw mafang gibolon, fagabag mawat hasta ibolon tiba taw. ¹² Maskin hami in Kiristo Hisos, kagfon intam, it manga sogowan, migtogon hanggan igfaaronganon hanya fag manga taw mafang kitay, ista manga ogali fag maangay, hanggan ta fag gibolon wan kaarakitay lomag it sadili fangaboyagon. ¹³ Dapat ham, angko manga fakilalaon tiba, ham fag idwag fagomon gogali ka maangay. ¹⁴ Ngatay ha akwa taw sinya kadwa katanog hyami togon ha hayo istay fag sorat. Ham no danwa twa kitay tonya fag taw mafang, fag idwa maafod hanya kaarakitay hanya maya wan. ¹⁵ Dapat fag idwag fatimbang hanya intam kalaban, fag faadal hanya kitos fadwasay. ¹⁶ Nyawa kana ka hayo madalanan, kagfon yadi kahowayan kagfalokmay hayo manga fangayofan fagaba. Hanya fag sawa hayo fagayo. ¹⁷ Angko sadili gamat kagrirok to. Ahos Pablo ka gwas hayo. Kiti aho nogsorat angko ngayan sas katabowanan sangko fagfadiyaon sorat fagayo. ¹⁸ Ham nangos fag domog kitay kagfon intam, is Kiristo Hisos, fagaba mahoway ha hayo fagayo.

1 TIMOTIYO

1 Ahos Pablo kagsorat to fag sorat. Aho in Kiristo Hisos Fandiya Barita maskin tonyan Diyos, intam Famawi, hanggan in Kiristo Hisos, intam fagsyagon, fasognod. ² Hogsorat ha hyamo, Timotiyo. Haw bilang wangko anak orongan, kawa ho nafatiwala hyamo han Kiristo. Haw nangos fag domog kitay is Diyos intam Ama, hanggan is Kiristo Hisos kagfon intam, mahoway ha hyamo, kaawa hyamo, hanggan igfalokmay hyamo fangayofan fagaba. ³ Kito kangko nafwayong itfagongan, aho no kalahaw has sakop Masidonya, haw nangos fag is nyamo yapdis banwa Ifiso, kaarakitay bomando ka manga taw kagfaadal ka bonwa fakaorongan. ⁴ Ha fag bando has taw, fag idwag falibang tonya fag manga taw has manga lisbay, hanggan ista fatoga manga listahan hasokfonan kadwa taw haminon. To fag manga bagay igfatoga odis taw, idwa yadi syagan igtogbong is taw igfatonglos in Diyos halimbawan, maskin tadwag syag in Diyos. ⁵ Hogtogon hyamo kito kaarakitay haw fatohod has taw kitay, kawasta manga fangayofan inbali maangay, idwa yadi ha fakayaon domwag it naogali dwat hyabi, maskin nasoyo wan, hanggan igsyag orongan han Diyos, yakanga ta fag galwasi manga taw hanggan in Diyos. ⁶ Tiba taw natalang odi, igdaraogan kadwa ha kahologan. ⁷ Ta kasaya nangos ta fag imbali mangag faadal manga togon, nyawa tadwa natwagdog it fwayong. Ta nogfaadal, no kadog di, bilang wasta mata lagan, dapat tadwa twagdog it sadili fagfaadalon. ⁸ Dapat ay, tam twa wa kitay ka Batasan Hodyo kafiyaon, no fiya nogfwayong. ⁹ Tam twa wa kitay ka batasan idwag fatoon has fiya fag manga taw, dapat igfatoon kawa has mangag dayo manga togon, dayog fasakop, ka mangadwa katiwala han Diyos, ka gogali dwat, ka mangag fadwat igdog han Diyos, idwa kasayam bali fiya, ka mangag libon taw, nyawat ama, nyawat ina. ¹⁰ In Diyos togon igfatoon has manga gogali dwat has ka taw, has manga ama nogfabayowan has manga kapariho ama, has mangag pilit wagtaban manga taw, has manga bohagon, has mangag balibad nogfaorongan, hanggan nyawa hada fag taw kaglaban ka adal orongan. ¹¹ Ka adal orongan kawa ka Fiya fag Barita gis kafiyaon fag Diyos. Hanya ka nafabahala hangko it Fiya fag Barita kaarakitay hogfadog yadis taw. ¹² Highbaya in Kiristo Hisos kagfon intam, hanggan igdisag karigongan angko kaarakitay ho bomarita wan. Maskin hanya

ka naayfan kitay, maangay aho no kabali Fandiya Barita, yakanga nafili yadingko, kaarakitay hombali it fangibolon, ¹³ nyawa hyabi ho kampang igsway hanya, hanggan ho nafahoriyan hanggan naisog has taw. Dapat ay, is Diyos in-awa angko maskin aho nodya katiwala hanya hyabi, hodwa natwa kitay angko ibolon ngatay fiya, ngatay dwat. ¹⁴ Kagfon intam nadisag hangko mahogod it malooy fag kahowayan. Tonya fag kahowayan ka nafatiwala angko hanggan nafaalwasi angko han Diyos, hanggan has manga taw, kiton tam fagayo, kansadi san Kiristo Hisos. ¹⁵ Fandog ngay, fiya fagayo fag manga taw nogfaanod hanggan katiwala kitay, is Kiristo Hisos inbangkad wa hastay is baba daga, kaarakitay bomawi manga taw ka ha ogali dwat. Hanggan angko ogali ka dwat man has fagayo. ¹⁶ Dapat ay, is Diyos in-awangko, kaarakitay gi wangko nadalanan, is Kiristo Hisos falag has taw no kinday hanya maagwantaon wa dahol. Aho bilang sadik fagtoladon has mangag syag in Kiristo Hisos, kat manga fagdisagan ka haboyagan kadwa ha katabowanan. ¹⁷ Yabay, tam fag fasayagdog hanggan igfadaholon fagaba ka sadi dik Diyos, kadwa katay, kadwa kalag, kaghari hanggan aban aban. Fag kitonya wa ngay. ¹⁸ Timotiyo, angko anak, hogtogon ha hyamo to fag manga bagay, ka kito yadi kasta nagona nafwayong kawa ha hyamo hyabi. Tonya fiya wam fanlaban has dwat. ¹⁹ Haw fag syag yadi marigon han Kiristo, hanggan fag idwa ha fakayaon kam naogali dwat hyabi, maskin ha nasoyo wan. Ha akwa manga taw dayo igsoyo, nyawat fangayofan igfatohod it naogali dwat. Yakanga ta fawag syag in Diyos kati, bilang kitos sahayyan baba dagat kantoktok ha sayo bato. ²⁰ Da Himinyo da Alihandro in-aktom yadi sinya. Ho nadisag wa tonya fag dowak taw han Satanas, kaarakitay ta tomwa kitay, ta fag idwa kampang igsway han Diyos.

2 Bago bago, angko fagfaaronganonon ha hayo kitay, tam fadogan han Diyos intam manga fagsagadon, intam daranginon, intam fwayongon hanggan intam fagbayaon, kawa has fagayo fag manga taw. ² Kitonya yadi, tam fag darangin kawa has manga Gorangon, ka manga ha kangayanan fagayo, kaarakitay tam idwa ha mahori, mahoway di santam ligongan, intam ogali maangay yadi han Diyos, hanggan has manga taw. ³ No kitonya, fiya hanggan maangay san Diyos intam Famawi faglagan, ⁴ maskin, non

Diyos di fangayofan, fag fagayo wambawi hanggan tomwa wa fiya fiya ka fakaoronganan. ⁵ Maskin is Diyos sadi di, hanggan sadi di ka fagalan han Diyos, hanggan has manga taw, kawa ka taw, is Kiristo Hisos. ⁶ Hanya nadisag it haboyagan sadik fangafiyon kaarakitay tomobos has fagayo, yakanga gis nanya fag masohod kan Diyos nafatohoyan, is Kiristo Hisos nafalag kitay is Diyos kasayag bawi fagayo fag manga taw. ⁷ Yakangas Diyos nafili angko sadik Fandiya Barita ka manoltol hanggan igfaadal has manga Hintil kitay, to wa fakaoronganan wan, kaarakitay ta somyag in Diyos. Orongan wan, bohonwa bohag, angko nafwayong hyamo. ⁸ Angko fakasayaon, nyawa siday tam nogtifonan, fag manga ama kagdarangin, maangay it manga fangayofan, idwa ha fagbotangon, idwa ha fakahoriyon has taw. ⁹ Ka manga ina yadi, it manga rotay hanggan bok fag sadis fakafiyon. Kat fagsolongon dayag fag bohonwa manga ono bolawan, manga sangbaw siwayang dahol dahol, ngatay it rotay araw araw wagtobos. ¹⁰ Dapat ka bilang wat dayag, fag ha fiya fag ogali ka maangay has mangam tiwala han Diyos. ¹¹ Ka manga ina fag idya gawang gawang ta nogtoltol yapdi, fag fasakop fiya fiya. ¹² Hodyag faangay kitay ka manga ina mamaadal, ngatay mamahala has manga ama. Ka fiya, ka manga ina fag matalingan yap. ¹³ Tam fag tohod kawas Adan gona man inhalig bago dis Iba. ¹⁴ Bohonwas Adan, dapat is Iba ka nadaysa hanggan nasway in Diyos togon. ¹⁵ Dapat ay, ka inam bawi kawa nogfasagaya anak dararag, nodwa ha takan, ta nogsyag in Diyos, galwasi has manga taw, hanggan it fangayofan no maliyaw.

3 Taglwang kitay, ka kasayam bali fangano Tifonan danwa fiya it fakasayaon. Anod wa tonya. ² Yakanga manga taw fag idwa ha fagoliton ka fangano Tifonan. It babay fag sadi di, idwag falabi it sadili fakasayaon, madahan, magalang, mafasakbawon famaklay, fiya yadi nogfaadal has taw. ³ Fag idwag langgo, idwa yadi maisog, dapat fag mahoway, idwag faangran has manga taw, fag idwa fagaba maowasan has kwarta baliwa. ⁴ Hanya fag gano wa fiya fiya it sadili talanahan, hanggan it manga anak fag magalang hanggan katanog hanya. ⁵ Kinday sadik taw no omano in Diyos tifonan, ham gayfan, nodwa syagan gano it sadili talanahan. ⁶ Fag kawa dogay wantiwala ka kabali fangano in Diyos Tifonan. No ngalay yapdi, ngandayo imbali ha takan, ginya madi ka fadosaan kamtohoyan hanya, kito yadi kantohoyan han Fandaya. ⁷ Kadya manga maaktoman san Diyos Tifonan, ta fag idwa ha faglwanon ka gano in Diyos Tifonan. No kitonya tadwag fadwat igdog hanggan is Fandaya idwa omiktan hanya sat siyok. ⁸ Ka fiya, ka mangag togbong san Diyos Tifonan fag ka magalang, idwag maswag no kampang has taw, idwa kalawis has fakalangoon, idwa maingliyon has kwarta. ⁹ Fag kawa dan intiwala oron-

gan hantam madolaw fag fakatiwalaon, ka nafatwagdog lamang has mangan tiwala, ka mangadwa ha fakahawagon it naogali dwat hyabi. ¹⁰ Tam fag bantay yapdit ogali, tam noglag fiya ngay, tam bago di domisag it bato ibolonon. ¹¹ Kat manga babay fag fiya yadit ogali, idwa mafadwaton igdog, idwag falabit sadili fakasayaon, nyawa kanat ibolon myasa wa fiya. ¹² Kagtogbong san Diyos Tifonan, it babay fag sadi di, gano yadi fiya fiya it sadili talanahan, syagan yadig fatanog it manga anak. ¹³ Fagayo fag manga taw gomalang has gibolon han Diyos Tifonan hanya nogfadagos fiya it bato ibolonon. Marigon yadista fangayofan igfadog no kinday tam nogsyag in Diyos kawa tam no kasadi san Kiristo Hisos. ¹⁴ Hogsorat to fag manga togon ha hyamo, hanggan ho gwayan wa kasaya kitay tam fag ngalay wa manladlagan aban. ¹⁵ Dapat, halimbawa, aho nodyam dasog is nyamo madali, to fag sorat ka fatwagdog hyamo kan Diyos boyagan it talanahan ogaliyon fiya. San Diyos Tifonan, no fiya ista manga ogali ka bilang wa torok famaganit has fakaoronganan. ¹⁶ Ka manga fakaoronganan kantam fakatiwalaon madolaw wa dahol dahol kitay, Hanyan lag hastay nonbali taw, It Maliyaw fag Falad nafaorongnan yadi hanya, Ka manga anghil nalag hanya, Ta nabarita yadi hanya sadik baba daga. Sas fagayo fag banwanan, ha akwan tiwala hanya, Ginya madis Diyos natanggap ya hanya ham tongod.

4 Katwa wagdog fiya fiya ka Maliyaw fag Falad fwayong kitay has ginanan sirang tiba domayot fakatiwalaon. Tamtanog manga falad madaya hanggan manga adal yadi gis manga labang. ² Ha akwa aban mangag faadal bohagon, kat manga fangayofan ha tandaan kitay tonyan Fandaya manga nasali sogowan. Ta bomando kitay, ³ fag idwag talsawa. Ta bomando yadi tibak fanganon kan Diyos nahalig hanggan nafatalaga kitay, ka mangan tiwala, ka natwa wan ka fakaoronganan, fag baya in Diyos ta no kwan. ⁴ Fagayo kan Diyos nahalig fiya, yakanga tam idwa ha fagdayoon fag fanganon, dapat tam fag baya in Diyos nogtanggap ka fanganon, ⁵ maskin in Diyos hampang hanggan intam darangin kagfatohoyan kitay bohonwa fagliyon tonya. ⁶ Haw nogfaadal to fag manga togon hantam manga fadwasay, haw in Kiristo Hisos fiya fag fangibolon. No kandogay day haw nogfaadal yapdi intam fakatiwalaon, hanggan kawa adal orongan kam fakatanogon, im sadili fangayofan imrigan yadi. ⁷ Fag idwag falibang hyamo has manga toltol magorang kadwa ha kahologan. Yatokitay, haw fag fayayom hyamo has fiya. ⁸ Ha fakinabang ongay tam nogfayayom igfarigon intam habilogan. Dapat ay, bohondi kitonyak fiya ka fakinabang nogfayayom intam fangayofan has fiya, maskin is Diyos ha togon it bato disagon, bohondi ti fag haboyagan, hanggan ka haboyagan has aban. ⁹ Fiya fagayo fag manga taw nogfaanod

hangan katiwala tonya. ¹⁰ Kawa kitonya tam idwag fagomon gibolon mahogod maskin tam igsyag in Diyos ka boyagan, intam Famawi fagayo, labi man ka mangan tiwala hanya. ¹¹ Haw fag faadal to fag manga togon hantam manga fadwasay. ¹² Kawa haw anahan yapdi, ta fag idwa ha fagoliton hyamo kitay, ha anahan ya ngadi. Yatokitay, haw fag kabali ka mangan tiwala fagtoladon, no kinda no galwasi manga taw, nogsyag in Diyos, hanggan no kabali maliyaw, sas hampang hanggan sas ogali. ¹³ No baliday ho nodyam dasog is nyamo, haw fag fagabag basa has fakaaywanan in Diyos sorat. Fag toltol yadi, hanggan igfaadal tonya. ¹⁴ Haw fag idwag fabayaan in Diyos disag fagsyaganon ha hyamo, fag faanod kasta nagona nafwayong kawa hyamo hyabi, ka manga fagtahinan sas Tifonan no natawid im baba alfoyo. ¹⁵ Ha fag fayayom wam sadili tonya fag manga ibolon, fatonglosan wan, kaarakitay fagayo lomag no kinday haw kabagat has fiya. ¹⁶ Im ogali fag maangay hanggan fag fiya haw nogfaadal has taw. Fag idwag fagomon, ginya madi haw, hanggan ka mangag talinga hyamo imbawi yadi.

5 Haw fag idwa kampang dwat donggon has manga ama ka magorang man hyamo haw no kabaya, haw fag kampang odi mayan mayan hanya, fag bilang wam ama. Ka manga anahan fag bilang wam fadwasay. ² Ka manga ina ka magorang man hyamo, fag bilang wam ina. Fag fiya yadim ogali has manga dayaga, fag bilang wam manga fadwasay ina. ³ Fag idwa gaway ka manga ina balo kadwa ha fagsyagon iba taw. Yatokitay, fag togbong wan. ⁴ Ka maangay hantam kamtiwala, ka ina balo no ha anak, ngatay ha manga fofo, fag tonya ka omanot magorang, bilang wat nafasalamatan hat ina, maskin naanot manga anak hyabi. Is Diyos igbaya wan no kitonya. ⁵ Ka orongan wa ina balo fiya fiya, sadi odi sat balay, idwa ha ofod ofod, hanggan is Diyos lamang it fagsyagon. Yakanga hanya fagabag darangin, igdagad togbong gin Diyos, yabi sirang. ⁶ Dapat ay, ka ina balo no lamang lamang it ogali, bilang wa natay it fangayofan, nyawa boyagan yapdit habilogan. ⁷ Ha fag fadog has manga ina balo to fag manga togon, kaarakitay iba taw idwa ha fabangdanan ha hanya. ⁸ Nyawa faktaw nodwa ganot manga kaiban, labi man it manga sadili talanahan, nadayo wat fakatiwalaon, bohondi kito ka mangadwan tiwala fag dwat it ogali. ⁹ Ka kito fag manga ina balo lamang ka fagfaaktomon hantam bato togbongon. Fag ka mandi manga ina balo kaglabi onom ik safolok fangaraw it kadogayan, kantam fagtogbongon. Fag kawat indogan sadi odi hyabi. ¹⁰ Fagayo iglwang fiyat ogali. Nafadahol wa fiya fiyat manga anak. No marigon yapdi hyabi, mafasakbawon manga famaklay, matogbongon hyabi has manga taw kantohoyan han Diyos, hanggan has manga ha fakahoriyon, intohoyan has fiya fag ibolon. ¹¹ Haw fag id-

wag faaktom santam bato togbongon ka manga ina balo kadya magorang. Ngandayo idwa omagwanta idwa omdogan, ginya madi ngandayo fabayaan in Kiristo ibolon. ¹² Ginyadwa faanod it togonan in Kiristo ibolon. ¹³ Imyayom wa kafang, kalibang odi gombalay gombalay. Ginya madi bondi tonya ka dwat, imbali mafadahiton, mamawaton is taw, idwa fiya it manga hampang. ¹⁴ Yakanga, no sa dingko, tam faindogan ya domwag, ngandayo omanak yapdi, yakanga omano yadit talanahan manga botang kaarakitay intam manga kalaban idwa ha faglwangon kitay idwa fiya intam ogali. ¹⁵ Maskin hoglwang kitonya, tiba balo indiya han Satanas fag ogali. ¹⁶ Ka fiya ka manga ina kamtiwala fag ganot manga kaiban ina ka balo, fag bohon yap ka Tifonan kagtogbong, kaarakitay ka manga Tifonan to-mogbong kawadwa ha manga kaiban, idwa ha fagsyagon iba taw. ¹⁷ Ham fag dogang ya domwag hayo disagon has manga fagtahinan ka gano fiya ka Tifonan, labi wa ka manga mahogod igtoltol hanggan igfaadal in Diyos hampang. ¹⁸ In Diyos sorat iglwang, Ha fag idwag fasolong bangkas ka oyong baka no balidag lid yapdi tirigo. Insorat yadi, Maangay ka gibolon no ha tangdan yadi. ¹⁹ Haw fag idwag talinga ta nog-sombong ka sadik fagtahinan naibolon, nodya manga dowak taw, ngatay tolo ka nalag. ²⁰ Fag sawasta fagdogan fagayo, haw no kabaya ka dayo kaoman it ogali dwat, kaarakitay tiba imdala yadi wagdog. ²¹ San Diyos, hanggan san Kiristo Hisos, hanggan sat manga anghil fagdogan, hogfwayong hyamo kitay, ha fag katanog to fag manga togon. Ha fag idwag fatoga ista naibolon dwat, fag idwa yadi ha fagihidon taw. ²² Fag idyag sadi ginan nogtawid hasta baba alfoyo kaarakitay igfalobos hanya ka kangayanan fagtahinan. Haw fag idwa kaaktom hasta ogali dwat. Hyamo fangayofan fag fagaba maliyaw. ²³ Fag bohondi danom im faginomon. Ha fag ginom yadi ogbot fag alak. To to-mogbong yadi hyamo haw nogdog masoha, mamarigon yadi hyamo, kawa haw no fagaba kasagit tiyan. ²⁴ Ha akwa manga taw malagan wa fiya fiya it manga ogali dwat, nyawa idyapdin dasog has fangabaya. Dapat ay tiba taw it ogali dwat aban ya bagom lag. ²⁵ Kitonya yadi, ha manga ibolon fiya ka madalim lag, dapat ay nodyan lag madali, idwa yadi aban imfyalom, imlag di.

6 Kasta manga nasali sogowan, kagfasakop hat manga fagoliyanan, fag magalang yadi hanya, kaarakitay tadwa ha lwangon hanya, idwa yadig fadwat igdog in Diyos hanggan intam fagfaadalon. ² Kasta fagoliyanan nomtiwala, it manga nasali sogowan fag idwa gayfan kitay, Mi pariho wa fadwasay santam Fon, nyawa hodwa bangan gibolon. Fag idwa yadig sway it fagoliyanan. Yatokitay, fag kabagat wa kabali fiya no gibolon, maskin ista fagtogbongon intam fagalwasiyon kagsyag yadin Kiristo. ³ nyawa faktaw nog-

faadal, nodwa kito kangko fwayong istay, nodwa yadi kiton Kiristo Hisos, kagfon intam togon orongan, hanggan nodwa has manga adal has kabali fiya intam ogali, ⁴ hanyag fataka odig dog, idwa ngap ha fakatwawon. It fangayofan bilang wa ha sagit. Iqfabarohagan yaglabanan ya has hampang, igbangkad odi kaid-ingliyan, gidgisogan, igfadwat igdog is taw, igfatodto-gaan wan. ⁵ Ka kasayag daraogan has manga taw kitonya, idwa maslong it isip, tadwa twa ka fakaoronganan. Kasta fangayofan, ta fag kabali maakwa maskin igsimba. ⁶ Ka orongan, dahol ka fakinabang tam nogsimba, nogfasakop orongan in Diyos, hanggan igbaya no dahol da kantam lagan. ⁷ Kawa hyabi, tam no bago sagaya, tam idwa ha diya diya, nyawa kana istay is baba daga, hanggan tam aba no malin gistay, tam fawa ha diya diya mandi. ⁸ Yakanga tam fag baya wan tam no ha hanon hanggan rotay. ⁹ Ka kasaya kabali maakwa wa dahol dahol lomog tokso, kawa aywan fag fakasayaon dwat kadwa ha kahologan giktan hanya, hanggan goyod hanya has kadwatan. ¹⁰ Maskin ka gwas fagaba has kwarta ha bilang wa dalid sat basad fangayofan, kagfatobo fagayo fag dwat fag ogali. Tiba taw kawa gwas wa gwas wan kitay, it kwarta fag aywan nangos, in-ayayo git fakatiwalaon. Ginya madi, no dogay, bago di nadog it kahorihan, it fangayofan bilang wa hagtobok hanya. ¹¹ Dapat haw, haw in Diyos fangibolon, fag baybay tonya fag manga bagay fagayo. Im fangayofan fag matoonan has fiya fag ogali, ka maslong. Fag imtoho-an han Diyos, matanogon, galwasi has tiba taw, idwag fagomon, hanggan mahoway. ¹² No baliday im fagsyaganon, fag mahogod kitosag dalandan maskin ha tanggapon, ka haboyagan kadwa ha katabowanan, kawa nogsyag in Diyos. Is Diyos nafatawag hyamo hastay fag ibolon hyabi, haw no nafaoronganan hanya sas

basad fakaaywanan fag manga taw ka nadog hyamo. ¹³ San Diyos faglagan, kagfaboyag fagayo fag manga bagay, hanggan san Kiristo Hisos faglagan, ka nafaoronganan it fagsyagon no san Ponsiyo Pilato fagdogan, hogtogan hyamo kitay, ¹⁴ is Kiristo Hisos kagfon intam nodyan dasog, haw fag fadagos angko manga togon to ha hyamo. Fag fatonglos fiya fiya hanggan fag idwag fasigpala. ¹⁵ Nomdasog gis nanya fag masohod, is Diyos mamalag ya in Kiristo Hisos. Is Diyos ka kafiyaon, sadi di kaghari, it kangayanan abwat man has fagayo fag manga gorongan. Hanya sadi di kagfon has fagayo fag manga fon. ¹⁶ Hanya lamang kadwa katay, igbanwanan sas basad yawa, idwa ha taw somompong hanya. Idwa ha nalag hanya hyabi, idwa yadi ha syagan lomog hanya kati. Tam fag fadaholon hanya, fag faanod yadi kitay it karigonan idwa ha katabowanan. Fag kitonya wa ngay. ¹⁷ Fag fatagak has manga maakwa istay is baba daga kitay, ta fag idwag faabwaton it sadili. Ta fag idwa yadig syag has kaakwaan ka ha kahaminan di, dapat ta fag syag han Diyos ka madisagon, kagdisag hantam fagayo fag manga bagay kaarakitay tam bomaya wan. ¹⁸ Fag fwayong has manga maakwa kitay, ta fag gibolon has fiya fag kabali yadi maakwa sas fiya fag ogali. Ta fag idwa mahwangiton, fag matogbongon hat kapariho. ¹⁹ No kitonya, ta tomifon yadi kaakwaan has aban kagfathoyan kitay ta tomanggap yadi ka orongan fag haboyagan. ²⁰ Timotiyo, haw fagano fiya fiya ka nafaano ha hyamo. Fag idwa gwas ka manga toltol kadwa fiya kadog han Diyos, hanggan ka manga katadlongan ka tiba taw noglwang gin Diyos kadonongan, dapat ay, idwa ngap gi hanya. ²¹ Ka mangag lwang kitay ta ha kadonongan kitonya, natalang di ngap gintam fakatiwalaon. Haw nangos fag domog kitay is Diyos mahoway ha hyamo.

2 TIMOTIYO

1 Ahos Pablo kagsorat to fag sorat. Ahon bali in Kiristo Hisos Fandiya Barita, maskin tonyan Diyos wa kafangayofanan kaarakitay ho fadog has taw kawas Diyos ha bato disagon hantam, ka haboyagan kansadi san Kiristo Hisos. ² Hogsorat ha hyamo, Timotiyo, angko fagalwasiyon fag anak. Haw nangos fag domog kitay is Diyos intam Ama, hanggan is Kiristo Hisos, kagfon intam, mahoway ha hyamo, kaawa, hanggan igfalokmay im fangayofan. ³ Hodwa ha fakayaon ho no gibolon in Diyos ibolon, kito yadingko manga hafofowan, hanggan aho no gwas hyamo ngayan, yabi sirang, aho nogdarangin, hogbaya in Diyos. ⁴ Aho nogtohod kawa haw goraw hyabi, ho gwayan wa kasaya lomag hyamo, kaarakitay ho bomaya wa dahol. ⁵ Ho fagaba wagtohod kawa haw orongan igsyag han Diyos. Bago bago is Loyda im fofog kagsyag hanya, ginya madim ina, is Yonisi, hanggan wa kati ho twa matohoyanan kitay haw igsyag yadi hanya. ⁶ Kawa kitonya hogfathod hyamo kitay, haw fag marigon nogfadagos in Diyos disag fagsyaganon ha hyamo hyabi, aho no natawid im baba alfoyo. ⁷ Maskin in Diyos disag hantam bonwa ka fangayofan madalaon, dapat ka fangayofan marigon, ka galwasi manga taw hanggan twag fasad intam sadili fakasayaon. ⁸ Haw fag idwa kaya igfaorongan has taw kawa hantam Fon. Fag idwa yadi kayag lwang kitay haw kilala wangko kanporiso kawa ha hanya. Yatokitay, fag syag in Diyos karigonan kaarakitay haw omagwanta yadi no ha mahori, haw nogtolto ka Fiya fag Barita. ⁹ Is Diyos ka nabawi intam kaarakitay tam imbalit sakop. Bonwantam sadili ibolon ka nabawi intam, dapat kawan Diyos kafangayofanan mahoway. Hyabi hyabi, nyawa idya ha fabagowanan nyawa kana, in Diyos malooy fag kahowayan danwan talaga hantam, kawa tam imsadi san Kiristo Hisos. ¹⁰ Dapat ay, is Kiristo Hisos, intam Famawi, nonbangkad has baba daga, to fag kahowayan bago dinlag. Hanya nadaog ka kahatayan, nafalag yadi ka haboyagan orongan, kadwa ha katabowanan, git Fiya fag Barita. ¹¹ Is Diyos nafabali wangko it Fandiya-Barita hanggan famaadal kaarakitay igfadog has taw to fag Fiya fag Barita. ¹² Maskin nga tagfahoriyan angko kati, kawa ho nogfadog ka Fiya fag Barita. Nyawa kitonya, hodwa ha fakayaon, maskin ho kilala fiya fiya angko fagsyagon. Ho twa matohoyanan kitay, hanggan has ginanan sirang,

hanya omano fiya fiya kangko nafaano ha hanya. ¹³ Fag kangko nafwayong kam fagtoladon, maskin sonson wa fakaorongan tonya. Haw fag fadagos igsyag in Diyos, hanggan galwasi manga taw, kito kantam ogaliyon kawa tam nonsadi san Kiristo Hisos. ¹⁴ Sas Maliyaw fag Falad togbong kagbanwanan santam, hagfalamang ka fakaorongan kat natogon ha hyamo. ¹⁵ Ha fadi wadtwa kitay fagayo fag manga taga Asya nafabayaan wangko, hanggan da Figilo da Hir-moginis naobon yadingko. ¹⁶ Dapat is Diyos wa ka tomogbong nangos inda Onisforo talanahan, kawa aywan ginan tagfarigon angko. Hanyadwa naya has taw nyawa honporiso. ¹⁷ Yatokitay, is Onisforo nondasog sas Roma, idwag fahoyangon igligaw angko, hanggan wa nalag angko oliyanan. ¹⁸ Ha twa wa fiya fiya no kinday is Onisforo no natogbong angko fagaba sas banwa Ifiso. Intam Fon nombangkad ya aban im-awa nangos hanya.

2 Dapat ay, haw, Timotiyo, angko anak, fag marigon im fangayofan. Maskin haw insadi san Kiristo Hisos, it malooy fag kahowayan tomogbong hyamo. ² Haw fag faadal has manga matanogon fag manga taw kam donggon gingko sas basad fakaaywanan, kaarakitay tonya man fag manga taw ka maadal has tiba. ³ Kawa haw in Kiristo Hisos fiya fag sondalo, fag gagwanta nyawa ha mahori. ⁴ Kagsondalo no kasaya kitay kagsogo hanya bomaya wan, idwag falibang it ibolon has manga iba bagay. ⁵ Kagsaringgonan, nodwag fayayom hanya kito kasta fwayong, idwa ha tanggapon, maskin idwa gomonom dasog has hadasogan. ⁶ Ka nangogodan gamas, tonya mandi ka fiya tomanggap bago bago it kahorayan gis ani. ⁷ Ha fag gayfan fiya fiya angko fwayong hyamo, ginya madis Diyos igfatwag dog hyamo tonya fagayo. ⁸ Haw fag tohod in Kiristo Hisos kawa hanya gin Dabid hasokfonan hanggan inboyag ya domwag gis kahatayan, kangko fagtololon Fiya fag Barita. ⁹ To kat tigadan yadi no kana mayon ta no nafahoriyan angko hanggan wa nagafos, kito wa sadik taw ha kasalanan. Dapat ay, hadwa twa gafoson in Diyos hampang. ¹⁰ Yakanga ho gagwanta wa fagayo fagayo fag manga bagay kawa han Diyos manga nafili, kaarakitay is Kiristo Hisos imbalista Famawi hanggan domisag has taw it kafiyon kadwa ha katabowanan. ¹¹ Fandog ngay, ti wa kasta faglwangon kawag farigon intam, Tam nonhoyog han

Kiristo Hisos kahatayan, Matohoyanan tam omofod yadi wa hanya aban, boyagan. ¹² Tam nodwag fagomon istay is baba daga, Tam tomogbong yadi aban in Kiristo hanya nogbahala has taw. Tam nog-tangkod in Kiristo sas fagdogan manga taw, Is Kiristo aban tomangkod yadintam. ¹³ Nyawa tam idwa maafanodon, is Kiristo maafanodon fagaba, Hanyad-wa twag tangkod it sadili. ¹⁴ Haw fag fatohod is taw to fag manga bagay. San Diyos ngayan, haw fag togon is taw kitay, ta fag idwag labanan no kadidwa ha kahologan fag manga hampang. Idwa ha fakinabang noglabanan kitonya, yatokitay igdiya di ngap has kadwatan ka mangag talinga. ¹⁵ No baliday im fagsyaganon, haw fag kabali maangay san Diyos faglagan, sadik fangibolon kadwa ha fakayaon, maslong yadi nogfaadal ka orongan wa Fiya fag Barita. ¹⁶ Haw fag idwa kalibang has manga toltol kadwa maangay, kadwa ha kahologan, kawa kagfadahit kitonya labi wa kaayayo wa ngap gin Diyos. ¹⁷ Ka kitonya fag manga taw it fagfaadalon bilang wa kitos sadik bangbang igsablay wa labay, kaskat sadik habilogan. Dowak ama ka kitonya da Himiniyo da Filito. ¹⁸ Tanayayo gis fakaoronganan hanggan nafaadowan ka mangan tiwala tiba. Taglwan kitay kati intolas wa ka manga taw no kaboyag gis kahatayan. ¹⁹ Dapat ay, in Diyos nahalig fagriganon intam fagsyagon bilang bato maganit. Kantigib yadi sinyag lwang kiti, Kagfon intam fadi wadkilala no fakta fag manga taw it sakop, iglwan yadi kitay, Fagayo kagsyag hantam Fon it ngayan, fag domayo ka dwat. ²⁰ Nyawa ka balay fiya wa kabantay, bohonwa fagayo ginto ngatay pilak ista botang sinyanya. Ha akwa di manga taya, manga anglit. No kawa manga sohadan ginto, manga pilak, ha toon kagfon nogbangkad no ha sohadan sinyanya. Dapat ay, no kadista manga taya manga anglit, sirang sirang nyawa faktaw, nyawa kanat fwalidon sinyanya. ²¹ Nyawa faktaw santam ka kaayayo gis manga ogali dwat, kito yadi was botang ginto hanggan pilak ha fakinabang, fagaba intalaga hasagfon intam, intalaga has ibolon fiya. ²² Yakanga haw fag dayo ka fakasolongon anahan kadwa fiya. Yatokitay, no baliday im fagsyaganon, haw fag kabali fiya, hanggan matanogon. Fag galwasi has iba taw, fag mahoway, kito yadis taw ka fiya it manga fangayofan, kagsyag yadi intam Fon togbong. ²³ Haw fag idwag talinga ka mangag labanan, kadwa ha kahologan, gawayan odit katabowan. ²⁴ Ka fiya, in Diyos fangibolon fag idwag daraogan. Yatokitay, fag mahoway has fagayo fag manga taw, madonong igfaadal, maagwantaon yadi. ²⁵ Fag kampang mayan mayan no kabaya ka mangag laban hanya, nogfatohod is taw has fiya. No kitonya no kabaya, is Diyos ngandayo tomogbong is taw igsoyo, tomwa yadi ka fakaoronganan. ²⁶ Ginya madi, ista fangayofan ngan-

dayo malfas ya aban, nyawas Fandaya naiktan sat siyok itfagonan, nasakop hanya.

3 Hogfatohod hyamo kitay, no sas ginanan sirang aban, tam domog mahori. ² Manga taw imbali wagsadili odi, it fagwason fagaba has kwarta wan, ha takan ya, mafasalagwaon ya, masabayonon ya ngadi. Tambali fanway ya has magorang, idwa gisip kitay tagtogbong hyabi hanya, idwa magalang han Diyos. ³ Bohondi kitonyak dwat, idwa twa kaawa, idwa twag fasonlon, kaplaon, idagdog wa dahol dahol ngadi kana kamlag, igfabohondi kas taw. Dayo ya ngadi has fiya. ⁴ Labi man inya, im-oyon has manga taw kaglaban it ofod, igfalabi wat fangayofan, ha takan ya ngadi, bohonwas Diyos ista fakasolongon, ha odis manga dwat fag halibangan it fakasolongon. ⁵ No kadog di to fag manga taw katiwala in Diyos, dapat ay, hadwa lagon in Diyos kariganon sat manga ogali. Haw fag idwa gamigosan ka kitonya fag manga taw. ⁶ To fag manga taw tiba igsakbaw hasta manga balay, igfaadowan manga ina, hanggan wamdiya ista manga fangayofan, no dogay. To fag manga ina aywan it fagayfanon it manga ogali dwat hyabi, hanggan wa kati, aywan it manga fakasayaon dwat. ⁷ To fag manga ina kasaya yadi wa tomwa has fiya, dapat ay, nyawa ginahin tadwa twagdog ka fakaoronganan. ⁸ Tonya fag manga ama iglaban has fakaoronganan, kito yadinda Hanis da Hambris ka nalaban in Mwisih hyabi. Tadwa ha fagayfanon has fiya. Yakanga manga taw natwa waglag kitay tadwa katiwala orongan. ⁹ Dapat ay, ista ogali dwat ha katabowan di aban, maskin fagayo fadi wad tomwagdog kitay ista ogali kaidagdogan odi, kito yadi kanda Hanis da Hambris hyabi. ¹⁰ Dapat ay, haw idwa kitonya, haw intanog angko adal ha hyamo. Haw nasokfon yadingko ogali hanggan angko fasadan. Haw fadi wad nalag aho nogsyag in Diyos, hanggan no gagwanta mahori, hanggan no galwasi has taw. Haw nalag kitay hodwag fagomon ¹¹ ta no nafahoriyan angko sas manga banwa Antiyokiya, Ikonyo hanggan Listra. Mahori wa dahol gis nanya hyabi. Dapat ay, kagfon intam nabawi angko ginya fag manga mahori fagayo. ¹² Ta fahoriyan intam fagayo ka kasaya gogali fiya kawa tam no katanog in Kiristo. ¹³ Ka dwat fag manga taw labi man imdwat, ka manga bohagon igfaadal igfadagos wagdaya iba taw, ginya madi tonya yadi aban ka adayaan. ¹⁴ Dapat ay, haw fag idwag dayo ka manga fakaoronganan kam naadal, kam fagsyagon marigon, kawa haw kilala fiya fiya ka manga nafaadal to ha hyamo. ¹⁵ Gis ogbot ginan haw fadi wadtw kitay ka maliyaw fag Kasoratan kagfadonong intam kaarakitay tam imbawi, kawa tam nogsyag han Kiristo Hisos. ¹⁶ Is Diyos ka nafasorat ka Kasoratan fagayo. To fagayo ha kahologan nogfaadal ka fakaoronganan, nogfabohag kadwa orongan fag adal, nogfahaslong ka ogali barikwang hanggan igtaban has fiya fag ogali. ¹⁷ In

Diyos fangibolon no katanog ka Kasoratan, imbali hostot ogali, imyayom has fiya fag ibolon fagayo.

4 San Diyos hanggan san Kiristo Hisos ngayan, ka mamatohoyan has manga boyagan hanggan has manga natay ista hadasogan aban, kawa hanyam bangkad ya hastay, hanggan mamahala has fagayo, hogtogon ha hyamo marigon kitay, 2 haw fag faadal in Diyos hampang, fag idwa ha toon, ngadi ginahin, nyawa mahori, nyawadwan. Fag fatohod hasag talinga hyamo, fag fahaslong ista ogali, fag maagwantaon nogfarigon ista manga fangayofan, fag idwag fagomon igfaadal has taw. 3 Maskin no ginahin fag masohod aban, ta fawa tomalinga has adal fiya, yatokitay ka odista sadili fakasayaon igdog kasta fagtalinggaon aban. Ka mangag faadal kitonya kasta fagligawon aban. 4 Igfabongkohon wan no hadis fakaoronganan fag adal, dapat tomalinga wan no ka manga toltol magorang. 5 Yakanga nyawa ginahin haw fag matagahan. Ha fag gagwanta ka manga kahorihan kamdasog ha hyamo aban kawa haw nogbarita. Kawa haw in Diyos yadi fangibolon, ha fadagosan wan im bato ibolonon. 6 Hogdog ho kaakbang wamdisag hasagfon intam. Kati hogdog ho katolas wa gistay fag haboyagan. 7 Hodwa nafagomon igdalandan kitos igsaringgonaan. Kati hontabo wagdalandan. Hontanog angko fakatiwalaon. 8 Ho tomanggap wa aban ka sangbaw kahaslongan, hawas nadaog igdalandan. Kagfon intam, ka maslong fag fangabaya, kagfasangbaw angko tonya fag sangbaw gis nanya fag sirang. Bohondi aho kat fagfasangbawon, dapat fagayo ka mafanayan intam Fon kabangkadan, kawa galwasi hanya, ta tomanggap yadit manga sangbaw gis nanya. 9 Ha no somyagan ya ngadi, ha fag ngalay wambangkad hastay, 10 kawas Dimas naobon wangko,

hawas banwa Tisalonika maskin it fakasayaon ka manga ogali istay is baba daga. Is Kirisinti hawas sakop Galasya, is Tito hawas Dalmasya. 11 Is Lokas lamang kangko ofod. Ha sayahan in Markos, tabanan hastay angko, maskin hanya tomogbong fiya fiya angko ibolon. 12 Ho nasogo in Tikiko has banwa Ifiso. 13 Haw no kabangkad hastay, diyan angko balokas kantagtag sanda Karpo balay sas banwa Toroas. Diyan yadi hastay angko manga famasaan, labi wa kansorat sas anit hayopan. 14 Is Alihandro, kagfanday tanso, naibolon dwat wa dahol hangko. Kagfon intam bahalag fadosa hanya. 15 Haw fag matagahan tonya fag ama, kawa maisog wa dahol dahol, gwayan waglaban intam fagbaritaon. 16 Itfagonan idwa ha naofod angko aho nonbangkad hasagtabo hampang. Ta nafabayaan wangko sadi sadi. Is Diyos nangos fag idwa somogat is taw. 17 Dapat kagfon intam ka naofod angko, nafarigon wangko fangayofan, yakanga ho nafadog fiya fiya it hampang has manga Hintil fagayo. Hanya nabawi yadingko, bilang gis basad bibig liyon. 18 Kagfon intam bomawi yadingko aban gis fagayo fag kadwatan, tomaban yadingko hat sakop banwanan sam tongod. Nyawa ginahin, tam nangos fag fasayagdog hanya. Fag kitonya wa ngay. 19 Fag lwang has talsawa da Pirusila da Akila kitay, ho gwas hanya, hanggan han Onisiforo talanahan. 20 Is Irasto in-goyan sas banwa Korinto. Ho naobon in Torofimo sas banwa Milito maskin hanya ha sagit. 21 Fag idya nangos abagat haw nombangkad hastay. Da Iyobolo da Podinti, da Lino, da Kalawdiya hanggan intam manga fadwasay tiba fagayo gwas hyamo. 22 Kagfon intam fag sawam fangayofan fagaba. Ham nangos fag domog kitay is Diyos mahoway ha hayo fagayo.

TITO

1 Ahos Pablo kagsorat to fag sorat. Aho in Diyos nasali sogowan, hanggan in Kiristo Hisos Fandiya Barita. Is Diyos ka nasogongko kaarakitay ho farigon it manga nafili fag manga taw ta nogsyag hanya. Hog-fatwagdog has mangag syag has haboyagan kadwa ha katabowanan, ka fakaoronganan kantam fakatiwalaon. ² Hyabi hyabi, is Diyos nodya kalig intam daga, is Diyos natogon kitay, hanya ha bato disagon haboyagan kitonya, hanggan hanyadwa yadi twag bohag. ³ Ginya madi aban, gis nanya fag masohod ka maanggay hanya, is Diyos, intam Famawi, nafatwagdog has taw to fag haboyagan. Is Diyos ka nafasognod kitay, fag aho ka bomarita tonya has taw. ⁴ Hogsorat ha hyamo, Tito. Haw bilang wangko anak orongan santam fakatiwalaon pariho. Haw nangos fag domog kitay, is Diyos intam Ama, hanggan is Kiristo Hisos intam Famawi mahoway ha hyamo, hanggan igfalokmay im fangayofan fagaba. ⁵ Itfagonan ho nafagoyan yapdi hyamo sas foyo dagat Kirita, kaarakitay haw fatabo yapdi ka manga bagay kadyan fafiyan. Angko togon hyamo itfagonan kitay, filiyon manga fagtahinan san Diyos manga Tifonan sas fagayo fag manga banwa. ⁶ Kam fagfiliyon fag kawa manga ama ka manga iba taw idwa ha fagoliton hanya, sadi dit babay. It manga anak katiwala yadin Diyos, fiyat manga ogali, magalang has taw. ⁷ Ka gano Tifonan fag kadwa ha fabangdanan maskin kat faganon kawa han Diyos. Fag kadwa ha takan, idwa maisog, idwa yadig lango, idwag faawang has taw, idwa madaya has kwarta baliwa. ⁸ Dapat fag kawa mafasakbawon famaklay, ka galwasi has fiya, twag dahan, idwa ha fagihidon taw, matanogon yadi han Diyos, idwag falabit sadili fakasayaon, nyawa kana. ⁹ Hanya fag twagdog fiya fiya ka barita kantam fagsyagon maganit, kitontam fagfaadalon. No kitonya, hanya syagan igfarigon ista manga fangayofan kawag faadal fiya, syagan yadi fabohag has taw kaglaban has fakaoronganan. ¹⁰ Kati aywan kaglaban has adal orongan. Ista manga hampang kadwa ha kahologan, igdaya ka tiba. Ka fakaaywanan ka kitonya, kawa ka mahogod has ogali Hodyo. ¹¹ Ka fiya fag idwag faawang kagfaadal kitonya, maskin tagfaagran kat manga ofod balay, idwa yadi kayag faadal kadwa orongan, kaarakitay lomag kwarta. ¹² Ka mandi sadik taga Kirita, ka matoltolon kaglwang, Ka manga taga Kirita fagaba wa bohagon,

bilang wa hayopan, masamohon, mafang ya ngadi.

¹³ Orongan wat fwayong. Maskin kitonyasta ogali, ¹⁴ haw fag marigon nogfatohod has taw, kaarakitay ta katiwala yapdi marigon in Diyos, idwa katiwala has manga toltol odi manga Hodyo, hanggan ista manga faadalon ka nadayo ka fakaoronganan. ¹⁵ Ista fangayofan no fiya, fagayo fag manga bagay fiya has taw, idwa ha fagliyon. Dapat ay, kasta fangayofan nodwa fiya, nodwa yadi katiwala in Diyos, fagayo fag manga bagay fagliyon wan, maskin it fangayofan fagayo has dwat, tadwa twagdog no kana ka dwat orongan.

¹⁶ Taglwang kitay, Mi kilala yadi wan Diyos, dapat ay, it manga ogali igfabohag it manga hampang. Dwat wa dahol ista ogali, fanway hanggan idwa ha fagibolonon fiya.

2 Dapat ay, hyamo fagfwayongon fag kagfaanod ka adal orongan. ² Fag lwang has manga magorang ama kitay, ta fag mahoway, magalang, idwag falabit sadili fakasayaon, fag orongan wagsyag in Diyos, galwasi manga taw, hanggan maagwantaon. ³ Haw fag fwayong yadi has manga ina magorang kitay, fag magalang han Diyos, fag idwa mafadahiton ka manga dwat donggon, fag idwag lango. ⁴ Fag fiya ista faadalon has taw kaarakitay fayayom fiya fiya ka manga ina bago kitay, ta fag galwasit manga indogan, it manga anak, ⁵ idwag falabit sadili fakasayaon, fiya yadit manga fangayofan, mahogod no gibolon, mahoway hanggan matanogon hasta manga sadili indogan, kaarakitay manga iba taw idwa ha faglwangon igfadwat igdog in Diyos hampang. ⁶ Ha fag faaronganon yadi has manga anahan kitay, ta fag idwag falabit sadili fakasayaon. ⁷ Hanggan haw, Tito, im manga ogali fagayo fag fiya, ista fagtoladon. Fag kawa maanod haw nogfaadal, fag idwa mahakot. ⁸ Fag filim hampang ka fiya, maanod yadi, kaarakitay idwa ha fabohag hyamo. No kitonya, ka kasayag laban intam maya wan, idwa yadi ha faglwangon. ⁹ Ha fag togon yadi hasta manga nasali sogowan kitay, ta fag fasakop hat fagoliyanan nyawa kana, ta fag idwa masongat. No baliday ista fagsyaganon, fag gibolon fiya fiya. ¹⁰ Ta fag idwa mahomiton, yatokitay, fag fiya ista ogali fagayo fagayo, kaarakitay manga taw lomwang kitay, fiya mangharaw in Diyos, intam Famawi, fagfaadalon.

¹¹ Maskin is Diyos nafalag hantam it malooy fag ka-howayan kaarakitay fagayo fag manga taw fag imbawi

wa nangos. ¹² To in Diyos kahowayan kagfayayom intam domayo ka dwat fag manga ogali, hanggan domayo ka bali fangayofan masayaon, ¹³ no kandogay day tam no mafanayan yapdistay is baba daga. In Diyos kahowayan kagfayayom intam gogali ka fiya, idwag falabi intam sadili fakasayaon, igtolad in Diyos, kantam fagbayaon fag fagsyagon, kawas Kiristo Hisos, intam Diyos hanggan Famawi, kamlag aban sat fagbokngan masilaw fag kafiyan. ¹⁴ Hanya nadisag it sadili kaarakitay fomalfas intam, fahaliyaw intam manga fangayofan, igfabali intam it nafili fag sakop, talaga wa omogali fiya. ¹⁵ Fag danwag fadog to fag manga togon fagayo has taw maskin haw ka ha kangayanan igfarigon ista fangayofan, hanggan fatohod hosto ka mangag talinga hyamo. Nyawa kindawan ta fag idwag yod hyamo.

3 Tito, haw fag fatohod ya has taw kitay, ta fag fasakop has manga gorongan, ka manga ha kangayanan. Ta fag katanog yadi tonya, fag talaga wa omibolon fagayo fag fiya fag ibolon. ² Ha fag bando has taw kitay, ta fag idwa kampang dwat, nyawa hada fag idwa kampang dwat, nyawa hada fag taw. Ta fag idwag sarogatan, ta fag magop wan, idwa kasayag faagran nyawa kindawan. ³ Hyabi hyabi tam bilang odi paong paong, idagdog fagaba. Hyabi tam igtalang odi, intam bali fangayofan masayaon kantam fakatanogon fagaba. Hyabi intam fangayofan sonson wa dwat hanggan kaingli odis taw. Tam kadaddwatan odig lag ha sadi ha sadi. ⁴ Dapat ay, is Diyos intam Famawi no nafalag it kahowayan hantam, hanggan kawa hanya galwasi intam, ⁵ hanya nabawi intam. Bohonwa kitay tam ha naibolon fiya, dapat kawas Diyos maawaon wan. Ka Maliyaw fag Falad ka nafabago intam manga fangayofan, tam nonsagaya ya domwag, kawan tohoyan kitonya sas danom, ka tandaan has fadowa fag

kasagayan. ⁶ Kawas Diyos nadisag hantam it Falad sadi wak kayonya gintam Famawi is Kiristo Hisos, ⁷ kaarakitay in Kiristo Hisos malooy fag kahowayan fahaliyaw intam manga fangayofan, hanggan fatohoyan hantam ka haboyagan kadwa ha katabowanan, kantam fagsyagon. ⁸ To fag manga adal sonson wa orongan. Yakanga angko fakasayaon haw fag faaronganon ka mangag syag in Diyos kitay, ta fag katiwala to fag manga bagay kaarakitay igfatohoyan it sadili, malayonan wa has ogali fiya. Tonya fag manga fwayongon kafiyaon, ha fakinabang yadi has manga taw. ⁹ Tam fag idwa kalibang iglabanan no kadidwa ha kahologan hanggan fag fatawas wan ka golit golit manga listahan manga hasokfonan, hanggan kagfabarohagan hanggan iglabanan kawa has Batasan Hodyo baliwa, maskin idwag togbong has fiya. ¹⁰ No ha taw igfasamanon, igfaagran san Diyos tifonan, tam fag mangabaya balis dowo ginan, ginya fag bayi mandi tonya fag taw. ¹¹ Tam twa wa kitay ka kitonya fag taw idwa fiya it fangayofan, hanggan it manga ogali dwat igfalag kitay hanyag falamang. ¹² Ho somogo in Artimas, ngatay in Tikiko has nyamo hayo. Ta nondasog wan is nyamo, ha nangos pilitan wa hyamo hastay has Nikopolis maskin ahostay wak domogay hanggan wamsagaya abagat. ¹³ No baliday im fagsyaganon, togbongan in Sinas kagtabo hampangan, hanggan in Apolos kaarakitay lomahaw wa madali. Fag fatohoyan kitay hosto ista manga diyaon fagayo. ¹⁴ Fag fwayong hantam manga ofod kitay, fag mahogod no gibolon kaarakitay lomag ista fangaboyagon hosto, hanggan idwa kabali malahawan malahawan. ¹⁵ Angko manga ofod fagayo istay gwas hyamo, Tito. Fag fwayong yadi hantam manga fadwasay kamtiwala kitay, mi gwas yadi has taw. Ham nangos fag domog kitay is Diyos mahoway ha hayo fagayo.

FILIMON

1 Ahos Pablo kanporiso kawa ho gibolon in Kiristo Hisos ibolon. Hami da Timotiyo, intam fadwasay, igsorat ha hyamo, Filimon, hyami kapariho fangibolon. ² Migsorat yadi han Diyos Tifonan kagtifonan sam balay, han Apiya, hyami fadwasay ina, hanggan han Arkipo, ka kito yadi hyami, idwag fagomon iglaban has dwat. ³ Ham nangos fag domog kitay is Diyos intam Ama, hanggan is Kiristo Hisos kagfon intam, mahoway ha hayo, hanggan igfalokmay hayo manga fangayofan. ⁴ Nyawa ginahin aho nogdarangin kawa ha hyamo, Filimon, hogfasalamat fagaba hangko Diyos. ⁵ Maskin ta nafadahit hangko kitay, haw igsyag han Hisos kagfon intam, hanggan haw galwasi hanya hanggan fagayo fag manga taw kantohoyan ha hanya. ⁶ Hogdarangin yadi kitay, ham nogfadog has taw kitay ham igsyag han Kiristo Hisos, tam fagayo fag labi man tomwa wagdog kitay, kafiyaon intam fagbayaon, kawa tam insadi san Kiristo. ⁷ Fadwasay Filimon, hogbaya wa dahol igdog, hanggan inhoway yangko fangayofan, ta nogfadahit kitay, kawa haw mahoway has manga taw kantohoyan han Diyos, ista manga fangayofan inrigon ya. ⁸ Kati aho nangos ha fagsagadon. No kitay di, fiya di aho nogfwayong hyamo kitay, haw fag katanog angko fagsagadon kawa han Kiristo. ⁹ Dapat ay, kawa ho galwasi hyamo, fiya man aho no kampang mayan mayan ha hyamo nogfadog angko sagadon. Ho kampang mayan kitonya, nyawa ahos Pablo in Kiristo Hisos nasogo, hanggan kati ahon poriso kawa ha hanya. ¹⁰ Kangko fagfwayongon ha hyamo kawas Onisimo. Is Onisimo bilang wangko anak san Kiristo, kawa aho nafatiwala hanya istay, aho no maporisowan. ¹¹ Hyabi hadwa ha fakinabang gi hanya, dapat kati aban, dahol intam fakinabang gi hanya, tam dowa. ¹² Kati hogfaoli ya in Onisimo ha hyamo. Angko fangayofan bilang yadi wantahin hanya. ¹³ No kitay di, ho kasaya yapdi ongay, is Onisimo fag sa yapdingko

akbang, kaarakitay bilang yadi wa haw kagtogbong angko, no baliday aho no maporisowan yapdi, kawa hyabi hogfahaskat ka Fiya fag Barita. ¹⁴ Dapat hodwa kasaya gibolon kitonya haw nodwag faangay, kaarakitay bohonwa pilitan, dapat im sadili wa kafangayofanan haw nogtogbong angko. ¹⁵ Ngatay itfagonan, is Onisimo idwas nyamo hyamo sadik ngalay, kaarakitay hanya nomfwali ya ha hyamo, hanya domogayan hanggan wa aban aban. ¹⁶ Kati bilang wad bohonwam nasali sogowan, dapat hyamo fagalwasiyon fag fadwasay. No kitay di, ho kawili wa dahol in Onisimo, dapat haw labi man kawili hanya. Kati inbali yadi wam fadwasay santam Fon, bohondi kitay hyamo nasali sogowan. ¹⁷ Yakanga, haw no gayfan kitay aho hyamo kapariho igsyag in Diyos, ha tanggapan yan Onisimo, kito yadi haw nangos nogtanggap angko. ¹⁸ Is Onisimo no ha naibolon dwat ha hyamo hyabi, ngatay ha bayadan, fag gingko haw nogsohot. ¹⁹ Aho ka nasorat istay. Ahos Pablo ka bomayad hyamo. No kitay di, hodwag lwang kawa haw bilang wa ha bayadan angko, kawa gingko nabarita ha hyamo, haw ha haboyagan wan. ²⁰ Kati, fadwasay, bilang ganti tonya, haw nangos faangayan angko fagsagadon, kawa tam insadi hasagfon intam. Aho fag bomaya wagdog nangos hyamo sagot kawa tam dowasay han Kiristo. ²¹ Angko fangayofan ha ngan wa faanod kangko faglwangon istay fag sorat, hanggan bohondi kitonyak fiya. ²² Ha nangos fag fatalaga yadingko bato hadasogan, maskin hogsyag wa kitay ahom fwali ya has nyamo hayo, kito ka hayo fagdaranginon, non Diyos wa kafangayofanan. ²³ Is Ifras kangko ofod kanporiso yadi kawa han Kiristo Hisos, gwas hyamo, Filimon. ²⁴ Kitonya yadi da Markos da Aristarko, da Dimas da Lokas, angko manga ofod yadi fangibolon, gwas yadi hyamo. ²⁵ Ham nangos fag domog kitay is Kiristo Hisos kagfon intam mahoway ha hayo fagayo.

HIBRIYO

1 Hyabi hyabi is Diyos ha manga fagalan fangampang no kampang hantam manga hafofowan. Idwa myasa gis nanya, nomtoon nomtoon di. Bokod bokod yadi in Diyos nafaibolon hat manga fangampang. 2 Dapat kati, sas ginanan fag manga sirang, maskin in Diyos wa kafangayofanan kitonya, kawat Anak in Diyos wa fagalan no kampang hantam. Hyabi is Diyos nafasognod it Anak ka naibolon, nahalig intam daga hanggan banwa sadi wak dahonya, nafatohoyan yadi kitay it Anak kagfon fagayo. 3 No kindas Diyos, kitonya yadit Anak, yakangat Anak ka bilang wagfasalog in Diyos kayawaan istay is baba daga. It Anak hampang karigonan ka gano yapdi sadik dahonya fagayo fagayo kan Diyos nahalig. Ginya madi in Diyos Anak natokaw sat balis sihon, ka marigon man has fagayo, nontabo waglinay intam manga naogali dwat, kawat kafangayofanan wa kitay hanya fag imbali intam fangafiyan. 4 Is Diyos nafangayan it Anak ngayan fiya man has manga anghil, yakangat Anak kangayanan labi wa fiya man. 5 Kawa kitonya, nyawa ginahin is Diyos idwa ha nafwayong nyawa haday fag anghil kitay, Haw angko Anak, Kati ahon bali hyamo Ama. Idwa yadi nafwayong kawa hat manga anghil, Ahom balit Ama Hanggan hanyam bali angko Anak. 6 Ginya madis Diyos no kaakbang wa somogot Anak ahan hastay has baba daga, hanya nalwang, Ka manga anghil fagayo fag fasayagdog yadi hat Anak. 7 Kawa hat manga anghil, is Diyos nalwang yadi, Nafabalit manga anghil manga bagyo, Hanggan nafabalit manga fangibolon manga afoy gigang. 8 Dapat kawa hat Anak nafwayong, Haw Diyos, haw wa kagtokaw sas tokawan fanokawan gorangon hanggan aban aban. Haw ka hari kagbahala maslong. 9 Haw ka hari kagbaya waglag ta no ha ogali fiya, Dapat haw kadwat iglag ka gogali dwat. Yakangas Diyos, hyamo wa Diyos nafili hyamo, Hanggan nafabaya wa dahol igdog hyamo basad fangayofan, Bohondi kito kam manga ofod. 10 Is Diyos nafwayong yadi hat Anak, Haw ka Hari, haw ka nahalig sadi wak dahonya daga, Hyamo yadi gamat ka nahalig sadik dahonya banwa sam tongod. 11 Tonya fagayo imliyam wan, dapat haw kamgoyan hanggan has aban aban. Fagayo kam nahalig imdaanon aban, kitos manga fagsolongon. 12 Haw aban fomolhot tonya kitos sadik rotay. Ka daga hanggan banwa aban imtobos wan, Dapat ka Haw, Haw wan,

haw idwa twa kagorang. 13 Nyawa ginahin is Diyos idwa ha nafwayong nyawa haday fag anghil kitay, Haw fag tokaw wan sangko akbang, sangko balis sihon, Aho nodya nadaog fiya fiya im manga kalaban hanggan nafasakop ha hyamo. 14 No kitonya mangharaw, kana ka manga anghil, ham gayfan? Gwadi ka manga anghil manga falad lamang, in Diyos manga fangibolon, it manga sogowan, kaarakitay igtogbong has manga taw kambawi.

2 Orongan wan ka manga anghil nafwayong manga togon hyabi. Hyabi hyabi no ha nasway tonya fag togon, ngatay nalaban, ha akwa wa fadosaan hosto in-anod has taw. Yakanga labi man tam fag bilang wa matawidan fiya fiya kantam donggon hampang manga fakaorongan kati, kaarakitay tam idwa tomalang ginya. 3 Tam labi man idwa twa bomaybay fadosaan tam nogfasigpala di to fag kafiyaon fag Famawi. Kagfon intam ka nagona nafwayong has taw kawa to fag Famawi, hanggan ka mangag talinga hanya hyabi kagfaorongan hantam kitay tonya maanod wan. 4 Is Diyos nafaorongan yadi tonya fag kafiyaon fag Famawi kawat manga nafalag hanggan manga nafatimawa madolaw bokod bokod. Ginya madi, ka Maliyaw fag Falad ha nadisag, nafahafodan has taw no kindat kafangayofanan. To fag manga disag igfaorongan yadi kitay tonya fag Famawi kafiyaon. 5 Is Diyos idwa nafabahala hat manga anghil it bato haligon daga, ka aban fag daga ka hyami fagfwayongon. 6 Yatokitay, kiti kantohoyan sa sadik layonan Kasoratan, Diyos, kana mayon haw nogtohod manga taw, kanat kahologan ha hyamo? Kanat kahologan yadi ha hyamo ista anak maskin haw gano hanya? 7 Sadik ngalay haw nafalibaba man hanya han Diyos manga anghil, Ginya madi haw nadisag hanya ka kangayanan abwat, ka maangay has hari. 8 Fagayo fagayo fag manga bagay fasakop hat karigonan. Is Diyos no nafasakop fagayo fag manga bagay hat karigonan, idwa ha bagay idwa nafasakop ha hanya. Dapat ay, kati fag masohod, tam idya nalag kitay fagayo fag manga bagay nafasakop ha hanya. 9 Dapat kati intam fangayofan iglag in Hisos, ka naagwanta mahori fag kahatayan hyabi. Ginya madis Diyos nadisag ha hanya ka dahol fag kangayanan, nyawa sadik ngalay hyabi, is Diyos nafalibaba yapdi has manga anghil in Hisos kangayanan. Maskin malooy in Diyos kahowayan hantam,

hanya nafaangay kitay is Hisos fag matay kaarakitay hantam fagayo. ¹⁰ Is Diyos ka nahalig hanggan gano fagayo fag manga bagay, nafabalit Anak hosto wan, kawat manga naagwanta, maskin hanya kagtaban han Diyos kayawaan aywan fag manga taw kanbali in Diyos manga anak. Is Diyos igfaad-angayan nogfabali it Anak hosto kitonya, maskin is Hisos kagtaban aywan fag manga taw kaarakitay imbawi. ¹¹ In Hisos Ama hanggan tam, kan Hisos nafabokod han Diyos, intam Ama, tonya yadi, sadi di, ka yadin Hisos Ama. Yakan-gas Hisos idwa kayag ngayan intam it manga fadwasay. ¹² Hanyag fwayong han Diyos kiti, Ho fomwayong hangko manga fadwasay im manga naibolon. Ho mangambahan igfasayagdog hyamo sas basad fakaaywanan matifonan. ¹³ Is Hisos nalwang yadi, Ho somyag in Diyos, nafwayong ya, Aho hanggan in Diyos disag hangko manga anak, hami istay wan. ¹⁴ Kawat faglwangon manga anak, kawa taw, is Hisos inbali yadi taw, kito yadis taw, ha manga faknol, ha folot yadi. Maskin inbali ha habilogan taw, kaarakitay hanya no matay syagan igdaog in Fandaya, ka hyabi ha karigonan has kahatayan. ¹⁵ Kawa kitonya is Hisos nafalfas manga taw gis fakadalaon kahatayan. Hyabi sadik kaban ya, manga taw kadala kahatayan, bilang magafosan sinya, dapat is Hisos nafalfas wan. ¹⁶ Gwadi bohonwan Diyos manga anghil kat manga fagtogbongon, kawan Abraham manga hasokfonan kat fagtogbongon. ¹⁷ Yakangas Hisos nadog yadit manga fadwasay fagdogon fagayo, kaarakitay imbali sadik Gorangon fag Fagalan-han-Diyos, maawaon hanggan idwag fabayaan manga taw. Hanya gibolon yadi han Diyos, igdisag yadi ka fagdisagon kaarakitay ista manga ogali dwat imliyam wan. ¹⁸ Kawas Hisos ha naagwanta intam manga mahori, hanggan nadog yadi is Satanas no nasolay igfaloksowan hanya, yakanga kati hanya syagan igtogbong yadi has manga taw is Satanas nogfaloksowan kati.

3 Angko manga fadwasay kantiwala, kan Diyos manga nafatawag, ka manga gofodan yadi hyami, tam fag tohod fagaba in Hisos. Is Hisos kan Diyos Fandiya Barita gona, hanggan intam Gorangon fag Fagalan-han-Diyos hantam ka mangag syag in Diyos. ² No kinday is Mwisis no matanogon san Diyos fag layonan hyabi, kitonya yadis Hisos no matanogon in Diyos, ka nafili hanya hat bato ibolonon. ³ Ka taw ka kalig balay bohondi kito kat nahalig balay. Kitonya yadi tam nogfasayagdog in Hisos, bohondi kiton Mwisis. ⁴ Fagayo fag balay ha taw nahalig, dapat is Diyos ka nahalig fagayo fagayo fag manga bagay. ⁵ Is Mwisis, no kitay di, matanogon ngay san Diyos fag layonan. Dapat is Mwisis matanogon maskin hanya sogowan lamang, kaarakitay igfaorongon ka manga bagay kamlag aban. ⁶ Dapat ay, is Kiristo bohondi kitay no matanogon kiton Mwisis, hanya matanogon maskin

hanya in Diyos wa Anak, kagbahala han Diyos fag layonan. Tam in Diyos yadi wa sadili fag layonan, tam no mahogod igsyag hanya, hanggan idwa kayag fadog has taw. ⁷ Yakanga kito kan Diyos Maliyaw fag Falad nafwayong, Kati fag sirang ham no domog in Diyos hasnog, ⁸ Ham fag idwag faganiton hayo manga fangayofan kito ka hayo manga magorang hyabi no nalaban in Diyos, hanggan gis nanya ta nasolay in Diyos ta no sas basad fakahyabogan. ⁹ Is Diys iglwang, Ta fadi wadnalag kangko manga naibolon ofat ik safolok fangaraw it kadogayan. Nyawa kitonya hayo manga magorang nafahoriyan angko hanggan nasolay angko sinya. ¹⁰ Yakanga hon-isog waglag ka manga taw gis nanya fag masohod, Hoglwang, Ta kafang fagaba katanog angko manga togon. ¹¹ Yakanga hon-isog is taw, ho nafatohoyan tonya fag manga taw has mahori, Ho nalwang, Nyawa kindawan tadwa domasog hangko bato disagon kafahowayan. ¹² Angko manga fadwasay, tam fag matagahan, ngadi sadi santam fag idwa ha fangayofan dwat kagfaliyam intam fakatiwalaon, hanggan fadayo intam gin Diyos ka boyagan fag Diyos. ¹³ Yatokitay, tam fag fatodtohodan ha sadi ha sadi, sirang sirang, ka gin Diyos baliwa, no ha faglwangon yapdi hantam, Kati fag sirang, kaarakitay nyawa faktaw santam fag idwa gadayaan gis manga ogali dwat hanggan nyawa faktaw santam, fag idwag faganiton it fangayofan. ¹⁴ Maskin tam fagayo in Kiristo wa ofod, tam nodwa gadowan igfadagos igsyag hanya, hanggan aban aban. ¹⁵ Kawa ka Kasoratan iglwang kito, Kati wa fag sirang ham no domog in Diyos hasnog, Fag idwag faganiton hayo manga fangayofan, kito ka hayo manga magorang naogali hyabi, ta no nalaban in Diyos. ¹⁶ Fakta fag manga taw ka nalaban in Diyos, ham gayfan, nyawa ta nadog it hasnog? Bohonwa awkin kayadin Mwisis fagtabanon fagayo gis Ihipto? ¹⁷ Fakta fag manga taw ham gayfan, kan Diyos fakaisogon sas ofat ik safolok fangaraw? Bohonwa awkin ka manga ha ogali dwat, ka manga natay sas basad fakahyabogan, kan Diyos fakaisogon? ¹⁸ Fakta kin hamagdog fag manga taw kan Diyos nafatohoyan has mahori, no nalwang, Nyawa kindawan tadwa domasog hangko bato disagon kafahowayan? Bohonwa awkin ka mangag sway ha hanya, ham gayfan? ¹⁹ Yakanga tam twa wa kitay tadwa nasyagan nadasog han Diyos togonan bato disagon fag daga, kawa tadwa katiwala in Diyos manga fwayong.

4 Kan Diyos togon it bato disagon hantam ha fakin-abang yapdi hantam. Tam syagan domasog hat bato disagon kafahowayan. Dapat tam fag danwa kahawag kitay, ngandayo tiba santam ngan idwa domasog hanya. ² Maskin ngay tam kito yadistaw hyabi, tam nadog yadi kati ka Fiya fag Barita. Intam manga magorang, nyawa nadog hyabi, tadwa ha nafakinabang kat donggon barita, maskin tadwan tiwala tonya. ³ Tam ka

mangan tiwala ka domasog han Diyos bato disagon kafahowayan, kito kat nafwayong, Maskin hon-isog, ho nafatohoyan tonya fag manga taw has mahori, Ho nalwang, Nyawa kindawan tadwa domasog hangko bato disagon kafahowayan. Is Diyos nalwang kitonya nyawan tabo in Diyos ibolon no kalig ka daga hyabi. ⁴ Maskin sadik layonan sas Kasoratan iglwang, kawa has fafito fag sirang, Ginya madi, not fafito fag sirang, is Diyos nafahoway git ibolon fagayo. ⁵ Ginya ka Kasoratan nafwayong ya domwag, Nyawa kindawan tadwa domasog hangko bato disagon kafahowayan. ⁶ Ka manga nagona nadog ka Fiya fag Barita hyabi, idwa nasyagan nadasog han Diyos bato disagon kafahowayan, maskin ta nasway in Diyos. Dapat ka orongan wan, ha akwa domasog aban han Diyos bato disagon kafahowayan. ⁷ Yakanga, sadi ya ginan is Diyos nafwayong sadik sirang, nalwang, Kati wa fag sirang. Aywan fag fangaraw kantolas gis hyabi is Diyos no nafwayong san Dabid ambahan, kawa tonya fag kati wa fag sirang, naolit ya, Kati wa fag sirang ham no domog in Diyos hasnog, Fag idwag faganiton hayo manga fangayofan. ⁸ No nangos is Hoswi nataban manga taw has kafahowayan hosto, is Diyos fawa ha fagfwayongon domwag sadi yak sirang kafahowayan. ⁹ It kahologan ha akwa yapdi kafahowayan, nomtabo gibolon insawad matalagaan has mangag syag in Diyos. ¹⁰ Maskin nyawa faktaw ka domasog han Diyos bato disagon kafahowayan, mamahoway yadi git fagibolonan, kito yadin Diyos, nonsagaya kalig ka daga hanggan banwa, nafahoway wan. ¹¹ Yakanga tam fag idwag fagomon kaarakitay tam somyagan domasog han Diyos bato disagon kafahowayan. Yakanga nyawa faktaw santam fag idwag sway in Diyos, kito kantam manga magorang hyabi, maskin tadwa katiwala hanya. ¹² Maskin in Diyos hampang boyagan hanggan marigon, matayom man ka baladaw kat tayom dowa. Igtigbas, igfabokngan fangayofan taw it isip, bilang yadi wagfisang botol ha otok, twa diglag ista fangayofan hanggan ista fagwason fagayo. ¹³ Kawa kitonya, tam idwa syagan igfyalom in Diyos. Fagayo fag manga bagay malagan wa fiya fiya, bilang wa malatagan san Diyos fag lagan. Hanya kagsolay intam fiya fiya. ¹⁴ Maskin tam ha Gorangon fag Fagalan-han-Diyos kafiyaon, ka natolas ka manga banwa ham tongod, hanggan nadasog han Diyos atobangan, ka mandis Hisos, in Diyos wa Anak, yakanga tam fag idwa kaoman no katiwala ha hanya. ¹⁵ To intam Gorangon fag Fagalan-han-Diyos natwa wan intam manga kalombayan kawa ha nagdalanen yadi wan is Satanas nogfaloksowan hanya, kito yadintam, dapat is Hisos idwa ha ogali dwat. ¹⁶ Yakanga tam fag marigon nogsyag ha hanya, tam no omakbang han Diyos kaawaan fag tokawan fanokawan gorangon, kaarakitay hanyam

awa intam hanggan tomogbong gis nanya is Satanas nogfaloksowan intam.

5 Hyabi is Diyos kagfili fagayo fag Gorangon fag Fagalan-han-Diyos gis fakaaywanan taw, kaarakitay fatonglos it ibolonon igfagalan han Diyos, kawag watwat ka folot hayopan kagfaliyam manga ogali dwat. ² Ka taw di fag Gorangon fag Fagalan-han-Diyos kito yadis taw ik magomo, yakanga igfahowayon wan has manga taw kadwa ha fakatwawon hanggan ka mangag falamang. ³ Maskin hanya magomo yadit fangayofan kito yadi ka iba taw, hanya fag watwat folot hayopan kaarakitay igfaliyam it sadili naogali dwat, bohondi kastaw. ⁴ Nyawa faktaw idwa fiya imbali ha kangayanan Gorangon fag Fagalan-han-Diyos no ha odit sadili fakasayaon. Is Diyos kagfabali hanya ha kangayanan kito yadin Diyos no nafabali in Aaron ha kangayanan hyabi. ⁵ Kitonya yadi, bohonwas Kiristo kagfaabwat it sadili kaarakitay kabali Gorangon fag Fagalan-han-Diyos, dapat is Diyos kagfaabwat hanya no nalwang, Haw angko Anak, Aho hyamo Ama. ⁶ Is Diyos nafwayong yadi sas iba layonan sas Kasoratan, Haw sadik fagalan-han-Diyos hanggan aban aban, Kito yadin Milkisidik fag fagalan -han-Diyos. ⁷ Is Hisos nos-tay yapdi sas baba daga hyabi, hanya nandarangin nogdyang igrokyaw, igfaawaon in Diyos ka syagan bomawi hanya gis kahatayan. Maskin is Hisos nafasolon fiya fiya it fangayofan, is Diyos nanalinga hanya. ⁸ Nyawas Hisos in Diyos wa Anak, hanya naagwanta yadi basad mahori, yakanga natwa wagdog no kanat kahologan no katanog it Ama. ⁹ Ginya madi, nontohoyan kitay is Hisos hosto wan has fagayo, hanyan bali wa Famawi hanggan aban aban has manga katanog hanya. ¹⁰ Hanggan was Diyos nafadog has fagayo fag manga taw kitay, is Hisos inbali Gorangon fag fagalan-han-Diyos kito yadin Milkisidik fag fagalan. ¹¹ Kati bokod wan angko bato fwayongon. No kitay di aywan hyami bato fwayongon hanya baliwa, dapat ay, ham mahori wa fwayongon, maskin ham igfabongkohon hayo. ¹² No kandogay wa ti, no kitay di, ham fiya wambali mangag faadal has tiba taw, dapat hanggan wa kati ham bato yapdi faadalon ngap ka fabagowanan fagadalon gin Diyos hampang. Ka fiya, no kitay di ha hayo, ka maganit fag fanganon, dapat hanggan kati hayo fakasayaon afo yapdi soso. ¹³ Kat fanganon, no afo yapdi soso, tonya bilang yapdi manga anak dararag, idya twagdog no kinday tam nombali fiya san Diyos faglagan. ¹⁴ Dapat ka maganit fag fanganon kawa has manga dahol taw, ka mangan yayom wan, ka twagdog has fiya hanggan has dwat.

6 Gwadi fag bohondi ka manga fabagowanan fagadalon kawa han Kiristo kantam fagadalon yapdi, fag ka mandi manga adalon kagfatwagdog intam fiya fiya. Fag bohondi intam dan wa fagadalon itfagonan kantam fagoliton fagaba, kito wasagdayo ka man-

ga ogali kadwa fiya san Diyos fag lagan, hanggan fag katiwala hanya, ² kitos manga faadalon hasagfatogna baliwa, mangag fasalangday gamat has taw, kawa ka manga natay imboyag ya, hanggan kawa ha fadosaan idwa ha katabowanan. ³ Yatokitay, tam fag fadagos yapdi intam adalon. Non Diyos wa kafangayofanan, mi omibolon tonya. ⁴ Maskin kinda araw nogfasoyo han Diyos hanggan nogfafwali ya nangos ka manga nadayo ya, ham gayfan? No kitay di, ta natwa wagdog hyabi, ta fadi wadnadog in Diyos manga disag gim tongod, tan-aktom yadi wan has manga natanggap ka Maliyaw fag Falad. ⁵ Ta nadog yadi wa fiya fiya in Diyos hampang kafiyon, hanggan ta nalag manga karigonan madolaw, ka bago dimlag fiya fiya aban. ⁶ Ta no nadog wa fagayo, dapat ta nafalfas ya, fawa syagan igsoyo domwag, kawa bilang wagfapako ya in Diyos Anak sas nafatimbangan hayo, hanggan tagfahayan yagdog hanya. ⁷ Nonsiwang ka mwayan kafiyaon, ka daga kagfatobo manga tanom kasta fagfakinabangon ka giyab sinya, tonya fag daga domog kafiyon gin Diyos. ⁸ Dapat, no manga odi lamnon dogiyan kagtobo sinya fag daga, tonyadwa ha fakinabang. Is Diyos ngandayo nga domwat aban tonya fag daga, ginya madi, sas katabowanan, somonog lamang tonya. ⁹ Angko manga fagalwasiyon, nyawa migfwayong kitonya, mi twa wa kitay kafiyaon hayo manga fangayofan. Ham twa no kana ka fiya ha hayo, hanggan igtogbong hayo kaarakitay is Diyos bomawi hayo. ¹⁰ Is Diyos kafiyaon nogbahala intam. Is Diyos igtoghod di hayo naibolon, kawa ham igtogbong manga kapariho intiwala, kagfalag kitay ham galwasi in Diyos. ¹¹ Angko fakasayaon orongan kitay, tam fagayo fagayo fag dagos wa kogo-dan hanggan has katabowanan, kaarakitay tam tomanggap intam manga fagfanayaon. ¹² Yakanga tam fag idwa kabali mafang. Tam fag tolad ka manga maagwantaon igsyag in Diyos, ginya madi igtanggap in Diyos togonan bato disagon. ¹³ Is Diyos no nafwayong han Abraham it bato disagon hanya, naolit it sadili ngayan kaarakitay igfarigon it taranggapan, maskin idwa ha dahol man in Diyos ngayan kaarakitay igfarigon. ¹⁴ Is Diyos nalwang, Angko disagon ha hyamo, intam togonan, ho faanod wa fiya fiya, ho faaywan yadi hyamo hasokfonan. ¹⁵ Is Abraham idwag fagomon gagwantag fanaya kan Diyos natogon ha hanya, ginya natanggap wa tonya. ¹⁶ Manga taw gwas sadik ngayan abwat man hanya it kangayanan, ginya madi no nafarigon it fwayong kitonya, imtabo wa balinya. ¹⁷ Kitonya yadi, is Diyos igfaanod igfarigon it togonan bato disagon no gwas it ngayan, kaarakitay igfatwagdog has manga taw ka tomanggap it bato disagon kitay, it fangayofan idwa kaoman. ¹⁸ Is Diyos idwag dowag ginan nogfwayong, hanggan idwa yadig bohag tonya fag dowak bagay. Ka sadik bagay, kawat togonan bato disagon hanggan ka fadowa fag bagay,

kawag faanod no gwas it ngayan. Yakanga tam ka nalagyo han Diyos, intam wa logawan, intam fangayofan idwa kaoman nogsyag tonyat manga natogonan bato disagon hantam. ¹⁹ Tam nogsyag kitonya, bilang wa ha gawid lobid santam fangayofan, kito ka sahayon sas baba dagat, ka ha lobid famatorosan, ha sayangan maganit, hanggan idwam bogloy. Tonya fag lobid igdasog hanggan wa ha sadik lingoban has basad fanahop rotay sas Fanimbaan-Dahol san Diyos banwanan sam tongod. Ka lobid ginya no masayangan, sas nafabokod ya domwag fag lingoban, ²⁰ kan Hisos nagsakbawan, nagona wantam nasakbaw, kawa hantam. Is Hisos sadik Gorongan fag Fagalan-han-Diyos sinya, hanggan wa has aban aban, kito yadin Milkisidik fag Fagalan-han-Diyos.

7 To fag is Milkisidik hyabi ista gorongan sas ban-wa Salim, in Diyos ka abwat man has fagayo fagayo, it fagalan yadi. Is Milkisidik natagbo in Abraham is Abraham no kaoli wan nontabo waglaban has manga gorongan. Is Milkisidik nafwayong hanya, Haw lomag im fagbayaon gin Diyos. ² Is Abraham nadisag han Milkisidik kat fasafolo git nadaog gis awayan. Bago bago in Milkisidik ngayan it kahologan, santam sanglitan, Kafiyaon fag gorongan nogbahala. Hanya ista gorongan yadi sas Salim a, santam sanglitan, it kahologan, hanya ka gorongan kagfon kahowayan. ³ Idwan sorat no faktan Milkisidik ama hanggan ina, hanggan no faktat hafowanan. It kasagayan hanggan kahatayan idwa yadin sorat. Kito yadin Diyos Anak, hanya sadik fagalan-han-Diyos. Bohondi kitay gis nanya odi fag masohod, hanggan has aban aban. ⁴ Fandog ngay in Milkisidik kangayanan abwat. Is Abraham nadisag hanya ka fasafolo it nadaog gis awayan. Hanggan is Abraham haraw, no kitay di, sadi yadi wak ha kangayanan bilang wantam pinagkaama. ⁵ In Mwisis togon igfatohoyan kitay kantalaga manga fagalan-han-Diyos gin Libi hasokfonan ka tomanggap manga fasafolo gis manga taga Israil. No kalwang ta nogtanggap tonya gi mandit manga fadwasay nyawa myasa wan Abraham manga hasokfonan. ⁶ No kitay di, to fag is Milkisidik bohonwan Abraham hasokfonan, dapat natanggap yadi gin Abraham it fasafolo. Is Milkisidik nadogang yat manga hampang fiya han Abraham kan Diyos nafwayong it togonan bato disagon. ⁷ Tam idwa gadowan kitay ka kampang fiya, igfasayagdog has taw, it kangayanan abwat man kat fakampangon fiya. ⁸ In Libi hasokfonan, kagtanggap it fasafolo gis taw, katay di, dapat intohoyan sas kasoratan kitay is Milkisidik boyagan. ⁹ Yakanga tam twa waglwan, no kitay di, nyawas Libi kagtanggap it fasafolo gis taw, nadisag yadit fasafolo han Milkisidik gin Abraham. ¹⁰ No kalwang, is Libi bilang gofod yadin Abraham is Milkisidik no natagbo hanya, kawas Libi in Abraham fofo madayo. ¹¹ Ka manga fagalan-han-Diyos gin Libi

hasokfonan ka nafwayong in Diyos manga togon has manga taga Israil. No nangos hosto wan ka gin Libi hasokfonan fag manga fagalan-han-Diyos it ibolon, kaarakitay igfabali hosto ista manga ogali, fag fawa ha iba fag fagalan kiton Milkisidik kadwa kiton Aaron. ¹² Nogfaoman ka ogali fagalan-han-Diyos, fag im-oman yadi wa ka togon. ¹³ Kawantam Fon kantam faglwangon istay ka gis iba hasokfonan, idwa gin Libi hasokfonan. Hyabi idwa hanbali iba fag fagalan-han-Diyos, ngadi sadi, ginya fag hasokfonan. ¹⁴ Fagayo twa kitay kagfon intam gin Hoda hasokfonan. Is Mwisidwa idwa naowas in Hoda ngayan nogfwayong hasagfagalan baliwa han Diyos. ¹⁵ Ti labi man tam twa wagdog kawa ha akwa ya sadik fagalan-han-Diyos kiton Milkisidik. ¹⁶ Bohonwa ka gis ogali togon kagfabali tonya fag fagalan, bohonwa kawa ginya fag hasokfonan ka taw, dapat kawa gis karigonan haboyagan kadwa ha katabowanan, hanya nonbali fagalan-han-Diyos. ¹⁷ Maskin ka Kasoratan iglwang kawa hanya kiti, Haw ka fagalan-han-Diyos hanggan has aban aban, Kito yadin Milkisidik fag fagalan. ¹⁸ No kitonya, ka togon gona in-oman wan maskin malombay, korang di, idwa yadi nasyagan igfafiya. ¹⁹ Maskin ka manga togon has manga taw idwa nasyagan nafahosto ista manga ogali, dapat ay, kantam natanggap fagsyagon bohondi kitonyak fiya, tonya fag fagsyagon kagfaakbang intam han Diyos. ²⁰ Hanggan is Diyos nahampang marigon no nafabali ka bago fag fagalan-han-Diyos, dapat nogfabali iba taw fagalan, is Diyos idwa nahampang marigon. ²¹ Dapat is Diyos nahampang marigon no nafabali in Hisos intam fagalan, kito ka Kasoratan iglwang, Kagfon fagayo nahampang marigon, Idwa yadig dowo ginan it naisip noglwang, Haw wa ka fagalan hanggan has aban aban. ²² Kawas Hisos inbali fagalan-han-Diyos kitonya kagfatohoyan kitay, it bago fag taranggapan hantam im-anod wan. Tonya ka fiya man ka gona fag taranggapan. ²³ Sadi yak bagay kagfabokod ka dowak fagalan. Gis hyabi hyabi ta fagaba wagtobos ka fagalan no natay wan, kawadwa syagan igfadagos it bato ibolonon. ²⁴ Dapat is Hisos boyagan nyawa ginahin, idwa ha fagalan tomobos hanya. ²⁵ Kawa kitonya, maskin is Hisos boyagan hanggan aban aban kaarakitay igfagalan manga taw han Diyos, hanya bon lamang, hanya syagan digbawi hanggan has aban aban, fagayo ka gakbang han Diyos, nogdalan lan Hisos. ²⁶ No kitonya, is Hisos ka Gorangon Fagalan maangay hantam. Hanya ka syagan igfahosto intam manga kakorangan. Is Hisos maliyaw, idwa ha ogali dwat, idwa ha fabangdanan gi hanya. Hanya idwa kitos taw kitay ha ogali dwat. Kati hanyan abwat, abwat man kantam faglagon fag banwa. ²⁷ Is Hisos idwa kito ka tibak gorangon fag fagalan ka fiya igdisag manga nawatwat folot hayopan sirang sirang, bago bago kawat sadili naogali dwat, ginya madi kawasta

manga naogali dwat iba taw. Dapat is Hisos sadi di ginan nawatwat it sadili folot, no nadisag it sadili habilogan. ²⁸ Ta no ha nafili manga gorangon fag fagalan hat ibolonon, ka maangay san Mwisidwa togon hyabi, tonya ha kagomowan di. Dapat ay, kanbali gorangon fag fagalan in Mwisidwa odi ginanan igtogon, is Diyos no nahampang marigon, kawan Diyos Anak wan. Hanyadwa ha kagomowan, inbali hosto hanggan aban aban.

8 To ka orongan hyami fagfwayongon, tam ha akwa sadik gorangon fag fagalan-han-Diyos kitonya, matokawan santam Hari akbang, sat balis sihon kagbahala sas banwa sam tongod. Tonya fag Gorangon it kangayanan abwat man has fagayo fagayo. ² Intam fagalan gibolon sinya sas nafabokod ya domwag fag lingoban orongan, sas basad Balay Rotay kantam Fon nafatobo, bohonwa taw ka nafatobo. ³ Fagayo fag gorangon fag fagalan ka bahalag disag manga fagdisagon han Diyos, hanggan igwatwat folot hayopan. Yakanga intam gorangon fag fagalan fag ha akwa yadi disagon. ⁴ Is Hisos nostay is baba daga, idya fiyam bali fagalan-han-Diyos maskin ha akwa wa manga fagalan kagdisag manga disagon gis nanya kito kasta togon. ⁵ Ka manga fagalan-han-Diyos istay it ibolon bilang tolad, igfahalimbawa di ka san Diyos banwanan sam tongod. Kiton Mwisidwa no kaakbang wa fatobo ka Balay Rotay, is Diyos mahogod wagtogon hanya kiti, Haligan wa fagayo fagayo fag manga bagay kito kangko nafalag hyamo tolad sas baba moyod. ⁶ Yakanga kawas Hisos kagfagalan sas sadik taranggapan fiya man ka gona, kawan ganit sas mahalga man fag manga bagay kan Diyos togon bato disagon, in Hisos bato ibolonon labi wa fiya man has ibolonon kantohoyan hyabi has iba fag fagalan-han-Diyos. ⁷ No nangos ka taranggapan gona idwa ha korang, fawa ha toboson domwag sadi yak taranggapan. ⁸ Dapat is Diyos nalag kitay it sakop fag manga taw ha korang yapdi, idya hosto it ogali, yakangas Diyos nafwayong ya domwag, Aho ha togonon yapdi taranggapan bago han Israil, No ginahin aban fag masohod, Hanggan han Hoda hasokfonan yadi. ⁹ Idwa kito kangko natogon hyabi hasta manga magorang hafowon, Aho no nagamit nataban is taw gis Ihipto. Tadwa nafatonglos angko togonon hyabi. Yakanga aho nafabayaan was taw. ¹⁰ To kambali angko togonon bago han Israil manga hasokfonan. Nomdasog gis nanya fag masohod aban, Ho bilang wa tomanom angko manga togon sasta basad fangayofan, Ho tomagis tonya sasta basad isip. Ahom bali ista Diyos, tambali wangko sakop fag manga taw. ¹¹ Nyawadwa ha fomwayong hat manga kaiban, Ngatay hat fadwasay, Haw fag homilala intam Fon Maskin ta fagayo homilala wangko, Nyawa kadwa ha manga kangayanan, hanggan ka ha akwa kangayanan abwat. ¹² Maskin ho faliyam wan ista manga naogali dwat, Hodwa tomohod domwag kasta manga nai-

bolon kadwa fiya. ¹³ Is Diyos no gwas sadik togonan bago, nafabali idwa ha kahologan ka togonan gona. Nyawa kana fag togonan nodwa ha kahologan, ta fawag tohod ka gona, kaliyam wan.

9 Ka gona fag taranggapan madi ngap ha manga ogaliyon nogsimba. Ha balay yadi fanimbaan istay is baba daga. ² Ta nahalig sadik balay rotay, ha dowak lingoban. Kas dasogan fag salogan ta nogn-gayan, Nafabokod fag lingoban. Sinya ha salong sas tongod salangan, ha dinolang hanggan tinapay ista disag han Diyos, mafwalidan basad dinolang. ³ Kat fadowa fag lingoban sas dayo fanahop rotay, ta nogn-gayan, Nafabokod man ka sadik lingoban. ⁴ Sinya ha fanonogan famabanglo, hanggan haban taranggapan. Fagayo dowo ta nafababaw ginto. Sas basad haban ta ha nafasawad in Diyos nafatimawa fanganon mana hyabi, ista fagtohodon mafwalidan basad sohadan ginto. Ha akwa yadi in Aaron sokod ka faginan wa bomorak, igsigangat wan, hanggan ka manga bato dalafi ka ha sorat manga togon. ⁵ Ka sas baba haban ka famwalidan folot, it ngayan, Tokawan Kaawaan. Sas tongod tokawan kaawaan ha dowak kirobin, kagfahilala kitay is Diyos sinya wan. Ka manga kirobin manga fakfak iglanbong ka Tokawan Kaawaan. Dapat no kati di, midya fomwayong igstadig sadi ha hayo it manga kahologan. ⁶ Kitonya wat kafiyon sasta basad fanimbaan rotay. Sirang sirang ka manga fagalan-han-Diyos igfakbaw ka balis dasogan fag salogan kaarakitay fangonglos it bato ibolonon. ⁷ Dapat ay, ka gorongan fag fagalan lamang kagsakbaw sas fadowa fag salogan, sadi di ginan sa sadik fangaraw. Idwag sakbaw sinya nodwa ha diya folot it disag han Diyos, kawa hat manga naogali dwat, hanggan yadi ka manga taw naogali dwat, igfakop yadi ista naibolon nyawa tadwa natwa kitay dwat. ⁸ No sadi yapdi kagsakbaw sinya sadi di ginan sadik fangaraw, ka Maliyaw fag Falad igfatwagdog hantam fiya fiya kitay, idya kalwang maboklasan ka lingoban ka nafabokod man ka sadi, no ha akwa yapdi ka balis dasogan fag salogan. ⁹ Tonya fag balis dasogan fag salogan igfahalimbawa yapdi ka kati fag manga masohod it fagfwayongon. Kasta manga nadisag hanggan nawatwat folot hayopan sinya han Diyos idwa syagan igfabali hosto ista manga fangayofan ka mangag simba sinya. ¹⁰ Kasta manga naibolon sinya ha odis manga fanganon, manga inomon, manga ogali bokod bokod hasagfalinay baliwa. To fagayo manga bato ibolonon sas faglagan kasta ogaliyon no kandogay day is Diyos nodyag faoman fagayo fag manga bagay. ¹¹ Dapat ay, is Kiristo indasog wan. Is Kiristo ka gorongan fag fagalanhan-Diyos kagfatonglos fiya man has manga bagay gona. Is Kiristo ka fagalan sas fanimbaan ka dahol man it kangayanan, idwa hagkitonyak fiya. Bohonwa taw ka nahalig tonya fag fanimbaan, bohonwa gistay is baba daga fag man-

ga bagay. ¹² Sadi di ginan is Kiristo no nasakbaw sas nafabokod man ka sadik lingoban, yakanga fiya wan. Bohonwa manga folot hambing, manga folot anak baka aman, kat nadiya disagon, dapat it sadili wa folot. Yakanga intohoyan kitay intam manga naogali dwat inliyam hanggan has aban aban. ¹³ San Mwisid togon faglagan, ka manga taw no ha dwat, bilang fagliyon, imbali fiya ta nogfafarisikan ka folot manga hambing, manga todo baka, hanggan manga fogis gis domaya-ga baka kan-irog. ¹⁴ Dapat in Kiristo folot bondi basta fag folot. Gin Diyos Falad, kadwa ha katabowanan, is Kiristo nadisag it sadili, kafiyon, idwa ha dwat ngadi ogbot ogbot, it disag han Diyos. In Kiristo folot kagfaangay intam manga fangayofan hanggan isip, kaarakitay tam domayo intam manga ogali kadwa ha kahologan, tam omibolon yadi ka boyagan fag Diyos it ibolon. ¹⁵ Yakangas Kiristo ka fagalan sas bago fag taranggapan, kawat kahatayan kagfaliyam intam manga ogali dwat kantam naibolon tam nogfasakop yapdi ka gona fag taranggapan. Kawa kitonya, in Diyos manga nafatawag fag manga taw tomanggap in Diyos manga bato disagon fagayo, kadwa ha katabowanan. ¹⁶ No ha Kasoratan kagfathoyan no hada aban ista manga sangkap, manga daga, fag imtohoyan kitay ka nahalig kasoratan natay wan. ¹⁷ Idya mangorayan, kagfon no boyagan yapdi. No bay natay wan, ta bago di mangorayan wan. ¹⁸ Kawa kitonya, nyawa ka taranggapan gona idya katohoyan nodya ha folot gis hayopan kandisag. ¹⁹ Is Mwisid nafwayong has manga taw in Diyos natogon manga bato ogaliyon fagayo. Ginya madi, nabol manga folot anak baka aman, folot hambing, ha aktom danom, natogna sinya dararag fag olad topa, hanggan sadik falongfong isopo, ginya nafafarisikan ka togon Kasoratan hanggan ha sayo manga taw fagayo. ²⁰ Dayog fafarisikan, is Mwisid kampang yadi, iglwang, To fag folot kagfaganit in Diyos disag taranggapan ha hayo, hanggan nalwang, ham fag katanog it togon ha hayo. ²¹ Kitonya yadis Mwisid nafafarisikan has Balay Rotay, hanggan kasta manga sangkap fagayo sas fanimbaan. ²² No gin Mwisid togon, fagayo wa bangan fag manga bagay inlinay sas folot. Idwa yadi ha faliyam ogali dwat nodwa ha folot in-olan. ²³ Yakanga ka manga sangkap istay is baba daga fag fanimbaan, kagtolad ka manga sangkap san Diyos banwanan sam tongod, fag imlinay gis manga nafafarisikan folot hayopan kitonya. Dapat ay, fag bohondi kito ka folot hayopan kamdisag kaarakitay igfaangay ka manga sangkap san Diyos banwanan fag fanimbaan. ²⁴ Maskin is Kiristo idwa nasakbaw ha sadik lingoban ka nafabokod man ka sadi, ista nahalig kagtolad lamang ka orongan, dapat ay, nadagos wa nasakbaw han Diyos banwanan sam tongod, hanggan kati sawan Diyos atobangan, igfagalan intam sinya. ²⁵ Fangaraw fangaraw ka manga gorongan fag fagalan

Hodyo igsakbaw has basad lingoban ka nafabokod man ha sadi, ha diya folot hayopan. Dapat is Kiristo sadi di ginan no nasakbaw, kaarakitay igdisag it sadili, intam fangafiyan han Diyos, tonya hosto wan. ²⁶ Tonya fag sadi di ginan nodya hosto, is Kiristo nangos fag fagaba wa katay gi yapdis hyabi, ka daga non-ganit. Dapat kati, no kaakbang wa has katabowanan fag manga masohod, sadi di ginan is Kiristo nonlag istay is baba daga, kaarakitay domaog manga ogali dwat kawat nadisag it sadili habilogan, bilang fangafiyan han Diyos. ²⁷ Kawan tohoyan has manga taw, ta fag matay sadi di ginan, ginya madi ha fatohoyan it hadasogan, ²⁸ kitonya yadi is Kiristo sadi di ginan nadisag it sadili habilogan, intam wa fangafiyan han Diyos, maskin hanya naagwanta nadiya intam manga ogali dwat. Hanya nombangkad ya aban, fawa fangafiyan domwag no kadi has ogali dwat baliwa, mangahot odi ka mangag fanaya hanya.

10 No kitay di, in Mwisitogon bilang yapdi marom nogfaayfan ka manga kafiyaon fag manga bagay kam-anod aban, bilang odi tolad, idwa kalag fiya fiya yapdi. Ka togon gin Mwisitogon, ka ha manga nawatwat folot hayopan fangaraw fangaraw, idya syagan igfabali hosto ka manga fangayofan taw ka gakbang han Diyos. ² Ka gakbang han Diyos hyabi, it manga naogali dwat no nangos intabo wa balinya, it manga fangayofan nonbali hosto ta nogwatwat manga folot hayopan kitonya, ta fawa ha fagayfanon domwag it manga ogali dwat, ta fawag watwat domwag folot hayopan. ³ Dapat kagwatwat folot hayopan kitonya, kasta fagdiyaon fangaraw fangaraw di, igfatohod ya domwag ka manga taw it manga naogali dwat, ⁴ maskin no kadi folot manga todo baka, manga hambing, idwa syagan igbol manga ogali dwat. ⁵ Maskin kitonya, is Kiristo no kadokson has baba daga, nalwang han Diyos kitay, Kam fakasayaon bohonwa kitay manga disagon hanggan manga nawatwat folot hayopan. Dapat kam nafatalaga hangko, kawangko habilogan kangko bato disagon. ⁶ Hadwag baya ka mangan disag kansonog, hanggan ka manga nawatwat folot hayopan kaarakitay has manga ogali dwat. ⁷ Yakanga hoglwang, Diyos, hostay di kaarakitay homtanog im fagfwayongon angko, Kito kansorat sas Kasoratan kawa hangko. ⁸ Is Kiristo nalwang bago bago, Hadwa kasaya, idwa yadig baya ka manga nawatwat folot hayopan hanggan manga disagon, nyawa ka manga disag kansonog, hanggan ka mangan disag has ogali dwat baliwa, nyawan Diyos togon han Mwisitogon iglwang fag disag kitonya. ⁹ Ginya nalwang, Diyos, hostay di, homtanog im fwayongon angko. Is Diyos nadayo ka gona fag nadisag hayopan, nabalyo man fag kawas Kiristo kamdisag. ¹⁰ Is Kiristo Hisos intanog in Diyos fwayong, nadisag it sadili habilogan, kawat folot inwatwat sadi di ginan, yakanga

hosto wa tonya. Kawa naibolon kitonya, is Kiristo Hisos kagfaangay intam hanggan igfabokod intam han Diyos. ¹¹ Fagayo fag fagalan-han-Diyos malindogan gibolon sirang sirang, igdisag kitonya, kitonya mandi fag mangag watwat folot hayopan. Dapat tonya fag manga disagon idya syagan igbol manga ogali dwat. ¹² Dapat is Kiristo nondisag wan, kawat folot inwatwat sadi di ginan, hosto wan kawa has manga ogali dwat hanggan aban aban. Ginya madi, is Kiristo natokaw wan san Diyos akbang, sat balis sihon. ¹³ Kati is Kiristo dan wa mafanayan sinya, is Diyos nodya nadaog in Kiristo manga kalaban, ginyag fasakop ha hanya. ¹⁴ Kawa kitonya nyawa sadi ginan lamang nadisag, is Kiristo nafabali hosto, hanggan aban aban, it fagfaangayon fag manga taw, kat nafatohoyan han Diyos ibolon. ¹⁵ Ka Maliyaw fag Falad igfaorongon yadi hantam kawa hanya baliwa. Nalwang bago bago, ¹⁶ Kagfon intam iglwang, Tombali angko taranggapan has taw nomdasog gis nanya fag masohod. Ho tomagis angko manga togon sasta basad isip, Ho bilang wa tomanom tonya sasta manga fangayofan. ¹⁷ Ginya madi hanya yadi ka nalwang, Hodwa tomohod domwag ista manga naogali dwat, hanggan ista manga naibolon kadwa fiya. ¹⁸ Maskin ista manga naogali dwat inliyam wan, fawa ha disagon ya domwag kawa has ogali dwat baliwa. ¹⁹ Yakanga angko manga fadwasay, kati tam fawa ha fakadalaon igsakbaw has basad lingoban ka nafabokod man kat sadi, maskin is Hisos natay, ²⁰ nafatalaga yadi hantam sadik dalam bago, hanggan boyagan, hanggan igsagaya has dayo fanahop rotay. Ka orongan, kawan Hisos wa habilogan ka nafatalaga dalam. ²¹ Tam ha sadik Gorongan fag fagalan-han-Diyos kagbahala han Diyos fag layonan fag manga taw. ²² Yakanga intam fangayofan nodwa ha fagisipon intam naogali dwat hyabi, maskin tam nasoyo wan, ginyan angay wantam fangayofan, kito yadi kantam habilogan no naogas sas maliyaw fag danom halimbawa, ginya madi intam fangayofan no hosto, hanggan tam nogsyag orongan han Diyos, tam fag gakbang hanya. ²³ Tam fag idwa kaoman intam fagsyagon, fag idwa yadi gadowan maskin is Diyos idwag bohag nyawa ginahin, hanggan hanya ka nafwayong hantam it bato disagon. ²⁴ Tam fag idwag fagomon igfatodtohodan ha sadi ha sadi kitay, tam fag gamigosan hanggan fag gibolon fiya. ²⁵ Tam fag fagaba kabangkad igtifonan, fag idwa kito ka tiba kagfasigpala, idwa kabangkad. Yatokitay, fag farigon ha sadi ha sadi, labi man kati tam igdog kaakbang wantam Fon hadasogan fag Sirang. ²⁶ Taw no natwa waggod hanggan natanggap ka fakaoronganan, dapat igfadagos yapdi has ogali dwat, fawa ha fawatwat domwag folot kawag faliyam it manga naogali dwat. ²⁷ Fawa hamsawad kaawaan. Kamsawad sat basad fangayofan, ka odi kadala wa dahol dahol, igfanaya odi ka

Sirang Fangabayan hanggan mahori wa dahol fag afoy ka somonog in Diyos manga kalaban. ²⁸ Hyabi, no dowak taw, ngatay tolo kagfaorongon kitay sadik Hodyo nalaban in Mwisitogon, ta fawa kaawa tonya, tagfahatay wa dagos. ²⁹ Yatokitay, mahigpit man kat fadosa ka maangay has taw kagyod in Diyos Anak, labi man nodwag fahalga it folot kagfaganit taranggapan kagfahalyaw it fangayofan, hanggan igyod ka maawaon fag Maliyaw fag Falad. ³⁰ Tam kilala kaglwang kito, Aho wa ka ganti, aho wa kagfadosa. Hanya yadi kaglwang, Intam Fon fatohoyan kat sakop fag manga taw hat hadasogan. ³¹ Madala wagdog ka boyagan fag Diyos nogfatohoyan hat hadasogan ka manga taw ka gogali dwat, nyawa natanggap hyabi ka fakaorongonan. ³² Ham fag tohod no kinday ham no natwa wagdog in Diyos kafiyan, ginya madi aban ham ha manga nadalanan mahori wa dahol dahol, dapat ham naagwanta wa a, idwan balaw. ³³ Nomtoon ta nayod hayo hanggan nafahoriyan sas fakaaywanan faglagan. Nomtoon ham indamay yadi wan hayo manga ofod, ta no nafahoriyan has taw kitonya. ³⁴ Ham indamay yadi wan poriso. Ham idwan hori is taw madi ngap, nyawa ta nahagaw hayo manga botang, maskin ham twa kitay ka kaakwaan ka mafanayan hayo aban, fiya man ka kati fag kaakwaan, hanggan dogay man imdwat. ³⁵ Yakanga tam fag idwa kagomo nogsyag in Diyos, maskin tam nogsyag, dahol intam tanggapon fasalamat aban. ³⁶ Ka fiya tam fag gagwanta kaarakitay tam imtanog in Diyos kafangayofanan, hanggan tomanggap it togonan bato disagon. ³⁷ Maskin, Ngalay di, idwa domogay, Kambangkad aban kadasog wan. ³⁸ Angko matanogon fag fangibolon fagaba boyagan nogsyag angko, Dapat hanya no domayo angko, hodwag baya hanya. ³⁹ Dapat tam idwan aktom ka mangag dayo, ka manga has kadwatan. Tam in-aktom has mangag syag in Diyos, yakanga tam imbawi.

11 Tam nogsyag in Diyos, tam twa matohoyanan kitay intam manga fakasyagon imlag wa aban, tam twa yadi kitay ka manga bagay kadwa malagan, orongan yadi wan. ² Ka manga taw hyabi nogsyag in Diyos, is Diyos igbaya wan. ³ Kawa tam nogsyag in Diyos, tam natwa wagdog kitay kawat hampang ka nahalig intam daga, hanggan tam natwa yadi wagdog kawa ka manga bagay ka malagan kati, inhalig gis idwa hara ha akwa. ⁴ Kawas Abil igsyag in Diyos, in Abil nawatwat folot hayopan, fangafiyan han Diyos, fiya man kan Kain nadisag manga hanon. Kawa kitonya, is Diyos no natanggap in Abil disag, intohoyan kitay is Abil maangay han Diyos faglagan. Nyawas Abil natay wan, bilang yapdi kampang hantam kawa hanya nogsyag in Diyos. ⁵ Kawas Inok igsyag in Diyos, hanyadwa natay, indiya odi has fadowa fag haboyagan. Ka Kasoratan iglwang, Tadwa nalag in Inok kawas Diyos nafaalin hanya, nalwang yadi kitay, Is Inok dan-

wan balin Diyos fagbayaon nyawas Diyos idyapdi naahot hanya. ⁶ Is Diyos idwag baya kadwag syag hanya. Maskin nyawa faktaw ka omakbang han Diyos, fag katiwala kitay ha akwa wa Diyos, hanggan fag katiwala kitay hanyag disag yadi fiya has manga taw ka gakbang hanya. ⁷ Kawas Nowi igsyag in Diyos, hanya natalinga in Diyos fatagak, kawa has manga bagay kadyan anod. Is Nowi nahalig sadik sahayon baba dagat kaarakitay hanya, hanggan it talanahan imbawi. Maskin is Nowi igsyag in Diyos, manga taw sadi wak baba daga intohoyan has fadosaan. Is Nowi ha akwa yadi wan in Diyos kafiyan kawa nogsyag hanya.

⁸ Kawas Abraham igsyag in Diyos, hanyan tanog in Diyos, is Diyos no nasogo hanya ha sadik daga in Diyos nafatohoyan bato disagon hanya. Is Abraham nalawah wan, nyawadwa twa no hadat hadasogan.

⁹ Kawas Abraham igsyag in Diyos, hanya nabanwanan, bilang odi sadik famaklay, san Diyos nafatohoyan bato disagon fag daga. It manga balay, balay odi rotay, kito yadinda Isaak da Hakob, pariho it manga natanggap in Diyos togonan bato disagon. ¹⁰ It balay kitonya odi no bali day is Abraham igfanaya yapdi sadik banwa fiya, ka ha faganitan, kadwa kahawig. Is Diyos ka naisip kitay fag kitonya ista fagfanayaon bago fag banwa, hanggan hanya yadi ka nahalig. ¹¹ Kawas Sara igsyag yadin Diyos, nyawa hanyan sagaya was fanganahon, is Diyos nafaangay kitay, ha aba omanak di, maskin is Sara natwa kitay is Diyos idwag bohag.

¹² Yakanga gi sadik taw, kawat kagorangan kaakbang wa has kahatayan baliwa, ginya wa kanginan sadik hasokfonan kanbali kayo was fanggasan sas banwa sam tongod, hanggan kayo was onay sas gobang dagat.

¹³ Tonya fag manga taw fagayo igsyag yapdin Diyos hanggan wa ta natay, nyawa tadya natanggap in Diyos togonan bato disagon. Dapat ta bilang wa nabantay, insaya waglag gis ayayo. To fag manga taw bilang wa nafwayong kitay, ta kito odis manga famaklay istay sas baba daga, giwas iba banwanan. ¹⁴ Ta noglwang kitonya, intohoyan kitay tagsayak yapdit sadili banwanan. ¹⁵ Ta nangos no kawili yapdista nagalanan fag banwanan, ta syagan di nangos kafwali ya sinya. ¹⁶ Dapat kasta fakasayaon sadik banwanan fiya man sinya, kawa sam tongod. Yakangas Diyos idwa kaya kabali ista Diyos, kawa hanya ha nafatalaga wan sadik banwa ista banwanan. ¹⁷ Is Diyos no nasolay in Abraham, kawas Abraham igsyag in Diyos, is Abraham nadisag hanya in Isaak, bilang wa kitos sogbaon hayopan.

Nyawas Abraham nadog in Diyos togonan bato disagon hanya, hanggan nadog in Diyos, hanya no nalwang kitay, gin Isaak kambali hyamo hasokfonan, is Abraham idwa kwangit igdisag han Diyos it anak nyawadwam dowo. ¹⁹ Is Abraham natwa wagdog fiya fiya kitay, is Diyos syagan faboyag ya manga taw. Hanggan, no kalwang, is Isaak bilang wa nwali han

Abraham gis kahatayan. ²⁰ Maskin is Isaak igsyag in Diyos, is Isaak nafatohoyan handa Hakob da Isaw kat tanggapon fiya aban. ²¹ Kawas Hakob igsyag in Diyos, hanya no kaakbang wa matay, nafatohoyan han Hosi manga anak dow, kat tanggapon fiya aban. Natawid sat fon sokod a, matarahongan, nafasayagdog in Diyos. ²² Kawas Hosi igsyag in Diyos, hanya no kaakbang wa matay, nalwang kitay in Israil manga hasokfonan mwali ya gis Ihipto aban, natogon kitay, diyan yat manga botol. ²³ Kawan Mwis is manga magorang igsyag in Diyos, tadwa kadalag laban ka gorangon batasan. Ta no nalag kitay ka anak dararag kafiyaon, tolok magdanon ta nafalogaw ka anak basad balay. ²⁴ Kawas Mwis is igsyag in Diyos, hanya no dahol wan, nadayo kitay, ta fag idwa lomwang hanya in Faraon dayaga faganon anak. ²⁵ Non Mwis di fangayofan, fiya man hanya nomaktom han Diyos fag manga taw kagdog mahori, has homoyog manga taw ka ha kasonlongan, ka ngalay di kaliyam kawa gis ogali dwat. ²⁶ Maskin san Mwis basad fangayofan, bilang wa mata lagan it manga tanggapon fiya aban, yakanga hanya natikis wa omagwanta ka mahori, kawa galwasi in Diyos-natogon-Famawi. It kafangayofanan wan tonya fiya man has manga kaakwaan Ihipto. ²⁷ Kawas Mwis is igsyag in Diyos nasyagan di naobon ka Ihipto, idwa kadala ka gorangon nyawa kaisog. Kawa bilang waglag ka Diyos kadwa kalag, it fangayofan marigon wan. ²⁸ Kawas Mwis is igsyag kitonya, nasyagan igfabago ka Fanohodan Nagsagayan, nafasognod kitay manga taw fag lidgid folot sas boknga sakbawan balay, kaarakitay ka anghil kagfadosa idwag fahatay in Israil manga hasokfonan it manga anak ahan. ²⁹ Kawan Israil manga hasokfonan igsyag in Diyos, ta nasyagan nadifay ka Dagat Dararag. Ka dagat infalhang has boknga, yakanga ta nadifay sas baba daga mamaya. Dapat ka manga taga Ihipto no kasaya omoyan is taw, ka danom dagat nasafong ka manga sondalo taga Ihipto, yakanga dagat natabon was taw. ³⁰ Kawan Israil manga hasokfonan igsyag in Diyos, ka alad bato sas banwa Hiriko inbodbolongan lamang, ta nontabo wagsafong ka banwa Hiriko fitok sirang. ³¹ Kawas Rahab, sadik ina fabayowan wa dahol, igsyag yadin Diyos, yakanga idwa kafang igfasakbaw in Hoswi manga sogowan, ginyas Rahab idwan sakop has dwat, kito kat manga ofod ka dayo igfasakop in Diyos. ³² Aho awkin igfadagos yapdi? Dogay araw ho no tomoltol ha hayo, ho no fagayo wa fomwayong, kawa handa Gideon, da Barak, da Samson, da Hipti, da Dabid, da Samwil, hanggan in Diyos manga fangampang. ³³ Kawa tagsyag in Diyos, tiba syagan di nadaog ka manga gorangon sakop. Kafiyaon tiba no nabahala has taw kafiyaon, ta natanggap in Diyos togonan bato disagon. Ta nogsyag in Diyos, tiba nalag kitay, ka manga bibig liyon in-gom lamang. ³⁴ Tiba nasyagan di

nafahapsa afoy dahol dahol. Tibadwan sakop ista talibong. Tiba magomo ongay, dapat is Diyos igdisag karigonan kaarakitay imbali marigon sas awayan. Tiba nasyagan di nafafwali manga habanan sondalo ka gis ayayo fag banwanan. ³⁵ Kawa tagsyag in Diyos, manga ina naofod yat manga kaiban ka natay dapat inboyag ya. Tibadwa kasaya kalfas gis basad porisowan, maskin tagfili fag nangos matay wan sas basad mahori, kaarakitay imboyag ya has fiya fag haboyagan. ³⁶ Tiba ta nayod, tiba ta nabakbak, tiba ta naporiso magafosan kadina. ³⁷ Tiba ta nabintok bato, tiba ta nalagadi has fagbokngan habilogan, tiba ta nabasing talibong nogfahatay. Tiba manga rotay manga odi anit topa, manga anit hambing. Tiba bali myabog wa dahol, manga taw nafahorihan fiya fiya hanya, mahigpit ngawan. ³⁸ Bilang odista fagdayoon, dapat ay, to fag manga taw fiya man ka tiba taw istay is baba daga. Tiba malahawan odi ha sayo basad fakahyabogan, hanggan wa ha basad moyod, matagowan, nalogaw wa ha sayo daga lohib bato, hanggan basad loong. ³⁹ Kawa tagsyag in Diyos, ta nafaobon hantam sadik faorongon kagfatohod intam fagaba. Dapat in Diyos togonan bato disagon idyan anod gis nanya fag masohod hyabi. ⁴⁰ Kawas Diyos ha fangayofan fiya man hantam, kitay tam fag im-aktom yadi has taw in Diyos togonan bato disagon nom-anod.

12 To fag manga taw aywan, ka nasyag in Diyos hyabi, bilang wa maligongan wantam. Fagayo igfaorongon hantam kitay, kafiyaon it fagsyagon. Yakanga tam fag gobon fagayo fag manga bagay kag-taktak intam, hanggan ka ogali dwat ka fagabag lafit intam. Ginya madi tam fag idwag fagomon igfadagos igdalandan hantam bato lahawan hantam fagonan. ² Intam mata fangayofan nogbantay, fag fagaba ma-toonan han Hisos lamang. Kawas Hisos kagfabago tam nogsyag ha hanya, hanya mandi kagfahosto. Kawas Hisos natwa kitay ha kasolongan mafanayan ha hanya, hanya naagwanta wan it kahatayan sas nafatimbangan hayo, idwa yadi naya natay. Kati is Hisos natokaw san Diyos akbang, sat tokawan fanokawan gorangon balis sihon. ³ Tam fag maisipan fagaba no kinday is Hisos naagwanta manga taw, ha ogali dwat, no kadwat iglag hanya hanggan nalaban hanya, kaarakitay tam idwam lombay, idwa yadim gomo intam manga fangayofan. ⁴ Tam noglaban has ogali dwat, idya han-olan intam folot. ⁵ Tam awkin idwag tohod in Diyos adal hantam kawa tam it manga anak? It manga hampang igfarigon intam manga fangayofan. Angko anak, ha fag idwa gayfan kitay, kanantam Fon no gato hyamo? Im fangayofan fag idwam gomo, nyawa kabaya hyamo. ⁶ Maskin intam Fon no galwasi manga taw mangabaya wan, Igbakbak yadi fagayo kanbali it manga anak orongan. ⁷ Tam fag gagwanta fagayo kitontam Ama no kabaya intam, maskin to kag-

falag kitay tam in Diyos wa manga anak. Fakta fag anak, ham gayfan, it ama idwa kabaya? ⁸ Nodwa ha kabaya intam, kitontam ogali kabaya intam manga anak, it kahologan, tam bohonwa orongan it sadili anak, gi odis famabayowan. ⁹ Sadi ya kitay, tam ha manga ama taw ka kabaya intam, yakanga tam magalang hanya. Idwa awkin labi man maangay tam nogtalinga hanggan igfasakop han Diyos intam Ama, kaarakitay tam imboyag, kawantam fangayofan bago giwan Diyos no kaginan? ¹⁰ Intam manga magorang no kabaya intam, sadik ngalay lamang no kinday kasta fangayofan fiya. Dapat is Diyos kabaya intam hantam kafiyan, kaarakitay tam kabali maangay kito yadi hanya. ¹¹ No kandogay day no ha kabaya yadintam, tam kadwat wagdog, tam kahori odi. Dapat ay, nonsagaya gis nanya, tam no natalinga ista habaya intam, tam ha kahowayan gintam ogali kanbali fiya. ¹² Yakanga, nogfahalimbawa, tam fag idwa kalibang odi masandigan, ngatay mafolidan odi, gwadi fag farigon intam habilogan. ¹³ Tam fag lahaw has fiya fag ogali fag dalam kaarakitay imrigan intam bitis, hanggan tam idwa kitos fihong, nogfahalimbawa. ¹⁴ Tam fag fagaba gamigosan hantam manga kapariho. Fag kabali maliyaw intam manga fangayofan, maskin tam idwa lomag kagfon intam, intam fangayofan nodwa kitonya. ¹⁵ Tam fag matagahan kitay nyawa faktaw fag idwa domayo in Diyos malooy fag kahowayan. Tam fag faliyam wan ka manga dwat fag fagayfanon santam fangayofan gis hyabi, hawa golit igfalafit has iba taw hanggan igfaagran. ¹⁶ Fag matagahan kitay fag idwa hagfabayowan nyawa faktaw santam, hanggan fag idwa yadi gayfan kitay ka manga bagay sas bago fag fangayofan idwa ha kahologan. Fag idwa kiton Isaw ka nafabalyo it bato tanggapon git ama, kawa hanya ista anak ahan, nafabalyo sadi dik fingga fanganon. ¹⁷ Ginya madi aban, nasagad kitay it ama fag domisag hanya it togon faobonon, ka maangay hat anak ahan. Dapat it ama idwa nasyagan nafafwalit hampang, kaarakitay igdisag han Isaw it fagsagadon, maskin idwa nasyagan nafaoman in Isaw naibolon, nyawas Isaw hanggan wa goraw wa kasaya tomanggap tonya fag togon faobonon. ¹⁸ Tam no gakbang han Diyos, tam idwa kitos manga taga Israil ka naakbang ha sadik moyod malagan. Tonya fag moyod, moyod Sinay, ha giging afoy, masafongan marom, ha bagyo yadi marigon, ¹⁹ ha hasnog bodyong sinya, ha kampung yadi. Ka manga taw no nadog tonya fag hasnog, tagsagad fag katohas wan, maskin ²⁰ tadwa gagwanta tonya fag togon kaglwang, Nyawa faktaw, nyawa hayopan, ka somapkid tonya fag moyod, ta bomintok bato hanggan wa fahatay. ²¹ Ta gafalad waglag kasta nabantay, yakanga hanggan is Mwisal nalwang yadi, Kadala waglag, ho karokog wan. ²² Dapat tam no gakbang han Diyos, tam gakbang has Moyod Siyon, han

Diyos boyagan it banwa, ka Hirosalim sam tongod. Hadwa homamin tomap ka manga anghil matifonan sinya. ²³ Tam gakbang han Diyos manga anak ahan ka masolong igtifonan, kat manga ngayan insorat sam tongod. Tam gakbang han Diyos ka mamatohoyan has fagayo fag manga taw it tanggapon. Tam gakbang yadi hasta manga falad taw fiya, kanbali hosto. ²⁴ Tam gakbang han Hisos kawag fagalan sas taranggapan bago, hanggan tam gakbang hat folot kan-olan, ka fiya man kan Abil folot it kahologan. ²⁵ Yakanga tam fag matagahan, fag talinga hasagtolto hantam. Kagdayo igtalinga, no hagtoltol hanya istay sas baba daga, idwa bomaybay fadosaan. Kinda ara tam, tam no dayog talinga kagtoltol, igfatagak intam gim tongod. ²⁶ Maskin is Diyos nahampang hyabi, gis nanya ka daga inhawig. Dapat is Diyos natogon kati, Sadi ya ginan aban ho fahawig ya, bohondi ka daga hanggan wa banwa aban. ²⁷ Noglwang Sadi ya ginan, katwa wagdog kitay domwat kat manga nahalig bagay gona kahawig, kaarakitay ka tomobos tonya kadwa kahawig, tonya wa ka domogay hanggan aban aban. ²⁸ Yakanga tam fag fasalamat han Diyos kawan Diyos sakop banwanan kantam fagtanggapon idwa kahawig. Tam fag fasayagdog han Diyos no kinday ka maangay ha hanya, magalang hanggan kadala yadig sway, ²⁹ kawantam Diyos kitos afoy ik marigon, kamin famagba fagayo.

13 Maskin tam manga fadwasay san Kiristo, tam fag fadagos gamigosan. ² Tam fag idwa kafang igfasakbaw manga famaklay gis iba banwanan. Tiba kitonya wan, idwa nahafang nafasakbaw, yakanga tiba ginan, manga anghil kat nafasakbaw, nyawa tadwa nahilala. ³ Tam fag tarogbongan ista fakahoriyon ta nonporiso hanggan tam fag bilang yadi basad porisowan. Tam fag bilang kito kasta nafahoriyan, maskin tam idwa twa ngatay tam domog yadi kitonya aban. ⁴ Tam fagayo fag tomwa kitay kafiyaon ka ogali igtalsawa. Fagayo fag talsawa fag kawidwiliyan maskin is Diyos mamadosa ka mangag fabayowan. ⁵ Fag bohondi kwarta kantam fagisipon fagaba. Tam fag baya wan nyawa kana ka santam. Maskin is Diyos iglwang, Hodwa omobon hyamo, hodwa yadi fabayaan. ⁶ Yakanga tam idwa gadowan noglwang, Intam Fon kagtogbong angko, hodwa ha fakadalaon. Hodwa ha fagayfanon, nyawa kana kasta ibolonon hangko. ⁷ Tam fag tohod ka mangag bahala intam, kagtoltol in Diyos hampang hantam. Tam fag maisipan no kinday it ogali no boyagan yapdi, nyawa hanggan wa natay. Tam fag tolalad hanya nogsyag in Diyos. ⁸ No kinday is Kiristo Hisos hyabi, kitonya mandi kati, nyawa aban, idwa yadim oman. ⁹ Fag idwa kadiya igdog ista manga madolaw fag adal bokod bokod. In Diyos malooy fag kahowayan kagfarigon intam manga fangayofan, bohonwa manga togon hasagfabaybay fanganon baliwa.

Ka mangadwag sapkid fagliyon, idwa yadi farigon it fangayofan ginya. ¹⁰ No kitay di, tam ha sadik fanogban, dapat ka manga fagalan-han-Diyos sas fanimbaan Hodyo idwa fiya no somayo intam sinya, maskin ka yapdi folot hayopan it fagsyagon. ¹¹ Ka gorangon fag fagalan-han-Diyos sas fanimbaan Hodyo igdiya folot manga hayopan has basad lingoban, ka nafabokod man ka sadi, kaarakitay igdisag ka folot hayopan kanwatwat kawa has manga ogali dwat, dapat ka hayopan it habilogan tagsonog sas dayo banwa. ¹² Is Hisos kitonya yadi no natay, sas dayo alad banwa, kaarakitay igfabali intam manga fangayofan maangay, kawa sat folot. ¹³ Yakanga tam fag imbangkad yadi hanya sas dayo alad banwa. Tam fag omagwanta yadi kat donggon mahaya. ¹⁴ Maskin intam banwanan orongan, kadwam liyam, bohonwa kastay is baba daga. Intam fagsayahon fag banwanan, ka sam tongod fag banwanan kamlag aban. ¹⁵ Yakanga tam fag fagabag fasayagdog in Diyos, kawa han Hisos. Tam nogfasayagdog in Diyos kitonya, bilang intam wa disagon hanya. Tam igfasayagdog hanya kawa tam igbayat ngayan. ¹⁶ Tam fag idwag fagomon gogali fiya, hanggan igtogbong has tiba taw, maskin tonya yadi ka manga disagon kan Diyos fagbayaon, ka fiya man has sogbaon hayopan hyabi. ¹⁷ Tam fag fasakop has mangag bahala intam. Fag katanog it fwayong. Ta bahala wa gano intam, hanggan ta aba somagot in Diyos it naibolon kawa hanya baliwa. Tam no katanog it fway-

ong, ta bomaya wan, kawam tonglos it bato ibololon. Tam nodwam tanog, tamhori wan, hanggan tam idwa yadi ha fakinabang. ¹⁸ Ham fag darangin kawa ha hyami. Midwa kayag fwayong hayo kitay, midwa ha fagisipon hyami naibolon kadwa fiya. Hyami fakasayaon hyami ogali fag maangay nyawa ginahin. ¹⁹ Ahog sagad hayo darangin kitay, aho nangos fag ngalay di mwali ha hayo. ²⁰ Ka kahowayan giwan Diyos no kaginan. Hanggan hanya ka nafaboyag ya kagfon intam, is Hisos. Is Hisos kanbali dahol man has fagayo fag fangano taw kito ka gano topa, kawat folot kagfaganit ka taranggapan kadwa ha katabowanan. ²¹ Is Diyos nangos fag domisag ha hayo ka korang sa hayo, kaarakitay ham syagan gibolon it fakasayaon. Is Diyos nangos fag gibolon santam basad fangayofan ka maangay sa hanya, gin Kiristo Hisos. Tam fag fasayagdog in Kiristo nyawa ginahin. Fadi wan, fag kitonya wa ngay. ²² Angko manga fadwasay, angko fagsagadon, ham fag idwa kahorig dog angko manga adal istay fag sorat, maskin agod di. ²³ Ho kasaya nangos ham fag twa kitay, ta nafalfas in Timotiyo, intam fadwasay, gis porisowan. No ngalay dimbangkad hastay, ho toman yadi hanya, ho nombangkad has nyamo hayo. ²⁴ Ham fag fwayong has mangag bahala ha hayo, hanggan hantam manga fadwasay fagayo kitay, mi gwas hayo fagayo. Intam manga fadwasay sas sakop Italya gwas yadi hayo. ²⁵ In Diyos malooy fag kahowayan fag fagaba wa sa hayo fagayo.

SANTYAGO

1 Ahos Santyago kagsorat ha hayo. Ahon Diyos hanggan in Kiristo Hisos kagfon intam, it sogowan. Ho gwas hayo, kan Diyos manga nafili, ka narowayan ha sadik baba daga. ² Manga fadwasay, tam fag masolong di intam fangayofan, nyawa tam basad manga fakahoriyan bokod bokod kagsolay intam. ³ Maskin tam twa kitay tam nodwag fagomon igsyag in Diyos, tam no basad manga mahori, labi man imrigan intam fangayofan igsyag hanya. ⁴ Yakanga, tam fag danwa karigon odi, karigon odi, tam nogsyag hanggan has aban, kaarakitay intam manga fangayofan imbali hosto, idwa yadi ha korang. ⁵ Dapat, nyawa faktaw santam, nodwa ha kadonongan, sagadan gin Diyos. Ginya madis Diyos domisag hanya kadonongan, maskin is Diyos madisagon, idwa yadi somogat has taw. ⁶ Dapat, tam nogsgad wa orongan, fag syag wa fiya fiya. Fag idwa gadowan intam fangayofan, maskin ka gadowan kitos taob dagat, bagyo odi kagdiya nyawa haday. ⁷ Nyawa faktaw santam no gadowan it fangayofan, idwa twa fiya fiya it fakasayaon, fag idwag syag kitay hanya ha tanggapon gisagfon intam, nyawa kana. ⁹ Intam fadwasay ka myabog fag igbaya wan is Diyos nogfaabwat it kangayanan. ¹⁰ Hanggan intam fadwasay ka maakwa fag igbaya yadis Diyos nogfalibaba hanya, kawa ka kaakwaan imliyam wan kitos borak lamnon. ¹¹ Ka myanit no kaabwat, kawa myanit wa dahol, ka manga lamnon kalayong di. It borak karabak wan, idwa yadi fiya kabantay. Kitonya yadi, ka taw maakwa bilang yadim layong, nyawa haraw kalibang odit manga ibolon fangaboyagon. ¹² Tam nodwa kaoman, nyawa hagsolay intam, intam manga fangayofan masolong. Maskin ka kahoriyan nomtolas wan, tam no naagwanta wan, is Diyos ha fasangbaw hantam ka haboyagan idwa ha katabowanan kantam Fon togon bato disagon has manga galwasi hanya. ¹³ Nyawa faktaw no ha laman mahori kagsolay hanya, fag idwag lwang kitay is Diyos kagfaloksowan hanya. Idwa ha syagan igfaloksowan in Diyos, hanggan is Diyos idwa yadig faloksowan nyawa faktaw. ¹⁴ Kasta sadili fangayofan masayaon kagfaloksowan has taw, igfasayagdog hanya has ogali dwat. ¹⁵ Ka bali fangayofan masayaon nogtobo, hanggan nogdalid, igbohoad ogali dwat. Ginya madi ka ogali dwat nomdahol, it bohoad kahatayan wan. ¹⁶ Yatokitay angko manga fagalwasiyon fag manga fadwasay, tam

fag idwa gadayaan. ¹⁷ Sonson wa fiya in Diyos manga disag hantam, hanggan fagayo fag manga maangay fag bagay gi wam tongod, gin Diyos intam Ama ka nahalig ka manga bagay kagfayawa intam. Dapat hanyadwa kaoman nyawa ginahin, idwag balihid, idwa yadig farom ka yawa gintam. ¹⁸ Is Diyos nafabali intam it manga anak git fakaorongan hampang, kawat fasadan kitonya, kaarakitay tam imbalit nafalayon gona git manga nahalig fagayo. ¹⁹ Angko manga fagalwasiyon fag manga fadwasay, tam fag matohodan wan, tam fag idwa kafang igtalinga has taw. Fag idwa kasadi ginan gidolog. Fag idwa madalig sagot dwat donggon. Fag maayfanan yap fiya fiya. ²⁰ Maskin tam no kaisog idwag togbong intam kabali fiya san Diyos faglagan. ²¹ Yakanga tam fag dayo ka manga mahaya fag ibolon. Obonan ka manga dwat fag ogali. Tam fag fasolon intam fangayofan sadi wak dahonya han Diyos nogfaanod it hampang, kantanom santam basad fangayofan. To fag hampang ka syagan igbawi intam. ²² Tam fag idwag daya intam sadili maskin tam igtalinga odin Diyos hampang, idwa katanog. ²³ Kagtalinga odi, dapat idwa katanog, kitos sadik taw ganino salamin, ²⁴ igbantay it walong, ginyag fabayaan wat sadili, idwag tohod no kinday it walong. ²⁵ Dapat ay, kagbantay fagaba fagaba ka togon hosto, kagfalfas intam, hanggan igtohod kat donggon gin Diyos hampang, igfayayom yadi hanya katanog fagaba, yabay tonya fag taw bomaya wan nyawa kanat ibolon. ²⁶ Nyawa faktaw no gayfan kitay hanya masimbaon wa dahol, dapat idwa fiyat hampang, hanyag daya yapdit sadili, idwa yadi ha kahologan nyawa masimbaon wan. ²⁷ Dapat, nos Diyos intam Amag lag, ka fiya fag masimbaon orongan, igtogbong has manga olila, hanggan manga ina balo ta no ha fakahoriyon, idwa yadi falafit hat sadili fangayofan ka kadwatan gistay is baba daga.

2 Angko manga fadwasay, kawa tam mangam tiwala han Kiristo Hisos, kagfon intam, hanggan kagfon kayawaan, tam fag idwa ha fagihidon taw. ² Maskin, halimbawa, handasog hantam fanifonan sadik taw, singsing di bay ginto a, balokasan di maangay wan. Ginya madi sadi yak taw myabog indasog yadi, it rotay dwat dwat odi. ³ Ginya tam iglwang has fiya it rotay, Haw fag istay sas fiya fag tokawan. Ginya madi, iglwang ya has myabog, Haw fag is nyamo di malindogan, ngatay, fag matokawan is nwa, baba daga,

sangko dayo bitis. ⁴ Tam no gibolon kitonya, tam ha fagihidon taw. Tam igfalamang igfili maskin idwa fiya intam fangayofan. ⁵ Angko manga fagalwasiyon fag manga fadwasay, ham fag matalingan. Is Diyos nafili ka manga myabog sas baba daga, kaarakitay imbali maakwa sas fangayofan nogsyag hanya. Ginya ka myabog ka omafo yadin Diyos sakop it natogon bato disagon has manga galwasi hanya. ⁶ Dapat ay, tam igyod ka manga myabog. Bohonwa aw ka maakwa kagfalingon tam, ham gayfan? Kigpitan intam, igdiya intam has manga fangabaya sas banwa? ⁷ Bohonwa awkin ka yadi manga maakwa kagyod ka maangay fag ngayan kan Diyos nafangayan intam? ⁸ Kafiyaon tam no gafanod ka togon gin Diyos ka hari, kito kat nafasorat kitay, Haw fag galwasim kapariho kito yadim sadili. ⁹ Dapat tam no ha fagihidon taw, tam ha ogali dwat, hanggan in Diyos togon iglwang, ka ha ogali dwat fiya wa fadosaon. ¹⁰ Nyawa faktaw no katanog in Diyos togon aywan, dapat nasway ka sadik togon, nasway wa fagayo. ¹¹ Is Diyos kaglwang kitay, Haw fag idwag fabayowan, iglwang yadi, Haw fag idwag libon taw. Dapat tam, nyawadwag fabayowan, dapat tam iglobon taw, halimbawa, tam nasway wan in Diyos togon sadik dahonya. ¹² Yakanga tam fag madahan tam no kam-pang, hanggan intam manga ogali fag fiya, maskin tonya yadi fag togon kagfalfas intam, omato yadintam tam nogsway tonya. ¹³ Kadwa twa kaawat ofod, ka fangabaya idwa yadi kaawa hanya. Dapat ay, ka manga maawaon idwa kadala ka fangabaya. ¹⁴ Angko manga fadwasay, kanat kahologan, ham gayfan, ka sadik taw noglwang, not hampang di, Aho orongan wantiwala han Diyos, dapat ay, idwa fiyat ogali? Ham gayfan awkin tonyam bawi wan nomtiwala kitonya? ¹⁵ Halimbawa, ka sadik fadwasay nodwa rotay, idwa yadi ha fanganon, ¹⁶ ginya madi sadi gintam lomwang kitay, Is Diyos nangos tomogbong hyamo. Fag solong wam rotay. Fakapsog wan. Hampang odi kandog, dapat ay idwa yadi ha fagdisagon kasta kakorangan. Fiya awkin no kitonya, ham gayfan? ¹⁷ Nyawa faktaw noglwang kitay, hanyan tiwala wan, dapat idwa ha fagfalagon fiya fag ogali, tonya fag taw idwa ngap intiwala. ¹⁸ Abi di man sadik taw noglwang kitay, Haglwang haw intiwala wan, dapat ahog lwang, Angko ogali ka fiya. Angko sagot kito, Ha no kasayag faorongan kitay haw intiwala, nyawadwa fiyam ogali, ho falag yadi hyamo kangko fag manga ogali fiya kagfaorongan kitay, ho katiwala wan Diyos. ¹⁹ Haw katiwala kitay is Diyos sadi di. Fiya ngay no kitonya. Dapat ay, nyawa ka manga labang idwag fabohag kitay is Diyos idwam dowa. Ta karokog yadi wa fag kadala hanya. ²⁰ Polos polos haw. Haw awkin kasaya yapdi kitay ho fatohoyan ha hyamo ka orongan? Bohag odi fag iglwang kitay ha katiwala wan nodwa fiyam ogali. ²¹ Is Diyos nalwang kitay is Abraham, intam pinagkaama, nangafiyan han Diyos

kawat ibolon fiya, nodwa nahwangit han Diyos it anak, is Isaak, nyawa nadiya wa has baba danglayan. ²² Hadwa awkin twagdog kitay is Abraham katiwala wan hanggan gibolon fiya, tonya fag dowak bagay koyogan mandi. Ka nafatohoyan kitay is Abraham idwa korang no katiwala, kawat naibolon fiya. ²³ In-anod yadi wan ka kasoratan fwayong kitay, Maskin is Abraham katiwala in Diyos, yakangas Diyos igfatohoyan kitay is Abraham nangafiyan hanya. ²⁴ Sinya wa tam no lomag kawas Diyos iglwang kitay tam nangafiyan wa hanya, bohondi kitay kawa tam no katiwala, dapat tam nogfadagos yadi has ogali fiya. ²⁵ Idwa awkin kitonya yadis Rahab, sadik ina fabayowan wa dahol, dapat nafalag fiya it manga ibolon han Israil manga sogowan ka namantay mafyaloman ista banwanan? Is Rahab nafasakbaw ka manga sogowan a, natagos taw, ginya nafwayong yadi ka tiba dalan kaarakitay ta lomagyog. Yakangas Diyos iglwang kitay, is Rahab nangafiyan wa hanya. ²⁶ No kinday tam mahatayan intam falad no nalahaw gintam habilogan, kitonya yadi ka katiwala no masamanan gis fiya fag ogali.

3 Manga fadwasay, tam fag idwa aywan ka kasaya kabali famaadal kawa tam twa kitay ka tam ka mangag faadal, mahigpit kagfon intam no omato intam, tam nogfalamang, bohondi kito ka tiba. ² Tam fagayo fagabag falamang. Dapat ay, inhosto intam ogali, nyawa faktaw, nodwa masalanon, twa yadig dahan it sadili nyawa kana. ³ Tam nogfwalid aramri ogbot ogbot basad bibig habayo kaarakitay igfalawah, ka habayo katahin odi, nyawa haday tam nogfalawah. ⁴ Kitonya yadi ka manga sahayon baba dagat, nyawa gorongan, hanggan marigon ka bagyo nogtolod, ka ogbot ogbot fag fangabang, daga habot sahayon, igfabalihid ka sahayon no hadawat fakasayaon kagfalawah, ya hanya wan. ⁵ Kitonya yadintam manga bibig. Nyawa ogbot ogbot fag sangkap sas habilogan, aywan nogfatakdog is taw. Fanlag kin, sadik igang ogbot ogbot syagan digfahayab sadik talon dahol dahol. ⁶ Ka bibig taw bilang wa afoy. Sadi wak kayonya manga ogali dwat kalafit gis bibig ha sadi wak dahonya habilogan. Ka afoy bibig intongo gis oliyanan fadosaan. Ginya madi ka bibig bilang wa afoy igfalafit ogali dwat has manga taw, ta no boyagan yapdi. ⁷ Manga taw syagan igfahagop fagayo fagayo fag manga manok, manga hayopan kaglahaw, hanggan ka gilafang, hanggan manga oyang. Korang, syagan gidfahagop. ⁸ Dapat ay, nyawa faktaw idwa ha syagan igfahagop ka bibig taw. Ka bibig taw dwat wa dahol, idwa kahoway. Bilang wa ha dalit fakatayon. ⁹ Tonya yadi fag bibig kagfasayagdog kagfon intam hanggan intam Ama. Tonya yadi fag bibig ka kam-pang dwat has taw kanhalig igtolad in Diyos. ¹⁰ Sadi dik bibig kagfasayagdog hanggan igfadwat igdog. Angko manga fadwasay, fag idwa ha akwa kitonya santam. ¹¹ Tam awkin gayfan ha

danom matabang hanggan mayat gi sadi dik bolbogan? ¹² Idwan, manga fadwasay. Ka fon igos idwa bomohad olibo nyawa kindawan, hanggan ka fon obas idwa bomohad igos. Danom matabang idwa yadi bomolos gis bolbogan mayat. ¹³ Fakta santam ka ha kadonongan hanggan twagdog fiya fiya? Fag imlag sat fiya fag ogali, kawat kadonongan igfasolon di has taw. ¹⁴ Dapat it fangayofan no sonson wa kahori, kaingli, hanggan igasadili odi, fag idwag fatakgdog kitay hanya ha kadonongan, fag idwag fabohag ka fakaoronganan. ¹⁵ Ka kitonya fag kadonongan idwa gin Diyos, kadonongan odi sas baba daga, gis bali fangayofan masayaon, gin Fandaya. ¹⁶ Maskin no siday kasta fangayofan maingliyong hanggan igasadili odi, sonson wa gagran hanggan fagayo fag manga ogali dwat sinya yadi wan. ¹⁷ Dapat ay, ka ha kadonongan gin Diyos, bago bago maliyaw it fangayofan, mahoway, magop, hanggan idwag faagran, maawaon, dagos wa gogali fiya. Idwa ha fagihidon taw. It ogali fiya bondi kitay famalagon odis taw. Tonya wa ka fakatwawon gin Diyos. ¹⁸ Ka manga galwasi kahowayan bilang wagtanom kahowayan. Ginya madi, tonyag bohad kahaslongan.

4 Kanat tigadan tam no fagaba kahodhoriyan, manga gagran, ham gayfan? Idwa awkin kawan-tam manga bali fangayofan masayaon idwa kaoman, yakangag sadili odi, iglaban hantam bali fangayofan fiya? ² Tam igfayafo wan, dapat ay, tam idwa somyagan omafo, yakanga tam kaingli wa dahol hanggan wagfahatay, no nangos imbolay di tonya gi hanya. Tam hanggan wa kaarisogan hanggan wa garogwanan. Maskin tam idwag sagad gin Diyos, tam idwag bolay intam fakasayaon. ³ Nyawa tam somagad wan, halimbawa, tam idwa yadi lomag maskin tam igfalaming nogsagad. Intam fakasayaon igasadili odi. ⁴ Tam goyon yapdin Diyos kalaban. Tam idwa aw twa kitay tam nogfabali mahalga kastay fag baba daga fag manga ogali, tam iglaban han Diyos? Maskin ngay, nyawa faktaw kagfahalgastay is baba daga fag manga ogali, in Diyos wa kalaban. ⁵ Tam awkin gayfan kanfwalid sas Kasoratan idwa ha kahologan noglwang, Is Diyos maskin galwasi wa dahol kat disag fangayofan hantam, kabalaw no ha kagaw intam gi hanya? ⁶ Dapat marigon man in Diyos disag togbong hantam, kawa ka Kasoratan iglwang yadi, Is Diyos igtaktak ka manga ha takan, dapat igtogbong has mangag fasolon it fangayofan. ⁷ Maskin ngay, tam fag fasolon han Diyos. Tam fag laban in Fandaya, ginya madi hanya lomagyog wan. ⁸ Tam fag gakbang han Diyos, ginya madis Diyos omakbang yadintam. Tam ka ha manga naogali dwat, fag sonson wa fiya kati intam manga gamat ibolonon. Tam ka manga gadowan fagaba, fag sonson wa malinay kati intam manga fagayfanon. ⁹ Tam fag goraw wagdayo intam ogali dwat. Fag bohondi ogbot no

goraw. Tam fag idwag baya. Fag karongkot wa ngap.

¹⁰ Tam fag falibaba intam fangayofan hasagfon intam, hat atobangan, ginya madi hanya farigon ya intam.

¹¹ Manga fadwasay, tam fag idwa fagabag fadwat igdog ha sadi ha sadi. Kagfadwat igdog, ngatay gato it fadwasay, igfadwat igdog hanggan gato ka Batasan Hodyo. Tam no gato ka Batasan, tam bohonwa manga katanog, tam inbali wa fangato. ¹² Sadi di ka natogon ka Batasan Hodyo, tonya yadi ka fangabaya. Hanya lamang ka ha kangayanan ngatay igbawi, ngatay igfadosa manga taw. Dapat fakta tam ka gato intam kapariho taw, ham gayfan? ¹³ Tam fag gisip fiya fiya. Tam madali odig lwang kitay, Araw, ngatay bago marom, tam hawas nwa fag banwa, tam bomanwanan sinya sadik fangaraw, tam mamalidya yadi, ginya tam lomag dahol fag kwarta. Fayag lwang kitonya. ¹⁴ Tam idwa twa no kinday tam aba no marom. Intam haboyagan bilang kito odis songaw sinyahod, nyawa tam iglag kati, araw araw idwa akwa. ¹⁵ Kito ka fiya intam bato fwayongon, Intam Fon nogfaangay, ngatay kito, ngatay kitonya intam ibolonon. ¹⁶ Dapat tam kati igbaya hanggan igfadaholon intam sadili fagsyaganon. Tam igfatakagdog. Dwat no kitonya intam ogali. ¹⁷ Tam no natwa sadik bagay fiya intam bato ibolonon, ginyadwag fatonglos tonya, ya tam ha ogali dwat.

5 Ka manga maakwa santam fag gisip fiya fiya. Ham fag goraw wan hanggan fag ngongoy wan, kawa ham lomag mahori wa dahol aban. ² Hayo kaakwaan inboyok wan. Hayo manga rotay ka kafiyaon, losbongon losbongon odi, kawa tipakong ka kagat. ³ Hayo ginto hanggan pilak aningga odi ka kwan. Hanggan tonya fag manga aningga kagfatohoyan kitay, idwa fiya hayo ibolon. Tonya fag manga aningga ka homamin hayo manga habilogan aban, bilang ka afoy has alfotong. Ham natifon hayo kaakwaan, dapat kastay is baba daga kaakbang has katabowanan fag sirang. ⁴ Fandog ngay ka manga famalo hadwa nabayad, nafalingo odi, igtawag marigon nogsombong han Diyos ka hayo nadaya. Hanggan kam nadaya im manga fangibolon ka gani, it hasnog ta nogmanaw, kadog wan hanggan wa hasagfon intam, ka marigon man has fagayo. ⁵ Ham insolong odi hayo kaakwaan istay sas baba daga. Ham nafahapsog hayo fagaba, kitos hayopan bato sogbaon. ⁶ Ham naato hanggan wa nafahatay ka fiyat ogali, tadwa nalaban hayo. ⁷ Dapat tam, manga fadwasay, no kandogay day kagfon intam nodyan bangkad, tam fag gagwanta yapdig fanaya. Tam fag kitos gamas nogfanayat ani, gagwantag fanaya yadi ka bago bago fag mwayan hanggan ka goyan kagfalangbat manga tanom. ⁸ Tam fag gagwanta yapdi kawa kaakbang wa dahol kagfon intam no kadasog. Maskin ngay, tam fag marigon intam manga fangayofan. ⁹ Manga fadwasay, tam fag idwag sarogatan kaarakitay is Diyos idwa omato intam.

Maskin ngay ka fangabaya istay, bilog wa sakbawan. ¹⁰ Manga fadwasay, fag in Diyos manga fangampang ogali kantam fagsokfonon. Aywan it manga naagwanta nogtoltol intam Fon hampang. ¹¹ Idwa awkin tam lomwang kitay masolong kadwag fagomon hanggan has katabowanan? Ham nadog wan no kinday is Hob idwa nafagomon, yakanga no has ginanan, intam Fon nadisag ya fiya fiya hanya, kawantam Fon mahoway hanggan maawaon. ¹² Dapat ka fiya man has iba, manga fadwasay, sakwag ngayan nyawa kana fag bagay sam tongod, ngatay sas baba daga, nyawa kana fag hampang tiba, kaarakitay igfaorongon intam fwayong, ginya kagfon intam idwa omato intam. Fag idwag sad wan. No ala, ya ala wan, no bohonwan, bohonwan. ¹³ No ha akwa santam ka ha fakahoriyon, hanya fag darangin wan. No ha fagbayaon, fag gambahan ya ngadi. ¹⁴ Ngatay ha kasagit santam? Tawagan ka manga fagtahinan sas Tifonan kaarakitay domarangin kawa ha hanya, lidgidan lana hanya. Fag lwang, Tam

igsyag hasagfon intam, hanggan mi lomidgid lana hyamo. ¹⁵ Ka darangin igsyag hantam Fon kagfafiya hanya. Intam Fon igfarigon ya hanya, hanggan no ha naogali dwat, intam Fon faliyam yadi tonya. ¹⁶ Maskin ngay, tam fag soyo ha sadi ha sadi intam manga naogali dwat, hanggan igdarangin kawa ha sadi ha sadi, kaarakitay imfiya ya intam manga sagit. Ka taw maslong it ogali nogdarangin, fagaba im-anod it fagdaranginon. ¹⁷ Hyabi is Iliyas taw yadi kitontam. Hanya nandarangin mahogod kitay, fag idwa kwayan, ginya madi in-anod wan, idwa nahwayan balis tolok fangaraw hagboknga. ¹⁸ Is Iliyas nandarangin ya domwag kitay, Fag homwayan ya, ginya madi nahwayan ngay, ka manga tanom namodbohadan ya. ¹⁹ Angko manga fadwasay no ha taw santam kagfafwali has fakaoronganan kagtalang, ²⁰ hanya fag twa kitay, hanya nogfafwali sadik taw gis ogali kagfalamang, tonya fag taw imbawi gis kahatayan, hanggan aywan fag manga ogali dwat imliyam yadi wan.

1 PIDRO

¹ Ahos Pidro, in Kiristo Hisos Fandiya Barita kagsor-rat. Hogsorat ha hayo kan Diyos, intam Ama man-ga nafili, dapat naskat ha sayo manga taw, igban-wanan sas manga sakop Ponto, Galasya, Kapadosya, Asya, hanggan Bitinya. ² Hanya ka nafili intam kawa danwat kafangayofanan gi yapdis hyabi hyabi, kaarak-itay it Maliyaw fag Falad fahaliyaw intam fangayofan. Ginya madi tam imbali matanogon han Kiristo Hisos, hanggan it karigonan folot indisag wa hantam. Ham nangos fag domog kitay is Diyos mahoway wa dahol ha hayo, hanggan igfalokmay fiya fiya hayo manga fangayofan. ³ Tam fag fasayagdog in Kiristo Hisos, kagfon intam, it Ama hanggan it Diyos. Hanyan awa wa dahol intam, yakanga nadisag hantam ka bago fag haboyagan no nafaboyag ya in Kiristo Hisos gis ka-hatayan, hanggan nafatohoyan intam ka fagsyagon boyagan. ⁴ Yakanga tam igsyag kitay tam ha tang-gapon fiya, kadwa kadwat, kadwam liyam, danwa nafatalaga hantam san Diyos banwanan sam tongod. ⁵ Maskin tam igsyag in Diyos, it karigonan ka gano in-tam hanggan bomawi intam gis nanya aban, sas katabowanan, is Diyos nogfalag no kinday it ibolonon nogbawi manga taw. ⁶ Yakanga tam fag kasolong to fag manga bagay, nyawa kitay sadik ngalay tam igdog manga mahori bokod bokod kagsolay intam. ⁷ To fag manga mahori kagsolay intam ha kahologan wan, maskin igfalag kitay tam orongan wagsyag in Diyos. Ka ginto kadwat di, nyawa tagfadalan sas afoy kaarakitay bomol ka mangan aktom kadwa fiya. Dapat nom-lag kitay tam orongan wagsyag in Diyos, tonya bondi kitos gintok mahalga, maskin ta mamasayagdog in-tam, domisag yadi kafiyan hanggan kangayanan han-tam is Kiristo Hisos nomlag ya aban. ⁸ Nyawa ham id-wa nalag in Hisos hyabi, ham galwasi hanya. Hanggan nyawa tam idwag lag hanya kati, tam igsyag yapdi hanya. Yakanga tam kasolong wa dahol dahol, tam id-wa ha fatoladan intam kasolongan kati, ⁹ maskin tam kabawi wan, kawa tam igsyag han Kiristo Hisos. ¹⁰ In Diyos manga fangampang ka nagona wa nafwayong kitay, is Diyos mamalag hantam it malooy fag ka-howayan. Ta mahogod wa gisip hyabi, hanggan igsayak no kinday manga taw nombawi aban. ¹¹ Hyabi hyabi in Kiristo Falad sawan Diyos manga fangampang basad fangayofan, hanggan ka manga fangampang naisip fiya fiya no faktaw, hanggan no ginahin it Falad

fagwason nogfatohoyan kitay, is Kiristo aban omag-wanta mahori, ginya madi manga kafiyan imlag yadi wan. ¹² Is Diyos nafatwagdog it manga fangampang hyabi kitay, ka fakinabang fiya fiya git ibolon hawas taw aban, hantam, idwa hat sadili fakinabang. Kati ka manga nadiya ka Fiya fag Barita gis Maliyaw fag Falad, kan Diyos nasogo hantam git banwanan sam tongod, ka nafwayong hantam no kana tonya fag fakinabang. Ka manga anghil gwayan wa kasaya lomag yadi to fag manga bagay. ¹³ Maskin ngay, tam fag danwa mataga-han, fag idwag fasigpala. Intam fagsyagon fag ka lamang ka malooy fag kahowayan kan Kiristo Hisos disagon hantam, hanya nombangkad aban. ¹⁴ Tam fag katanog in Diyos. Tam fag idwa katanog intam bali fangayofan masayaon kito kantam ogali hyabi, tam nodya nadog ka Fiya fag Barita. ¹⁵ Yatokitay, kawas Diyos maliyaw ka nafili intam, intam fangayofan fag maliyaw yadi, sadi wak dahonya. ¹⁶ Fag tohod kitay, in Diyos sorat iglwang, Maskin aho maliyaw, ham fag maliyaw yadi. ¹⁷ Tam igngayan in Diyos intam Ama, tam nogdarangin hanya. Dapat ay, is Diyos idwa ha fagihidon taw, igfaparidrihowan di nogsolay intam manga ogali. Yakanga, tam no baliday boyagan yapdistay sas baba daga, tam fag katanog hanya. ¹⁸ Maskin tam twa kitay, bohonwa manga bagay ka kadwat, kitos manga pilak, manga ginto, ka nafalfas intam gintam manga ogali kadwa ha kahologan, kan-tam natanggap gintam manga hafowan, ¹⁹ dapat ay, is Kiristo no natay, intam fangafiyan, kitos sadik anak topa kafiyaon, idwa ha dwat, it folot ka mahalga wa dahol ka nafalfas intam. ²⁰ Is Diyos nodyapdi nahalig daga, danwa nafatalaga in Hisos hanya baliwa. Ginya madi kati, sas ginanan fag manga sirang, is Diyos nafalag hanya kaarakitay hantam. ²¹ Kawa gin Hisos tam igsyag han Diyos ka nafaboyag hanya gis ka-hatayan hanggan nadisag hanya kangayanan abwat man has fagayo. Yakanga gin Hisos tam intiwala hang-gan igsyag han Diyos. ²² Kati intam manga fangayofan inlinay wan kawa tam katanog ka fakaorongan, hanggan tam gadgalwasiyan orongan. Tam fag ma-hogod no gadgalwasiyan, bonwa yadi famalagon odi. ²³ Tam insagaya ya domwag. Kati intam Ama bago is Diyos kadwa katay, bonwa kantam ama taw ka katay. In Diyos hampang boyagan, kadwa kaliyam, ka nafa-bali intam in Diyos wa manga anak. ²⁴ Kito kansorat

sas Kasoratan kitay, Fagayo fag manga taw kitos lamnon, It manga kafiyon fagayo kito odis borak lamnon. Ka lamnon kalayong, it manga borak kafangta di.

²⁵ Dapat ay, intam Fon hampang igdogayan hanggan aban aban. To fag hampang ka manga Fandiya Barita nagfwayongan hantam.

2 Yakanga kati tam fag dayo fagayo ka manga dwat fag ogali, kitos mangag balibad, mangag falagon odi ogali fiya, manga kaid-ingliyan, mangag fadaddwatan igdog. ² Fag kitos anak dararag no kasamok it soso, tam no kasamok in Diyos hampang, kagfarigon intam fangayofan bago, kaarakitay tam karigon nomtiwala, hanggan tam imbawi wan. ³ Maskin kito kansorat san Diyos Kasoratan, Tam fadi wadnadog kitay kagfon intam mahoway wa dahol dahol. ⁴ Yakanga tam fag gakbang hantam Fon ka bilang bato boyagan, kasta nadayo, dapat kan Diyos nafili, mahalga yadi sa hanya. ⁵ Tam fag gakbang hanya kawa tam bilang yadi manga bato boyagan. Fag is Diyos kagfatarongbawan intam sat fakaligon Fanimbaan-Dahol gis manga fangayofan bago. Sinya tam imbali sadik layonan maliyaw fag manga fagalan kagdisag han Diyos, gin Kiristo Hisos, it manga fag-bayaon gis manga fangayofan bago. ⁶ Maskin ka Kasoratan iglwang, Fanlag ngay, hogfatobo sas Siyon, Sadik bato, angko nafili hanggan mahalga, Infwalid sas basad solok igfarigon ka tiba. Nyawa faktaw kagsyag hanya, idwam balaw, nyawa ginahin. ⁷ Yakanga tonya fag bato mahalga wa dahol hantam kagsyag hanya. Dapat no kadi has mangadwag syag, im-anod wa kito ka sas Kasoratan, Ka kalig balay fagdayoon fag bato, Tonya di ngap kanbali igfarigon ka tiba. ⁸ Hanggan Manga taw katahid odi sinya fag bato, Ta makfo yadi sas bato famarigon. Tintahid wan maskin tadwa katanog in Diyos hampang, ginya tonya kan Diyos nafatohoyan hanya fag manga taw. ⁹ Dapat tam kan Diyos nafili fag hasokfonan, manga fagalan hantam hari, sadik maliyaw fag layonan, in Diyos sadili fag manga taw, kagfalag has taw in Diyos manga naibolon kafiyon, no nafatawag intam gis basad marom, hawat kafiyon fag kayawaan. ¹⁰ Hyabi hyabi tam bohonwan Diyos layonan fag manga taw, dapat kati tam inbalit nafili fag layonan. Hyabi tam idya nadog kitay is Diyos maawaon, dapat kati tam nadog kitay tam it fakaawaon wan. ¹¹ Angko manga fakilalaon, kawa tam bilang manga famaklay kagsabang odistay is baba daga, hogfaaronon kitay, tam fag idwa goyon ka bali fangayofan masayaon gistay is baba daga, kawag laban has fangayofan bago. ¹² Intam manga ogali fag fiya sas faglagan manga taw kadwam tiwala. Nyawa tagbangdan intam kati, ta noglag kitay intam ogali fiya, mangharaw, ta mamasayagdog han Diyos aban, gis nanya fag sirang hanya nombangkad. ¹³ Maskin tam galwasi kagfon intam, tam fag fasakop has fagayo

ka ha kangayanan sas baba daga, hanggan has goran-gon sas Roma ka nasakop fagayo fagayo fag banwanan. ¹⁴ Tam fag fasakop yadi hat manga nahalig go-birnadod, kat nasogo hantam, kaarakitay igfadosa has manga gibolon dwat, hanggan igfasayagdog ka manga gibolon fiya. ¹⁵ Maskin in Diyos fakasayaon fag kantanam fiya fag ogali kagfatwag lag has taw kitay, bohag odi ista fwayong kadwa ha fakatwawon nogfalamang kampang. ¹⁶ Tam fag gogali kitos mafalfasan gis Batasan, dapat kawa no mafalfasan, tam fag idwa gayfan kitay, fiya di no gibolon dwat. Yatokitay, intam manga ogali fag kito kan Diyos manga sogowan fag ogali. ¹⁷ Tam fag magalang has fagayo fag manga taw, fag galwasi yadintam manga fadwasay san Kiristo. Fag katanog in Diyos, hanggan tam fag magalang has goran-gon sas Roma. ¹⁸ Ham, ista manga nasali sogowan, fag magalang, fag fasolon yadi ha hayo manga fagolayanan, nyawa mahoway, nyawa maisog. ¹⁹ Maskin is Diyos igbaya wan tam nogtohod kitay, hanya gofod intam, yakanga tam gagwanta ta nogfadosa intam nyawa tam idwa ha kasalanan. ²⁰ Tagfasayagdog awkin ka ha kasalanan no gagwanta di ta nogbakkak hanya, ham gayfan? Idwan. Dapat tam no gagwanta yapdi ta nogfahorihan intam, kawa tam gibolon has fiya, is Diyos igbaya wan. ²¹ Maskin tam in Diyos nafili, intam tanggapon it baliw, fag gagwanta nyawa basad mahori. Is Kiristo naagwanta basad mahori kawa hantam, yakanga tam fag tolad yadi hanya. ²² Is Kiristo idwa ha ogali dwat, idwa yadi nabalibad nyawa ginahin. ²³ Nyawa ta nayod hanya, is Kiristo idwa naganti ngadi sas hampang. Nyawa tagfahorihan hanya, hanyadwa nafadalagdog is taw. Is Kiristo nasyag odi han Diyos ka maslong nogfatohoyan ista fadosaan. ²⁴ Is Kiristo natay sas nafatimbangan hayo, nadiya wantam manga ogali dwat fagayo sat habilogan, kaarakitay intam fangayofan matay has ogali dwat baliwa, dapat imboyag has ogali fiya. In Kiristo manga baran ka nafafiya intam. ²⁵ Maskin hyabi tam lamang lamang odi, bilang manga topa matalangan. Dapat ay kati, tam infwali ya has gano topa hanggan hasag bahala intam.

3 Kitonya yadi ham, manga ina, fag fasakop ha hayo manga sadili indogan. Hayo indogan tiba nodyan tiwala in Diyos hampang, fag hayo fiya fag ogali ka fatiwala has taw. ² Ta fag lomag kitay hayo ogali maangay hanggan ham magalang wan. Yakanga nyawa ham idwag toltol aywan. ³ Fag bonwa manga dayag malagan kagfalag hayo kafiyon, kitos madolaw fag nasorod bok, manga ono ayo ayo, ngatay manga rotay araw araw igtobos. ⁴ Hayo kafiyon fag imlag sas magop hanggan mahoway fag ogali kamlag gi hayo fangayofan. Ka fangayofan kitonya balaw kadaanon hanggan mahalga wa dahol san Diyos faglagan. ⁵ Hyabi hyabi, ka manga ina kantiwala hanggan

nasyag in Diyos, kitonyat manga dayag. Ta nafasakop hat manga sadili indogan. ⁶ Halimbawa, is Sara intanog in Abraham, nangayan yadi hanya it fagtahinan. Ham imaktom yadin Sara manga hasokfonan ina, hayo ibolon no fiya, hanggan ham nodwa ha fakahawagon nyawa kana. ⁷ Tam yadi manga ama, tam fag gano yadi intam manga babay fiya fiya, maskin tam twagdog kitay ka ina idwa kitos ama ik marigon. Tam fag magalang yadi hantam manga babay, maskin tam talsawa myasa wa kitonya nogtanggap in Diyos disag hantam haboyagan. Tam no gofodan fiya kitonya, idwa hagtaktak intam darangin. ⁸ Angko togon ka goyan goyan kitay, tam fag kasadi. Tam fag myasa wa mahoway no gofodan. Tam fag gadgalwasiyan ha sadhi ha sadhi, kitos tasayan. Tam fag maawaon hanggan igfasolon di istaw. ⁹ Nyawa ta naibolon dwat hantam, tam fag idwa ganti dwat. Nyawa tagyod intam, tam fag idwag faganti hampang has taw kitonya. Yatokitay, tam ngap fag darangin kitay tonya fag taw fag lomag it fagbayaon, kawas Diyos nafili intam kaarakitay tam tomanggap yadi manga fagbayaon. ¹⁰ Kito kansorat, Ka kasaya fagaba boyagan hanggan kasolong, Fag idwag salan kampang has iba taw, fag idwa yadig balibad. ¹¹ Fag dayo ka manga ogali dwat, Fag katanog ka fiya. Fag sadhi wak fangayofan igfayayom hanya has kahowayan. ¹² Maskin kagfon intam igbantay fagaba ka gogali maslong, Igtalinga yadi ta nogdarangin, Dapat hanya magoyoyan has manga taw ka gogali dwat. ¹³ Fakta kagfahoriyan intam, ham gayfan, nontam ogali sonson wa fiya? Idwa akwa nangos. ¹⁴ Dapat ay, nyawa kitay halimbawa, tagfahoriyan intam maskin tam gibolon fiya, tam ha fagbayaon yapdi. Nyawa tagfadalgdog intam, tam fag idwa kadala. Fag idwa yadi galibitan intam fangayofan. ¹⁵ Dapat tam fag magalang wa dahol han Kiristo santam basad fangayofan, kawa hanya kagfon intam. Nyawa faktaw ka omintaw intam kawa hantam fagsyagon, no kanat kahologan, tam fag matalagaan intam sagot, nyawa ginahin. ¹⁶ Dapat tam nogsagot fag mahoway mahoway, magalang yadi has taw. Tam fag idwa ha fakahawagon kantam naogali dwat, kaarakitay kagyod hanggan igfadwat igdog intam maya wan, ta noglag intam ogali fiya, kawa tam insadi san Kiristo. ¹⁷ Fiya man ta nogfahoriyan intam, non Diyos wa fasadan kitonya, maskin intam ogali fiya, has igfadosa intam kawa tam naibolon dwat. ¹⁸ Kawas Kiristo natay sadhi di ginan, kawa hantam manga ogali dwat, ya hosto wan. Ka maslong it ogali natay kaarakitay has manga taw ka ha manga ogali dwat, kaarakitay tomaban intam han Diyos. Manga taw nafahatay in Hisos habilogan taw, dapat is Diyos nafaboyag ya hanya, ha habilogan maangay sas Maliyaw fag Falad. ¹⁹ No ha habilogan bago, is Hisos nadokson has manga falad maporisowan hanggan nafaadal sinyaw. ²⁰ Tonyasta manga falad ka dayo kati-

wala han Diyos hyabi, is Diyos no dogay wagfanaya, sa yapdin Nowi fag kasohodan, is Nowi no kalig yapdi baloto. Sayok fag manga taw kanbawi gis gonaw danom dagat sinyas basad baloto, walo odi. ²¹ Ka danom igfahalimbawa no kinday kati tam nontogna. Tam nontogna basad danom, bohonwa kitay tam igbol owing habilogan, tam igfatohoyan intam sadili han Diyos, idwa ha fakahawagon kantam naogali dwat. Tam nontogna kitonya, tam inbawi wan kawas Kiristo Hisos inboyag ya. ²² Ginya madi hanya nasakbaw han Diyos banwanan sam tongod. Kati sawan Diyos balis sihon. Ka manga anghil, hanggan ka manga ha kangayanan hanggan ka ha karigonan nafasakop ha hanya.

4 Kawa tam iglag kitay is Kiristo naagwanta mahori sat habilogan, tam fag handa wa omagwanta yadi, maskin ka naagwanta mahori sat habilogan, idwa kasaya ogali dwat. ² No kitonya, tam nostay yapdis baba daga, tam omogali in Diyos fakasayaon, bohonwa kantam bali fangayofan masayaon fag ogali. ³ Maskin dogay wa hyabi tam no naogali kantam kaidagdogan kitos manga idya kilala in Diyos. Fiya wa kati. Intam manga ogali hyabi idagdog odi, kitos manga igfahayan, goyon ka bali fangayofan masayaon, mangalang, iglabi wa kasolongan, mahabanan ginom, goyanon has dwat, hanggan kagsagaya wa ogali noglohod has manga bohonwa orongan diyos. ⁴ Kati ta kadolaw wantam, no kana mayon tam nodwa kaaktom has taw ta no gogali yapdi kitonya, idwag dahan, yakanga tagfadwat igdog intam. ⁵ Dapat ta bahala wagsagot han Diyos aban, ka talaga wa fatohoyan it fadosaan has manga boyagan yapdi, hanggan has manga natay. ⁶ Maskin kitonya, ka Fiya fag Barita inbarita yadi wan has manga natay, kaarakitay tamboyag yadi san Diyos akbang aban, nyawa ka kahatayan natahod it manga habilogan, kito kantohoyan has fagayo fag manga taw. ⁷ Ka katabowanan fagayo fag manga bagay kaakbang wan. Yakanga tam fag matalagaan, fag idwag falabi intam sadili fakasayaon, kaarakitay tam syagan igdarangin fiya fiya. ⁸ Ka labi man has fagayo, tam fag gadgalwasiyan fiya fiya, maskin tam no gadgalwasiyan, idwa mahori igfaliyam fagaba manga ogali dwat ha sadhi ha sadhi. ⁹ Tam fag idwa kafang igfasakbaw intam manga fadwasay hantam manga balay. ¹⁰ Tam fagayo ha natanggap fagsyaganon bokod bokod gin Diyos. Tam faanodan wa tonya, kaarakitay fagayo ha fakinabang maskin tam igfatonglos fiya fiya kan Diyos nafaano hantam fagsyaganon ha sadhi ha sadhi. ¹¹ Tam awkin ka manga fanoltol? Fag in Diyos hampang kantam fagtoltolon has taw. Tam awkin ka mangag togbong is taw? Tam fag syag in Diyos disag karigonan. Nyawa kana fag bagay fag in Diyos kafiyan kamlag gin Kiristo Hisos. Sawa hanya ka kafiyan hanggan karigonan hanggan

aban aban. Fag kitonya wa ngay. ¹² Angko manga fakilalaon, tam fag idwa kadolaw ka manga mahori kagsolay intam. Tam fag idwa gayfan kantam bohondi kito ka tiba ista kahoriyan. ¹³ Yatokitay, tam fag masolong maskin tam igdog yadin Kiristo kahoriyan it baliw, ginya tam kasolong wa dahol dahol is Kiristo nombangkad ya, it kafiyan malagan sa hanya. ¹⁴ Ta nogfasidyowan intam maskin tam galwasi in Kiristo, tam fag kasolong wan. It kahologan in Diyos Falad kafiyaon kasadi santam. ¹⁵ Nyawa tam igdog mahori, fag bohonwa kitay tam ha nafahatay taw, ngatay tam ignahaw, ngatay ha kasalanan, ngatay tam mamawaton is taw. ¹⁶ Dapat ay, tam fag idwa kaya tam nogdog mahori kawa tam in-ngayan in Kiristo sakop fag manga taw. Yatokitay, tam fag fasalamat han Diyos maskin tam in-ngayan in Kiristo wa sakop. ¹⁷ Kati wa fag masohod is Diyos fabago nogfathoyan is taw it hadasogan, hanggan bago bago kayapdin Diyos manga nafili, ginya has iba taw. No giwantam nogfabago, kinda ara to it katabowanan no has manga idwa katanog in Diyos Fiya fag Barita, ham gayfan? ¹⁸ Kito kansorat sas Kasoratan, Ka manga maslong no ganong wansakop basad fadosaan, Kinda araw ka mangadwan tiwala han Diyos, ka manga ha ogali dwat, ham gayfan? ¹⁹ Yakanga ka manga gagwanta basad mahori kawan Diyos fasadan kitonya, fag gogali yapdi fiya, hanggan fag faano intam sadili ha hanya ka nahalig intam, hanya ka fiya fag fagsyagon.

5 Kati ka mandi has manga fagtahinan kagbahala ha hayo kangko fagwayongon. Aho sadik fagtahinan kito yadi hayo. Hyabi ho nalag in Kiristo kahoriyan, hanggan ahog syag yadi kitay, aho ha kahorayan in Kiristo kafiyan, tonya nomlag aban. ² Hogfaaronganon hantam kitay, tam anowan kan Diyos nafaano intam it Tifonan taw, bilang tifonan topa. Fag igbaya wa gano in Diyos Tifonan kiton Diyos fakasayaon, bohonwa kitay napilitan odi. Bohonwa yadi kitay tam kasaya intam odi sadili fakinabang, kitos kwarta, dapat kawa tam kasaya wagtogbong. ³ Tam fag idwag fabali kitay tam bilang wasta dahol hantam

sakop, dapat ka odi kitay tam intam Tifonan fagtoladon. ⁴ Intam fagtahinan fag fangano topa nombangkad aban, tam tomanggap ka kafiyaon fag sangbaw ka masinay fagaba. ⁵ Ham ka manga bago, ham fag fasakop has manga fagtahinan. Tam fagayo fagayo fag fasolon intam fangayofan, tam nogtogbong ha sadi ha sadi, kito kansorat, Is Diyos iglaban ka manga ha takan, dapat igdisag it malooy fag kahowayan has mangag fasolon it fangayofan. ⁶ Yakanga, tam fag fadaga baliwa intam fangayofan han Diyos, ka marigon. Ginya madis Diyos kagfaabwat intam no ginahin fag masohod ka fiya. ⁷ Tam fag fadiya han Diyos intam manga fagalibiton fagayo maskin hanya gano intam. ⁸ Tam fag matagahan, fag bantay ka manga fangwan fagaba, maskin is Fandaya intam kalaban, igngwa kitos liyon, igtorang mayan mayan, igdama odig ligaw it iktanon taw. ⁹ Tam fag marigon igsyag han Diyos. Labanan yadin Fandaya maskin tam twa kitay bohondi tam ka gagwanta basad mahori kito, hanggan yadintam manga fadwasay sadik baba daga igdog yadi mahori kitonya. ¹⁰ Tam nontabo wagdog mahori sadik ngalay istay is baba daga, is Diyos kagfon fagayo fag kafiyan, kagtaban yadintam, kawa tam insadi san Kiristo, kaarakitay omafo yadit kayawaan, kadwam liyam. Hanya fabali intam maganit, marigon hanggan falindog intam sas fagriganon kadwa kahawig. ¹¹ Sawan Diyos ka kariganon hanggan aban aban. Fag kitonya wa ngay. ¹² Is Silbano ka natogbong angko igSORAT ha hayo to fag sorat sayok. Hanyantam fadwasay matanogon. Ho twa kitay hanya mamarigon hayo manga fangayofan hanggan faorongan kitay, to fagayo kangko nasonat, in Diyos malooy fag kahowayan orongan. Yakanga tam fag kaganit sinya. ¹³ In Diyos Tifonan sas Babilonya, kan Diyos nafili kito yadintam, gwas hayo. Hanggan is Markos, angko nafatiwala, bilang angko anak, gwas yadi hayo. ¹⁴ Kawa tam igdowasayan san Kiristo, tam fag igbadbayaan tam nogladlagan. Ham fagayo kansadi san Kiristo fag nangos domog kitay hanya kagfalokmay hayo manga fangayofan.

2 PIDRO

1 Ahos Simon Pidro kagsorat ha hayo. Ahon Kiristo Hisos sogowan hanggan it Fandiya Barita. Hogso-
rat ha hayo, ka kito yadi hyami, in Kiristo Hisos, intam
Diyos hanggan Famawi nagdisagan fagsyagon, kawa
hanya maslong it ogali. **2** Kawa ham kilala in Diyos
hanggan in Hisos kagfon intam, ham nangos fag do-
mog kitay hanya mahoway wa dahol ha hayo, hang-
gan igfalokmay fiya fiya hayo manga fangayofan. **3** In
Diyos karigonan nadisag hantam fagayo fag manga
bagay kagfasyagan intam gogali has fiya, ka maangay
han Diyos. Nadisag hantam kitonya, kawa tam kilala
fiya fiya hanya ka nafatawag intam, kaarakitay tam ha
horay yadi git kangayanan hanggan kafiyan. **4** Kawa
kitonya, is Diyos natogon it manga bato disagon han-
tam manga bagay kafiyaon, mahalga yadi, kaarakitay
tam somyagan igbaybay ka kadwatan gis fangayofan
masayaon istay is baba daga, kaarakitay tam myasa
wa ha natanggap yadi in Diyos kafiyan. **5** Kawa kitonya,
maskin tam intiwala, tam fag mahogod wagsayak ka
fiya fag ogali. Ginya madi, fag kabali madonong yadi.
6 Ginya tam fag idwag falabi intam sadili fakasayaon,
hanggan tam fag idwag fagomon nyawa mahori.
Ginyantam fangayofan fag kabali maliyaw kito yadin
Diyos. **7** Ginya madi, tam fag galibitan hantam fad-
wasay no ha mahori, hanggan fag gadgalwasiyon ya-
di. **8** Tonya fag manga ogali fagayo, no matohoyanan
santam, hanggan kalabi man inya, intam haboyagan
ha kahologan hanggan ha fakinaabang, hanggan tam
homilala wa fiya fiya in Kiristo Hisos kagfon intam.
9 Nyawa faktaw nodwa ha akwa tonya fag manga
ogali, bilang wa marom it mata fangayofan hanggan
hanyadwag tohod kitay is Hisos nafaliyam it manga
naogali dwat. **10** Yakanga manga fadwasay, fag intam
fiya fag manga ogali kagfalag kitay, tam in Diyos nafili
hanggan nafatawag. No kitonyantam manga ogali,
tam idwam tahid. **11** Ginya madi, ta madali wagfasak-
baw intam aban han Hisos intam Famawi, kagfon in-
tam, hat sakop banwanan, kadwam liyam hanggan
aban aban. **12** Yakanga, hogfatohod yapdi fagaba ha
hayo hanya baliwa, nyawa ham madonong wan, hang-
gan idwa kaoman gi hayo donggon fakaoronganan.
13 Ho gayfan fiya aho nogfatohod hayo hanya baliwa
aho no boyagan yapdi. **14** Aho twa kitay ho kaakbang
wa omobon toy angko habilogan istay is baba daga,
kawas Kiristo Hisos kagfon intam nafaisip angko kitay

kitonya. **15** Kati aho homogodan yapdi omibolon,
kaarakitay ham fagaba tomohod to fag manga bagay,
nyawa aho malin wan gistay is baba daga. **16** Mi
noglwang kitay is Kiristo Hisos kagfon intam nom-
bangkad aban, malagan kitay marigon wa dahol da-
hol, bohonwa kitay manga odi lisbay taw, taw odi ka
naisip. Dapat ay, hyami wa mata lagan hyabi in Hisos
kangayanan madolaw wa dahol dahol. **17** Is Diyos in-
tam Ama nafasayagdog in Hisos, hanggan nafatohoy-
an it kafiyan no nahampang gis kafiyaon fag
kayawaan, nalwang kitay, To kangko fagalwasiyon fag
Anak, ahog baya hanya. **18** Hami sinya yadi, gofod in
Hisos gis nanya, sas baba moyod maliyaw. Mi nadog
tonya ka nahampang gin Diyos banwanan sam ton-
god. **19** Yakanga hami labi man inrigon no katiwala han
Diyos manga fangampang natoltol. Fiya ham no toma-
linga yadi tonya fag manga toltol maskin bilang sadik
salong basad marom kagfayawa hantam no baliday
intam Fon Sirang nodyag fayawa istay, hanggan no
baliday ka faramnag idyag yawa intam manga basad
fangayofan. **20** Dapat bago bago, tam fag tohod kitay,
nyawa faktaw, not sadili fagsyaganon, idwa twa fato-
hoyan it kahologan in Diyos manga fangampang dan-
wa nafwayong, ka has aban fag manga bagay.
21 Maskin in Diyos manga fangampang no danwa
nafwayong kitonya, bohonwa odi kitay ista kafangay-
ofanan, dapat kawa gin Diyos hanggan ka Maliyaw fag
Falad ka nafadonong kasta bato fwayongon.

2 Dapat ay, hyabi ha akwa yadi manga bohagon
fag fangampang san Diyos layonan fag manga
taw. Kitonya man di aban, ha akwa yadi santam man-
ga bohagon fag famaadal. Ta fomwayong hantam it
manga adal kagfadwat odig dog kantam fakatiwalaon.
Ta domayo kagfon intam ka nabayad kaarakitay tam-
bawi wan, yakanga sadi odi ginan ista fadosaan imda-
sog wan. **2** Aywan kamsayagdog aban, somokfon yadi
ista manga ogali dwat. Kawa kitonya, manga taw aban
fadwat igdog ka fakaoronganan Ogali Bago. **3** Ka bo-
hagon fag manga fangampang toltol bilang wa fakiya-
son nogfaadowan intam, kawa ta kasayag falingo in-
tam, bomolay intam kaakwaan. Dogay hyabi ka
Fangabaya nafatohoyan ista fadosaan, hanggan kag-
fadosa has taw idwa yadig toyog. **4** Is Diyos idwan awa
it manga anghil ka naogali dwat, dapat nafaporiso
wan sas oliyanan fadosaan sas basad ohang marom,

kaarakitay sinya wa kagfanaya magafosan sas basad marom, hanggan ka Sirang Fangabayan nomdasog wan. ⁵ Is Diyos idwan awa ka manga taw sas baba daga hyabi hyabi no nafagonaw wan sadi wak dahonya, kawasta ogali sonson wa dwat. Dapat is Diyos nabawi in Nowi, kagtoltol kawa has kahasslongan, hanggan it ofod fito. ⁶ Is Diyos nafatohoyan has fadosaan ka manga banwa Sodoma hanggan Gomora, yakanga nafayagaw wan, kaarakitay igfaisip yap ka tiba taw no kanat lagon aban no dwat ista ogali. ⁷ Dapat ay, is Diyos nabawi in Lot, ka fiyat ogali hanggan kahori wa dahol ista manga ogali dwat has ka taw. ⁸ Tonya fag is Lot, kawat ogali fiya, kahori wa dahol it fangayofan nogbanwanan sinya, kawa sirang sirang hanyag lag hanggan igdog ka manga dwat fag taw ogali mahaya. ⁹ Yakanga kagfon intam twa wagbawi gis manga mahori, kagsolay intam, ka manga katanog hanya, twa yadig fadosa sadik kaban ya ka manga dwat it ogali hanggan wamdasog sas Sirang Fangabayan. ¹⁰ Labi man fadosa ka manga goyon it bali fangayofan masayaon has hayan baliwa, kagdayog fasakop has ha kangayanan. Maisog ya, ha takan ya, idwag galang, igsalan ya ngadi kampung kawa has manga gis tongod. ¹¹ Nyawa ka manga anghil, ka marigon man has taw, hanggan idwa ha bosal, idyadi wa kampung kitonya, idwag fadog hasagfon intam, kito ka haraw ta nogsombong kasta manga naibolon. ¹² Dapat ay, to fag manga taw bilang wa hayopan myala, kadwa ha boot, fiya wa bato iktanon hanggan fahatayon. Tagfadwat digdog no kawa has manga bagay tadwa ha fakatwawon. Yakanga kito odis hayopan myala, fiya wa fahatayon. ¹³ Tonya wa kat ganti kasta naibolon dwat has taw. Tagfadagos it dwat fag kasolongan nyawa basad wa sirang, kaarakitay im-anod it habilogan fakasayaon. Hayan wa lagon ta nogsayo hayo, tagbaya yapdit manga ogali kitay tagdaya hayo. ¹⁴ Ka manga bohagon fag fangampang idwa ha fagsayahon iba fag halibangan, ha odista babay. Idwa twa taboon has ogali dwat. Tagtaban has kasolongan ka manga magomo it fangayofan. Inyayom wa masayaon. Intohoyan han Diyos fadosaan. ¹⁵ Ta natalang wat dalan bato ogaliyon. Ta natolad in Balaam in Bosor anak, ka kasaya tangdan nogdaya has taw. ¹⁶ Yakanga in Balaam hayopan asno nahampang wa hanya, bilang wa taw, kaarakitay kabaya in Balaam nogfalamang kampung. Yakanga, ka fangampang bato ibolonon kaidagdogan idwan tonglos. ¹⁷ To fag manga fangampang bohagon bilang wa bolbogan inlanggang, bilang yadi manga linyabo, marigon fag bagyo igfafayag odi. Kan Diyos nafatohoyan hanya madala wa fag oliyanan, hawa basad basad marom. ¹⁸ Myasa wa madonong kampung no kitay di, dapat ay, idwa ha kahologan kat manga fagfwayongon. Manga fakasayaon dwat has habilogan baliwa kwinta wat sangkap fafwali ya man-

ga taw hat manga ogali dwat hyabi, ta no kabayan odi naobon tonya. ¹⁹ To fag manga fangampang bohagon sogowan wa ogali dwat. Nyawa tagfasayagdog has manga taw kitay, tam bohonwa sogowan nyawa haday, idwa ha bawal nyawa kana, dapat ay, nyawa kana kagdaog intam, tam sogowan wa sinya, ya sogowan has dwat ka kitonya. ²⁰ Ka manga taw ka kilala in Kiris-to Hisos, kagfon intam hanggan intam Famawi, nalfas gis kadwatan istay is baba daga. Dapat ta no kafwali ya hat ogali dwat hyabi, hanggan fadagos kalabi wa has dwat, it lagon aban, bohondi kitonyak mahori nodya kilala intam Fon. ²¹ Balay balay hanya nodya natwa ka maslong fag ogali. Maskin mahori man ta no natwa wagdog ka fiya fag togon, ginya madi nadayo ya. ²² No kitonya maangay wa fiya fiya ha hanya ka fwayongon kitay, Ka ido ogali, Ya kwan yat soha, Hanggan ka baboy, nyawa tam fomyagos, Kafwali ya has basad danawan.

3 Angko manga fakilalaon, tongko fadowa fag sorat ha hayo. Sas fagayo fag dowak sorat hogtikis wagfafolaw hayo isip, ² nogfatohod hayo in Diyos manga maliyaw fag fangampang fwayong hyabi, hanggan intam Famawi kagfon intam it togon hantam kat Fandiya-Barita nafadog ha hayo. ³ Bago bago, fiya tam no tomwa kitay, sas ginanan fag manga sirang, ka mangag fasakop hat bali fangayofan masayaon, aba lomibak intam. ⁴ Ta lomwang aban, Idwa awkin is Kiris-to igtogon kitay hanyam bangkad ya? Kati hadawa ham iglag? Intam manga magorang natay wan, dogay wa hyabi yapdi, dapat gi yapdis kabali daga, hanggan wa kati, fagayo fag manga bagay idwan oman. ⁵ Tag tikis wadwag bati ka fakaoronganan kitay, hyabi hyabi is Diyos nahampang lamang no nahalig intam daga hanggan banwa. Gis basad danom is Diyos no nafabago ka daga hanggan ha akwa yapdi danom igfodfowowan sas fagbokngan daga. ⁶ Gi mandis danom hyabi hyabi no nafagonaw hanggan nafadwat ka daga sadi wak dahonya. ⁷ Dapat in Diyos hampang karigonan yadi kagfadogay intam daga hanggan banwa kati, kaarakitay im-irog hanggan imyagaw wa aban sas afoy, ka Sirang Fangabayan nomdasog, hanggan ka manga dwat fag taw nomdosa. ⁸ Dapat, angko manga fakilalaon, tam fag idwa kaliyam. Tam fag tohod kitay intam Fon noglag, sadik sirang bilang wa 1,000 fangaraw, hanggan 1,000 fangaraw bilang odi sadik sirang, intam Fon nogfahalimbawa. ⁹ Bohonwa kitay kagfon intam igfasigpalat togon, kito kasta isip tiba taw. Hanya gagwanta wagfanaya maskin idwa kasaya ngadi sadik taw fag has kadwatan. Not fasadan di, tam fagayo fagayo fag somoyo wan. ¹⁰ Dapat ay aban, ka Sirang mahalga hasagfon intam imdasog, kitos fangnahaw. Gis nanya ka banwam liyam wa madali nograbog dahol dahol. Ka manga myanit, magdanon hanggan fanggasan imtonaw sas myanit. Fagayo sas baba daga

hanggan ka daga imsonog yadi wan. ¹¹ Kawa to fag manga bagay fagayo imliyam yadi aba kitonya, kinday nangos ka fiya intam manga ogali kati, ham gayfan? Tam no mafanayan yapdin Diyos Sirang, tam fag imto-hoyan hanya, hanggan fag gogali ka maangay. ¹² No baliday intam fagsyaganon, fag fadali wan tonya fag Sirang mahalga. Gis nanya fag sirang ka banwam sonog wa fiya fiya hanggan ka manga bagay sinya fagayo imsakop yadi wamtonaw wan. ¹³ Dapat ay, tam ha fagfanayaon ya sadik banwa bago, hanggan sadik daga bago, kahaslongan lamang ka ogali sinya, kawas Diyos natogon kitonya. ¹⁴ Maskin ngay, angko manga fakilalaon, no kandogay day tam no mafanayan yapdi to fag manga bagay, tam fag gogali ka mahoway, maangay hanggan manga taw fag idwa ha fagoliton intam. ¹⁵ Tam fag tohod kitay kagfon intam gagwanta yapdig fanaya kaarakitay tam ngandayo imbawi yapdi.

Tonya yadi kantam fadwasay Pablo faglwangon. Kawas Diyos nadisag it kadonongan han Pablo, ¹⁶ kitos Pablo nogfatohod hantam hastay fag manga bagay sat sorat fagayo. Ha manga mahori katwagdog san Pablo manga sorat. Ka manga magomot fangayofan, hanggan kadwa twagdog in Pablo bato lwangon, ig-falamang it kahologan nomtoon. Kitonya yadi ta nod-wa twagdog tibak layonan gin Diyos Kasoratan, yakanga kadiya has kadwatan. ¹⁷ Dapat ay, ham, angko manga fakilalaon, ho danwa nafatagak hayo. Ka manga taw kadwa maslong it bato ibolonon fag idwag faadowan intam, yakanga tam idwa kadiya gintam fagsyagon maganit. ¹⁸ Yatokitay, tam fag bondi kito kat fagonan no kilala in Kiristo Hisos, intam Famawi, kagfon intam, hanggan fag kalabi wa hat kahowayan. Tam fag fasayagdog it kafiyan kati, hanggan aban aban. Fag kitonya wa ngay.

1 HWAN

1 Ka hyami fagsoraton ha hayo kawa hanya ka danwa ha akwa, gi yapdis fabagowanan, ka Hampang kagdisag haboyagan. Mi nadog hanya, hyami mata nalag yadi, mi nabantay hanya, hanggan hyami gamat nasapkid yadi hanya. ² Tonya fag haboyagan indasog hastay a, hyami wa mata lagan. Yakanga migfaorongan ha hayo. Migfwayong ha hayo kitay, tonya wa fag haboyagan kadwa ha katabowanan, gi yapdis hyabi danwa sat Ama, ginya nafalag yadi ha hyami. ³ Migfwayong ha hayo hyami lagan hanggan wa hyami donggon kaarakitay ham gamigosan ha hyami. Ginya ham im-aktom kito yadi hyami kansadi sa hanya, gamigosan hantam Ama hanggan hat Anak is Kiristo Hisos. ⁴ Migsorat ha hayo kito, kaarakitay intam kasolongan idwa ha korang. ⁵ Ka hyami donggon barita git Anak migfadog yadi ha hayo kitay, is Diyos ka yawa, idwa yadi ha marom sa hanya ngadi ogbot. ⁶ Tam noglwang kitay tam kasadi gamigosan han Diyos, dapat tam gogali yapdi ka manga ogali gis sakop marom, tam igbalibad odi, idwa gogali ka fakaorongan. ⁷ Dapat ay, tam no gogali ka sakop yawa fag ogali, no kinday is Diyos sas yawa yadi, tam kasadi gamigosan ha sadi ha sadi, hanggan in Hisos, in Diyos Anak folot, igfalinay intam manga ogali dwat fagayo gintam basad fangayofan. ⁸ Tam noglwang kitay tam idwa ha ogali dwat, tam igdaya odi intam sadili, hanggan idwa ha akwa santam ka fakaorongan. ⁹ Dapat, tam nogbaya han Diyos intam manga naogali dwat, hanyag faliyam tonya gintam, hanggan igfalinay gintam fangayofan fagayo fag kadwatan, maskin is Diyos maslong hanggan igfaanod it fwayong. ¹⁰ Tam noglwang tam idwa ha naogali dwat, tam bilang nafabali kitay, is Diyos bohagon, hanggan it hampang idwa santam.

2 Angko manga anak, hogsorat ha hayo kaarakitay ham idwa omogali dwat. Dapat ay, nyawa faktaw, no gibolon dwat, tam ha fagan hantam Ama, kawas Kiristo Hisos ka maslong. ² Is Kiristo intam fangafiyon han Diyos kaarakitay igfaliyam intam manga naogali dwat, hanggan bohondi kitay hantam naogali dwat, hayadi was fagayo fag manga taw sadik baba daga. ³ Ginya madi tam twa matohoyanan kitay tam kilala hanya tam no katanog it manga togon hantam. ⁴ Bohagon odi kaglwang kitay hanya kilala yadin Diyos, dapat idwa katanog it manga togon. Ka fakaorongan

idwa sa hanya. ⁵ Tam nomtanog ngat manga togon, tam orongan wa hosto no galwasi han Diyos hanggan tam twa kitay tam insadi hanya. ⁶ Nyawa faktaw kaglwang kitay hanya kasadi fagaba san Diyos, it ogali fag kito yadi kan Kiristo Hisos ogali. ⁷ Angko manga fakilalaon, bohonwa sadik togon bago kangko fagsoraton ha hayo. Ho golit ka mandi dan hayo donggon fag togon ham no bagon tiwala. Ka mandi hayo fag donggon hyabi fag barita. ⁸ Nonman bilang sadik togon yadi bago kangko fagsoraton ha hayo, kawa tonya fag togon inorongan san Kiristo ogali, hanggan inlag yadi sa hayo manga ogali, kawa ka yawa orongan igyawa, hanggan ka marom iglagyo yadi wan. ⁹ Kaglwang kitay hanya sas basad mayawa, dapat kadwat iglag it fadwasay, tonya sa yapdis basad marom. ¹⁰ Ka galwasit fadwasay, sawas basad mayawa, idwa hagdahid hanya has ogali dwat. ¹¹ Dapat ay, ka kadwat iglag it fadwasay, sa yapdis basad marom a, bilang waglahaw basad marom, idwa natwa it hadasogan maskin ka marom igfabota wa hanya. ¹² Hogsorat ha hayo, manga anak, Kawa hayo manga naogali dwat inliyam wan maskin ham galwasi in Hisos. ¹³ Hogsorat ha hayo manga bokngan ama, Maskin ham kilala wa hanya ka danwa ha akwa gi yapdis fabagowanan. Hogsorat ha hayo manga ama bago, Maskin ham nadaog in Fandaya. ¹⁴ Ho nasorat ha hayo, manga anak, Maskin ham kilala intam Ama. Ho nasorat ha hayo, manga bokngan ama, Maskin ham kilala wa hanya ka danwa ha akwa gis fabagowanan. Ho nasorat ha hayo, manga bago ama, Maskin hayo manga fangayofan marigon, In Diyos hampang fagaba sa hayo basad fangayofan Hanggan ham nadaog in Fandaya. ¹⁵ Tam fag idwa galwasi ka manga ogali hanggan ka manga bagay ka gi odistay is baba daga. Ka galwasi ka manga bagay gi odistay is baba daga, idwa galwasi intam Ama. ¹⁶ Maskin fagayo fag manga ogali istay is baba daga kitos mangag fasakop has bali fangayofan masayaon, ka maingliyon, hanggan ka ha takan kawa maakwa, tonya fag manga ogali idwa gintam Ama, nodwa kitay gi odistay is baba daga. ¹⁷ Kastay is baba daga fag manga ogali hanggan wat manga fakasayaon fagayo, mamin di aban, dapat ka katanog in Diyos fasadan idwam liyam hanggan aban aban. ¹⁸ Angko manga anak, kati wa fag masohod kaakbang wan ka katabowanan. Ham nadog kitay ha madaya fag

Kiristo imbangkad aban. Ka orongan, aywan fag manga madaya fag Kiristo inbangkad wan. Yakanga tam twa wa kitay kaakbang wa ngay ka katabowanan fag kasohodan. ¹⁹ Nyawa to fag manga madaya fag Kiristo danwantam manga ofod hyabi, tadwa orongan insadi santam. No orongan insadi santam, ya nangos fagaba gofod yapdintam. Ta naobon wantam tifonan kaarakitay imlag matohoyanan kitay, ta fagayo idwa orongan insadi santam. ²⁰ Dapat ay, ham ka natanggap ka Maliyaw fag Falad, yakanga ham fagayo twagdog. ²¹ Yakanga hogsorat ha hayo, bohonwa kitay ka ham idwa natwa ka fakaorongan, dapat kawa ham natwa wan hanggan ham twa kitay ka fakaorongan idwag bohag. ²² Fakta ka bohagon, ham gayfan? Ka bohagon ka mangag tangkod kitay is Hisos bohonwa ka Kiristo. To wan ka madaya fag Kiristo, ka kafang homilala in Diyos intam Ama hanggan it Anak. ²³ Ka kafang homilala it Anak, it Ama idwa yadi sa hanya. Dapat ay, nyawa faktaw kagbaya in Diyos Anak, it Ama sa yadi wa hanya. ²⁴ Ham fag fagaba matohodan sa hayo manga fangayofan ka hayo donggon gis bago katiwala ginan. Tam no matohodan ngay santam manga fangayofan kantam donggon gi yapdis bago bago, tam fagaba kasadi han Diyos Anak hanggan hat Ama. ²⁵ Hanggan in Kiristo natogon bato disagon hantam, kawa ka haboyagan idwa ha katabowanan. ²⁶ Maskin hogsorat ha hayo kati, ha akwa kasayag fatalang hayo. ²⁷ Dapat ay, sawa hayo in Kiristo disag, ka Maliyaw fag Falad, nyawadwa ha iba taw igfaadal hayo, ka Maliyaw fag Falad kagfwayong ha hayo fagayo fag bagay, hanggan it fwayong orongan wan, idwag bohag. Yakanga tam fag fagaba kasadi has Falad Maliyaw kito kat fwayong hantam. ²⁸ Maskin ngay, angko manga anak, tam fag fagaba kasadi san Kiristo, kaarakitay hanya nombangkad ya, tam idwa ha fagadowanon, yakanga tam idwa kaya homablant hanya. ²⁹ Tam twa wa kitay is Kiristo maslong, yakanga tam homilala ka mangan bali it manga anak, tam noglag ista ogali sonson yadi wa maslong.

3 Yabay, kafiyaon kafiyaon intam Ama no galwasi intam, kawag ngayan intam in Diyos wa manga anak. Tam it manga anak wa ngay. Ka manga taga istay is baba daga fag manga taw idwa kilala in Diyos, yakanga idwa yadi kilala intam, it manga anak.

² Angko manga fakilalaon, is Diyos nafabali intam it manga wa anak kati, dapat tam idya twa no kinday tam aban. Nyawa kitonya, tam twa wa kitay, no ginahin aban is Kiristo nomlag ya, tam imbali kito yadi hanya, maskin tam lomag hanya fiya fiya. ³ Fagayo fag manga taw kagsyag kitonya, igfahaliyaw it fangayofan kito yadin Kiristo fangayofan ka maliyaw wa malayon.

⁴ Fagayo ka gogali dwat iglaban yadi han Diyos manga togon. Kawa kaglaban han Diyos manga togon, tonya wa ka gogali dwat. ⁵ Dapat tam twa kitay is Kiristo in-

bangkad hastay kaarakitay bomol manga ogali dwat fagayo. Idwa ha bali fangayofan dwat sa hanya. ⁶ Ka fagaba wa kasadi sa hanya, idwag fadagos gogali dwat. Nyawa fakta kagfadagos gogali dwat, idya nalag in Kiristo hanggan idya kilala hanya. ⁷ Angko manga anak, tam fag idwa gadayaan nyawa faktaw. Nyawa faktaw it manga ogali no maslong, maslong it fangayofan kito yadin Kiristo fangayofan. ⁸ Kagfadagos gogali dwat, in Fandaya sakop, maskin gi yapdis fabagowanan, is Fandaya danwa gogali dwat. Ginya madi yabay, in Diyos Anak inbangkad wa hastay kaarakitay igfadwat in Fandaya manga ibolon. ⁹ In Diyos manga anak idwag fadagos gogali dwat maskin in Diyos fangayofan sawa hanya. Hanyadwa syagan igfadagos has ogali dwat maskin hanya in Diyos wa anak. ¹⁰ To kagfatohoyan kitay no fakta fag manga taw in Diyos manga anak hanggan no fakta fag manga taw in Fandaya manga anak. Nyawa faktaw kadwag fadagos gogali maslong, hanggan idwa galwasit fadwasay, bohonwan Diyos anak. ¹¹ To kantam donggon togon gis fabagowanan yapdi kitay, tam fag gadgalwasayan. ¹² Tam fag idwa kiton Kain. Tonyan Kadwatan anak hanggan nafahatay it fadwasay. Kana mayon no nafahatay hanya, ham gayfan? Maskin in Kain manga ibolon dwat, dapat it fadwasay manga ibolon maslong. ¹³ Maskin ngay, manga fadwasay, tam fag idwa kadolaw kastay is baba daga fag manga taw no kadwat iglag intam. ¹⁴ Tam twa wa kitay tam nalin wan gis sakop kahatayan hawas sakop haboyagan, maskin tam galwasi intam manga fadwasay. Kadwa galwasi it fadwasay sa yapdis sakop kahatayan. ¹⁵ Ka kadwat iglag it fadwasay, it fangayofan pariho has igfahatay taw. Tam fadi wadtwa kagfahatay taw idwa ha akwa haboyagan kadwa ha katabowanan. ¹⁶ Kawas Kiristo nadisag it haboyagan kawa hantam kafiyan kagfalag hantam no kanat kahologan no galwasi orongan. Tam fag kitonya yadi, igdisag intam haboyagan kawa hantam manga fadwasay. ¹⁷ Nyawa faktaw ka ha akwa ogbot, dapat natwa kitay it fadwasay ha kakorangan, ginyadwa kaawa hanya, kinday tonya fag taw, ham gayfan? Hanyadwa twag lwang kitay hanya galwasi fagaba in Diyos. ¹⁸ Angko manga anak, fag bohondi intam bibig fwayong kitay tam galwasi manga taw, fag hanggan wantam ibolon kagfatohoyan kitay tam orongan wa galwasi manga taw. ¹⁹ Tam no gogali kitonya, tam tomwa fiya fiya kitay tam sas sakop fakaorongan, hanggan no san Diyos atobangan, tam idwa ha fakahawagon, ²⁰ nyawa intam sadili fangayofan nogso-gat intam nomtoon, tam fag tohod kitay is Diyos madonong man intam fangayofan, kawas Diyos twa wa fagayo fag manga bagay. ²¹ Angko manga fakilalaon, intam manga fangayofan nodwag sogat intam, tam idwa gadowan omakbang han Diyos, ²² hanggan tomanggap nyawa kanantam sagadon maskin tam

katanog it manga togon hanggan intam manga ogali maangay san Diyos faglagan. ²³ In Diyos togon hantam kitay tam fag syag hat Anak, kawas Kiristo Hisos, hanggan fag gadgalwasiyan, kito kat fwayong. ²⁴ Ka katanog fagaba in Diyos manga togon fagaba wa kasadi san Diyos, hanggan is Diyos kasadi sa hanya. In Diyos disag hantam it Falad kagfathoyan hantam kitay is Diyos kasadi santam.

4 Angko manga fakilalaon, tam fag idwa katiwala madali fagayo kaglwang kitay ka Maliyaw fag Falad sa hanya. Ka fiya, solayan yap kaarakitay tomwa ngatay gin Diyos ka falad sas taw. Maskin aywan ka manga bohagon fag fangampang kagbarita sas baba daga. ² Nyawa fakta fag taw kagfaanod kitay is Hisos ka Kiristo hanggan kawa hanyan bali taw, ka Falad sa hanya orongan gin Diyos. ³ Dapat kadwag faanod kitonya, kawa han Hisos, ka falad sas taw idwa gin Diyos. Ka madaya fag Kiristo fag falad ka sa hanya. Ham dan wa nadog ka madaya fag Kiristo falad imbangkad aban. It falad istay sas baba daga kati. ⁴ Manga anak, tam kasadi han Diyos. Tam nadaog ka manga bohagon fag manga fangampang, maskin is Diyos ka santam marigon man has madaya fag Kiristo ka sas manga taw ka kasadi istay is baba daga fag falad. ⁵ Ka manga bohagon fag manga fangampang kasadi istay is baba daga, yakanga ka lamang istay is baba daga fag manga bagay it fagfwayongon, hanggan ka taga istay is baba daga fag manga taw igtalinga. ⁶ Dapat tam kasadi san Diyos. Nyawa faktaw no kilala in Diyos, igtalinga intam. Dapat nyawa faktaw kadwa kasadi san Diyos, idwag talinga intam. Kitonya tam no tomwa waglag ngatay ka Falad fakaorongan sawasta basad fangayofan, ngatay ka falad bohagon. ⁷ Angko manga fakilalaon, tam fag gadgalwasiyan maskin gin Diyos ka ogali galwasi has manga taw. Fagayo ka galwasi manga taw, in Diyos wa manga anak, kilala yadin Diyos. ⁸ Kadwa galwasi manga taw idwa kilala in Diyos, maskin in Diyos ogali fagaba wa galwasi manga taw. ⁹ Kalag wa kitay is Diyos galwasi intam kawa nasogot Anak sadi sadi hastay has baba daga, kaarakitay tam imboyag gi hanya. ¹⁰ To it kahologan no orongan wa galwasi, bohonwa kitay tam galwasi han Diyos, dapat ay, is Diyos ka galwasi intam hanggan wa nasogot anak kaarakitay imbali intam fangafiyon, kagfaliyam intam manga naogali dwat. ¹¹ Angko manga fakilalaon, kawa kafiyaon is Diyos no galwasi intam, tam fag gadgalwasiyan. ¹² Nyawa ginahin idwa ha taw nalag in Diyos, dapat, tam no gadgalwasiyan, is Diyos kasadi santam, hanggan it ogali ka galwasi manga taw inhosto santam. ¹³ Tam talastas kitay tam kasadi san Diyos, hanggan hanya kasadi santam maskin hanya nadisag hantam it Falad. ¹⁴ Hyami wa mata lagan kitay intam Ama nasogot Anak kaarakitay mamawi manga taw sadik baba daga, yakanga migfaorongon tonya

has taw. ¹⁵ Kagfaanod kitay is Hisos in Diyos wa Anak, fagaba kasadi san Diyos hanggan is Diyos fagaba kasadi sa hanya. ¹⁶ Tam igdog hanggan katiwala kitay is Diyos galwasi intam. In Diyos ogali fagaba wa galwasi manga taw. Kagfadagos galwasi iba taw, tonya ka fagaba kasadi san Diyos, hanggan is Diyos fagaba kasadi sa hanya. ¹⁷ Nonhosto santam ka fangayofan ka galwasi, tam idwa ha fakahawagon sas Sirang Fangabayan aban. Kawa, no kinday is Kiristo istay is baba daga, tam kitonya yadi. ¹⁸ Tam no gadgalwasiyan idwa ha aktom kadala, dapat ay, no galwasi hosto kagfaliyam kadala fagayo. Ka kadala yapdi, ka fangayofan galwasi idyan hosto sa hanya, maskin kadala yapdi ka fadosaan. ¹⁹ Tam galwasi han Diyos hanggan has manga taw maskin is Diyos nagona wa galwasi intam. ²⁰ Kaglwang aho galwasi han Diyos, dapat kadwat iglag it fadwasay, igbohag odi. Nodya twa galwasi kat faglagon fadwasay haraw, labi man idwa twa galwasi han Diyos, taw nodwag lag hanya. ²¹ Is Diyos natogon hantam kito, ka galwasi han Diyos, fag galwasi yadit fadwasay.

5 Fagayo ka katiwala kitay is Hisos ka Kiristo, in Diyos wa manga anak. Nyawa faktaw no galwasi manga taw, galwasi yadi ista manga anak. ² Yakanga tam twa kitay tam no galwasi han Diyos hanggan katanog it manga togon, tam galwasi yadit manga anak. ³ Maskin tam no galwasi han Diyos, it kahologan tam katanog it manga togon. It manga togon idwa yadi mahori katanog, ⁴ maskin in Diyos manga anak fagayo syagan digdaog ka manga ogali dwat istay sas baba daga. Kawa tam igsyag in Diyos kagfarigon intam, yakanga tam igdaog ka manga ogali dwat. ⁵ Faktaw ka syagan igdaog ka manga ogali dwat istay is baba daga, ham gayfan? Ka lamang katiwala kitay is Hisos in Diyos wa Anak ka syagan igdaog. ⁶ To fag is Kiristo Hisos kandasog istay is baba daga, intogna sas danom a, in-olan yadit folot. Ka Maliyaw fag Falad kagfaorongon tonya kawa tonya fag Falad ka fakaorongan. ⁷ Tolo kagfaorongon. ⁸ Ka Maliyaw fag Falad, ka danom, hanggan ka folot kagfaorongon. Nyawa tolo, pariho it faglwangon. ⁹ Tam igfaanod intam kapariho taw it faorongon, dapat ay bohondi kitos taw is Diyos nogfaorongon. Is Diyos nafaorongon kawa hat Anak. ¹⁰ Nyawa faktaw kagsyag han Diyos Anak twa sat basad fangayofan kitay, in Diyos faorongon maanod wan. Kadwag faanod han Diyos faorongon, bilang iglwang is Diyos bohagon, maskin ka taw idwa katiwala in Diyos faorongon kawa hat Anak. ¹¹ Kiti is Diyos no nafaorongon kitay, hanya nadisag hantam ka haboyagan idwa ha katabowanan, hanggan tonya fag haboyagan sawat Anak. ¹² In Diyos Anak nonsadi santam, tam ha akwa ka haboyagan idwa ha katabowanan. Dapat ay, it Anak nodwan sadi santam, tam idwa ha akwa tonya fag haboyagan. ¹³ Hogsorat

ha hayo kagsyag in Diyos Anak kaarakitay ham tomwa matohoyanan kitay, ham ha akwa wan haboyagan kadwa ha katabowanan. ¹⁴ Tam idwa ha fagadowanon tam nogsagad, nyawa kana fag bagay ka maangay han Diyos, kawa tam twa kitay hanyag talinga intam. ¹⁵ Hanggan tam no twa kitay hanya fagabag talinga hantam, tam twa yadi kitay tam tomanggap intam fagsagadon. ¹⁶ Nyawa fakta kaglag it fadwasay gogali dwat, bohonwa ka dwat kagdagos has kahatayan, daranginan han Diyos tonya fag fadwasay. Ginya madi is Diyos domisag haboyagan has naogali dwat haraw. To kawa has taw kat naogali dwat idyapdig dagos has kahatayan. Dapat ha akwa ogali dwat kagdagos has kahatayan. Ahodwag lwang kitay, fag darangin kawa has taw ka ha naogali dwat kitonya. ¹⁷ Fagayo fag ogali

dwat kasalanan wan. Kakitay ha akwa manga ogali dwat kadyag dagos has kahatayan. ¹⁸ Tam twa kitay kanbalin Diyos manga anak idwag fadagos fagaba has ogali dwat, kawan Diyos Anak gano tonya fag manga taw, yakangas Fandaya idwa syagan manmawat hanya. ¹⁹ Tam talastas kitay, tam in Diyos wa sakop hanggan is Fandaya kagfasognod ka manga taga istay is baba daga. ²⁰ Tam twa wan kitay, in Diyos Anak in-bangkad wan hastay a, nadisag yadi hantam kadonongan kaarakitay tam homilala ka orongan fag Diyos. Hanggan tam insadi han Diyos orongan kawa tam insadi hat Anak is Kiristo Hisos. Hanya ka orongan fag Diyos hanggan to ka haboyagan idwa ha katabowanan. ²¹ Angko manga anak, fag idwa kadiya has iba fag fagsyagon.

2 HWAN

¹ Aho sadik fagtahinan kagsorat ha hyamo, sadik ina kan Diyos nafili, hanggan ha hyamo manga anak kangko fagalwasiyon, kawa tam pariho igsyag has fakaoronganan. Bohondi aho, dapat fagayo kagsyag has fakaoronganan galwasi yadi hayo, ² kawa ka fakaoronganan fagaba kasadi santam hanggan aban aban. ³ Kawa tam igsyag has fakaoronganan hanggan gadgalwasiyan, tam domog kitay is Diyos intam Ama, hanggan is Kiristo Hisos it Anak mahoway hantam, kaawa hanggan igfalokmay intam manga fangayofan. ⁴ Hogbaya wa dahol dahol igdog kitay im manga anak tiba gogali has fakaoronganan, kito kantam Ama natogon hantam. ⁵ Kati kangko fagsoraton ha hyamo bohonwa sadik togon bago, no bohonwa kitay ka mandi dan fag togon, ka gi yapdis bagon tiwala danwantam donggon kitay, tam fagayo fag gadgalwasiyan. ⁶ Tam no gadgalwasiyan it kahologan tam katanog in Diyos manga togon. To ka mandintam donggon togon gi yapdis fabagowanan kitay, tam fag gadgalwasiyan. ⁷ Ka manga bohagon in-aywan sadik

baba daga, ka dayo katiwala kitay is Kiristo Hisos inbali taw. Ka kitonya fag taw igdaya, tonya ka madaya fag Kiristo. ⁸ Tam fag matagahan kaarakitay idwam liyam intam nakayayan, ginya madi, nodwam liyam, tam tomanggap fagayo kan Diyos nafatalaga hantam. ⁹ Nyawa faktaw kagfaaktom manga bagay tiba han Kiristo manga togon hanggan igsagaya hat manga togon, is Diyos idwa sa hanya. Dapat intam Ama hanggan it Anak fagaba kasadi has taw ta nogfadagos han Kiristo manga togon. ¹⁰ Nyawa faktaw nogsabang hayo, it adal nodwa kito kan Kiristo togon orongan, hawag fasakbaw hantam basad balay, hanggan fag idwa maofod ha hanya, ¹¹ maskin ka gofod hanya kasadi hat manga ibolon dwat. ¹² Aywan yapdi nangos angko fwayongon ha hayo, dapat hodwa kasayag sorat tonya kati. Ho gayfan nangos ho hawas nyamo hayo aban. Ginya madi tam myasa wa sinya nogtoltolan kaarakitay tam igbadbayaan fiya fiya. ¹³ Hyamo fadwasay ina, in Diyos nafili kito yadi hyamo, it manga anak gwas yadi hyamo.

3 HWAN

¹ Aho sadik fagtahinan kagsorat ha hyamo, Gayo, kangko fagalwasiyon, kawa tam pariho igsyag has fakaoronganan. ² Angko fakilalaon, hogdarangin kitay, haw nangos fiya di is nyamo, hanggan im habilogan fag nangos marigon kito yadim fangayofan. ³ Hogbaya wagdog ka tibak fadwasay kandasog gis nyamo no nabarita kitay haw idwag fagomon has fakaoronganan hanggan haw gogali ka maangay yadi has fakaoronganan. ⁴ Idwa ha akwa domwag igfasayagdog angko hat dayo, no bohonwa kitay angko manga anak igfadagos it ogali ka maangay has fakaoronganan. ⁵ Angko fakilalaon, haw idwag fagomon igtogbong has manga fadwasay, nyawa hadya kilala haraw tonya. ⁶ Tagfadog has Tifonan istay kitay haw matogbongan wa dahol. Fag kitonya ngay. Togbongan is taw kagfadagos it lahawan kiton Diyos fakasayaon. ⁷ Maskin ta galwasi in Kiristo ta nalahaw git banwanan, yakanga tadwag syag togbong gis manga idwam tiwala. ⁸ Ka fiya, fag tam ka mangan tiwala kagtogbong ngay ka kitonya fag manga taw, kaarakitay imlag kawa tam pariho wa fangibolon has fakaoronganan baliwa. ⁹ Aho nasorat madi ngap has Tifonan is nyamo, dapat is Diyotiripis idwa kasayag talinga hangko. It fasadan

fag hanya kasta fagtalingaon. ¹⁰ Maskin ngay, aho nomdasog is nyamo, ho fadog it naibolon fagayo, no kinday nogfadwat igdog hyami, hanggan igbohag. Bohondi kitay tonya di kat naibolon dwat. Kafang yadig fasakbaw ka manga fadwasay nogsabang, ginya ka tiba no kasayag fasakbaw tonya fag manga fadwasay, is Diyotiripis igbando is taw, hanggan kasayag faalin gis Tifonan. ¹¹ Angko fakilalaon, fag idwag sokfon ka dwat fagtoladon, dapat fag ka fiya kam fagsokfonon. Ka fiyat ogali in Diyos wa manga anak, dapat ay, ka dwat it ogali idwa nalag hanya. ¹² No kawa han Dimitiriyo baliwa, sonson wa fiya kasta fwayong, hanggan ka fakaoronganan igfaanod kitonya. Hami igbaya yadi hanya, hanggan haw fadi wadtwa ka hyami fwayong bohonwa bohag. ¹³ No kitay di aywan yapdi angko bato fwayongon ha hyamo, nonman hodwa kasayag sora tonya kati. ¹⁴ Ho kasyag wa kitay tam ngalay di aban manladlagan. Ginya madi tam myasa wa sinya nogtololan. ¹⁵ Hyamo fangayofan fag malokmay nangos. Intam fakilalaon istay gwas yadi hyamo hanggan haw fag fadog yadi hantam manga fakilalaon fagayo is nyamo kitay, ho gwas has taw fagayo, igsadig sadi.

HODAS

1 Ahos Hodas in Kiristo Hisos sogowan sadi, hanggan in Santyago fadwasay kagsorat. ² Hogsorat has manga taw kan Diyos intam Ama fagalwasiyon, kat nafatawag hanggan in Kiristo Hisos faganoon. Ham nangos fag domog kitay is Diyos kaawa wa dahol hayo, igfalokmay hayo manga fangayofan fiya fiya, hanggan galwasi wa dahol hayo. ³ Angko manga fakilalaon, no kitay di, ho kasaya wa dahol dahol igsorat ha hayo itfagonan, no kinday is Diyos nogbawi intam fagayo. Dapat kati hogdog idwa fiya aho nodwag faaronganon ha hayo kitay, ham fag marigon no gapin intam fakatiwalaon, kan Diyos nadisag sadi di ginan, hanggan hosto wa tonya has aban aban, hat sakop fag manga taw. ⁴ Maskin hogfatagak hayo, ha akwa manga taw inaktom hantam mafyaloman. To fag manga taw iglaban in Diyos. Tagbalyo odi kastay sas baba daga fag manga dwat, han Diyos disag kafiyaon. Ta dayo homilala in Kiristo Hisos, ka sadi di kagfon intam hanggan intam Hari. Ka fadosaan kantalaga has taw danwan tohoyan hyabi yapdi. ⁵ Nyawa ham natwa wan, ho kasayag fatohod ya domwag hayo kitay, non-sagaya wa nabawi in Israil tifonan gis banwanan Ihip-to, is Diyos nafahatay wan ka mangadwan tiwala hanya. ⁶ Hanggan ka manga anghil tiba kagyod hyabi in Diyos disag kangayanan ha hanya, nadayot banwanan, yakangas Diyos nafagafos kadina kadwam bogloy tonya fag manga anghil, hanggan nafaporiso, hawas fakabokngan basad fakaharoman hanggan wa has Sirang Fangabayon. ⁷ Tam fag tohod yadi ka manga banwa Sodoma hanggan Gomora hanggan it manga faakbang banwa. Ka manga taga sinya gogali dwat has ka taw, kagsagaya ogali, nyawa has ina, nyawa has ama. Ginyas Diyos nafadosa has taw basad afoy kadwa kapsa, kaarakitay igfatagak has fagayo. ⁸ Ka kati fag manga taw kaglaban in Diyos kitonya yadi. Kawa tagtagimfan madolaw, yakanga ta gibolon dwat hat sadili habilogan, dayog fasakop in Diyos, hanggan igyod ka manga sam tongod. ⁹ Nyawas Migil, in Diyos anghil ka abwat man tibat kangayanan, kadalag yod kitonya nogfabohag han Satanas, kawa han Mwisid habilogan baliwa. Is Migil no gato in Satanas nalwang odi kitay, Kagfon intam fadosa hyamo. ¹⁰ To fag manga taw igyod odi ka manga bagay ta nodwa natwa wagdog. Ginya madi, kawat fakatwawon kito odis hayopan, tagfadwat yadit sadili. ¹¹ Isyay wan to fag manga

taw. Tagtolad odi in Kain ogali. Kawa ta kasaya kwarta tagtolad madali in Balaam nafalamang. To fag manga taw kiton da Kori hyabi, ta nalaban has ha kangayanan a, inliyam yadi wa makitonyaan. ¹² Ham manga fadwasay intiwala nogsayowan, to fag manga taw mahaya wa kalag non-aktom ha hayo, igbilog wa ka tiba, tadwa ha fagisipon no bohonwat sadili. To fag manga taw bilang odi linyabo, bagyo odi kagdiya, idwa yadi kwayan. Bilang odi manga fon hayo kadwag bohad nyawa dayo famohadon, no kitay di. Hanggan wa ngap it dalid in-goyod wan, natay wa orongan. ¹³ Bilang odi taob dagat dahol, it manga fakadiyaon igbo-raan wan. Bilang odi manga fanggasan kagtalang, intalaga wa ngap has basad marom wa dahol dahol, hanggan aban aban. ¹⁴ Is Inok, ka fafito fag hasokfonan gin Adan, danwa nafwayong kawa hanya fag manga taw, no nalwang kitay, hyabi yapdi, Fanlag ngay, intam Fon indasog wan, libo libo fag maliyaw fag manga ofod mahoyogan yadi hanya, ¹⁵ kaarakitay fatohoyan has fadosaan hanggan fadosa fagayo kadwa kilala in Diyos, kawat manga ibolon dwat, hanggan tagyod in Diyos. ¹⁶ To fag manga taw mamanawon ya, masogaton ya. Mahogod ya ngadi no goyon it bali fangayofan masayaon. Mafatakaon ya ngadig dog, dapat bilang wa fakiyason it hampang has taw no ha fagsagadon. ¹⁷ Dapat ay, angko manga fakilalaon, tam fag fagaba matohodan in Kiristo Hisos kagfon intam it togon git manga Fandiya Barita, ta no nafaadal hantam. ¹⁸ Hyabi yapdi ta nafwayong hantam kitay, sas ginanan fag kasohodan, hambangkad aban manga fanlibak kadwa kasaya han Diyos, ka katanog odit bali fangayofan masayaon. ¹⁹ To fag manga taw kagfasarowayan hayo nagkasadiyan. Ta goyon kastay is baba daga fag manga ogali. Ka Maliyaw fag Falad idwa yadi sas taw. ²⁰ Dapat angko manga fakilalaon, tam fag karigon nogsyag han Diyos. Kantam, fag ka mandintam fakatiwalaon kafiyaon. Fag syag ka Maliyaw fag Falad togbong tam nogdarangin. ²¹ Tam fag idwa kaoman no galwasi in Diyos hanggan fag gagwanta waganaya ka haboyagan kadwa ha katabowan kan Kiristo Hisos kagfon intam fagdisagon hantam, maskin kaawa intam. ²² Tam fag kaawa hanggan farigon ka manga gadowan it fangayofan. ²³ Lakwian wan ka tiba ka kaakbang has afoy. Ka tiba intam fakawaon, dapat tam fag matagahan yadi kat manga

ogali kadwa fiya. Fag idwam lafit hantam kat manga ogali dwat, fag kitos igbaybay ista rotay sitam sitam, ta no bangbangon, halimbawa. ²⁴Is Diyos ka syagan gano intam kaarakitay tam idwag falamang. Hanya ka syagan yadig fadasog intam hat atobangan kafiyan, idwa ha dwat ngadi ogbot ogbot, masolong wa dahol.

²⁵Tam fag fasayagdog hanya, ka sadi dik Diyos intam Famawi, gin Kiristo Hisos kagfon intam. Tam fag faan-od kitay hanya ka ha kafiyan, kadaholan, karigonan hanggan kangayanan, gi yapdis hyabi hyabi, hanggan wa kati, hanggan wa aban aban. Fag kitonya wa ngay.

NAFALAG

1 To fag sorat kagfwayong in Diyos nafalag han Kiristo Hisos, kaarakitay is Kiristo Hisos man ka fathoyan hat manga sogowan ka manga bagay kaakbang wamlag aban. Ginya madis Kiristo nasogo ya domwag it anghil kaarakitay falag to fag manga bagay han Hwan, it sogowan. ² Ginya madis Hwan nafwayong it mata lagan fagayo, kawan Diyos nafalag hanya, hanggan is Kiristo Hisos nafaorongan yadi wan. ³ Kagbasa to fag sorat bomaya wan, hanggan ka mangag talinga hanggan igfaanod kan Diyos manga nafwayong istay, bomaya yadi wan, maskin to fagayo fag manga bagay kaakbang wamlag aban. ⁴ Ahos Hwan kagsorat ha hayo san Diyos fitok tifonan sas sakop Asya. Ham nangos fag domog kitay is Diyos, ka kati, hanggan ka hyabi, hanggan ka kabangkad aban fag Diyos, hanggan ka fitok falad ka san Diyos tokawan fanokawan gorangon akbang, ⁵ hanggan is Kiristo Hisos ka fiya wak faorongan, ka bago bago fag natay kanboyag ya, hanggan Hari has manga gorangon istay is baba daga, ham nangos fag domog kitay tonya fag tolo mahoway ha hayo, hanggan igfalokmay hayo manga fangayofan. Is Kiristo Hisos galwasi intam, hanggan it folot ka nafalfas intam gintam manga ogali dwat, ⁶ ginya madi nafabali intam it sakop kafiyaon, manga fagalan-han-Diyos, kaarakitay omibolon in Diyos hanggan it Ama ibolon. Tam fag fasayagdog hanya hanggan fag faanod it kafiyan hanggan karigonan hanggan aban aban. Fag kitonya wa ngay. ⁷ Is Kiristo Hisos kaakbang wamdasog sas linyabo. Fagayo fag manga taw lomag hanya, hanggan ka naoros in Hisos daga tagyangan, ta lomag hanya aban. Gis nanya, sas fagayo fagayo fag manga banwanan taw, ta omoraw was kadalan Hisos. Fadi wan, fag kitonya wa ngay. ⁸ Is Diyos kagfon intam, kadwa ha bosal, ka kati, hanggan ka hyabi, hanggan ka kabangkad aban fag Diyos iglwang, Aho ka Alfa hanggan ka Omiga. ⁹ Ahos Hwan, hayo fadwasay ka kito yadi hayo gagwanta manga mahori, kasadi santam Hari, hanggan idwag fagomon kawa tam insadi san Hisos. Kawa ta kahori angko, aho nogfaadal in Diyos hampang, hanggan ka fakaorongan kawa han Hisos, yakanga ta nafaalin angko ha sadik foyo dagat, it ngayan Patmos. ¹⁰ Itfagonan, santam Fon sirang, hogfaangay ka Maliyaw fag Falad kafasadan sangko, ginya ho nadog kitay ha nahasnog dahol ginko dayo goyoy, dahosag

bodyong no kaato. ¹¹ Ka nahasnog iglwang, Soratan sa sadik famasaan nyawa kana kam manga lagon, ginya ha fadiyan aban kam manga nasorat han Diyos fitok Tifonan sas manga banwa Ifiso, Ismirna, Pirgamo, Tiyatira, Sardis, Filadilfiya, hanggan has Lawdisiya yadi. ¹² Ho natakfili kaarakitay lomag ka kampang hangko. Kangko lagan fitok salangan ginto. ¹³ Ginya ho ha lagan sadi, ka bilang Kanbali Taw, malindogan sas fagbokngan manga salangan. It rotay balis bisngilan a, ginto it fogong sas boknga dobdob. ¹⁴ It manga bok bohondi kitos gafas ik kaabohayan. It mata kito was afoy nogsinay. ¹⁵ It bitis kito wasta nafalayon tanso gis basad afoy sawas kasinayan. It hasnog kito wasag fawas danom kagtarapsahan. ¹⁶ Ha bitbit yadi fitok fanggasan sat balis sihon fag gamat, ha baladaw ha tayom baliw baliw kabangkad git basad bibig. It walong masilaw kito was myanit nogyawa sas boknga sirang. ¹⁷ Ho no nalag di ngay hanya, ho nakfo hat atobangan, bilang wa mahatayan. Dapat hanya natawid angko it gamat ka balis sihon, ginyag lwang, Haw fag idwa kadala, aho ka nagona hanggan kamgoyan, ¹⁸ aho ka boyagan yadi kati. Hyabi ho natay wan, dapat fanlag ngay, kati ahon boyag ya, ho fawa matay domwag hanggan aban aban. Aho wa ka ha manga sosi has kahatayan hanggan has Daga Salad. ¹⁹ Yakanga ha fag sorat ka hyamo lagan, ka kati fag masohod fag manga bagay, hanggan ka manga bagay kamlag aban. ²⁰ To kat kahologan kadya nafatwagdog has taw, kangko bitbit fitok fanggasan hanggan ka fitok salangan ginto. Ka fitok fanggasan kawa ka manga anghil gis fitok tifonan, hanggan ka fitok salangan ginto, kawan Diyos fitok tifonan taw.

2 Ha soratan han Diyos Tifonan sas banwa Ifiso, hat anghil kitay, Ka ha bitbit fitok fanggasan sat balis sihon fag gamat, hanggan kaglahaw sas fagbokngan fitok salangan ginto ka nafwayong angko, soratan kitay, ² Ho fadi wadtwa hyamo manga naimibolon, hanggan im nakayayan, hanggan kitay hadwag fagomon. Ho twa wa kitay haw kadwat iglag ka manga gogali dwat. Haw nasolay ka mangag faniring odi in Diyos manga Fandiya-Barita. Haw natwa waglag kitay manga odi bohagon tonya. ³ Ho twa kitay maskin haw galwasi angko haw nadog mahori, dapat hadwag fagomon, hadwan bway. ⁴ Dapat, to kangko lagan dwat sa hyamo kati, hagfasigpala wa bangan angko,

idwa kito ka hyabi ha no galwasi angko bago bago. ⁵ Ha fag tohod haw no kinday hyabi no galwasi angko. Ha fag soyo wan hanggan fag dayo ka manga dwat fag ogali. Im ogali fag kito mandi ka hyabi ha no galwasi angko. Dapat, ha nodwag soyo, ho ngalay dimbangkad has nyamo, ho bomol kam salangan. ⁶ Dapat to fag bagay kangko nabayaan hyamo, haw kito yadingko, haw kahori wa dahol dahol ka manga Nikolayta ibolon. ⁷ Ham no ha manga talinga ya ngadi, fag talinga wan ka Maliyaw fag Falad fwayong han Diyos manga Tifonan. Hogfaangay kitay aban, sas fiya fag oliyanan ka manga natay, ka manga nadaog has kadwatan, ta fag homwan ka bohad hayo kagfaboyag is taw. ⁸ Ha soratan han Diyos Tifonan sas banwa Ismirna, hat anghil kitay, Ka nalwang yadi kitay, Aho ka nagona hanggan kamgoyan, ka natay, ginyan boyag ya, ka nafwayong hangko, soratan kitay, ⁹ Ho natwa wan ka hyamo nadalanan manga mahori. Ho twa kitay haw myabog, dapat ka orongan haw maakwa. Ho fadi wadtwa kitay kagfaniring manga Hodyo igyod hyamo, dapat ka orongan tonya fag manga taw in Satanas di sakop. ¹⁰ Ha fag idwa kadala ka manga mahori kamdasog ha hyamo aban. Haw fag danwa twa kitay is Fandaya faporiso tiba aban sa hayo safolok yabi, kaarakitay somolay hayo. Haw fag idwag fagomon nyawa ta hanggan wa fahatay hyamo, ginya madi ho domisag ha hyamo haboyagan ka bilang wa sangbaw kagfalag kitay haw nadaog has kadwatan. ¹¹ Ham no ha manga talinga ya ngadi, fag talinga ka Maliyaw fag Falad fwayong han Diyos manga Tifonan Kagdaog has kadwatan idwa domalan has fadowa fg kahatayan. ¹² Ha soratan han Diyos Tifonan sas Pargamo, hat anghil kitay, Ka ha bitbit baladaw, ka ha tayom baliw baliw, ka nafwayong hangko, soratan kitay, ¹³ Ho fadi wadtwa kitay im banwanan sawan Satanas tokawan fanokawan gorongan, dapat ay, nyawa kitonya, hadwag fagomon igsyag angko. Nyawat fagonan, sa hyamo banwanan, in Satanas wa oliyanan, ta nafahatay angko matanogon fag fangibolon, is Antipas, hadwa nafagomon igsyag angko. ¹⁴ Dapat to kangko fakabayaon hyamo maskin tiba sa hayo igtalinga in Balaam faadal, ka nafadonong in Balak ka nafayayom manga taga Israil has ogali dwat. Ginya, nyawa ta nahwan famiyan has labang taw, hanggan ta naogali dwat has ka taw baliwa. ¹⁵ Tiba ya ngadi sa hayo igtalinga has adal Nikolayta. ¹⁶ Yakanga ham fag soyo wan, dayowan wan hayo manga ogali dwat. Ham nodwa somoyo, hombangkad wa madali has nyamo hayo, yakanga ho omisog tonya fag manga taw, kawa baladaw gingko basad bibig kangko fanlaban has taw. ¹⁷ Ham no ha manga talinga ya ngadi, fag talinga wan ka Maliyaw fag Falad fwayong han Diyos manga Tifonan. Ho domisag angko nabotang fanganon gingko banwanan sam tongod has mangag daog has kad-

watan. Ho fahafod yadi ha sadi ha sadi myasa sadik bato abohay, masoratan yadi sinyo bago fag ngayan, idwa ha taw twa ka ngayan bago, no bohonwa ka tomanggap tonya fag bato. ¹⁸ Ha soratan han Diyos Tifonan sas banwa Tiyatira, hat anghil kitay, In Diyos Anak, kat mata kito was afoy nogsinay, hanggan it bitis kito was tanso nogsilaw siwas kasinayan, ka nafwayong hangko, soratan kitay, ¹⁹ Ho fadi wadaglag hyamo manga ogali, kawa haw galwasi angko hanggan has taw, hadwag fagomon, haw gibolon in Diyos ibolon, hanggan gagwanta manga mahori. Ho twa yadi kitay bohondi kito ka hyabi im manga ibolon fiya kati. ²⁰ Dapat to kangko fakabayaon hyamo, haw igfaangay in Hisibil, ka ina kaglwang kitay hanya in Diyos wa fangampang, dapat it manga adal nabalag odingko manga fangibolon, nafadogay odi has ogali dwat has ka taw baliwa, nafaoyon ya ngadi kitay nyawasta famiya, fakwan lamang. ²¹ No kitay di, ho dogay wagfanaya kitay, tonya fag ina fag somoyo, fag domayo it manga ogali mahaya, dapat dayo kaoman. ²² Haw fag danwa twa kitay, ho fagomo tonya fag ina, hanggan ka manga ama ka kasaya hanya, sat baba sagmak kaarakitay dogay idwam bangon. Ka manga kasaya hanya fag ina domog mahori, idwa hat dayo fag mahori ta nodwa somoyo ista manga naogali dwat ginya fag ina. ²³ Ho fahatay yadi wat manga anak, hanggan in Diyos manga Tifonan fagayo tomwa kitay, aho wa ka twaglag fiya fiya sasta manga fangayofan hanggan isip. No kinday ka hayo manga naibolon ha sadi ha sadi, ho gomanti wa hayo fagayo fagayo. ²⁴ Hodwa mamahoriyan domwag hayo tiba sas Tiyatira kadwag talinga han Hisibil adal, kadwan donong hasta faglwangon in Satanas manga abasad fag kadonongan mafyaloman. ²⁵ Dapat ay, no baliday ahodya kabangkad, ham fag idwa kaoman hayo manga ogali ka fiya. ²⁶ Ho domisag has idwag fagomon igdayo has dwat, hanggan kagfadagos katanog angko manga togon hanggan has katabowanan, ho domisag kangayanan igbahala has fagayo fag manga layonan banwanan taw, kito yadingko natanggap kangayanan gingko Ama. ²⁷ Kito was baol mabyat hanya no bomahala aban, tomoltog ka manga layonan banwanan taw, kito wasag bakbak anglit hanggan wagfaarogbotan ²⁸ Ho domisag yadi hanya ka faramnag dayo kasirang. ²⁹ Ham no ha manga talinga ya ngadi, fag talinga wan ka Maliyaw fag Falad fwayong han Diyos manga Tifonan.

3 Ha soratan han Diyos Tifonan sas banwa Sardis, hat anghil kitay, Ka ha akwa in Diyos fitok falad, hanggan fitok fanggasan, kaglwang kitay, Ho fadi wadtwa hyamo manga ogali. No kalag di haw boyagan di, dapat ka orongan haw mahatayan wan. ² Ha fakafolaw wan, farigonan ka manga bagay fiya kansawad yapdi ha hyamo, kaarakitay ka fiya fag manga

bagay idwa fagayo imliyam. Ho natwa wagdog kitay, sangko Diyos faglagan, hadwa nafatonglos im manga ibolonon. ³ Haw fag idwag liyam kam natanggap hyamo donggon manga adal. Fag katanog wa tonya, fag soyo wa a, fag dayo im manga dwat fag ogali. Ha no bilang didwa kafolaw, ho has nyamo wan, ho bilang di kitos fangnahaw, hodwa tomogon no ginahin fag masohod aho no kadasog. ⁴ Nyawa kitonya, ha akwa yapdi sayok is nyamo sas Sardis kadwa nafaowing it manga rotay, yakanga ta omofod angko ha manga solong rotay abohay, maskin ta maangay wan. ⁵ Kadwag fagomon igdaog ka kadwatan somolong yadi ka kitonya fag rotay abohay, ahodwa bomol it ngayan gis listahan manga taw ka ha haboyagan. Ho fahilala yadi wa hanya sangko Ama atobangan hanggan hat manga anghil. ⁶ Ham no ha manga talinga ya ngadi, fag talinga wan ka Maliyaw fag Falad fwayong han Diyos manga Tifonan. ⁷ Ha soratan han Diyos Tifonan sas banwa Filadilfiya, hat anghil kitay, Ka Maliyaw hanggan ka fiya fag fandaliyan hanggan ka mabitbitan yadi in Dabid sosi, kaglwang kitay hanya no naboklas, idwa ha twagtahop, hanya no natahop, idwa ha twag boklas. ⁸ Ho fadi wadtwa im manga ogali, ho twa kitay hadwa bangan madonong, dapat haw katanog angko togon, hadwag tangkod angko, hadwag dayo. Yakanga ho naboklas ka sik sakbawan sa hyamo fagonan, idwa ha syagan tomahop to, nyawa faktaw. ⁹ Fandog ngay, ho fabangkad ha hyamo in Satanas sakop manga bohagon, kagfaniring odi kitay manga Hodyo, ho falingkohodan lamang tonya fag manga taw sa hyamo atobangan kaarakitay ta tomwa waglag kitay ho galwasi hyamo. ¹⁰ Maskin haw intanog angko togon kitay fag idwag fagomon, gis nanya fag masohod aban, ka kahoriyan kagsolay fagayo fag manga taw sadik baba daga nomdasog, ho omano wa fiya fiya hyamo. ¹¹ Ho ngalay dimbangkad is nyamo. Ha anowan fiya fiya ka hyamo wa fagbotangon kaarakitay idwa ha homagaw hyamo sangbaw, nyawa faktaw. ¹² Ho fabali kagdaog has kadwatan bilang sadik torok sangko Diyos Fanimbaan-Dahol, hanya idwa yadi malin ginya, hanggan aban aban. Ho somorat angko Diyos ngayan sa hanya, hanggan angko Diyos it banwa ngayan, ka bago fag Hirosalim, ka domokson gingko Diyos banwanan sam tongod. Ho somorat yadi sa hanya angko ngayan bago. ¹³ Ham no ha manga talinga ya ngadi, fag talinga wan ka Maliyaw fag Falad fwayong han Diyos manga Tifonan. ¹⁴ Ha soratan han Diyos Tifonan sas banwa Lawdisiya, hat anghil kitay, It ngayan is Fadi wa ngay, fag kitonya wan, ka maanod hanggan fiya nogfaorong, hanya kagfabago in Diyos nahalig fagayo, kaglwang kitay, ¹⁵ Ho fadi wadtwa im manga ogali, ho twa kitay hadwa matamis, hadwa yadi matabang. Fiya man nangos haw no matamis, ngatay matabang.

¹⁶ Maskin haw bilang mataka wagdog, bohonwa yadi

matamis, bohonwa yadi matabang, ho somofa di hyamo. ¹⁷ Haglwang, ha maakwa wan, hosto wan fagayo fagayo fag kaakwaan. Yatokitay, hadwa ngap twa kitay haw marongkot, haw maawa waglag, myabog wa dahol haw, bota hanggan malobasan odi. ¹⁸ Gwadi ka fiya, ha saliyon gingko ginto kanlayon fiya fiya kaarakitay hambali maakwa orongan, manga yadi rotay abohay kaarakitay hadwa kaya kitay hadwa ha solong, manga famolong has mata kaarakitay im mata imfoga ya. Fagayo saliyon gingko. ¹⁹ Ho gato hanggan gadal fiya fiya fagayo kangko fagalwasiyon. Yakanga ha fag kabagat wa has fiya, fag soyo wan, hanggan fag dayo im ogali dwat. ²⁰ Fandog ngay, ho malindogan sas dayo sakbawan, hogsagam wan, nyawa faktaw no domog angko hasnog, ginya fasakbaw angko, ho somakbaw wa hat fangayofan a, mi mangilhodan wan, hyami sagaba sadi wan, mi manayowan fagaba. ²¹ No kinday aho nadaog has kadwatan hanggan matokawan kati, sangko Ama akbang, sat tokawan fanokawan gorangon, kitonya yadi kagdaog has kadwatan, ho fatokaw yadi hanya sangko akbang, sangko tokawan fanokawan gorangon. ²² Ham no ha manga talinga ya ngadi, ham fag talinga wan ka Maliyaw fag Falad fwayong han Diyos manga Tifonan.

4 Aho nontabo wagsorat han Diyos fitok Tifonan, bokod angko lagan madolaw. Ginya ho ha lagan ya, san Diyos banwanan sam tongod, sadik sakbawan maboklasan. Aho sadi ya ginan nadog ya domwag ka nahasnog, bilang igbodyong, iglwang kitay, Ha fag sakbaw wa hastay, ho falag hyamo kam-anod aban kasta faglagan. ² Ginya madi hogfaangay ka Maliyaw fag Falad kafasadan sangko, ginya ho nalag sadik tokawan fanokawan gorangon san Diyos banwanan sam tongod, hanggan ka matokawan sinya. ³ Ka matokawan sinya it walong di masilaw waglag, kito was bato aspiro a, bato kornalina, fiya kabantay, sinay sinayon. Ha akwa yadi sadik balangaw malatoy kitos bato ismiralda maligongan sinya fag tokawan. ⁴ Sas ligongan fanokawan gorangon ha dowak yak safolo ha ofat ik manga tokawan fanokawan gorangon. Ka mangag tokaw sinya fag manga tokawan dowak safolo ha ofat ik manga fagtahinan. It manga solong rotay sonson wa abohay, sat manga boknga alfoyo ha sangbaw ya ngadi ginto. ⁵ Ginya fag tokawan gis fagbokngan, ha tahin wa barikos hilat a, igsohodan wan has hinagoman, hanggan linti di, katik wan. Ha fito yadik salong igyawa sas akbang tokawan fanokawan gorangon. Tonya kan Diyos fitok falad. ⁶ Sas fagonan tokawan ha dagat, bilang wa salamin it kahalyawan, kito was bato matikyas it kaabohayan. Ginya madi ho nalag in Diyos nahalig boyagan ofat, maligonan sas tokawan fanokawan gorangon, sonson wa mata sas fagonan hanggan wa ginanan alfoyo. ⁷ Kangko lagan bago bago kanhalig boyagan, bilang wa liyon, it fad-

owa bilang wa anak baka aman, it fatolo bilang wa taw it walong, it faofat bilang wa boyaw kaglayog sam tongod, daga banwa. ⁸To fag manga inhalig boyagan ofat, myasa wa onom it fakfak, naskat wa mata sas babaw hanggan sas basad. Idwa ha katohasan gambahan yabi sirang, iglwang, Maliyaw, maliyaw, maliyaw is Diyos kagfon intam, kadwa ha bosal, Ka hyabi, hanggan ka kati, hanggan ka kabangkad aban fag Diyos. ⁹No baliday tonya fag ofat kan Diyos nahalig boyagan gambahan yapdi, igfasayagdog, igfadaholon hanggan igbaya has matokawan sas tokawan fanokawan gorangon, ka boyagan hanggan aban aban, ¹⁰ka dowak safolo ha ofat ik fagtahinan nanlibabaan sas atobangan tokawan, igfasayagdog has matokawan sinya, ka boyagan hanggan aban aban. Ta nafwalid yadi ista manga sangbaw ginto sas fagonan tokawan, ginya taglwang, ¹¹Haw hyami Diyos, kagfon hyami, haw ka fiya ista fagfasayaon igdog, ista fagfadaholon hanggan ka fiya tomanggap karigonan, Maskin haw wa ka nahalig fagayo fag manga bagay, No kinday kam kafangayofanan haw nahalig fagayo, hanggan haw mandi ka gano yapdi fagayo.

5 Ginya madi ho nalag kitay ka matokawan sas tokawan fanokawan gorangon ha bitbit, sat balis sihon fag gamat, ka sadik famasaan malohotan. Baliw baliw labong ha sorat, hanggan ha faganitan fitok tatak sas boknga lohota sorat. ²Ho nalag sadik marigon fag anghil kampang marigon has taw, iglwang, Fakta ka fiya gomisi ka manga faganitan hanggan bomoskad ka famasaan malohotan? ³Dapat, nyawa san Diyos banwanan sam tongod, nyawa sas baba daga, nyawa ka sas daga daga, basad daga, tadwa ha lagan fiya bomoskad ka famasaan hanggan bomantay no kana kat sorat sinya. ⁴Honyaya wa goraw maskin idwa ha lagan fiya bomoskad hanggan bomantay ka famasaan. ⁵Yakanga gis dowak safolo ha ofat ik fagtahinan, ka sadi nalwang hangko, Ha fag idwa goraw. Fanlag ngay, bantayan ka Liyon gin Hoda hasokfonan, in Dabid yadi hasokfonan, hanya wa ka nadaog has kadwatan, yakanga fiya di no gomisi ka fitok faganitan hanggan bomoskad ka malohotan fag famasaan. ⁶Ginya madi Anak Topa kangko lagan, malindogan sas fagbokngan manga fagtahinan hanggan sas fagbokngan ofat kanhalig boyagan, sawasta boknga boknga, sas tokawan fanokawan gorangon. Ka Anak Topa ha manga nagbaranan, yakanga twa wa kalag kitay tonya fag Anak Topa kasta nafahatay. Ka Anak Topa ha mata fito, ha songay fito. Ka fitok mata kan Diyos fitok Falad kat nasogo hastay sas baba daga sadik dahonya. ⁷Ka Anak Topa naakbang ka matokawan sas tokawan fanokawan gorangon a, kat sihon fag gamat nabol ka malohotan fag famasaan. ⁸Ginya madi ka Anak Topa no nabol tonya fag famasaan, ka ofat kanhalig boyagan, hanggan ka

dowak safolo ha ofat ik fagtahinan, nanlibabaan sat atobangan. Kafod wa diya alpa, bilang gitara, ha bitbit yadi fingga mangkok ginto, napno wa kamangyan, it anos banglo. To fag anos banglo kawa manga darangin manga taw kantohoyan han Diyos. ⁹To kat ambahan bago kasta fagambahanon, Haw lamang ka fiya bomol ka malohotan fag famasaan Hanggan gomisi ka manga faganitan sinya, Kawa haw kasta nafahatay, hanggan im kahatayan Ka natobos manga taw gis fagayo fag layonan daga, gis fagayo fag sanglitaw, gis fagayo fag hasokfonan, hanggan gis fagayo fag dahol fag layonan banwanan, ha akwa wan kam natobos, kaarakitay imtohyon han Diyos. ¹⁰To fag manga taw kam natobos, ha nafabali intam hari it sakop manga fagalan, kaarakitay omibolon intam Diyos ibolon. Ta abam bali yadi manga gorangon istay is baba daga. ¹¹Ginya ho nabantay ya domwag hanggan ho nadog manga hasnog anghil kaaywanan wa kaaywanan wan, hadwa mamin bomilang manga anghil sas kaaywanan. Ka manga anghil maligongan ka tokawan fanokawan gorangon, hanggan ka ofat kanhalig boyagan, hanggan ka dowak safolo ha ofat ik fagtahinan. ¹²Kiti ta no gambahan, dahol yadi ta no kasnog, Ka Anak Topa, kasta nafahatay, Hanya wa ka fiya tomanggap kadonongan, kaakwaan, fakatwawon, Fagsyaganon, kangayanan hanggan kafiyan. Tam fag fasolong igdog hanya. ¹³Ginya madi ho nadog yadi fagayo ka mangan halig san Diyos banwanan sam tongod, hanggan sas baba daga, hanggan ka sam daga, sas basad daga, hanggan ka basad dagat, fagayo fagayo ka mangan halig sadi wak kayonya, igsohodan garambahanan, iglwang kitay, Ka matokawan sas tokawan fanokawan gorangon, hanggan ka Anak Topa kaghari fagaba, Hanya ka ha kangayanan hanggan kafiyan. Tam fag fasayagdog hanya hanggan aban aban. ¹⁴Ka ofat kanhalig boyagan nasagot, Fadi wa ngay, fag kitonya wan. Hanggan ka manga fagtahinan nanlibabaan, nafasayagdog yadi han Diyos.

6 Ginya ho nalag kitay ka Anak Topa nagisi ka bago bago fag faganitan gis fitok faganitan sas famasaan. Ginya madi ho nadog ka sadi kanhalig boyagan no nahampang dahowas hasnog dalogdog, nalwang, Ha fag hastay wan. ²Aho no nabantay, ho nalag sadik habayo abohay, hanggan ka masahayan sinya ha diya famana. Ha nadisag hanya sangbaw. Ginya hanyan lahaw wan kaarakitay domaog it kalaban. ³Ginya ka Anak Topa no nagisi ya kat fadowa fag faganitan, ho nadog ka fadowa fag inhalig boyagan iglwang, Ha fag hastay wan. ⁴Ginya sadi yak habayo, dararag, kanbangkad. Ha nafaangay ka masahayan sinya kitay, hanya kagbahala igfabago awayan istay is baba daga, kaarakitay manga taw igfahadhatayan ha sadi ha sadi. Ha nadisag hanya sadik talibong aba. ⁵Ka Anak Topa no nagisi ya kat fatolo fag faganitan, ho

nadog ka fatolo fag inhalig boyagan noglwang, Ha fag hastay wan. Kangko lagan sadi yak habayo, masding. Ka masahayan sinya ha bitbit timbangan. ⁶ Ginya madi ho nadog bilang wa ha nahasnog gis fagbokngan ofat kanhalig boyagan, iglwang, Sadik dinariyo it sali sadi lamang ik sarok tirigo, dapat tolok sarok sibada sadik dinariyo. Dapat ha fag idwag fadwat ka langis gis bohad olibo hanggan ka alak. ⁷ Ka Anak Topa no nagisi ya ka faofat fag faganitan, ho nadog ka faofat fag inhalig boyagan iglwang, Ha fag hastay wan. ⁸ Ho nalag sadik habayo kaabohay wat anit, kawa kagomo. Ka masahayan sinya is Kahatayan it ngayan, hanggan is Daga Salad sa odit dayo habot. Ha nadisag hanyas dowak masahayan kitay, ta fag bahalag fahatay it faofat fag layonan gis fagayo fag manga taw sadik baba daga. Tiba ta nabasing talibong no natay, tiban lonos, tiban sagit fanalafod, tiba kawa manga hayopan maisog nahagat. ⁹ Ka Anak Topa no nagisi ka falima fag faganitan, ho nalag kasta manga nafahatay kawa ta galwasi in Diyos barita, hanggan tadwag fagomon igfaorongan kawa han Diyos. Ho nalag it manga falad sasta daga fanogbaan. ¹⁰ Tagrokyaw dahol, igsyag in Diyos kitay, Haw kagfon hyami, haw ka maliyaw hanggan orongan, mayaya wagfanaya. Ginahin kin haw no fatohoyan has fadosaan hanggan gomanti has taw sas baba daga ka nafahatay hyami? ¹¹ Ha nadisag rotay abohay has fagayo kasta manga nafahatay. Ha nafwayong yadi has taw kitay ta fag mafahowayan yapdi ogbot. Kagfon intam bago di fadosa tonya nodwa hamaktom domwag gista manga fadwasay, hanggan gista manga ofod fangibolon ka kito yadis taw no matay aban. ¹² Ginya madi ho nabantay hanggan ho nalag kitay ka Anak Topa no nagisi ka faonom fag faganitan, nalinog marigon. Ka myanit inbali wa masding kito was rotay magwang magwang. Ka magdanon bilang wa folot dararag. ¹³ Ka manga fanggasan indagdag gis banwa kitos manga bohad igos no karabak nogbagyo marigon. ¹⁴ Ka banwa sam tongod inliyam wan kitos kasoratan no kalohot madali hanggan ka manga moyod hanggan manga foyo dagat nalin git fagoliyanan. ¹⁵ Ginya fagayo fag manga taw, ka manga gorangon istay is baba daga, hanggan ka manga ha kangayanan, kasta manga tahinan, hanggan ka manga maakwa, ka manga ha kadonongan, fagayo fagayo, nyawasta nasali sogowan, nyawa bohongan, fagayo igtago wan sayo basad lohib, sayo faktaban manga bato sas moyod. ¹⁶ Tagtawag yadi has manga moyod, taglwang, Ham tabonan wa hyami kaarakitay ka matokawan sas tokawan fanokawan gorangon idwa lomag hyami, hanggan ka Anak Topa idwa omisog hyami. ¹⁷ Maskin kati, ka madala fag Sirang fadosaan indasog wan. Faktaw wa kamtolas no kitonya wan, ham gayfan?

7 Ginya madi ho nalag ofat ik anghil malindogan bali bali ofat ik fongfongan daga igtaktak yapdi ka ofat ik bagyo, fag idya bomagyo has baba daga, nyawa has baba dagat nyawa has manga fon hayo. ² Ginya ho nalag sadi yak anghil gindahod gis salogan myanit baliwa, ha diya in Diyos boyagan it fantanda. Natawag marigon has ofat ik anghil kan Diyos nagtongon ka bahala igfabagyo, hanggan aywan kat bato fadwaton hastay has baba daga hanggan baba dagat, iglwang, ³ No baliday hami idya nafatanda in Diyos manga fangibolon sat boknga angas, ham fag idyag fabagyo marigon has baba daga hanggan has baba dagat, hanggan has manga fon hayo. ⁴ Ginya ho nadog no kayoday kat natandaan, gamtanan 144,000 gis fagayo fag manga layonan in Israil manga hasokfonan. ⁵ san Hoda hasokfonan 12,000 san Robin hasokfonan 12,000 san Gad hasokfonan 12,000 ⁶ san Asir hasokfonan 12,000 san Niptali hasokfonan 12,000 san Manasis hasokfonan 12,000 ⁷ san Simyon hasokfonan 12,000 san Libi hasokfonan 12,000 san Isakar hasokfonan 12,000 ⁸ san Sabolon hasokfonan 12,000 san Hosi hasokfonan 12,000 san Binhamin hasokfonan 12,000 ⁹ Ginya madi ho nabantay ya, kangko lagan kaaywanon kaaywanon fag manga taw, hadwa mamin bomilang, nyaa faktaw. To fag manga taw giwas fagayo fag manga dahol fag layonan banwanan taw, hanggan gis fagayo fag manga layonan ogbot, manga banwanan hanggan manga sanglitan sinya. Ta malindogan sas fagonan tokawan fanokawan gorangon hanggan sas atobangan Anak Topa. Fagayo ha solong rotay abohay, ha bitbit yadi manga labong bilang manga labong tagisi. ¹⁰ Tagsohodan igtarawagan marigon, iglwang, Intam Diyos, ka matokawan is nwa fag tokawan, hanggan ka Anak Topa kagbawi intam. ¹¹ Ginya madi, fagayo fag manga anghil naligong malindogan tonya fag tokawan, naligong has manga fag-tahinan, hanggan has ofat kanhalig boyagan, nanlibabaan sas fagonan tokawan hanggan nafasayagdog in Diyos. ¹² Nalwang, Fadi wa ngay, fag kitonya wan. Intam Diyos ka maangay bomaya, hawa hanya ka kafiyon, kadonongan, fasalamat, kangayanan, karigongan hanggan fagsyaganon hanggan aban aban. Fag kitonya wa ngay. ¹³ Ginya madi sadik fagtahinan naintaw angko kitay, Fakta fag manga taw tonya, hanggan ginday ka ha manga solong rotay abohay, ha gayfan? ¹⁴ Ginya hoglwang, Twa man, hodwa twa. Haw wa ngap ka twa. Ginya hanya nafwayong angko, To ka mangadwa nafagomon nyawa ta nafahoriyan wa dahol dahol has taw. Ta nafabali fiya hanggan nafaabohay it manga rotay sas Anak Topa folot. ¹⁵ Yakanga ta sawan Diyos fagonan tokawan fanokawan gorangon, gibolon it ibolon yabi sirang, sat Fanimbaan Dahol. Hanggan ka matokawan sinya fag tokawan ka so-makop has taw. ¹⁶ Tadwam lonos domwag, idwa yadim

inom, idwa yadim alhagan afali basad myanit.

¹⁷ Maskin ka Anak Topa ka sas baba tokawan fanokawan gorangon ka omano is taw, kito wa ka fangano topa. Tomaban manga taw has manga bolbogan danom kagfaboyag has manga taw. Is Diyos wa ka fomyad ka manga lowa fagayo gista manga mata.

8 Ginya madi ka Anak Topa no nagisi ka fafito fag faganitan, manga sadik tama sinyahod idwa ha naawang ngadi kana san Diyos banwanan sam tongod. ² Ginya madi ho nalag ha nafahafod ha sadi ha sadi has fitok anghil, ka malindogan san Diyos atobangan, myasa sadik bodyong. ³ Ginya sadi yak anghil ka ha bitbit fingga mangkok ginto, it sohadan kamangyan, nalindog sas bilog fanogbaan. Ha nadisag kaaywanon fag kamangyan hanya fag anghil kaarakitay fasoglat in Diyos manga nafili it manga darangin, nogsonog sas baba ginto fag fanonogan, sas fagonan tokawan fanokawan gorangon. ⁴ Ka anos kamangyan masoglatan in Diyos manga nafili it manga darangin, nasongaw gi basad fingga mangkok san anghil gamat, nasongaw han Diyos akbang. ⁵ Ginya madi yabay, ka anghil nabol manga baga gis fanonogan, nafahapno basad fingga mangkok a, ginya naokas has boknga daga. Dagos wa nadalogdog, manbang wan, nahilat ya, nalinog ya. ⁶ Ginya madi ka fitok anghil dan wa matalagaan faoni it manga bodyong. ⁷ Ka gona fag anghil no nafaoni it bodyong, dagos nahwayan has baba daga, yilo hanggan afoy, ha soglat ya ngadi folot. Kat fatolo fag layonan daga insonog, kat fatolo fag layonan manga fon hayo, hanggan fagayo fag lamnon latoy sadik baba daga insonog wan. ⁸ Ka fadowa fag anghil nafaoni it bodyong, ginya ka bilang sadik dahol fag moyod gigang in-okas ha basad dagat. Kat fatolo fag layonan dagat inbali wa folot. ⁹ Kat fatolo fag layonan manga boyagan basad dagat natay wan, hanggan kat fatolo fag layonan sahayan baba dagat indwat lamang. ¹⁰ Ka fatolo fag anghil nafaoni it bodyong, ginya sadik dahol fag fanggasan gigang, kito was fatay iyanay, indagdag has fatolo fag layonan manga safa hanggan manga bolbogan danom. ¹¹ Ta nafangayan tonya fag fanggasan is Lamnon Mayat. Kat fatolo fag layonan danom safa hanggan bolbogan inbali mayat, hanggan kaaywanon fag manga taw natay wan no nainom, kawa mayat wan. ¹² Ka faofat fag anghil nafaoni it bodyong, ginya ka fatolo fag layonan myanit, ka fatolo fag layonan magdanon, hanggan fatolo fag layonan fanggasan in-iktan wan, yakanga ka myanit it fatolo fag layonan, hanggan ka fatolo fag layonan magdanon, hanggan fatolo fag layonan manga fanggasan inharom wan. No sirang idwa haryawa sas fatolo fag layonan, hanggan no yabi kitonya yadi, idwa ha nayawa sas fatolo fag layonan. ¹³ Ginya madi ho nalag sadik boyaw iglayog sam tongod, sas daga banwa. Ho nadog yadi no goni, igtawag

marigon, iglwang, Isyay, isyay wan, kat sawad tolok anghil no faoni dit bodyong, madala wa dahol dahol kasta lagon fagayo istay is baba daga.

9 Ginya madi ka falima fag anghil nafaoni it bodyong. Ginya ho nalag sadik fanggasan kandagdag gin Diyos banwanan sam tongod has baba daga. Ha nadisag hanya ka sosi has ohang kadwa ha saragan. ² Ka fanggasan naboklas ka ohang, ginya ha anos dahol dahol, dahos nagfagbaan anglit ayo ayo, inbangkad ginyas basad ohang, nalanbong wa myanit hanggan wa baba daga, marom wan. ³ Ginya madi aywan fag manga fan inbangkad gis basad anos, narowayan has baba daga. Ha nadisag has manga fan kitay, fag somyagan homagat ka manga taw, myasa wa masagit, kito was inonay no kagat. ⁴ Ha natogon has manga fan kitay, hawag dwat ka manga lamnon, hanggan manga fon hayo, nyawa kana fag tanom. It bato hagaton ka manga taw lamang kadwa ha akwa in Diyos tanda sat boknga angas. ⁵ Idwa ha nafaangay kitay ka manga fan fag fahatay tonya fag manga taw, fahoriyan odi balis limak magdanon. Ka fan nogfahoriyan is taw bilang wa ha korit kito was inonay no kagat. ⁶ No kandogay day ka fan no kagat yapdis taw aban, ka manga taw kasaya wa matay nangos, dapat tadwa yadi katay. ⁷ No kalag di ka manga fan kito was manga habayo ta nogfatalaga has awayan, ha bilang manga sangbaw ginto, hanggan it manga walong bilang yadi wa walong taw. ⁸ It manga bok bilang wa bok ina, it manga ngifon kito was ngifon liyon. ⁹ Ka manga fan bilang wa ha fanaktak baol sat manga boknga dobdob. Kat manga fakfak nograbog, kito was manga habayo no ha goyod kalisa no hawas awayan, kadkalingan wan. ¹⁰ Ha sogod sas dayo habot, kitos inonay. Ka gis basad ihog ka syagan igfasagit manga taw limak magdanon. ¹¹ Ka anghil gorangon fan ka gano ka ohang daga kadwa ha saragan. It ngayan, sas fangampangan Hibriyo, kawas Abadon, no sas fangampangan Girigo, is Apolyon, it kahologan, kawas Fandwat. ¹² Ka gona fag madala kanboyaw nafwayong intolas wan, dowaya ka kadasog. ¹³ Ginya ka faonom fag anghil nafaoni it bodyong, hanggan ho ha donggon ya sadik hasnog gis basad ofat fag solok sas ginto fag fanonogan ka san Diyos atobangan. ¹⁴ Ka hasnog nafwayong has faonom fag anghil ka ha bodyong, Falfasan ka ofat ik anghil ka magafosan sas gobang safa dahol, ka safa Ifratis. ¹⁵ Yakanga nafalfas ngay ka ofat ik anghil ka danwa nafatalaga hat bato ibolonon, kaarakitay homamin wa fahatay ka fatolo fag layonan gis manga taw, sadi wak dahonya baba daga, gis nanya fag oras, gis nanya fag sirang, magdanon hanggan fangaraw. ¹⁶ Ta nafwayong angko kitay ka manga sondalo masahayan baba habayo, 200,000,000 it kaaywanan. ¹⁷ Ho nalag ka manga habayo hanggan ka masahayan sinyay, ta ha manga fanaktak sat boknga dobdob, it kadarara-

gan bilang wa afoy, it kalatoyan bilang wa bato sapiro, it kaboragawan kitos asopri. Ka alfoyo habayo bilang wa alfoyo liyon. Ha afoy ya, ha anos ya, ha asopri ya, kabangkad git manga basad bibig. ¹⁸ Tonya tolok kahoriyan ka nafahatay ka fatolo fag layonan gis fagayo fag manga taw sadik baba daga, gis afoy, gis anos hanggan gis asopri kanbangkad gis basad manga bibig habayo. ¹⁹ Maskin ka karigonan manga habayo sawat manga bibig, hanggan giwat manga ihog. It manga ihog ha alfoyo kito was abyanon, kagfasagit has manga taw. ²⁰ Ka mangan sawad yapdi istay is baba daga, ka mangadwa natay ginya fag kahoriyan, idwa yadi nasoyo. Tadwa nadayot manga sadili gamat nahalig fag manga fagsyagon, igfasayagdog yapdi has manga labang, manga tolad ginto, manga tolad pilak, tanso, bato, ngatay hayo. ²¹ Tadwa yadi nasoyo it manga ogali dwat, kitos iglibon taw, igsyag has iba fag katonongan, mangag fabayowan, mangag nahaw.

10 Ginya madi ho nalag sadi yak anghil marigon igdokson gin Diyos banwanan sam tongod, bilang wa masafotan sayo manga linyabo linyabo, ha balangaw ya ngadi sat tongod alfoyo. It walong igsinay kito was myanit hanggan it bitis bilang wa manga igang nogsaroray aba aba. ² Hanya ha bitbit sadik famasaan ogbot maboklasan. It bitis ka balis sihon, malidan sas baba dagat, kat balis wala has baba daga. ³ Hanya narokyaw, it hasnog kitos liyon nogngayong. Hanya no narokyaw ha fitok dalogdog nasagot, nafawas, bilang wa nanogonan. ⁴ Ka fitok dalogdog nonsagaya wa kampang, ho gayfan ho somorat, dapat ay, ho nadog sadik hasnog gin Diyos sam tongod kaglwang, Fag idya man igfadog ka fitok dalogdog nafwayong. Haw fag idwag sorat tonya. ⁵ Kangko lagan anghil ka matorangan, insadi it bitis has baba dagat, insadi has baba daga, nafaabwat it gamat balis sihon a, igsiyo han Diyos banwanan sam tongod. ⁶ Naowas ka boyagan fagaba fag Diyos it ngayan, ka nahalig ka banwa sam tongod, ka daga, hanggan ka dagat hanggan fagayo ka sinya, naowas tonya kaarakitay faorongan it fwayong, noglwang, Idwa fadogay domwag. ⁷ Ka fafito fag anghil no faoni it bodyong, is Diyos fatonglos wan it bato ibolonon kadya nafadog has taw, kito kat nafwayong hyabi hat manga fangampang fag manga fangibolon. ⁸ Ginya madi kangko donggon hasnog ka nahampang gin Diyos banwanan sam tongod, nahampang ya domwag hangko, nalwang, Fag gakbang has anghil ka matorangan, insadi it bitis has baba dagat, insadi has baba daga, fag bol ka bitbit famasaan maboklasan ⁹ Ho naakbang nga anod has anghil a, ho nasagad ka famasaan. Ka anghil nalwang hangko, Bol to a, hwan wa dagos. Ha domog mayat no sam daga dobdob, dapat im dayo kwan matamis, kito was dyahot salbod it katamisan. ¹⁰ Ho nagamit wa a, ho nahwan wan ka ogbot fag famasaan.

No kitay di matamis ngawan, kito was dyahot salbod, dapat ho no natolon wan, mayat sangko daga dobdob. ¹¹ Gin ka naghil nafwayong hangko kitay, Ha fag fadog ya has taw kan Diyos nafagona nafwayong hyabi kawa has manga taw gis fagayo fag banwa, hanggan gis fagayo fag layonan banwanan taw, hanggan manga sanglitan, hanggan kawasta manga gorangon.

11 Ginya madi ka anghil nadisag angko sadik fanokat ka kitos sokod, nalwang kitay, Ha fag kalindog wan, sokatan in Diyos Fanimbaan Dahol hanggan ka fanogbaan. Tapan yadi ka mangag fasayagdog in Diyos sinya, no kayoday. ² Dapat ay, fag idwag sokat ka basad aladan Fanimbaan-Dahol maskin indisag wan has manga Hintil kagbahala sinya. Balis ofat ik safolo ha dowak magdanon ta lomid lamang, domwat ka banwa ka nafabokod han Diyos. ³ Dapat ho somogo angko sogowan dowak, ka maorongan has taw balis 1,260 ik sirang, ta nogfadog angko hampang. It manga rotay manga odi sagodang. ⁴ To fag dowak sogowan kagfaorongan, kawa dowak fon olibo, hanggan dowak salangan ka sawasagfon daga atobangan fagaba. ⁵ No ha akwa taw kasaya omisog aban hanya fag dowak taw kagfaorongan, yabay ha akwa wa afoy imbangkad gista manga basad bibig a, matohoyanan ka mangag laban hanya fag dowak taw matay wan. ⁶ Tonya fag dowak taw kagfaorongan, syagan digtaktak ka mwayan sam tongod is banwa, kaarakitay idwa homwayan no kandogay day ta nogtolto yapdi in Diyos hampang. Ta syagan yadig fabali ka danom kito was folot, hanggan no ginahin ta no kasaya, ta syagan digfabangkad nyawa kana fag kahoriyan sas baba daga. ⁷ Dapat ay, ka dowak sogowan nonsagaya wagfaorongan, ka hayopan maisog imbangkad gis basad ohang kadwa ha saragan, lomaban has taw, domaog hanggan wa fahatay. ⁸ Ista manga habilogan mahatayan aban basta odi boknga karsada basad banwa dahol, dapat ta nogfatimbang tonya fag banwa, bilang wa banwa Sodoma, ngatay Ihipto. Sinya yadi manga taw no nafapako ista sadili Fon sas naftimbangan hayo. ⁹ Tolok sirang hagboknga ka manga taw, nyawa ginda fag manga banwa, hanggan manga layonan taw, manga sanglitan, manga layonan daga dahol, mabantayan yapdi, tadwa nafaangay kitay fag imlobgob kat manga habilogan. ¹⁰ Fagayo fag manga taw sas baba daga tamsolong waglag kitay to fag dowak taw natay wan. Ta manolodan ya ngadi. Ta mandidisagan manga fasalamat ha sadi ha sadi, maskin tonya fag dowak fangampang nafahoriyan wa dahol has taw. ¹¹ Dapat ay, nonsagaya tonya fag tolok sirang hagboknga, is Diyos nafafwali ya hanya fag dowak fangampang ka ipsaw haboyagan. Ta nalindog ya. Ka manga taw indolaw wan, tandala waglag. ¹² Ginya madi, in Diyos manga

fangampang dowak, kanboyag ya, nadog sadik hasnog marigon gim tongod, nalwang hanya fag dowak taw, Ham fag sakbaw wa hastay. Ginya ista manga kalaban no mabantayan yapdi, ka dowak taw hawas tongod, hawa basad linyabo, in-anggong wa has tongod. ¹³ Dagos wa nalinog yadi marigon marigon gis nanya, ka manga balay nakfo sas fasafolo fag layonan sinya fag banwa, hanggan 7,000 taw natay kansakop sas linog. Ka manga in-goyan sinya indala wan, ta bago di nafasayagdog in Diyos kagfon ka banwa sam tongod. ¹⁴ Ka fadowa fag madala kan boyaw nafwayong intolas wan. Ka fatolo fag madala madali yadi wamlag aban. ¹⁵ Ginya madi ka fafito fag anghil nafaoni it bodyong hanggan ha manga hasnog nahampang marigon san Diyos banwanan sam tongod, kaglwang, Kati ka manga gorongan sakop fagayo fagayo, sadi wak baba daga, inbali kagfon intam, it sakop, hanggan it natogon-Famawi, it sakop. Kagfon intam inbali wa hari sadi wak baba daga, hanggan has aban aban. ¹⁶ Ginya madi, ka dowak safolo ha ofat ok fagtahinan ka matokawan sat manga tokawan fanokawan gorongan, san Diyos atobangan, nanlibabaan a, nafasayagdog han Diyos. ¹⁷ Taglwang, Haw Diyos, kadwa ha bosal, kagfon hyami, Ka hyabi hanggan ka kati fag Diyos, Migbaya wa dahol hyamo, kawa haw nabangkad wam karigonan kadwa ha katabowanan. Gis kati ginan haw igfabago waghari. ¹⁸ Hyabi ka mangadya kilala hyamo gisog wan. Dapat haw nafalag yadi wa kati im kaisogan. Kati haw igfathoyan yadi has manga natay it fadosaan. Dapat ha domisag yadi manga fasalamat ha hyamo manga fangibolon, ka manga fangampang, Hanggan ha hyamo manga nafili, Hanggan has fagayo ka katanog hyamo manga fwayong, nyawa ka manga ha kangayanan, nyawa ka mangadwa ha akwa. Kati wa fag masohod haw no fadwat ka mangag dwat manga banwanan taw. ¹⁹ Ginya madi in Diyos Fanimbaan-Dahol san Diyos banwanan sam tongod inboklas wa a, sinya yadi wa basad fanimbaan ka haban taranggapan inlag wan. Ginya ha hilat nandadalakan nafawas wan, nadalogdog yadi dahol dahol. Nalinog ya ngadi, nahwayan ya yilo.

12 Ginya madi sadik tanda madolaw wa dahol dahol inlag sas banwa sam tongod, sadik ina mabalokasan ka myanit, ka magdanon sat daga bitis, ha sangbaw yadi safolo ha dowak fanggasan sat boknga alfoyo. ² Ka ina gabosog wan, igdyang, igrokyaw wan it kasagitan, kawa mahori igfasagaya it anak. ³ Ginya sadi yak tanda inlag sas banwa sam tongod, sadik daragon gorongan, dararag. It alfoyo fito, hanggan it songay safolo, talafod wa ha sangbaw sat manga boknga alfoyo. ⁴ Ka daragon nafabayabayan it ihog ka nafadagdag ka fatolo fag layonan gis manga fanggasan, in-od-okasan lamang has baba daga. Ginya madi, ka ina no kaakbang wagfasagaya it anak, ka

daragon nalindog sas ina dayo bitis kaarakitay homwan wa madali madali ka anak dararag nom-sagaya git ina. ⁵ Ka ina nafasagaya sadik anak ama, kantalaga bomahala has fagayo fag dahol fag layonan daga, kito was baol fag maganit no bomahala has taw, ginya dagos ha akwa naanggong ka anak gis ina akbang, nadiya wa han Diyos sat tokawan fanokawan gorongan. ⁶ Ka ina nalagyo yadi wan has basad fakahyabogan, ha sadik foyo kan Diyos nafatalaga hanya, kaarakitay is Diyos omano hanya sinya, balis 1,260 ik sirang. ⁷ Ginya madi haglabanan san Diyos banwanan sam tongod. Is Migil hanggan it ofod manga anghil iglaban in Daragon hanggan it manga anghil. Da Daragon iglaban yadinda Migil, ⁸ dapat in-daog di. Ginya ta nafaalin inda Daragon gin Diyos banwanan sam tongod. ⁹ Ta naokas lamang ka dahol fag daragon, kawa hyabi hyabi it ngayan is Abyanon, it ngayan is Fandaya yadi, hanggan is Satanas, kawag fatalang manga taw istay sadik baba daga. Ta naokas lamang hanya hanggan it manga sakop anghil hastay is baba daga. ¹⁰ Ginya madi ho nadog sadik hasnog marigon san Diyos banwanan sam tongod kaglwang, Giwas kati ginan is Diyos igbawi intam. Nafalag wantam it karigonan, hanggan kati hanyan bali hari, Hanggan nafalag it natogon-Famawi it kangayanan, Maskin in-okas kati gin Diyos banwanan kagsombong yabi sirang han Diyos, intam manga ogali, manga dowasayan. ¹¹ Dapat ta nadaog in Fandaya Kawa ka Anak Topa it folot, Hanggan ka barita kat fagfaoronganon kat manga fanlaban no nadaog hanya, Kawa tadwa nafaanogon it manga haboyagan, nyawa hanggan wa matay. ¹² Yakanga ham, in Diyos banwanan sam tongod, hanggan fagayo ka mabanwanan sinya, ham fag masolong wan. Dapat ay, isyay wan, ka ham sas baba daga hanggan ka sas dagat, Maskin is Fandaya nadokson has nyamo hayo, hanggan it mahori fag kaisogan tomoon wa ha hayo, Kawa hanya twa wa kitay it karigonan ngalay wamliyam aban. ¹³ Ka daragon no nalag kitay hanyan okas wan has baba daga, naalaw ya domwag ka ina ka nafasagaya anak dararag ama. ¹⁴ Dapat ay, ha nadisag bilang manga fakfak boyaw dahol has ina, kaarakitay syagan lomayog ha sadik foyo basad fakahyabogan, sinya ha akwa falogaw, omano yadi hanya balis tolok fangaraw hagboknga, kaarakitay ka ina lomagyog gin Abyanon dahol. ¹⁵ Kawa kitonya is Abyanon naolob danom, inbali kitos safa kaarakitay, falimos nangos ka ina. ¹⁶ Dapat ay, ka daga natogbong ka ina, nasngi lamang, yakanga ka danom kan Daragon naolob intoyong lamang has daga, yakanga ka ina inbawi di. ¹⁷ Yakanga kawas Daragon kaisog wa dahol dahol ka ina, nabaring wa ka ina manga hasokfonan kansawad, kaarakitay omaway has taw, has manga katanog in Diyos togon hanggan idwag fagomon katiwala in Hisos nafadog ka fakaorongan.

¹⁸ Ginya madi yabay, is Daragon nalindog sas bahalan dagat, baba onay.

13 Ginya madi ho nalag sadik hayopan maisog kabangkad gi basad danom dagat. It alfoyo fito, it songay safolo. Fagayo fag songay kafod ha sangbaw, fagayo fag alfoyo ha ngayan masoratan, igsway in Diyos. ² Kangko lagan hayopan maisog, bilang wa liyopardo, it bitis kitos bitis oso, it bibig bilang wa bibig liyon. Is Daragon nadisag wa has hayopan maisog it sadili kadonongan hanggan it tokawan fanokawan gorongan, hanggan it dahol fag kangayanan. ³ Ka hayopan maisog, kat alfoyo sadi ha baran, no kalag di fakatayon wan, dapat infakdat ya. Ka manga taw sadi wak baba daga intaka waglag kitay in fiya di, ta ngap natahin wa has hayopan maisog. ⁴ Manga taw nafasayagdog han Daragon maskin is Daragon kagdisag it kangayanan has hayopan maisog. Ta nafasayagdog yadi has hayopan maisog, taglwang, Idwa ha tomolad in Hayopan maisog. Fakta ka lomaban hanya, ham gayfan? ⁵ In-angay kitay ka maisog fag hayopan fag mafatakaon igdog, igsway in Diyos, hanggan hanya fag ha kangayanan balis ofat ik safolo ha dowak magdanon. ⁶ Igyod wa nga in Diyos, in Diyos ngayan, in Diyos banwanan sam tongod, hanggan fagayo ka maoliyanan sinya. ⁷ In-angay yadi kitay ka hayopan maisog lomaban hanggan domaog in Diyos manga nafili. Indisag yadi has hayopan maisog ka kangayanan igbahala has fagayo fag manga layonan taw, manga banwanan, manga sanglitan, hanggan fagayo fag manga dahol fag layonan daga. ⁸ Fagayo fag manga taw ka boyagan istay is baba daga mamasayagdog hanya, no bonwa ka manga taw ka odit manga ngayan insorat sas listahan manga taw ka ha haboyagan. Ista manga ngayan danwan sorat sinya ka daga nodyan halig, hanggan ka Anak Topa, ka manga taw nafahatay, ka gano tonya fag listahan. ⁹ Ham no ha manga talinga ya ngadi, fag talinga wan. ¹⁰ No faktaw kantohoyan kitay ta pomilit wa tomaban wan, ya ta tomaban wa hanya. No faktaw kantohoyan kitay ta lomibon wa hanya, tonya wa kat lagon aban. Yakanga in Diyos manga nafili fag danwadwag fagomon, fag syag wa orongan han Diyos. ¹¹ Ginya madi, ho nalag sadi yak hayopan maisog kanbangkad gis basad daga. It songay dowak, kitos anak topa songay, dapat it hasnog kitos hasnog daragon. ¹² To fag hayopan ha natanggap kangayanan gis gona fag hayopan maisog, hanggan ka gona mabantayan di, ka fadowa nogbahala has taw. Igpilit fagayo fag manga taw sas baba daga fag fasayagdog has gona fag hayopan maisog, ka hyabi ha baran, no kalag di fakatayon wan, dapat infakdat ya. ¹³ Ay ay, ka fadowa fag hayopan maisog, madolaw wa dahol it nafalag manga fatimawa. Nafabangkad yadi afoy gis banwa sam tongod, has baba daga sas faglagan manga taw. ¹⁴ Igfaadowan fagayo fag manga

taw sas baba daga kawat manga nafatimawa sas gona fag hayopan maisog faglagan. Nafasognod is taw kitay, haligan sadik tolad, igtolad ka gona fag hayopan maisog, ka ha baran talibong hyabi, dapat idwa natay. ¹⁵ In-angay yadi kitay, ka goyan fag hayopan maisog fag domisag yadi ipsaw kasta nahalig tolad ka gona fag hayopan maisog. Yakanga ka tolad syagan yadi wa kampang, igfahatay yadi fagayo ka dayog fasayagdog hanya. ¹⁶ Nafwalid ka gona fag hayopan tanda sas fagayo fag manga taw, ngatay sasta gamat balis sihon, ngatay sas boknga angas, napilit wa fagayo, nyawa ka ha kangayanan, nyawa kadwa ha kangayanan, nyawa ka maakwa, nyawa ka myabog yadi, nyawa kasta sogowan, nyawa ka bohonwasta sogowan. ¹⁷ Nodwa ha akwa ka gona fag hayopan maisog it tanda, ngatay it nomiro ka pariho it ngayan, tadwag faangay manga taw igfali, ngatay igfali nyawa kana. ¹⁸ Tam idwa tomwagdog to tam nodwa ha fakatwawon. Nyawa faktaw ka ha fakatwawon tomwa wagdog it kahologan ka nomiro ka gona fag hayopan maisog, kagfatohoyan sadik ama it ngayan. It nomiro kawa 666.

14 Ginya madi ho no nabantay wan, hoglag kitay ka Anak Topa malindogan sas baba moyod Siyon, hanggan it manga ofod 144,000 ik taw. Ka Anak Topa ngayan hanggan it Ama ngayan masoratan sasta boknga angas fagayo fagayo. ² Ho nadog yadi sadik hasnog gin Diyos banwanan sam tongod, bilang wa sadik danom gis boknga tiwan nogtarapsahan, igfawas wan, kito was dalogdog katik wan. Kangko donggon hasnog bilang wa mangag faoni, kaskas it manga alpa. ³ Ta garambahanan wan sadik ambahan bago, sas atobangan tokawan fanokawan gorongan, hanggan sas akbang ofat kanhalig boyagan, hanggan sas akbang dowak safolo ha ofat ik fagtahinan. Idwa ha taw twagdog ista ambahan no bohonwa ka odi ka 144,000 ik taw kan Diyos natobos gistay is baba daga ka syagan igtohod tonya fag ambahan. ⁴ To fagayo manga ama kadwa naofod has manga ina, idwa nababay. Ta matahinan fagaba has Anak Topa nyawa haday it hadasogan. Ka Anak Topa natobos tonya fag manga ama gis fagayo fag manga foro taw kawan disag han Diyos hanggan has Anak Topa, bilang bohad bago bago. ⁵ Tadwa nabalibad nyawa ginahin. Manga taw idwa ha lagan dwat sasta manga ogali. ⁶ Ginya ho nalag sadi yak anghil iglayog sas boknga halayawan, ha diya ka Fiya fag Barita kadwa kaoman, kaarakitay fadog has manga taw sas baba daga sas fagayo fag manga dahol fag layonan daga, fagayo fag layonan taw, fagayo fag sanglitan taw, hanggan fagayo fag banwanan. ⁷ Hanya nafwayong marigon, Ham fag katanog in Diyos manga fwayong a, ham fag fasayagdog hanya, maskin kati wa fag masohod hanya mamatohoyan has manga taw it fadosaan. Ham fag fasayagdog hanya ka nahalig ka banwa sam tongod, hanggan

ka daga hanggan dagat, hanggan manga bolbogan danom. ⁸ Ginya kat fadowa fag anghil nasoson ka gona, nalwang, Ka gorangon fag banwa, banwa Babilonya, intodtolagan wan, intodtolagan wan. Ka Babilonya nafainom ya ngadi manga alak has fagayo fag dahol fag layonan daga, kawat sadili wa nahalig alak, it ogali podo wa dwat has ka taw, napilit wa nafainom has taw, yakanga tonya fag alak kan Diyos fakaisogon. ⁹ Ka fatolo fag anghil nasoson yadi ka dowak anghil gona, igtawag marigon, Nyawa faktaw kagfasayagdog has hayopan maisog, ngatay hat tolad, hanggan igfafwalid it tanda sat boknga gamat, ngatay sat boknga angas, ¹⁰ hanya ominom in Diyos alak kaisogan, natalin han Diyos basad ongot kahoriyan, idwa ha aktom kahowayan sinya. Hanya domog mahori basad afoy hanggan asopri, saya ngadis Anak Topa faglagan hanggan ka manga maliyaw fag manga anghil fag lagan yadi. ¹¹ Ka anos gis afoy kagfahoriyan has taw maanosan wa sadik kaban ya. Ka mangag fasayagdog has hayopan maisog, hanggan hat tolad, hanggan ka ha akwa it tanda, idwa ha kahowayan yabi sirang. ¹² Yakanga kan Diyos manga nafili, ka manga katanog in Diyos togon, hanggan idwag fagomon igsyag in Hisos, fag matohoyanan idwag fagomon. ¹³ Ginya ho nadog sadik hasnog gin Diyos banwanan sam tongod, kaglwang, Ha fag sorat kitay, Ka manga mahatayan, ka katay gis kati ginan, dapat, gis dayo boyagan, insadi hasagfon intam, bomaya wan. Ka Maliyaw fag Falad iglwang, Anod wan, ta bomaya wan maskin ta mama-howay git nakayayan, kawa ka kasoratan it manga naogali gofod yadis taw. ¹⁴ Ginya ho nabantay ya, hanggan nalag sadik linyabo abohay hanggan ha matokawan sinya sadi, ka bilang taw, ha sangbaw ginto, ha bitbit sadik karit matayom. ¹⁵ Sadi yak anghil ka nadokson gis basad Fanimbaan Dahol, natawag marigon has matokawan sas baba linyabo, nalwang, Ha fag matawidan im karit, ha fag gafas wan maskin loto wa kati ka aniyon sas baba daga. ¹⁶ Yakanga ka matokawan sas baba linyabo igfasayang wat fangarit a, gafas wat aniyon sas baba daga. ¹⁷ Ginya madi ho nalag sadi yak anghil ka nadokson gis basad Fanimbaan Dahol, san Diyos banwanan sam tongod, ha bitbit yadi sadik karit matayom. ¹⁸ Ginya sadi yak anghil kagbahala has afoy inbangkad gis fanogbaan. Natawag marigon has anghil ka ha bitbit karit matayom, iglwang, Ha fag matawidan im karit, ha fag gani wan ka manga obas gis fagayo fag manga obasan sas baba daga, maskin loto wa kati. ¹⁹ Yakanga ka anghil nafasayang it karit a, naani ka manga obas, naokas has basad dahol fag fanlidan obas. Tonya fag fanlidan obas in Diyos mahori fag kaisogan. ²⁰ Ta nalid ka manga obas sas sokayan banwa hanggan ka folot gis basad fanlidan obas nabaha wan, 400 ik liho it kaayay-

owan hanggan balis liyog taw it kaabasadan gis baba daga has tongod, sonson wa folot.

15 Ginya ho nalag sadi yak falagon madolaw sas banwa sam tongod, fitok anghil ha diya fitok kahoriyan has fakaaywanan. Tonya kawa goyan goyan fag manga kahoriyan has fakaaywanan kawan Diyos mahori fag kaisogan imtabo wa balinya. ² Ginya kangko lagan bilang sadik dagat kito was matikyas it kasinayan, ka ha aktom afoy. Ho nalag yadi ka manga nadaog has hayopan maisog, hanggan hat tolad, hanggan hat ngayan nomiro. Ta malindogan sas akbang dagat ka bilang matikyas, ha bitbit in Diyos manga alpa. ³ Ta gambahan in Mwis, ka ngan Diyos sogowan, it ambahan hanggan ka Anak Topa, it ambahan kiti, Haw Diyos kagfon hyami, haw kadwa ha bosal, Kafiyaon hanggan madolaw wa dahol dahol im manga ibolon. Maslong hanggan orongan im manga ogali Haw noghari has manga dahol fag layonan daga. ⁴ Hyami Fon, fakta fag manga taw idwam tanog hyamo, ha gayfan? Fagayo fag manga taw mamasayagdog kitay haw kafiyaon. Maskin haw sadi lamang ka maliyaw, Manga taw gis fagayo fag dahol fag layonan daga manlibabaan ha hyamo atobangan, Maskin im manga ibolon maslong inlag wan. ⁵ Ginya madi ho nalag ka nafabokod ya domwag fag lingoban sas Fanimbaan Rotay, san Diyos banwanan sam tongod, inboklas wan. Tonya fag lingoban ista fanaranggapan han Diyos hanggan has taw. ⁶ Ka fitok anghil ka ha diya fitok kahoriyan has fakaaywanan nadokson ginya basad lingoban. Ista solong rotay abohay, malinay yadi, ha fagyahos ginto sas boknga dobdob. ⁷ Sadi kanhalig boyagan nadisag has fitok anghil fitok mangkok ginto, napno in Diyos mahori fag kaisogan, ka boyagan fagaba fag Diyos. ⁸ Napno wa anos sas basad lingoban ka nafabokod ya domwag maskin in Diyos kangayanan hanggan karigonan sinya. No baliday idyan tolas ka fitok anghil diya fitok kahoriyan has fakaaywanan, idya twag sakbaw hanyas basad lingoban.

16 Ginya madi ho nadog sadik hasnog marigon gis basad lingoban sas Fanimbaan Rotay, igsogo ka fitok anghil, iglwang, Sogi, ham fag hanya wan, bohosan ka manga mangkok it sohad, in Diyos mahori fag kaisogan, has baba daga. ² Yakanga ka anghil gona nawatwat ngay kat sohad, kat diya basad mangkok, has baba daga. Yakanga ka manga taw ka ha akwa in hayopan maisog it tanda, hanggan kaglohodan hat tolad, nabangbangan mahori a, masagit ya, baw ya. ³ Ka fadowa fag anghil nabohos yadi kat sohad git basad mangkok has baba dagat. Ka danom inbali folot bilang folot taw mahatayan, hanggan fagayo ka manga boyagan basad dagat natay wan. ⁴ Ka fatolo fag anghil nabohos yadi kat sohad git basad mangkok has manga basad safa, hanggan has manga bolbogan, ginyan

bali yadi wa folot sinya. ⁵ Ho nadog ka anghil ka gano has manga danom iglwang, Haw ka maliyaw, ka boyagan kati hanggan ka gis hyabi hyabi, Fakafiyen wan kam naibolon haw nogfatohoyan it fadosaan has taw. ⁶ Maskin kam disagon inomon has taw ka nafaolan in Diyos nafili fag manga taw, it folot, hanggan it manga fangampang folot, Folot mandi kasta inomon. Tonya ka fiya fag fadosa has taw. ⁷ Ginya madi ho nadog to fag manga hampang gis bilog fanogbaan. Haw Diyos kagfon fagayo hanggan kadwa ha bosal, Maanod hanggan orongan wa fakafiyen haw nogfatohoyan has taw it fadosaan. ⁸ Ka faofat fag anghil nabohos has myanit kat diya basad mangkok, ginya ka myanit nafali was taw afoy. ⁹ Yakanga ka manga taw nafali ngay. Dapat, nyawa kitonya, bohonwa ngap has mangag soyo, mangag fasayagdog in Diyos, ta ngap igfadwat odigdog in Diyos ngayan, ka syagan igfabangkad kitonya fag manga kahorihan has fakaaywanan. ¹⁰ Ka falima fag anghil nabohos has maisog fag hayopan tokawan fanokawan gorangon, nabohos it sohad git bitbit basad mangkok, ginyan hayopan maisog it banwanan inharom wan. Manga taw kagat it sadili dila kawa kasagit wa dahol. ¹¹ Ta nafadwat yadigdog in Diyos kagfon it banwanan sam tongod, kawa ta nogdog mahori ista manga sagit hanggan manga bangbang. Dapat ay, tadwa yadi nasoyo, tadwa yadi nadayo it manga ogali dwat. ¹² Ka faonom fag anghil nabohos kat sohad git basad diya mangkok, nabohos ha basad dahol fag safa, ka safa Ifratis. Ka danom inmaya, kaarakitay ka manga gorangon gis salogan myanit baliwa ha dalan has basad bintalan. ¹³ Ginya ho nalag tolok dwat dwat fag labang, bilang wa fihaw inbangkad gis basad bibig daragon, gi yadis basad bibig hayopan maisog, hanggan gis basad bibig fangampang bohagon. ¹⁴ To fag manga labang gibolon manga madolaw. Ta somabang has fagayo fag manga gorangon, sadik baba daga, kaarakitay fatifon nangos ka manga gorangon, kawa aban, san Diyos Sirang mahalga, ka Diyos kadwa ha bosal, ta manlabanan wan. ¹⁵ Ham fag matalingan, kito odis fangnahaw aho no kadasog. Ka mafolawan fagaba, kadwag loslos it manga rotay, idwam toon kitay idwa ha solong noglahaw, idwa maya sasta faglagan hanggan hanya bomaya wan. ¹⁶ Ka manga labang nafatifonan ka manga gorangon sa sadik foyo tagngayan Armagidon sas fangampang Hibriyo. ¹⁷ Ka fafito fag anghil nabohos kat sohad git basad bitbit mangkok, nabohos has boknga halayawan. Ginya madi ha nahampang marigon gis tokawan fanokawan gorangon sas Fanimbaan Dahol, nalwang, In-anod wa kati. ¹⁸ Ginya nahilat ya, nafawas ya, nadalogdog ya, nalinog ya. Marigon marigon fag linog, marigon man ka hyabi fag manga linog gona. ¹⁹ Ka dahol fag banwa insigsig tolok layonan. Kadi tiba fag manga banwa dahol sadik baba daga, fagayo

nakfo wan. Ka banwa Babilonya kanbantog kitay gorangon, fawa ha nalfas gin Diyos fadosaan. Yatokitay, is Diyos nafainom it mahori fag kaisogan fag alak ha hanya. ²⁰ Fagayo fag foyo dagat intaklob wan, fagayo fag moyod intanas lamang. ²¹ Nahwayan myasa wa dahol fag lifong yilo, it kahabyatan ka sik lifong, kito was sadik sako fayay, indagdag has taw. Kawa kitonya tagsogat ya ngawan Diyos, maskin to fag kahorihan has fakaaywanan taw mahori wa dahol dahol.

17 Ginya madi sadi gis fitok anghil ka ha diya fitok mangkok naakbang angko, nalwang, Ha fag hastay wan, lag ngay, ho falag hyamo ka fadosaan kamtohoyan has ina ka ha kangayanan has fabayowan baliwa. Hanya ka matokawan sat tokawan fanokawan gorangon, sas baba danom safa aywan. ² Ka manga gorangon istay sas baba daga insaya tonya fag ina, hanggan manga taw sas baba daga intahin yadi waglag, bilang yadi wanlango git alak kahayan. ³ Ginya ka Maliyaw fag Falad naboklas angko fangayofan hanggan sadik anghil nafangolo angko ha sadik foyo basad fakahyabogan. Ho nalag sinya sadik ina masahayan baba hayopan maisog, it olad dararag. Ka hayopan ha fitok alfoyo hanggan safolok songay. Ha manga ngayan, fagayo wagsway in Diyos, masoratan sas boknga hilogan hayopan. ⁴ Ka ina solong rotay ha dararag, ha akwa yadi bilang obi dongon it kahasdingan. It manga dayag manga ginto, manga bato fiya kabantay, hanggan manga ono bolawan. Ka ina ha bitbit sadik fanginoman ginto napno ka manga dwat fag ogali, hanggan wa ngap ka mahaya kawa nogfabayowan. ⁵ Sadik ngayan, mafyaloman yapdit kahologan, insorat sat boknga angas, kiti, Ka gorangon fag banwa Babilonya tonya wa ka bilang wasta ina has mangag fabayowan hanggan fagayo fag mahaya donggon sas baba daga, sinya wa fagayo. ⁶ Ho nalag yadi kitay tonya fag ina bilang wanlango gin Diyos manga nafili, it folot, kawasta nafahatay maskin tagfaorongan kawa han Hisos. Ho no nalag ka ina, hondolaw wa dahol dahol. ⁷ Dapat ay, ka anghil naintaw angko kitay, Kana mayon haw no kadolaw? Ho fomwayong hyamo it kahologan ka ina hanggan it nagsahayan hayopan, ka fito it alfoyo hanggan safolo it songay. ⁸ Kam lagan hayopan maisog boyagan hyabi, dapat kati natay wan, dapat ay, aban imbangkad ya gis basad ohang kadwa ha saragan, ginya hawas kadwatan. Ka manga taw boyagan yapdi sas baba daga, kat manga ngayan, gi yapdis kabali daga, idwan sorat sas listahan manga taw ka ha haboyagan, ta no lomag ka hayopan maisog, tamlipto wan, maskin ha nafahatay tonya hyabi, dapat ay imbangkad ya aban. ⁹ Ka fiya ka manga madonong fag twagdog. Ka fitok alfoyo kawa fitok fongso ka ina fanokawan. Ka fitok fongso igfahalimbawa fitok gorangon. ¹⁰ Indaog wa ka lima, sadi ya kan-goyan ha kangayanan yapdi, ka fafito idyan dasog. Hanya nom-

dasog, ngalay odi it kangayanan. ¹¹ Hanggan ka hayopan maisog, ka boyagan hyabi, dapat kati idwa akwa, kambali ka fawalo fag gorangon aban, dapat ay, tombos ka sadi gis fito. It hadasogan hawas kadwatan aban. ¹² Kam lagan safolok songay kawa safolok gorangon kadya ha nagdogan kangayanan, dapat aban ta mangoyogan has hayopan maisog no mamahala balis manga dowak tama sinyahod it kadogayan. ¹³ To fag safolok gorangon insadi it fangayofan hanggan mamasakop it kadonongan hanggan kangayanan has hayopan maisog. ¹⁴ Ta lomaban has Anak Topa, dapat ay, ka Anak Topa domaog di tonya maskin hanya ka Fon has manga fon, hanggan Hari has manga gorangon. Ka Anak Topa manga nafatawag, manga nafili, hanggan kadwag fagomon katanog hanya, gofodan yadi has Anak Topa nogdaog has taw. ¹⁵ Ginya ka anghil nafwayong ya domwag angko, Ka hyamo lagan danom, ka ina nagtokawan, kawa manga banwa, manga fakaaywanan taw, manga layonan daga dahol, hanggan manga sanglitan taw. ¹⁶ Kam lagan safolok songay, hanggan ka hayopan maisog, omisog aban has ina ka ha kangayanan has fabayowan baliwa. Ta homagaw it manga sangkap fagayo fagayo, ta lomobas wa a, omobon wa malobasan. Ta homwan wat manga faknol a, ta somonog wa kansawad. ¹⁷ Is Diyos igfaangay wa kitay, ta fag kasadi it fangayofan hanggan fasakop ista kangayanan hanggan kadonongan has hayopan maisog, hanggan wamtonglos in Diyos manga hampang. ¹⁸ Kam lagan ina kawa ka gorangon fag banwa kagfasognod has manga gorangon istay is baba daga.

18 Ginya madi ho nalag sadi yak anghil ka ha kadonongan dahol, igdokson gin Diyos banwanan sam tongod. It kasinayan igyawa wa sadik baba daga. ² Igrokyaw di kamin wan, iglwang, Ka gorangon fag banwa Babilonya intodtolagan wan, intodtolagan wan. Kati manga odi oliyanan labang sinyaya. Inbali odi porisowan labang, manga manok sitam sitam kagfogad sinyaya. ³ Maskin hanya nafainom has fagayo fag dahol fag layonan daga, it alak kawat ogali dwat has ka taw. Ka manga gorangon sas baba daga insaya hanya, hanggan aywan inbali maakwa noglag it fangaboyagon gis Babilonya manga ogali mahaya. ⁴ Ginya madi ho nadog sadi yak hasnog gin Diyos banwanan sam tongod kaglwang, Ham kangko sakop, ham fag danwag lagyo, Ham fag idwam aktom hat manga ogali dwat Kaarakitay ham idwa yadim aktom has taw ta nomdosa. ⁵ It manga ogali dwat digtarongbawan wan hanggan wagdasog ham tongod is banwa. Is Diyos fawag liyam it manga naogali dwat. ⁶ No kinday kat naibolon has taw, ham fag ganti yadi kitonya. Ham fag ganti, igfaparihowan wan kat naibolon ha hayo, Ham fahapnowan wat ongot fanginoman, Fag mayat man kat nadisag ha hayo. ⁷ No kinday ka banwa

Babilonya nogfadaholon it sadili, hanggan fagaba has kasolongan, Ham fag fatacakdog yadi hanya, hanggan fag fahori yadig dog hanya, Maskin it fangayofan fagabag lwang, Aho ka ina ha kangayanan, ista gorangon. Aho bohonwa ina balo, Nyawa ginahin ahodwa lomag kahorihan ⁸ Nyawa ka banwa Babilonya iglwang kitonya, yatokitay igsohodan wa kadasog gis nanya fag sirang ka manga kahorihan Manga sagit, tamrongkot yadi kawa ha natay, hanggan wamlonos, Im-sogba wa has basad afoy, hanggan wamyagaw. Maskin is Diyos kagfon intam marigon kagfatohoyan ista fadosaan. ⁹ Ka manga gorangon istay is baba daga, kansaya hanya hanggan kansolong sat akbang omoraw wan. Ta nogbantay ka banwa ganos wan, kasonog wan, ¹⁰ ta lomindog wa sas ayayo maskin ta kadala kitay, ta ngandayom lafit yadi kat kahorihan. Ta lomwang, Liwas liwas, manga dowa lamang ik tama sinyahod in-anod wan ka madala has gorangon fag banwa Babilonya. ¹¹ Kawa kitonya ka manga nalag it fangaboyagon ginya, istay is baba daga, omoraw a, imrongkot yadi wa dahol maskin idyadi wa ha manali ista manga fagfasaliyon. ¹² Idwa ha manali ista balidya ginto, pilak, manga bato fiya kabantay, hanggan ono bolawan, manga rotay kadya mahaligan, manga rotay dararag hanggan bilang obi dongon it kahasdingan, hanggan fagayo fag hayo banglo, ista sangkap manga fangil, kawa manga hayo fiya, manga tanso, manga baol, manga bato marmol, ¹³ manga haningay, manga famabanglo ofi, kasta fagsonogon banglo mira, hanggan kamangyan, manga alak, langis, harina, manga tirigo, manga baka, manga topa, manga habayo, hanggan wat kalisa, manga fasaliyon sogowan, nyawa hanggan wasta fangayofan hanggan wa habilogan. Idwa ha somali domwag. ¹⁴ Ka mangag lag it fangaboyagon ginya fag banwa lomwang hanya, Namin wan ka manga bagay fiya kam fakasayaon. Hadwa ha lagon domwag im kaakwaan fagayo, hanggan hyamo kafiyan inliyam yadi wan. ¹⁵ Ka manga nalag it fangaboyagon kawag fasali tonya fag manga bagay, hanggan inbali maakwa ginya fag banwa, tadwa omakbang domwag, kawa ta kadala kitay ta ngan yadim lafit has mahori. Ta omoraw wan hanggan imrongkot wa dahol. ¹⁶ Ta lomwang, Liwas liwas, tonya fag banwa gorangon no kana mayon nonsonog. Hyabi it solong rotay myasa wa fiya fag manga rotay dararag, manga obi dongon it kahasdingan, Manga ginto, manga bato fiya kabantay hanggan ono bolawan it manga dayag. ¹⁷ Manga dowa lamang ik tama sinyahod inliyam wa tonya fagayo. Ka manga kapitan sahayan baba dagat, hanggan it manga sahay, it manga bantay sas basad sahayan nabantay yadi gis ayayo, hanggan fagayo kaglag it fangaboyagon sas baba dagat, ¹⁸ ngadit anos ta nabantay, ta godgorawan wan ta noglag kitay ka banwa kasonog wa yabay. Taglwang,

Idwa ha natolad it kafiyan tonya fag banwa gorangon. ¹⁹ Ta nafwalid fogis sat sadili baba alfoyo, kawa no ha fakahoriyon. Taglwang, Isyay wa isyay wan ka gorangon fag banwa nadalanan. Fagayo fag sahayon kagtorosan hat fangadagsaan kabali wa maakwa haraw, no kitay di. Dapat ay, manga dowa odik tama sinyahod inliyam yadi wan it kafiyan hanggan kaakwaan. ²⁰ Dapat ay, kati, haw in Diyos banwanan sam tongod, fag kasolong wan, kawa tonya fag banwa insonog wan. Ham in Diyos manga nafili, ka manga gona fag Fandiya-Barita, hanggan manga fangampang, ham fag kasolong yadi maskin kati is Diyos nafatohoyan ista fadosaan kawasta naibolon dwat ha hayo. ²¹ Ginya sadik anghil marigon nabol sadik bato bilang dahol fag gilingan. Hanggan ya ngadi ha karigonan no ganggong ka bato, naokas has basad dagat, igsohodan wagrokyaw iglwang, Kitoy ka banwa Babilonya nomdwat aban, Hadwa aba ha lagon domwag. ²² Hadwa aba ha dogon domwag ista manga hasnog garambahanan, Hadyadi wa ha dogon sinyan aban manga kaskas alpa, mangag faon manga palawta, manga bodyong. Hadwa ha lagon aban sa hyamo, nyawa kana fag katonongan has fangalig baliwa. Hadyadi wa ha dogon aban manga gilingan igrabog. ²³ Idwa ha somantik ngadi sadik salong is nyamo, Hadwa aba ha dogon domwag masolong fag manga hasnog kagbabay hanggan gindogan no hawat fangsawan. Maskin hyamo fangaboyagon hyabi inbali marigon sadik baba daga gi hyamo fagfasalison. Haw nadaya fagayo fag manga taw sadik baba daga maskin haw nafasayagdog has fagayo in Satanas katonongan. ²⁴ Inlag sas ina in Diyos manga fangampang folot, in Diyos manga nafili it folot, hanggan fagayo kasta nafahatay istay is baba daga.

19 Ginya madi ho nadog kaaywanon fag manga taw sas banwa sam tongod, it manga hasnog inbali bilang di sadi ta no gambahan kiti, Tam fag fasayagdog kagfon intam Is Diyos lamang ka ha kafiyan, ka ha katonongan hanggan igbawi intam. ² Orongan wa fakafiyan hanya nogfathoyan ista fadosaan. Nafadosa ka ina ka ha kangayanan has hayan baliwa, Kagfadwat manga taw istay is baba daga kawat ogali nogfabayowan. Is Diyos nafadosa hanya maskin kawa nogfahatay intam Fon manga fangibolon. ³ Ta nangarambahanan ya domwag kitay, Fag fasayagdog kagfon intam. Sinya dik ganos ganos ham tongod, idwa kapsa sadi wak kaban ya, ka gorangon fag banwa no kasonog. ⁴ Ka dowak safolo ha ofat ik fagtahinan hanggan ka ofat kanhalig boyagan nanlibabaan a, nafasayagdog in Diyos, ka matokawan sas tokawan fanokawan gorangon, nalwang, Fadi wan, fag kitonya wa ngay. Fag fasayagdog kagfon intam. ⁵ Ha nahampang gis tokawan fanokawan gorangon iglwang, Ham fagayo fagayo in Diyos manga fangi-

bolon Nyawa ka ha kangayanan, Nyawa kadwa ha kangayanan, ham ka manga katanog it fwayong, ham fag fasayagdog intam Diyos. ⁶ Ho dagos wa nadog kasta manga hasnog kaaywanon fag manga taw kanbali bilang sadi dik hasnog, bilang wa tarapsakan danom gis tongod tiwan, no gambahan kito was dalogdog ganingalan wan, fiya wa donggon. Taglwang, Tam fag fasayagdog hanya maskin intam Diyos hanggan kagfon intam kadwa ha bosal, inbali wa hari. ⁷ Tam fag baya, fag kasolong wan. Tam fag fasayagdog in Diyos kadaholan, Maskin ka Anak Topa kaakbang wa kababay. It fakasayaon ina nandayagan, ⁸ nasolong rotay kaabohayon, malinay ya ngadi. Ka rotay abohay kawan Diyos manga nafili it manga naogali fiya. ⁹ Ginya ka anghil nafwayong angko, Soratan to, Kasta manga nasabang kaarakitay omofod yadi has Anak Topa nafatalaga fanganon has fangsawan, bomaya wan. Nadogang yat hampang, nalwang kitay, To orongan wan in Diyos manga hampang. ¹⁰ Ginya ho nanlibabaan san anghil atobangan kaarakitay masayagdog hanya, dapat hanya nalwang hangko, Fag idwa hangko haw nogfasayagdog, aho it sogowan yadi, kito yadi hyamo, hanggan kito kam manga fadwasay kagfaorongan kawa han Hisos. Fag is Diyos ka hyamo fagfasayaon igdog. Maskin ka fakaorongan sawan Hisos hanggan fagayo in Diyos manga fangampang nafwayong hanggan nasorat, sinyan wa kan-anod san Hisos. ¹¹ Ginya madi ho nalag kitay in Diyos banwanan sam tongod maboklasan wan. Ginya ho nalag sadik habayo abohay. Ka masahayan sinyan it ngayan is Matanogon, hanggan is Orongan maskin sawas fakafiyan hanya noglaban hanggan nogfathoyan ista fadosaan. ¹² It manga mata bilang wa afoy gigang. Aywan kasta nafasangbaw hat baba alfoyo. It ngayan insorat yadi sat boknga habilogan, dapat hanya lamang ka twa no kanat ngayan kansorat sinyan. ¹³ It rotay di foloton wan. Manga taw igngayan hanya in Diyos Hampang. ¹⁴ Ka manga tifonan sondalo gin Diyos banwanan sam tongod gofod hanya sat ginanan, masahayan yadi sas baba manga habayo abohay. Ista manga rotay myasa wa abohay, malinay ya ngadi. ¹⁵ Sadik talibong matayom inbangkad yadi git basad bibig, it fanlaban has manga layonan daga dahol. Hanya no bomahala has taw it karigonan gamat bilang wa baol. Hanya fabolos gis fanlidan obas ka alak gin Diyos, kadwa ha bosal, kawan Diyos mahori fag kaisogan. ¹⁶ Insorat sat manga rotay hanggan boknga balangbang ka ngayan, Hari has fagayo fag manga gorangon, hanggan Fon has manga fon. ¹⁷ Ho nalag yadi sadik anghil malindogan sas baba myanit. Ka anghil igtawag ka manga manok kaglayog sas boknga halayawan iglwang, Ham fag hastay, ham fag kabangkad han Diyos dahol fag talagaan fanganon. ¹⁸ Ham fag hastay wan, kaarakitay homwan ka manga gorangon it man-

ga habilogan, manga sondalo, hanggan wat manga fagtahinan, ka manga habayo hanggan ka manga masahayan haraw sinya. Ham hwan wan ista habilogan fagayo fag manga taw, nyawa kasta sogowan, nyawa ka bohonwan, nyawa kadwa ha kangayanan, nyawa ka ha kangayanan. ¹⁹ Ginya madi ho nalag ka hayopan maisog, ka mandi ka ha baran kanfakdat wan, hanggan ka manga gorangon istay is baba daga, hanggan wat manga ofod sondalo intifon ya, kaarakitay lomaban ka masahayan baba habayo abohay, hanggan hat manga ofod sondalo. ²⁰ Dapat ay, ta nagamat ka hayopan maisog. Ta nagamat yadi ka fangampang bohagon ka naibolon manga madolaw sas hayopan maisog faglagan. It manga naibolon madolaw kat fandaya has manga taw, ka manga taw ka ha akwa ka maisog fag hayopan tanda hanggan ka-glohod hat tolad. To fagayo dowan in-okas boyagan has basad linaw asopri gigang. ²¹ Ka masahayan baba habayo it talibong ka famahatay ka hayopan maisog manga sondalo. Ka manga manok fadi wad nahwan, idyadi wa namin ista manga habilogan ka natay.

20 Ginya madi ho nalag sadik anghil igdokson gin Diyos banwanan sam tongod ha bitbit kadina dahol hanggan sosi has ohang idwa ha saragan. ² Ka anghil nagamat ka daragon, ka yapdista nangayan Abyanon hyabi hyabi, kawas Fandaya, it ngayan is Satanas. Ka anghil nagafos hanya, ginya madi is Satanas magafosan 1,000 fangaraw. ³ Ginya madi ka anghil naokas hanya hawas basad ohang daga kadwa ha saragan, ginya madi natahop a, nafwalid tanda sas boknga faganitan sosi kaarakitay idwa malfas, idwa syagan domaya domwag ka manga taw istay sas baba daga nodyam sagaya 1,000 fangaraw. Nomsagaya tonya fag 1,000 fangaraw, ta fag fomalfas ya in Satanas sadik ngalay. ⁴ Ginya madi ho nalag manga tokawan fanokawan gorangon hanggan ha nadisag ka manga matokawan sinya kangayanan. Ho nalag yadi kasta falad kasta nalifong hyabi it manga liyog, kawa nogfaorongon han Hisos hanggan igfadog in Diyos hampang. Tadwa nalohod has hayopan maisog, nyawa hat tolad. Tadwa yadi nafaangay kitay fag ha tanda gis maisog fag hayopan sasta boknga angas, ngatay boknga gamat. Is Diyos nafaboyag ya tonya fag manga taw kaarakitay gofod in Kiristo ha kangayanan balis 1,000 fangaraw it kadogayan. ⁵ To ka manga gona fag natay kanboyag ya gis kahatayan. Is Diyos faboyag ya yadi aban ka tiba fag manga natay, nomsagaya 1,000 fangaraw. ⁶ Maliyaw ka mangan aktom has manga gona fag imboyag ya gis kahatayan maliyaw, hanggan ta bomaya yadi wan. Ka fadowa fag kahatayan idwa syagan domaog tonya fag manga taw. Tambali in Diyos manga fagalan hanggan in Diyos-natogon-Famawi it manga fagalan, ta mangofodan yadi han Kiristo, bomahala has taw balis 1,000 fangaraw.

⁷ Nonsagaya 1,000 fangaraw, ta fomalfas ya in Satanas. ⁸ Hanya domaya ya ka manga taw istay is baba daga, kawa ka taga Gog hanggan Magog it fagdayaon sas ofat ik fongfongan daga manga layonan banwanan. Is Satanas tomifon it manga sakop kaarakitay lomaban wan. In Satanas ofod sondalo kayowas onay dagat. ⁹ Ta nanarowayan wan ha sadik baba daga a, naligong in Diyos manga nafili nahalig alad fanaktak ista kalaban, naligong yadi in Diyos faganoon banwa. Dapat ay, ha akwa afoy inbangkad gin Diyos banwanan sam tongod a, nafayagaw was taw. ¹⁰ Ginya madis Fandaya kagdaya has taw in-okas wan, hawas basad linaw afoy hanggan asopri, hayadin anghil nagokasan in hayopan maisog, hanggan ka manga fangampang bohagon. Ta fagayo mangofodan wan domog mahori yabi sirang, hanggan aban aban.

¹¹ Ginya madi ho nalag sadik dahol fag tokawan fanokawan gorangon abohay, ho nalag yadi ka matokawan sinya. Ka daga hanggan ka banwa sam tongod inliyam wa kitonya git faglagan ka matokawan sinya, idwa hanlag domwag. ¹² Ginya madi ho nalag ka manga natay hyabi, nyawa ka manga ha kangayanan, nyawa kadwa ha kangayanan, malindogan sas tokawan fanokawan gorangon akbang. Ta naboklas ka manga listahan. Naboklas yadi ka sadi yak listahan, ka listahan manga taw ka ha haboyagan. Ginya ta no nafatohoyan ista hadasogan ka manga natay, kawasta manga naogali, no kinda kansorat sas listahan. ¹³ Ka dagat nafabangkad ya ka manga natay sas basad dagat. Ka kahatayan hanggan ka Daga Salad nafa-bangkad ya ka manga natay ka sinya. Kitonya yadi ta no nafatohoyan ista hadasogan kawasta manga naogali. ¹⁴ Ginya madi ka kahatayan hanggan ka Daga Salad in-okas ha basad linaw afoy. To fag linaw afoy kawat fadowa fag kahatayan. ¹⁵ Nyawa faktaw kat ngayan kadwan sorat sas listahan manga taw ka ha haboyagan, ta naokas wan ha basad linaw afoy.

21 Ginya madi ho nalag ka bago fag banwa sam tongod, hanggan ka bago fag daga. Ka gona fag banwa hanggan daga inliyam wan. Ka dagat fayadi wa ha akwa. ² Ho nalag yadi ka banwa kantohoyan han Diyos wa malayon, kawa bago fag Hirosalim, kadokson gis banwa sam tongod, giwan Diyos, kitos sadik ina kaginan wa hat fangsawan, nandayagan wan, kawa managbo wan kat fakasayaon ama ka bomabay hanya. ³ Ho ha donggon sadik hasnog marigon gis tokawan fanokawan gorangon, nalwang, Kati in Diyos oliyanan sawas manga taw fagbokngan. Is Diyos bomanwanan sasta akbang, gofodan yadi was taw, tambali in Diyos wa sakop fag manga taw, hanyam bali wasta Diyos. ⁴ Is Diyos fomyad ista manga lowa fagayo. Idwa ha kahatayan domwag, yakanga idwa karongkot ista fangayofan. Idwa ha fagorawon, idwa yadi kasagit, kawa ka manga bagay gona inliyam wan.

⁵ Ginya madi ka matokawan sas baba tokawan fanokawan gorangon nalwang kitay, Kati ahog fabago ya fagayo fag manga bagay. Nafwayong ya domwag angko, Ha fag sorat to fag manga hampang maskin fiya wa fagsyagon, orongan yadi wan. ⁶ Nafwayong yadingko, Kati in-anod wa fagayo. Ahos Alfa hanggan ahos Omiga, aho ka fabagowanan hanggan ka katabowanan. Nyawa faktaw ka kainom, ho domisag danom kadwa ha bayad, gis bolbogan kagdisag haboyagan. ⁷ Kagdaog has kadwatan, tonya wat tangapon, hanggan ahom bali wat Diyos, hanyam bali yadi wangko anak. ⁸ Dapat ay, isyay wan, mahori wa dahol ista lagon aban ka manga madalaon wa dahol dahol, ka mangadwa katiwala, ka manga fagaba has sitam sitam it ogali, ka mangag libon taw, ka mangag fabayowan, ka ha fagsyagon gis iba kadonongan, kagsimba has manga tolad, hanggan fagayo ka manga bohagon. Tonya fag manga taw fagayo hawas linaw asopri, igang digrabog wan. Tonya wa kat fadowa fag kahatayan. ⁹ Kat fafito fag anghil ka ha bitbit yadi sadik fingga mangkok, kawat fafito fag kahoriyan has manga taw, naakbang hangko, nalwang, Ha fag hastay, ho falag hyamo ka ina ka omindogan has Anak Topa. ¹⁰ Ka Maliyaw fag Falad naboklas angko fangayofan, ginya sadik anghil nataban angko ha sadik baba moyod abwat abwat, nafalag angko ka banwa Hirosalim, ka banwa kanbokod han Diyos, kadokson gis banwa sam tongod, giwan Diyos. ¹¹ In Diyos kafiyan fagayo sinya wan. Masilaw wan kitos bato haspi, kitos manga matikyias maliyaw wa dahol. ¹² It alad madamol a, abwat. It sakbawan safolo ha dow, talafod sakbawan ha bantay anghil. In Israil manga hasokfonan safolo ha dow it manga ngayan insorat sas boknga manga tahop sakbawan. ¹³ Tolo ka balis salogan myanit, myasa wa tolo baliw baliw balitangan, tolo yadi balis sangdayan myanit. ¹⁴ Ka alad ha safolo ha dowak torok bato it fagriganon, hanggan ka Anak Topa it safolo ha dowak Fandiya-Barita ka gona man tiba, ista manga ngayan insorat sinyas boknga torok bato. ¹⁵ Ka anghil ka kampang hangko ha bitbit fanokat ginto kaarakitay somokat ka banwa, it manga tahop sakbawan hanggan it alad. ¹⁶ Myasa kaban ya ka banwa kadaholan hanggan it kaaban. Ka anghil nasokat ka banwa. It kaaban hanggan it kadaholan hanggan it kaabwatan myasa wa dahonya, 24,000 ik liho. ¹⁷ Ka anghil nasokat yadi ka alad, ofat ik safolo h sadik dofa it kaabwatan, ka anghil nogsokat it diya fanokat. ¹⁸ Ka alad bato haspi wan, ka banwa sonson wa ginto idwa ha aktom iba, maliyaw wa kitos salamin. ¹⁹ Ha akwa fagayo fagayo fag manga bato ka fiya kabantay, matokban sas torok bato ka fagriganon alad. Ka gona fag bato kawa haspi, malatoy fag bato ha aktom bilang ginto, ka fadowa sapiro, malatoy fag bato, maliyaw yadi, kat fatolo kalsidonya, malatoy fag bato dapat masi-

nay, kat faofat ismiralda, sadik bato malatoy wa dahol dahol. ²⁰ Kat falima, onisi, sadik bato igsoglatan sayo dararag, sayo abohay, kat faonom, kornalina, sadik bato boragaw boragaw, kat fafito, kirisolito, sadik bato bilang wa loto soli it kadararagan. It fawalo birilo, kitos dagat it kahasdingan, it fasiyam topasyo, boragaw wa dahol dahol, kat fasafolo kirisopiras, sadik bato bilang wa kaliboyong it kalatoyan. It fasafolo ha sadi, hasinto, sadik bato bilang wa obi dongon it kahasdingan, ginya madit fasafolo ha dow, amatista, sadik bato bilang obi dongon yadit kahasdingan. ²¹ Ka safolo ha dowak fanahop sakbawan sonson inhalig gis basad boga sihi. Gi sadik boga sihi ka sadik fanahop nonhalig. Ka manga karsada basad banwa inhalig ginto wa malayon, maliyaw wan, kitos salamin. ²² Hodwa ha lagan Fanimbaan-Dahol sinya fag banwa, maskin is Diyos kadwa ha bosal, kagfon intam, hanggan ka Anak Topa, tonya wa ka Fanimbaan-Dahol sinya. ²³ Tam fawa ha fakasayaon manga magdanon, manga myanit kitay igfayawa tonya fag banwa, maskin in Diyos kafiyan kagfayawa sinya hanggan ka Anak Topa intam wa salong. ²⁴ Tonya fag yawa kagfayawa has fagayo fag manga dahol fag layonan daga ka manga taw noglahaw sinya. Hanggan ka manga gorangon sas baba daga domiya yadi sinya basad banwa, it manga kaakwaan. ²⁵ Ka manga fanahop sakbawan banwa maboklasan fagaba sadi wak sirangan maskin fawa ha yabi sinya. ²⁶ Ta domiya ka kaakwaan hanggan kangayanan gis fagayo fag manga dahol fag layonan daga hanya basad banwa. ²⁷ Dapat ay, nyawa kana ka sitam san Diyos faglagan, hanggan kasta manga ogali mahaya kalag, hanggan ka manga bohagon idwa somakbaw sinya. Ka lamang ista manga ngayan kansorat san Anak Topa listahan ka manga taw ka ha haboyagan ka somakbaw sinya fag banwa.

22 Ginya madi ka anghil nafalag angko sadik safa kagdisag haboyagan. Tonya fag danom maliyaw kito was matikyias, igbolbogan gin Diyos hanggan ka Anak Topa tokawan fanokawan gorangon. ² Ginya madi igbolos has boknga manga karsada sinya basad banwa. Bali bali safa ha fon hayo kagdisag haboyagan. Magdanon di magdanon di igbohad wan. It manga labong igfiya yadi sagit sas manga dahol fag layonan daga. ³ Hadwa ha lagon sinya nyawa kana kan Diyos nafatohoyan has kadwatan. Dapat ay, kam lagon sinya aban in Diyos hanggan ka Anak Topa tokawan fanokawan gorangon hanggan it manga fangibolon mamasayagdog hanya. ⁴ In Diyos manga fangibolon lomag wa aba in Diyos mata, in Diyos ngayan imsorat yadi wa aba sasta manga boknga angas. ⁵ Idwa ha yabi domwag, tadwa ha fakasayaon manga salong, manga yawa gis myanit, maskin kawas Diyos kagfon intam imbali wasta yawa hanggan tambali ha kangayanan igbahala hanggan has aban aban. ⁶ Ginya

madi ka anghil nalwang hangko, To fag manga hampang fiya wa fagsyagon, orongan yadi wan. Is Diyos kagfon intam ka nafaisip it manga fangampang, hanya yadi ka nasogo it anghil kaarakitay fadog hat manga fangibolon ka manga bagay ka kaakbang wamlag aban. ⁷ Is Hisos iglwang, Ham fag danwa matalingan, ho kaakbang wa kadasog. Kagfaanod ka manga nagona wa nafwayong istay fag famasaan bomaya wan. ⁸ Ahos Hwan ka nadog hanggan nalag to fag manga bagay fagayo. Aho, nonsagaya wagtalinga hanggan igbantay has fagayo, ho nanlibabaan san anghil akbang, ka nafalag angko to fag manga bagay kaarakitay mamasayagdog hanya. ⁹ Dapat ay, ka anghil nalwang, Balaw kitonya, ahot sogowan di kito yadi hyamo, kito yadi wam manga fadwasay fangampang hanggan kito yadis fagayo kagfaanod ka manga hampang kansorat istay fag famasaan. Fag is Diyos ka hyamo fagfasayaon igdog. ¹⁰ Ka anghil nafwayong yadingko, Haw fag idwag fyalom kansorat istay fag famasaan kamlag aban, maskin to fag manga bagay kaakbang wamtonglos. ¹¹ Ka dwat igfadagos has dwat, ka has hayan igfadagos has hayan. Dapat ay ka has fiya igfadagos wa has fiya, hanggan ka maliyaw it fangayofan igfadagos wa maliyaw yapdi. ¹² Is Hisos iglwang kitay, Ham fag danwa matalingan, ho kaakbang wa kadasog. Ho danwa ha diya manga fasalamat, ho fahafod wa domisag ha sadi ha sadi kawasta naogali. ¹³ Ahos Alfa hanggan is Omiga. Aho ka nagona hanggan kamgoyan. Aho ka fabagowanan hanggan ka katabowanan. ¹⁴ Ka mangag falinay it manga rotay bomaya wan maskin is Diyos igfaangay kitay ta fag somakbaw has nwa basad banwa, homwan yadi

ka bohad hayo kagdisag haboyagan. ¹⁵ Dapat ay, imgoyan di sas dayo banwa ka manga taw it ogali bilang odi ido, ka manga ha fagsyagon gis iba kadonongan, mangag fabayowan, ka mangag libon taw, ka mangag lohod has manga tolad, ka manga bohagon it manga hampang hanggan ogali. ¹⁶ Ahos Hisos ka nasogo angko anghil kaarakitay fadog to fag manga bagay ha hayo, ka sawas manga Tifonan. Aho gin Dabid hasokfonan. Aho ka faramnag dayo kayawa. ¹⁷ In Diyos Maliyaw fag Falad hanggan ka ina ka kaakbang kaindogan iglwang, Fag hastay wan. Fagayo kagtalinga tonya fag manga hampang iglwang yadi, Ham fag hastay wan. Nyawa faktaw ka kainom, ham fag danwa gakbang, ka kasaya wan, fag danwag bol ka danom kagdisag haboyagan, todwa ha fagbayadon. ¹⁸ Ahos Hwan kagfatagak has manga taw kitay, nyawa faktaw kagtalinga kansorat istay fag famasaan, ka manga bagay kamlag aban, dapat igfalabi kat nafwayong istay fag famasaan, nogtoltol is taw, is Diyos domogang yadi hanya ka manga kahorihan has taw kansorat istay. ¹⁹ Kitonya yadi, nyawa faktaw nogbohin nyawa kana fag bagay kansorat istay, manga bagay kamlag aban, is Diyos bomol yadit ngayan gis listahan ka manga fiya homwan ka bohad hayo kagdisag haboyagan, hanggan bomohin it ngayan gis listahan ka maangay somakbaw has banwanan kanbokod han Diyos kanowas istay fag famasaan. ²⁰ Kagfaorongon to fag manga bagay fagayo iglwang, Matohoyanan ho kaakbang wa kadasog. Fadi wan, fag kitonya wa ngay, Hisos, kagfon hyami, fag imdasog wa ngay hastay. ²¹ Ham nangos fag domog kitay is Kiristo Hisos kagfon intam mahoway ha hayo fagayo. Fag kitonya wa ngay.